

# Dill' wen dill' Kob Çhe Jesucrístona'

Cajonos Zapotec New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](https://dbs.org/bibles).

San Mateo .....	4
San Marcos .....	35
San Lucas .....	54
San Juan .....	86
Los Hechos .....	109
Romanos .....	139
1 Corintios.....	151
2 Corintios.....	163
Gálatas .....	170
Efesios .....	174
Filipenses .....	178
Colosenses.....	181
1 Tesalonicenses .....	184
2 Tesalonicenses .....	187
1 Timoteo .....	189
2 Timoteo .....	193
Tito.....	196
Filemón .....	198
Hebreos.....	199
Santiago .....	208
1 Pedro .....	211
2 Pedro .....	214
1 Juan.....	216
2 Juan.....	219
3 Juan.....	220
Judas .....	221
Apocalipsis.....	223

# San Mateo

## Dii xoxxto' Jesucrístona' (Lc. 3:23-38)

- 1 Dga cho'en dill' nan Jesucrístona' nake' xiiñ dia che dii Davina' na' dii Abrahama'.
- 2 Abrahama' goke' xa Isaaca', na' Isaaca' goke' xa Jacoba', na' Jacoba' goke' xa Judána' len beñ' bisheeka'.
- 3 Na' Judána' goke' xa Fáreza' len Zárana', na' xñeeka' wlie' Tamar. Na' Fáreza' goke' xa Esróma', na' Esróma' goke' xa Arama'. 4 Na' Arama' goke' xa Aminadaba', na' Aminadaba' goke' xa Naasónna', na' Naasónna' goke' xa Salmónna'. 5 Na' Salmónna' len Rahaba' gokgake' xaxña' Booza'. Na' Booza' goke' xa Obeda' na' xñeena' wlie' Rut. Na' Obeda' goke' xa Isaína'. 6 Na' Isaína' goke' xa Davina', na' Davina' goke' xa Salomónna'. Na' xña' Salomónna', beena' bikaa Davina', goke' xool dii Uríaza'.
- 7 Na' Salomónna' goke' xa Roboama', na' Roboama' goke' xa Abíaza', na' Abíaza' goke' xa Ásana'. 8 Na' Ásana' goke' xa Josafata', na' Josafata' goke' xa Jorama', na' Jorama' goke' xa Uzíaza'. 9 Na' Uzíaza' goke' xa Jotama', na' Jotama' goke' xa Acaza', na' Acaza' goke' xa Ezequíaza'. 10 Na' Ezequíaza' goke' xa Manaséza', na' Manaséza' goke' xa Amónna', na' Amónna' goke' xa Josíaza'. 11 Na' Josíaza' goke' xa Jeconíaza' len beñ' bisheeka', legaken' zoa kana' bche'byen beñ' Babilóni-aka' beñ' Israelka' lalle'ka'.
- 12 Na' shlak ni zoagake' Babilóniana' golj Salatiela' xi-ñ Jeconíaza', na' Salatiela' goke' xa Zorobabela'. 13 Na' Zorobabela' goke' xa Abiuda', na' Abiuda' goke' xa Eli-aquima', na' Eliaquima' goke' xa Azora'. 14 Na' Azora' goke' xa Sadoca', na' Sadoca' goke' xa Aquima', na' Aquima' goke' xa Eliuda'. 15 Na' Eliuda' goke' xa Eleazara', na' Eleazara' goke' xa Matánna', na' Matánna' goke' xa Jacoba'. 16 Na' Jacoba' goke' xa Joséna' beñ' che Maríana', xña' Jesúsza', beena' lezkza' nsi'gake' Cristo.
- 17 Na' ka' gok wzoa shda' diaka' wzololenzan dii Abrahama' na' biyoll-lenan dii Davina'. Na' wde zi shda' diaka' bizzololenan dii Davina' axt ka bche'byengake' beñ' Israelka' Babilóniana'. Na' wizak zi shda' diaka' biz-zolon ka bche'byengake' legake' Babilóniana' axt ka wzoa Crístona', beena' bseñ' Chioza' inabi'e.

## Ka golj Jesúsza' (Lc. 2:1-7)

- 18 Ki gok ka golj Jesucrístona': Xñee Maríana' ba nakan ikaa Joséna'ne', na' ka zi' soalene'ne' bi'e, la' Espíritu Santo che Chioza' bene' kwenche bi'e. 19 Na' José-

na' beena' ba nakan ikeene', nake' to beñ' chon ka cheeni Chioza', na' daa bi goklallee wsi'e Maríana' yel' zto' gokile' choonlalleene' ka kono gakbe'i. 20 Na' shlak chza'lallee gone' dga, to anjl che Xancho Chioza' bli'lawe' le' lo bishgal che'na', na' chi'ene':

—José, xiiñ dia che dii Daví, bi illebo' ikoo Maríana' daa ba no'e, la' Espíritu Sántona' bene' kwenche bi'e. 21 Na' sane' to bi' byodo' na' wsi'ob' Jesús, la' leban' yis-lab' beñ' yell cheb'ka' lao saaxya che'ka' kwenche bi kwiayi'gake'.

22 Gok yog' diiki kwenche gok ka wna dii beena' wdix-jee daa goll Chioza'ne', chi'e:

23 To nool wew' wee, na' sane' to bi' byodo', na' wsi'gake'b' Emanuel.

Na' Emanuel zejín: Chioza' zoalene' cho'.

24 Na' ka biban Joséna', bene' kon ka goll anjl che Xancho Chioza'ne' na' wkee Maríana'. 25 Na' bi wdelle'ne' axt ki wxanche' bi'do'na', na' bsi'eb' Jesús.

## Wyaj beñ' sin'ka' jawiagake' Jesúsza'

2 Jesúsza' golje' yell Belénna', daa Iliá gana' mbani Judeana', kana' chñabia' Heródeza'. Na'ch bañ beñ' sin', beñ' nsed che beljka', za'gake' ka de gana' chla'lə wbillə, bliintegake' Jerusalénna'. 2 Na' che'gake':

—¿Gañ rey che beñ' Israelka', bi'na' ba golj? Nezinto' ba goljb' la' ka de gana' chla'lə wbillə ble'into' to belj dii bzajniin neto' nan ba goljb', daan ba za'nto' kwenche we'la'onto'b'.

3 Na' ka beni Heródeza' daa wnagake', gokshejlallee, na' lezkza' yog'loñ beñ' Jerusalénka'. 4 Na'ch Heródeza' goxe' yog'loñ bxozka' chñabia', na' beñ'ka' chli' chsedi ley che dii Moiséza', na' wñabile' legake' gan chiyañ galj Crístona', beena' wsel' Chioza' inabi'e. 5 Na'ch goll-gake'ne':

—Yell Belénna' daa mbani Judeanan' galje', la' kan' bzej to beñ' wdixjee daa goll Chioza' le', chi'e:

6 Na' li', yell Belén Ilio' gani mbani Judeani, aga inacho nako' dii liizelozí bibi zakii ladj yellka' zakii Iliá Judeani;

la' lawo'ni ichej to beñ' inabi'e, na' gap wwie' beñ' Israelka', beñ'ka' nak yell cha'.

7 Na'ch Heródeza', ka kono gokbe'zi goxe' beñ' sin'ka' na' wñabile' legake' batyey'an ble'gakile' belja'. 8 Na'ch bselee legake' Belénna' na' golle' legake':

—Li shaj, na' li ljadiljyoll bi'do'na', na' kat' yillelileb' na' yidñale nad' kwenche len' sha' lje'lawaab'.

9 Na' ka biyoll goll Heródeza' ka', na'ch wza'gake'. Na' belja' daa ble'gakile' kana' zi' sa'gake', zejan xan ya-

bana' llialon lawe'ka', na' ka bllinan gana' zoa bi'do'na', na' na'zə wzoan. <sup>10</sup> Na' ka bizle'i beŋ' sin'ka' belja', le bibagakile'. <sup>11</sup> Na'ch ka wyoogake' loo yoonā' ble'gakile' bi'do'na' len xŋa'b' Marīana'. Na'ch bçhek' xibe'ka' na' be'la'ogake'b'. Na' wlejgake' or, na' yal zix, na' lekzka' len nill' çhe to yag dii chla' zix daa le mirra, na' be'gake'n çheb'. <sup>12</sup> Ka biyoll be'la'ogake'b', Chioza' bsi'nile' legake' lo yel bishgal çhe'ka' kwençhe bich yidegake' gana' zoa Heródeza'. Daan, bikaagake' nez yoblə ziyajgake' lalle'ka'.

### Bxonjgake' wza'gake' Egíptona'

<sup>13</sup> Ka wde biza' beŋ' sin'ka', to anjl çhe Xancho Chioza' bli'lawe' Joséna' lo bishgal çhe'na' chi'ene':

—Wyas, na' bçhe' bdo'na' len xŋa'baa na' li shaj gana' mbani Egíptona'. Na' na'z soale axt kat'ch inia' li' yiza'le. La' Heródeza' yiyilje' bdo'na' kwençhe wite'b'.

<sup>14</sup> Na'ch lii wyaste Joséna' na' bçhi'e bdo'na' len xŋa'baa, na' wał-lə wza'gake' zejleŋgake'b' gana' mbani Egíptona'. <sup>15</sup> Na' wzoagake' na'zə axt ka bllin lla wit Heródeza'. Na' daa gok ka', gok ka goll Xancho Chioza' to beŋ' wdixjee daa golle'ne', kana' wne': "Nad' biŋia' bi' çha'na' kwençhe biza'b' gana' mbani Egíptona'."

### Ben Heródeza' mandad witgake' bi'do'ka'

<sup>16</sup> Na' ka gokbe'i Heródeza' bi ben beŋ' sin'ka' ka golle' legake', le bllee. Na' bene' mandad witgake' yog'loł bi' byodo'ka' lle' yell Belénna' len yellka' ndil nllagan, bdo' cheeŋka' axt bi' çhop yizi, bsakee ka to yizka' ba gok ble'i beŋ' sin'ka' belja'. <sup>17</sup> Na' daa bengake' ka', gok daa wna dii Jeremíaza', beena' wdixjee daa goll Chioza' le', ka wne':

<sup>18</sup> Kwe' wbell na' gakyeshii beŋ'ka' lle' yella' le Ramá. Noolka' nak xiŋ dia çhe dii Raquela' ni to kono cheengakile' gonxenlall' legake', daa wit bi'do' çhe'ka'.

<sup>19</sup> Na'ch ka wde wit Heródeza', to anjl çhe Xancho Chioza' bli'lawe' Joséna' lo yel bishgal çhe'na' shlak ni zoe' Egíptona', na' chi'ene':

<sup>20</sup> —Wyas, biçhe' bi'do'na' len xŋa'baa na' li yiyaj gana' mbani Israela', la' ba wit beŋ'ka' cheengakile' witgake'b'.

<sup>21</sup> Na'ch wyas Joséna' na' biçhi'e bi'do'na' len xŋa'baa na' biyajgake' gana' mbani Israela'. <sup>22</sup> Na' ka wnezi Joséna' Arquelawa' ba chŋabi'e lo laz dii xe' Heródeza', na' bllebe' yiyajgake' Judéana'. Na' Chioza' wdixje'ile'ne' lo yel bishgal çhe'na' yiyajgake' gana' mbani Galileana'. <sup>23</sup> Na' ka billingake' Galileana' jazoagake' yell Nazareta'. Na' daa jazoagake' na', gok ka wna dii beŋ'ka' wdixjee daa goll Chioza' legake' kani'yi çhe Jesúza', wnagake' wsi'gake'ne' beŋ' Nazaret.

### Juanna', beena' bchoa beŋ' nisa'

(Mr. 1:1-8; Lc. 3:1-9, 15-17; Jn. 1:19-28)

**3** Na' do kana', Juan, beena' bchoa beŋ' nisa', wyaje' to latj gana' bibi chashj chleb' gana' mbani Judeana', na' wdixje'ile' beŋ'ka' chdi'a chllag na', <sup>2</sup> chi'e:

—Li yiyaj yileni dii malka' chonle, la' ba bllin lla inabia' Chioza', beena' zoa yabana', loo yichjlall'do'lena'.

<sup>3</sup> Na' dii Isaíaza', beena' wdixjee daa goll Chioza'ne', wne' çhe Juanna':

To beŋ' gosyee to lo latj ga bibi chashj chleb, na' ine': "Li se kwas wzenagle çhe Xanchona' na' wsalj yichjlall'do'leka' kat' zee."

<sup>4</sup> Na' Juanna' bene' xe'na' de xa kamey, na' nçhej lsi-neena' to yid. Na' wdawe' bish'zo len shin baser daa de lyixaa. <sup>5</sup> Na' beŋ'ka' lle' yell Jerusalénna', na' doxen gana' mbani Judeana' na' yellka' lliā gaoz yao Jordánna' jazenaggake' dillaa cho'e. <sup>6</sup> Na' biçoadol'gake' saaxya çhe'ka', na' bchoa Juanna' legake' nisa' loo yao Jordánna'.

<sup>7</sup> Na' ka ble'i Juanna' zan fariseoka' na' saduceoka' bllingake' lawe'na' kwençhe wchoe' legake' nisa', na' golle' legake':

—iLe' naklikzle ka bel zŋia! çAchakile wak wxonjile' yel' zak'zi' daa wsel' Chioza'? <sup>8</sup> Li gon ka gakbe'i beŋ' nan dii li ba biyaj bilenile. <sup>9</sup> Na' bi gakzile bibi yel' zak'zi' ile'ile daa inazle: "Neto' naknto' xiŋ dia çhe dii Abrahama'." Dii li nia' le', axt yajki wak gon Chioza' xiŋ dia çhe dii Abrahama'. <sup>10</sup> Yog'loł-le shi bi chonle ka chiyoolallii Chioza' na' gak çhele ka chak çhe to yag dii chbia dii zix dii bi chak wen, na' lii chçhogtegake' axt xanin na' chzal'gake'n lo yi'na'. <sup>11</sup> Dii li nad' chchoa' le' nisa' daa chiyaj chilenile, per beena' zi' za' kollaana' napche' yel' wak xench ka nad', na' ni bi zakaa' gak xmosé' kwençhe galj' xe'le'na'. Len' gone' ka yidsoa Espiritu Sántona' loo yichjlall'do'lena', ka le' chiyaj chilenile, na' beŋ'ka' bi chiyaj chileni wzalee legake' lo yi' gabiła'. <sup>12</sup> Na' gone' çhe beŋ' yell-lioni na' chon beena' nox' yag xozaa daa chpa'ile' trígona' na' kooshawee trígona' na' wzeye' beb çheyinna' lo yi'na' daa biga yiyolkzə.

### Jesúza' wchoe' nisa'

(Mr. 1:9-11; Lc. 3:21-22; Jn 1:31-34)

<sup>13</sup> Na'ch wza' Jesúza' gana' mbani Galileana' wyaje' cho'a yao Jordánna' kwençhe wchoa Juanna'ne' nisa'. <sup>14</sup> Na' ka blline', bi nan cheeni Juanna' wchoe'ne' nisa', san chi'ene':

—Li'lan chiyal' wcho' nad' nisa', na' li'lə za'zo' kwençhe wchoa' li' nisa'.

<sup>15</sup> Per Jesúza' golle'ne':

—Ben goklen bchoa' nad' nisa' la' chiyal' goncho ka nak daa nllia Chioza' bia' goncho. Na'ch bchoe'ne' nisa'.

<sup>16</sup> Na' kon ka biyoll bchoe'ne' nisa' lii bichejte Jesúza' loo nisa' na' lii byaljte yabana' na' ble'ile' Espiritu çhe

Chioza' chetje' ka to palom na' jsoalene' le'. <sup>17</sup> Na'ch bengakile' shii Chioza' zoa yabana' chi'e:

—Beenin nake' Xiin', beena' chakid', na' le chibaid' le'.

**Goki dii xiwaa gonan ka wzenag Jesúza' cheyin**

(Mr. 1:12-13; Lc. 4:1-13)

**4** Na'ch Espíritu che Chioza' bchi'e Jesúza' to latj ga bibi chashj chleb na' dii xiwaa goklalliin kooyela'n le' gone' ka cheenin.

<sup>2</sup> Na' ka wde choa lla choa yel bibi wdawe', na' wdone'. <sup>3</sup> Na'ch bliin dii xiwaa kwite'na' gollan le':

—Shi leilo' nako' Xiin' Chios, ben ka yiyak yajki yetxtil.

<sup>4</sup> Na'ch goll Jesúza':

—Cho'a xtill' Chioza' nan: "Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban."

<sup>5</sup> Na'ch dii xiwaa bche'n le' Jerusalénna' daa nak yell che Chioza' na' bjeapan le' yichj yoodo'na' gana' nak sib wal. <sup>6</sup> Na'ch gollan le':

—Shi leilo' nako' Xiin' Chios, lla bixit'shki ni. La' Cho'a Xtill' Chioza' nan:

Wselee anjl che'ka' gap wwiagake' li', na' gox'gake' li' kwenche ki koo wchewo' yajka'.

<sup>7</sup> Na' goll Jesúza' len:

—Lekzka' na Cho'a Xtill' Chioza': "Bi wzo' Chioza' gone' daa nazan cho' kwencheza' xenlalloo shi gone' ka ba wne'."

<sup>8</sup> Na'ch stokzə bizche' dii xiwaane' to lo yaa sib wal na' bliin le' yog' yellka' lle' yell-lioni na' yel' zakii cheyin-ka'. <sup>9</sup> Na' gollan le':

—Yog' diiki chle'ilo' gon' li' shi wchek' xibo'na' we'la-woo nad'.

<sup>10</sup> Na'ch goll Jesúza' len:

—Biyaj, Satanás, la' Cho'a Xtill' Chioza' nan: "Be'la'o toz Xano' Chioza' na' kon daa ine', lennan' gono'."

<sup>11</sup> Na'ch biza' dii xiwaa kwit Jesúza' na' bliin bal' anjlka' be'gake'ne' kon bi byalljile'.

**Wzolo Jesúza' choe' cho'a xtill' Chioza' gana' mbani Galileana'**

(Mr. 1:14-15; Lc. 4:14-15; 5:1-11; 6:17-19)

<sup>12</sup> Ka beni Jesúza' wloogake' Juanna' lillyana', bizee biyaje' gana' mbani Galileana'. <sup>13</sup> Na' bizee yell Nazareta' na' jazoe' yell Capernaúma', to yell xen dii lla cho'a nido'na' gana' mbani yell-lío che dia che dii Zabolónna' na' dii Neftalína'. <sup>14</sup> Na' daa jazoe' na', gok ka wna dii Isáfaza', beena' wdixjee daa goll Chioza'ne', daa wne':

<sup>15</sup> Ka nak yell-lío daa naki che dia che dii Zabolónna' na' dii Neftalína',

daa lla shlaa yao Jordánna', gana' xoa nez daa zej cho'a nido'na'

daa lla gana' mbani Galileana', gana' lle' zan beñ'ka' bi nak beñ' Israel,

<sup>16</sup> beñ'ka' lle' na' gok yichjall'do'eka' shgasj shchol, na' Chioza' ba bselee to beeni' xen lawe'ka'.

Lao beñ'ka' lle' gana' chñabia' yel' wita'

ba chzeeni' beeni' che Chioza'.

<sup>17</sup> Na' wzolo Jesúza' chyixje'ile' beñ' cho'a xtill' Chioza', chi'e:

—Li yiyaj yileni dii malka' chonle, la' ba bliin lla Chioza', beena' zoa yabana', inabi'e loo yichjall'do'lena'.

**Wlej Jesúza' tap beñ' wxen bel' kwenche gongake'ne' txen**

(Mr. 1:16-20; Lc. 5:1-11)

<sup>18</sup> Na' ka zej Jesúza' cho'a nido' che Galileana' ble'ile' chop bish' beñ' wxen bel' chza'l'gake' yixja' loo nisa' chzengake' beja'. Toe' le Simón na' lekzka' nsi'gake'ne' Pedro, na' beena' sto lie' Andrés. <sup>19</sup> Na'ch Jesúza' chi'e legake':

—Li da, dino nad', na' kon ka chonle naa chbejle bel' ki loo nisi, ka'kzan gonle yibejle beñ' lao dii mala'.

<sup>20</sup> Na' ka golle' legake' ka', lii bkwaan'tegake' yixj che'ka' na' zejlengake'ne'.

<sup>21</sup> Na' zi lat'chga wza'gake' bizle'i Jesúza' zi chop bish' beñ', beena' to lie' Jacobo na' beena' sto lie' Juan, beñ'ka' nak xiiñ Zebedewa', lle'gake' to loo barkw chiyonshao'gake' yixja' daa chzengakile' belka'. Na' lekzka' goll Jesúza' Jacóbona' len Juanna' shajlen-gake'ne'. <sup>22</sup> Na' lii bkwaan'tegake' barkwa' len xe'ka' na' janogake' Jesúza'.

**Jesúza' chli' chsedile' beñ' zan**

(Lc. 6:17-19)

<sup>23</sup> Na' wda Jesúza' yog' yellka' lla doxen gana' mbani Galileana', chli' chsedile' beñ' Israelka' gana' chdop chllaggake' choe'llwillgake' Chioza', cho'e dill' wen dill' kob che yel' wñabia' che Chioza', na' biyone' yog' beñ' che'i wde wdeli yillwe'. <sup>24</sup> Na' doxen gana' mbani Síri-ana' wze dill' daa chon Jesúza', na' jwa'gake' yog'lo' beñ'ka' che'i wde wdeli yillwe', beñ' chey chla, beñ' yoo dii xiw', beñ' chaz shon, na' beñ' net ni'a nee. Na' Jesúza' biyone' legake'. <sup>25</sup> Na' beñ' zan inlleb jano le', beñ'ka' lle' yellka' mbani Galileana' na' yellka' mbani Decápoliza', na' beñ'ka' lle' yell Jerusalénna' na' yellka' sto mbani Judeana', na' beñ'ka' lle' yellka' lla shlaa yao Jordánna'.

**Dill'ka' be' Jesúza' lo yaana'**

**5** Ka ble'i Jesúza' beñ' zan ba nogake'ne', na'ch wyepe' to lo yaa, na' wchi'e. Na'ch beñ'ka' nakgake'ne' txen jabig'gake' kwite'na'. <sup>2</sup> Na' wzolo Jesúza' chli' chsedile' legake', chi'e:

**Beñ'ka' zoa mbalaz**

(Lc. 6:20-23)

<sup>3</sup> —Chakomba beñ'ka' chakbe'gakile' chyaljgakile' gaklen Chioza' legake', la' legaken' yillingake' yabana' gana' chñabia' Chioza'.

<sup>4</sup> Chakomba beñ'ka' chbellyesh', la' Chioza' yizoe' le-gake' mbalaz.

<sup>5</sup>'Chakomba beŋ'ka' nak beŋ' gaxjlall', la' wllin lla Chioza' wi'e legake' yell-lioni.

<sup>6</sup>'Chakomba beŋ'ka' chzelall' gakgake' beŋ' li beŋ' shao', la' Chioza' iŋe' nakgake' beŋ' wen lawe'na'.

<sup>7</sup>'Chakomba beŋ'ka' chiyeshii beŋ', la' ka'kzə yiyeshii Chioza' legake'.

<sup>8</sup>'Chakomba beŋ'ka' nxi nyech yichjlall'do'eka', la' legaken' ile'gakile' Chioza'.

<sup>9</sup>'Chakomba beŋ'ka' chon to dii byen soalen ljjwelligake' mbalaz, la' iŋa beŋ' dii ljkzan nakgake' xiŋ Chios.

<sup>10</sup>'Chakomba beŋ'ka' chiya dii chen chle'i daa chongake' ka cheeni Chioza', la' legaken' yillingake' gana' chŋabi'e.

<sup>11</sup>'Chakomba le' kat' chiya dii na beŋ' chele na' chiya dii chongakile' le', na' kat'ka' chiyiljall'gake' bittezə dill' wxiye' chele daa chonjilall'le nad'. <sup>12</sup>Li yiba yizaki, la' yabana' gaple to dii wen dii shao'. La' ka chongakile' le' ŋaa, ka'kzan bchi' bsak'gake' kani'yi dii beŋ'ka' wdixjee daa goll Chioza' legake'.

#### Nakle ka zed' na' ka beeni'

(Mr. 9:50; Lc. 14:34-35)

<sup>13</sup>'Len' nakle ka zedaa ladj beŋ' yell-lioki. Zedaa, shi bich xzi'n, aga wakch yiyonchon xzi' ni bich gak wchinchon, na' chchoonchon gana' wlej wshoshj beŋ' len.

<sup>14</sup>'Len' nakle ka to beeni' ladj beŋ' yell-lioki. To yell dii llia to lo yaa, zit'lə ŋla'n, na' bi ngashaan. <sup>15</sup>Ni biga zoa to beŋ' chxene' kandila' na' chdose'n to dii kwkwaasaan len, san chzoe'n sibə kwenche wzeeni'n doxen loo yoona'. <sup>16</sup>Ka'kzan le', li gon to dii byen gonle daa nak wen kwenche ile'i beŋ' na' we'la'ogake' Xacho Chioza' zoa yabana'.

#### Jesúza' cho'e dill' che ley che dii Moiséza'

<sup>17</sup>'Bi gakzile bid' kwenche yikwas' ley daa bzej dii Moisézan' wa daa bli' bsedi dii beŋ'ka' wdixjee daa goll Chioza' legaken'. Bi nakan ka', san bid' kwenche yiyoll gak yog'loj ka na leya' na' daa bli' bsedi beŋ'ka' wdixjee daa goll Chioza' legake'. <sup>18</sup>Dii li nia' le', shlak biŋ' te che yabana' len yell-lioni, bi init ni shcho'a dill' daa nllia ley che Chioza' bia' gak, axt ki gakch yog'loj daa blie' bia' gak. <sup>19</sup>Daan, nottezə beŋ' chyishje' to daa nllia Chioza' bia' goncho, la'kzi dii bi lliatote, na' shi wliile' beŋ' yoblə gone' ka chone', bitek bi zakee yabana' gana' chŋabia' Chioza'. San beena' gon daa nllia Chioza' bia' goncho na' wliile' beŋ' yoblə gone'n, beenan' gake' to beŋ' zakii yabana' gana' chŋabia' Chioza'. <sup>20</sup>Na' nia' le', aga wak yillinle gana' zoa Chioza' chŋabi'e shi toz ka chonlenle fariseoka' na' beŋ'ka' chli' chsedi leya', chiya' wzenagchle che Chioza' aga ka legake'.

#### Bi chiya' wito beŋ'

(Lc. 12:57-59)

<sup>21</sup>Na' lekzka' che' Jesúza' legake':

—Nezkzile goll dii Moiséza' dii xozxto'choka': "Bi chiya' wito beŋ'. La' beena' wit to beŋ' chiya' guete' daa bene' ka'." <sup>22</sup>Per nad' nia' le', nottez beena' chllie

bish' ljjwelle'na' chidojee tie' lo ye' zak'zi'na'. Na' lekzka' beena' chzoazi'yee bish' ljjwelle'na', beŋ'ka' chŋabia' chiya' wwiagake' nak gongake' che'; na' beena' chŋie' bish' ljjwelle'na' dill' zibia', chidojee wza' Chioza' le' lo yi' gabi'la'.

<sup>23</sup>'Daan, shi ka zjoo daa chzanilo' wi'o Chioza' na' ka illino' gana' chzeygake'n lljadinilo' ngoolall' to bish' ljjwello'na' li', <sup>24</sup>na'z bkwaan daa noxoo, zigaate chiya' lljaye'xeno' bish' ljjwello'na', na'tech wak wi'o Chioza' daa chzanilo' wi'one'.

<sup>25</sup>'Shi no cheeni lljtao xya cho' lao joschiska', ben byen yiyoe'xeno'ne' shlak ni de xlatjin. La' shi ba bllino' lao beena' wchogbia' cho', na' gone' li' lo na' beena' wseje' li' lillyana'. <sup>26</sup>Dii li nia' li', aga wibeje' li' lillyana' axt ki chixjo' doxen daa chiya' chixjo'.

#### Bi chiya' inelen ljjwellig beŋ'

<sup>27</sup>'Nezkzile wna dii Moiséza': "Bi chiya' ineleno' nool bi nak nool cho'." <sup>28</sup>San nad' nia' le', nottez beena' chwia to noolə na' chza'lalleene' loo yichjlall'do'ena', daa chone' ka' ba benkze' ka chon beena' zoate xoole'na' na' chŋelene' nool yoblə.

<sup>29</sup>'Shi jalawo' de shjina' chonan ka gono' dii mala', naklan wen wtoljo'n na' choonon'. La' wenchan soa tlaaz jalawo'na' aga ka daa yiyaj doxentio' lo yi' gabi'la'. <sup>30</sup>Na' shi noo de shjina' chonan ka gono' dii mala', naklan wen wchogo'n na' choonon', la' wenchan soa tlaaz noona' aga ka daa yiyaj doxentio' lo yi' gabi'la'.

#### Bi nakan wen yilaa beŋ'ka' nshagna'

(Mt. 19:9; Mr. 10:11-12; Lc. 16:18)

<sup>31</sup>'Nezkzile wna dii Moiséza': "Nottez beena' yilaa nool che'na' chiya' chas to yish we'n dill' nan bilaa-gake'." <sup>32</sup>San nad' nia' le' shi to beŋ' byo yilee xoole'na' la'kzi xoole'na' bi chŋelene' beŋ' yoblə, daa yileene' chone' ka yikaa noola' beŋ' yoblə na' gake' ka to noolə zoalentie' beŋ' che'na' na' chŋelene' beŋ' yoblə. Na' beena' yikee noola' ŋlaa beŋ' che'na', lekzka' chone' ka chon beena' chŋelen xool beŋ' yoblə.

#### Bibi wzoacho de taschiw kat' bin wchebcho

<sup>33</sup>'Lekzka' nezkzile golle' dii xozxto'leka': "Bi kwkwaan-zo' ka'zə daa ba bchebo' lao Xancho Chioza' shi bzoat-io' bi bzo' de taschiw." <sup>34</sup>San nad' nia' le', bibi wzoale de taschiw kat' wcheble lao Chioza'. Bi wzoazle yabana' de taschiw, la' yabana' nakan gana' zoa Chioza'. <sup>35</sup>Na' ni bi wzoale yell-lioni de taschiw, la' nakan ka gana' nzoa ŋi'a Chioza'; na' ni Jerusalenna', la' linnan' yell che beena' chŋabia' doxen. <sup>36</sup>Na' ni bi wzoazle yichjlana' de taschiw, la' aga wak gonle ka yiyak ni to yish' yichjlana' yish' bez' shi nakan dii gasj wa gonle ka yiyakan dii gasj shi nakan yish' bez'. <sup>37</sup>San kon inale "wakan" wa inale "bi gakan", la' shi chzoale de taschiw bichlə wa nochlə, dii malan' chonan chonle ka'.

**Chiyal' gakicho ben'**

(Lc. 6:29-30)

<sup>38</sup> 'Lekzka' nezkzile' wna dii Moiséza: "Shi to ben' wshoshje' tlaa jalawo'na' lekzka' yiyono' che'. Na' shi to ben' wxope' leyo'na', lekzka' yixopo' leye'na'." <sup>39</sup> San nad' nia' le': Bi yizi'o wzon che ben' mala'. Shi no kap' xagoona' tlaa, bi'e daa zi shlaa. <sup>40</sup> Shi to ben' chbagoo dii chbagoo che' na' cheenile' ikee xkamiso'na', be'shaze' lente daa nxa kolloona'. <sup>41</sup> Na' shi to ben' wwee li' yoa' che'na' na' gone' byen woon to kilómetro, wza'lentegan chop kilómetro. <sup>42</sup> Na' nottezə ben' shi bi inabe' cho', be'n. Na' shi no inabi li' wi'one' shloll bi de cho', bi wllonilo'ne'n.

**Chiyal' gakicho ben'ka' chakzbangakile' cho'**

(Lc. 6:27-28, 32-36)

<sup>43</sup> 'Na' lekzka' nezile wnagake': "Goki bish' ljwello'na' na' bwiyi ben'ka' chakzi' chakzbangakile' li'." <sup>44</sup> San nad' nia' le': Li' gaki ben'ka' chakzbangakile' le', li' inabi Chioza' gak wen che ben'ka' chsak'zi'gake' le'. <sup>45</sup> Shi gonle ka', na'ch inezi ben' nakle xiiñ Xacho Chioza', beena' zoa yabana'. La' le' chone' ka chla' wbillā' lao ben' mal na' lao ben' wen, na' chone' ka chak yeja' lao ben' chon wen na' lao ben' chon mal. <sup>46</sup> Na' shi to ben'ka' nllagzile chakile, aga bi zjanayin, la' ka'klen chon ben' wixhixjka' ben'ka' chakile le ben' mal nakgake'. <sup>47</sup> Na' shi to ben'ka' nllagzile chwaple chiox, zgaran de dii wenna' chonle? La' ka'klen chon ben'ka' bi nombia'gake' Chioza'. <sup>48</sup> Li' gak dowalj ben' li' ben' shao' ka nak Xacho Chioza' zoa yabana', nake' dowalj ben' li' ben' shao'.

**Chiyal' gakencho ben'**

**6** 'Bi wli' wzez chele ladj ben' nan nakle ben' wen. La' shi kwencheza' ile'i beñaan chonle daa nak wen, bibi laxjle gon Xacho Chioza', beena' zoa yabana'. <sup>2</sup> Na' kat' chaklenle ben'ka' chyalj chchini, bi wzelen dill', ka chon ben' wxiye'ka' gana' chdop chllagcho choe'lwillcho Chioza', wa do yawi nez. Choe'gake' dill' che daa chongake' kwenche we'la'o ben' legake'. Dii li' nia' le', daa choe'la'o ben' legake', lennan' laxje'ka'. <sup>3</sup> San le', kat' choe'le ben' bi dii choe'lene', bi gonlen ka ile'i ben'. Na' ni to ben' bi ye'lene' bin chonle. <sup>4</sup> San li' gaken ben' ka kono gakbe'i. Na' Xachona', beena' chen chle'i daa chonle, gone' laxjle.

**Ka chiyal' we'lwillcho Chioza'**

(Lc. 11:2-4)

<sup>5</sup> 'Na' kat' choe'lwill-le Chioza', bi gonle ka ben' wxiye'ka'. Legake' chooll'gake' sechagake' we'lwill-gake' Chioza' gana' chdop chllagcho choe'lwillchone' wa ga lle' la' ben' kwenche ile'gakile' ka chongake'. Dii li' nia' le', daa chle'i ben' ka chongake', lezannan' laxje'ka'. <sup>6</sup> San le', kat' we'lwill-le Chioza', li' yiyoo loo lill-lena' na' li' wsej puerta', na' li' we'lwill Xachona', beena'

kono chle'i. Na'ch Xachona', beena' chen chle'i daa chonle, gone' laxjle.

<sup>7</sup> 'Na' kat' choe'lwill-le Chioza' aga lilezi dill'ka' inale ka chon ben'ka' bi nombia'gake'ne', la' chakgakile' daa choe'gake' dill' zan na' wzenague' bin che'gake'ne'. <sup>8</sup> Bi gonle ka chongake', la' Xacho Chioza' ba nezkzile' bi daa chyaljile ka zi' inablalen. <sup>9</sup> Kat' we'lwill-le Chioza', kin inale:

Xanto' Chios, ben' zoa yaba,  
we'la'oshga yog'lo' ben' li'.

<sup>10</sup> Na' inabia'gacho' loo yichjlall'do' yog'lo' ben',  
kwenche gak lo yell-lioni ka chaklalloo, ka chak ya-bana'.

<sup>11</sup> Ga nak daa chono' cheej chaonto' yog' lla, ben-gachan naanlla.

<sup>12</sup> Wxi'xen chento', ka chon neto' chzi'xennto' bitteza dii choni ben' neto'.

<sup>13</sup> Bi we'gacho' latj ibixnto' gonnto' daa bi nak wen, san bislagach neto' lo ni'a na' dii mala'.

La' lin' napo' yel' wñabia', na' yel' wak, na' lin' chido'loo shoo balaan xen zejli kan. Kan' nakan.

<sup>14</sup> 'La' shi le' chzi'xenle che ben' shi bi chongakile' le', ka'kzə Xacho Chioza' zoa yabana' si'xene' chele. <sup>15</sup> San shi le' bi chzi'xen che ljiwell-le, ka'kzə Chioza', beena' nak Xale, bi si'xene' dii malka' chonle.

**Daa chiyal' goncho kat' zoacho wbas'**

<sup>16</sup> 'Kat' zoale wbas', bi gonzle cho'alaolena' nyesh' ka chon ben' wxiye'ka', la' legake' chon cho'alawe'ka' nyesh' kwenche gakbe'i ben' bi neej naogake'. Dii li' nia' le', daa gakbe'i ben' daa chongake', lezannan' laxje'ka'. <sup>17</sup> San le', kat' soale wbas', li' wpaa yichjlēna' na' li' chib li' wxis cho'alaolena' <sup>18</sup> kwenche bi gakbe'i ben' nan zoale wbas'. San toz Xacho Chioza', beena' kono chle'i, ile'ile' daa chonle na' gone' laxjle.

**Yel' shawaa daa de yabana'**

(Lc. 12:33-34)

<sup>19</sup> 'Bi wtop wshagle yel' wni'ana' yell-lioni, la' bal' diika' chaljan baka' chliayi'gakban, na' balan chibia leyin na' chbiayi'gakan, wa choo wbanka' na' chkaagake'n.

<sup>20</sup> San li' gon ka gat' yel' shao' chele yabana', la' daa de yabana' bi galjan bado' wliayi'ban, ni bi yibia leyin, ni bi gak sho' wbanna' ikeen. <sup>21</sup> La' gana' de yel' shao' chelena', na'kzan se yichjlall'do'lena' wñeyi.

**Jalaochoki nakgakan beeni' che kwerp chechoni**

(Lc. 11:34-36)

<sup>22</sup> 'Jalaochoki nakgakan beeni' che kwerp chechoni. Shi jalaochoki chle'gakin kwaslo', doxen kwerp chechoni zoan lo beeni'na'. <sup>23</sup> Per shi bi chle'i jalaochoki, kwerp chechoni zoan lo yel' chola'. Ka'kzan chak che yichjlall'do'choni. Shi bi chzenagcho che Chioza', ncholi yichjlall'do'choni.



**Aga wak goncho ye! wni'ana' txen na' lekzka' gontechio Chioza' txen**

(Lc. 16:13)

<sup>24</sup> Aga ga zoa to ben' wlane' xshin chop ben', la' wakzbanile' beena' to, na' gachile' beena' sto, wa gone' xshin beena' to do yichj do lallee na' xshin beena' sto gone'n do ki do lallee. Na' ka'kzan chak checho len Chioza', aga wak goncho ka cheenile' shi we'techo latj inabia' ye! wni'ana' cho'.

**Bi kwek yichjcho diika' chyalljicho**

(Lc. 12:22-31)

<sup>25</sup> Daan nia' le': Bitek kwek yichjle daa yeej gaole kwenche ibanle, ni xalaanle. La' zak'techle ye! mban chechona' aga ka daa cheej chaocho, na' zak'tech kwerp chechona' aga ka xalaancho. <sup>26</sup> Li wwiakachi by-indo'ka' chda xan yabana', la'kzi bi chaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Xacho Chioza' zoa yabana' legakb. Zalechlin le', zak'techle aga ka bado'ka' ze lo llazə? <sup>27</sup> Na' ni tole bi gak yischooch ye! mban chelena' zi shloil la'kzi nall inlebb ze wneyi cheyin.

<sup>28</sup> Na' zbighe chi' yichjzle xalaanlena'? Wwiakachile ka chgol yejdo'ka' ze lyixaa, len aga bi llin chongakan ni bi chogakan do. <sup>29</sup> Per nia' le', ni dii Salomonna', beena' wdapchga ye! shao'ka', bi bllin gak xe'na' xochi ka yejdo'ka'. <sup>30</sup> Na' shi Chioza' none' yejdo'ka' ze lyixaa xochi, la'kzi nakan de toldezə na'tech chtop ben' len na' chz-eye'n, zalechla le', gontechle' wen chele gone' xalaanle la'kzi bitek chajle'le gaklene' le'? <sup>31</sup> Na' bi kwek yichjzle inazle: "ZBin yeej gaocho?" wa "ZNak goncho gat' xalaancho?" <sup>32</sup> La' ben'ka' bi nonlilall'gake' Chioza' to daazə chi' yichjgake'. Per Xachona', beena' zoa yabana', nezkzile' chyalljile yog' diiki. <sup>33</sup> Na' daa lliarote chiyal' wzenagle che Chioza' kwenche inabi'e le', na' gonle kon daa cheenile', na' gonkze' yog' daa chyalljile. <sup>34</sup> Bitek kwek yichjle shi wyaj wdele llaka' zi za' la' to to lla nsa' dii zed cheyin.

**Bi chiyal' yiya yiyiljicho ben'**

(Lc. 6:37-38, 41-42)

**7** 'Bi yiya yiyiljle ben', kwenche bi yiya yiyilj Chioza' le'. <sup>2</sup> La' kon ka chiya chiyiljle ben', ka'kzan yiya yiyilj Chioza' le', na' kon ka gonile ben', ka'kzan goni Chioza' le'. <sup>3</sup> Zbighe chwiazə bi'cha' yoo loo jalao bish' ljwello'na' na' bi chile'ilo' kwagaa yoo loo jalawo'na'? <sup>4</sup> Shi bi chle'ilo' kwagaa yoo loo jalawo'na', znakra gono' yoo bish' ljwello'na': "Benshki yibej' bi'cha' yoo loo jalawo'na'?" <sup>5</sup> Ben' wxiye! Zigaate bwia cho'na' na'tech wwio' che bish' ljwello'na'.

<sup>6</sup> Na' bi gonle byen we'lenle xtill' Chioza' ben'ka' bi chazlall'gake'n, kwenche ki gongakile' le' znia ka chon bekw'ka' chxoxj chtingakb kat' no chonlegakib. Ni bi we'lenle xtill' Chioza' ben'ka' bi cheengakile' wzenag-gake'n kwenche ki wlej wshoshjgake' dillaa ka chon kushka' chlej chshoshjgakb daa bi choolall'gakb gaogakb.

**Chiyal' inabicho Chioza' gaklene' cho'**

(Lc. 11:9-13; 6:31)

<sup>7</sup> Li inabi Chioza' bin cheenile na' gone'n. Li yiyilj daa cheenile na' yillelilen. Li ine cho'a puerta', na' wsalje'n.

<sup>8</sup> La' beena' chnabile' ben' daa cheenile', we'kze'n; na' beena' chiyilje' daa cheenile', willelkzile'n; na' beena' chne cho'a puerta', wsaljkgake' sho'e.

<sup>9</sup> Le' zoa xiingle, shi inabib' le' to yetxtil aga we'leb' to yaj. <sup>10</sup> Wa shi inabib' le' to bel' yaa, aga we'leb' to bel' znia. <sup>11</sup> Shi le' naktele ben' mal chak we'le xiingleka' daa nak dii wen, zalechli Xacho Chioza' zoa yabana' ki gone' le' dii wen dii shawaa shi inabilene'n?

<sup>12</sup> Kon ka cheenile goni ben' le', ka'kzan chiyal' gonilene', la' kan' na' leya' na' librka' bzej dii ben'ka' wdixjee daa goll Chioza' legake'.

**Puert daa nak diido' yid**

(Lc. 13:24)

<sup>13</sup> Li gon byen sho'le cho'a puerta' daa nshop'. La' nlag' puerta' na' zlag' nak neza' daa zej gana' chbiayi' ben', na' ben' zan choogake'n. <sup>14</sup> Per ka nak neza' daa zej yabana' gana' lljazoalencho Chioza', nakan to nez les, na' to chopchga ben' chillelgakile'n.

**Daa chbia lo yaga' chli'n bi yag daa**

(Lc. 6:43-44)

<sup>15</sup> Li wsak' kwenche bi shajle'le che ben'ka' chonz ka chyixjee daa che' Chioza' legake', na' chonz kwingake' ben' wen ben' gaxjlall', per ben' malzgakan na' chlliyi'gake' ben', ka chon to ba znia. <sup>16</sup> Ka ile'ile ka nsa' chegake' na' gakbe'ile non nakgake'. La' nezkzile aga wishibcho uvana' to lo yag yesh' na' lekzka' aga wishibcho yixwewa' to lo yag yesh' yaa. <sup>17</sup> Ka'kzan yag wenna' chbian dii wen, na' yaga' daa bi nak wen chbian dii bi nak wen. <sup>18</sup> La' yaga' daa nak dii wen aga wbian dii bi nak wen, na' yaga' daa bi nak dii wen aga wbian dii nak wen. <sup>19</sup> Yog' yag dii chbia dii bi nak wen, chhog-gake'n na' chzeygake'n. <sup>20</sup> Daan, wakbe'kzile ka nsa' che ben'ka'.

**Aga yog' ben' yilline' yabana' gana' zoa Chioza' chnabi'e**

(Lc. 13:25-27)

<sup>21</sup> Aga yog' ben'ka' na' nad': "Xan', Xan'", yillingake' yabana' gana' chnabi'a' Chioza', lete ben'ka' chongake' ka cheeni Xa' Chioza', beena' zoa yabana'. <sup>22</sup> Kat'ka' illin llana' yizia' kwent che ben', zangake' inagake' nad': "Xan', Xan', neto' wdixjeento' daa wno', na' kon ye! wak cho'na' bibejnto' dii xiw'ka' yoo ben' na' bennto' dii zan ye! wak." <sup>23</sup> Na'ch yepgakee: "Biga bembia' le'. Li kwas ka'la, le' ben' wen dii mal."

**Chop ben' bengake' twej yoo**

(Lc. 6:47-49; Mr. 1:22)

<sup>24</sup> Daan, nottez beena' chzenag cho'a xtilaani na' chone' ka nia', nake' ka to ben' sin', beena' ben lille'na'

to lo yaj. <sup>25</sup> Na' ka gok yejsiwaa, bgol yaoka', na' wzechga be'na' nan wllig'gakan yooná', per bi billeen daa chi'cha leninna' lo yaja'. <sup>26</sup> Per beena' cheni cho'a xtil-laani na' bi chone' ka nia', nake' ka beena' bi chajnií, beena' bxe lille'na' lo yoxa'. <sup>27</sup> Na' ka gok yejsiwaa, bgol yaoka', na' wzechga be'na' na' bllig'gakan yooná' na' wlliyi'tekzan.

<sup>28</sup> Na' ka biyoll be' Jesúza' dillii, bibani beñ'ka' ka chli' chsedile', <sup>29</sup> daa bli' bsedile' legake' legá beñ' za'len yel' wñabia', aga ka chli' chsedí beñ'ka' chzajnií legake' leya'.

### Jesúza' biyone' to beñ' che'i léprana'

(Mr. 1:40-45; Lc. 5:12-16)

**8** Na' ka biyetj Jesúza' lo yaana', beñ' zan zino-gake'ne'. <sup>2</sup> Na' kwite'na' bllin to beñ' che'ile' lepra', na'ch bçhek' xibe' lawe'na', chi'ene':

—Xan', ñezid' wak yikwaso' yillwe'ni chak' shel' gueenilo'.

<sup>3</sup> Na'ch Jesúza' bxoá neena' yichje'na', chi'ene':

—Cheenid'x. Na' ñaate yikwasa'n.

Na' kon ka golle' ka', lii biyakteyi beena'. <sup>4</sup> Na'ch che' Jesúza'ne':

—Ni to kono yoo ka nak daa ba ben' cho'. Lete wyaj lao bxoza' kwençhe ile'ile' ba biyakilo', na' jwa' daa chiya! Iljoo lao Chioza' ka nilia dii Moiséza' bia' goncho kwençhe ñezi beñ' ba biyakilo'.

### Biyon Jesúza' xmos xan soldadka'

(Lc. 7:1-10)

<sup>5</sup> Ka billin Jesúza' yell Capernaúma' lii bllinte to xan soldad lawe'na', na' got'yoile'ne', <sup>6</sup> chi'ene':

—Xan', xmosaa die' lillaa, na' net tlaa kwerp çhe'na' na' le chey chle'.

<sup>7</sup> Na'ch che' Jesúza'ne':

—Na' sa' yiyonee.

<sup>8</sup> Na' che' xan soldadka'ne':

—Xan', aga zakii nad' kwençhe shoo loo yoo lillaa. Kon ben mandad yiyakile' na' wiyakkzile'. <sup>9</sup> Nia' ka' la' zoa beñ' chñabia' nad', na' nad' lekzka' chñabia' soldad çha'ka'. Kat' chep' toe': "Wyaj ni'", na' chaje'; na' kat' chep' stoe': "Da ni'", na' chide'; na' kat' chizep' xmosaa: "Ben dga", na' chone'n.

<sup>10</sup> Ka beni Jesúza' cho'a xtilleena', bibanile' na' chi'e beñ'ka' nogake' le':

—Dii li nia' le', bigan' lljtia' to beñ' Israel beñ' gonjilallee nad' ka chonjilall' beeni nad'. <sup>11</sup> Na' nad' nia' le', beñ' zan beñ' zaak doxen yell-lioni gonjilall'gake' nad' na' lljazoalengake' txen dii Abrahamá', dii Isaaca' na' dii Jacoba' yabana' gana' chñabia' Chioza'. <sup>12</sup> Na' ka nak beñ'ka' wlej Chioza' nan lljazoagake' gana' chñabi'e, zane' wzalee gana' shgasj shçhol, gana' kwellyesh'gake' na' gaoyaaxaxj leye'ka' daa le gakshejlall'gake', daa bi goongakile' inabi'e legake'.

<sup>13</sup> Na'ch che' Jesúza' xan soldadka':

—Biyaj lillo'na', na' gak ka cheenilo' daa chajli'o çha'. Na' lo lla lo gorzə biyaki xmosena'.

### Biyon Jesúza' tobiñ çhe Pédróna'

(Mr. 1:29-31; Lc. 4:38-39)

<sup>14</sup> Na'ch wyaj Jesúza' lill Pédróna', na' ble'ile' de tobiñ çhe'na' yo'e dii lana'. <sup>15</sup> Na' bex' Jesúza' neena' na' bicheje' dii lana'. Na' lii wyastie' bene' dii wdaogake'.

### Jesúza' biyone' zan beñ'ka' bi shao'

(Mr. 1:32-34; Lc. 4:40-41)

<sup>16</sup> Na'ch ka ba chxoá wbillá', jwa'gake' beñ' zan gana' zoa Jesúza', beñ' yoo dii xiw'ka', na' shcho'azə dillaa bi'e bichejgakan. Na' lekzka' biyone' yog' beñ' bi shao'.

<sup>17</sup> Gok ka' kwençhe gok ka wna dii Isaíaza', beena' wdixjee daa goll Chioza'ne', daa wne': "Le' bikee yill-we'ka' che'icho na' bene' ka bigaa yel' chey chla çhechona'."

### Beñ'ka' cheengakile' lljanogake' Jesúza'

(Lc. 9:57-62)

<sup>18</sup> Na' ka ble'i Jesúza' beñ' zan inlleb ba neçhjgake'ne', bene' mandad telene' beñ'ka' nakgake'ne' txen shlaa nisdona'lə. <sup>19</sup> Na' wbig' to beñ' chli' chsedí leya', chi'ene':

—Maestro, cheenid' sa'len' li' gattezə shajo'.

<sup>20</sup> Na'ch che' Jesúza'ne':

—Bez'ka' nongakb yech ga chiyoogakb, na' byiñ-do'ka' non lilldo'gakb, san nad', Beñ' Bsel' Chioza' Yell-lioni, bibi lill' de.

<sup>21</sup> Na' bchej sto beñ' nake' Jesúza' txen na' chi'ene':

—Xan', wza'len' li' gattezə shajo' ka yiyoll guet xa'na'.

<sup>22</sup> Na'ch goll Jesúza'ne':

—Da, dino nad'. Wikwash'kzə ljwell beñ' wetka'.

### Jesúza' bkweze' be'na' lo nisdona'

(Mr. 4:35-41; Lc. 8:22-25)

<sup>23</sup> Na'ch wyoo Jesúza' loo barkwa' len beñ'ka' ba nakgake'ne' txen. <sup>24</sup> Na' shlak zej barkwa' wtese'. Na' wzolo wzechga be'na' lo nisdona', na' wzolo chas chataan na' biyoll nisa' loo barkwa'. <sup>25</sup> Na'ch beñ'ka' nak Jesúza' txen jasangake'ne', na' che'gake':

—iXan', bisla cho'! iBa chbe'cho yel!

<sup>26</sup> Na'ch che' Jesúza':

—¿Berəçhe chllleblizle? ¿Biçhe bi nxenilall'le nad' kwaslo?

Na'ch wyase' bsheshlene' be'na' len nisdona', na' wlezgakan. <sup>27</sup> Na' beñ'ka' lle'len Jesúza' loo barkwa' bibangakile' ka bene', na'ch che' ljwellgake':

—¿Noran nak beeni, lla? Axt be'na' na' nisdona' chzenaggakan çhe'.

### Çhop beñ' Gadara yoogake' dii xiwaa

(Mr. 5:1-20; Lc. 8:26-39)

<sup>28</sup> Na' ka bllin Jesúza' yell-liona' mbani Gadárana' daa llia shlaa nisdona', çhop beñ' yoogake' dii xiw'ka' bchejgake' loo kapsanta' jati'gake'ne'. Na' daa le zña-gake' aga no chak te lo neza' chde gana' zoagake'.

<sup>29</sup> Na' besyaagakan che'gakan Jesúza':

—¿Biçhe za'zo' gani zoanto', Jesús, Xiñ Chios? ¿Aba za'zelo' zidsak'zi'o neto' la'kzi biñ' illin lla sak'zi'nto'?

<sup>30</sup> Na' gaoz lle' ba zan kush chaogakb. <sup>31</sup> Na'ch got'yoio dii xiw'ka' Jesúza', che'gakan le':

—Shi yibejo' neto' loo yichjall'do' beñ'ki, we'gacho' latj yiyoonto' kushka'.

<sup>32</sup> Na'ch goll Jesúza' legakan:

—Wakkzan. Li yiyoo shka'.

Na'ch bichej dii xiw'ka' na' biyoogakan kushka', na' kushka' lii bxonjtegakb na' jabixgakb to cho'a yaa na' bxoptegakb loo nisdona' na' wche'gakb yel.

<sup>33</sup> Na'ch beñ'ka' chap kushka' bixonjdogake', na' ka billingake' lalle'ka' gollgake' beñ' yellka' doxen ka gok che beñ'ka' yoo dii xiw'ka'. <sup>34</sup> Na'ch wza' yog' beñ' yellka' zjatilgake' Jesúza', na' ka ble'gakile'ne' got'yogakile'ne' yiyaje' gan yoblə.

### Jesúza' biyone' to beñ' net tlaa kwerp che'na'

(Mr. 2:1-12; Lc. 5:17-26)

**9** Na' biyoo Jesúza' to loo barkw, na'ch bilag'gake' shlaa nisdona' na' billine' yell che'na' gana' wzee.

<sup>2</sup> Na' bllinlengake' to beñ' net ni'a neena' lawe'na', nxoogake'ne' to lo daa. Na' gokbe'i Jesúza' le nonjilall'gake'ne', na'ch golle' beñ' we'na':

—Btiplaloo, xiñ', ba biyakxen xto'loona'.

<sup>3</sup> Na'ch ba' beñ'ka' chli' chsedi leya' che' ljwellgake': "Ba chonz kwin beeni ka Chioza' daa ne' ka'." <sup>4</sup> Na' gokbe'i Jesúza' daa wza'lall'gake', na' chi'e legake':

—¿Biçhe chza'lall'zle ka'? <sup>5</sup> ¿Achakile chyalljchid' yel' wak xench yep' beeni: "Ba bizi'xen' saaxya cho'na'", ka daa yepee: "Biyas na' bigoo nez'?" <sup>6</sup> Na' wliid' le', nad', Beñ' Bsel' Chioza', nap' yel' wñabia' yell-lioni kwenche yizi'xen' saaxya che beñ'.

Na'ch golle' beena' net ni'a neena':

—Biyas, bitob daa cho'na', na' biyaj lillo'na'.

<sup>7</sup> Na'ch biyas beena' net ni'a neena' na' ziyaje' lille'na'.

<sup>8</sup> Na' ka ble'i beñ'ka' ka gok, bibangakile', na' be'la'ogake' Chioza' daa bi'e yel' wak xenna' to beñ' yell-lío.

### Wlej Jesúza' Matewa' kwenche gone'ne' txen

(Mr. 2:13-17; Lc. 5:27-32)

<sup>9</sup> Ka biza' Jesúza' na', ble'ile' to beñ' wixhixj, lie' Mateo, chi'e gana' chchixje'. Na' chi'ene':

—Da, dino nad'.

Na'ch lii wzolla'te Matewa' janoe'ne'.

<sup>10</sup> Na' shlak chi' Jesúza' lill Matewa', bllin beñ' zan wixhixjka' na' zan beñ' zeyi cheyi bi nsa' chegake' wen, wche'gake' cho'a mesa' wdaolengake' Jesúza' len beñ'ka' nakgake'ne' txen. <sup>11</sup> Na'ch ka ble'i fariseoka' chaolen Jesúza' beñ'ka', na'ch wñabgakile' beñ'ka' nakgake'ne' txen, che'gake':

—¿Biçhe chaolenz maestro cheleni beñ' wixhixjki len beñ'ki bi nsa' cheyin wen?

<sup>12</sup> Na' beni Jesúza' daa goll fariseoka', na'ch chi'e legake':

—Aga beñ'ka' shawaan chyalljgakile' wen rmecha' san beñ'ka' bi shawaan chyalljgakile'ne'. <sup>13</sup> Li yiyaj na' li

ljased bin zeji Cho'a Xtill' Chioza' gana' nan: "Nad' cheenchid' yiyeshii ljwell-le, aga ka daa witle bayix'ka' kwenche we'la'ole nad'." Aga bid' ni che beñ'ka' nak beñ' li beñ' shao', san bid' ni che beñ' saaxyaka'.

### Wñabgakile' Jesúza' biçhe bi chzoa beñ'ka' nakgake'ne' txen wbas'

(Mr. 2:18-22; Lc. 5:33-39)

<sup>14</sup> Na'ch beñ'ka' nak Juanna' txen jabig'gake' kwit Jesúza' na' wñabgakile'ne' che'gake':

—Neto' na' fariseoka' zeyi chento' chzoanto' wbas'.

Na' ¿biçhe beñ'ka' nakgake' li' txen bi chzoagake' wbas'?

<sup>15</sup> Na'ch che' Jesúza' legake':

—Kat' chak to wishagna' beñ'ka' chdi'a chllag lill beñ' byona' aga chdagake' nyesh', san cheej chaogake'. Na' ka'kzan beñ'ki nakgake' nad' txen, cheej chaogake' ñaa zoalen' legake', per wllin lla wkwas beñ' nad' kwite'ka', kana'chan soagake' wbasaa.

<sup>16</sup> Ni to kono chida' lat' lech' kob lee lech' gola', la' kat' shechan na' yibe' lech' koba' na' wsho'chan dii gola' na' gana' nll'o' gakchan dii xench. <sup>17</sup> Na' aga no chgaa vino daa zi' bchejte loo yid gola', la' wchez' yid gola' na' laljə vinona', na' ka vinona' ka yida' kwiayi'gakan. San chiya' sholl vino daa zi' bchejte loo yid koba' kwenche ni ton bi kwiayi'.

### Jesúza' biyone' xiñ Jairona' len noola' jexee xe'na'

(Mr. 5:21-43; Lc. 8:40-56)

<sup>18</sup> Na' ni choe'te Jesúza' dill', ka bllin to beñ' wñabia' na' bçhek' xibe'na' lao Jesúza', chi'ene':

—Shingt wit to bi' nool cha'; per shi li' sa'gacho' na' wxoa noona'b' na' yibam'.

<sup>19</sup> Na'ch lii wzolla'te Jesúza' zejlene' beñ'ka' nakgake'ne' txen lill beñ' wñabia'na'. <sup>20</sup> Na' ka zejgake' lill beñ' wñabia'na' jano to noolə legake', na' ba gok shllin yiz chzoe' wbaa. Na'ch wbiguee koll' Jesúza' be'xee xe'na', <sup>21</sup> la' chakile': "Kon shel' ba be'xaa xe'na' wiyakkzid'." <sup>22</sup> Na' biyeçhj Jesúza' na' ka ble'ile' noola' chi'ene':

—Btiplaloo, xiñ', ba biyakilo' daa chonjilaloo nad'.

Na' lii biyakteyi noola'.

<sup>23</sup> Na' ka bllin Jesúza' lill beñ' wñabia'na' ba lle' beñ'ka' chkwel' bllaja' na' beñ' zan ba chosyaagake' chbellgake'. <sup>24</sup> Na'ch che' Jesúza' beñ'ka':

—Li yillesh ni. Aga witba'n san cheszbaan.

Per bxill-ligake'ne'. <sup>25</sup> Na' ben Jesúza' byen billesh-gake', na' wyo'e na' be'xee na' bi' nool weta' na' lii biyasteb'. <sup>26</sup> Na' yog' yellka' lli'a gaoz wze dill' daa bene'.

### Biyon Jesúza' çhop beñ' lçhol

<sup>27</sup> Na' ka biza' Jesúza', çhop beñ' lçhol janogake'ne'. Na' chosyaagake' zilljə che'gake':

—iBiyesh'lall'gachi neto', xiñ dia che dii Davi!

<sup>28</sup> Ka biyoo Jesúza' loo yoon'a, beñ' lçhol'ka' jabig'gake' kwite'na'. Na'ch che' Jesúza' legake':

—¿Achajje'le wak gon' ka ile'ile?

Na'ch goll beṅ' l'cho'ka'ne':

—Awe, Xannto', wak gono' ka ile'into'.

<sup>29</sup> Na'ch beṅ' Jesúza' jalawe'ka' na' golle' legake':

—Daa chonlilall'le nad' na' gak ka cheenile.

<sup>30</sup> Na'ch bile'gakile'. Na' Jesúza' golle' legake':

—Li gon byen kono ye'le ka'.

<sup>31</sup> Per ka biza'gake' kwite'na' lii wzolotegake' choe'gake' dill' doxen gana' mbani yella' daa ben Jesúza' chegake'.

### Biyon Jesúza' to beṅ' bi chak iṅe

<sup>32</sup> Shlak chiza' beṅ'ka' gok beṅ' l'cho', bllin beṅ' yoblə lao Jesúza' n'che'gake' to beṅ' bi chak iṅe daa yo'e dii xiwaa. <sup>33</sup> Na' kon ka bibej Jesúza' dii xiwaa yoo beena' na' biṅie'. Na' bibani beṅ'ka' lle' na', nagake':

—Ni shlin biṅ' ile'icho yell Israeli to yel' wak ka dga ba ben beeni.

<sup>34</sup> Per fariseoka' che'gake':

—Beeni chibeje' dii xiw'ka' kon yel' wak che daa chṅabia' legakan.

### Chyallj beṅ' zan gongake' xshin Chioza'

<sup>35</sup> Na' wda Jesúza' yog' yellka', ka yell xen ka yelldo', chli' chsedile' to to gana' chdop chllag beṅ' Israelka' choe'lwillgake' Chioza'. Wdixje'ile' legake' dill' wen dill' kob che yel' wṅabia' che Chioza' na' biyone' beṅ' che'i bittezə yillwe'. <sup>36</sup> Na' ble'i Jesúza' beṅ' zan zejlen-gake'ne' na' biyeshile' legake', la' gokbe'ile' ka nyesh'lazan chak chegake', ka xil' ba kono xanin zoa.

<sup>37</sup> Na'ch golle' beṅ'ka' nakgake'ne' txen:

—Dii li nia' le', beṅ'ka' zi' gonlilall'gake' Chioza' zakle-bgakile' to dii williachga to lo yell-lío, na' chyallj no yizi' yilapan, per to chopchga wen llinka' zoa. <sup>38</sup> Na' li iṅabi Xancho Chioza' wzanche' beṅ'ka' wtopgake' beṅ'ka' gonlilall'gake'ne'.

### Jesúza' wleje' shllin beṅ'ka' gake' postl' che'

(Mr. 3:13-19; Lc. 6:12-16)

**10** Na'ch biti'a Jesúza' beṅ'ka' shllin wleje' na' bi'e legake' yel' wṅabia' kwenche'gak yibejgake' dii xiw'ka' yoo beṅ', na' yiyongake' beṅ' che'i bittezə yillwe'.

<sup>2</sup> Na' kin le postlka' shllin: zigaate wleje' Simónna', beena' lekzka' che'gake' Pedro, len beṅ' bishee Andrėja', na'tech Jacóbona' len beṅ' bishee Juanna', beṅ'ka' nak xiiṅ Zebedewa', <sup>3</sup> na'ch Felípena', Bartoloména', Tomásza', Mateo, beṅ' wixixja', Jacobo xiiṅ Alfewa', Tadewa', <sup>4</sup> Simón, beena' bsi'gake' Zelote, na' Jud Scariota', beena' bene' Jesúza' lo na' beṅ' malka'.

### Bsel' Jesúza' postlka' shllin je'gake' cho'a xtil' Chioza'

(Mr. 6:7-13; Lc. 9:1-6)

<sup>5</sup> Na'ch bsel' Jesúza' beṅ'ka' shllin je'gake' cho'a xtil' Chioza', na' chi'e legake':

—Bi shajle yellka' gana' zoa beṅ'ka' bi nak beṅ' Israel, ni bi shajle yellka' lliia gana' mbani Samáriana'.

<sup>6</sup> San li shaj gana' lle' beṅ' Israelka', beṅ'ka' nak ka xil' ba wnit. <sup>7</sup> Li shaj li lljtixjee ba zoa gaoshosh iṅabia' Chioza' beena' zoa yabana' loo yichjall'do' beṅ'. <sup>8</sup> Li yiyon beṅ'ka' bi shao' na' beṅ'ka' che'i lepra, li yisban beṅ' ba wit, na' li yibej dii xiw'ka' yoo beṅ'. Na' ka beṅ' Chioza', beṅe' le' yel' waka' ka'z, ka'kzan le' bibi wchixjle yiyonle beṅ'.

<sup>9</sup> Na' bi wa'le mech de or, de plat ni de cobre. <sup>10</sup> Na' ni bi gal'le no yixj les, ni bi gox'le zi shkwe' xale, ni zi shkwe' xel-le, ni bi gox'le yag bar, la' to wen llin chidolee yeej gawe'.

<sup>11</sup> Na' kat' illinle to to yell xen wa yelldo'zə, chijle to beṅ' nsa' che' wen, na' yigaanle lille'na' na' na'tezə soale axt ka illinch lla yiza'le. <sup>12</sup> Na' ka sho'le lille'na' ye'lene': "Chioza' wzoe' le' mbalaz." <sup>13</sup> Na' shi dii li beṅ'ka' lle' na' nakgake' beṅ' wen, wakkzə daa ye'le le-gake'; san shi bi nakgake' beṅ' wen, na' aga wakan.

<sup>14</sup> Na' gattezə illinle shi kono wleb le' na' ni bi wzenag-gake' chele, na' yiza'le lill beena' wa yella' gana' gongakile' le' ka' na' yishible bishtena' lliia ṅi'aleka'.

<sup>15</sup> Dii li nia' le', kat' illin lla wchoglo Chioza' che beṅ', yel' zak'zi' xench ile'chi beṅ' yellka' gana' gongakile' le' ka' aga ka beṅ' yell Sodómana' na' yell Gomórrana'.

### Yel' zak'zi'ka' yen ile'i beṅ'ka' nak Jesucristona' txen

<sup>16</sup> Nad' chselaa le' ka xildo' ladj ba zṅiaka'. Na' chiyal' gake' beṅ' sin' na' beṅ' wen. <sup>17</sup> Wsak'gale, la' wchej beṅ' lljwee le' lao beṅ'ka' chṅabia' na' wit chingake' le' gana' chdop chllagcho choe'lwillcho Chioza'. <sup>18</sup> Na' lljwa'gake' le' lao beṅ' wṅabia' xenka' daa chonlilall'le nad', na' ka' gak we'lenle legake' cho'a xtilaana' na' ka'kzə beṅ'ka' bi nakgake' beṅ' Israel. <sup>19</sup> Na' kat' gongake' le' lo na' beṅ'ka', bi sele wṅeyi naklə iṅale wa bi iṅale, la' ka gal' iṅele, Chioza' wxoe' dillaa cho'a lol'leka'. <sup>20</sup> La' aga len' iṅele, san Espiritu che Xacho Chiozan' gone' ka iṅele.

<sup>21</sup> Beena' zoa beṅ' bishee leteze' gone'ne' lo na' beṅ'ka' witgake'ne', na' beena' zoa xiiṅe' gone'b' lo na' beṅ' wite'b'. Na' soa beṅ' yizoshi'e xaxṅeena' na' gone' legake' lo na' beṅ'ka' witgake' legake'. <sup>22</sup> Yog'lo beṅ' gakzbangakile' le' daa nonlilall'le nad', per beena' so sakile' bittezə daa yen ile'ile' axt kat' guete', beenan' gat' yel' mban che' zejli kaṅi. <sup>23</sup> Shi to yell yilaggake' le', li yiyaj yell yoblə. La' dii li nia' le' bilan' yiyoll tale yog'lo yellki mbani Israeli kat' illin lla yiyed' nad', Beṅ' Bsel' Chioza'.

<sup>24</sup> To beṅ' chsed aga zak'che' ka beena' chli' chsedi le', na' ka'kzə to wen llin aga zak'che' ka xane'na'. <sup>25</sup> Na' beena' ni chsed yibaile' gake' ka beena' chli' chsedi le', na' ka'kzə wen llinna', yibaile' gake' ka xane'na'. Nad' nak' xanle, na' shi nagake' cha' non' txen dii xiwaa daa le Bezlo, zalelə ki iṅagake' chele ka'?

### ¿Non chiyal' illebocho?

(Lc. 12:2-9)

<sup>26</sup> Bi illeble beṅ'ka' biya dii wchi' wsak'gake' le'. La' daa kono ṅezi ṅaa, wllin lla ila'lawin, na' aga ga de to dii ngash' dii bi illin lla ila'lawin. <sup>27</sup> Diika' chli' chsedid'

le' do ngash'zə, li we'n dill' ladj lkwe' beŋ'. Na' diika' nia' le' to le'zə, li wzenin yog'loj beŋ'. <sup>28</sup> Bi illeble beŋ'ka' cheengakile' witgake' le', la' kwerp chele na'zan witgake', aga bi gak gongakile' yichjlall'do'lena'. San Chiozan' chiyal' illeble, la' len' wakə wlliyee kwerp chelena' len yichjlall'do'lena' lo yi' gabi'la'.

<sup>29</sup> La'kzi wak si'cho chop byiŋdo' kon to sintabdo', ni tob bi guet shi Xacho Chioza' bi wi'e latj. <sup>30</sup> Na' ka nakle le', axt yish' yichjlana' n'abe'. <sup>31</sup> Daan bi chiyal' illeble, la' zak'ch le' aga ka ba zan byiŋdo'ka'.

**Beŋ'ka' chchebgake' lao beŋ' nan nombia'gake' Jesúza'**  
(Lc. 12:8-9)

<sup>32</sup> Beena' we' dill' lao beŋ' iŋe' nake' nad' txen, ka'kzə nad' yep' Xa'na' zoa yabana' nake' nad' txen. <sup>33</sup> Na' beena' bi chcheb lao beŋ' nan nake' nad' txen, ka'kzə nad' yep' Xa'na' zoa yabana' bi nake' nad' txen.

**Ni che Jesúza' gak beŋ' choplə**  
(Lc. 12:51-53; 14:26-27)

<sup>34</sup> Bi gakzile bid' lo yell-lioni kwenche gon' ka soalen ljwell beŋ' mbalaz. Aga daan bid', san bid' kwenche wxia' wdi. <sup>35</sup> Daa bid' na' yidi-len beŋ' byona' xe'na' na' noola' yidi-lene' xneena', na' beena' zoa xoolille' yidi-lene' le'. <sup>36</sup> Na' beŋ'ka' zoa toz yoo gakzbani ljwelle'.

<sup>37</sup> Beena' chakchile' xe'na' wa xneena' aga ka nad', bi chidolee gake' nad' txen, na' ka'kzə shi chaktechile' xi-iŋe'na' ka nad', lekzka' bi chidolee gake' nad' txen.

<sup>38</sup> Beena' bi chzani ye! mban che'na' yen ile'ile' bittezə kwenche gone' ka nia', bi chidolee gake' nad' txen.

<sup>39</sup> Na' beena' chakile' shel' kono wchi' wsak' le', beenan' kwiayee. San beena' chzani ye! mban che'na' yen ile'ile' bittez daa nonlilallee nad', beenan' gat' to ye! mban che' zejli kanj.

**Beŋ'ka' soagake' mbalaz yabana'**  
(Mr. 9:41)

<sup>40</sup> Beena' wlebe' le', nad'kzan chlebe'. Na' beena' wlebe' nad' lekzka' Chioza', beena' bsel' nadaan, chlebe'. <sup>41</sup> Beena' wlebe' to beŋ' chyixjee daa che' Chioza'ne', lenkzen' ikee ka laxj beena' chyixjee daa che' Chioza'ne'. Na' lekzka' beena' wlebe' to beŋ' chone' daa nak shji daa chibaile' nake' beŋ' li beŋ' shao', lekzka' lene'n ikee ka laxj beena' chon daa nak shji. <sup>42</sup> Na' beena' we' la'ch' lat' nis yeej beŋ'ki nakgake' nad' txen, dii li nia' le', de laxje'.

**11** Na' ka biyoll goll Jesúza' beŋ'ka' shllin bin chiyal' gongake', na'ch bizee na', na' jali' jasedile' beŋ' na' jtixje'ile' legake' cho'a xtill' Chioza' yellka' lliana' gana' mbani Galileana'.

**Beŋ'ka' bsel' Juan wichoa nisa'**  
(Lc. 7:18-35)

<sup>2</sup> Na' Juanna' beena' chchoa beŋ' nisa', ba die' lillyana'. Ka wnezile' daa chon Crístona', na'ch bselee chop beŋ'ka' nakgake'ne' txen gana' zoe'. <sup>3</sup> Na' janabgakile'ne' che'gake':

—¿Alin' beena' ba lliana' bia' yid?, ¿anti chiyal' kweznto' sto beŋ' yoblə?

<sup>4</sup> Na'ch che' Jesúza' legake':

—Li yiyaj na' li lljayell Juanna' daa chenile nia' na' daa chle'ile chon'. <sup>5</sup> Li lljayelle' chon' ka chle'i beŋ' lchojka', na' chiza' beŋ'ka' bi chak sa', na' chiyaki beŋ'ka' che'i lepra, na' chiyeni beŋ' kwellka', na' chisban' beŋ'ka' ba wit, na' chyixje'id' beŋ' yesh'ka' dill' wen dill' kob che Chioza'. <sup>6</sup> Chakomba beena' chajle' cha' na' bi chakcho-plallee.

<sup>7</sup> Na' ka biza' beŋ'ka' bsel' Juanna', na'ch wzolo Jesúza' be'lene' beŋ'ka' lle' na' xtill' Juanna', chi'e legake':

—¿Nakran nsa' che beena' jawiale latja' gana' bibi chashj chleb? ¿Anake' to beŋ' chakchoplallii che dill'ka' cho'e? <sup>8</sup> Shi bi nakan ka', ¿nakran nak beena' jawiale? ¿Ato beŋ' nakw xalaane' dii le nakə? Bi nakan ka'. La' nezkzile beŋ'ka' nakw xalaangake' dii le nak zoagake' loo yoo lill beŋ' wñabia'ka'. <sup>9</sup> ¿Nakrakzan nak beena' jawiale? ¿Ato beŋ' chyixjee daa che' Chioza'ne'? Dii li kan' chone', na' chontechle' ka beŋ'ka' chyixjee daa che' Chioza' legake'. <sup>10</sup> La' che beenin cho'e Cho'a Xtill' Chioza' dill' daa nan:

Wselaa beena' kwialo lawo'na',

na' chixji'e xtillloona' kwenche soa beŋ' wzenaggake' cho' kat' illino'.

<sup>11</sup> Dii li nia' le', ladj yog' beŋ' yell-lioki, ni toe' biŋ' ichej gake' beŋ' zak'chi' aga ka Juanna' beena' chchoa beŋ' nisa'. Per nottezə beena' choe' latj inabia' Chioza' yichjlall'do'ena', zak'teche' aga ka Juanna'.

<sup>12</sup> Kon ka wzolo Juanna' bchoe' beŋ' nisa' axt ñaanlla, zoa beŋ' chsej chllongake' kono wleb ye! wñabia' che Chioza'. <sup>13</sup> Librka' daa bzej dii beŋ'ka' wdixjee daa goll Chioza' legake' na' leya' bzej dii Moiséza' wdixjeegakan che ye! wñabia' che Chioza', na' lekzannan' cho'e Juanna' dill' ñaa blee. <sup>14</sup> Na' shi cheenile shajle'le dga nia' le', lekzen' Elíaza', beena' nagake' yid kwenche chixji'e cho'a xtill' Chioza'. <sup>15</sup> Ka le' chenile dga nia', li sen wneyi.

<sup>16</sup> ¿Bera ka wsaklebid' le' mbanle ñaa? Le' chonle ka bi'do'ka' lle' gana' chak yaana' na' chosyaagakb' che' ljwellb': <sup>17</sup> "Bkwellnto' billeja' na' bi byaale, na' be'nto' daa chon nyesh' na' ni bi wchellkzle." <sup>18</sup> La' Juanna' bi weej wdawe' dii wen dii shao', na' wngake' che': "Dii xiwaan yo'e." <sup>19</sup> Na'ch wdena' bid' nad' nak' Beŋ' Bsel' Chioza' Yell-lioni, na' cheej chaw', na' nagake' nak' to beŋ' waoxat na' to weezo, na' lekzka' nagake' non' txen beŋ' wen dii malka' na' beŋ' wixhixjka'. Per ye! sin' che Chioza' chli'lawin ka chsa' che beŋ'ka' chzenaggake' che'.

† Zoa beŋ' chsej chllongake' kono wleb ye! wñabia' che Chioza': dga nakan to dii lallj. Lekzka' bal beŋ'ka' nsed nagake' versículoni zezin: zoa beŋ' chongake' axt ga zeelo chakgake' kwenche inabia' Chioza' legake'.

**Yellka' gana' bi bzenaggake' che Jesúza'**

(Lc. 10:13-15)

<sup>20</sup> Na'ch wzolo Jesúza' bsheshlene' ben' yellka' gana' bli'che' ye'l' waka', daa bi biyaj bilengakile' xtoleeka'. Na' wne':

<sup>21</sup> —iNyesh'laz gak chele, le' ben' yell Corazín! iNyesh'laz gak chele, le' ben' yell Betsaida! La' shel' ben'ka' lle' yell Tírona' na' yell Sidónna' ble'gakile' ye'l' wakka' ba ble'ile, lii biyaj bilentel'agakile' xtoleeka', na' gokwl'jagake' lech' zeshaa na' bllaagake' dena' yich-je'ka' daa le gokyesh'gakile', shel'ka'. <sup>22</sup> Na' daa bi biyaj bilenile, ba nia' le', llana' wchoglo Chioza' che ben', dii walch sak'zi'le aga ka ben' Tíroka' na' ben' Sidónka'. <sup>23</sup> Na' le' ben' Capernaúm, zachakile willinle yabana'? Aga willinle na', san latj gana' sak'zi'len yillinle. La' shel' ben' Sodómaka' ble'gakile' ye'l' wakka' daa ba ble'ile, balja biyaj bilengakile' saaxya che'ka' na' ni ndia yella', shel'ka'. <sup>24</sup> Daan nia' le', kat' illin lla wchoglo Chioza' che ben', dii walch sak'zi'le aga ka ben' Sodómaka'.

**Mbalaz soa ben'ka' gonjilall'gake' Jesúza'**

(Lc. 10:21-22)

<sup>25</sup> Na' lo gora' wne Jesúza', chi'e:  
—Xa, li' nako' xan yabana' na' yell-lioni, choe'lawaa li' daa bkwashilo' ben' sin'ka' diika' ba bliilo' ben'ka' bibi chajinii. <sup>26</sup> Beno' ka', Xa, la' kan' wyazlaloo.  
<sup>27</sup> Na'ch goll Jesúza' ben'ka':  
—Xa'na' bene' lall' na' yog'lo' daa chon'. Na' ni to kono nombia'yen' nad' lete Xa'na', na' lekzka' kono nombia'yen' Xa'na' lete nad' nak' Xiine' len ben'ka' cheenid' gon' ka gombia'gake'ne'. <sup>28</sup> Li gonjilall' nad', yog'le le' ba chjshiaile na' nakle ka ben' n'ntakw n'chej to dii zii dii zshab, na' nad' gon' ka yizi'lall'le. <sup>29</sup> Li gon ka nia', na' li wzenag daa chzajniid' le', la' nad' nak' ben' gaxjlall' na' gon' ka gat' ye'l' wixi'lall' chele. <sup>30</sup> Daa nia' le' gonle aga nakan dii bi gak gonle, na' daa chli' chse-did' le' bi nakan dii bi so sakile.

**Ben'ka' nak Jesúza' txen wdishjgake' trígona' llana' chombaangake'**

(Mr. 2:23-28; Lc. 6:1-5)

**12** To lla sabd, llana' chombaang ben' Israelka', wde-len Jesúza' ben'ka' nakgake'ne' txen to ga naz to ben' trígona', na' ben'ka' zejlengake'ne' wzolo wdishjgake' trígona' na' wdaogake'n. <sup>2</sup> Na' ka ble'i fariseoka' daa chon ben'ka', na'ch che'gake'ne':

—Bwia ka chon ben'ki nakgake' li' txen, chongake' daa bi chiya'l' goncho llani chombaangcho.

<sup>3</sup> Na'ch che' Jesúza' legake':  
—¿Abin' wlable ka ben dii Davina' len ben'ka' nakgake'ne' txen ka wdongake'? <sup>4</sup> Wyo'e loo lill xlatj Chioza' na' wdoyoe' yetxtilka' daa naki che Chioza' daa toz b'xozka' de Isens gaogake'. <sup>5</sup> ¿Abin' wlable leya' gana' nan aga bi xya nakan che b'xozka' la'kzi chongake' llinna' loo yoodo'na' llaka' chombaangcho? <sup>6</sup> Na' nia' le', ladjleni zoa to ben' zak'che' aga ka yoodo'na'. <sup>7</sup> Bilja wyajniile bi zeji Cho'a Xtill' Chioza' daa na: "Nad'

cheenchid' yiyeshii l'jwell-le, aga ka daa witle bayix'ka' kwenche we'la'ole nad'." La' shel' le' wyajniilen, aga waole xya che ben' bi nap dol', shel'ka'. <sup>8</sup> Nad', Ben' Bse'l' Chioza' Yell-lioni, chnabi'a lao llani chombaangcho.

**Jesúza' biyone' to ben' llana' chombaang ben' Israelka'**

(Mr. 3:1-6; Lc. 6:6-11)

<sup>9</sup> Na'ch biza' Jesúza' latja', na' biyaje' gana' chdop chllag ben' Israelka' choe'lwillgake' Chioza'. <sup>10</sup> Na' ladj ben'ka' len to ben' net t'laa neena'. Na' fariseoka' chwiagake' naklā ka si' sengake' kwenche gaogake' xya che Jesúza', na'ch w'abgakile'ne', che'gake':

—¿Beran na leya'? ¿Ade Isens yiyoncho to ben' bi shao' llani chombaangcho?

<sup>11</sup> Na'ch che' Jesúza' legake':  
—Shi nole zoa to xil' chele na' ixopb to loo yech llaki chombaangcho, zabi yibejleb? <sup>12</sup> Na' izak'techlā benecha' aga ka xilaa! Daan de Isens goncho daa nak wen llaki chombaangcho.

<sup>13</sup> Na'ch golle' beena' net t'laa neena':

—Bli noona'.

Na' ka bli neena' lii biyakten ka nak daa zi sh'laa. <sup>14</sup> Na' ka biza' fariseoka' gana' chdop chllaggake', be'gake' dill' nak sho' xnezi witgake' Jesúza'.

**Daa wna dii Isafaza' che Jesúza'**

<sup>15</sup> Ka gokbe'i Jesúza' daa cheengakile' gongake', na' bizee ziyaje' gan yoblā. Na' ben' zan inlleb janoe'ne' na' biyone' yog' ben'ka' bi shao'. <sup>16</sup> Na' golle' ben'ka' biyone' bi we'gake' dill' daa chone'. <sup>17</sup> Daa bene' ka', billinin ka wna dii Isafaza', beena' wdixjee daa goll Chioza'ne', kana' wne':

<sup>18</sup> Beenin nake' wen llin cha', beena' ba wlej', na' le chakidee na' chazlallaa ka chone'. Na' wzoa' Espiritu cha'na' loo yichjall'do'ena', na' chixje'ile' ben'ka' lle' yell-lioni ka cheenid' gongake'.

<sup>19</sup> Bi gakti'l-lene' ben', na' ni bi gosyee wi'e dill' yawi nez.

<sup>20</sup> Aga wisyoll wistoe' chishje' yaxtila' daa ba chashje. na' aga wisole' mesha' daa ba chiyol, axt ki gone' gan wli'lao ye'l' li ye'l' shao' che'na'.

<sup>21</sup> Na' ben' lle' doxen yell-lioni gongake' lez len' gak-lene' legake'.

**Nagake' che Jesúza' chibeje' dii xiw'ka' kon ye'l' wak cheyinna'**

(Mr. 3:19-30; Lc. 11:14-23; 12:10)

<sup>22</sup> Jwa'gake' lao Jesúza' to ben' yo'e dii xiw' na' bi chle'ile' ni bi chak inie'. Na' bibej Jesúza' dii xiwaa yo'e, na' bile'ile' na' gokte binie'. <sup>23</sup> Yog'lo' ben'ka' bibangakile' ka nak daa bene', na' chisne':

—¿Aaga beenin xiin dia che dii Davina', beena' chbezcho, lla?

<sup>24</sup> Ka beni fariseoka' dillaa choe' ben'ka', na' che'gake':

—Aga bi yel' wak nap beeni. San yel' wak çe Bezlona', † daa chñabia' dii xiw'ka'zan, chibejile' diika'.

<sup>25</sup> Na' gokbe'i Jesúza' daa chza'lall' fariseoka', na'ch chi'e legake':

—Shi gana' chñabia' to beñ' na' tilgake' to jezgake' na' gakgake' çhoplə, na' kwiayi' gana' chñabi'e, na' ka'kzə shi to yell wa beñ' lle' toz yoo gakgake' çhoplə aga wdiagake'. <sup>26</sup> Ka'kzə Satanáza', shi yibej l'jwell dii xi-wiinka' yoo beñ', aga wdia yel' wñabia' çheyinna', shel'ka', la' to jezgakannan' chidi-len kwingakin. <sup>27</sup> Le' nale chibej' dii xiwaa yoo beñ' kon yel' wak çe Bezlona' †† daa chñabia' legakan. ¿Shera beñ'ka' nakle txen? ¿Alekzka' l'ennan' chibejlengake' dii xiw'ka' yoo beñ'? Daa bi nakan ka', na' chli'n nakllejile. <sup>28</sup> Na' shi nad' chibej' dii xiw'ka' kon yel' wak çe Espíritu çe Chioza' zejín ladjleni ba bla' yel' wñabia' çe Chioza'.

<sup>29</sup> Aga no gak sho' lill to beñ' wal na' kwane' dii de çe' shi bi wçheje'ne' zigaate. Na'chan gak kwane' lille'na'.

<sup>30</sup> Beena' bi chone' nad' txen, len' chakzbanile' nad'; na' beena' bi chaklene' nad' kwençe wzenag beñ' çe Chioza', len' chsej chlone' wzenaggake'.

<sup>31</sup> Na' nia' le', wizi'xen Chioza' yog' saaxya çhelena' na' yog'te dii mala' daa chbell chñele, san shi inele zban çe Espíritu Sántona' na' çheyi diika' chone', aga wizi'xen Chioza' çehele. <sup>32</sup> Na' shi no ine' cha', nad', Beñ' Bsel' Chioza' Yell-lioni, lekzka' wizi'xen Chioza' çe', san beena' ine' çe Espíritu Sántona', aga wizi'xene' çe' ñaa zoe' yell-lioni ni kat' illin llana' wçhogloe' çe beñ'.

### Kon ka nak yaga', ka'te nak daa chbian

(Lc. 6:43-45)

<sup>33</sup> Nezicho yaga' daa nak wen chbian dii wen, na' yaga' daa bi nak wen aga bi dii wen chbian. Kon ka nak yaga', ka'te nak daa chbian. <sup>34</sup> Le' beñ' wen dii mal! ¿Nakra gonle inele daa nak dii wen daa nakle beñ' mal? La' yog' dill' daa chchej cho'a lol'l'chona' za'n loo yichjlall'do'chona'. <sup>35</sup> Beena' nak beñ' wen cho'e dill' wen, daa yoo dii wenna' loo yichjlall'do'ena'; na' beena' nak beñ' michian bi cho'e dill' yejni'alallii, daa yoo dii michianna' loo yichjlall'do'ena'. <sup>36</sup> Na' nad' nia' le', kat' illin lla yizi' Chioza' kwent çe yog' beñ', kanan' yidele kwent çe yog'te dill'ka' konteje wñele. <sup>37</sup> La' shi le' choe'le dill' wen, na'ch ina Chioza' bibi do'l' naple; per shi le' bi choe'le dill' wen, na' wçhogloe' çehele sak'zi'le.

### Wñabi beñ' malka' Jesúza' wli'e to yel' wak

(Mr. 8:12; Lc. 11:29-32)

<sup>38</sup> Na'ch bał fariseoka' na' beñ'ka' chli' chsedi leya' che'gake' Jesúza':

—Maestro, cheeninto' ile'into' gono' to yel' wak kwençe gakbe'into' shi Chiozan' bselee li'.

<sup>39</sup> Na' che' Jesúza' legake':

—Le' nakle beñ' mal na' beñ' bi chzenag çe Chioza' chñable ile'ile' yel' waka' kwençe wli'n shi Chiozan' bselee nad', per aga wliid' le' daa cheenile. Lete ile'ile'

† Bezlo: lekzannan' Beelzebú de xtil na' nakan sto le Satanáza'.

†† Bezlo: lekzannan' Beelzebú de xtil na' nakan sto le Satanáza'.

to dii nak ka yel' wak daa ben Chioza' çe dii Jonáza'.

<sup>40</sup> La' Jonáza' wyo'e shoñə lla shoñə yel loo lee beł xen-na', na' ka'kzə nad', Beñ' Bsel' Chioza' Yell-lioni, shoñ lla shoñ yel igaana' loo bana'. <sup>41</sup> Kat' illin lla wçhoglo Chioza' çe beñ' yell-lioni, kanan' dii beñ' Níniveka' gaogake' xya çehele, le' zoale ñaa, la' legake' biyaj bileni saaxya çe'ka' kana' wdixje'i dii Jonáza' legake' cho'a xtill' Chioza'. Na' nad', zak'techid' aga ka dii Jonáza' na' bi chzenagle' cha'. <sup>42</sup> Na' lekzka' llana' kat' wçhoglo Chioza' çe beñ' yell-lioni, noola' wñabia' yellka' lle' do lli'lə gawe' xya çehele, le' zoale ñaa, la' len' wzee zit' nllleb bidzenague' dill' sin' daa wñe dii Salomónna'. Na' nad', zak'techid' aga ka dii Salomónna' na' bi chzenagle' cha'.

### Dii xiwaa daa chiyoo beñ'

(Lc. 11:24-26)

<sup>43</sup> Kat' chichej dii xiwaa yoo beñ', na' chdan gana' bibi chashj chleb chyiljan gana' yizi'lalliin. Na' kat' bi chllein gana' yizi'lalliin, <sup>44</sup> na'ch chakin: "Yiyaach' dii yoblə gana' bichejkz'." Na' kat' yillinan gana' bichejan, nakan ka to yoo desh dii nxi ñloa. <sup>45</sup> Na'ch lljaxi'n zi gall dii xiw'ka' nakch dii malch aga ka len, na' sho'gakan beena'. Na' gaktech mal çe beena' aga ka gok çe' dii nech. Ka'kzan gak çe beñ' malka' lle' ñaa.

### Bllin xña' Jesúza' len beñ' bisheeka' gana' zoe'

(Mr. 3:31-35; Lc. 8:19-21)

<sup>46</sup> Ni choe'lente Jesúza' beñ'ka' dillaa ka bllin xñeena' len beñ' bisheeka' goklall'gake' wshaljlengake'ne' na' wzegake' lesh' chyoonaa'. <sup>47</sup> Na' goll to beñ' Jesúza': —Xñoona' len beñ' bishooka' zegake' lesh' chyoonaa' cheengakile' wshaljlengake' li'.

<sup>48</sup> Na' che' Jesúza' beena' golle'ne' ka':

—¿Noran xña'na' na' noran beñ' bishaaka'?

<sup>49</sup> Na'ch bli'e beñ'ka' nakgake'ne' txen na' chi'e:

—Beñ'kin xña'na' na' beñ' bishaaka'. <sup>50</sup> La' nottezə beena' chon ka cheeni Xa'na' zoa yabana', beenan' nake' beñ' bishaa, beñ' zan' na' xña'.

### Jempl çe to beñ' goz gooñ

(Mr. 4:1-9; Lc. 8:4-8)

**13** Na' lo llana'tezə wza' Jesúza' yoona' gana' zoe' na' jchi'e cho'a niso'na'. <sup>2</sup> Na' daa bdop beñ' zan gana' chi'e, na' wyep'e' jshie' to loo barkw. Na' yog' beñ'ka' bdop bllag wzegake' cho'a niso'na'zə. <sup>3</sup> Na'ch bseese zə jemplka' kwençe bli' bsdile' legake', chi'e:

—To beñ' goz gooñ wzee zeje' goza'. <sup>4</sup> Na' ka zej chzalee biñna', bxop bałan cho'a neza' na' bllin byinka' wdaogakban. <sup>5</sup> Na' zi bałan bxop ladj yajka' gana' bitek chi' yona', na' lobe' bilaan daa bi wyazan zitj. <sup>6</sup> Na' ka wña'n wbillia', bkwedan na' wbilliten daa bitek bde loinna'. <sup>7</sup> Na' zi bałan bxop ladj yag yesh'ka', na' bgol yag yesh'ka' na' bi be'gakan latj igolgakan. <sup>8</sup> Na' zi bałan bxop lo yo wenna', na' wllia'chgan. Bałan wllia to guiyoa, na' zi bałan wllia guiyon na' zi bałan wllia shi-choa. <sup>9</sup> Ka le' chenile dga nia', li sen wñeyi.

**Jesúza' bzajniile' biçhe chzoe' jemplka'**

(Mr. 4:10-12; Lc. 8:9-10)

<sup>10</sup> Na' beñ'ka' nak Jesúza' txen jabig'gake' kwite'na', wñabgakile'ne':

—¿Biçhe chseeso jemplka' kat' chli' chsedilo' beñ'?

<sup>11</sup> Na' che' Jesúza' legake':

—Chioza' cho'e latj iñezile ka nak ye! wñabia' che'na' daa kono ñezi. Na' beñ'ka' bi nak nad' txen, bi cho'e latj iñezgakile'n. <sup>12</sup> La' beena' ze wñeyi shajniile' Cho'a Xtill' Chioza', zizikli shajni'chile'n. Na' beena' bi se wñeyi shajniile'n, na' ga!-lallee daa ba wyajniile' lat'. <sup>13</sup> Daan chseesaa jemplka' kat' chzajniid' legake'. La' beñ'ka' chwiategake' na' bi chakbe'gakile' bin zeji daa chon', na' chengakile' daa chña' na' bi chajni'gakile' bin zejin, daa bi chajle'gake' cha'. <sup>14</sup> Na' daa chongake' ka', chill-inin ka wna dii Isaíaza' ka wdixji'e daa goll Chioza'ne', daa na:

La'kzi yengakile', aga wyajni'gakile' bi zeji daa yengakile'.

Na' la'kzi ile'gakile', aga wakbe'gakile' bi zeji daa ile'gakile'.

<sup>15</sup> La' yichjall'do'eka' ncho! nntin, na' chongake' ka beñ' ndap naguín na' ka beñ' nshod' jalawin.

She! bi chongake' ka', na' shajni'gakile' daa chzajniid' legake'

na' chazan loo yichjall'do'eka'

na' yiyaj yilengakile' dii malka' chongake', na' yiyongakee sto beñ' wen.

<sup>16</sup> Per chakomba le' chakbe'ile bi zeji diika' chle'ile chon' na' chajniile diika' chli' chsedid'. <sup>17</sup> Dii li nia' le', zan dii beñ'ka' wdixjee daa goll Chioza' legake' na' zan dii beñ'ka' bsa' cheyin wen lao Chioza' goklall'gake' ile'gakile' ka dga chle'ile ñaa, na' bi ble'gakile'n. Na' goklall'gake' yengakile' ka dga chenile ñaa na' bi ben-gakile'n.

**Bizajnií Jesúza' legake' bi zeji jempl che beñ' goz gooña'**

(Mr. 4:13-20; Lc. 8:11-15)

<sup>18</sup> Li wzenag bin zeji jempl che beñ' goz gooña'.

<sup>19</sup> Beena' cheni cho'a xtill' Chioza' daa chzajniin le' che ye! wñabia' che'na', na' bi chajniile'n, nake' ka cho'a neza' gana' bxop binña' daa wdao byiñdo'ka', la' dii xi-waa chikwasan cho'a xtill' Chioza' daa wyoo loo yichjall'do'ena'. <sup>20</sup> Na' beena' cheni cho'a xtill' Chioza' na' le' chibaile' chlebe'n, nake' ka ladj yajka' gana' bxop binña' <sup>21</sup> daa bitek bi loin bde na' bi bdian. La' kat' bi chak che' wa chchi' chsak' beñ' le' ni che cho'a xtill' Chioza', na' lii chbejte yichje'n. <sup>22</sup> Na' beena' cheni cho'a xtill' Chioza' per chi' yichje' diika' chak che' na' chze-lall'tie' ye! wni'ana', na' chsej chllongakan gon xshin cho'a xtill' Chioza' lo ye! mban che'na'. Beenan' nake' ka daa bla' ladj yag yesh'ka' daa bi be'gakan latj igolan. <sup>23</sup> Per beena' cheni cho'a xtill' Chioza' na' chajniile'n na' chone' ka nan, nake' ka yo wenna' gana' bxop binña',

na' bañan wllian to guiyoa, bañan do guiyon, na' zi bañan wllian shichoa.

**Jempl che yixaa daa bla' ladj trígona'**

<sup>24</sup> Na' bsees' Jesúza' sto jempl, chi'e legake':

—Ye! wñabia' che Chioza' nakan ka to beñ' goze' biñ wenna' lo yell-lío che'na'. <sup>25</sup> Per wal' chela' shlak chese', wyaj to beñ' chakzbanile'ne' jeze' ladj trígona' daa nak xenin, na' ka biyoll bene' ka' bizee. <sup>26</sup> Na' ka bgol trígona' na' na' wllian, na' lekzka' bgolte xeninna' ladjinna'. <sup>27</sup> Na' wyaj wen llinka' jellgake' xaninna': "Beñ'do', çaa-ga biñ wenna' jezo' lo cho'na'? çGara wza' xeninna' lenzan ladjinna', lla?" <sup>28</sup> Na' che' xaninna' legake': "No-chod' beñ' chakzbanile' nad' jene' ka'." Na' goll wen llinka' le': "¿Acheenilo' shajnto' lljalall'nto'n?" <sup>29</sup> Na' chi'e legake': "Bi lljalall'len, la' nxoll lente trígona' wlall'le. <sup>30</sup> San igol-lenchan trígona', na' kat' illin lla yichog-gake'n, na' yep' beñ'ka' zigaate yilall'gake' xeninna' na' gongake'n shlen wej kwenche sheyan, na'tech yitop-gake' trígona' na' yigooshao'gake'n loo lillinna'."

**Jempl che sa mostásana'**

(Mr. 4:30-32; Lc. 13:18-19)

<sup>31</sup> Na' lekzka' bzoa Jesúza' sto jempl, chi'e:

—Ye! wñabia' che Chioza' nakan ka sa mostásana' daa goz to beñ' lo yell-lío che'na'. <sup>32</sup> La'kzi sa mostásana' nakan liizelozí diido' yid lao bichlè sa yix' kwan, kat' chla'n na' chgolan na' chakan dii xench aga ka yix' kwanka' sto, na' ax't byiñdo'ka' chon lillbka' lo xozinna'.

**Jempl che lewadúrana'**

(Lc. 13:20-21)

<sup>33</sup> Na' lekzka' bzoa' sto jempl, chi'e:

—Ye! wñabia' che Chioza' nakan ka lewadúrana' daa chçhix to noolè shoña rob yezja' kwenche yisgolan kwa che yetxtila'.

**Jesúza' bchine' jemplka'**

(Mr. 4:33-34)

<sup>34</sup> Jesúza' toshiizi bchine' jemplka' ka bi'e dill' ladj lao lkwe' beñ'. <sup>35</sup> Na' daa ben Jesúza' ka', billinin daa wdix-jee to beñ' daa goll Chioza'ne', ka wne':

Wchin' jemplka' ka we'len' beñ' dill'.

We'len' beñ' dill' cheyi daa konoñ' iñezi dezd kana' bxe bsilte Chioza' yell-lioni.

**Bizajnií Jesúza' bi zeji jempl che yixaa daa bla' ladj trígona'**

<sup>36</sup> Na' bisa' Jesúza' beñ'ka' lle' na', na' biyo'e loo yoona'. Na' beñ'ka' nakgake'ne' txen jabig'gake' kwite'na' che'gake'ne':

—Bizajnií neto' bi zeji jempl che xen trígona'

<sup>37</sup> Na' goll Jesúza' legake':

—Kin zejin: Nad', Beñ' Bsel' Chioza' Yell-lioni, zak-lebid' beena' goz trígona'. <sup>38</sup> Na' doxen yell-lioni zak-lebin gana' goz beena' trígona'. Na' beñ'ka' choe'gake'



latj chñabia' Chioza' yichjall'do'eka' zaklebgakile' trígona'. Na' beñ'ka' choe'gake' latj chñabia' dii xiwaa yichjall'do'eka' zaklebgakile' xen trígona'. <sup>39</sup> Na' dii xiwaa zaklebin beñ' mala', beena' jez ladj trígona' daa nak xenin. Na' llana' chilapgake', zaklebin llana' kwiayi' yell-lioni. Na' anjka' zaklebgakile' beñ'ka' chizi' chilap trígona'. <sup>40</sup> Na' ka chitopgake' daa nak xen trígona' kwenche wzeygake'n, ka'kzan gak che beñ'ka' chñabia' dii xiwaa yichjall'do'eka' ka illin lla kwiayi' yell-lioni. <sup>41</sup> Nad', Beñ' Bsel' Chioza' Yell-lioni, wselaa anjl cha'ka' kwenche yitopgake' beñ' wen dii malka' na' beñ'ka' chzechgake' beñ' yoblə gongake' dii mala'. <sup>42</sup> Na' wza'lgake' legake' lo yi' gabi'la' gana' kwellyesh'gake' na' gaoxaxj leye'ka' daa le gakshejlall'gake'. <sup>43</sup> Na' beñ' li beñ' shao'ka' sho'gake' balaan choo balaan xen yabana' gana' chñabia' Xacho Chioza'. Ka le' chenile dga nia', li sen wneyi.

### Jempl che mecha' ngash'

<sup>44</sup> 'Yel' wñabia' che Chioza' nakan ka to mech xen dii ngash' to lo yell-lio che beñ' gana' to beñ' jadi'en. Na' na'tezə bikwasheen, na' chibaile' jayet' jadie' yog' dii de che' kwenche bizi'e yell-liona' gana' ngash' mecha'.

### Jempl che to perla dii zak'chga

<sup>45</sup> 'Yel' wñabia' che Chioza' zaklebin to beñ' chone' delgens che perla dii zak'chga. <sup>46</sup> Na' ka bllelile' to dii lizelozi zakii, na'ch jayet' jadie' yog' dii de che' kwenche wxi'en.

### Jempl che yixj che bel'a

<sup>47</sup> 'Yel' wñabia' che Chioza' zaklebin to yixj che bel'. Beñ'ka' chzen bel'a chza'lgake' yixja' loo nisdona' na' chzenan zan kwen bel'. <sup>48</sup> Na' kat' chill'a' yixja' na' chibejgake'n cho'a nisdona' na' chbe'gake' chibegake' bel'ka' nak wen na' chgooshao'gake'b to loo llom, na' baka' bi nak wen, chchoongake'b. <sup>49</sup> Kan' gak che benecha' ka illin lla kwiayi' yell-lioni. Anjka' yibegake' beñ' wenka' ladj beñ' malka', <sup>50</sup> na' wza'lgake' beñ' mal'ka' lo yi' gabi'la' na' kwellyesh'gake' na' gaoxaxj leye'ka' daa le gakshejlall'gake'.

### Dii koba' na' dii gola'

<sup>51</sup> Na'ch che' Jesúza' beñ'ka' nakgake'ne' txen:

—¿Azajniile yog' daa ba bli' bsedid' le'?

Na'ch che'gake'ne':

—Awe, zajniinto'n.

<sup>52</sup> Na' chi'e legake':

—Beena' chli' chsedi leya' na' nzedile' che yel' wñabia' che Chios, beena' zoa yabana', zaklebile' to xan yoo beñ' ngooshawee dii zan dii zakii, ka dii kob na' ka dii gol, na' chbeje'gakan chchine'gakan.

### Jesúza' biyaje' Nazareta'

(Mr. 6:1-6; Lc. 4:16-30)

<sup>53</sup> Ka biyoll bsees' Jesúza' jemplka', na' bizee. <sup>54</sup> Na' ka billine' yell Nazareta' gana' bgole', na' bli' bsedile' beñ'

Israelka' chdop chllag gana' choe'lwilgake' Chioza'. Na' bibani beñ'ka', che'gake':

—¿Gara jxi' beeni yel' sin' che'na', na' nak chak chone' yel' wakka'? <sup>55</sup> ¿Aaga xiin karpintera'zan na' xneena' lie' María? Na' ¿aaga beñ' bishee Jacóbona', Joséna', Simónna' na' Júdaza'? <sup>56</sup> Na' beñ' zane'ka' zoagake' lallchoni. ¿Gara jasede' yog' lo' diiki chli' chsedile', lla?

<sup>57</sup> Na' daa bi wyajle'gake' che Jesúza', na' golle' le'gake':

—To beñ' chyixjee daa che' Chioza'ne', gattez chgoogake'ne' balaan san lall lille'na' aga no chgoo le' balaan.

<sup>58</sup> Na' aga bitek yel' wak ben Jesúza' yell Nazareta' daa bi wyajle'gake' che'.

### Betgake' Juanna', beena' bchoa beñ' nisa'

(Mr. 6:14-29; Lc. 9:7-9)

**14** Na' do kana', Heródeza', beena' chñabia' gana' mbani Galileana', benile' ka nak daa chon Jesúza'. <sup>2</sup> Na' golle' beñ'ka' chon xshine'na':

—Beenan' dii Juanna', beena' bchoa beñ' nisa'. Ba bibane' ladj beñ' wetka', daan chak chone' yel' wakka'.

<sup>3</sup> La' kana' ni mban dii Juanna', Heródeza' bselee beñ' bex'gake'ne' na' wloogake'ne' lillyana' ni che Herodíaza' xool beñ' bisheena', beena' le Felipe. <sup>4</sup> La' dii Juanna' golle' Heródeza':

—Bi nakan wen nkoo xool beñ' bishoona'.

<sup>5</sup> Na' daa golle'ne' ka' goklall' Heródeza' wite'ne', per bi biyaxjile' daa bllebe' beñ'ka' chajle' daa nak Juanna' to beñ' chyixjee daa che' Chioza'ne'. <sup>6</sup> Per ka wya'i Heródeza' yiz, bi' nool wew' che Herodíaza' byaab' lao beñ'ka' lle' Inina'. Na' daa le biyoolallii Heródeza' ka byaab' <sup>7</sup> axt bzo'e' Chioza' de taschiw bchebe' wi'eb' bit-tezə dii inabib' le'. <sup>8</sup> Na' kon ka bzajni xna'baab' bem', na' che'b' Heródeza':

—Yichj Juanna', beena' chchoa beñ' nisa', cheenid' goño'n nad' to lo plat llilj.

<sup>9</sup> Na' gokyeshii Heródeza', per daa ba bcheble' lao yog' beñ'ka' goxe' Inina' wi'eb' kon daa inabib' le', benchaze' byen we'gake'b' daa wñabb'. <sup>10</sup> Na' bselee beñ' jachoggake' yichj Juanna' loo lillyana'. <sup>11</sup> Na' bliagake'n to lo plat llilj na' be'gake'n bi' nool wewaa na' be'baan xna'baa.

<sup>12</sup> Na'ch beñ'ka' wdalen Juanna' txen wyajgake' jaxi'gake' kwerp che'na' na' bkwash'gake'n. Na' wdena' jellgake' Jesúza' ka gok.

### Jesúza' bwawe' gayaa mil beñ'

(Mr. 6:30-44; Lc. 9:10-17; Jn. 6:1-14)

<sup>13</sup> Na' ka wñezi Jesúza' daa gok che Juanna', bizee gana' zoe' na' biyo'e to loo barkw ziyaje' gana' kono beñ' lle'. Na' ka wñezi beñ'ka' lle' yellka' lla gaozə cho'a nisdona' galan zej Jesúza', na'ch wloogake' nez janogake'ne'. <sup>14</sup> Na' ka bichej Jesúza' loo barkwa', ble'ile' beñ' zan inlleb ba lle' na', na' biyeshile' legake' na' biyone' beñ'ka' bi shao'. <sup>15</sup> Na' ka ba wlle', na'ch

ben'ka' nak Jesúza' txen jabig'gake' kwite'na', che'gake'ne':

—Ba wlle' naa, na' gani lle'cho kono zoa wit' dii gaocho. Goll ben'ki yiyajgake' yellka' llia gaozə kwenche lljxi'gake' dii gaogake'.

<sup>16</sup> Na' che' Jesúza' legake':

—Bi chonan byen yiyajgake'. Len', li we' dii gaogake'.

<sup>17</sup> Na' che'gake'ne':

—Gay'chga yetxtil na' zi çopchga beļ noa'nto' ni.

<sup>18</sup> Na' che' Jesúza' legake':

—Li goṅshkin ni.

<sup>19</sup> Na'ch golle' ben'ka' kwe'gake' lo yixa'. Na' beṅee yetxtilka' gay' na' beļka' çop na' blis lawe'na' yabana' na' bi'e Chioza' yeļ' choṅken. Na'ch bxoṅje' yetxtilka' na' bi'en ben'ka' nakgake'ne' txen kwenche be'gake' che che ben'ka'. <sup>20</sup> Na' wdao yog'loļ ben'ka' axt ka beljgake'ile'. Na' ka bidaogake', na'ch bitopgake' diika' bgaan, na' biyakan shliṅ xet'. <sup>21</sup> Na' ben' byoka' wdao gokgake' ka do gayaa mil, na' bi blabgake' noolka' na' bi'do'ka' wdao.

### Jesúza' wzee lo nisdona'

(Mr. 6:45-52; Jn. 6:16-21)

<sup>22</sup> Ka wde dga bigoo Jesúza' ben'ka' nakgake'ne' txen to loo barkw kwenche yilag'gake' shlaa nisdona' to lez-gake', na' le' bigaane' kwenche bisee ben'ka' bdoṅ billag. <sup>23</sup> Na' wde bisee ben'ka', na'ch wyepe' to lo yaa kwenche jelwille' Chioza' toze'. Na' ni zetie' lo yaana' ka goļ. <sup>24</sup> Na' barkwa' gana' ziyoo ben'ka' nakgake'ne' txen ba zejan gchoļ nisdona'. Chakan to ki to ka'lə daa chas chat' nisa', na' be'na' bi cho'en latj yiyajan shli'cha. <sup>25</sup> Na' zbaļz biyetj Jesúza' lo yaana' na' bizee tlo nisdona' zeje' gana' zejlagake'. <sup>26</sup> Na' ka ble'i ben'ka' non Jesúza' txen zeje' tlo nisa', le bllebgake' na' axt besyaa-gake', nagake':

—iBa za' to yel bṅen!

<sup>27</sup> Na' lii wṅete Jesúza' legake', chi'e:

—Bi illeble. Nad'kzan'.

<sup>28</sup> Na'ch wṅe Pédrona' chi'e:

—Ḳan', shi lin', ben ka gak saa lo nisi kwenche yid' kwito'na'.

<sup>29</sup> Na' che' Jesúza'ne':

—Dashka'.

Na'ch bchej Pédrona' loo barkwa' na' wzoloe' chzee tlo nisa' nan shaje' kwit Jesúza'. <sup>30</sup> Per ka gokbe'ile' zechga be'na', na' bllebe' na' lii wzolote chbi'e yel, na'ch besyee chi'e:

—iḲan', bisla nad'!

<sup>31</sup> Na' lii biyox'te Jesúza' neena', chi'ene':

—iBerache gokçhopzilo? iBiçe bi nxenilalloo nad' kwasloļ?

<sup>32</sup> Na' kon ka biyoogake' loo barkwa' na' bgan be'na'.

<sup>33</sup> Na' ben'ka' bgaan loo barkwa', be'la'ogake' Jesúza' na' gollgake':

—Dii li, lin' Xiṅ Chioza'.

Jesúza' biyone' ben'ka' bi shao' gana' mbani Genesareta'

(Mr. 6:53-56)

<sup>34</sup> Na' ka blag'gake' shlaa nisdona' na' bllingake' gana' mbani Genesareta'. <sup>35</sup> Na' ben' Genesaretk'a' biyombia'gake' Jesúza' na'ch bzengakile' ben' yellka' lle' gao nan ba bllin Jesúza'. Na' jwa'gake' yog' ben'ka' bi shao' lawe'na', <sup>36</sup> na' got'yogakile'ne' wi'e latj la'ch' goṅ ben' we'ka' xe'na', na' yog' ben'ka' beṅ'gake'n biyakgake'.

### Daa chxiṅj yichjall'do' benecha'

(Mr. 7:1-23)

**15** Baļ fariseoka' na' ben'ka' chli' chsedi leya', wza'gake' Jerusalenna' na' wyajgake' lao Jesúza', wṅabgakile'ne':

<sup>2</sup> —iBiçe ben'ki nakgake' li' txen bi chongake' ka wyoolo dii xoṅxto'choka'? La' bi chixis chiyib neeka' ka zi' gaogake'.

<sup>3</sup> Na' wṅabi Jesúza' legake' chi'e:

—iBiçe chyishjle daa nllia Chioza' bia' gonle na' zechle wṅeyi chonle ka ben dii xoṅxto'choka'? <sup>4</sup> La' kin wna Chioza': "Li gap ṅaxṅa'le balaan", na' "Beena' iṅe zban che xe'na' wa xṅeena', chiyal' guete'." <sup>5</sup> Per le', nale wak ye' ben' ṅaxṅeena': "Bi gak gaken' le', la' yog' daa nap' ba ncheb' wi'an Chioza'." <sup>6</sup> Na' beena' yee ṅaxṅeena' ka', cho'allalene' daa nale bi chonan byen gaken' legake'. Na' daa chonle ka', chonile daa nllia Chioza' bia' goncho ka to dii bibi zakii kwenche nole diika' wyoolo dii xoṅxto'choka'. <sup>7</sup> iLe' ben' wxiye', le' wen gan! Kwasloļ inlleb be' dii Isa'aza' xtill'le, ka wne':

<sup>8</sup> Ben'ki choe'la'ogake' nad' de cho'a loļ'zgake', la' aga do yichj do lall'gaken' choe'la'ogake' nad'.

<sup>9</sup> Bibi zjanayin chonzgake' ka ben' choe'la'o nad'; na' diika' chli' chsedgakile' nakgakan che ben' yell-li-oz.

<sup>10</sup> Na' wṅe Jesúza' ben'ka' lle' na', golle' legake':

—Li wzenag dga inia' le' na' li shajniin. <sup>11</sup> Aga daa cheej chao beṅaan chxiṅj chlenan yichjall'do'ena', san dill'ka' chchej cho'enan', lennan' chxiṅj chlenan yichjall'do'ena'.

<sup>12</sup> Na'ch ben'ka' nak Jesúza' txen wbig'gake' kwite'na', gollgake'ne':

—iAzakbe'ilo' gokzi'chgayi fariseoka' ka bengakile' wno' ka'?

<sup>13</sup> Na'ch goll Jesúza' legake':

—Nottezə ben' bi chzenague' che Ḳa'na' zoa yabana', yiyol yinite', na' gak che' ka chak che to yag dii chlall' ben' do loyin. <sup>14</sup> Jwayishazi fariseoka', la' nnit nçholgak-ilen'. Na' ṅezicho shi to ben' lçhoļ wçhi'e sto ljjwell lçhoļe', çhoptie' lljabix.

<sup>15</sup> Na'ch Pédrona' golle' Jesúza':

—Bizajniin neto' bi zejṅ jempla' daa ba bseesoo.

<sup>16</sup> Na'ch goll Jesúza' legake':

—iAlekzka' lenle biṅ' shajniile bi zejṅ daa ba wnia'?

<sup>17</sup> iAbi ṅezile nan daa cheej chaocho chjche'n loo lee-chona' na'tech chiden? <sup>18</sup> Per ka nak daa chṅecho, len-

nan' chalj chxen loo yichjall'do'chona'. Na' shi chnecho dii bi nak wen, lannan' chxinj chlenan cho'. <sup>19</sup> La' loo yichjall'do' benechan' chalj chxe diiki bi nak wen: yel' chon xya, yel' chnelen ljwellin, yel' wban, yel' chyiljall' che ben', na' yel' chbell chne che ben'. <sup>20</sup> Diikin chxinjan yichjall'do' ben', aga daa bi chixis chiyib neena' ka zi' gawen'.

### To noolə bi nak ben' Israel benjilallee Jesúza'

(Mr. 7:24-30)

<sup>21</sup> Na' biza' Jesúza' wyaje' gana' mbani yell Tírona' len yell Sidónna'. <sup>22</sup> Na' to noolə cananea zoe' gana' mbani yellka' wbigue' kwite'na' na' wnie' zilljə, chi'ene':

—Xan', Xiin dia che dii Daví, biyesh'lall'gachi nad', la' bi' nool cha'na' yoob' dii xiwaa na' le chsak'zi'n le'b'.

<sup>23</sup> Per Jesúza' bikzə bi golle' noola'. Na'ch ben'ka' nakgake'ne' txen wbig'gake' kwite'na' gollgake'ne':

—Goll nooli yiyaje', la' kon chosyee zidnoe' cho'.

<sup>24</sup> Na'ch goll Jesúza':

—Bsel' Chioza' nad' kwenche gaklen' to ben' Israel-ka'zə, ben'ka' nak ka xil'ka' wnit.

<sup>25</sup> Na'ch noola' jabiguae kwit Jesúza' na' b'chek' xibe'na' lawe'na' chi'ene':

—iXan', goklengach nad'!

<sup>26</sup> Na'ch che' Jesúza'ne':

—Bi nakan wen yikaacho yel' wawa' chao bi'do' chechoka' na' we'chon bekw'ka'.

<sup>27</sup> Na'ch noola' chi'ene':

—Lekzilo', Xan', per chak chao xikw'choka' diika' chxop lo yona'.

<sup>28</sup> Na'ch goll Jesúza'ne':

—iNoolə, nonjilall'likzo' nad'! Na' gak ka cheenilo'.

Na' katena' lii biyakteyi bi' nool che'na'.

### Jesúza' biyone' ben' zan

<sup>29</sup> Na' biza' Jesúza' na', na' billine' cho'a nido' che Galileana' na' wyepe' to lo yaa jchi'e. <sup>30</sup> Na' ben' zan bllin lawe'na' nche'gake' no ben' bi chak sa', no ben' l'choj, no ben' bi chak inə, no ben' nxinj, no ben' chak bichlə yillwe'. Na' bzoagake' legake' lao Jesúza' na' biyone' legake'. <sup>31</sup> Na' bibani ben'ka' ka gok, la' ben'ka' bi chak inə wnegake', na' ben'ka' nxinj biyagkake', na' ben'ka' bi chak sa' wza'gake', na' ben' l'chojka' ble'gakile'. Na'ch yog'loj ben'ka' be'la'ogake' Chios, beena' choe'la'o ben' Israelka'.

### Jesúza' bwawe' tapa mil ben'

(Mr. 8:1-10)

<sup>32</sup> Na'ch gox Jesúza' ben'ka' nakgake'ne' txen, na' golle' legake':

—Le chiyeshid' ben'ki, la' ba gok shon lla zoalengake' cho' ni, na' aga bi de dii gaogake'. Na' bi cheenid' yisangakee daa bin' gaogake', la' nxoll ikwidgakile' tneza'.

<sup>33</sup> Na' che' ben'ka' nakgake'ne' txen:

—Per zga lljxi'cho dii gao yog'loj ben'ki?, la' gani lle'cho kono zoa wit' dii gaocho.

<sup>34</sup> Na'ch wñabi Jesúza' legake', chi'e:

—zZi balchga yetxtil chechoka' de?

Na' che'gake'ne':

—De gall yetxtilka' na' sto chop bel.

<sup>35</sup> Na'ch goll Jesúza' ben'ka' kwe'gake' lo yona'. <sup>36</sup> Na' bexee yetxtilka' gall na' belka' na' bi'e Chioza' yel' choxken, na' bxoje'n bi'en ben'ka' nakgake'ne' txen kwenche be'gake' che che ben'ka'. <sup>37</sup> Na' yoguee wdao axt ka beljgakile'. Na' wdena' bitopgake' dii lao'ka' bi-choonən, gokten zi gall xet'. <sup>38</sup> Na' ben' byoka' wdao nakgake' tapa mil, na' bi blabgake' noolka' ni bi'do'ka' wdao. <sup>39</sup> Na' biyoll bisa' Jesúza' legake', biyo'e to loo barkw len ben'ka' nakgake'ne' txen na' biyajgake' gana' mbani yell Magdálana'.

### Fariseoka' na' saduceoka' wñabgakile' Jesúza' gone' to yel' wak

(Mr. 8:11-13; Lc. 12:54-56)

**16** Fariseoka' len saduceoka' jawiagake' Jesúza' na' wñabgakile'ne' gone' to yel' wak dii ile'gakile' kwenche wli'n shi Chiozan' bseleene'. <sup>2</sup> Na' goll Jesúza' legake':

—Shlle'na' chwiale xan yabana' na' nale: “Le yillaa wxə, la' le nlatjcha.” <sup>3</sup> Na' shi chibe'cha shzila' na' nale: “Wak yeja' la' ba bibe'cha.” Le' chakbe'ile shi gak zey' wa gak yej daa chwiale ka nak xan yabana', per aga chakbe'ile bin zeji diika' chon Chioza' llaki zoacho naa. <sup>4</sup> Le' nakle ben' mal na' ben' bi chzenag che Chioza', chñable ile'ile' to yel' wak kwenche wli'n shi Chioza' bselee nad', per bi wliid' le' daa chñable. Lete ile'ile sto yel' wak ka daa ben Chioza' che dii Jonáza'.

Na' wde goll Jesúza' legake' ka', na' bizee kwite'ka' ziyaje'.

### Dill' wxiye' che fariseoka' zaklebin lewadúrana'

(Mr. 8:14-21)

<sup>5</sup> Na' ka bllingake' shlaa nido'na', ben'ka' nakgake'ne' txen goj-lall'gake' wa'gake' yetxtila'. <sup>6</sup> Na' goll Jesúza' legake':

—Wsak'gale bi shajle'le dill' wxiye' che fariseoka' na' saduceoka', daa zaklebi lewadúrana'.

<sup>7</sup> Na' che' ljwellgake':

—Daa goj-lall'cho wa'cho yetxtilan' ne' cho' ka'.

<sup>8</sup> Na' gokbe'i Jesúza' daa che' ljwellgake' na' golle' legake':

—zBiçhe nazle bibi yetxtila' bia'le? zBiçhe bi nxeni-lall'le nad' kwas'loj? <sup>9</sup> zAbikzan' shajniile ka nak diika' chon'? zAbi chjadinile kana' wdao gayaa mil ben' kon gay'zə yetxtilka' na' bal xet' dii bixjka' bitople? <sup>10</sup> Na' zshera kana' wdao tapa mil ben' kon gallzə yetxtilka'? zAbi chjadinile bal xet' dii bixjka' bitople? <sup>11</sup> zBiçhe che yetxtila'lə wyajnzile ka wnia' wsak'gale che lewadura che fariseoka' len saduceoka'?

<sup>12</sup> Na' kana'ch wyajni'gakile' nan aga che lewadura che yetxtilan' chi'e legake' wsak'gale san diika' chli' chsedi fariseoka' len saduceoka'lan.

**Pédrona' chi'e Jesúza'n nake' Crístona'**  
(Mr. 8:27-30; Lc. 9:18-21)

<sup>13</sup> Na' ka bllin Jesúza' len beṅ'ka' nakgake'ne' txen gana' mbani yell Cesarea che Filípona', na'ch chi'e le-gake':

—¿Non na beṅ' yell-liona' nak', nad', Beṅ' Bseḷ' Chioza' Yell-lioni?

<sup>14</sup> Na' che'gake'ne':

—Baḷe' nagake' nako' dii Juanna', beena' bchoa beṅ' nisa', na' zi baḷe' nagake' nako' Elíaza', na' zi baḷe' nagake' nako' dii Jeremíaza', na' baḷe' nagake' nako' sto beṅ' chyixjee daa che' Chioza'ne'.

<sup>15</sup> Na'ch chi'e le-gake':

—¿Shera le'? ¿Nora nale nak'?

<sup>16</sup> Na' Simón Pédróna' chi'ene':

—Lin' Crístona', Xiṅ Chios yaa Chios banna'.

<sup>17</sup> Na' Jesúza' chi'ene':

—Chakomba li' Simón, xiṅ Jonás, la' aga nochlan bzajni li' daa ba wno'. Xa'na' zoa yabanan' ba bzajni-ile'n li'. <sup>18</sup> Na' nad' nia' li', lin' lio' Pedro, daa zeji yaj, na' gako' ka to yaj wal na' lin' wchin' kwenche gono' ka shanch beṅ'ka' gonjilall'gake' nad', na' ni yeḷ' wita' bi yizoin williayi'n beṅ'ka' ba wlej' kwenche nakgake' lall' na'. <sup>19</sup> Na' gon' li' yeḷ' wṅabia' daa zaklebi to xiṅya dii chsaljan yabana' gana' chṅabia' Chioza'. Na' diika' iṅo' bi chiyaḷ' gon beṅ' yell-lioni, lekzka' iṅa Chioza' zoa yabana', na' diika' iṅo' wak gongake', lekzka' iṅa Chioza' zoa yabana'.

<sup>20</sup> Na' goll Jesúza' beṅ'ka' nakgake'ne' txen ni to kono ye'gake' len' Crístona', beena' bseḷ' Chioza' iṅabi'e.

**Jesúza' bi'e dill' witgake'ne'**  
(Mr. 8:31-9:1; Lc. 9:22-27)

<sup>21</sup> Na' lo llana' wzolo Jesúza' bzajniile' beṅ'ka' nakgake'ne' txen daa llia bia' gak che'. Golle' le-gake' chonan byen yiyaje' Jerusalénna' kwenche gake' lo na' beṅ' golka' chṅabia' na' lo na' bṅozka' chṅabia' na' lo na' beṅ'ka' chli' chsedi leya', na' le wsak'zi'gake'ne', na' chonan byen witgake'ne' na' ka gak shon' lla yibane' ladj beṅ' wetka'. <sup>22</sup> Na'ch Pédróna' wleje' Jesúza' ladj beṅ'ka' chi'ene':

—Xan', jbat gak cho' ka ba wno'!

<sup>23</sup> Na' biyečhj Jesúza' chi'e Pédróna':

—Kwas ka'lə, Satanás. Cheenzilo' bi gon' daa llia bia' gon' daa bi yoo yichjo' daa cheeni Chioza', san daa nak che yell-liozan yoo yichjo'.

<sup>24</sup> Na' che' Jesúza' beṅ'ka' nakgake'ne' txen:

—Shi no cheeni gon nad' txen, chiyaḷ' wsanlall' kwine', na' izani yeḷ' mban che'na' yen ile'ile' bittez ni cha', na' gone' ka chazlallaa. <sup>25</sup> La' beena' bi chzani yeḷ' mban che'na', beenan' kwiaiyi', san beena' chzani yeḷ' mban che'na' yen ile'ile' bittez ni cha', beenan' gat' to yeḷ' mban che' zejli kaṅi. <sup>26</sup> ¿Bera zjanayin gap beṅ' yog'te dii de yell-lioni, shi le' kwiaayee? Aga bi de wi'e lo laz yeḷ' mban che'na' kwenche bi kwiaayee. <sup>27</sup> La' nad', Beṅ' Bseḷ' Chioza' Yell-lioni, yiyed' len anjl' cha'ka' zinsa' balaan' xen che Xa' Chioza'. Kana'chan chixj' to to beṅ'

kon ka dii bene'. <sup>28</sup> Dii li' nia' le', baḷ-le lle'le ni, ni mban-le ile'ile yeḷ' wṅabia' cha'na', nad', Beṅ' Bseḷ' Chioza' Yell-lioni.

**Biyak Jesúza' nlla'lə**  
(Mr. 9:2-13; Lc. 9:28-36)

**17** Ka wde xop lla, bche' Jesúza' Pédróna', na' Jacóbona' len beṅ' bishee Juanna', na' to lez-gake' wyajlene' to lo yaa xen. <sup>2</sup> Na' ka lle'gake' lo yaana', gok Jesúza' nlla'lə lawe'ka'. Wyp wyeeni' cho'alawe'na' kakzə wbillā', na' xe'na' nakwe' gokan xtil llyish axt chey cheeni'n. <sup>3</sup> Na' beṅ'ka' lle'lengake'ne' ble'gakile' dii Moiséza' na' Elíaza' chshaljengake' Jesúza'. <sup>4</sup> Na'ch Pédróna' golle' Jesúza':

—Xan', le mbalaz zoacho ni. Shi cheenilo', gon' shon' ransh, ton cho', ston che Moiséza' na' ston che Elíaza'.

<sup>5</sup> Na' ka golle' ka', betj to bej dii chey cheeni' na' bkwashaan le-gake', na' loo beja' bengakile' che' Chioza':

—Beenin Xiṅnaa, beena' chakid', na' chazlall'chga' ka chone'. Li' wzenag che'.

<sup>6</sup> Na' beṅ'ka' nak Jesúza' txen, ka bengakile' wṅe Chioza', le bllebchgagake' na' to bdoszgake' lo yona'.

<sup>7</sup> Na' wbig' Jesúza' kwite'ka' bexee le-gake', chi'e:

—Li' yiyas. Bi illeble.

<sup>8</sup> Na' ka bilis yichje'ka', koch no beṅ'ka' ble'gakile', stochga Jesúza'.

<sup>9</sup> Na' ka biza'gake' lo yaana' goll Jesúza' le-gake':

—Ni to kono ye'le ka nak dga ba ble'ile axt kat'ch nad', Beṅ' Bseḷ' Chioza' Yell-lioni, ba biban' ladj beṅ' wetka'.

<sup>10</sup> Na'ch beṅ'ka' nak Jesúza' txen che'gake'ne':

—¿Berache naz beṅ'ka' chli' chsedi leya' zigaate Elíazan' yiyed'?

<sup>11</sup> Na' goll Jesúza' le-gake':

—Dii li' ka nakannan', zigaate Elíazan' yiyede' yigwee xnezi yog'loḷte. <sup>12</sup> Per nad' nia' le', ba biyed Elíaza', na' bi gokbe'gakile' shi len'. Na' bengakile'ne' kon ka wnanan' chegake'. Na' ka'kzan gongakile' nad', Beṅ' Bseḷ' Chioza' Yell-lioni.

<sup>13</sup> Na' gokbe'gakile' nan che Juanna', beena' bchoa beṅ' nisan' cho'e dill'.

**Jesúza' biyone' to bi' chaz shon'**  
(Mr. 9:14-29; Lc. 9:37-43)

<sup>14</sup> Na' ka billingake' gana' lle' lla' beṅ', na'ch bchej to beṅ' jabigwee kwit Jesúza' na' bchek' xibe'na' lawe'na', chi'ene':

<sup>15</sup> —Maestro, biyesh'gachi bi' cha'ni. Chazb' shon' na' le chzak'zi'b'. Zan shii ba bzala'n leb' lo yi'na' na' lekzka' loo nisa'. <sup>16</sup> Na' ba jwa'b' lao beṅ'ka' nakgake' li' txen na' bi gok yiyongake'b'.

<sup>17</sup> Na' goll Jesúza':

—¿Zi'tegalə chelena', le' beṅ' mal na' beṅ' bi chajle'! ¿Zi' ka'k'tek chiyaḷ' soalen' le'? Na' ¿zi' ka'k'tek chiyaḷ' soid' le'? Li' da diwa' bi' xkwidaa ni.

<sup>18</sup> Na'ch bsheshlen Jesúza' dii xiwaa yoob' na' bichejan. Na' katena' biyakib'.

<sup>19</sup> Na' ka biyoll gok ka', beŋ'ka' nak Jesúza' txen bshaljengake'ne' to lezgake', gollgake':

—¿Biçhe bi gok yibejnto' dii xiwaa yoo bi' xkwidaa'?

<sup>20</sup> Na' goll Jesúza' legake':

—Bi gok yibejen, la' bi chajle'le Chioza' gone' ka yichejan. Dii li nia' le', shel'ka' yel' chajle' çhelena' nakan la'çh' ka sa mostásana' daa nak diido'zə, wakte ye'le yaani: “Bkwas ni na' jsoa gan yoblə”, na' wkwasan ka'lə. Aga ga de to dii bi gak gonle shel'ka' chajle'le che Chioza'. <sup>21</sup> Kwençhe gak yibejele dii xiwaa ka daa bibej' bi' xkwidaa, chiyal' soale wbas' na' soaçheçhle we'llwillle Chioza'.

### Sto shii wdxjee Jesúza' witgake'ne'

(Mr. 9:30-32; Lc. 9:43-45)

<sup>22</sup> Na' shlak chdalen Jesúza' beŋ'ka' nakgake'ne' txen gana' mbani Galileana', golle' legake':

—Nad', Beŋ' Bsel' Chioza' Yell-lioni, gak' lo na' beŋ' malka'. <sup>23</sup> Na' witgake' nad', na' ka gak shon' lla yiban' ladj beŋ' wetka'.

Na' ka golle' legake' ka', le gokyesh'gakile'.

### Jesúza' wdxje' daa chiyal' gaxj che yoodo'na'

<sup>24</sup> Na' ka billin Jesúza' len beŋ'ka' nakgake'ne' txen Capernaúma', beŋ' Israelka' beŋ'ka' chçhixj che yoodo'na' jawiagake' Pédróna', na' wñabgakile'ne':

—¿Achyixj maestro çhelena' daa chido'l'cho we'cho che yoodo'na'?

<sup>25</sup> Na' goll Pédróna' legake':

—Awe, chyixje'n.

Na' ka biyoo Pédróna' loo yoono' gana' zoagake', Jesúza' bkwaloe' dillaa chi'e:

—¿Nak ka chakilo', Simón? Beŋ'ka' chñabia' yell-lioni, çaben' wlall che'kan' chçhixjgake'?, çawa beŋ' zit'kan'?

<sup>26</sup> Na' billii Pédróna' xtilleena':

—Beŋ' zit'kan' chçhixjgake'.

Na' goll Jesúza'ne':

—Zejin beŋ' wlall che'ka' bi chonan byen çhixjgake'.

<sup>27</sup> Per kwençhe bi wshaachogake', wyaj cho'a nisdona' na' wza'loo daa chzenilo' be'la'. Na' be'l' necha' seno' wxoo cho'aba' na' loo cho'aba' yillelilo' to mech. Wak-tekzin lltjixjo' che çhopteço.

### Beŋ'ka' nak Jesúza' txen gokdilgake' nogaken' nak beŋ' zak'chi

(Mr. 9:33-37; Lc. 9:46-48)

**18** Na' do kana'kzə, beŋ'ka' nak Jesúza' txen jabig'gake' kwite'na' che'gake'ne':

—¿Noran nak beŋ' zak'chi ladj beŋ'ka' chñabia' Chioza'?

<sup>2</sup> Na' wñe Jesúza' to bi'do' na' bzie'b' ladjeka'. <sup>3</sup> Na'ch chi'e legake':

—Dii li nia' le', beena' bi yiyak yichjlall'do'ena' ka che bi'do'ni kwençhe inçhia' Chioza' le', bi lene' beŋ'ka' chñabia' Chioza'. <sup>4</sup> Daan beena' wlexj yichje' wzenague' che Chioza' ka chlexj yichj bi'do'ni chzenagb' che xaxña'baa, beenan' zak'chi ladj beŋ'ka' chñabia'

Chioza'. <sup>5</sup> Na' beena' wlebe' to bi'do' ka bi'do'ni daa chonlilallee nad', nad'kzan chlebe'.

### Xoll ibixcho lao dii mala'

(Mr. 9:42-48; Lc. 17:1-2)

<sup>6</sup> Nottez beena' wchixe' to beŋ' zi' chzolo chonlilallee nad' gone' dii mala', naklan wen wwal'gake' yene'na' to yaj che molin na' lljlekgake'ne' yel loo nisdona' aga ka daa wchixe' beŋ' lao dii mala'. <sup>7</sup> Nyesh'laz che beŋ' yell-liokil, la' biga iyallji daa gonan ka wxinj wleŋgake'. Per nyesh'lazch gak che beena' gon ka wxinj wlen beŋ' yoblə!

<sup>8</sup> Na' shi noona' wa ni'ona' gonan ka ibixcho' lao dii mala', naklan wen wçhogo'n na' çhoonon, la' wenchlan bi de noona' tlaa wa ni'ona' tlaa yillino' kwit Chioza' aga ka daa yiyaj doxentio' lo yi' gabil'a' daa biga yiyol. <sup>9</sup> Na' shi daa ile'ilo' kon jalawo'na' gonan ka ibixcho' lao dii mala', naklan wen wleçhjo'n na' çhoonon, la' wenchlan yillinleno' tlaaz jalawo'na' kwit Chioza' aga ka daa yiyaj doxentio' lo yi' gabil'a'.

### Jempl che xilaa wnit

(Lc. 15:3-7)

<sup>10</sup> Bi gonile nakzi ni to beŋ'ki zi' wzolo chonlilall' nad'. La' nia' le', anjl che'ka' toshiizi zoagake' lao Xa'na', beena' zoa yabana'. <sup>11</sup> La' nad', Beŋ' Bsel' Chioza' Yell-lioni, bid' kwençhe yisla' beŋ'ka' yoo nez daa wlliyi'n le-gake'.

<sup>12</sup> ¿Nak chakile? Shi to beŋ' lle' to guiyoa xil' che' na' nit tob, çabi wkwaane' baka' taplalj twalj na' shaje' ll-jadilje' bana' wnit? <sup>13</sup> Na' shi yillelile'b, lech yibaile' cheb aga ka che baka' taplalj twalj baka' lle' tozga. <sup>14</sup> Ka'kzan Xacho Chioza' zoa yabana' cheenile' ni to beŋ'ki zi' wzolo chonlilall' nad' bi kwiayi' shel'ka'.

### Chiyal' si'xencho che beŋ'ka' nakcho txen chonlilall'cho Chioza'

(Lc. 17:3)

<sup>15</sup> Shi to beŋ' nakle txen nonlilall'le Chioza' gone' to dii mal cho', je'lene' dill' to li' to le' daa bene' cho'. Shi ba bzenague' cho', ba beno' gan bizoaleno'ne' wen.

<sup>16</sup> Per shi bi wzenague' bin yoone', na'ch wçhi'o sto çop beŋ' kwençhe gaggake' taschiw che daa yoone'.

<sup>17</sup> Na' shi ni ka' bi wzenague' chele, wak ye'le yog' beŋ'ka' nakle txen nonlilall'le Chioza' ka nak daa ba bene' kwençhe we'lengake'ne' dill'. Na' shi ni che beŋ'ka' bi wzenague', na'chan gonilene' ka to beŋ' bi nonlilall' Chioza' wa ka to beŋ' wixhixj.

<sup>18</sup> Na' dii li nia' le', diika' inçale bi gon beŋ' yell-lioni, lezkka' inçale Chioza' zoa yabana', na' diika' inçale wak gon beŋ' yell-lioni, lezkka' inçale Chioza' zoa yabana'.

<sup>19</sup> Na' lezkka' nia' le', shi çople idili xtil'l'ena' yell-lioni kat' bi inçable lao Xa' Chioza', beena' zoa yabana', na' gone' daa inçabile'ne'. <sup>20</sup> La' gana' chdop çhope' wa shone' choe'la'ogake' nad', na'kz zoa' ladjeka'.

<sup>21</sup> Na' wbig' Pédróna' kwit Jesúza', chi'ene':

—Xan', çba'l shii chiyal' yizi'xen' che bish' lllwellaa shi bi dii mal chone' çha'? ¿Azeelo gall shii?

<sup>22</sup> Na' che' Jesúza'ne':

—Aga nia' li' zeelo gall shii yizi'xeno' che bish' Ijwello'na', san nia' li' chiyal' yizi'xeno' guiyon shin'çhopə shii. †

### Jempl che beena' bi bizi'xen che bish' Ijwelle'na'

<sup>23</sup> Ye'l' wñabia' che Chioza' zaklebin to beñ' wñabia' beena' bizi' kwent che mecha' daa chal' wen llin che'ka'. <sup>24</sup> Na' ka wzoloe' chizi'e kwent che to toe', jwa'gake' to wen llin che'na' beena' chal' dii xen inlleb. <sup>25</sup> Per aga bi mech nap beena' kwenche yiyixje' daa chbaguee, na' xane'na' bene' mandad wit' wdegake'ne' do xiin do xooloe' na' yog'lo! dii de che' kwenche yiyaxj xyana' daa llie'. <sup>26</sup> Na' beena' chbag' mecha' bçhek' xibe'na' lao xane'na', chonyeshee, chi'e: "Xan', wdap-gach ye'l' chxenlall' cha', wiyixjkz' doxen daa chbagaa cho'." <sup>27</sup> Na' xane'na' biyeshile'ne', na' bene' ka'z doxen daa cha'lee che', na' bisane'ne'. <sup>28</sup> Per le', ka bicheje' lill xane'na', billague' sto wen llin beñ' chal' lat'do' xmeche', na' lli bniztie' yene'na' chi'ene': "iBiyon xmechaa daa cha'loo!" <sup>29</sup> Na' bçhek' xib beena' lawe'na' na' chonyeshee, chi'ene': "Wdapgach ye'l' chxenlall' cha', wiyixjkz' doxen daa chbagaa cho'." <sup>30</sup> Na' bi goonile', san lli wyajtie' ji'ene' part kwenche wloogake'ne' lillyana' axt ki yiyixjche' doxen daa cha'lee che'. <sup>31</sup> Na' ka ble'i wen llinka' sto ka bene', na' gokyesh'gakile' na' jayellgake' xane'ka' doxen ka bene'. <sup>32</sup> Na' wizax xane'na' le', chi'ene': "Beñ' mal inlleb nako'. Nad' ben' ka'z doxen daa cha'loo cha' daa benyeshoo lawa'. <sup>33</sup> Ka'kzan nan chiyal' yiyeshilo' bish' Ijwello'na' chal' cho', ka biyeshid' li'." <sup>34</sup> Na' daa le bllaachga xane'na', bene'ne' lo na' beñ'ka' wdixjgake'ne' lillyana' na' wit chingake'ne' axt ki yiyixjche' doxen daa cha'lee. <sup>35</sup> Na'ch goll Jesúza' legake':

—Ka'kzan goni Xa'na' beena' zoa yabana' le' shi bi si'xen che Ijwell-le do yichj do lall'le.

### Bi chiyal' yilaa Ijwell beñ'ka' nkaa cheyin

(Mr. 10:1-12; Lc. 16:18)

**19** Na' ka biyoll be' Jesúza' dill'ki, bizee Galileana' na' biyaje' gana' mbani Judeana' daa lliia sh'jaa yao Jordánna'. <sup>2</sup> Na' beñ' zan zjanogake'ne', na' na' biy-one' beñ'ka' bi shao'.

<sup>3</sup> Na' wbig' bal' fariseoka' lao Jesúza' daa goklall'gake' wi'e dill' dii wchixa'n le', na' che'gake'ne':

—¿Ade lsens yilaa xool beñ' ni che bizə diido' chone' dii bi chiyoolallee?

<sup>4</sup> Na'ch che' Jesúza' legake':

—¿Abin' wlable gana' nan ka wxe wzil yell-lioni Chioza' bene' beñe'cha', beñ' byo na' noolə? <sup>5</sup> Na' wne': "Daan, w'jaa beñ' byona' xaxneena' kat' ikaa che', na' soalene' xooloe'na' gakgake' toz." <sup>6</sup> Na' bich nakgake' çhop, san ba nakgake' toz. Na' daan bi chiyal' yilaa xool beñ', la' Chiozan' ba bti'le' legake'.

<sup>7</sup> Na' gollgake'ne':

† Guiyon shin'çhopə shii: bal' yishka' nyoj de dill' griegona' nan gall shii de guiyonshin'. Per çhopten zejın toshiizi chiyal' yizi'xencho che beñ'.

—Na' çbiçhe ben dii Moiséza' mandad kat' to beñ' yilaa xooloe'na' chiyal' w'ise' to yish dii we'n dill' bich nake' xooloe' na' wak yichooñe'ne'?

<sup>8</sup> Na' goll Jesúza' legake':

—Ye'l' widenag çhelenan' be' dii Moiséza' latj yilaa xool-lena'. Per ka ben Chioza' beñ' nechka', bi gokan ka'. <sup>9</sup> Nad' nia' le', shi nool çhelena' bi chdalene' beñ' yoblə, bi chiyal' yilaaalene' na' yikaale nool yoblə, la' shi ka' gonle, na' chonle ka beena' zoalente xooloe'na' na' chdalene' noolə yoblə.

<sup>10</sup> Na' beñ'ka' nakgake'ne' t xen gollgake'ne':

—Shi ka' nak che beena' chshagna', naklan wen kono wshagna'.

<sup>11</sup> Na' goll Jesúza' legake':

—Aga yog' beñ' çhajni'gakile' dga, lete beñ'ka' chon Chioza' ka shajni'gakile'n. <sup>12</sup> La' de dii chllonan wshagna' beñ'. Bal' beñ' bi chshagna'gake' daa bi nak kwerp che'ka' wen ka chaljtegake', na' zi ba'le' bi chshagna'gake' daa bxinj beñe'cha' kwerp che'ka'. Na' zi ba'le' bi chshagna'gake' daa cheenchgakile' gongake' xshin Chioza'. Beena' wlebe' dga, na' gonin che'.

### Jwa'gake' bi'do'ka' lao Jesúza'

(Mr. 10:13-16; Lc. 18:15-17)

<sup>13</sup> Na' wyaj beñ' jwa' bi'do' che'ka' lao Jesúza' kwenche wxoa neena' yichjb'ka' na' we'lwille' Chioza' ni çhegakb'. Per beñ'ka' nakgake'ne' t xen bsheshlengake' beñ'ka' zjwa' bi'do'ka'. <sup>14</sup> Na' goll Jesúza' legake':

—Li we' latj yid bi'do'ki lawa'ni, bi wllonle, la' Chioza' chñabi'e loo yichjlall'do' beñ'ka' nak ka legakb'.

<sup>15</sup> Na' ka biyoll bxoa na' Jesúza' yichj bi'do'ka', na'ch bizee ziyaje' gan yoblə.

### To bi' wew', bi' wni'a, bshaljlem' Jesúza'

(Mr. 10:17-31; Lc. 18:18-30)

<sup>16</sup> Na' bllin to bi' wew' lao Jesúza' che'b' le':

—Maestro, çbi dii wennan' chiyal' gon' kwenche gat' to ye'l' mban cha' zejli kañi?

<sup>17</sup> Na'ch goll Jesúza' le'b':

—¿Biçhe chñabzilo' nad' che daa nak wen? Toz Chioza' nake' beñ' wen. Na' shi cheenilo' gat' to ye'l' mban cho' zejli kañi, chiyal' gono' diika' bllia Chioza' bia' goncho.

<sup>18</sup> Na' goll bi' wewaane':

—¿Bera diika' chiyal' gon', lla?

Na' che' Jesúza':

—Bi wito' beñ', bi soaleno' nool bi nak nool cho', bi kwano' bi de che beñ', bi çhiljlalloo bizə gon ino' che beñ'. <sup>19</sup> Wdap balaan xaxnoona' na' goki bish' Ijwello'na' ka chaki kwino'.

<sup>20</sup> Na' che' bi' wewaane':

—Yog' diika' chon' kana' naktia' bi'do'. ¿Berachan ni chyallj gon'?

<sup>21</sup> Na' goll Jesúza' le'b':

—Shi lekzilo' cheenilo' gako' dowalj beñ' li beñ' shao', biyaj jayet' yog' dii de cho' na' xmechinna' wyoon beñ' yesh'ka', na' yido' gono' nad' t xen. Na' kat' yillino' yabana' na' gon Chioza' li' ye'l' shawaa.

22 Na' ka beni bi' wewaa dga, nyesh' inlleb gokib' na' biza'b', la' bi' wni'a nllaban nakb'.

23 Na' goll Jesúza' beṅ'ka' nakgake'ne' txen:

—Dii li nia' le', lallj inlleb chonan che beṅ' wni'ana' yilline' yabana' gana' chṅabia' Chioza'. 24 Sto shii nia' le', lobe'ch te to kamey to xan yesh' aga ka to beṅ' wni'a yilline' yabana' gana' chṅabia' Chioza'.

25 Na' bibangakile' ka wne', na' che' ljwllgake':

—¿Notg gak yillin lao Chioza', shka'?

26 Na' bwia Jesúza' legake', na' golle':

—Ni to beṅ' yell-liona' bi gak gone' dga, san Chioza' yog'loite chak gone'.

27 Na' che' Pédrona'ne':

—Neto' ba wlej yichjnto' yog' dii de chento' kwenche naknto' li' txen. ¿Bin gonnto' gan?

28 Na' che' Jesúza' legake':

—Dii li nia' le', kat' illin lla yikob yog'loj dii de, nad', Beṅ' Bsel' Chioza' Yell-lioni, kwi'a inabi'a gana' sho'a balaan xen wal, na' le', shllinṅtele, nakle nad' txen kwe'le kwitaa kwenche inabia'lenle nad'. Na' yizi'le kwent shllin kwente yell che beṅ' Israelka'. 29 Na' nottez beena' ba wlej yichje' lille'na', beṅ' bisheeka', beṅ' zane'ka', xaxṅee'ka', wa xiin xooole', wa yell-lio che' ni cha', Chioza'kzə wi'ene' dii zak' dii xen inllebch aga ka daa wlej yichje', na' lekzka' wi'ene' to yel' mban zejli kanj. 30 Per beṅ' zan nakgake' beṅ' zakii, wllin lla bich bi sak'gake', na' beṅ' zan bi nakgake' beṅ' zakii, wllin lla gagkake' beṅ' zakii.

### Jempl che wen llinka'

20 Na' wna Jesúza':

—Ye! wṅabia' che Chioza' chzaklebin daa gok che to xan yell-lio beena' naz yag uvana'. Na' shzildo' wzee zeje' zjtijje' wen llinka' kwenche lljengake' llinna' gana' naze' yag uvaka'. 2 Na' bgaangake' dill' chixje' legake' che lla, na'ch bselee legake' gana' lljengake' llinna'. 3 Na' ba gok shon gor chon beṅ' nechka' llinna' ka wyaje' dii yoblə gana' chak yaana', na' ble'ile' lle' beṅ' bibi llin de gongake'. 4 Na'ch chi'e legake': "Li shaj li lljen llinna' gana' naz' yag uvana' na' chixj' le' daa chido'le." Na' wza'gake' zejgake' llinna'. 5 Na' do ka gobill wizaje' dii yoblə, na' lekzka' chida shonə, bizillele' beṅ' yoblə lljengake' llin che'na'. 6 Na' do ka chida gay', wizaje' dii yoblə na' bizle'ile' beṅ' lle'zgake'. Na'ch chi'e legake': "¿Biḅche bi benle llinna' ṅaanlla?" 7 Na' goll beṅ'ka'ne': "La' ni to kono bche' neto' llinna'." Na' golle' legake': "Li shaj, lla, li lljen llinna' gana' naz' yag uvana'." 8 Na' ka wzeles yela' na' che' xan yag uvana' beena' ngoo lo nee llinna': "Biyax wen llinka' na' wdixj-gake'. Zigaate beṅ'ka' zi' wyoo llinna' chixjo', na' yiyollin beṅ'ka' wzolo nech." 9 Na' bene' kon ka goll xane'na', na' wdixje' zigaate beṅ'ka' wyoo llinna' do ka chida gay'. Na' wdixje' to toe' che llakzə. 10 Na' ka gol' chixje' beṅ'ka' wyoogake' llinna' shzildo', gokgakile' wxoache' laxje'ka'. Per bich bi bxoe' san che llachokzə wdixje' legake'. 11 Na' ka ba nox'gake' laxje'ka', wzologake' biz chon chnagake' che xan llinna', 12 na' goll-gake'ne': "Do lla wzento' lo bana' bennto' xshino'na'

na' toz ka wdixjo' neto' len beṅ'ka' zi' wyoo, na' zi' tgorchga bengake' llinna'." 13 Na' che' xan llinna' toe': "Bish'dawaa, aga bi laxjo' chzeshaa. ¿Aaga bgaancho dill' che llan chixj' li? 14 Wkaa laxjo'na', na' biyaj. Nad' cheenid' chixj' beṅ'ka' wyoo llinna' ba wllə'ch ka to daa ba wkoo. 15 Jwayishaz nad' bi gonid' xmechaa. ¿Anti chakziilo' daa chonid' beṅ' wen?"

16 Na' ka wde bzoa Jesúza' jempli, na' chi'e beṅ'ka':

—Ka'kzan beṅ' zan nakgake' beṅ' zakii, wllin lla bich bi sak'gake', na' beṅ' zan bi nakgake' beṅ' zakii, wllin lla gagkake' beṅ' zakii.

### Sto shii wdixjee Jesúza' witgake'ne'

(Mr. 10:32-34; Lc. 18:31-34)

17 Ka ziyaj Jesúza' Jerusalenna' wṅie' to beṅ'ka' shllinṅə, chi'e:

18 —Naa ba ziyajcho Jerusalenna', gana' gongake' nad', Beṅ' Bsel' Chioza' yell-lioni, lo na' bxozka' chṅabia' na' lo na' beṅ'ka' chli' chsedi leya', na' wchoglogake' witgake' nad'. 19 Na' gongake' nad' lo na' beṅ'ka' bi nak beṅ' Israel kwenche wtitgakile' nad' na' wit chingake' nad', na'tech wda'gake' nad' lee yag cruza', per ka gak shon lla yiban' ladj beṅ' wetka'.

### Daa wṅab xṅa' Jacóbona' len Juanna' lao Jesúza'

(Mr. 10:35-45)

20 Na' Jacóbona' len Juanna', beṅ'ka' nak xiin Zebede-wa', wbig'lengake' xṅee'ka' kwit Jesúza', na' xṅee'ka' bḅhek' xibe'na' lawe'na' wṅabile'ne' to goklen. 21 Na' goll Jesúza'ne':

—¿Bera goklenan cheenilo' gon' cho'?

Na' golle'ne':

—Cheenid' gongacho' goklen kweko' bi' cha'ki shlaa wej kwito'na' kat'ka' illin lla inabi'o.

22 Na' goll Jesúza'ne':

—Ni bi ṅezile bin chṅable. ¿Awizoile wtiḷ-le yel' zak'zi'na' ka daa wtiḷ' na' gak chele ka daa gak cha'?

Na' gollgake'ne':

—Wizokzinto'n.

23 Na' goll Jesúza' legake':

—Lekzile wtiḷ-le ka daa wtiḷ', na' gak chele ka daa gak cha', per daa nale kwe'le shlaa wej kwitaa bi nak lo na' gon' ka nale, san Xa'nan' ba mbeje' beṅ'ka' wi'en.

24 Na' beṅ'ka' zi' shi, bllaagake' Juanna' len Jacóbona' daa wṅabgake' kwe'gake' kwit Jesúza'. 25 Na' bitop Jesúza' legake', na' chi'e:

—ṅezkzile zoa beṅ' wṅabia' na' beṅ' zakii che to to yell na' chongakile' kon daa nazan chegake' beṅ' yell che'ka'. 26 Per aga kan' chiya' gonle. Shi nole cheenile gake beṅ' mbejlawin chiya' gake ka to beṅ' chon xshin beṅ'. 27 Na' shi nole cheenile gake beṅ' zakii, chiya' gake ka beṅ' ndoo lla yel chone' xshin beṅ'.

28 Ka nak nad', Beṅ' Bsel' Chioza' Yell-lioni, aga bid' kwenche gaklen beṅ' nad', san bid' kwenche gaklen beṅ' na' wi'a yel' mban cha'ni kwenche yisla' beṅ' zan lao saaxya che'ka'.

**Jesúza' biyone' çhop beñ' lçhoł**

(Mr. 10:46-52; Lc. 18:35-43)

<sup>29</sup> Na' ka biza' Jesúza' yell Jericóna' len beñ'ka' nakgake'ne' txen, beñ' zan inleeb janogake'ne'. <sup>30</sup> Na' cho'a neza' chi' çhop beñ' lçhoł, na' ka bengakile' bide Jesúza' kwite'ka' na'ch besyaagake', che'gake':

—İĶan', xiñ dia çhe dii Daví, biyesh'lall'gachi neto'!

<sup>31</sup> Na' beñ'ka' zejlen Jesúza' bsheshlengake' legake' kwençhe nan kwe'gake' lliz, per ziziklæ besyaachgake', che'gake':

—İĶan', xiñ dia çhe dii Daví, biyesh'lall'gachi neto'!

<sup>32</sup> Na'ch wlez Jesúza' na' wñie' beñ' lçhołka', na' chi'e legake':

—İBeran cheenile gon' çhele?

<sup>33</sup> Na'ch che' beñ' lçhołka'ne':

—Ķan', bengach ka ile'into'.

<sup>34</sup> Na' biyesh'lallii Jesúza' legake' na' beçee jalawe'ka'. Na' katena' gok ble'gakile' na' janogake' Jesúza'.

**Bllin Jesúza' Jerusalénna'**

(Mr. 11:1-11; Lc. 19:28-40; Jn. 12:12-19)

**21** Na' ka ba zoa yillingake' Jerusalénna', bllingake' cho'a yell Betfagéna' daa lliia kwit Yaa Olívoza'.

Na' wlej Jesúza' çhop beñ'ka' nakgake'ne' txen na' bselee legake' yella'. <sup>2</sup> Na' chi'e legake':

—İi shaj yella' daa lliia shlaana'. Na' ile'ile to burr ba noolæ da'b yag na' nçhe' to xiñdo'b. Na' wsell-leb wçhe'legakb nilæ. <sup>3</sup> Na' shi no bi inna le', na' ye'lene': "Ķannto'nan' chyalljile' legakb, na' llii yidsanten-to'gakb."

<sup>4</sup> Na' daa gok ka', billinin ka bzej dii beena' wdixjee daa goll Chioza'ne' daa wne':

<sup>5</sup> İi ye' beñ'ka' lle' yell Siónna':

"İi wwia, ba za' beñ' wñabia' çhelena', nake' beñ' gaxjlall' na' lliie' to burrdo'; xiñ to ba choa' yoa'."

<sup>6</sup> Na' wza' beñ'ka' nakgake'ne' txen zejgake' yelldo'na' gana' bsel' Jesúza' legake' na' bengake' kon ka golle' legake'. <sup>7</sup> Na' jxi'gake' burra' len xiñba' na' bçhe'gake' legakb kwit Jesúza'. Na'ch bçoagake' xe'ka' koll'bka', na'ch wllia Jesúza'b zeje' Jerusalénna'. <sup>8</sup> Na' beñ' zan wdixjgake' xe'ka' tneza', na' zi bałe' bçhoggake' no zin na' wdixjgake'n tneza' gana' zeje'. <sup>9</sup> Na' beñ'ka' lliialo lao Jesúza', na' ka'kzæ beñ'ka' nogake'ne', wzologake' chosyaagake', nagake':

—İWe'la'ocho beeni nak xiñ dia çhe dii Davina'! İGonleeyshga Ķancho Chioza' beeni ba bselee! İİi da we'la'ocho Chioza' zoa yabana'!

<sup>10</sup> Na' ka wyoo Jesúza' yell Jerusalénna', na' yog' beñ'ka' lle' na' bllesh bcheengake', nagake':

—İNoraz beeni bla' ni, lla?

<sup>11</sup> Na' beñ'ka' che'gake':

—Beenin Jesúza' beñ' Nazareta' yell daa mbani Galileana', beena' chyixjee daa che' Chioza'ne'.

**Bishesh Jesúza' beñ'ka' chit' chde lesh' chyoodo'na'**

(Mr. 11:15-19; Lc. 19:45-48; Jn. 2:13-22)

<sup>12</sup> Na' wyoo Jesúza' lesh' chyoodo'na' na' bisheshe' yog' beñ'ka' chit' chde na'. Na'ch bishi'e mes çhe beñ'ka' chsha' mecha' na' bzoles bzolline' gana' chi' beñ'ka' chit'gake' palomka'. <sup>13</sup> Na' ka wde bene' ka' chi'e legake':

—Cho'a xtill' Chioza' nan: "Lillaa nakan ga choe'łwill beñ' nad'", na' le', ba nonzlen ka to ga chdop chllag wban.

<sup>14</sup> Na' shlak zoa Jesúza' yoodo'na', bał beñ' lçhoł na' beñ' bi chak sa'gake' wen bllingake' lawe'na', na' biy-one' legake'. <sup>15</sup> Na' bçozka' chñabia' na' beñ'ka' chli' chsedile' leya' le bllaagake' ka ble'gakile' yel' wakka' chon Jesúza', na' bengakile' chosyaa bi'do'ka' lesh' chyoodo'na', che'gakb': "İWe'la'ocho beeni nak xiñ dia çhe dii Davina'!" <sup>16</sup> Na' gollgake' Jesúza':

—İAchenilo' ka na' bi'do'ka'?

Na' chi'e legake':

—Awe, chenzkid'. İAbiñ' wlable Cho'a Xtill' Chioza' gana' na':

Chçhino' cho'a łoll' bi' xkwid'do'ka' na' bdo'ka' ni chall' chxop

kwençhe choł chnegakb' li' ka chiyał' we'la'o beñ' li'?

<sup>17</sup> Na'ch bicheje' ladj beñ'ka', na' bizee yell Jerusalénna' ziyaje' yell Betániana' gana' wdie' yel.

**Jesúza' bene' ka wbill to yag yixwew**

(Mr. 11:12-14, 20-26)

<sup>18</sup> Na' betiyo biza'gake' shzildo' yell Betániana' kwençhe biyajgake' yell Jerusalénna' dii yoblæ, na' tneza' wzolo chdon Jesúza'. <sup>19</sup> Na' ble'ile' to yag yixwew dii zoa cho'a neza', na' jawie' shi llian. Per zeelo xlaguinna'z lliia. Na' golle'n:

—İBatch kwio' yixwewa'!

Na' katena' llii wbillte yaga'. <sup>20</sup> Na' ka ble'i beñ'ka' nakgake'ne' txen ka gok, le bibangakile', na' che'gake'ne':

—İBeraçhe llii wbilltelikazæ yag yixwewa'?

<sup>21</sup> Na'ch che' Jesúza' legake':

—Dii İi nia' le', shi nonlilall'le Chioza' na' bi gakçhoplall'le, aga daazan gak gonle, san wakte ye'le yaani: "Bkwas, na' jsoa łoo nido'na'", na' gak ka ye'len. <sup>22</sup> Na' yog' daa inabile Chioza' ka we'łwill-lene' gonkze'n kon shi nonlilall'lene'.

**Yel' wñabia' çhe Jesúza'**

(Mr. 11:27-33; Lc. 20:1-8)

<sup>23</sup> Na' wyaj Jesúza' dii yoblæ yoodo'na' kwençhe jali' jasedile' beñ'ka'. Na' shlak chli' chsedile' legake', bçozka' chñabia' na' beñ' golka' chñabia' beñ' Israelka' bllingake', na' che'gake'ne':

—İNora lsens çheyi chono' diiki? İNo beñ' li' yel' wñabia'na'?

<sup>24</sup> Na' goll Jesúza' legake':

—İLekzka' de to dii cheenid' inabid' le'. Na' shi le' inale nad' daa inabid' le', na' inia' le' no lsens çheyi chon'



yog' diiki. <sup>25</sup> Li inashki nad', z noran bsele' Juanna' kwenche bidchoe' ben' nisa'? z Achioza' anti ben' yell-li-oni?

Na' wzologake' chakguedgake' to lezgake', nagake':  
—Shi ye'chone' Chioza' bseleene' na'ch in'e cho':

“z Bi'che bi wyajle'le che', lla?” <sup>26</sup> Na' shi ye'chone' ben' yell-liona' bselee Juanna', le xoll bi goni ben'ki cho', la' yog'lole' chajle'gake' Chioza' bselee Juanna' kwenche bidixji'e daa golle'ne'.

<sup>27</sup> Na'ch che'gake' Jesúza':

—Bi nezinto' non bsele' dii Juanna'.

Na' goll Jesúza' legake':

—Lezkza' nad', aga wnia' le' nora lsens cheyin chon' diiki.

### Jempl che chop xiin ben'

<sup>28</sup> Na' goll Jesúza' legake':

—z Bi' ka inale cheyi dga wseesaa? To ben' zoa chop xiine', na'ch golle' bi'na' to: “Xiindawaa, wyajgach jen llinna' gana' nazcho yag uvana'.” <sup>29</sup> Na' che' xi-in'e'na'ne': “i'Bi sha'!” Per na'tech biyajib' na' wyajkb' jem' llinna'. <sup>30</sup> Na' wyaj xabaa jelle' bi'na' sto ka golle' bi' bish'baa, na'ch goll bi'na'ne': “Wakkzə xa, na' sha'.” Per bi wyajb'. <sup>31</sup> Li inashki, z nora bi'ka' chop ben ka cheeni xab'ka'?

Na' goll ben'ka'ne':

—Bi'na' golle' ka' dii nech.

Na'ch che' Jesúza' legake':

—Dii li nia' le', ben' wichixjka' na' noolə wdaka', lel-gaken' zigaate we'gake' latj inabia' Chioza' legake' aga ka le'. <sup>32</sup> La' ka bid Juanna' bchoe' ben' nisa', bidzajniile' le' ka chiya' soa kwezle, per le' aga wyajle'le che', lete ben' wichixjka' na' nool wdaka'chgan wyajle'gake' che'. Na' le' naalla, la'kzi gokbe'ile ba chajle'gake' che', aga biyaj bileni saaxya cheleka' na' shajle'le che'.

### Jempl che wen llinka' nak ben' mal

(Mr. 12:1-12; Lc. 20:9-19)

<sup>33</sup> Li wzenag jempli sto. Wzoa to ben' biyaze' yag uva lo yell-lio che'na' na'ch wlo'en leej, na'tech beshawee to ga wsigake' uvaka'. Na' lezkza' bene' to yoo sibə gana' kwia beena' gap wwie'n.

Na'tech bene'n lo na' to chop ben' na' wzee zeje' zit'.

<sup>34</sup> Na' ka go! yishibgake' uvaka', na'ch bselee to chop wen llin che'na' gana' lle' ben'ka' chapgake' yag uvaka' kwenche lljaxi'gake' uvaka' daa chidolee. <sup>35</sup> Per ka bllingake' gana' lle' ben'ka' chapgake' yag uvaka', na'ch bex'gake' ben'ka' bllin, toe' bet wdingake'ne', na' stoe' bettekgake'ne' na' beena' sto btakwgake'ne' yaja'.

<sup>36</sup> Na'ch bsele' xan yag uvaka' zanch wen llin che'ka' aga ka to ben'ka' bselee dii nech, per ben'ka' chap yag uva-ka' bengakile' legake' ka bengakile' ben' nechka' bllin.

<sup>37</sup> Na'ch xan yag uvaka' bselee kwinkz xiine'na', chak-ile': “Wapgake' balaan bi' cha'ni na' we'gake'b' daa chidojaa.” <sup>38</sup> Per ben'ka' chap yag uvaka' ka ble'gakile' xi-in'e'na', na'ch che' ljwelle': “Bi'nin xiin xan yag uvaki na' leban' yigaañlem' yog' dii nape'. Li da witchob' kwenche yigaañlencho daa gaki cheb'.” <sup>39</sup> Na'ch

bex'gake'b' bibejgake'b' gana' lle' yag uvaka' na' bet-gake'b'.

<sup>40</sup> Na' Jesúza' chi'e ben'ka' lle' na':

—z Nakra ka chakile gon xan yag uvaka' che ben'ka' chapgake'n ka illine' kwine'?

<sup>41</sup> Na' che' ben'ka':

—Ba nakten wite' legake' na' bi yiyeshile' legake' daa nakgake' ben' mal. Na' yiyone' yell-lio che'na' lo na' ben' yoblə, ben' yiyoe'gake'ne' daa chidolee kat' yishib-gake'n.

<sup>42</sup> Na' goll Jesúza' legake':

—z Abigan' wlable Cho'a Xtill' Chioza' gana' na:

Yaja' daa bi wyoolall' wen yooka', leyen'lannan' yaja' daa ba nchejcha yoon'a'.

Dgan ben Xancho Chioza' na' nakan to dii yibanicho?

<sup>43</sup> Daan nia' le', kon ka gon xan yag uvaka' yiyone' yell-lio che'na' lall' na' ben' yoblə, ben' gongake' ka chee-nile', ka'kzan gon Chioza' chele. Kwey yichje' le', na' ben'ka' wzenaggake' che', si'gake' banez yel' wñabia' che'na'. <sup>44</sup> Na' ka nak yaja', nottezə ben' lljchaze' lawin-na' kwiayee, na' shi idakwan ben', axt wshoshjan le'.

<sup>45</sup> Na' ka biyoll bzenag bxozka' chñabia' na' fariseoka' jempli bzoa Jesúza', na'ch gokbe'gakile' chegake'n chñie'. <sup>46</sup> Na'ch goklall'gake' gox'gake'ne', per bi biyaxj-gakile', la' bllebgake' ben'ka' lle' na' daa chajle'gake' Jesúza' nake' to ben' chyixjee daa che' Chioza'ne'.

### Jempl che to wishagna'

**22** Na' Jesúza' bseesile' legake' sto jempli, chi'e:

<sup>2</sup> —Ye! wñabia' che Chioza' chzaklebin to ben' wñabia', ben' bene' to lni che xiine'na' ka bshagna'b'.

<sup>3</sup> Na' bselee wen llin che'ka' lljanegake' ben'ka' ba bye', per ben'ka' bye' bi goongakile' shajgake'. <sup>4</sup> Na'ch bizselee zi shkwen wen llin che'ka' chi'e legake': “Li lljell ben'ka' ba bya' yid lni che bi' cha'na' ba de daa gaocho. Ba betgake' goon cha'ka' na' nochlə baka' le nak, na' ba de yel' wawa'. Li lljellgake' yidgake' kwenche yeej gaocho.”

<sup>5</sup> Per ben'ka' ba bye' bi bengake' kwent daa goll wen llinka'. Toe' wyaj jawia' yell-lio che'na' na' stoe' wzee zeje' delgens che'na'. <sup>6</sup> Na' ben'ka' sto bex'gake' wen llinka' na' biya dii bengakile' legake' axt ka wit-gake'. <sup>7</sup> Na' le bllaachga ben' wñabia'na', na'ch bselee soldad che'ka' kwenche jetgake' legake' na' bzeygake' yell che'ka'.

<sup>8</sup> Na'ch chi'e wen llin che'ka' sto: “Ba gok daa yeej gaocho, na' wentelan bi wlen ben'ka' bya'.” <sup>9</sup> Na' li shaj lyell na' li wche' kon no ben' yillagle tneza' kwenche yidgake' yeej gaogake'.” <sup>10</sup> Na'ch wza' wen llinka' zejgake', na' jxi'gake' kon no ben' billaggake', ka ben' wen ka ben' mal. Na' billa'cha lill ben' wñabia'na'.

<sup>11</sup> Na' ka wyoo ben' wñabia'na' chwie' ben'ka' ba ndop nllag, na' ladj ben'ka' len to ben' bi nakw xe'na' daa chiya' gakwe' gana' chak wishagna'na'. <sup>12</sup> Na' goll ben' wñabia'na'ne': “Bish'dawaa, z nakra gok wyoozo' na' bi nakw xo'na' daa chiya' gako' kwenche leno' gani chak wishagna'ni?” Na' beena' bikzə bi billet-lallee yeene'.

<sup>13</sup> Na'ch che' ben' wñabia'na' ben'ka' chde yel' wawa': “Li wchej ni'a na' beeni na' li yibeje' na' li wzalee

gana' shgasj shçhol, gana' kwellyeshee na' gaoxaxj lye'na' daa le gakshejlallee." <sup>14</sup> La' beñ' zan nak beñ'ka' chax chñab Chioza', per bałchgagake' kweje' gakgake' lall' nee.

**Wñabgakile' Jesúza' shi chiyał' çhixjgake' daa chñab beñ' wñabia'na'**

(Mr. 12:13-17; Lc. 20:19-26)

<sup>15</sup> Na' biza' fariseoka', na' wloogake' xñezi naklæ gongake' kwençhe we' Jesúza' dill' dii wchixa'n le'. <sup>16</sup> Na'ch bseł'gake' bał beñ'ka' nakgake'ne' txen na' zi bał beñ'ka' nak Heródeza' txen kwençhe wyajgake' lao Jesúza' na' jellgake'ne':

—Maestro, ñezinto' nako' beñ' li beñ' shao' na' chli' chsedilo' beñ' che nez li çhe Chioza' kon ka nakan, na' bi chshoo cho'a xtilloona' lao nottezæ beñ', la' bi chwio' no nakgake'. <sup>17</sup> Daan cheeninto' inagacho' neto' nak ka chakilo': çAchiyał' çhixjcho daa chñab beñ' wñabia' Césara', anti bi chiyał' çhixjchon?

<sup>18</sup> Na' gokbe'i Jesúza' aga do lall'gaken' gollgake'ne' ka', na'ch chi'e legake':

—Le' beñ' wxiye', aga dii leilen nale ka'. <sup>19</sup> Li wli'shki nad' to mech daa chyixjile beñ' wñabia'na'.

Na' be'gake'ne' to mech. <sup>20</sup> Na' goll Jesúza' legake':

—çNora cho'alawin na' no leyin da' lee mechí?

<sup>21</sup> Na'ch che'gake'ne':

—Çhe beñ' wñabia', Césaran'.

Na' che' Jesúza' legake':

—Na'len, li we' Césara' daa naki çhe', na' lekzka' li we' Chioza' daa naki çhe'.

<sup>22</sup> Na'ch bibangakile' daa goll Jesúza' ka'. Na' biza'gake' kwite'na' ziyajgake'.

**Saduceoka' wñabgake' nak gak kat' yiban beñ' wetka'**

(Mr. 12:18-27; Lc. 20:27-40)

<sup>23</sup> Na' lo llana'kzæ saduceoka', beñ'ka' bi chajle'gake' yiban beñ' wetka', wyajgake' lao Jesúza', na' wñabgakile'ne':

<sup>24</sup> —Maestro, dii Moiséza' wne' shi to beñ' byo guete' na' kono xiñe' wzoa, beñ' bisheena' chiyał' yikee xool dii beñ' bisheena' kwençhe soa xiñ dia çhe dii beñ' weta'. <sup>25</sup> Na' ki gok çhe gall bish' beñ' nakgake' neto' txen. Beñ' necha' bshagnee, na' wite' na' kono xiñe' wzoa, na' beñ' bishee, beñ' wchopina', bikee xoolena'. <sup>26</sup> Na' lekzka' wit beñ' wchopina' na' kono xiñe' wzoa. Na' ka'kzæ wit beñ' wyonina' na' axt biyate beñ'ka' gall wit. Na' ni togake' bi wzoa xiñgake'. <sup>27</sup> Na' ka wde wit yog'lole' na'ch lekzka' wit noola'. <sup>28</sup> Na' kat' yiban beñ' wetka', ñaa, çnora beñ'ka' gall bish' gaki xoolena' noola'? la' yog'lole' wkaagake'ne'.

<sup>29</sup> Na'ch che' Jesúza' legake':

—Nakllejzilen daa bi ñezile ka na Cho'a Xtill' Chioza', na' ka nak yeł' wak çhe'na'. <sup>30</sup> La' kat' yiban beñ' wetka', koch no yikaa ljwellin, ni koch no wit' wde xiñin, san yiyakgake' ka anjlka' lle' yabana'. <sup>31</sup> Na' ka nak daa yiban beñ' wetka', ñaa, çabin' wlable daa wna kwin Chioza', gana' nan: <sup>32</sup> "Nad nak' Chios çhe Abrahama', Isaaca' na' Jacoba'?" Na' bi nake' Chios çhe beñ' wet,

san nake' Chios çhe beñ' ban, la' lao Chioza' mban beñ'ki.

<sup>33</sup> Na' ka beni beñ'ka' lle' na' daa wna Jesúza', le bibangakile' ka chli' chsedile'.

**Daa lliarote daa bliia Chioza' bia' goncho**

(Mr. 12:28-34)

<sup>34</sup> Ka wñezi fariseoka' ba wlekli Jesúza' saduceoka', na'ch wyajgake' kwite'na'. <sup>35</sup> Na' to beena' chli' chsedileya' wñabile' Jesúza' kwençhezæ wchixeene', chi'e:

<sup>36</sup> —Maestro, çberan lliarote nllia leya' bia' goncho?

<sup>37</sup> Na' Jesúza' golle'ne':

—"Chiyał' gakilo' Xancho Chioza' do yichj do lalloo na' axt ga zeelo chajniilo'." <sup>38</sup> Dgan lliizelozi chonte na' llialon lawi yog' diika' nllia leya' bia'. <sup>39</sup> Na' de wchopina' nakan katekzæ dii necha', na' nan: "Chiyał' gakilo' bish' ljwello'ka' ka chaki kwino'." <sup>40</sup> Na' diiki çhop chejin doxen ka na leya' len diika' bzej dii beñ'ka' wdixjee daa goll Chioza' legake'.

**Crístona' nake' xiñ dia çhe dii Davina'**

(Mr. 12:35-37; Lc. 20:41-44)

<sup>41</sup> Na' shlak ndop nllag fariseoka' kwit Jesúza' <sup>42</sup> wñabile' legake':

—çNak ka chakile çhe Crístona', beena' inabia'? çNo xiñ dia çheyin nake'?

Na' che'gake'ne':

—Xiñ dia çhe dii Davinan'.

<sup>43</sup> Na' che' Jesúza' legake':

—Na' çberaçe ben Espiritu Sántona' ka goll dii Davina'ne': "Xan"? La' kin na daa bzeje':

<sup>44</sup> Xancho Chioza' golle' Xan'na':

"Wche' kwit' de shłini, shlak wzoa' xñi'ona' beñ'ka' chakzbani li'."

<sup>45</sup> Na' shi kwin dii Davina' golle' Crístona': "Xan", çberaçe nazle nake' xiñ dia çhe', shka'?

<sup>46</sup> Na' ni toe' bi gok yilliigake' xtilleena'. Na' zeelo kana' koch no biyaxji bi inabgakile'ne'.

**Jesúza' chawe' xya çhe fariseoka' na' beñ'ka' chli' chsedileya'**

(Mr. 12:38-40; Lc. 11:37-54; 20:45-47)

**23** Na'ch Jesúza' golle' beñ'ka' nakgake'ne' txen len beñ'ka' lle' na', chi'e:

<sup>2</sup> —Beñ'ka' chli' chsedileya' na' fariseoka' nak lo na'gake' wzajni'gakile' beñ' daa bzej dii Moiséza'. <sup>3</sup> Na' chiyał' wzenagle çhegake' kat' chzajni'gakile' le' leya' na' gonle ka nan. Per bi gonle ka chongake', la' legake' bi chongake' ka nagake' chiyał' gonle. <sup>4</sup> Dii zan dii che'gake' beñ' chiyał' gongake', na' nakan ka to yoa' xen dii chwa'gake' beñ' dii kono so saki, na' legake' bikz bi chda na'gake' kwençhe gaklengake'. <sup>5</sup> Na' yog' diika' chongake' chongake'n kwençhezæ ile'i beñ' ka chongake' na' we'la'ogake' legake'. Na' kajdo'ka' nak de yid daa yoo lat' Cho'a Xtill' Chioza' daa chda' loxgue'ka' na' daa chçhel' neeka' chongake'n dii xench aga ka çhe beñ' yoblæ, na' chtonçhake' lox xe'ka' aga ka çhe beñ' yoblæ. <sup>6</sup> Na' kat' çhajgake' Inika', le chiba-

gakile' kwe'gake' gana' chbe' beṅ'ka' zakii, na' lekz-ka'yen' chjengake' gana' chdop chllaggake' choe'lwill-gake' Chioza'. <sup>7</sup> Na' le chibagakile' gap beṅ' legake' bal-aan kat' chillaggake' legake' ga lle' lla' beṅ' na' ye'gake' legake': "maestro".

<sup>8</sup> San le', bi we'le latj ina beṅ' le' "maestro", la' toz nadaan nak' Maestro chele na' yog'le nakle ka bish' ljwellin. <sup>9</sup> Na' kono ye'le "xa" lo yell-lioni, la' toz Chioza', beena' zoa yabana', nake' Xale. <sup>10</sup> Ni bi we'le latj ina-gake' le' "maestro", la' toz nad', Cristo, nak' Maestro chele. <sup>11</sup> La' beena' nak beṅ' gaxjlall' na' chaklene', beenan' nake' beṅ' zak'chi ladjlena'. <sup>12</sup> Na' beena' chon kwine' beṅ' zakii, Chioza' gone'ne' beṅ' bibi zakii. Na' beena' chon kwine' ka beṅ' bibi zakii, Chioza' gone'ne' beṅ' zakii.

<sup>13</sup> Nyesh'laz gak chele, le' chli' chsedile' leya' na' le' fariseo, daa nakle beṅ' wxiye'! La' chsej chllonle gombia' beṅ' ye'l' wṅabia' che Chioza', na' ni bi choe'le latj inabi'e le', ni bi choe'le latj che beṅ'ka' cheengakile' inabi'e legake'.

<sup>14</sup> Nyesh'laz gak chele, le' chli' chsedile' leya' na' le' fariseo, daa nakle beṅ' wxiye'! La' chkaale lill nool wizebka' na' choe'lwill-le Chioza' ssha nllieb kwenche gaki beṅ' nakle beṅ' wen. Na' daa chonle ka', Chioza' wsak'zi'che' le' aga ka beṅ' yoblə.

<sup>15</sup> Nyesh'laz gak chele, le' chli' chsedile' leya' na' le' fariseo, daa nakle beṅ' wxiye'! Chdale to ni to na' chyljle beṅ' wsede' daa chli' chsedile. Na' kat' chllililene' chónlene' beṅ' malch aga ka le' na' chlliyi'chlene' axt choplə ka to ba mbiayi'le.

<sup>16</sup> Nyesh'laz gak chele, le' nakle ka beṅ' lchoḷ, beṅ' chakile' wak wchi'e sto beṅ' lchoḷ! La' nale: "Shi to beṅ' wchebe' to dii gone' na' wzoe' yoodo'na' de taschiw kwenche gone' daa bchebe', bi chonan byen gone'n." Na' chiznale: "Shi wzoe' de taschiw ora' daa de loo yoodo'na', na'chan chiya' gone' daa bchebe'." <sup>17</sup> Le' nakle ka beṅ' lchoḷ daa bi nteyile! ¿Abi chakbe'ile zak'ch yoodo'na' aga ka ora'? La' yoodo'nan' chonan kwenche ora' de lo'inna' nakan che Chios. <sup>18</sup> Na' lekzka' chiznale: "Shi to beṅ' wchebe' to dii gone' na' wzoe' de taschiw gana' chzeygake' bayix'ka' chitgake' kwenche choe'la'ogake' Chioza', bi chonan byen gone' daa bchebe'. Per shi wzoe' de taschiw bayixaa chxoagake' lawinna', na'chan chiya' gone' daa bchebe'." <sup>19</sup> Le' nakle ka beṅ' lchoḷ daa bi chajniile! ¿Abi chakbe'ile' gana' chzeygake' bayixaa chzanile we'le Chioza' zak'chan aga ka bayixaa chzeygake' lawinna'?, la' gana' chzeygake'b chonan leb ba che Chios. <sup>20</sup> La' beena' chcheb wi'e to dii wi'e na' chzoe' de taschiw gana' chzeygake'b, aga toz lennan' chzoe' de taschiw, san lekzka' len yog' daa xoa lawinnan'. <sup>21</sup> Na' beena' chcheb wi'e to dii wi'e na' chzoe' de taschiw yoodo'na', aga toz yoodo'nan' chzoe' de taschiw, san lekzka' len Chiozan' daa nakan lill xlatje'. <sup>22</sup> Na' lekzka' beena' chcheb wi'e to dii wi'e na' chzoe' de taschiw yabana', aga toz yabanan' chzoe' de taschiw, san len Chiozan' daa nakan gana' chnabi'e.

<sup>23</sup> Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! Choe'le Chioza' diézmona' axt len yixweja', aníza', na' cominna', per bi chonle daa llialotech daa nllia Chioza' bia' goncho. Dii llialotech goncho daa nak shli, yiyesh'lalicho beṅ', na' gonjilall'cho Chioza' do yichj do lall'cho. Diikin chiya' gonle, per lekzka' bi chiya' wsanle gonle diika' sto. <sup>24</sup> Le' nakle ka to beṅ' lchoḷ beṅ' chakile' wak wchi'e sto beṅ' lchoḷ! Na' chonle ka to beṅ' chone' byen chibeje' to bi'a lesdo' loo ye'l' wao che'na' na' bi chakbe'ile' chebe' to kamey.

<sup>25</sup> Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! Nakle ka xig' yeen dii nxi nyech kolliinna' per lo'inna' bi nxe bi nzak' nakan, daa chonle ka chaki beṅ' nakle beṅ' wen per le chze-lall'le bi dii de che beṅ' na' chbanlen. <sup>26</sup> Na' le' fariseo, inakle ka beṅ' lchoḷ daa bi chajniile! Li yiyaj yilene daa chonle kwenche gake beṅ' wen ka chaki beṅ' nakle, na'ch gake ka xig' yeen dii nxi nyech ka loolə ka koll'in.

<sup>27</sup> Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! La' nakle ka to lill beṅ' wet dii nyebgake' yiw' na' nja' lawinna' xochi, per lo'inna' lle' lla'n lit wetka' na' bichlə dii zban. <sup>28</sup> Kan' nakle le' daa chonle ka chaki beṅ' nakle beṅ' li beṅ' shao' per loo yichjlall'do'lena' lle' lla'n de wxiye' na' dii mal.

<sup>29</sup> Nyesh'laz gak chele, le' chli' chsedile leya' na' le' fariseo, daa nakle beṅ' wxiye'! Chonshao'zle gana' bkwash'gake' dii beṅ'ka' wdixjee daa goll Chioza' legake' kani'yi, na' chonle xochi gana' bkwash'gake' nochlə beṅ'ka' gok beṅ' li beṅ' shao'. <sup>30</sup> Na' nale: "Shel'ka' neto' ba zoanto' kana' wzoo dii xozxto'nto'ka' aga bennto' legake' txen ka betgake' dii beṅ'ka' wdixjee daa goll Chioza' legake'." <sup>31</sup> Per kwinkzlen chli'le nakle toz beṅ'ka' betgake' dii beṅ'ka' wdixjee daa goll Chioza' legake' kani'yi, la' toz ka chonlenle legake'. <sup>32</sup> Na' li yisyoll li yisto li gon dii mala' daa bi biyoll gon dii xozxto'leka'!

<sup>33</sup> Le' nakle ka beḷ zṅia! Bi gakile shi wilale lo yi' gabi'la'. <sup>34</sup> Daan wselaa beṅ' chixje'gakile' le' daa yepga-kee. Wselaa beṅ' sin' beṅ' chajni kwenche wli' wsedgakile' le' cho'a xtillaana'. Per balgake' witle, na' balgake' wda'le lee yag cruza', na' balgake' wit chinle gana' chdop chllagle choe'lwill-le Chioza', na' zi balgake' lljalagle to to yellka' gana' illingake'. <sup>35</sup> Na' daa gonle ka', yidobile ye'l' wit che yog'loḷ beṅ' li beṅ' shao'ka' bet dii xozxto'leka', wzolozin dii Abela' beena' gok beṅ' li beṅ' shao', axt dii Zacaría'za, xiṅ Berequí'za, beena' betgake' latja' daa de cho'a yoodo'na', kwit gana' chzeygake' bayix'ka'. <sup>36</sup> Dii li nia' le', ka le' zoale naa chidol'le sak'zi'le che yog' daa ben dii xozxto'leka'.

Jesúza' gokyeshile' che beṅ' Jerusalénka'

(Lc. 13:34-35)

<sup>37</sup> Le' beṅ' Jerusalén, le' chitle beṅ'ka' chyixjee daa che' Chioza' legake', na' chlliale yaj beṅ'ka' chselee chixje'gakile' le' cho'a xtilleena'! ¿Zan shii goklallaa gon'

chele ka chon jeda' chiyellb xiindo'bka' xan xilba', na' bi goklall'le! <sup>38</sup> Na' naa ba wlej yichj Chioza' le', na' gani lle'le idesh iloan. <sup>39</sup> Na' nia' le', bich ile'ile nad' axt kat'ch illin Ila inale: "iGaklenshga Xancho Chioza' beeni ba bselee!"

**Jesúza' bi'e dill' yiyinj yoodo'na'**  
(Mr. 13:1-2; Lc. 21:5-6)

**24** Na' ka bichej Jesúza' loo yoodo'na' kwenche yiyaje' gan yoblə, beñ'ka' nakgake'ne' txen jabig'gake' kwite'na' na' wzologake' choe'lengake'ne' dill' ka xochi nak yoodo'na'. <sup>2</sup> Na'ch che' Jesúza' legake': —Yog' dga chle'ile naa, dii li nia' le' wllin Ila kat' yiyinj doxenan, ni to yaj bich igaan koll' ljjwellin.

**Diika' gak kat' ba zoa te che yell-lioni**  
(Mr. 13:3-23; Lc. 21:7-24; 17:22-24)

<sup>3</sup> Na'ch biyajgake' lo Yaa Olívoza', na' ka chi' Jesúza' lo yaana' na'ch wbig' beñ'ka' nakgake'ne' txen na' xochiteza wñabgakile'ne', che'gake':

—Cheeninto' ino' neto' batran gak daa ba wno'. ħNakran gak kat' ba zoa yiyedo' dii yoblə na' kat' ba zoa te che yell-lioni?

<sup>4</sup> Na'ch che' Jesúza' legake':

—Wsak'yen'gale kwenche kono siye'z le'. <sup>5</sup> La' ben' zan ichej inazgake': "Nadaan Crístona." Na' ben' zan shajle'. <sup>6</sup> Na' yenile chak wdil' to ni to na', per bi gakshejlall'le. La' dii chiyal'kz gakan, per aga ba bllin Ila te che yell-lionin kat' ba chak ka'. <sup>7</sup> La' yidi'l-len ljjwell yell-ka' na' beñ' wñabia'ka' yidi'l-len ljjwellgake', na' kwe' yill-we', kwe' wbin, na' zan yell gak bedxo' wal. <sup>8</sup> Kat' ba chak diiki, shinz chzolo ka nak daa yen ile'i beñ' yell-lioki.

<sup>9</sup> Na'ch gongake' le' lo na' beñ'ka' wchi' wsak' le', na' witgake' le', na' yog' beñ' yell-lioki gakzbangakile' le' daa nonlilall'le nad'. <sup>10</sup> Na' kat' ba chak diiki beñ' zan bich gonlilall'gake' nad', na' gakzbani ljjwelle' na' gon ljjwellgake' lo na' beñ' malka'. <sup>11</sup> Na' ichej zan beñ' gonzgake' ka beñ' chyixjee daa che' Chioza' legake', na' beñ' zan shajle'. <sup>12</sup> Na' daa kwe'chachga dii mala', beñ' zan bich gaggakile' Chioza' ni bish' ljjwelle'ka'. <sup>13</sup> Per beena' soachech gonlilallee nad' axt ka yiyoll diika' yen ile'ile', beenan' gat' to yel' mban che' zejli kani. <sup>14</sup> Na' ka nak dill' wen dill' kob che yel' wñabia' che Chioza', chonan byen lljtixjeegake'n doxen yell-lioni kwenche yog'loj beñ' yengakile'n, na' kana'chan te che yell-lioni.

<sup>15</sup> "Dii Daniela', beena' wdixjee daa goll Chioza'ne', bzeje' cheyi daa soa loo yoodo'na' daa wñitan balaan cheyinna', na' chiyal' sele wñeyi bin zejlin. Na' kat' ile'ile'n loo yoodo'na' <sup>16</sup> kanan' beñ'ka' zoa Judeana' chiyal' wxonjgake' shajgake' yaa yaoka'. <sup>17</sup> Na' beena' lliia koll' lille'na' ni bich gal' yiyetje' lljaleje' dii de loo yoo lille'na'. <sup>18</sup> Na' beena' chda lyixaa ni bich gal' yiyaje' lille'na' lljaxi'e xe'na'. <sup>19</sup> iNyesh'laz gak che noolka' noa' na' noolka' chwall' chxop llana' gak ka'! <sup>20</sup> Li inabi Chioza' kwenche llana' wxonjile dga bi gakan kat'ka' chbe' dii zaga' wa to Ila sabd, llana' chombaancho.

<sup>21</sup> La' yel' zak'zi' wal inlleban nak daa yen ile'ile, daa konon' yen ile'kzi dezd ka wxe wzil yell-lioni axt naa, na' kat' ba wde gokan kochno yen ile'i ka len. <sup>22</sup> Na' shi Chioza' bi wzeshee llaka' gak ka', kono yila, shel'ka'. Per wzesheen daa chakile' beñ'ka' ba wleje' kwenche nakgake' lall' nee.

<sup>23</sup> 'Na' llaka' chak ka' shi no ina le': "Li wwia, ni ze Crístona", wa in'e le': "Na' zie", bi shajle'le. <sup>24</sup> La' wchej beñ' siye'gake', inazgake': "Nadaan Crístona", wa "Nadaan chyixji'a daa na Chioza'". Na' lekzka' gongake' dii gonan ka yibani beñ', na' gongake' yel' wak xen kwenche siye'gake' beñ', axt shel' wxegakile' siye'gake' beñ'ka' ba wlej Chioza' nakgake' lo nee. <sup>25</sup> Na' naa ba bzenid' le' ka nak daa zi' gak. <sup>26</sup> Daan shi no inaz le': "Crístona' zoe' latja' gana' bibi chashj chleb", bi shajle; wa shi no inaz le': "Loo yoona' zoe'", bi shajle'le. <sup>27</sup> La' kat' nad', Beñ' Bsel' Chioza' Yell-lioni, zizaa dii yoblə, gak ka chak kat' chep yes na' chzeeni'n doxen xan yabana'. <sup>28</sup> La' gana' de ba weta' nan' chllag llodka'.

**Kat' yiyed Jesucristona'**  
(Mr. 13:24-37; Lc. 21:25-33; 17:26-30, 34-36)

<sup>29</sup> 'Na' kate yiyoll yel' zak'zi'ka', lii gakte shgasj shchol lao wbillal' na' bewaa bich wzeeni'n na' beljka' ixop-gakan, na' yog' diika' lliia xan yabana' inibgakan.

<sup>30</sup> Na'ch yog' beñ' lle' yell-lioni ile'gakile' nad', Beñ' Bsel' Chioza' Yell-lioni, zizaa ladj bejka' kon yel' wak na' bal-aan xen. Na' yog' beñ'ka' lle' doxen yell-lioni kwellyesh'gake'. <sup>31</sup> Na' ka kwell trompeta' zillj wselaa anjl cha'ka' zbii zkaan yell-lioni kwenche yitopgake' beñ'ka' wlej Chioza' nak lall' nee.

<sup>32</sup> 'Na' li wwia ka chak che yag yixwewa': kat' ba chzolo chibia xlaguinna', na' chakbe'ile ba zoa yiyoo la'o linna'. <sup>33</sup> Ka'kzan, kat' ile'ile ba chak yog' diika' ba wnia' le' gakə, na' gakbe'ile ba zoa gaoshosh te che yell-lioni. <sup>34</sup> Dii li nia' le', aga ba wit beñ'ki zoa naa kat' gak yog' diiki lliia bia' gakə. <sup>35</sup> Yabana' na' yell-lioni te chegakin, san cho'a xtilaana' biga te cheyin na' gak ka nan.

<sup>36</sup> 'Kono nezi bi Ila bi gor te che yell-lioni, ni anjlka' lle' yabana', ni nad' nak' Xiin Chioza'. Toz Xa' Chioza' nezile'n.

<sup>37</sup> 'Na' ka gok kana' wzoa dii Noéna', ka'kzan chak kat' nad', Beñ' Bsel' Chioza' Yell-lioni, yiyed' dii yoblə. <sup>38</sup> La' beñ'ka' wzoa kana' zi' gak yej ziw' wala', cheej chao-gake', na' chshagna'gake' na' no choe'gake' yel' wishagna' che xiine'ka' axt llana' wyoolen dii Noéna' xiin xoolena' loo barkwa'. <sup>39</sup> Na' beñ'ka' bi wyoo bi gokbe'gakile' bin gak axt ka wzolo chak yejsiwaa na' bia' nisa' yog'gake'. Na' ka'kzan ni to kono gakbe'i kat' nad', Beñ' Bsel' Chioza' Yell-lioni, zizaa. <sup>40</sup> Kana'n, gana' lle' chop beñ' lyixaa, toe' yichi'a na' beena' sto yigaane'. <sup>41</sup> Na' gana' lle' chop noolə chotgake', toe' yichi'a na' stoe' yigaane'.

<sup>42</sup> 'Daan li se kwas kwezle nad' nak' Xanle, la' bi nezile bi Ila bi gor zizaa. <sup>43</sup> Li shajni'kachi dga, shel' xan yoona' nezile' bi gor illin beñ' wbanna' lille'na', aga wes yele' kwenche bi wi'e latj sho' wbanna' lille'na'. <sup>44</sup> Na'

daan, li soatezi soa kwezle nad', Ben' Bsel' Chioza' Yell-lioni, la' kat' bilə nonle lez, tokonganzi zizaa.

**Jempl che wen llinka', beena' chon wen na' beena' bi chon wen**  
(Lc. 12:41-48)

<sup>45</sup> Na' li gak ka to wen llin ben' chajni na' chone' daa chiya' gone' na' kat' chza' xane'na' chone' lall' nee lille'na' kwenche wi'e dii yeej gao wen llinka' sto gor cheyin. <sup>46</sup> Chakomba wen llinna' daa chilajile' chone' daa chidolee gone' kat' yillin xane'na'. <sup>47</sup> La' dii li nia' le', xane'na' gone' lall' nee yog' dii de che'. <sup>48</sup> Per shi wen llinna' nake' ben' mal na' gakile': "Wllaljachkzi xan'na' yilee." <sup>49</sup> Na' soloe' wit chine' wen llinka' nak lall' nee na' yeej gaolene' weezoka'. <sup>50</sup> Na' llana' bi nonyen'le' lez, tokonganz yillin xane'na'. <sup>51</sup> Na' daa bi chone' wen, na' wsak'zi'ene' ka sak'zi' ben' wxiye'ka' gana' kwellyesh'gake' na' gaoxaxj leye'ka' daa le gak-shejlall'gake'.

**Jempl che shi bi' nool wew'ka'**

**25** 'Yel' wñabia' che Chioza' chzaklebin daa gok che shi bi' nool wew' wyaj to wishagna', na' bex'gakb' kandil cheb'ka' jlezgakb' bi' byona' lill noola'. <sup>2</sup> Na' gay'gakb' nteyi na' zi gay'gakb' bi nteyi. <sup>3</sup> Bi'ka' bi nteyi kontele wza'len kandil cheb'ka', per bich bex'gakb' seta' yigaagakba'n. <sup>4</sup> Na' bi'ka' nteyi, bex'gakb' kandil cheb'ka' na' bex'tegakb' seta' yigaa-gakba'n. <sup>5</sup> Na' bi' wishagna'na' wll'e'ib' na' bi' nool wew'ka' chbez gokxwesgakb' na' wtesgakb'. <sup>6</sup> Na' do ka chel besyaa to ben', chi'e: "iBa za' bi' wishagna'na', li sho' lljatilchob'!" <sup>7</sup> Na' wyas bi' nool wew'ka' wzologakb' chiyonshao' kandil cheb'ka'. <sup>8</sup> Na' bi' nool wew'ka' bi nteyi gollgakb' bi'ka' zi gay': "Li gongach neto' lat' set chelena' la' ba chibill chento'ni." <sup>9</sup> Per bi'ka' nox' seta' che'gakb': "Bi gonnto'n, kwenche ki iyalljichon ganga. Wenlə li shaj li lljxi' chelena' gana' chiteen." <sup>10</sup> Na' shlak zejgakb' zjxi'gakb' seta', bllin bi' wishagna'na' na' bi'ka' nox' seta' wyoolengakb' ben'ka' loo yoonā' gana' chak wishagna'na', na'ch wyej puerta'. <sup>11</sup> Na' ka billin bi' nool wew'ka' jxi' seta', wnegakb' xan yoonā' che'gakb': "iBen'do', bsaljgach shoonto'!" <sup>12</sup> Per xan yoonā' chi'e legakb': "Bi wsalj', la' bi nombi'a le'." <sup>13</sup> Na'ch che' Jesúza' ben'ka':  
—Ka'kzə le', chiya' se kwasle, la' aga nezile bi lla bi gor zizaa.

**Jempl che ben'ka' bgaanlen xmech xane'ka'**

<sup>14</sup> 'Yel' wñabia' che Chioza' zaklebin dga wseesaa. To ben' wzee zeje' zit', na' ka ba zoa see, goxe' wen llin che'ka' na' bene' lall' na'gake' xmeche'na' kwenche gonlengake'n delgens.

<sup>15</sup> Na' toe' bi'e gayaa mil mech de or, na' stoe' chopā milan, na' beena' sto bi'e to milan. Bi'e to toe' kon ka dii chakile' wak gonlengake' llinna'. Na'ch wzee zeje'. <sup>16</sup> Na' beena' bi'e gayaa milan, benlene'n llin na' bene' gan zi gayaa milan. <sup>17</sup> Na' lekzka' beena' bi'e chopā mi-

lan, benlene'n llin na' bene' gan zi chopā milan. <sup>18</sup> San beena' bi'e to milan, jtene' to yech na' bkwashen.

<sup>19</sup> Na' ka ba gok ssha na' billin xane'ka', na' goxe' to togake' kwenche bidegake' kwent lawe'na'. <sup>20</sup> Na'ch zigaaete beena' bi'e gayaa mil mech de or blline' lawe'na', chi'ene': "Xan', ni de de gayaa mila' beno' nad', na' ni de zi gayaa mil daa benlena'n gan." <sup>21</sup> Na' che' xane'na'ne': "Le wen beno', to wen llin wen inlleb nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." <sup>22</sup> Na'ch wdena' bllin wen llinna' bkwaanlene' chopā mil, chi'ene': "Xan', ni de de chopā mila' beno' nad', na' ni de zi chopā mil daa benlena'n gan." <sup>23</sup> Na'ch che' xane'na'ne': "Le wen beno', to wen llin inlleb wen nako', beno' ka chiya' gono' kon daa bkwaanlen' li' lat'. Na' dii xench gon' li' naa. Wyoo kwenche yibalenilo' nad'." <sup>24</sup> Per ka bllin wen llinna' bkwaanlene' to mil, na' golle' xane'na': "Xan', nezid' nako' ben' zñia, na' to chizo' banez daa chon ben' yoblə. <sup>25</sup> Na'chan blleb' gonditj' xmecho'na', daan wden' to yech na' bkwashaan. Ni de xmecho'na', bikaagachan, la' chekzo'n." <sup>26</sup> Na'ch che' xane'na'ne': "Ben' lia, bikz bi llin yejni'alallii chono'. Nezteilo' to chizi'z' banez daa chon ben' yoblə. <sup>27</sup> Na' daa nezilo' kan' chon', zberache ki joo xmechaa gana' chon yichjin shlak bi wzoa? Shel' beno' ka', na' naa ba biyed' yiyono'n lente yichjinna', shel'ka'." <sup>28</sup> Na'ch golle' ben'ka' lle' na': "Li yikaa mecha' daa bkwaanlene' na' li we'n beena' nap shi milan. <sup>29</sup> La' kan' nakan, beena' chgone' llin daa yoo lo nee, gonche' lall' nee dii xench axt gat' kwe'chile'; san beena' bi chgone' llin daa yoo lo nee, axt daa ngoo lo nee lat' yidoyo. <sup>30</sup> Na' wen llinni bi yejni'alallii, li wzalee gana' shgasj shchol, gana' kwellyeshee na' gaoxaxj leye'na' daa le gakshejlallee."

**Ka gak kat' wchoglo Jesúza' che ben'**

<sup>31</sup> 'Kat' ziza' nad', Ben' Bsel' Chioza' Yell-lioni, len bal-aan xen cha'na' na' yog' anj cha'ka', na' wli'a yel' wñabia' choo yel' wñabia' xen cha'na'. <sup>32</sup> Na' yog' ben' lle' doxen yell-lioni yidopgake' lawa'na', na' gon' che cheləgake' ka chon to ben' chape' bayix' chone' chelə xil'ka' na' chelə shibka'. <sup>33</sup> Na' wzoa' shlaa de shli cha'ni ben'ka' zaklebi xil'ka' daa chonlilall'gake' nad', na' ben'ka' zaklebi shibka' daa bi benlilall'gake' nad', wzoagakee shlaa de robes cha'ni. <sup>34</sup> Na' nad', ben' wñabia', yep' ben'ka' lle' shlaa de shli cha'ni: "Li da, ka le' ba ben Xa' Chioza' ka gak wen chele, na' si'le banez daa ba nonshawee chele ka bxe bsiltie' yell-liona'. <sup>35</sup> La' ka wdon', bwaole nad'; na' ka wbilid', benle dii weej'; na' ka wda' ka ben' zit', bleble nad' lill-lena'. <sup>36</sup> Na' ka byallj xalaana', benle dii gokw', na' ka bi shawaa, bidwiale nad'; na' ka gotaa lillyana', bidwiale nad'." <sup>37</sup> Na' yog' ben' li ben' shao'ka' inagake' nad': "Xan', zbatran ble'in-to' li' chdono' na' bwaonto' li'? zBatran ble'into' li' chbililo' na' bennto' daa weejo'? <sup>38</sup> zBatran ble'into' li' chdo' ka ben' zit' na' blebnto' li' loo yoo lillnto'na'? zBatran ble'into' li' chdo' bibi xalaano' de na' bennto'n? <sup>39</sup> Na' zbatran gokbe'into' bi shawoo wa gotoo lillyana'

na' bidwianto' li'?" <sup>40</sup> Na' nad', beŋ' wŋabia', yepgakee: "Dii li nia' le', yog' daa benle che beŋ'ka' byallj bċhini, beŋ'ka' nak beŋ' bishaa na' beŋ' zan', la'kzi bi nakgake' beŋ' zakii, nad'kzan benile ka'."

<sup>41</sup> 'Na'ch yep' beŋ'ka' lle' shlaa de robesi: "Li kwas ka'lə, le' wen dii mal. Lo yi' gabila' daa chal' zejli kaŋi chido! le yiyajle gana' ba non Chioza' sak'zi' dii xiwaa len anjl cheyinka'. <sup>42</sup> La' ka wdon' bi beŋle dii gaw'; na' ka wbiid' bi beŋle dii yeej'. <sup>43</sup> Na' ka wda' ka beŋ' zit', aga bleble nad' loo yoo lill-le. Na' ka byallj xalaana', aga bi beŋle; na' ka bi shawaa wa gotaa lillyana', aga bidwiale nad'." <sup>44</sup> Na' inagake' nad': "Xan', zbatran wdono', wa wbiilo', wa wdoo ka beŋ' zit', wa bibi xalaano' got', wa bi shawoo, wa gotoo lillyana' na' bi goklennto' li'?" <sup>45</sup> Na' yepgakee: "Dii li nia' le', daa bi goklenle beŋ'ka' byallj bċhini, beŋ'ka' nak beŋ' bishaa na' beŋ' zan', la'kzi bi nakgake' beŋ' zakii, nad'kzan bi goklenle." <sup>46</sup> Na' beŋ' malkan' yiyajgake' gana' tegake' yel' sak'zi'na' zejli kaŋi, na' beŋ'ka' nak beŋ' li beŋ' shao' soalengake' nad' zejli kaŋi.

### Wloogake' xnezin gox'gake' Jesúza'

(Mr. 14:1-2; Lc. 22:1-2; Jn. 11:45-53)

**26** Na' ka biyoll be' Jesúza' yog' dill'ka', na'ch golle' beŋ'ka' nakgake'ne' txen:

<sup>2</sup> —Ba nezkzile zi chop llazan chyallj gal' Inj Paskwa', na' nad', Beŋ' Bsel' Chioza' Yell-lioni, gak' lo na' beŋ'ka' witgake' nad' lee yag cruza'.

<sup>3</sup> Na'ch bxoza' chnabia' na' beŋ'ka' chli' chsedi leya' na' beŋ' golka' chnabia' beŋ' Israelka' bdogpake' lill bxo choo bxo xenna', beena' le Caifás. <sup>4</sup> Na' wloogake' xnezin gox'gake' Jesúza' xochizi, ka ki gakbe'i beŋ', na' witgake'ne'. <sup>5</sup> Na' che' ljwelle':

—Bi gox'chone' shlak chal' Injina' kwenche bi wta wnecho beŋ'.

### To noolə bwazje' set zixa' yichj Jesúza'

(Mr. 14:3-9; Jn. 12:1-8)

<sup>6</sup> Na' ka zoa Jesúza' Betániana' len beŋ'ka' nakgake'ne' txen, wyajgake' lill to beŋ' le' Simón, beena' gok yillwe' daa le lepra. <sup>7</sup> Na' shlak chi' Jesúza' cho'a mesa', bllin to noolə noxee to lmet de yaj xochi na' yollan set dii chla' zix' dii zak' mech xen, na'ch bwazje'n yichj Jesúza'. <sup>8</sup> Na' ka ble'i beŋ'ka' nak Jesúza' txen daa ben noola', le bllaagake' na' che' ljwelle':

—zBiċhe benditjz beeni seta'? <sup>9</sup> Shel' bet'chokle'n, la' dii xen zakaan, na' bi'e xmechinna' beŋ' yesh'ka', shel'ka'.

<sup>10</sup> Na' beni Jesúza' ka choe'gake' dill', na' golle' le-gake':

—zBiċhe chnezle che nooli? La' daa ba bene' cha' nakan dii wen. <sup>11</sup> Ka nak beŋ' yesh'ka', toshiizi soagake' ladjlena', san nad', aga toshiizi soalen' le'. <sup>12</sup> Daa ba bwazj nooli nad' set zixa', bene' ka' kwenche gak-shao'zega kwerp cha'ni kat' wkwash'gake' nad'. <sup>13</sup> Na' dii li nia' le', gatteza' we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingakile'ne'.

### Juda' bdie' Jesúza' lo na' bxoza' chnabia'

(Mr. 14:10-11; Lc 22:3-6)

<sup>14</sup> Na'ch beena' le Jud Scariot, beena' nak txen beŋ'ka' shllin, wyaje' lao bxoza' chnabia'. <sup>15</sup> Na' golle' legake':

—zKa'k' chixjle nad' shi gon' Jesúza' lo na'le?

Na'ch wdixjgake'ne' shichoa mech plat. <sup>16</sup> Na'ch lo llana'tez wzolo Juda' chinoe' nakan gone' kwenche gone' Jesúza' lo na' beŋ'ka'.

### Xancho Jesúza' wdaolene' beŋ'ka' nakgake'ne' txen xshe'na'

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Lla nech che Inj Paskwa', llana' chaogake' yetxtila' daa bi nchix lewadúrana', beŋ'ka' nak Jesúza' txen wyajgake' kwite'na' che'gake'ne':

—zGa cheenilo' lljasini'anto' xshe' che Inj Paskwi?

<sup>18</sup> Na'ch che' Jesúza' legake':

—Li shaj yell Jerusalénna', na' beena' yillagle ye'lene': "Maestrona' ne' ba zoa gak daa llia bia' gak che', na' lill-lo'na' cheenile' wsini'anto' daa gaolennto'ne' xshe' che Inj Paskwi."

<sup>19</sup> Na'ch beŋ'ka' nakgake'ne' txen bengake' kon ka golle' legake', na' jasini'agake' xshe' che Inj Paskwa'.

<sup>20</sup> Na' ka gol, wche'len Jesúza' beŋ'ka' shllin cho'a mesa'. <sup>21</sup> Na' shlak chaogake' che' Jesúza' legake':

—Dii li nia' le', tole gonle nad' lo na' beŋ'ka' chakzi' chakzbani nad'.

<sup>22</sup> Na' ka golle' legake' ka' le gokyesh'gakile' na' to toe' che'gake'ne':

—Xan', zanadaan gon' ka', lla?

<sup>23</sup> Na'ch che' Jesúza' legake':

—Beena' ba bleejlene' nad' yetxtil che'na' loo yeeŋa', beena'kzan' gone' nad' lo na' beŋ'ka' chakzi' chakzbani nad'. <sup>24</sup> Ka nak nad', Beŋ' Bsel' Chioza' Yell-lioni, wit beŋ' nad' kon ka na Cho'a Xtill' Chioza', per inyesh'laz gak che beena' gone' nad' lo na' beŋ'ka'! inaklan wen shel'ka' bi golje'!

<sup>25</sup> Na'ch Juda', beena' wdie' Jesúza' lo na' beŋ'ka', chi'ene':

—Maestro, zanadaan gon' ka'?

Na'ch che' Jesúza'ne':

—Kan' ba wno'z.

<sup>26</sup> Na' shlak chaogake', bex' Jesúza' yetxtila' na' bi'e Chioza' yel' choxken, na' bxoje'n na'ch bi'en beŋ'ka' nakgake'ne' txen, chi'e:

—Li gao dga. Lennan' kwerp cha'ni.

<sup>27</sup> Na'tech bexee to kop dii yoll vino, na' bi'e Chioza' yel' choxken na' bi'en legake', na' golle':

—Yog'le li yeej dga yoll loo kopi, <sup>28</sup> la' lennan' xchen'na' daa gon ka gak li dii koba' bċheb Chioza' gone'. Na' laljan kwenche yiyakxen saaxya che beŋ' zan. <sup>29</sup> Na' nia' le', ni zeelo cheejlen' le' nis uvani. Aga weejcha'n axt kat'ch illin lla soacho txen gana' chnabia' Xa' Chioza', kana'chan yeejlana'n le' dii yoblə.

**Jesúza' chi'e bi w̄cheb Pédróna' shi nombi'ene'**

(Mr. 14:26-31; Lc. 22:31-34; Jn. 13:36-38)

<sup>30</sup> Na' ka bidaogake', beḷgake' be'la'ogake' Chioza' na'ch biyajgake' lo yaa Olívoza'. <sup>31</sup> Na' ka ziyajgake', che' Jesúza' ḷegake':

—Yog'le kwej yichjle nad' ṅaanlle'. Ḷa' kin na Cho'a Xtill' Chioza': "Wit' beena' chap xil'ka' na' illeshlesgakb."  
<sup>32</sup> Per ka yiban' ladj beṅ' wetka', yiyaa Galileana' ḷjalez' le'.

<sup>33</sup> Na'ch che' Pédróna'ne':

—Ḷa'kzi yog' beṅ'ki kwej yichjgake' li', nad' bi kwej yichj' li'.

<sup>34</sup> Na'ch che' Jesúza'ne':

—Dii ḷi nia' li', ṅaanlle' shon shii bi w̄chebo' shi nom-bi'o nad' ka zi' kwell shikwteza'.

<sup>35</sup> Na' Pédróna' chi'ene':

—Ḷa'kzi guetlencia' li', biga inia' bi nombi'a li'.

Na' ka'kzə goll yog'ḷoḷ beṅ'ka' nakgake'ne' txen.

**Jesúza' be'ḷwille' Chioza' latja' le Getsemaní**

(Mr. 14:32-42; Lc. 22:39-46)

<sup>36</sup> Na' ka bllinlen Jesúza' beṅ'ka' nakgake'ne' txen latja' le Getsemaní, na'ch golle' ḷegake':

—Nizə ḷi kwe' shlak shaa daa ka'lə ḷje'ḷwill' Chioza'.

<sup>37</sup> Na' b̄chi'e Pédróna' na' ḷhop bish'te xiṅ Zebede-wa', na' wzolo chakyeshile' dii wal inleeb. <sup>38</sup> Na' golle' ḷegake':

—Axt chaklikazid' lii guettia' daa ḷe chakyeshii yichjlall'dawaani. Ḷi igaṅ nizə na' bi guesle.

<sup>39</sup> Na' b̄lee ḷegake' zi lat' na' b̄chek' yichje'na' lo yona' na' be'ḷwille' Chioza', chi'e:

—Ḷadawaa, shi wakan, bengach ka ikwas dga yen ile'id', per aga gak ka cheenid', san gak ka cheenilo'.

<sup>40</sup> Na'ch biyajje' gana' lle' beṅ'ka' shon, na' ble'ile' ba chesgake'. Na' golle' Pédróna':

—ḶAbikzə bchejlat'gaile ḷa'ch' tgor kwezle nad' bi guesle? <sup>41</sup> Bi guesle. Ḷi we'ḷwill Chioza' kwenche bi we'zle latj gon beli chenna' le' gan. Aga ki cheeni yichjlall'do'lena' gonlen per beli chenna' bi chizoin.

<sup>42</sup> Na'ch wyaje' de wchop shii jeḷwille' Chioza', chi'e:

—Ḷadawaa, shi ba nakten idil' illag' dga, gakkzə ka cheenilo'.

<sup>43</sup> Na' ka billine' dii yoblə ḷekzka' chesḷagake' daa bi wzogakile' bishgala'. <sup>44</sup> Na' bikzə bisbane' ḷegake', na' wzee sto shii jeḷwille' Chioza' de wyon shii na' golle'ne' ka ba gollkze'ne'. <sup>45</sup> Na'ch biyajje' gana' bgaṅ beṅ'ka', na' golle' ḷegake':

—ḶAni chestkile? Ba bllin gor nad', Beṅ' Bsel' Chioza' Yell-lioni, gak' lo na' beṅ' saaxyaka'. <sup>46</sup> Ḷi ḷhas na' ḷi sho'. Ba za' beena' wdie' nad' lo neeka'.

**Bex'gake' Jesúza'**

(Mr. 14:43-50; Lc. 22:47-53; Jn. 18:2-11)

<sup>47</sup> Bilan' yiyoll yee Jesúza' ka' ka bllin Juda' beena' nak txen beṅ'ka' shllin, n̄chi'e beṅ' zan beṅ'ka' bsel' b̄xozka' ch̄nabia' len beṅ' golka' ch̄nabia' beṅ' Israelka'. Na' nox'gake' no spad na' no yag. <sup>48</sup> Na' Juda' ba bzajniile'

beṅ'ka' n̄chi'e nakan gone' wli'e beena' gox'gake', golle': "Kon beena' wnop', len gox'le."

<sup>49</sup> Na' ka bllinlene' beṅ'ka' kwit Jesúza', lii wbig'tie' lawe'na' chi'ene':

—ḶChiox ṅaa, maestro!

Na'ch bnopene'. <sup>50</sup> Na' Jesúza' golle'ne':

—Bish'dawaa, ben daa zidyeno'.

Na'ch lii wbig'te beṅ'ka' bex'gake' Jesúza'.

<sup>51</sup> Na' ka bex'gake'ne', to beena' nake'ne' txen wleje' spad che'na' na' wdine'n xmos b̄xoz choo b̄xoz xenna', b̄chogtie' ḷlaa nague'na'. <sup>52</sup> Na'ch goll Jesúza'ne':

—Bigooshao' spad cho'na', ḷa' yog' beṅ'ka' chitgakile' beṅ' yesya, ḷekzka' len guetgakile'. <sup>53</sup> ḶAchakile bi gak in̄abid' Ḷa'na' gaklene' nad' na' lii wsel'tie' anjil zan in-leeb, shel'ka'? <sup>54</sup> Per shi ka' gon', ḷnakra gak yillini Cho'a Xtill' Chioza' gana' nan chonan byen gak ki?

<sup>55</sup> Na'ch goll Jesúza' beṅ'ka' ba nox'gake'ne':

—ḶAchakile' no wban no nad' za'lenzle no spad no yag kwenche gox'le nad'? Yog' ḷla bli' b̄sedid' beṅ' ḷoo yoodo'na', ḷbiḷche bi bex'le nad' shlak bli' b̄sedid' beṅ' na'? <sup>56</sup> Per daa chonle ki, chillinin ka na Cho'a Xtill' Chioza' daa bzej dii beṅ'ka' wdixjee daa golle' ḷegake'.

Na'ch yog'ḷoḷ beṅ'ka' nak Jesúza' txen b̄xonjgake' na' bkwaan'gake' toze'.

**Jwa'gake' Jesúza' lao beṅ'ka' ch̄nabia' beṅ' Israelka'**

(Mr. 14:53-65; Lc. 22:54-55, 63-71; Jn. 18:12-14,19-24)

<sup>57</sup> Na' beṅ'ka' bex'gake' Jesúza' jwa'gake'ne' lill Caifáza', beena' nak b̄xoz choo b̄xoz xen, na' lille'na' ba ndop nllag beṅ'ka' chli' ch̄sedi leya' na' beṅ' golka' ch̄nabia'. <sup>58</sup> Na' Pédróna' janoe' Jesúza' de zit'lə, bllintie' lesh' chyoo che b̄xoz choo b̄xoz xenna' na' j̄che'lene' beṅ'ka' chap yoodo'na' kwenche ile'ile' ka gak che Jesúza'.

<sup>59</sup> Na' b̄xozka' ch̄nabia' len beṅ'ka' ch̄nabia' beṅ' Israelka' wdiljgake' beṅ' ch̄iljlallee che Jesúza' kwenche w̄choglogake' guete'. <sup>60</sup> Na' ḷa'kzi beṅ' zan beṅ'ka' biya dii biyiljall'gake' che Jesúza', aga bidilj cho'a dill' che'ka', axt ki bllin ḷhop beṅ' <sup>61</sup> be'gake' toz dill', che'gake':

—Ki wna beeni: "Nad' wak yichinj' yoodo' che Chioza' na' shon ḷlazə yiyontia'n dii yoblə."

<sup>62</sup> Na'ch wzolla' b̄xoz choo b̄xoz xenna', golle' Jesúza':

—ḶAbikz bi in̄o' cheyi dga nagake' cho'?

<sup>63</sup> Na' Jesúza' bikzə w̄nie'. Na'ch che' b̄xoz choo b̄xoz xenna'ne':

—Chios yaa Chios banna' soe' de taschiw. Wnashki neto' shi lin' Crístona', beena' nak Xiṅe'.

<sup>64</sup> Na' goll Jesúza'ne':

—Awe, kan' nakan. Na' ḷekzka' nia' le', wle'ile nad', Beṅ' Bsel' Chioza' Yell-lioni, kwi'a sh̄laa de sh̄li che Chioza', beena' zeelo nap yel' wak choo yel' wak xenna', na' ḷekzka' ile'ile nad' zizaa ladj bejka' ze xan yabana'.

<sup>65</sup> Na'ch bsho' b̄chez' xa b̄xoz choo b̄xoz xenna'. Na' daa bene' ka', bli'e nan ḷe b̄lee, na' wne:

—ḶKwinle ba benile naz beeni nake' Xiṅ Chioza'! Bich chyaljicho beṅ' gao xya che'. <sup>66</sup> ḶBi ka in̄ale?

Na'ch gollgake'ne':

—Chiyal' guete'.

<sup>67</sup> Na'ch bllaa xeneeka' cho'alaó Jesúza' na' wdap' wllall'gake'ne'. <sup>68</sup> Na' che'gake'ne':

—Shi iin' Crístona', wnashki non wdap' wllall' li'.

### Pédrona' bi bçhebe' shi nombi'e Jesúza'

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Na' shlak chak ka', Pédróna' chi'e lesh' chyoona' ka bllin to noolə wen mandad kwite'na' chi'ene':

—Lenon' nako' txen Jesúza', beñ' Galileana'.

<sup>70</sup> Na' lao yog' beñ'ka' lle' na', aga bçheb Pédróna' shi nake' Jesúza' txen, na' golle' noola':

—Bi ñezid' bin no'.

<sup>71</sup> Na' ka ziyaje' cho'a puerta' bizle'i sto beñ' yoblə le' na' chi'e beñ'ka' lle' na':

—Len beenin nake' txen Jesúza', beñ' Nazareta'.

<sup>72</sup> Na' lekzka' aga bizçheb Pédróna' shi nake' Jesúza' txen, bzoatie' Chioza' de tasçhiw, chi'ene':

—Bi nombi'a beena'.

<sup>73</sup> Na' gokzə xtít na' jabig' beñ'ka' lle' na' kwit Pédróna' na' che'gake'ne':

—Dii likzan lenon' nako' legake' txen, la' lii nakbia'te ka chshaljo'.

<sup>74</sup> Na'ch wzolo Pédróna' chone' zña, chi'e:

—¡Dii balçzan nia' bi nombi'ane'! ¡Chioza' wsak'zi'e nad' shi chziye'zan'!

Na' biyoll wne' ka' lii wchellte shikwteza'. <sup>75</sup> Na'ch jadiní Pédróna' daa goll Jesúza'ne': "Shon shii bi wçhebo' shi nombi'o nad' ka zi' kwell shikwteza'." Na'ch biza' Pédróna' chbellyeshee.

### Jwa'gake' Jesúza' lao Pilátóna'

(Mr. 15:1; Lc. 23:1-2; Jn. 18:28-32)

**27** Na' ka wyeeni', yog'loł bçozka' chñabia' na' beñ' golka' chñabia' beñ' Israelka' bengake' toz dill' witgake' Jesúza'. <sup>2</sup> Na' bçhejgake'ne' jwa'gake'ne' lao Pilátóna' beena' chñabia' gana' mbani Judeana'.

### Wit Juda'

<sup>3</sup> Juda', beena' bene' Jesúza' lo na' beñ'ka', ka gokbe'ile' ba nakan witgake' Jesúza' na' wdáo bdiachgan le'. Na'ch wyaje' lao bçozka' chñabia' na' lao beñ' golka' chñabia' jasane' shichoate mech de plata' daa be'gake'ne'. <sup>4</sup> Na' chi'e legake':

—Le malchga ben' daa bdiá' to beñ' bibi dol' nape' lo na'léna'.

Na' legake' che'gake'ne':

—¿Bera kwent çhe neto'? Li'z ñezilo' bin beno'.

<sup>5</sup> Na' jaza! Juda' mecha' loo yoodo'na', na' tech jayet kwine' jaloo do yene'.

<sup>6</sup> Na' bçozka' chñabia' bitopgake' mecha' na' che' ljjwellgake':

—Bi gak yiyonchon toz mech çhe yoodo'na', la' nakan dii ba nap xya.

<sup>7</sup> Na' be'gake' dill' yizi'gakile' mecha' to yell-lío dii le Yell-lío çhe Ben' Wen Yes' gana' kwwash'gake' beñ'

zit'ka'. <sup>8</sup> Daan ax̄t ñaanlla yell-liona' len Yell-lío Chen.

<sup>9</sup> Na' daa gok ka', billinin ka wna dii Jeremíaza', beena' wdixjee daa goll Chioza'ne', ka wne': "Bikaagake' shi-choa mech plat daa bçhogbia' beñ' Israelka' zak' beena'. <sup>10</sup> Na' kon len wxi'gakile' Yell-lío çhe Ben' Wen Yesaa, kon kana' wna Xancho Chioza' nad'."

### Bllin Jesúza' lao Pilátóna'

(Mr. 15:2-5; Lc. 23:3-5; Jn. 18:33-38)

<sup>11</sup> Ka bllin Jesúza' lao Pilátóna', na'ch che' Pilátóna'ne':

—¿Alin' beñ' wñabia' çhe beñ' Israelka'?

Na' che' Jesúza'ne':

—Kan' ba wno'.

<sup>12</sup> Na' shlak bçozka' chñabia' na' beñ' golka' chñabia' beñ' Israelka' chaogake' xya çhe', bibi dill' billi'e legake'. <sup>13</sup> Na'ch goll Pilátóna'ne':

—¿Abi chenilo' diika' chaogake' xya çho'?

<sup>14</sup> Per Jesúza' ni to diika' chaogake' xya çhe' ni shçho'a dill' bi billi'e, na' le bibanchgayi Pilátóna'.

### Bçhoglogake' guet Jesúza'

(Mr. 15:6-20; Lc. 23:13-25; Jn. 18:38-19:16)

<sup>15</sup> Na' beñ' wñabia'na' yooloe' yog' yiz chisane' to beñ' de lillyana' lla lñi Paskwa', kon beena' inab yog' beñ' yell yisane'. <sup>16</sup> Na' de to beñ' lillyana', beñ' le zeyi çhe' nake' beñ' mal, na' lie' Barrabás. <sup>17</sup> Na' ka ndop nllag beñ' yellka', che' Pilátóna' legake':

—¿No beñ'ki cheenile yisan'?, ¿aBarrabáza', awa Jesúzi, beeni nsi'gake' Cristo?

<sup>18</sup> Golle' legake' ka' la' gokbe'ile' daa chakxe'gakile' Jesúzan' jwa'gake'ne' lawe'na'.

<sup>19</sup> Shlak chi' Pilátóna' gana' chone' yel' josçhisa', bsel' xooléna' to rson, chi'ene': "Bi gaklebilo' beñ'ka' chao xya çhe beena', la' aga bi dol' çhe' de, la' nllé'yi wñeid' to yel' çhe', na' le bsheban nad'."

<sup>20</sup> Per bçozka' chñabia' na' beñ' golka' chñabia' beñ' Israelka' wlooyel'gake' beñ'ka' lle' lla' na' inabgake' yisane' Barrabáza' na' gone' mandad guet Jesúza'.

<sup>21</sup> Na' Pilátóna' sto shii wñabile' legake':

—¿No beñ'ki çhop cheenile yisan'?

Na' beñ'ka' che'gake'ne':

—¡Bisan Barrabáza'!

<sup>22</sup> Na' che' Pilátóna' legake':

—Na' ¿bera ka gonid' Jesúzi beeni nsi'gake' Cristo?

Na' yog'lole' che'gake'ne':

—¡Bdee lee yag cruza'!

<sup>23</sup> Na' che' Pilátóna' legake':

—Per ¿bera dii malan' ba bene'?

Na' legake' zizikli chosyaadiagake', che'gake'ne':

—¡Bdee lee yag cruza'!

<sup>24</sup> Na' ka gokbe'i Pilátóna' bich bi de gone' daa zizikchli ba chaklleshgakile', bene' mandad jxi'gake' nisa' kwençhe binee lao yog' beñ'ka', na' chi'e:

—Aga bi dol' nap' nad' daa guet beeni. Len' gak xbag'lene'.

<sup>25</sup> Na' yog'loł beñ'ka' che'gake'ne':

—¡Neto' len xiñnto'ka' idobinto'ne'!



<sup>26</sup> Na'ch bisan Pilátona' Barrabáza', na' bene' mandad bet wdingake' Jesúza' na' bene'ne' lo na'gake' kwenche wda'gake'ne' lee yag cruza'.

<sup>27</sup> Na' soldadka' bche'gake' Jesúza' gana' chon Pilátona' ye'l' joschisa' na' biti'agake' yog'lo' soldadka' nakgake' txen. <sup>28</sup> Na'ch wdingake' xa Jesúza' na' bwakwage'ne' to lech' xna ka che to beñ' wñabia'. <sup>29</sup> Na' bengake' to bxoõ de xis yesh' na' bllingake'n yichje'na' ka to corona, na' nee de shlina' bgox'gake'ne' to bar. Na'ch bchek' xibe'ka' lawe'na' na' btitjgakile'ne' che'gake':

—iToshiizi sechgayi che beeni chñabia' beñ' Israelka'!

<sup>30</sup> Na'ch no chlla' xeneeka' le', no chikaagake' bara' daa bgox'gake'ne' na' chyingake'n yichje'na'. <sup>31</sup> Na' ka wde btitjgakile'ne' na'ch biyingake' lechaa bwakwage'ne' na' biwakwage' xe'na' nakwkze'. Na'ch bche'gake'ne' kwenche wda'gake'ne' lee yag cruza'.

### Bda'gake' Jesúza' lee yag cruza'

(Mr. 15:21-32; Lc. 23:26-43; Jn. 19:17-27)

<sup>32</sup> Na' ka ba chchejgake' cho'a yell Jerusaléna', bilaggake' to beñ' Cirene, beñ' le Simón, na' bengake' byen bi'e yag cruz che Jesúza'.

<sup>33</sup> Na' ka' bllingake' latja' le Gólgota, na' zejin Latj che llit yichj beñ' wet. <sup>34</sup> Na' nan wweejgake' Jesúza' vino daa nchix' to dii zla', per ka bnixe'n, bi goonile' yeeje'n.

<sup>35</sup> Na' ka biyoll bda'gake'ne' lee yag cruza', soldadka' bengake' to wyitj kwenche got'bia' nogake' yido'l' xa Jesúza'. <sup>36</sup> Na'tech wche'gake' wdapgake'ne'. <sup>37</sup> Na' yichj yag cruz che'na' bda'gake' to dii choe'n dill' biçe nda'gake'ne' na', na' nan: "Beenin Jesúza', beñ' wñabia' che beñ' Israelka'."

<sup>38</sup> Na' lekzka' bda'gake' chop beñ' wban shlaa wej kwit yag cruz che Jesúza'. <sup>39</sup> Na' beñ'ka' chde gana' dee, chta yichje'ka' na' chgoogake'ne' belban, <sup>40</sup> che'gake'ne':

—Li' wno' yichinjo' yoodo'na' na' shõn llazõ yiyontio'n, ¡bisla kwino' lee yag cruzi shi leilo' nako' Xiin Chios!

<sup>41</sup> Na' lekzka' bxoza' chñabia' na' beñ'ka' chli' chsedi leya', na' fariseoka' len beñ' golka' chñabia' btitjgakile'ne', che' l'jwelle':

<sup>42</sup> —Gok bisle' beñ' yoblõ per bi chak yisla kwine'. Shi leile' len' beñ' wñabia' chechona', cho' beñ' Israel, yiyetjshkile' lee yag cruza' naa kwenche shajle'cho che'. <sup>43</sup> Nxenilallee Chioza'. Yislashkile'ne' naa shi leile' chakile'ne', la' wne' nake' Xiin Chios.

<sup>44</sup> Na' axt wbanka' da' lee yag cruza' kwite'na' lekzka' biya dii che'gake'ne'.

### Wit Jesúza'

(Mr. 15:33-41; Lc. 23:44-49; Jn. 19:28-30)

<sup>45</sup> Na' do ka gobill kat' biçho' doxen yell-lioni axt do ka chida shõnch biyeeni'. <sup>46</sup> Na' do ka chida shõnõ besyaa Jesúza' zilljõ, ne':

—Elí, Elí, ¿lama sabactani? —na' zejin: Chios cha', Chios cha', ¿biçe ba wlej yichjzo' nad'?

<sup>47</sup> Na' ba' beñ'ka' lle' na', bengakile' ka wne', na'ch che'gake':

—Elíazan' chaxe', beena' wdixjee daa goll Chioza'ne' kani'yi.

<sup>48</sup> Na' toe' lii zejdotie' jxi'e to dii bleeje' loo vino daa nak zichj zla', na'ch bzoe'n to lo xis na' jazoe'n cho'a Jesúza' kwenche yeeje'n. <sup>49</sup> Na' beñ'ka' sto che'gake':

—Jwayishkile'na', la'shki shi wid Elíaza' kwenche yid-sle'ne'.

<sup>50</sup> Na' ka biyoll besyaa Jesúza' zilljõ dii yoblõ, na' wite'.

<sup>51</sup> Na' ka wite', lechaa ze loo yoodo'na' lii bchez'ten gokan çhoplõ. Na' gok to bedxo' na' wlaa yajka'. <sup>52</sup> Na' lekzka' axt biyalj gana' bgash' beñ' wetka'. Na' zan beñ' wetka', beñ'ka' benlilall' Chioza', bibangake' sto shii

<sup>53</sup> na' bichejgake' gana' bgash'gake'. Na' ka bibanch

Jesúza', biyoogake' yell Jerusaléna', na' beñ' zan

ble'gakile' legake'.

<sup>54</sup> Na' xan soldadka' len beñ'ka' chaplene' Jesúza' le bllibgake' ka wxo' na' bichlõ diika' gok. Na' wngage':

—Dii likzan Xiin Chios beeni.

<sup>55</sup> Na' zan noolka' wno Jesúza' dezd gana' mbani Galileana', beñ'ka' goklengake'ne' che bi dii byalljile', lle'gake' de zit'lõ bwiagake' doxen ka gok. <sup>56</sup> Na' ladje'ka' len María, beñ' yell Magdálana', na' María beena' nak xna' Jacóbona' len Joséna', na' xna' beñ'ka' nak xiin Zebedewa'.

### Bkwash'gake' Jesúza'

(Mr. 15:42-47; Lc. 23:50-56; Jn. 19:38-42)

<sup>57</sup> Na' ka chzeles yela' bllin to beñ' wni'a lie' José, beena' nak beñ' yell Arimatea na' goke' txen Jesúza'.

<sup>58</sup> Na' wyaje' lao Pilátona' janabe' kwerp che Jesúza', na' Pilátona' bene' mandad biyoe'gake'ne'. <sup>59</sup> Na' bikaa Joséna' kwerp che Jesúza' na' bitobe'ne' to lech' xtil.

<sup>60</sup> Na' jlo'ene' to loo ba kob dii zi' beshawee to lee yaj. Na'tech bdee to yaj xen cho'ayinna'. Na'ch bizee. <sup>61</sup> Na' María, beñ' yell Magdálana', len Maríana' sto wche'gake' cho'a bana'.

### Beñ'ka' wdap cho'a ba che Jesúza'

<sup>62</sup> Na' betiyo, llana' chombaan beñ' Israelka', wyaj bxoza' chñabia' len fariseoka' lao Pilátona',

<sup>63</sup> che'gake'ne':

—Beñ'do', ba jadininto' ka wna dii beñ' wxiye'na' kana' mbane', wne' yiyõn lla yibane' dii yoblõ ladj beñ' wetka'. <sup>64</sup> Na' bse'lgach beñ' lljtape' gana' bkwash'gake'ne' axt ka gakch shõn lla kwenche bi shaj beñ'ka' nakgake'ne' txen do waj chel lljalejgake' kwerp che'na', na' tena' ye'gake' beñ': "Ba bibane' dii yoblõ ladj beñ' wetka'." La' shi ba bengake' ka', na'ch gongake' to dii wxiye' walch aga ka dii necha'.

<sup>65</sup> Na'ch che' Pilátona' legake':

—Na' lle' soldadka', li wche'gake' kwenche gapgake'n axt ga zeelo gakgake'.

<sup>66</sup> Na'ch wyajlengake' soldadka' na' bsejchachgake' gana' da' yaja' nkwasha'n cho'a bana'. Na'ch bzoagake' soldadka' kwenche gapgake'n.

**Biban Jesúza' ladj beŋ' wetka'**  
(Mr. 16:1-8; Lc. 24:1-12; Jn. 20:1-10)

**28** Na' ka wde lla sabda', llana' chombaangake', ni ba| lla nech che xmanna' sto, wyaj María nool Magdálana', len Maríana' sto jawiagake' cho'a bana'.<sup>2</sup> Na' wzolo to bedxo' xen wal daa betj to anjl che Xancho Chioza' yabana', na' ka blline' cho'a bana' na' bikwase' yaja' daa nsejan cho'a bana' na' wllie' lawinna'.<sup>3</sup> Na' anjla' chey cheeni'e kakzə ga chep yes na' xe'na' nakan xtil inlleb.<sup>4</sup> Na' ka ble'i soldadka' le' axt bxiztitgake' daa le bllebgake' na' axt witgake' shlet.<sup>5</sup> Na'ch che' anjla' noolka':  
—Bi illeble. Nejid' Jesúzan' chiyiljle, beena' wit lee yag cruza'.<sup>6</sup> Koch no de ni. Ba bibane' kon ka wne'. Li dakachi wwiale gani wdixjgake'ne'.<sup>7</sup> Na' li yiyajdo li lljayell beŋ'ka' nakgake'ne' txen: “Ba bibane' ladj beŋ' wetka' na' ba ziyaje' Galileana' lljaleze' le', na' na'kzə ile'ilene'.” Na' ba wnia' le' ka'.<sup>8</sup> Na'ch biza'do noolka' cho'a bana' chllebgake' na' le chibagakile' zjadixje'gakile' beŋ'ka' nak Jesúza' txen daa goll anjla' legake'.<sup>9</sup> Na' ka ziyajgake', bli'lao Jesúza' legake' na' bwape' legake' chiox. Na' jabig'gake' kwite'na' na' wde|gake' ŋi'ena' be'la'ogake'ne'.<sup>10</sup> Na' che' Jesúza' legake':  
—Bi illeble. Li lljayell beŋ' bishaaka' shajgake' Galileana' na' ile'gakile' nad' na'.

**Wxi' laxj soldadka' kwenche bi we'gake' dill' biban Jesúza'**

<sup>11</sup> Na' ka biza' noolka', ba| soldadka' wdap gana' bkwash'gake' Jesúza' biyajgake' yell Jerusalénna' jayell-

gake' bəozka' chŋabia' yog' diika' gok.<sup>12</sup> Na'ch wyaj bəozka' chŋabia' je'lengake' beŋ' golka' chŋabia' dill' naklə ka gongake' daa goll soldadka' legake'. Na' ka biyoll be'gake' dillaa, na'ch be'gake' soldadka' mech xen,<sup>13</sup> che'gake':

—Inatezle wa| chel shlak chesle, beŋ'ka' nak Jesúza' txen bidlejgake' kwerp che'na'.<sup>14</sup> Na' shi ba biŋezi Pilátona' dga, neto'kzə lljazajniinto'ne' nakan gok kwenche bibi gonile' le'.

<sup>15</sup> Na'ch soldadka' bex'gake' mecha' na' biza'gake' jazegake'n dill' kon ka gollgake' legake'. Na' axt ŋaanlla beŋ' Israelka' ni nagake' ka'.

**Jesúza' golle' legake' we'gake' xtilleena' doxen yell-lioni**  
(Mr. 16:14-18; Lc. 24:36-49; Jn. 20:19-23)

<sup>16</sup> Na' wyaj beŋ'ka' shnej, beŋ'ka' nak Jesúza' txen, Galileana' kwenche yillaggake' Jesúza' lo yaana' gana' golle' legake'.<sup>17</sup> Na' ka ble'gakile' Jesúza', be'la'ogake'ne', per balgake' gokchoplall'gake'.<sup>18</sup> Na'ch jabig' Jesúza' kwite'ka', chi'e legake':

—Ba non Chioza' lo na' inabi'a yabana' na' yell-lioni.  
<sup>19</sup> Daan, li shaj doxen yell-lioni, li lljali' lljasedi yog' beŋ' kwenche gagkake' nad' txen. Na' wchoale legake' nis daa ba nonllilall'gake' Xacho Chioza', na' nad', Xiiŋe', len Espíritu Sátona'.<sup>20</sup> Na' wli' wsedile legake' gongake' yog' diika' ba ben' mandad gonle. Na' nad' soalen' le' toshiizi axt ka te che yell-lioni.

# San Marcos

**Juanna', beena' bchoa beṅ' nis**  
(Mt. 3:1-12; Lc. 3:1-9, 15-17; Jn. 1:19-28)

**1** Ki wzolo dill' wen dill' kob ɕhe Jesucristona', beena' nak Xiṅ Chioza'.  
<sup>2</sup> Gok ka wna dii Isaíaza', beena' wdixjee daa goll Chioza'ne':  
 Wseḷaa to beṅ' kwialoe' lawo'na',  
 wi'e xtilloona' kwenɕhe ba lle' beṅ' wzenague' ɕho' kat' illino'.  
<sup>3</sup> To beṅ' wṅie' zilljə to lo latj gana' bibi chashj chḷeb, chi'e:  
 "Li se kwas wzenagle ɕhe Xanchona' na' wsalj yichjlall'do'leka' kat' zee."  
<sup>4</sup> Na' bllin Juanna' latja' gana' bibi chashj chḷeb. Bchoe' beṅ' nis, na' wdixje'ile' beṅ' chiya!' yiyaj yilengakile' na' ɕhoagake' nis kwenɕhe yizi'xen Chioza' saaxya ɕhe'ka'.  
<sup>5</sup> Na' yog' beṅ'ka' lle' gana' mbani Judeana' na' beṅ'ka' lle' yell Jerusalenna' jazenaggake' dillaa cho'e. Na' bixoadol'gake' saaxya ɕhe'ka', na' bchoa Juanna' le-gake' nis loo yao Jordánna'.  
<sup>6</sup> Na' xa Juanna' gokan de xa kamey na' bɕhej lsi-neena' to yid. Na' wdawe' bish'zo na'ch shin baser dii de lyixaa. <sup>7</sup> Na' wdixje'ile' beṅ'ka' cho'a xtill' Chioza', chi'e:  
 —Zi' za'lə beena' napch ye! wak xench ka nad', na' ni bi zakaa gak' xmose' kwenɕhe wḷeɕhj' xe'le'na'. <sup>8</sup> Nad' ba bchoa' le' nisa', san le', gone' ka yidsoa Espiritu ɕhe Chioza' loo yichjlall'do'lena'.

**Jesúza' wchoe' nisa'**  
(Mt. 3:13-17; Lc. 3:21-22)

<sup>9</sup> Na' kana'yen' Jesúza' wzee yell Nazareta' daa llii gana' mbani Galileana' na' wyaje' cho'a yao Jordánna' gana' bchoa Juanna'ne' nisa'. <sup>10</sup> Na' shlak chichej Jesúza' loo nisa', ble'ile' byalj yabana' na' betj Espiritu ɕhe Chioza' jsoalene'ne' na' ble'ile' Espirituna' ka to palom. <sup>11</sup> Na' bengakile' wṅe Chioza' yabana', chi'e Jesúza':

—Lin' nako' Xiṅ', chakchgaid' li' na' le chibaid' li'.

**Dii xiwaa goklalliin kooyela'n Jesúza' gone' ka cheenin**  
(Mt. 4:1-11; Lc. 4:1-13)

<sup>12</sup> Na' lii bɕhe'te Espiritu ɕhe Chioza' le' latja' gana' bibi chashj chḷeb. <sup>13</sup> Na' wzoe' na' ɕho lla ladj ba zṅia-ka', na' Satanáza' daa chṅabia' dii xiw'ka' goklalliin kooyela'n le' gone' ka cheenin. Na' ka wde, jaklen anj-ka' le'.

**Wzolo Jesúza' choe'lene' beṅ' xtill' Chioza' gana' mbani Galileana'**

(Mt. 4:12-17; Lc. 4:14-15)

<sup>14</sup> Biyoll wloogake' Juanna' lillyana', Jesúza' wyaje' gana' mbani Galileana' na' je'lene' beṅ' dill' wen dill' kob ɕhe Chioza', <sup>15</sup> chi'e:  
 —Ba bllin lla inabia' Chioza' loo yichjlall'do'lena'. Li yiyaj yileni dii malka' chonle na' li shajle' dill' wen dill' kob ɕhe'na'.

**Jesúza' goxe' tap beṅ' wxen beḷ**  
(Mt. 4:18-22; Lc. 5:1-11)

<sup>16</sup> Shlak ngoo Jesúza' nez cho'a nisdo' ɕhe Galileana', ble'ile' Simónna' len beṅ' bishee Andréza', chzal'gake' yixj daa chzengakile' beḷka' loo nisdo'na', la' lɛnnan' noni xshingake'. <sup>17</sup> Na' goll Jesúza' legake':

—Li da, dino nad'. Na' ka chonle chbejle beḷka' loo nisi, ka'kzan gonle yibejle beṅ' lao dii mala'.

<sup>18</sup> Na' ka biyoll golle' legake' ka', lii bkwaan'tegake' yixja' daa chzengakile' beḷka' na' zejle'ngake'ne'.

<sup>19</sup> Ka ba wza'gake' zi lat', ble'i Jesúza' Jacóbona' len beṅ' bishee Juanna', beṅ'ka' nak xiṅ Zebedewa', lle'gake' loo barkwa' chiyonshao'gake' yixja' daa chzengakile' beḷka'. <sup>20</sup> Na' lii wṅetie' legake', na' bkwaan'gake' xe'ka', beena' le Zebedeo, len beṅ'ka' chaklen legake' loo barkwa', na' wyajle'ngake' Jesúza'.

**Jesúza' bibeje' dii xiwaa yoo to beṅ'**  
(Lc. 4:31-37)

<sup>21</sup> Na' bllingake' yell Carpernaúma'. Na' lla sabda', llana' chombaan beṅ' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedile' legake'. <sup>22</sup> Na' bibani beṅ'ka' lle' na' ka chli' chsedi Jesúza', la' bli' bsedile' legake' lega beṅ' nap ye! wṅabia', na' bi chli' chsedile' ka beṅ'ka' chli' chsedi leya'. <sup>23</sup> Na' ladj beṅ'ka' chdop chllag gana' chli' chsedile' legake', len to beṅ' yo'e dii xiwaa, na' besyaan, che'n:

<sup>24</sup> —jwayi neto', Jesús, beṅ' Nazaret! ¿Abido' kwenɕhe wlliyoo neton'? Nad' nombi'a li' na' ṅezid' nako' dowalj beṅ' li beṅ' shao' ɕhe Chios.

<sup>25</sup> Na' Jesúza' bsheshlene'n, chi'e:

—jLlizə wzoa! jBichej loo yichjlall'do' beeni!

<sup>26</sup> Na' dii xiwaa wchoonan beena' na' bchix btoḷan le' na' bichejan chosyaadian. <sup>27</sup> Na' yog' beṅ'ka' lle' na' bibangakile', na' che' ljjwellgake':

—¿Bi dii kob dga chli' chsedi beeni, Ila? ¡Nakbia' nape' ye! wñabia', la' axt len dii xiw'ka' chsheshlene' na' chzoagakan xtillee!

<sup>28</sup> Na' lii wzete dill' doxen gana' mbani Galileana' ka nak daa chon Jesúza'.

### Jesúza' biyone' tobiin che Simón Pédrona'

(Mt. 8:14-15; Lc. 4:38-39)

<sup>29</sup> Na' biza' Jesúza' gana' chdop chllaggake' na' biyaj-lene' Jacóbona' len Juanna' lill Simónna' na' Andréza'.

<sup>30</sup> Na' tobiin che Simónna' die' yo'e dii la. Na' gollgake' Jesúza' daa chak che'. <sup>31</sup> Na' wbiguee gana' die' na' bexee neena' blise'ne'. Na' lii bichejte dii lana' na' wzoloe' bene' daa wdaogake'.

### Jesúza' biyone' ben' zan

(Mt. 8:16-17; Lc. 4:40-41)

<sup>32</sup> Na' ka ba wxoa wbillá, jwa'gake' lao Jesúza' yog' ben'ka' bi shao' na' ben'ka' yoo dii xiwaa. <sup>33</sup> Na' yog' ben'ka' lle' yella' bdi'a bllaggake' cho'a yooná gana' zoe'. <sup>34</sup> Na' Jesúza' biyone' ben' chak wde wdeli yillwe'. Na' lekzka' bibeje' dii xiw'ka' yoo ben', na' bi bi'e latj inegakan daa nombia'gakan le'.

### Jesúza' cho'e cho'a xtill' Chioza' gana' mbani Galileana'

(Lc. 4:42-44)

<sup>35</sup> Na' Jesúza' wyase' ni ba, na' bcheje' yella' jelwille' Chioza' ga kono ben' lle'. <sup>36</sup> Na' wyaj Simónna' len ben'ka' nakgake'ne' txen jadiljgake'ne', <sup>37</sup> na' ka billegakile'ne' na'ch gollgake'ne':

—Yog'z ben' chiyiljgake' li'.

<sup>38</sup> Na' che' Jesúza' legake':

—Li sho' yellka' sto, diika' Iliá gaozə, kwenche lekzka' llje'len' cho'a xtill' Chioza' ben'ka' lle' na', la' ni cheyin-nan' bid'.

<sup>39</sup> Na' wda Jesúza' yog' yellka' Iliá doxen gana' mbani Galileana' cho'e'lene' ben'ka' cho'a xtill' Chioza' yog' gana' chdop chllag ben' Israelka' cho'e'llwillgake' Chioza', na' bibeje' dii xiw'ka' yoo ben'.

### Jesúza' biyone' to ben' chak yillwe' daa le lepra

(Mt. 8:1-4; Lc. 5:12-16)

<sup>40</sup> To ben' chak yillwe' daa le lepra blline' lawe'na' na' bchek' xibe'na' lawe'na', chi'e:

—Shi cheenilo', wak yikwaso' yillwe'ni chak'.

<sup>41</sup> Na' biyesh'lallii Jesúza'ne', na' bxoá neena' yich-je'na' chi'e:

—Cheenid'x. Na' naate yikwasa'n.

<sup>42</sup> Na' katena' lii bikwaste léprana' na' biyakile'. <sup>43</sup> Na' Jesúza', chi'ene':

<sup>44</sup> —Kono yoo dga ba ben' cho'. San wyaj jali'lawa' lao bxoza', na' jwa' daa chiyal' lljoo lao Chioza' ka nllia dii Moiséza' bia' goncho kwenche inezile' ba biyakilo'.

<sup>45</sup> Per ka bizee, wzoloe' bi'e dill' lao yog'loj ben' daa gokə. Na' daa bene' ka', bich gok sho' Jesúza' ka nla'zə yellka', san bigaane' ga kono ben' lle'. Per bia'kzə wyaj ben' za' wde wdeli yell jawiagake'ne'.

### Biyon Jesúza' to ben' net ni'a neena'

(Mt. 9:1-8; Lc. 5:17-26)

**2** Wde to chop Ila, Jesúza' billine' sto shii yell Capernaúma'. Na' ka wñezi ben'ka' lle' na' ba billine' yooná gana' wzoe', <sup>2</sup> na' bdi'a bllag ben' zan inlleb loo yooná axt bich chaki lesh' chyooná she'gake'. Na' bli' bsdile' legake' cho'a xtill' Chioza'. <sup>3</sup> Na' bllin tap ben' nllengake' to ben' net ni'a neena'. <sup>4</sup> Na' daa bi gok illingake' gana' zete Jesúza' daa lle' ben' zan inlleb, na' wzologake' bsaljgake' koll' yooná na' bletjgake'ne' do daa che'na'. <sup>5</sup> Na' ka gokbe'i Jesúza' chajle'gake' che', golle' ben' we'na':

—Xiiñ, ba biyakxen saaxya cho'ka'.

<sup>6</sup> Na' chi' ba ben'ka' chli' chsedi leya', na' wza'lall'gake': <sup>7</sup> “¿Beraçhe naz beeni ka? Chonz kwine' ka Chioza'. Kono zoa sto ben' gak yizi'xen saaxya che ben', san toz Chioza' gak yizi'xene'n.” <sup>8</sup> Na' lii gokbe'teyi Jesúza' daa chza'lall'gake', na' wñabile' legake', chi'e:

—¿Beraçhe chza'lall'zle ka'? <sup>9</sup> ¿Achakile chyalljchid' ye! wak xench yep' beeni: “Ba bizi'xen' saaxya cho'na”, ka daa yepee: “Biyas na' bigoo nez”? <sup>10</sup> Na' wliid' le', nad' Ben' Bsel' Chioza' nap' ye! wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

<sup>11</sup> —Nia' li', biyas, bitob daa cho'na', na' biyaj lillo'na'.

<sup>12</sup> Na' lii biyastie' bitobe' daa che'na' na' bizee chwiata ben'ka' lle' na'. Na' yog'zgake' bibani na' be'la'ogake' Chioza', che'gake':

—Bigañ' ile'icho ka dga.

### Jesúza' goxe' Levína' kwenche gake'ne' txen

(Mt. 9:9-13; Lc. 5:27-32)

<sup>13</sup> Na' wyaj Jesúza' sto shii cho'a nisdona' na' ben' zan janogake'ne', na' bli' bsdile' legake'. <sup>14</sup> Na' wde Jesúza' gana' chi' Levína', xiiñ Alfewa', chçhixje' daa chkaa ben' Rómaka'. Na' chi'ene':

—Da, dino nad'.

Na' wzolla' Levína' janoe'ne'.

<sup>15</sup> Na' to shii Jesúza' len ben'ka' nakgake'ne' txen cheej chaogake' lill Levína', na' zan ben' wìchixjka' na' ben'ka' zeyi chegake' nakgake' ben' mal cheej chaolengake'ne', la' ben' zan ba nak ben'ka' no le'. <sup>16</sup> Na' ba fariseoka', ben'ka' lekzka' chli' chsedi leya', ka ble'gak-ile' cheej chaolen Jesúza' ben'ka', na' gollgake' ben'ka' nakgake'ne' txen:

—¿Beraçhe cheej chaolenz beena' chli' chsedi le' ben' wìchixjka' na' ben' malka'?

<sup>17</sup> Na' ka beni Jesúza' che'gake' ka', na'ch chi'e:

—Ben'ka' zoa shi'a shao' aga no wen rmech chyalljgake'ne', san ben'ka' bi shawaan chyalljgake'ne'. Ka'kzə nad', aga bid' ni che ben'ka' nak ben' li ben' shao', san ni che ben' malkan' bid'.

**Wnabgakile' Jesúza' biçhe bi chon beñ'ka' nakgake'ne'  
txen wbasaa**  
(Mt. 9:14-17; Lc. 5:33-39)

<sup>18</sup> To shii beñ'ka' nak Juanna' txen na' beñ'ka' nak fariseoka' txen choagake' wbas'. Na' bał beñ' wyaj-gake' lao Jesúza' na' che'gake'ne':

—Beñ'ka' nak Juanna' txen na' beñ'ka' nak fariseoka' txen choagake' wbas'. ¿Berache beñ'ka' nakgake' li' txen bi chongake'n?

<sup>19</sup> Na' che' Jesúza' legake':

—¿Awak soa beñ'ka' chaxe' to ga chak wishagna' wbasaa shlak chak lñina'? Bi gakan, la' shlak zoalen beena' chshagna' legake' aga wak soagake' wbasaa. <sup>20</sup> San wllin lla kat' yikwas beñ' beena' chshagna' lad-je'ka', kana'chan soagake' wbasaa.

<sup>21</sup> 'Ni to beñ' bi chida' chichollee lee lech' gola' lat' lech' kob, la' lech' koba' yibe'n kat' çhibe'n na' zizikli wçhez'chan lech' gola', na' dii xench gak gana' nchez'. <sup>22</sup> Ni biga zoa beñ' chguee vino koba' loo yid golka', la' vino koba' wçhezaan yid gola' na' kwiayi' vino koba' lente yid gola'. Na' daan, chiyał' sholl vino koba' loo yid koba'.

**Beñ'ka' non Jesúza' txen chyishjgake' do çhe trígona'  
llana' chombaangake'**  
(Mt. 12:1-8; Lc. 6:1-5)

<sup>23</sup> Na' to lla sabd, llana' chombaang beñ' Israelka', wdelen Jesúza' beñ'ka' nakgake'ne' txen to ga naz to beñ' trigo, na' wzolo beñ'ka' nakgake'ne' txen wdishj-gake' trígona' wdaogake'n. <sup>24</sup> Na' goll fariseoka'ne':

—¿Berache chonz beñ'ki nako' txen daa bi chiyał' gongake' llani chombaangcho?

<sup>25</sup> Na' golle' legake':

—¿Ani shlin biñ' wlable daa ben dii Davina' to shii kon beñ'ka' nakgake'ne' txen ka byallj daa gaogake'?

<sup>26</sup> Kana' nak Abiatar' bçoz choo bçoz xen, wyoo Davina' gana' nongake' lill xlatjə Chioza' na' wdoyoe' yetxtila' daa naki çhe Chioza' na' wdaolene'n beñ'ka' nakgake'ne' txen, la'kzi toz bçozkan' chiyał' gaogake'n.

<sup>27</sup> Na' lekzka' golle' legake':

—Chioza' wleje' llani chombaangcho kwençhe gakle-nan beñeçha', aga bxe bsile' beñeçha' kwençhezə we'la'ogake' llani chombaangchon. <sup>28</sup> Daan, nad', Beñ' Bsel' Chioza' Yell-lioni, chñabi'a lao llani chombaangcho.

**Beena' net neena' tñaa**  
(Mt. 12:9-14; Lc. 6:6-11)

**3** Na' sto shii wyaj Jesúza' gana' chdop chllaggake' choełwillgake' Chioza' na' ladj beñ'ka' lle' na' len to beñ' net neena' tñaa. <sup>2</sup> Na' chwiayen'gake' shi wiyon Jesúza'ne' lla sabda', llana' chombaangake', kwençhe gaogake' xya çhe'. <sup>3</sup> Na' che' Jesúza' beena' net neena' tñaa:

—Wzolla' na' wze gchoł beñ'ki.

<sup>4</sup> Na'ch wñabile' beñ'ka' ndop nllag na':

—¿Beran na leya' chiyał' goncho lla sabdka'? ¿Agon-cho daa nak wen, anti goncho daa nak mal? ¿Ayislacho beñ', anti witchone'?

Na' kokzno billii xtilleena'. <sup>5</sup> Na' ka chwie' beñ'ka' lle' na', bllee na' gokyeshile' daa nakgake' beñ' lall'do' çheçh, na' chi'e beena':

—Błi noona'.

Na'ch błi na' beena' na' lii biyakteyin. <sup>6</sup> Na' bichej fariseoka' na' wzologake' chgoogake' xñezin len beñ'ka' non Heródeza' txen kwençhe witgake' Jesúza'.

**Beñ' zan bdop bllag cho'a nisdona' gana' chda Jesúza'**

<sup>7</sup> Na' biza' Jesúza' gana' zoe' na' zejlene' beñ'ka' nakgake'ne' txen cho'a nisdona' na' beñ' zan beñ' Galiléaka' wnogake' legake'. <sup>8</sup> Na' beñ' zan beñ'ka' lle' gana' mbani Judeana', na' yell Jerusalénna', na' gana' mbani Idumeana', na' beñ'ka' lle' shłaa yao Jordánna' na' yellka' ndił nllag yell Tírona' na'ch yell Sidónna', ka wñezgakile' chon Jesúza' dii zan yeł' wak, na' wyajgake' jawiagake'ne'. <sup>9</sup> Na' daa lle' beñ' zan inlleb, golle' beñ'ka' nakgake'ne' txen yisbig'gake' to barkw gana' lljshie' kwençhe bi idakwyill' beñ' be beñ' zilka' le'. <sup>10</sup> Ła' beñ' zan inlleb ba biyone' na' yog' beñ'ka' bi shao' ch-di'a chllaggake' lawe'na' kwençhe gox'gake'ne' na' yiyakgakile'. <sup>11</sup> Na' dii xiw'ka' yoo bał beñ'ka', ka chle'gakin Jesúza', chongakan ka chçhek' xib beñ'ka' lawe'na' na' chosyaagakan, che'gakan:

—łLin' nako' Xiin Chioza'!

<sup>12</sup> Na' Jesúza' bsheshlene'gakan kwençhe bi inagakan ka' ga lle' lla' beñ'.

**Jesúza' chbeje' shllin postlka'**  
(Mt. 10:1-4; Lc. 6:12-16)

<sup>13</sup> Ka biyoll ben Jesúza' diika', na' wleje' bał beñ'ka' wyazlallee gakgake'ne' txen na' wyajlengake'ne' to lo yaa. <sup>14</sup> Na' wleje' shllin beñ'ka' kwençhe talengake'ne' txen na' kwençhe wsełee legake' llje'gake' cho'a xtill' Chioza', na' bsi'e legake' postl. <sup>15</sup> Na' bi'e legake' yeł' wñabia' kwençhe yiyongake' beñ'ka' bi shao' na' yibej-gake' dii xiw'ka' yoo beñ'. <sup>16</sup> Beñ'kin wleje' shllin: Simónna', beena' bisi'e Pedro; <sup>17</sup> Jacóbona' len beñ' bishee Juanna', beñ'ka' nak xiin Zebedewa', (beñ'ka' bsi'e Boanerges, daa zeji beñ' nak ka yi' wziiw' dii chashj chtin); <sup>18</sup> na' Andréza', Felípena', Bartoloména', Matewa', Tomásza', Jacóbona', xiin Alfewa', Tadewa', Simón, beena' wlen cananistka', <sup>19</sup> na'ch Jud Scariota', beena' bene' Jesúza' lo na' beñ' malka'.

**Wnagake' çhe Jesúza' bçhine' yeł' wak çhe dii xiwaa**  
(Mt. 12:22-32; Lc. 11:14-23; 12:10)

<sup>20</sup> Na' Jesúza' len beñ'ka' nakgake'ne' txen biyajgake' gana' zoagake'. Na' daa bizdi'a bizllag beñ' zan inlleb, ni bi gok latj gaogake'. <sup>21</sup> Ka wñezi beñ'ka' nak bish' lljwell Jesúza', wyajgake' nan lljaxi'gake'ne', la' gokgak-ile' ba chaktonte'n.

<sup>22</sup> Na' lekzka' beñ'ka' chli' chsedi leya', beñ'ka' zaak Jerusalénna', nagake' çhe':

—Bezlo daa chṇabia' dii xiw'kan' yo'e, na' ye! wak cheyinnan' chisheshile' dii xiw'ka'.

<sup>23</sup> Na' gox Jesúza' legake' na' bzo'e to jempl lawe'ka', chi'e:

—¿Nakra gon Satanáza' yibej ljwell dii xiwiinna'?

<sup>24</sup> Ben'ka' lle' toz yell shi til-len ljwellgake' na' gakgake' choplə, aga ssha soagake'. <sup>25</sup> Na' ben'ka' lle' toz yoo shi illaa ljwellgake' na' gakgake' choplə, aga ssha soagake'. <sup>26</sup> Na' shi Satanáza' na' dii xiw'ka' nak lall' na'yin yiyakdilgakan na' gakgakan choplə, bi idiagakan, san ba bllin lla kwiayi'gakannan', shi ṇaa.

<sup>27</sup> 'Kono gak sho' loo yoo lill to ben' wal na' kwane' bi de che' shi bi wḥeje'ne' zigaate, na'chan wtesh wlo'e' loo lille'na'.

<sup>28</sup> 'Dii li nia' le', Chioza' yizi'xene' yog'lo! saaxya na' yog'lo! dii mal daa chbell chṇe ben' che'; <sup>29</sup> san beena' ine zban che Espíritu Sántona', biga yizi'xene' che', na' toshiizi gak xbaguee cheyi daa wchell wṇie' che'.

<sup>30</sup> Golle' legake' ka' daa wnagake' che' dii xiwaan yo'e.

### Xṇa' Jesúza' na' ben' bisheeka'

(Mt. 12:46-50; Lc. 8:19-21)

<sup>31</sup> Na'ch bllin xṇa' Jesúza' len ben' bisheeka', wzegake' lesh' chyooná' na' bsel'gake' ben' janegake'ne'. <sup>32</sup> Na' ben'ka' chi' kwit Jesúza' gollgake'ne':

—Ba chiyilj xṇooná' li' len ben' bishooka'.

<sup>33</sup> Na' chi'e legake':

—¿Aṇezile noran xṇa'na' na' ben' bishaaka'?

<sup>34</sup> Na' chwie' ben'ka' chi' kwite'na' na'ch chi'e:

—Ben'kin xṇa'na' na' ben' bishaaka'. <sup>35</sup> Notteza beena' chon ka cheeni Chioza', len' ben' bishaana', ben' zanna' na'ch xṇa'na'.

### Jempl che to ben' goz goon

(Mt. 13:1-9; Lc. 8:4-8)

**4** Sto shii wzolo Jesúza' bli' bsdile' ben' cho'a nisdona', na' daa bdop bllag ben' zan inleeb jshie' to loo barkw daa chi' cho'a nisdona', na' ben'ka' bdi'a bllag wlle'gake' cho'a nisdona'. <sup>2</sup> Na' dii zan dii bli' bsdile' legake' na' bchine' jemplka', na' golle' legake':

<sup>3</sup> —Li wzenag dga. To ben' goz goon wzee zeje' goza'.

<sup>4</sup> Na' ka zej chzalee biṇna', baḷan bxop cho'a neza' na' bllin byiṇka' wdaogakban. <sup>5</sup> Na' zi baḷan bxop ladj yajka', gana' bitek bi yo chi'. Na' tolbe' bilaan, daa bi chi'tekan yona'. <sup>6</sup> Per ka bla' wbillá', bkwedgakan. Na' daa bi bde loinna', wbillan. <sup>7</sup> Na' zi baḷan bxop ladj yag yesh'ka' na' yag yesh'ka' bi be'gakan latj igolgakan na' bibi wllian. <sup>8</sup> Na' zi baḷan bxop gana' chi' yo wenna', na' bgolgakan na' le wlliaḡakan. Baḷan wllia shichoa wej, na' zi baḷan guiyon wej, na'ch to guiyoa wej.

<sup>9</sup> Na' chi'e legake':

—Ka le' chenile dga nia', li sen wṇeyi.

### Jesúza' bzajniile' legake' biḥe chseese jemplka'

(Mt. 13:10-17; Lc. 8:9-10)

<sup>10</sup> Na' ka bgaan stoz Jesúza', ben'ka' wlle' gaoshosh kwite'na' len ben'ka' shllin, wṇabgakile'ne' bi zeji jempla' daa bseesile' legake'. <sup>11</sup> Na' chi'e legake':

—Chioza' cho'e latj inezile daa kono wṇezi che ye! wṇabia' che'na'. Per ben'ka' bi chzenag che', chseesid' legake' jemplka' <sup>12</sup> kwenche la'kzi ile'tegakile' ka chon', bi shajni'gakile' bi zejin, na' la'kzi yentegakile' xtil-laana', bi shajni'gakile'n, kwenche bi yiyaj yilengakile' lao Chioza' na' bi yizi'xene' chegake'.

### Jesúza' bizajniile' bi zeji jempla'

(Mt. 13:18-23; Lc. 8:11-15)

<sup>13</sup> Na' chi'e legake':

—Shi bi chajniile jempli, ¿nakra gonle shajniile diika' sto? <sup>14</sup> Beena' chaz zaklebile' beena' choe' cho'a xtill' Chioza'. <sup>15</sup> Zoa ben' chengakile' cho'a xtill' Chioza' na' kat' ba bengakile'n, lii zeje' dii xiwaa chikwasan daa loo yichjlall'do'eka'. Na' chak chegake' ka gok che biṇna' daa bxop cho'a neza'. <sup>16</sup> Zi baḷgake' chak chegake' ka gok che biṇna' daa bxop ladj yajka' na' aga bi logakin bde. La' ka chengakile' cho'a xtill' Chioza' chiba chizak'gakile' chzenaggake'n <sup>17</sup> per shlollchga chajle'gake'. Na' kat' bi chen chle'gakile' ni che cho'a xtill' Chioza', lii chbej yichjtegake'n. <sup>18</sup> Zi baḷgake' chak chegake' ka gok che biṇna' daa bxop ladj yag yesh'ka'. Chengakile' cho'a xtill' Chioza', <sup>19</sup> per chi' yichjgake' diika' chak chegake', na' zetegake' wṇeyi che ye! wni'ana' na' chzelall'tegake' yog'lo!te daa de yell-lioni. Na' legakannan' chsej chllongakan gon xshin cho'a xtill' Chioza' loo yichjlall'do'eka'. <sup>20</sup> Na' zoa zi baḷ ben' chengakile' cho'a xtill' Chioza' na' chajle'gake' do yichj do lall'gake', na' chon xshinin loo yichjlall'do'eka'. Na' chak chegake' ka biṇna' bxop lo yo wenna' daa wllia shichoa wej, na' guiyon wej na'ch to guiyoa wej.

### Jempl che to kandil

(Lc. 8:16-18)

<sup>21</sup> Na' lekzka' chi'e legake':

—Biga zoa ben' chxene' kandila' na' chdosen to dii wkwashaan len wa chṇi'en xan xlague'na', san chzoe'n sibə kwenche wzeeni'n doxen loo yoona'. <sup>22</sup> Na' lekzka' yog'lo!te dii ngash' ṇaa wllin lla yila' lawin, na' daa kono nezi ṇaa wllin lla inezi beṇaan. <sup>23</sup> Le' chenile dga nia', li sen wṇeyi.

<sup>24</sup> Na' lekzka' chi'e legake':

—Li se wṇeyi cheyi dga chzenagle. Na' shi gonle ka dii le, Chioza' wzajni'chile' le' dii xench. <sup>25</sup> Beena' chzenag, zizikchli shajni'chile', na' beena' bi chzenag, axt daa ba benile' lat' yiyal-lallee.

### Jempl che biṇna' daa chgol

<sup>26</sup> Na' lekzka' chi'e legake':

—Ye! wṇabia' che Chioza' zaklebin daa chak che biṇna' chaz ben'. <sup>27</sup> Beena' chaz chaan, chila' daa chaze' na' chgolan la'kzi chese' wa chechj chdaze', ka'kzə shi wal wa tella, na' ni bi nezile' nak chak chgolan. <sup>28</sup> Lo yell-lioni chla' daa chaz ben': zigaate chila'n, na' chgolan, na' chzen do, na'tech chbian. <sup>29</sup> Na' kat' ba gol daa chbian, na' chizi' chilape'n.

**Jempl che sa mostásana'**  
(Mt. 13:31-32; Lc. 13:18-19)

<sup>30</sup> Lëkzka' che' Jesúza' legake':

—¿Bera ka wsaklebicho yel' wñabia' che Chioza', Ila? wa ¿bera ka jempl wchincho wsaklebichon? <sup>31</sup> Yel' wñabia' che Chioza' nakan ka sa mostásana' daa chaz-gake'. La'kzi lënnan' binna' daa liizelozi nesh'ch, <sup>32</sup> kat' ba bla'n na'ch chgolan na' chakan dii xench ka yog'te yix' kwan yoblə, na' chak xoziiinka' dii xen axt byin-do'ka' wak ljshiagakban na' sho'gakb xol cheyinna'.

**Jesúza' bçhine' jempl ka bli' bsedile' beñ'**  
(Mt. 13:34-35)

<sup>33</sup> Dii zan jempl bçhin Jesúza' ka bli' bsedile' beñ'ka' cho'a xtill' Chioza', bene' kon ga zeelo wyajni'gakile'. <sup>34</sup> Na' toshiizi bzoe' jemplka' lao beñ'ka' bdi'a bllag, na' toz beñ'ka' nakgake'ne' txen bizajniile' bi zejin yog' di-ika'.

**Jesúza' bkweze' to yejpe' wal lo nisdona'**  
(Mt. 8:23-27; Lc. 8:22-25)

<sup>35</sup> Na' ka goł, golle' beñ'ka' nakgake'ne' txen:

—Techo shłaa nisdona'.

<sup>36</sup> Na' biza'gake' kwit beñ'ka' bdi'a bllag na' biçhe'gake' Jesúza' loo barkwa' daa chi' cho'a nisdona', na' lench barkw yoblə ziyajlengake'. <sup>37</sup> Na' wze to yejpe' wal na' wzolo nisdona' chas chataan axt ba chiyollan loo barkwa', na' ba wzolo chbe'n yel. <sup>38</sup> Na' ba de Jesúza' chese' xaninna' nkogtie' to dii nkogue', na' jas-bangake'ne' che'gake':

—¿Maestro! ¿Abikzə chakbe'ilo' ba chbe'cho yel?

<sup>39</sup> Na' wyase' bsheshlene' be'na', na' chi'e nisdona':

—Lliz wzoa.

Na' wlez be'na' na' wche'lli nisdona'. <sup>40</sup> Na' golle' beñ'ka' nakgake'ne' txen:

—¿Biçhe chllëbzle? ¿Abikzan' gonłilall'le nad'?

<sup>41</sup> Na' le blleb'gake', na' che' ljwell'gake':

—¿Nora beeni, Ila?, axt be'na' na'ch nisdona'ni chzoa-gakan xtillëe.

**Bibej Jesúza' dii xiwaa yoo beñ' Gadárana'**  
(Mt. 8:28-34; Lc. 8:26-39)

**5** Na'ch bllingake' gana' mbani Gadárana' daa Ili shłaa nisdona'. <sup>2</sup> Na' ka bichej Jesúza' loo barkwa', na' wbig' to beñ' yo'e dii xiwaa. Na' beeni bcheje' loo kapsanta' <sup>3</sup> gana' none' ka lill xlatje'. Na' kono gok wçhej le', ni gdenna' bi ben llin. <sup>4</sup> Zan shii bçhejgake' ni'a neena' gdenka', na' tolbe'do' chçhogue'gakan, na' kono wzoyi le'. <sup>5</sup> Ka wal ka tella cheçhj chde' yaa yaoka' na'ch kapsanta' chosyaadie' na' chgoyoe' yajka' chon kwine' zi'. <sup>6</sup> De zit'lə ble'ile' zej Jesúza' na' bxonjdoe' jatile'ne' na' jaçhek' xibe'na' lawe'na', <sup>7</sup> na' besyee zillj, chi'e:

—¿Bi wllali' cho' kon nad', Jesús, Xiin Chios, beñ' choo beñ' xen! Chat'yoid' li', jbcheb lao Chioza' bi wsak'zi'o nad'!

<sup>8</sup> Gollan ka' daa goll Jesúza' len:

—¿Dii xiw', bichej loo kwerp che beeni!

<sup>9</sup> Na' goll Jesúza' len:

—¿Bin lio'?

Na' che'n:

—Legiónan lia', la' zannto' nak.

<sup>10</sup> Na' got'yochgain Jesúza' bi wseleegakan gan yoblə.

<sup>11</sup> Na' gaozə kwit yaana' gana' lle'gake', lle' zan kush chaogakb. <sup>12</sup> Na' got'yo'i dii xiw'ka' le', che'gakan:

—Bsel' neto' gana' lle' kushka' na' be' latj yiyoonto' legakb.

<sup>13</sup> Na' bi'e latj çhegakin, na' bichejgakan jayoogakan kushka'. Na' nakgakb ka çhopa mil, na' wzologakb chxonjdogakb jabixgakb loo nisdona', na' jche'gakb yel.

<sup>14</sup> Na' beñ'ka' chap kushka' ziyajdogake' jayell'gake' beñ'ka' lle' yella' na' beñ'ka' lle' lyixaa daa ble'gakile', na' beñ' zan jawia daa gok. <sup>15</sup> Na' ka bllingake' gana' ze Jesúza', ble'gakile' beena' wyoo dii xiw'ka' chi'e kwite'na' ba biyakw xe'na' na' ba biyeen biyeeniile', na' blleb'gake'. <sup>16</sup> Na' beñ'ka' ble'i daa gok che beena' wyoo dii xiw'ka' na' daa gok che kushka', be'gake'n dill' lao beñ'ka' bllin. <sup>17</sup> Na' got'yogakile' Jesúza' yiyaje' gan yoblə.

<sup>18</sup> Ka chiyoo Jesúza' loo barkwa', beena' wyoo dii xiw'ka' got'yoile'ne' wi'e latj shajlene'ne'. <sup>19</sup> Per bi bi'e latj, san chi'ene':

—Biyaj lillo'na' gana' lle' bish' ljwello'ka', na' jayell'gake' ka nak diiki ba ben Xancho Chioza' cho' na' ka ba biyesh'lallile' li'.

<sup>20</sup> Na'ch biza' beena' na' jaye' dill' doxen gana' mbani Decápoliza' daa ben Jesúza' che', na' yog' beñ' bibani.

**Biyon Jesúza' noola' beç' xe'na' na' lekzka' xiin Jairona'**  
(Mt. 9:18-26; Lc. 8:40-56)

<sup>21</sup> Ka billinlen Jesúza' barkwa' shłaa nisdona', na' bdi'a bllag beñ' zan cho'a nisdona' gana' billine'. <sup>22</sup> Na' bllin to beñ' le Jairo, nake' to beñ'ka' chgoogake' xñezi diika' chon beñ' Israelka' gana' chdop chllaggake' choe'ljwillgake' Chioza'. Na' ka blline' gana' ze Jesúza', bçhek' xibe' lawe'na' <sup>23</sup> na' benyesh'chgue', chi'e:

—Ba chet bi' çha'na'. Ben goklen sho'gach wçoa noona' yichjbaa kwençhe yiyakib' na' ibanchb'.

<sup>24</sup> Na' wyajlen Jesúza' le', na' beñ' zan inleeb no-gake'ne' axt bdakwyillgake'ne'. <sup>25</sup> Na' ladj beñ' zan wal-ka' len to noolə ba gok shllin yiz chzoe' wbaa. <sup>26</sup> Dii zan dii ba ben ble'ile' lao beñ' wen rmechka', na' ba blliy-ee yog' dii de che' na' bi gokkze' rmech, san gokxinlile'.

<sup>27</sup> Na' ka benile' xtill' Jesúza', jni'e ladj beñ' zan walka' no le' na' jexee xe'na'. <sup>28</sup> La' gokile': "La'çh' xe'na' sheł' ba beçaa, na' yiyakid'." <sup>29</sup> Na' katena' wlez wbaana' na' gokbe'ile' ba bigaa yillwe' che'na'. <sup>30</sup> Na' gokbe'i Jesúza' bchej yel' wak che'na', na' biyeçhje' chi'e beñ'ka':

—¿Noran beç' xa'na'?

<sup>31</sup> Na' beñ'ka' non le' txen che'gake'ne':

—Beñ' zan walan ndakwyill li'. ¿Biçhe nazo': "Non ba beç' nad'?"

<sup>32</sup> Na' ze Jesúza' chwie' beñ'ka' lle' kwite'na' kwençhe inezile' non beç' le'. <sup>33</sup> Na'ch noola', daa ba gokbe'ile' biyakile', de chall chllëbzile' wdie' na' bçhek' xibe'na'

lawe'na' na' golle' le' doxen daa ba gok che'. <sup>34</sup> Na' che' Jesúza'ne':

—Xiin', daa chonlilalloo nadaan ba biyakilo'. Biyaj mbalaz daa ba bigaa yillwe'na' bsak'zi' li'.

<sup>35</sup> Na' ni chshaljte Jesúza' ka blin to chop ben' wza' lill Jairona', chi'ene':

—Ba wit bi' cho'na'. Bich gonilo' maestroni zed.

<sup>36</sup> Na' bi ben Jesúza' legake' kwent, na' golle' Jairona':

—Bi illebo'. Kon bxenilall' nad'.

<sup>37</sup> Na' bi bi'e latj shajlen ben' yoblə le', lete Pédrona' na' chop bish'te, Jacóbona' na'ch Juanna'. <sup>38</sup> Na' ka blingake' lill Jairona', ble'ile' le chakyeshii ben'ka' lle' na' na'ch chbellgake' na' le chosyaagake'. <sup>39</sup> Na' jabigee gana' lle'gake' na' golle' legake':

—¿Bera che chonzle dae na' chbellze? Aga ba wit bi'do'nan', san cheszbään.

<sup>40</sup> Na' bxillgakile' Jesúza'. Na' bisheshe' yog'lole' na' wyoole'ne' xaxna'baa na' ben'ka' zejlene' txe'ne' gana' de bi'do'na'. <sup>41</sup> Na' bexee na'baa na' golle'b':

—Talita, cumi † —na' zej'in: Bi' nooldo', nia' li' biyas.

<sup>42</sup> Na' bi' nooldo'na' lii biyasteb' na' bidab', la' ba gokkzib' shllin' yizan. Na' bibanchgayi ben'ka' lle' na'.

<sup>43</sup> Na' Jesúza' bene' mandad kono ye'gake' daa gok, na' golle' legake' we'gake' dii gao bi'do'na'.

#### Billin Jesúza' yell Nazareta'

(Mt. 13:53-58; Lc. 4:16-30)

**6** Na' biza' Jesúza' biyaje' lalle'na', na' ben'ka' nakgake'ne' txe'ne' zejlengake'ne'. <sup>2</sup> Na' ka blin lla sabda', llana' chomba' ben' Israelka', wyaje' gana' chdop chllaggake' choe'llwillgake' Chioza' na' wzoloe' bli' bsdile' ben'ka' lle' na'. Na' zan ben'ka' bzenag xtilleena' bibangakile', na' che'gake':

—¿Gara jasedz beeni diiki, lla? ¿Gara za' ye'l' sin' che beeni, na' ye'l' wakka' chone', lla? <sup>3</sup> ¿Aaga beenin karpintera', beena' nak xiiñ Maríana', na' ben' bish' Jacóbona', Joséna', Júdaza' na'ch Simónna'? Na' le'kzka' ben' zane'ka' zoagake' lall'choni.

Na' bi wyajle'gake' che'. <sup>4</sup> Na' che' Jesúza' legake':

—To ben' chyixjee daa che' Chioza'ne', gattez ch-googake'ne' balaan, san lall' lille'na' aga no chgoo le' balaan.

<sup>5</sup> Na' aga bitek ye'l' wak gok gone' na', lete xonjchga ben' we'ka' bxo'ne' na' yichje'ka' na' biyone' legake'.

<sup>6</sup> Na' bibanile' daa bi chajle' ben'ka' che'. Na' wde' bli' bsdile' ben'ka' lle' to to yellka' lla gaoza' yell Nazareta'.

Jesúza' bselee ben'ka' shllin' llje'gake' cho'a xtil' Chioza'

(Mt. 10:5-15; Lc. 9:1-6)

<sup>7</sup> Na' wnie' ben'ka' shllin, na' bselee chop weje', na' bi'e legake' ye'l' wñabia' kwenche' yibejgake' dii xiw'ka' yoo ben'. <sup>8</sup> Na' golle' legake' bibi gox'gake' kat' koogake' nez; bi chiyal' wa'gake' yixj ga koo xsh-inlaze'ka', ni dii gaogake', ni mech, san twejz yag bar gox'gake'. <sup>9</sup> Na' shkwe'z xelgake' wlej, na' zi shkwe'z xe'ka' gakw. <sup>10</sup> Na' chi'e legake':

—Yoona' gana' illinle, na'z soale axt ka illinch lla yiza'le. <sup>11</sup> Na' yella' gana' bi wlebgake' le' ni bi wzenag-gake' chele, ka yiza'le na', yishible bishtena' lla n'ale-ka' kwenche' gakbe'gakile' aga wenan chongake' bi chlebgake' cho'a xtil' Chioza'. Dii li nia' le', kat' illin lla wchoglo Chioza' che ben', ben'ka' lle' yella' gana' bi wlebgake' le', ile'gakile' ye'l' zak'zi' xench aga ka ben'ka' wille' yell Sodómana' na' yell Gomórrana'.

<sup>12</sup> Na' wza'gake' zjtixje'gakile' ben' chiyal' yiyaj yilen-gakile' saaxya che'ka'. <sup>13</sup> Na' bibejgake' zan dii xiw'ka' yoo ben', na' bshongake' lat' wej seta' yichj ben'ka' bi shao' na' biyakgakile'.

#### Betgake' Juanna', beena' bchoa ben' nis

(Mt. 14:1-12; Lc. 9:7-9)

<sup>14</sup> Na' Heródeza', beena' wñabia' gana' mbani Galileana', benile' yog' daa chon Jesúza', daa le ba zeyi che'. Ba ben'ka' che'gake':

—Dii Juanna', beena' bchoa ben' nisan' ba biban, daan chone' ye'l' wakka'.

<sup>15</sup> Zi bale' che':

—Elíazan' ba biyed.

Na' zi bale' che':

—Nake' ben' chyixjee daa che' Chioza'ne', ka ben'ka' wzoa kani'yi.

<sup>16</sup> Ka beni Heródeza' dill'ki, na' chi'e:

—¿Beenan' dii Juanna', beena' ben' mandad wchog yichje'na'! ¡Ba bibane' ladj ben' wetka'!

<sup>17</sup> La' kwin Heródeza' bene' mandad bex'gake' Juanna' na' bseje'ne' lillyana' daa bseshlene'ne' daa bikee Herodíaza', xool ben' bishee, Felípena'. <sup>18</sup> Juanna' golle'ne':

—Xya nllab nakan bikoo xool ben' bishoona'.

<sup>19</sup> Na' bllaa Herodíaza' Juanna' na' goklallee wite'ne', per bibi gok gone' <sup>20</sup> daa chllab Heródeza' Juanna', daa nezile' nake' to ben' li ben' shao' ben' nak lall' na' Chioza', na' bi bi'e latj no bi goni le'. Na' la'kzi chakcho-plallee che' dill'ka' cho'e, bibaile' bzenague' che'. <sup>21</sup> Per ka wyayi Heródeza' yiz, bene' to lni na' goxe' ben'ka' chñabia', na' xan soldadka', na' ben'ka' mbejlawin gana' mbani Galileana'. Na' got' xlatjin gon Herodíaza' ka cheenile'. <sup>22</sup> Na' bi' nool wew' che' Herodíaza' byaab' lao ben'ka' lle' lnina', na' le' bibayi Heródeza' len ben'ka' chaolene' ka byaab'. Na' golle'b':

—Wñab bitteza' cheenilo' na' goña'n.

<sup>23</sup> Na' bchebe' wi'eb' daa cheenib', la'kzi axt gashj gana' chñabi'e wi'eb'. <sup>24</sup> Na' bichejb' janabib' xna'baa:

—¿Bera ka inab', lla?

Na' che' xna'baa:

—Wñab yichj Juan wicho' nisa'.

<sup>25</sup> Na' lii biyooteb' gana' chi' Heródeza', na' che'b':

—Cheenid' yichj Juanna' to lo plat lllj naate.

<sup>26</sup> Na' le' gokyeshii Heródeza', per daa ba bcheble' lao yog' ben'ka' goxe', bi goklallee wllonile'b' daa chñabib' le'. <sup>27</sup> Na' lii bsele'tie' to soldad jachogue' yen Juanna' loo lillyana' <sup>28</sup> na' bllie' yichje'na' to lo plat. Na' bi'en bi' nool wewaa na' leb' be'baan xna'baa.

† Talita, cumi: dill'ki nakgakan dill' arameo.



<sup>29</sup> Ka wnezi beṅ'ka' nak Juanna' txen, na' jaxi'gake' kwerp che'na' na' jakwash'gake'ne'.

**Bwao Jesúza' gayaa mil beṅ'**  
(Mt. 14:13-21; Lc. 9:10-17; Jn. 6:1-14)

<sup>30</sup> Ka billin postlka' gana' zoa Jesúza', na' gollgake'ne' yog' diika' jengake' na' daa jali' jasedgakile' beṅ'. <sup>31</sup> Na' che' Jesúza' legake':

—Li sho' shajcho ga kono beṅ' lle' kwenche yizi'lall'lat'cho.

Golle' ka' daa le chdia chllag beṅ' zan lawe'ka', na' ni bi chak latj gaogake'. <sup>32</sup> Na' wyoogake' to barkw wyaj-gake' ga kono beṅ' lle'. <sup>33</sup> Na' beṅ' zan ble'gakile' ka wza'gake' na' biyombia'gake' legake', na' wza'do beṅ'ka' lle' to to yell zedogake' gana' illin barkwa' na' nechlagake' bllin. <sup>34</sup> Na' ka bichej Jesúza' loo barkwa' ble'ile' ba bdi'a bllag beṅ' zan inlleb na' biyesh'lallile' legake' daa nakgake' ka xil'do', ba kono xanin zoa. Na' wzoloe' dii zan dii bli' bsedile' legake'. <sup>35</sup> Na' ka wlle', beṅ'ka' nakgake'ne' txen wbig'gake' lawe'na' che'gake'ne':

—Ba wlle' naa, na' gani lle'cho kono zoa wit' dii gaogake'. <sup>36</sup> Goll beṅ'ki yiyajgake' ranshka', na' yellka' llia gaozə kwenche lljxi'gake' daa gaogake'.

<sup>37</sup> Na' che' Jesúza' legake':

—Len', li we' dii gaogake'.

Na' che'gake'ne':

—zNakra gonnto' lljxi'nto' yetxtilka' gao yog' beṅ'ki? la' wyejljain che chop guiyoa lla che laxj beṅ'.

<sup>38</sup> Na' che' Jesúza' legake':

—Li lljawia ka'k' yetxtilka' naple.

Na' ka wnezagakile' ka'ka'n de, na' che'gake'ne':

—De gayaan, na' zi chop beṅ'.

<sup>39</sup> Na'ch goll Jesúza' legake' kwegake' xonj wej beṅ'ka' lo yixa'. <sup>40</sup> Na' wche' to guiyoa wejgake' na' shiyon wejgake'. <sup>41</sup> Na' beṅ' Jesúza' yetxtilka' gay' na' belka' zi chop na' blis jalawe'na' yabalə bi'e Chioza' yel' choxken, na' bxoje' yetxtilka' bi'en beṅ'ka' nakgake'ne' txen kwenche be'gake' che che beṅ'ka'. Na' lekzka' yog'gake' be'gake' belka'. <sup>42</sup> Na' yog'lolgake' wdaogake' ka beljakile'. <sup>43</sup> Na' postlka' bitopgake' yetxtilka' len belka' bichoonan, na' biyakan zi shllin xet'. <sup>44</sup> Na' beṅ'ka' wdao, to beṅ' byoka'zə gokgake' gayaa mil.

**Jesúza' wzee lo nisdona'**  
(Mt. 14:22-27; Jn. 6:16-21)

<sup>45</sup> Na' ka wde, bigoo Jesúza' beṅ'ka' nakgake'ne' txen loo barkwa' kwenche yibialogake' lawe'na' yiyajgake' Betsáidana' daa llia zi shlaa nisdona', shlak bisee beṅ'ka' bdi'a bllag na'. <sup>46</sup> Na' ka biya beṅ'ka' billesh, na' wyaje' lo yaana' jelwille' Chioza'. <sup>47</sup> Na' ka gol, ba zej barkwa' gchol nisdona' na' stoz Jesúza' bgaane' gana' biza'n. <sup>48</sup> Na' ble'ile' le chllaglogaken' daa za' be'na' gana' zejlagake'. Na' ni bal' wlo'e nez tlo nisdona' zeje' gana' ziyajlgake'. Na' ba zoa yidie' lawe'ka' <sup>49</sup> ka ble'gakile'ne' zeje' tlo nisdona' na' gokgakile' yel bxen-zan. Na' besyaagake' <sup>50</sup> daa le bllebgake' daa ble'gakile'. Na' lli wnetie' legake', chi'e:

—Bi illeble, nad'kzan.

<sup>51</sup> Na' biyepé' loo barkwa' na' wche'lli be'na'. Na' le bibangakile', <sup>52</sup> la' aga ba wyajni'gakile' yel' waka' daa bene' che yetxtilka' daa gokgake' beṅ' lall'do' wal.

**Jesúza' biyone' beṅ'ka' bi shao' gana' mbani Genesareta'**  
(Mt. 14:34-36)

<sup>53</sup> Na' ka biyoll wdegake' lo nisdona' na' bllingake' yell-lío daa mbani Genesareta', na' bda' barkw che'ka' yag cho'a nisdona'. <sup>54</sup> Ka bchejgake' loo barkwa', lli biyombia'te beṅ' Genesaretká' Jesúza'. <sup>55</sup> Na' wdaogake' doxen gana' mbani lalle'ka' btopgake' beṅ' bi shao', na' lo daazə nxoogake' legake' chjwa'gake' legake' gana' nezagakile' bllin Jesúza'. <sup>56</sup> Na' gattezə chaje' laa yell-do'ka' laa yell xenka', wa laa ranshka', chyixjgake' beṅ'ka' bi shao' tneza' gana' chdie'. Na' chat'yogakile'ne' wi'e latj gox'gake' la'ch' xe'na'. Na' yog' beṅ'ka' gok be'gake'n biyagkakile'.

**Diika' chxinj chlenan yichjlall'do'chona'**  
(Mt. 15:1-20)

**7** Fariseoka' len zi bal' beṅ'ka' chli' chsedi leya', beṅ'ka' zaak Jerusalénna', bllingake' lao Jesúza'. <sup>2</sup> Na' ka ble'gakile' bal' beṅ'ka' nak Jesúza' txen bi bixis biyib neeka' ka zi' gaogake', na' wdaogake' xya che-gake'. <sup>3</sup> (La' fariseoka' len yog'z beṅ' Israelka' ni no-gake' daa bli' bsedi dii xozxtoe'ka' legake' nan bi gak gaogake' shi bin' yixis yiyib neeka'. <sup>4</sup> Na' ka chiyoll chaj-gake' lao yaana' shi bi yixis yiyib neeka' bi gak gaogake'. Na' lekzka' chixis chiyibgake' diika' cheej chaogakile'. Na' dii zanch diika' yoologake' chongake'. <sup>5</sup> Na' fariseoka' len beṅ'ka' chli' chsedi leya' wṅabgakile' Jesúza', che'gake':

—zBi'che bi chon beṅ'ki nako' txen ka bli' bsedi dii xozxto'choka' cho'?, la' bi chixis chiyib neeka' kat' cheej chaogake'.

<sup>6</sup> Na' che' Jesúza' legake':

—Kwaslo' inlleban wne dii Isáíaza' chele, le' beṅ' wxiye', kana' bzeje' daa na:

Ka nak beṅ'ki, de cho'a dill'zan choe'la'ogake' nad', na' aga choe'la'ogake' nad' do yichj do lall'gake'.

<sup>7</sup> Bibi zjanayin chongake' ka choe'la'o nad'; na' daa chli' chsedgakile' nakan dii chyiljall'z beṅ'.

<sup>8</sup> Na' le' chbej yichjle daa nllia Chioza' bia' gonle kwenche gonle daa chyiljall' beṅ' yell-lioni.

<sup>9</sup> Na' lekzka' golle' legake':

—Chzoale ka'lə daa nllia Chioza' bia' gonle kwenche gonle daa bli' bsedi dii xozxto'leka' le'. <sup>10</sup> Moiséza' wne': "Li koo xaxna'ləna' balaan", na' "Beena' ine zban che xaxneena' chiyal' guete'." <sup>11</sup> Na' le' choe'le latj yee beṅ' xaxneena': "Bi gak gaken' le', la' yog' dga de cha' ba ncheb' wi'an Chioza'." <sup>12</sup> Na' daa nale ka', bich chonle byen gaken beṅ' xaxneena'. <sup>13</sup> Na' daa chonle ka', chzoale cho'a xstill' Chioza' ka'lə kwenche chonle daa bli' bsedi dii xozxto'leka' le'. Na' dii zanch ka dga chonle.

<sup>14</sup> Na' wne Jesúza' yog' ben'ka' lle' na', na' golle' le-gake':

—Li wzenag dga inia' le', na' li shajniin: <sup>15</sup> Aga daa cheej chao ben' yell-lionin chxinj chlenan le'. San daa chalj chxe loo yichjall'do'enan' chxinj chlenan le'. <sup>16</sup> Ka le' chenile dga nia', li sen wneyi.

<sup>17</sup> Na' ka bikwase' kwit ben'ka' lle' na' biyo'e loo yona' gana' zoagake', na' ben'ka' nakgake'ne' txen wñabgakile'ne' bi zejin daa golle' ben'ka'. <sup>18</sup> Na' golle' legake':

—¿Ani le' bi chajniilen? ¿Abi chajniile aga daa cheej chao beñaan chxinj chlenan le'? <sup>19</sup> La' aga loo yichjall'do'enan' illinan, san loo li'enan' lljche'n, na'tech yichejan.

Na' daa golle' ka', zejin bittezə yel' wao wak yeej gaocho. <sup>20</sup> Na' lekzka' golle':

—Daa chchej loo yichjall'do' ben' yell-lioni, lennan' chxinj chlenan le'. <sup>21</sup> La' loo yichjall'do'ekan' chalj chxe diiki bi nak wen: yel' chza'lall' mal, yel' chñelen ljwellin, yel' chiyit ljwellin, <sup>22</sup> yel' wban, yel' wzelall', yel' wen dii mal, yel' wxiye', yel' wenlen kwerp cheyinna' daa bi nxe bi nzak', yel' xe', yel' wyilj wzan dill' che ben', yel' chep cha'lall', na' yel' nchoj nnti. <sup>23</sup> Yog'loj dii malki chalj chxegakan loo yichjall'do' ben' na' chxinj chlengakan legake'.

#### To noolə bi nake' ben' Israel benlilallee Jesúza' (Mt. 15:21-28)

<sup>24</sup> Na' biza' Jesúza' gana' wzoe' na' ziyaje' gana' mbani yell Tírona' na'ch yell Sidónna'. Na' blline' to yoo na' bi goklallee no inezin, per bi gok kwashēe. <sup>25</sup> Na' to noolə, ben' zoa to bi' nool che' yoob' dii xiwaa, ka wñezile' bllin Jesúza', lii wyajtie' jaçhek' xibe'na' lawe'na'. <sup>26</sup> Na' noola' nake' ben' griego, na' golje' gana' mbani Sirofeníciana'. Na' got'yoile' Jesúza' yibeje' dii xiwaa yoo bi' nool che'na'. <sup>27</sup> Na' goll Jesúza' le':

—Yog'zə ben' zigaate chwawe' xiñe'ka'. La' bi nakan wen koyochə daa chao xiñchoka' na' wza'ljchon lao bekw'ka'.

<sup>28</sup> Na' che' noola' le':

—Lekzilo'n, ben'do', per bekw'ka' chbe'gakb xan mesa' na' chitopgakb blaaka' chxop.

<sup>29</sup> Na'ch golle'ne':

—Ni che dillii ba bi'o, biyaj mbalaz. Ba bichej dii xiwaa yoo bi' cho'na'.

<sup>30</sup> Na' ka bllin noola' lille'na', ble'ile' bi' nool che'na' deb' lo blaga' na' ba bichej dii xiwaa wyoob'.

#### Biyon Jesúza' to ben' kwell na' bi chak inetie'

<sup>31</sup> Na' biza' Jesúza' gana' mbani Tírona' na' bidie' yell Sidónna' na' billine' gana' de nido' che Galileana', gana' mbani Decápoliza'. <sup>32</sup> Na' jwa'gake' lawe'na' to ben' kwell na' leyi bi cha'yen' inie', na' got'yogakile'ne' wxoa neena' yichje'na'. <sup>33</sup> Na' bche' Jesúza'ne' ka'lə gana' kono lle', na' bñe' xbene'na' loo nague'na', na' bllaa xeneena' lo xbene'na', bshile'n lo loll' beena'.

<sup>34</sup> Na' blis jalawe'na' cha'lə, wkaalallee, na' golle'ne':

—¡Éfata! —zejin: ¡Byalj!

<sup>35</sup> Na' lii byaljte nague'na', na' gok bita lolleena' na' bishalje' wen. <sup>36</sup> Na' che' Jesúza' ben'ka' ble'i kono ye'gake' ka'. Na' la'kzi golle' legake' ka', zizikli bze-gake'n dill'. <sup>37</sup> Na' le bibangakile', che'gake':

—Yog'lojte chak gon beeni, chiyone' ben'ka' bi cheni, na' ben'ka' bi chak inə, chone' ka chñegake'.

#### Jesúza' bwawe' tapa mil ben' (Mt. 15:32-39)

**8** Do kana', ben' zan inleeb bdop bllag. Na' daa bibi de yeej gaogake', wne Jesúza' ben'ka' nakgake'ne' txen chi'e legake':

<sup>2</sup> —Chiyeshid' ben'ki, la' ba gok shon lla zoalengake' nad' na' bibi de yeej gaogake'. <sup>3</sup> Na' shi yise'laa legake' bi neej naogake', xoll icho'lall'gake' tneza', la' balgake' za'gake' zit'.

<sup>4</sup> Na' ben'ka' nakgake'ne' txen che'gake'ne':

—¿Gatg lljxi'cho dii gao yog' ben'ki?, la' gani lle'cho kono zoa wit' dii gaocho.

<sup>5</sup> Na' che' Jesúza' legake':

—¿Ka'k' yetxtilka' noa'le?

Na' che'gake'ne':

—Gallan.

<sup>6</sup> Na' bene' mandad kwe' ben'ka' lo yona', na' bexee gallte yetxtilka', na' ka biyoll bi'e Chioza' yel' choxken, na' bxoxje'n na' bi'en ben'ka' nakgake'ne' txen kwenche chisgake' che che ben'ka'. <sup>7</sup> Na' lekzka' nox'gake' zto chop bel. Na' bi'e Chioza' yel' choxken, na' golle' ben'ka' nakgake'ne' txen we'gake' che che ben'ka'. <sup>8</sup> Na' yog'lojgake' weej wdaogake' axt ka belj-gakile', na' bitopgake' zi gall xet' diika' bichoonan.

<sup>9</sup> Ben'ka' weej wdao gokgake' ka tapa mil. Na' Jesúza' bisee legake' <sup>10</sup> na' bizee biyoolene' ben'ka' nakgake'ne' txen loo barkwa' na' ziyajgake' gana' mbani Dalmanútana'.

#### Fariseoka' goklall'gake' gon Jesúza' to yel' wak lawe'ka' (Mt. 16:1-4; Lc. 12:54-56)

<sup>11</sup> Na' bllin fariseoka' na' wzologake' chakguedlen-gake' Jesúza'. Na' daa goklall'gake' wchixgake'ne', wñabgakile'ne' gone' to yel' wak lawe'ka' kwenche gak-bia' shi Chioza'kzan bseleene'. <sup>12</sup> Na' Jesúza' axt wkaalallee, golle':

—¿Berache le' zoale ñaa chñabzle gon' to yel' wak dii ile'ile'? Dii li nia' le', aga bi yel' wak gon' ile'ile'.

<sup>13</sup> Na' bizee kwite'ka', na' biyo'e loo barkwa' sto shii ziyaje' shlaa nido'na'.

#### Dill' wxiye' che fariseoka' zaklebin levadúrana' (Mt. 16:5-12)

<sup>14</sup> Na' ben'ka' nak Jesúza' txen go'lall'gake' wa'gake' yetxtil che'ka', na' tlish'chga dii noa'gake' loo barkw che'ka'. <sup>15</sup> Na' che' Jesúza' legake':

—Wsak'gale bi shajle'le dill' wxiye' che fariseoka' na' che Heródeza', daa zaklebi levadúrana'.

<sup>16</sup> Na' ben'ka' nakgake'ne' txen che' ljwellgake':

—Daa bi bi'acho yetxtilan' ne' ka'.

<sup>17</sup> Na' gokbe'i Jesúza' dillaa choe'gake', na' golle' le-gake':

—¿Berache chakzile daa bi bi'ale yetxtilan' nia' ka'? ¿Abin' shajni'kzile' ni bin' gakbe'ile ka nak diika' chon'? ¿Abin' iyalj yichjlall'do'lenan'? <sup>18</sup> Zoate jalaoleka' na' bi chle'ile, na' zoate nagleka' na' bi chenile'. ¿Abi chjadinile ka ben'? <sup>19</sup> Kana' bxo'j' gay' yetxtilka' na' wdao ben'ka' gaya' mil, ¿ba' xet' diika' bichoonan?

Na' gollgake'ne':

— Shllinan.

<sup>20</sup> —Na' kana' bxo'j' gall yetxtilka' na' wdao ben'ka' tapa mil, ¿ba' xet' diika' bichoonan?

Na' che'gake'ne':

— Zi gallan.

<sup>21</sup> Na' che' Jesúza' legake':

—¿Ana' ni ka' bin' shajni'kzile'?

### Jesúza' biyone' to ben' lcho'j' yell Betsáidana'

<sup>22</sup> Na' bllingake' yella' le Betsaida, na' ben'ka' lle' yella' jwa'gake' to ben' lcho'j' lao Jesúza' na' got'yogakile'ne' gox'gache'ne'. <sup>23</sup> Na' bex' Jesúza' na' ben' lcho'la' na' wleje'ne' yella'. Na' bll'e' xeneena' jalawe'na' na' bxo'a neena' yichje'na', na' wñabile'ne' shi ba chle'ile'. <sup>24</sup> Na' che' ben' lcho'la':

—Chle'id' xonj' ben', na' nakgake' ka yag dii chza'.

<sup>25</sup> Na' Jesúza' bexee jalawe'na' sto shii, na' biyakile'. Na' ble'ile' kwas'lo'j' yog'lo'jte. <sup>26</sup> Na' bise'l' Jesúza'ne' shljicha lille'na', chi'ene':

—Bi lljayoo dill' yella'.

### Pédrona' bi'e dill' Jesúzan' nake' Crístona'

(Mt. 16:13-20; Lc. 9:18-21)

<sup>27</sup> Na' biza'len Jesúza' ben'ka' nakgake'ne' txen wyajgake' yellka' mbani Cesarea de Filípona'. Na' shlak ngoo'gake' nez, wñabile' legake', chi'e:

—¿Non na ben' nak'?

<sup>28</sup> Na' che'gake'ne':

—Balgake' nagake' lin' dii Juanna', beena' bchoa ben' nisa', na' zi balgake' nagake' lin' Elíaza', na' zi balgake' nagake' nako' sto ben' wdixjee daa goll Chioza'ne' kani'yi.

<sup>29</sup> Na' chi'e legake':

—Shera le', ¿nora nale nak'?

Na' che' Pédróna':

—Lin' Crístona', beena' ncheb Chioza' wselee.

<sup>30</sup> Na' che' Jesúza' legake' kono ye'gake' ka'.

### Jesúza' cho'e dill' guete'

(Mt. 16:21-28; Lc. 9:22-27)

<sup>31</sup> Na' wzolo Jesúza' bli' bsdile' legake' nan le', Ben' Bsel' Chioza' Yell-lioni, chonan byen sak'zi'e dii xen, na' ben' golka' chñabia' na' bxo'zka' chñabia' na'ch ben'ka' chli' chsedi leya' gaxzbangakile'ne', na' chonan byen witgake'ne' na' yibane' ka gak shon' lla. <sup>32</sup> Na' bshaljlene' legake' kwas'lo'j' daa gak che'. Na'ch wlej Pédróna'ne' ka'lə na' wzolo golle'ne' bi koo cho'e daa.

<sup>33</sup> Na' biyechj Jesúza' chwie' ben'ka' nakgake'ne' txen, na' bsheshlene' Pédróna', chi'ene':

—¿Kwas ka'lə, Satanás!, la' bi chajniilo' daa cheeni Chioza' gone', san de yell-liozan chajniilo'.

<sup>34</sup> Na' wñe Jesúza' ben'ka' nakgake'ne' txen len ben'ka' lle' na', na' chi'e:

—Shi no cheeni gake' nad' txen, chiya'l' wsanlall' kwine' na' izanile' yel' mban che'na' yen ile'ile' bittez ni cha', na' gone' ka chazlallaa. <sup>35</sup> La' beena' bi chzanile' yel' mban che'na', beenan' kwiayi', san beena' chzanile' yel' mban che'na' ni cha' na' ni che dill' wen dill' kob cha'na', beenan' gat' to yel' mban che' zejli kan'i. <sup>36</sup> Bibi zjanayin gap ben' yog'lo'j' daa de yell-lioni, shi le' kwiayee. <sup>37</sup> Na' aga zakii chixje' kwenche yisla yel' mban che'na'. <sup>38</sup> Nottezə beena' chido'i wchebe' nombi'e nad' wa wi'e cho'a xtillaana' lao ben' saaxyaka' ben'ka' bi chon'ilall' nad', ka'kzə nad', Ben' Bsel' Chioza' Yell-lioni, yiyii yido'id' le' kat' yiyedlen' anjl cha'ka' na' zinsa' bal-aan xen che Xa' Chioza'.

**9** Na' lekzka' golle' legake':

—Dii li nia' le', ba'le lle'leni, ni mbanle ile'ile ka chñabia'len Chioza' yel' wak xen che'na'.

### Jesúza' biyake' nlla'lə

(Mt. 17:1-13; Lc. 9:28-36)

<sup>2</sup> Wde xop lla, Jesúza' wyaje' to lo yaa sibə, na' bchi'e Pédróna', Jacóbona' na'ch Juanna'. Na' lawe'ka' biyake' nlla'lə. <sup>3</sup> Na' xe'na' axt chep cheeni'n, na' biga zoa ben' chibe'n xtil inleeb ka gokan. <sup>4</sup> Na' ble'gakile' Elíaza' na'ch dii Moiséza' chshaljlengake' Jesúza'. <sup>5</sup> Na' che' Pédróna' Jesúza':

—Maestro, iwen inleeb zoacho ni! Gonnto' twej ransh chele, to cho', to che dii Moiséza', na' sto che Elíaza'.

<sup>6</sup> Kon bi billet-lallee golle', daa chllebchagake'. <sup>7</sup> Na' wze to bej kwashaan legake', na' loo beja' wñe Chioza', chi'e:

—Beenin xiinaa, na' le chakidee. Li wzenag che'.

<sup>8</sup> Na' ka bwiagake' gana' wlle' ben'ka' shon', stoz Jesúza' ze.

<sup>9</sup> Na' shlak chiyetjgake' lo yaana', goll Jesúza' legake' kono ye'gake' daa ble'gakile' axt kat'ch le', Ben' Bsel' Chioza' Yell-lioni, ba bibane' ladj ben' wetka'. <sup>10</sup> Na' daa golle' ka', ni to kono ben' yoblə gollgake' daa ben ble'gakile', la'kzi wñabi ljwellgake', bi zejlin daa golle' yibane' ladj ben' wetka'. <sup>11</sup> Na' wñabgakile' Jesúza', che'gake'ne':

—¿Biçe naz ben'ka' chli' chsedi leya' nan zigaate Elíazan' yiyed?

<sup>12</sup> Na' chi'e legake':

—Dii li, Elíaza' yide' zigaate yidgwee xnezi yog'lo'jte. ¿Abi nezile biçe Cho'a Xtill' Chioza' nan Beena' Bsel' Chioza' Yell-lioni chonan byen sak'zi'chgue' na' gaxzbani ben' le'? <sup>13</sup> Na' nia' le', ba biyed Elíaza', na' bengakile'ne' daa nazan chegake', kon ka na Cho'a Xtill' Chioza' gongake' che'.

**Biyon Jesúsza' to bi' yoo dii xiw'**

(Mt. 17:14-21; Lc. 9:37-43)

<sup>14</sup> Na' ka billingake' gana' lle' beṅ'ka' sto, beṅ'ka' nakgake'ne' txen, na' ble'gakile' lle' beṅ' zan inlleb kwite'ka', na' len baḷ beṅ'ka' chli' chsedi leya' chakguedlengake' legake'. <sup>15</sup> Na' beṅ'ka' lle' na' ka ble'gakile' Jesúsza', bibangakile' na' wza'dogake' jawap-gake'ne' chiox. <sup>16</sup> Na' chi'e legake':

—¿Bi cheyin chakguedlenile beṅ'ka'?

<sup>17</sup> Na' to beena' len ladj beṅ'ka' lle' na' chi'ene':

—Maestro, ni ba nchi'a bi' cha'ni lawo'ni, la' yoo' to dii xiw' na' chlloanan ineb'. <sup>18</sup> Gattezə chdab' dii xiwaa choxa'n leb' na'ch chchoonān leb' lo yona'. Na' chbia bllin' cho'abaa, na' chaoxaxj leybaa na' chzecha kwerp che'baa. Na' ba gosh' beṅ'ki nako' txen yibejgake' dii xiwaa yoo'b', per bi chakgake'.

<sup>19</sup> Na' che' Jesúsza' legake':

—¿Le' beṅ' bi chajle'? ¿Zi' ka'k'tek chiyaḷ' soalen' le'? ¿Zi' ka'k'tek chiyaḷ' soid' le'? Li lljxi'shki' ni.

<sup>20</sup> Na' jwa'gake'b' lawe'na'. Na' ka ble'i dii xiwaa Jesúsza', benan ka wyazb' shonā'. Na' billeeb' lo yona' na' wbix wtoḷb' na' willia bllin'na' cho'abaa. <sup>21</sup> Na' wṅabi Jesúsza' xabaa, chi'e:

—¿Batrate wzolo chakb' ki?

Na' che' xabaa:

—Kana' nakteb' bi'do' chakb' ka'. <sup>22</sup> Na' zan shii ba bzaḷ' dii xiwaab' lo yi'na' na' loo nisa' kwenche witan leb'. Na' shi wak yiyono'b', biyesh'lall'gachi neto' na' goklengach neto'.

<sup>23</sup> Na' che' Jesúsza':

—¿Bi che nazo' shi wak'?, la' beena' chonlilall' Chioza' aga bi dii lallj gat' che'.

<sup>24</sup> Na' besyaa xabaa, chi'e:

—Chonlilallaane'. ¿Goklen nad' gonlilall'chee!

<sup>25</sup> Na' ka ble'i Jesúsza' ba chdop chllag beṅ' zan inlleb, na' bsheshlene' dii xiwaa, chi'en:

—Dii xiw', lin' chono' kwenche bi cheni bi'ni ni bi chak ineb', nad' nia' li', bichej, na' bich gak yiyoo sto shii.

<sup>26</sup> Na' besyaa dii xiwaa, na' bxizan leb' zibia' wal na' bichejan, na' gotb' ka bi' wet. Na' beṅ' zan wnagake': "Ba witb'." <sup>27</sup> Na' bex' Jesúsza' na'ba' kwenche bisolleeb'.

<sup>28</sup> Na' ka biyoo Jesúsza' to loo yoo, beṅ'ka' nakgake'ne' txen wṅabgakile'ne' to lezgake', che'gake':

—¿Berache bi gok yibejnto' dii xiwaa?

<sup>29</sup> Na' chi'e legake':

—Kwenche gak yichej dii xiw' ka dga, chiyaḷ' soale wbas' na' we'llwill-le Chioza'.

**Jesúsza' sto shii cho'e dill' guete'**

(Mt. 17:22-23; Lc. 9:43-45)

<sup>30</sup> Na' biza'gake', na' bidegake' gana' mbani Galileana'. Na' Jesúsza' bi goklallee no inezi gan zoa-gake' <sup>31</sup> daa chzajniile' beṅ'ka' nakgake'ne' txen. Na' chi'e legake':

—Nad', Beṅ' Bsel' Chioza' Yell-lioni, gon beṅ' nad' lo na' beṅ' malka' na' witgake' nad', na' ka gak shon' lla, yiban' ladj beṅ' wetka'.

<sup>32</sup> Na' bi wyajni'gakile' daa chi'e legake', na' bi biyaxj-gakile' inabgakile'ne' bi che'ze' ka'.

**¿Noran zak'chi'?**

(Mt. 18:1-5; Lc. 9:46-48)

<sup>33</sup> Na' billingake' yell Capernaúma'. Na' ka billingake' gana' zoagake', na' chi'e legake':

—¿Bi cheyin chakguedzle shlak zingoocho neza'?

<sup>34</sup> Na' ni togake' bi wṅe, daa gokguedgake' che noyēṅ'gaken' nak beṅ' zak'chi'. <sup>35</sup> Na' wche' Jesúsza' na' goxe' beṅ'ka' shllin, chi'e legake':

—Shi nole cheenile gakle beṅ' zakii, chiyaḷ' gon kwindle ka wen llin che beṅ'.

<sup>36</sup> Na'ch bzoe' to bi'do' ladje'ka'. Na' blene'b' chi'e legake':

<sup>37</sup> —Nottezə beṅ' wlebe' to bi'do' ka bi'do'ni daa chonlilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'.

**Beena' bi chakzbani cho', txenkzan nake' cho'**

(Lc. 9:49-50; Mt. 10:42)

<sup>38</sup> Na' che' Juanna' le':

—Maestro, ba ble'into' to beṅ' chzetje' lio'na' kwenche chibeje' dii xiw'ka' yoo beṅ' na' bllonnto' gone' ka', la' bi nake' cho' txen.

<sup>39</sup> Na' che' Jesúsza':

—Bi wllonle gone' ka', la' beena' chzetj lia'na' kwenche chone' yeḷ' wak, aga wak inie' zban cha'. <sup>40</sup> La' beena' bi chakzbani cho', txenkzan nake' cho'. <sup>41</sup> Na' nottezə beena' gone' le' la'ch' lat' nis yeejle daa nakle nad' txen, dii li nia' le', de dii si'e banez.

**Diika' gon ka ibixcho lao dii mala'**

(Mt. 18:6-9; Lc. 17:1-2)

<sup>42</sup> 'Nottezə beena' gon ka ibix to beṅ' zi' chzolo chonlilallee nad', naklan wen wwaḷ'gake' yene'na' to yaj che molinna' na' lljazaḷ'gake'ne' loo nisdo'na' aga ka daa gone' ka ibix beṅ' lao dii mala'. <sup>43</sup> Na' shi noona' chonan ka ibix'o' lao dii mala', bchogan. Wenchlan bi de noona' tḷaa yillino' kwit Chioza' aga ka daa yiyaj doxentio' lo yi' gabiḷa' daa biga yiyol, <sup>44</sup> gana' ni bzogaa bi chet ni biga chiyaḷ' yi'na'. <sup>45</sup> Na' shi ni'ona' chonan ka chono' to dii mal, bchogan. Wenchlan bi de ni'ona' tḷaa yillino' kwit Chioza' aga ka daa yiyaj doxentio' lo yi' gabiḷa', <sup>46</sup> gana' ni bzogaa bi chet ni biga chiyaḷ' yi'na'. <sup>47</sup> Na' shi jalawo'na' chonan ka chono' to dii mal, wlejan. Wenchlan bi de jalawo'na' tḷaa yillino' gana' zoa Chioza' chṅabi'e aga ka daa yiyaj doxentio' lo yi' gabiḷa', <sup>48</sup> gana' bi chet bzogaa ni biga chiyaḷ' yi'na'.

<sup>49</sup> 'Ka yog'te diika' chzangakile' choe'gake' Chioza' ch-googake'n zed', ka'kzan yog'te beṅ'ka' nonlilall' nad' yen ile'gakile' yeḷ' zak'zi'na' yell-lioni. <sup>50</sup> Zedaa nakan dii wen, per shi bich nakan zxi', aga wakch yiyonchon zxi' dii yoblə kwenche wchinchon. Chiyaḷ' soalen lljwell-le

mbalaz, na' shi gonle ka', nakle ka yel' wao daa yoo zed' na' sian.

**Bi chiyal' yilaa beṅ'ka' nshagna'**  
(Mt. 19:1-12; Lc. 16:18)

**10** Biza' Jesúza' Capernaúma' ziyaje' gana' mbani Judeana' na' lo yell-liona' daa de shlaa yao Jordánna'. Na' bizdi'a bizllag beṅ' zan lawe'na' na' wzoloe' chli' chsedile' legake' kon ka ba yooloe' chone'.<sup>2</sup> Na' baḷ fariseoka' wbig'gake' lawe'na', na' kwencheze wchixgake'ne' wṅabgakile'ne' shi de lsens yilaa xool beṅ'.<sup>3</sup> Na' chi'e legake':

—¿Bin bllia dii Moiséza' bia' gonle?

<sup>4</sup> Na' che'gake'ne':

—Dii Moiséza' bi'e latj yichooṅ beṅ' byona' xoolena' na' wi'ene' to yish daa cho'e dill' ba bilaagake'.

<sup>5</sup> Na' che' Jesúza' legake':

—Dii Moiséza' bllie' bia' gonle ka' daa nakle beṅ' widenag. <sup>6</sup> Per dii nech ka wxw wzil yell-lioni, Chioza' "bene' beṅ' byona' na'ch noola'." <sup>7</sup> "Daan, beṅ' byona' wlee xaxneena' kwenche soalene' xoolena' <sup>8</sup> na' gake' toz." Na' bich nakgake' chop, san ba nakgake' toz. <sup>9</sup> Na' beṅ'ka' ba non Chioza' toz, ni to beṅ' yell-lio bi chiyal' yilee legake'.

<sup>10</sup> Ka billingake' yoona' gana' zoagake', beṅ'ka' nakgake'ne' txen wṅabgakile'ne' cheyi daa golle' ka'.

<sup>11</sup> Na' che' Jesúza' legake':

—Beena' yilee nool che'na' na' yishagnee nool yoblə, chone' ka beena' zoakzə nool che' na' chdalene' nool yoblə. <sup>12</sup> Na' shi noola' yilee beṅ' che'na' na' yikee beṅ' yoblə, chone' ka beena' zoakzə beṅ' che' na' chdalene' beṅ' yoblə.

**Jesúza' chonleeye' bi'do'ka'**  
(Mt. 19:13-15; Lc. 18:15-17)

<sup>13</sup> Na' baḷ beṅ' jwa'gake' bi'do' che'ka' lao Jesúza' kwenche wxoa neena' yichjb'ka' na' gonleeye' legakb'. Na' beṅ'ka' nakgake'ne' txen wzologake' chsheshlengake' beṅ'ka' zjwa' bi'do'ka'. <sup>14</sup> Na' ka ble'i Jesúza' chsheshlengake' beṅ'ka', bllie na' chi'e legake':

—Li we' latj yid bi'do'ki lawa'ni, bi wllonle, la' Chioza' chṅabi'e loo yichjlall'do' beṅ'ka' nak ka legakb'. <sup>15</sup> Dii li nia' le', beena' bi yiyak yichjlall'do'ena' ka che bi'do'ki kwenche iṅabia' Chioza' le', bi yilline' gana' zoa Chioza'.

<sup>16</sup> Na' blene' bi'do'ka', na' bxoā neena' yichjb'ka' na' benleeye' legakb'.

**To bi' wew', bi' wni'a, bshaljlem' Jesúza'**  
(Mt. 19:16-30; Lc. 18:18-30)

<sup>17</sup> Ka ba chiza' Jesúza' yigwee nez, bllindo to bi' wew' bchek' xibbaa lawe'na' che'bee:

—Maestro, li' nako' beṅ' wen. ¿Beran chiyal' gon' kwenche gat' to yel' mban cha' zejli kaṅi?

<sup>18</sup> Na' che' Jesúza' le'b':

—¿Berache nazo' nad' beṅ' wen? Toz Chioza' nake' beṅ' wen. <sup>19</sup> Ba ṅezkzilo' daa nllia Chioza' bia' goncho: "Bi wito' beṅ', bi soaleno' nool bi nak nool cho', bi

kwano', bi chiljlalloo bizə gon iṅo' che beṅ', ni bi siyoo, na' wdap balaan xaxṅoo."

<sup>20</sup> Na'ch che'bee:

—Maestro, kana' naktia' bi' xkwid' chon' yog' diika'.

<sup>21</sup> Na' bwia Jesúza' le'b' kon yel' chaki, chi'e:

—Stozə daa chyallj gono': jayet' yog' dii de cho' na' be'n beṅ' yesh'ka', na' gat' to yel' shao' cho' yabana'. Na' da dino' nad'.

<sup>22</sup> Na' gokyeshii bi' wni'ana' ka golle'b' ka'. Na' ziyajb' chakyeshib' daa nakb' bi' wni'a xen inleeb.

<sup>23</sup> Na' bwia Jesúza' beṅ'ka' lle' na', na' chi'e beṅ'ka' nakgake'ne' txen:

—¿Lallj inleeb chonan che beṅ' wni'aka' we'gake' latj iṅabia' Chioza' legake'!

<sup>24</sup> Na' bibani beṅ'ka' nakgake'ne' txen daa golle' ka'. Na' chizi'e legake':

—Le' xiṅdawaa, chonan lallj che beṅ' wni'ana' yilline' yabana' gana' chṅabia' Chioza'. <sup>25</sup> Lobe'ch te to kamey to xan yesh' aga ka to beṅ' wni'a yilline' yabana' gana' chṅabia' Chioza'.

<sup>26</sup> Ka bengakile' golle' ka', zizikli bibangakile', na' che' ljjwellgake':

—¿Notg gak yillin lao Chioza', shka'?

<sup>27</sup> Na' bwia Jesúza' legake' chi'e:

—Ni to beṅ' yell-lio bi gak gone' dga, per Chioza' aga bi dii lallj che' de, la' yog'loḷte chak gone'.

<sup>28</sup> Na' Pédrona' chi'ene':

—Neto' ba wlej yichjnto' yog'loḷ dii napnto' kwenche nonnto' li' txen.

<sup>29</sup> Na' che' Jesúza':

—Dii li nia' le', nottezə beṅ' ba bzanile' no lille', no xaxnee, no beṅ' bishee, no beṅ' zane', no xiṅ xoolo', no yell-lio che' ni cha' nad' na' ni che dill' wen dill' kob cha'na', <sup>30</sup> lo yell-lioni Chioza' yiyo'ene' dii zanch ka diika' wlej yichje', no lille', no beṅ' bishee, no beṅ' zane', no xiṅe', no yell-lio che' la'kzi chiya dii wsak'zi' beṅ' le', na' illin lla gat' to yel' mban che' zejli kaṅi. <sup>31</sup> Per beṅ' zan nakgake' beṅ' zakii naa, wllin lla bich bi sak'gake', na' beṅ' zan bi nakgake' beṅ' zakii, wllin lla gake' beṅ' zakii.

**De wyon shii Jesúza' cho'e dill' guete'**  
(Mt. 20:17-19; Lc. 18:31-34)

<sup>32</sup> Ka ziyajgake' Jerusalénna', na' zillialo Jesúza' lao beṅ'ka' nakgake'ne' txen. Na' le chibangakile', na' beṅ'ka' zinoch le' le chllebgake'. Na' bche' Jesúza' beṅ'ka' shllin ka'lə na' wzoloe' cho'e dill' lawe'ka' daa gak che', <sup>33</sup> chi'e legake':

—Ba gokbe'kzile' ba ziyajcho Jerusalénna', na' nad', Beṅ' Bsel' Chioza' Yell-lioni, gongake' nad' lo na' bxoā-ka' chṅabia' na' beṅ'ka' chli' chsedi leya', na' wchoglogake' cha' guet' na' gongake' nad' lo na' beṅ' zit'ka'.

<sup>34</sup> Na' wtitgake' nad', na' wlla' xeneeka' nad', na' wit chingake' nad', na' witgake' nad'. Na' ka gak shoṅ lla yiban' ladj beṅ' wetka'.

**To dii wṇab Jacóbona' len Juanna' lao Jesúza'**

(Mt. 20:20-28)

<sup>35</sup> Na' Jacóbona' len Juanna', beṇ'ka' nak xiṇ Zebede-wa', wbig'gake' lao Jesúza' che'gake'ne':

—Maestro, cheeninto' gongacho' goklen gono' dga iṇabinto' li'.

<sup>36</sup> Na' chi'e ḡgake':

—¿Beran cheenile' gon' ḡchele?

<sup>37</sup> Na' che'gake'ne':

—We'gacho' latj kwe'nto' shḡaa wej kwito'na' kat' solo iṇabi'o gana' de balaṇ xen ḡho'na'.

<sup>38</sup> Na' che' Jesúza' ḡgake':

—Aga ṇezile' bin chṇable. ¿Awzoile' wtiḡ-le ka yeḡ' zak'zi'ka' idiḡ illag' na' gak ḡchele ka gak ḡha'?

<sup>39</sup> Na' che'gake'ne':

—Wzointo'n.

Na' che' Jesúza' ḡgake':

—Dii ḡj, wtiḡ-le ka yeḡ' zak'zi'ka' idiḡ illag' na' gak ḡchele ka gak ḡha'. <sup>40</sup> Per daa nale kwe'le shḡaa wej kwitaa bi nak lo na' gona'n, san beṇ'ka' ba mbej Chiozan', gakan ḡhegake'.

<sup>41</sup> Ka beni beṇ'ka' zi shi, na' bllaagake' Jacóbona' na'ch Juanna'. <sup>42</sup> Na' wṇe Jesúza' ḡgake', chi'e:

—Ṇezkzile beṇ'ka' chṇabia' yell-lioni na' beṇ'ka' zakii chongake' byen chzenag beṇ' ḡhegake'. <sup>43</sup> Per aga kan' chiyaḡ' gonle. Shi nole cheenile gakle beṇ' mbejlawin chiyaḡ' gon kwintle ka wen ḡlin ḡhe beṇ'. <sup>44</sup> Na' shi nole cheenile gakle beṇ' zakii, chiyaḡ' gakle ka beṇ' ndoo ḡla yel chone' xshin beṇ'. <sup>45</sup> ḡa' nad', Beṇ' Bseḡ' Chioza' Yell-lioni, aga bid' kwenḡhe gaklen beṇ' nad', san bid' kwenḡhe gaklen' beṇ' na' wi'a yeḡ' mban ḡha'na' kwenḡhe yisla' beṇ' zan lao saaxyana'.

**Jesúza' biyone' beṇ' ḡchoḡa' le Bartimeo**

(Mt. 20:29-34; Lc. 18:35-43)

<sup>46</sup> Na' bllingake' Jericóna', na' ka ba chichej Jesúza' yella' kon beṇ'ka' nakgake'ne' t xen na' len beṇ' zanch zinogake'ne', na' chi' to beṇ' ḡchoḡ cho'a neza' cheenile' no we' ḡe' mech, na' lie' Bartimeo, xiṇ to beṇ' le Timeo. <sup>47</sup> Na' ka benile' nan Jesús, beṇ' Nazaretan', wdena', na' wzoloe' chosyee, chi'e:

—¡Jesús, xiṇ dia ḡhe dii Daví, biyesh'lall'gachi nad'!

<sup>48</sup> Na' beṇ' zan bsheshlengake'ne' daa chosyee, na' zizikli chosyaache', chi'e:

—¡Xiṇ dia ḡhe dii Daví, biyesh'lall'gachi nad'!

<sup>49</sup> Na' wlez Jesúza' chi'e:

—ḡi iṇie'.

Na' wṇegake'ne', che'gake':

—Btiplaloo, wzolla', ba chṇe' li'.

<sup>50</sup> Na' bzaḡee ka'lə lechaṇ nḡoa kolleena' na' wzollee jsie' lao Jesúza'. <sup>51</sup> Na' wṇabile'ne', chi'e:

—¿Bin cheenilo' gon' ḡho'?

Na' che' beṇ' ḡchoḡa'ne':

—Maestro, cheenid' ile'id'.

<sup>52</sup> Na' che' Jesúza'ne':

—Wak yiyajo'. Daa ba beṇ'ḡilaloo nad', ba biyakilo'.

Na' katena' lii ble'teile' na' wnoe' Jesúza'.

**Ka billin Jesúza' Jerusalénna'**

(Mt. 21:1-11; Lc. 19:28-40; Jn. 12:12-19)

**11** Ka ba zoa yillingake' Jerusalénna', na' wdegake' gaozə gana' ḡlia yell Betfagéna' na' yell Betáni-ana', kwit Yaa Olívoza', na' Jesúza' bseḡee ḡhop beṇ'ka' nakgake'ne' t xen, <sup>2</sup> chi'e ḡgake':

—ḡi shaj yella' daa ḡlia gaozə, na' ka ḡllinle na', ile'ile to burr chbando', ba konon' kwia, da'b yaga'. Na' wsell-leb wḡhe'leb nilə. <sup>3</sup> Na' shi no iṇaz le': "¿Berāḡhe chsell-zleb?" na' ye'lene': "ḡanchonan' chyalljile'b xtit, na' yiy-ontie'b."

<sup>4</sup> Na'ch wyaj beṇ'ka' bseḡee, na' ble'gakile' to burr da'b to cho'a yoo gana' chde neza', na' bsellgake'b.

<sup>5</sup> Na' beṇ'ka' ḡle' na' wṇabgakile' ḡgake':

—¿Bin chonle? ¿Biḡhe chsellzleb?

<sup>6</sup> Na' gollgake' ḡgake' daa goll Jesúza', na' be'gake' latj bḡhe'gake'b. <sup>7</sup> Na' bḡoagake' xe'ka' koll' burra' na' jasangake'b lao Jesúza', na' wllie'b. <sup>8</sup> Na' beṇ' zan bshiljgake' xe'ka' tneza', na' zi baḡe' bḡhoggake' no zin na' wdixjgake'n tneza'.

<sup>9</sup> Na' ka beṇ'ka' ḡlialo lao Jesúza' ka beṇ'ka' no-gake'ne', chosyaagake', nagake':

—¡ḡi we'la'o Chioza'! ¡Gonḡeeyshga ḡancho Chioza' beeni ba bseḡee! <sup>10</sup> ¡Gonḡeeyshga ḡancho Chioza' yeḡ' wṇabia' ḡhe beeni zee ḡo dia ḡhe dii ḡoxzto'cho Davina'! ¡ḡi da we'la'ocho Chioza' zoa yabana'!

<sup>11</sup> Na' wyoo Jesúza' yell Jerusalénna' na' zeje' gana' zoa yoodo'na'. Na' ka biyoll bwie' doxenten na' ziyaje' Betániana' len beṇ'ka' shllin, daa ba wille'.

**Bllaa Jesúza' daa bibi dii zix ḡlia yag yixwewa'**

(Mt. 21:18-19)

<sup>12</sup> Na' betiyo ka biza'gake' Betániana', wdon Jesúza'. <sup>13</sup> Na' zit'lə ble'ile to yag yixwew ḡlia ḡlaguinna', na' jawie' shi ḡekzka' ḡlian yixwewa'. Na' ka blline' zeelo ḡlaguinna' ḡlia, ḡa' aga tiemp ḡhe yixwew kana'. <sup>14</sup> Na'ch golle' yaga':

—¡Batch kwio' dii gao beṇ'!

Na' beni beṇ'ka' nakgake'ne' t xen ka golle'n.

**Jesúza' bisheshe' beṇ'ka' chit' chde lesh' chyoodo'na'**

(Mt. 21:12-17; Lc. 19:45-48; Jn. 2:13-22)

<sup>15</sup> Na' ka billingake' Jerusalénna', Jesúza' wyo'e lesh' chyoodo'na' na' wzoloe' bshesh biḡcheeṇe' beṇ'ka' chit' chde na' beṇ'ka' cha'o chzi'. Na' bishi'e mes ḡhe beṇ'ka' chshaa mecha' na' bzoles bzolline' gana' chi' beṇ'ka' chit'gake' palomka'. <sup>16</sup> Na' bi bi'e latj no sho'lench dii wit' wdie' lesh' chyoodo'na'. <sup>17</sup> Na' wzoloe' chli' chsedile' beṇ'ka' ḡle' na', chi'e:

—Cho'a Xtill' Chioza' nan: "ḡlilla'na' nakan ga choeḡwill yog'te beṇ' ḡle' doxen lo yell-lioni nad'", per le', ba nonzlen ka to ga chdop chillag wban.

<sup>18</sup> Na' ka beni bḡozka' chṇabia' na' beṇ'ka' chli' chsedi leya' ka wne', wzologake' wdiljall'gake' nak gongake' witgake'ne', daa ḡe chllibgake'ne', ḡa' yog' beṇ' chiban-gakile' ka chli' chsedile' ḡgake'. <sup>19</sup> Na' ka goḡ, biza'len Jesúza' beṇ'ka' nakgake'ne' t xen Jerusalénna'.

**Wbill yag yixwewa'**  
(Mt. 21:20-22)

<sup>20</sup> Na' betiyo shzila' ka wdegake' gana' zoa yag yixwewa', ble'gakile' ba wbill axt loinna'. <sup>21</sup> Na' jadini Pé-drona' daa goll Jesúsza' yaga' na' chi'ene':

—Maestro, bwiakachi, yag yixwewa' daa bsheshleno'. Ba wbillan.

<sup>22</sup> Na' che' Jesúsza' legake':

—Li gon'jilall' Chioza'. <sup>23</sup> Dii li nia' le, nottezə beena' yee yaani: “Bkwas ka'lə na' jsoa loo nisdona'”, na' bi gon'choplallee, san shajli'e, na' gak ka iñe'. <sup>24</sup> Daan nia' le', bittezə iñable kat' we'lwill-le Chioza', li shajle' ba nakkzan gon'e'n, na' ikaalen. <sup>25</sup> Na' kat'ka' choe'lwill-le Chioza', li si'xen che bish' ljwell-lena' shi bi chone' chele kwenche Xalena' beena' zoa yabana' si'xene' saaxya cheleka'. <sup>26</sup> La' shi le' bi si'xen che ljwell-le, lekzka' Xalena', beena' zoa yabana', bi si'xene' saaxya cheleka'.

**Yel' wñabia' che Jesúsza'**  
(Mt. 21:23-27; Lc. 20:1-8)

<sup>27</sup> Na' billingake' Jerusalénna' sto shii, na' shlak chda Jesúsza' lesh' chyoodona', wbig' b'xozka' chñabia', len beñ'ka' chli' chsedi leya' na' beñ' golka' chñabia', <sup>28</sup> na' che'gake'ne':

—Wnashki neto', ¿nora lsens cheyi chono' diiki? ¿No beñ' li' yel' wñabia'na' kwenche chono' diiki?

<sup>29</sup> Na' che' Jesúsza' legake':

—Lekzka' nad', de to dii iñabid' le'. Na' shi le' iñale nad' daa iñabid' le', na' iñia' le' no lsens cheyin chon' yog' diiki. <sup>30</sup> ¿Noran bsel' Juanna' kwenche bidchoe' beñ' nisa'? ¿AChiozan' bseleene', anti beñ' yell-li-ona'zan? Li iñashki nad'.

<sup>31</sup> Na'ch choe'len ljwellgake' dill', che'gake':

—Shi ye'chone' Chioza' bseleene', lobe' iñe' cho': “¿Berache ki wyajle'le che', lla?” <sup>32</sup> Na' bite gak yize'chone' nozə beñaan bseleene'.

Bi biyaxjgakile' ye'gake'ne' ka' daa bllebgake' beñ' yellka', la' yog'zgabe' yoo yichjgabe' Juanna' goke' to beñ' wdixjee daa goll Chioza'ne'. <sup>33</sup> Na' gollgake' Jesúsza':

—Bi ñezinto'.

Na' che' Jesúsza' legake':

—Lekzka' nad', bi iñia' le' no beñ' nad' yel' wñabia'na' chon' diiki.

**Jempl che wen llinka' beñ'ka' nak beñ' mal**  
(Mt. 21:33-46; Lc. 20:9-19)

**12** Na' wzolo Jesúsza' bseesile' legake' to jempl, chi'e':

—To beñ' biyaze' yag uva. Na' wlo'en leeja', na' ben-shawee gana' wsigake' uvaka', na' bene' to yoo sibə, gana' kwia beena' gap wwie'n.

Na'tech bene'n lo na' to chop beñ' na' wzee zeje' zit'. <sup>2</sup> Na' ka bllin lla yishibgabe' uvaka', bselee to wen llin che'na' lao beñ'ka' chap yag uvaka' kwenche lljaji'e daa chidolee. <sup>3</sup> Per beñ'ka' bex'gabe' wen llin che'na',

na' bet wdingake'ne' na' bilaggake'ne' to ka che'. <sup>4</sup> Na' xan yag uvaka' bselee sto wen llin che' lawe'ka', na' blaagake' yichje'na', na' chiya dii bengakile'ne'. <sup>5</sup> Na'ch bselee stoe', na' betgabe'ne'. Na'tech bselee zanch beñ' yoblə; na' balgabe' bengakile' zibia', na' zi balgabe' betgabe'.

<sup>6</sup> Na' ni chgaan bi'na' nakyen' xiine', bi'na' le chakile'. Na' bseleeb', la' gokile': “Wapgake' balaan bi' cha'ni.”

<sup>7</sup> Na' beñ'ka' nak lo na'gake' yag uvaka' che' ljwellgake': “Bi'nin gaki cheb' dga chapcho. Li da witchob', na' gakin checho.” <sup>8</sup> Na' bex'gabe'b' na'ch betgabe'b' na' bibejgabe' kwerp chebaa gana' lle' yag uvaka'.

<sup>9</sup> Na' wñabi Jesúsza' legake':

—¿Beraka chakile gon xan yag uvaka'? De de shaje' na' lljete' beñ'ka' na' yiyone' yell-lío che'na' gana' lle' yag uvaka' lo na' beñ' yoblə.

<sup>10</sup> ¿Abigan' wlable Cho'a Xtill' Chioza'?, gana' na:

Yaja' daa bi wyoolall' wen yooka', leyen'lannan' yaja' daa ba nchejcha yoonā.

<sup>11</sup> Dgan ben Xancho Chioza' na' nakan to dii yibani-cho.

<sup>12</sup> Na'ch goklall'gake' gox'gabe' Jesúsza' daa gokbe'gakile' bchine' jempla' daa bi chajle'gake' che'. Per daa chlebgake' beñ'ka' ndop nllag, biza'gabe' bibi bengakile'ne'.

**Janabgakile' Jesúsza' shi chiya' chixjgabe' daa chñab beñ' Rómaka'**

(Mt. 22:15-22; Lc. 20:20-26)

<sup>13</sup> Na' bsel'gabe' lao Jesúsza' bal' fariseoka' na' zi bal beñ'ka' nak Heródeza' t xen, kwenchezə kwejyelgakile'ne' na' lljadaogake' xya che'. <sup>14</sup> Na' wyajgabe' lawe'na', che'gake'ne':

—Maestro, ñezinto' dillaa choo nakan dii li. Na' biga chshoo cho'a xtilloona' lao nottez beñ', la' bi chwio' shi no naggake'. San chli'o nez li che Chioza' kon ka nakan. Wnashki neto': ¿Achiya' chixjcho daa chñab beena' chñabia' Rómāna', anti bi chiya' chixjchon?

<sup>15</sup> Na' gokbe'i Jesúsza' aga do lall'gabe'n che'gake'ne' ka', na'ch chi'e' legake':

—¿Berache chiyiljall'zle wchixle nad'? Li gonshki ni to mech kwenche ile'ida'n.

<sup>16</sup> Na' be'gabe'ne'n, na' che' Jesúsza' legake':

—¿Nora cho'alawin na' no lein da' lee mechī?

Na' che'gake'ne':

—Che beena' chñabia' Rómanan'.

<sup>17</sup> Na' che' Jesúsza' legake':

—Na'len li we' beena' chñabia' Rómāna' daa naki che', na' lekzka' li we' Chioza' daa naki che'.

Na' le bibangakile' daa golle' legake'.

**Wñabgakile' Jesúsza' nak gak kat' yiban beñ' wetka'**  
(Mt. 22:23-33; Lc. 20:27-40)

<sup>18</sup> Na' wyaj bal' saduceoka' lao Jesúsza'. Na' daa na-gake' bich yiban beñ' wetka', wñabgakile'ne' dga:

<sup>19</sup> —Maestro, ley daa bzej dii Moiséza' nan shi to beñ' byo guete' na' yigaan xoolena' wizeb na' kono xiin-gake' wzoa, beñ' bisheena' chiya' yikee nool wizeba'

kwenche soa xiin dia che dii ben' bisheena'. <sup>20</sup> Na' to shii wzoa gall bish' ben'. Na' ben' necha' bshagnee, na' wite' na' kono xiine' wzoa. <sup>21</sup> Na' ben' wchopina' bikee noola', na' lekzka' wite' na' kono xiine' wzoa. Na' ka'kza' gok che ben' wyonina'. <sup>22</sup> Na' gall bish'te ben'ki wzoalengake' noola' na' kono xiingake' wzoa. Na' ka wde wit yog'lolgake', lekzka' wit noola'. <sup>23</sup> Na' kat' yiban ben' wetka', znorayen'en' gak ben' che noola', Ila? Ia' gall bish'tegaken' wkaagake'ne'.

<sup>24</sup> Na' che' Jesúza' legake':

—Nakllejzilen, daa bi nombia'le Cho'a Xtill' Chioza' ni yel' wak che'na'. <sup>25</sup> Kat'ka' yiban ben' wetka', koch no ikaa Ijwellin, ni koch no wit' wde xiinin, san yiyakgake' ka anjlka' Ile' yabana'. <sup>26</sup> Na' ka nak daa yiban ben' wetka', zabin' wlable daa bzej dii Moiséza' gana' cho'en dill' che yagdo'na' chal', na' goll Chioza' dii Moiséza': "Nadaan Chios che Abrahama', Isaaca', na'ch Jacoba'?" <sup>27</sup> Na' bi nake' Chios che ben' wet, san nake' Chios che ben' ban. Dii xen inlleb nakllejile.

### Daa lialoch lao diika' bllia Chioza' bia' goncho

(Mt. 22:34-40)

<sup>28</sup> Na' beni to ben' chli' chsedi leya' ka golle' legake'. Na' daa gokbe'ile' le wen billi'e xtilleeka', na' wna-bile'ne':

—zBeran lialote nllia leya' bia' goncho?

<sup>29</sup> Na' che' Jesúza'ne':

—Daa lialote lao diika' nllia Chioza' bia' goncho, len daa na: "Li wzenag, le' ben' Israel, Xancho Chioza' zee-lo nake' Chios. <sup>30</sup> Goki Xano' Chioza' do yichj do lalloo, axt ga zeelo chajniilo', na' do ka nak fuerz cho'na'."

<sup>31</sup> Na' de wchopina' nakan ka dii necha': "Chiyal' gakilo' bish' Ijwello'na' ka chaki kwino'." Bich de dii zak'chi ka diiki.

<sup>32</sup> Na' beena' chli' chsedi leya' chi'ene':

—Kakzan nakan, Maestro. Dii li kan' nakan: toz Chiozan' zoa, na' bichga zoa ka le'. <sup>33</sup> Na' daa gakicho Chioza' do yichj do lall'cho, na' axt ga zeelo chajniicho, na' do ka nak fuerz chechona', na' gaki bish' Ijwell-chona' ka chaki kwino', zak'chan aga ka yog'loite bayix'ka' chitgake' na' chzeygake'b lao Chioza'.

<sup>34</sup> Na' ka gokbe'i Jesúza' kayen'nan billii beena' xtilleena', na' chi'ene':

—Zi lat'zə chyaljilo' kwenche inabia' Chioza' yichjlall'do'na'.

Na' koch no biyaxji inabchile'ne'.

### Cristona' nake' xiin dia che dii rey Davina'

(Mt. 22:41-46; Lc. 20:41-44)

<sup>35</sup> Na' shlak chli' chsedi Jesúza' ben'ka' lesh' chyoodo'na', na' chi'e legake':

—zBerache nazə ben'ka' chli' chsedi leya' nan Cris-tona', beena' ba mbej Chioza' inabi'e, nake' xiin dia che dii Davina'? <sup>36</sup> La' kwin dii Davina' bi'e dill' daa goll Espiritu che Chioza'ne', kana' wne':

Xancho Chioza' golle' Xan'na':

"Wche' kwit' de shlini,

shlak wzoa' xni'ona' ben'ka' chakzbani li'."

<sup>37</sup> Len kwin dii Davinan' golle' Cristona': Xan', zberache nazgake' Cristona' nake' xiin dia che dii Davina'?

Na' ben' zanka' ndop nllag bibagakile' xtilleena'.

### Jesúza' chawe' xya che ben'ka' chli' chsedi leya'

(Mt. 23:1-36; Lc. 11:37-54; 20:45-47)

<sup>38</sup> Na' ka chli' chsedi Jesúza' ben'ka', chi'e legake':

—Wsak'gale bi gonle ka ben'ka' chli' chsedi leya'. Le chibagakile' gon xe'ka' dii ton, na' cheengakile' yog'zə ben' gapgake' legake' balaan ladj Ikwe' ben'. <sup>39</sup> Na' gana' chdop chllagcho choe'llwillcho Chioza' le chibagakile' kwe'gake' gana' chbe' ben'ka' zakii, na' ka'kza' chongake' ga de yel' wao. <sup>40</sup> Na' lekzka' chkaatezgake' lill nool wizebka', na' kwenche ina ben' le shlichə zey ben'ki lao Chioza', chongake' ka choe'llwill Chioza' ssha nllab. Na' daa chongake' ka', ba nakten ile'chgakile' yel' zi' walch.

### Daa bzani to nool wizeb, bi'en Chioza'

(Lc. 21:1-4)

<sup>41</sup> To shii chi' Jesúza' gaozə gana' chgoogake' mech che yoodo'na' na' chwie' ben'ka' chgoogake' mecha'. Na' ben' zan ben' wni'aka' wloogake' mech xen. <sup>42</sup> Na' bllin to nool wizeb, ben' yesh', wlo'e chop sintabdo'.

<sup>43</sup> Na' wne' Jesúza' ben'ka' nakgake'ne' txen, chi'e legake':

—Dii li nia' le', nool wizebi ba be'che' dii xench aga ka yog'te ben'ka' wloo mech xench. <sup>44</sup> La' yog'gake' daa chichoonzannan' be'gake', san le', naktie' nool yesh', ba wlo'e doxen daa nape' la'kzi chyaljile'n.

### Jesúza' bi'e dill' wllin Ila kwiayi' yoodo'na'

(Mt. 24:1-2; Lc. 21:5-6)

**13** Ka chichej Jesúza' lesh' chyoodo'na', to ben'ka' nakgake'ne' txen chi'ene':

—Maestro, bwiakachi ka xochi nak yajki na' yooki.

<sup>2</sup> Na' che' Jesúza' le':

—Ka nak yooki chwiale naa, wllin Ila kwiayi' yogaan na' ni sto yaj bich kwia koll' Ijwellin.

### Diika' gak kat' ba zoa te che yell-lioni

(Mt. 24:3-28; Lc. 21:7-24; 17:22-24)

<sup>3</sup> Na' ziyajgake' lo Yaa Olívoza' gana' nla' yoodo'na'. Na' shlak chi' Jesúza' na', Pédrona', Jacóbona', Juanna', na'ch Andréza' wñabgakile'ne' to lezgake':

<sup>4</sup> —Cheeninto' ino' neto' batran gak daa ba wno'.

zBera ka ile'into' gak kwenche inezinto' nan ba zoa gaoshosh gakan?

<sup>5</sup> Na' che' Jesúza' legake':

—Bi we'le latj no siye' le'. <sup>6</sup> La' ben' zan ichej na' inazgake': "Nadaan Cris-tona'", na' ben' zan shajle'.

<sup>7</sup> Na' ka yenile chak wdił to ni to na', bi illeble. La' chonan byen gaggakan, per aga ba bllin Ila te che yell-lionin. <sup>8</sup> La' yidił-len Ijwell yellka' na' ben' wñabia'ka' yidił-len Ijwellgake'. Na' zan latj gak bedxo', na' gat' wbin, na' kwe' wdił wishesh. Kat' ba chak diiki shinz chzolo ka nak daa yen ile'i ben' yell-liokin.



<sup>9</sup> 'Wesak'gale, la' gongake' le' lall' na' beñ'ka' chñabia' cho' beñ' Israel, na' wit chingake' le' gana' chdop chllagcho choe'lwilcho Chioza'. Na' daa nakle nad' tx-en, lljwa'gake' le' lao beñ' wñabia' xenka' na' lao nochle beñ'ka' chñabia', na' ka' gak we'le xtillaana' lawe'ka'.  
<sup>10</sup> Na' ka' zi' te che yell-lioni, chiyal' illilj dill' wen dill' kob cha'na' doxen yell-lioni. <sup>11</sup> Na' kat' ba zjwa'gake' le' lao beñ'ka' chñabia', bi sele wñeyi bin ye'le legake', san daa wzajni Chioza' len' ñe'le, la' aga tobia'lall'zlen ñe'le, san Espiritu Sántonan' ñe'. <sup>12</sup> Beena' zoa beñ' bish' golje', leteze' gone'ne' lo na' beñ'ka' witgake'ne', na' beena' zoa xiñe', leteze' gone' xiñe'na lo na' beñ'ka' witgake'ne', na' ba' beñ', xiñe'ka'tezə gongake' xaxñeeka' lo na' beñ'ka' witgake' legake'. <sup>13</sup> Na' yog'zə beñ' gaxbzangakile' le' daa nonlilall'le nad'. Per beena' so saki bittez dii yen ile'ile' axt ka yiyoll diika' yen ile'ile', beenan' gat' to yel' mban che' zejji kañi.

<sup>14</sup> Na' kat' ile'ile ba zoa daa nak dii zban inleeb latja' gana' bi chiyal' soan, na'ch beñ'ka' lle' Judeana' chiyal' wxonjgake' shajgake' lo yaaka'lə. (Le' chlable dga, li shajniin.) <sup>15</sup> Na' beena' lliia koll' lille'na' ni bi gal' yiyetje' lljaleje' dii de loo lille'na'. <sup>16</sup> Na' beena' chda lyixaa, ni bich gal' yiyaje' lille'na' kwenche lljadoyoe' xe'na'.  
<sup>17</sup> Nyesh'laz gak che noolka' noa' na' noolka' chwall' chxop llana' gak ka'! <sup>18</sup> Li ñabi Chioza' bi gak dga kat'ka' chbe' dii zaga', <sup>19</sup> la' yel' zak'zi' wal inleeban nak daa yen ile'ile, daa konon' yen ile'kzi dezd ka bxe bsil Chioza' yell-lioni axt naa, na' kat' ba wde gokan kochno yen ile'i ka len. <sup>20</sup> Na' shi Xancho Chioza' bi wzeshee lla-ka' gak ka', kono yila shel'ka'. Per wzesheen daa chak-ile' beñ'ka' ba wleje' nakgake' lall' nee.

<sup>21</sup> Na' kat' gak diika', shi no ña le': "Li wwia, ni ze Crístona", wa ñe', "Li wwia, na' zie", bi shajle'le. <sup>22</sup> La' wchej beñ' siye'gake' ñazgake': "Nadaan Crístona", na' beñ' chonz ka chyixjee daa che' Chioza'ne', na' wli'gake' no yel' wak kwenche siye'gake' beñ', axt shel' wxegakile' siye'gake' beñ'ka' ba wlej Chioza' nakgake' lo nee. <sup>23</sup> Wsak'gale. Ba bzenid' le' ka nak yog' diiki zi' gak.

#### Kat' yiyed Crístona' dii yoblə

(Mt. 24:29-35, 42-44; Lc. 21:25-36)

<sup>24</sup> Na' kat' ba biyoll wde yel' zak'zi'ka', lii yicholte lao wbillā' na' beo'do'na' bich wzeeni'n. <sup>25</sup> Na' beljdo'ka' ixopgakan na' yog' diika' lliia xan yabana' ñibgakan. <sup>26</sup> Na' ile'gakile' nad', Beñ' Bsel' Chioza' Yell-lioni, zizaa ladj bejka' kon yel' wak choo yel' wak xen cha'na' na' balaan cha'na'. <sup>27</sup> Na' wselaa anjl cha'ka' tap laate yell-lioni axt gana' zeelo chiyollan kwenche yitopgake' beñ'ka' nak lall' na'.

<sup>28</sup> Li wwia ka chak che yag yixwewa': kat' chzolo chigaan na' chibia xlaguinna', na' chakbe'ile ba zoa yiyoo la'o linna'. <sup>29</sup> Ka'kzan, kat' ile'ile ba chak yog' diiki ba wnia' le' gak, na' gakbe'ile ba zoa gaoshosh te che yell-lioni. <sup>30</sup> Dii li nia' le', aga ba wit ben'ki zoa naa kat' gak yog' diiki. <sup>31</sup> Yabana' na' yell-lioni te chegakin, san cho'a xtillaana' aga wde bi gak ka nan.

<sup>32</sup> Na' kono ñezi bi lla bi gor gak diiki, ni anjlka' lle' yabana', ni nad' nak' Xiin' Chios. Toz Xa' Chioza' ñezile'n.

<sup>33</sup> Li wsak', na' li se kwas, na' li we'lwil Chioza', la' bi ñezile bat illin lla gakan. <sup>34</sup> Nakan ka ben to beñ' ba zoa see shaje' to yell zit', na' golle' beñ'ka' chon xshine'na' gapgake' lille'na'. Na' to togake' bene' lall' na'gake' daa gongake', na' golle' beena' chap cho'a leej che'na' bi guetlalleen. <sup>35</sup> Li se kwas, la' bi ñezile bat yila' xan yoonā'; shi yilee chaldo'zə, wa yilee chel, wa kat' chbell tezka', wa yilee cheeni'lesdo'. <sup>36</sup> Shi tokonganə yilee na' yidolile' le' bich ze kwasle. <sup>37</sup> Dga nia' le', lekzka' yog'lo' beñaan chep' ka', li se kwas.

#### Wloogake' xñezin gox'gake' Jesúza'

(Mt. 26:1-5; Lc. 22:1-2; Jn. 11:45-53)

**14** Chyallj zi chop llazə gal' lñi Paskwa', kana' chao-gake' yetxtila' bi yoo lewadúrana', na' bñozka' chñabia' na' beñ'ka' chli' chsedi leya' biyiljall'gake' naklə siye'gake' Jesúza' kwenche gox'gake'ne' na' wit-gake'ne'. <sup>2</sup> Na' che' ljwellgake':

—Bi gox'chone' lo lñina' kwenche bi wsees wcheen-cho beñ' yell.

#### Bwazj to noolə set zixə' yichj Jesúza'

(Mt. 26:6-13; Jn. 12:1-8)

<sup>3</sup> Ka zoa Jesúza' Betániana', wyaje' lill beena' le Simón, beena' gok yillwe' daa le lepra. Na' shlak chi'e cho'a mesa', bllin to noolə noxee to lmet de yaj xochi yoollan set zix de nardo na' dii xen zakaan. Na' wdish-je' yen lmeta' na' bwazje' set zixə' yichj Jesúza'. <sup>4</sup> Na' ba' beñ'ka' lle' na' bllaagake', na' che' ljwellgake':

—¿Berache benditjz nooli set zixə'? <sup>5</sup> Shel' bet'chok-le'n na' bi'e mecha' beñ' yesh'ka', la' zakaan che shon guiyoa lla che laxj beñ'.

Na' bsheshlengake' noola' daa bene' ka'.

<sup>6</sup> Na' che' Jesúza':

—Bibi ye'lene'. ¿Berache chsheshlenzlene'? Daa ba bene' cha' nakan dii wen. <sup>7</sup> Ka nak beñ' yesh'ka', toshi-izi soagake' ladjlena', na' wak gaklenle legake' kat'ka' cheenile'; san nad', aga toshiizin soalen' le'. <sup>8</sup> Ka nak nooli ba bene' daa zeelo gok bene'. Ba bwazje' nad' set zixə' kwenche gakshao'zega kwerp cha'ni kat' wk-wash'gake' nad'. <sup>9</sup> Dii li nia' le', gattezə we'gake' dill' wen dill' kob che Chioza' lo yell-lioni, lekzka' we'gake' dill' ka nak dii wenna' daa ba ben nooli na' lljadingak-ile'ne'.

#### Juda' chchebe' gone' Jesúza' lo na' beñ' malka'

(Mt. 26:14-16; Lc. 22:3-6)

<sup>10</sup> Na' Jud Scariota', beena' nake' txen beñ'ka' shllin, wyaje' lao bñozka' chñabia' kwenche gone' Jesúza' lo na'gake'. <sup>11</sup> Na' ka golle' ka', bibagakile' na' bchebgake' we'gake'ne' mech. Na' wzolo Juda' chinoe' nakan gone' kwenche gone' Jesúza' lo na'gake'.

**Lle'na' zeelo wdaolengake' Jesúza'**  
(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup> Na' Ila nech che Inina' kat' chaogake' yetxtila' daa bi nchixə levadúrana', llana' chitgake' xil'do'na' chaogake' Ini Paskwa', beŋ'ka' nak Jesúza' txen wŋabgak-ile'ne':

—¿Ga cheenilo' ljasini'anto' xshe' che Ini Paskwi?

<sup>13</sup> Na' bselee chogpake', chi'e legake':

—Li shaj yell Jerusalénna' na' yillagle to beŋ' byo zino'e to chee nis, na' lJanólene'. <sup>14</sup> Na' gana' yiyo'e, li yee xan yoona': "Maestrona' ne': ¿Garan zoa yoona' gana' gaolene' beŋ'ka' nakgake'ne' txen lle' Ini Paskwi?" <sup>15</sup> Na' wliile' le' to yoo xen dii lla shkwia cha'la ga ba nonshao'tie'. Na' nan' wsini'ale daa gaocho xshe'na'.

<sup>16</sup> Na' wza' beŋ'ka' bselee, wyajgake' yella'. Na' gok kon kayen' golle' legake'. Na' bsini'agake' daa gaogake' lle' Ini Paskwa'.

<sup>17</sup> Na' ka goļ billinlen Jesúza' beŋ'ka' shllin yoona'.

<sup>18</sup> Na' shlak chi'gake' cho'a mesa' chaogake', goll Jesúza' legake':

—Dii li nia' le', tole chi'le ni chaolenle nad' gonle nad' lo na' beŋ'ka' chakzi' chakzbani nad'.

<sup>19</sup> Na' gokyesh'gakile', na' wzolo to togake' chŋabgak-ile'ne':

—¿Anadaan gon' ka', Ila?

<sup>20</sup> Na' che' Jesúza' legake':

—Ladjleni, ka le' nakle shllin chleejenle nad' yetxtila' loo yeeni, len beena' gon ka'. <sup>21</sup> Ka nak nad', Beŋ' Bsel' Chioza' Yell-lioni, wit beŋ' nad' ka na Cho'a Xtill' Chioza'. Per nyesh'laz gak che beena' gone' nad' lo na' beŋ'ka'. Naklan wen shel'ka' bi golje'.

<sup>22</sup> Na' shlak chaogake', bex' Jesúza' yetxtila' na' bi'e Chioza' yel' choxken, na' bxoje'n na' bi'en legake', chi'e:

—Li gao dga. Lennan' kwerp cha'ni.

<sup>23</sup> Na' bexee kopa', na' bi'e Chioza' yel' choxken na' bdie'n lawe'ka' na' yog'loļgake' weejgake' daa yollan.

<sup>24</sup> Na' chi'e legake':

—Lennan' xchen'na' daa gon ka gak li dii koba' bcheb Chioza' gone'. Na' laljan kwenche gaklenan beŋ' zan.

<sup>25</sup> Dii li nia' le', bichga yeej' xis uvana' axt ki illin Ila yeeja'n gana' chŋabia' Chioza'.

**Jesúza' golle' bi wcheb Pédrone' shi nombi'ene'**  
(Mt. 26:30-35; Lc. 22:31-34; Jn. 13:36-38)

<sup>26</sup> Na' ka biyoll beļgake' be'la'ogake' Chioza', na'ch wyajgake' lo Yaa Olívoza'. <sup>27</sup> Na' che' Jesúza' legake':

—Yog'le le' kwej yichjle nad'. La' Cho'a Xtill' Chioza' nan: "Wit' beena' chap xil'ka', na' guesles xil'ka' chape'." <sup>28</sup> Per kat' ba biban' ladj beŋ' wetka', na' yiyaa Galileana' lljalez' le'.

<sup>29</sup> Na' che' Pédrone'ne':

—La'kzi yog' beŋ'ki choonlall'gake' li', nad' bi gon' ka'.

<sup>30</sup> Na' che' Jesúza'ne':

—Dii li nia' li', ŋaanyel ka zi' kwell teza' de wchop shii, shon shii wi'o dill' nan bi nombi'o nad'.

<sup>31</sup> Na' zeyid Pédrone' chi'ene':

—La' guetlencia' li', biga inia' bi nombi'a li'.

Na' yog'zgake' che'gake'ne' ka'.

**Be'ļwill Jesúza' Chioza' gana' le Getsemaní**  
(Mt. 26:36-46; Lc. 22:39-46)

<sup>32</sup> Na' wyajgake' to latj gana' le Getsemaní, na' che' Jesúza' beŋ'ka' nakgake'ne' txen:

—Nizə li kwe' shlak llje'ļwill' Chioza'.

<sup>33</sup> Na' bchi'e Pédrone', Jacobona', na'ch Juanna', na' wzoloe' chakyeshile' na'ch chakchgaile' dii wal inleeb.

<sup>34</sup> Na' chi'e legake':

—Axt chaklikazid' lii guettia' daa le chakyeshii yichjllal'dawaani. Li igaan nizə na' bi guesle.

<sup>35</sup> Na' wzee zi lat' kwite'ka', na' bchek' xibe'na' lo yona' na' be'ļwille' Chioza' chi'ene' shi wak ten ka'zə daa wtile'. <sup>36</sup> Na' chi'e:

—Xadawaa, aga bi dii lallj cho' li' de. Bislagach nad' lawi dga ba zoa idil' illag'. Per aga gak ka cheenid', san gak ka cheenilo' li'.

<sup>37</sup> Na' biyaje' gana' lle'gake' na' ble'ile' ba chesgake'. Na' chi'e Pédrone':

—Simón, ¿Aba cheson'? ¿Abikzə bchejlat'gailo' la'ch' tgor bi gueso'? <sup>38</sup> Bi guesle, li we'ļwill Chioza' kwenche bi we'zle latj gon beli chenna' le' gan. Aga ki cheeni yichjllal'do'chona' gonchon per beli chenna' bi chizoin.

<sup>39</sup> Na' wyaje' sto shii jelwille' Chioza', na' toz ka golle'ne'. <sup>40</sup> Na' ka billine' gana' lle'gake', na' bizle'ile' chizesgake', la' jalawe'ka' bi chizoyin bishgala'. Na' bibi billegakile' ye'gake'ne'. <sup>41</sup> Na' ka billine' de wyon shii, chi'e legake':

—¿Ani cheskzle? Ba gok. Ba bllin gor nad', Beŋ' Bsel' Chioza' Yell-lioni, gak' lo na' beŋ' saaxyaka'. <sup>42</sup> Li chas. Li sho'. Ba za' beena' gone' nad' lo na'gake'.

**Bex'gake' Jesúza'**

(Mt. 26:47-56; Lc. 22:47-53; Jn. 18:2-11)

<sup>43</sup> Ni choe'te Jesúza' dill' ka bllin Juda', beena' wlen beŋ'ka' shllin, lene' beŋ' zan beŋ'ka' bsel' bxoza' chŋabia' len beŋ'ka' chli' chsedi leya' na'ch beŋ' golka' chŋabia', nox'gake' spad, na' no yag. <sup>44</sup> Na' Juda', beena' bene'ne' lo na' beŋ'ka', ba be'le' dill', chi'e:

—Beena' wnop', len' gox'le, na' wche'lene'.

<sup>45</sup> Na' ka bllingake', jabiguae lao Jesúza' na' chi'ene': —iMaestro!

Na'ch bnopene'. <sup>46</sup> Na' lii bex'tegake' Jesúza' bche'gake'ne'.

<sup>47</sup> Na' to beena' len na' wleje' spad che'na' bchogue' shlaa nag xmos bxo' choo bxo' xenna'. <sup>48</sup> Na' che' Jesúza' legake':

—¿Berache za'zle nox'le no spad no yag kwenche gox'le nad' ka to no beŋ' wban? <sup>49</sup> Yog' Ila wzoa' ladje' na' bli' bsedid' loo yoodo'na', na' biga bex'le nad'. Per chonan byen gak ka na Cho'a Xtill' Chioza'.

<sup>50</sup> Na' yog'loļ beŋ'ka' ben Jesúza' txen wchoonlall'gake'ne' na' bxonjgake'.

**Bi' xkwidaa bixonj**

<sup>51</sup> Na' to bi' xkwid' nob' [e' ndobb' to lech'. Na' ka bex'gake'b' <sup>52</sup> bsam' lechaa ndobb' na' bxonjb' gal'yidzb'.

**Bdegake' Jesúza' lao beṅ'ka' chṅabia' beṅ' Israelka'**  
(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Na' jwa'gake' Jesúza' lao bṅoz choo bṅoz xenna', na' bdi'a yog'loḷ bṅozka' chṅabia' na' beṅ' golka' chṅabia' na'ch beṅ'ka' chli' chsedi leya'. <sup>54</sup> Na' zit' zit'lə jano Pédróna'ne' bllintie' lesh' lill bṅoz choo bṅoz xenna'. Na' wche'lene' beṅ'ka' chap yoodo'na' chbillgake' cho'a yi'na'.

<sup>55</sup> Na' bṅozka' chṅabia' na' yog'loḷ beṅ'ka' chṅabia' beṅ' Israelka' lle' na' chiyiljyollgake' ga si' sengake' kwenṅhe wṅhoglogake' ṅhe Jesúza' guete', per bi bllel dii gao xya ṅhe'. <sup>56</sup> La'kzi beṅ' zan chiya de wxiye' che'gake' ṅhe', bi bidili cho'a dillaa choe'gake'. <sup>57</sup> Baḷgake' wzolla'gake' chziye'gake' na' chaogake' xya ṅhe', che'gake':

<sup>58</sup> —Neto' ba beninto' ne': "Nad' wṅhinj yoodo'ni dga ben beṅ' yell-lioki. Na' ka gak shon' lla yil'is ston na' aga beṅ' yell-lionichan gone'n."

<sup>59</sup> Na' la'kzi wxiye'gake', bi bidili cho'a xtilleeka'.

<sup>60</sup> Na' bṅoz choo bṅoz xenna' wzollee ladj beṅ'ka' na' chi'e Jesúza':

—¿Abikz bi ino' ṅheyi dga na beṅ'ki ṅho'?

<sup>61</sup> Na' Jesúza' wzie' lliz bibi gollkze'. Na' bṅoz choo bṅoz xenna' chizi'ene':

—¿Alin' Crístona', Xiiṅ Chioza'?

<sup>62</sup> Na' che' Jesúza'ne':

—Awe, nadaan. Na' ile'ile nad', Beṅ' Bsel' Chioza' Yell-lioni, chi'a de shli' ṅhe Chioza', beṅ' yel' wak choo beṅ' yel' wak xenna', na' lekzka' ile'ile' zizaa ladj bejka' ze xan yabana'.

<sup>63</sup> Na' bṅoz choo bṅoz xenna' bsho' bṅhez' xe'na' kwenṅhe chli'n nan [e chllée. Na' chi'e:

—Bich chyalljicho beṅ' gawe' xya ṅhe beeni. <sup>64</sup> Kwinle ba benile ka chṅie' ṅhe Chioza'. ¿Nakra gonchon?

Na' yog'loḷgake' bṅhoglogake' ṅhe' nan chiyaḷ guete'.

<sup>65</sup> Na' baḷgake' wzologake' chlla'gake'ne' xeneeka'. Na' bsejgake' jalawe'na' na'ch chgap' chball'gake'ne', na' che'gake'ne':

—Wnashki, non bet li'.

Na' beṅ'ka' chap yoodo'na' wdap'gake' xague'na'.

**Bi bṅheb Pédróna' shi nombi'e Jesúza'**  
(Mt. 26:69-75; Lc. 22:56-62; Jn. 18:15-18, 25-27)

<sup>66</sup> Na' Pédróna' zie' lesh' chyoon'a' de lli'lə ka bllin to noolə, beṅ' nak xmos bṅoz choo bṅoz xenna'. <sup>67</sup> Na' ka ble'ile' Pédróna' chbille' cho'a yi'na', na' wzie' chwie'ne' chi'e:

—Lenon' nako' txen Jesús, beṅ' Nazareta'.

<sup>68</sup> Na' bi bṅheb Pédróna', san chi'e:

—Bi nombi'a beena', ni bi ṅezid' bi dillaan choo.

Na' bicheje' na' jazie' cho'a leeja'. Na' wchell to tez.

<sup>69</sup> Na' ble'i noola'ne' sto shii, na' golle' beṅ'ka' sto:

—Beenin lene' beṅ'ka' nak Jesúza' txen.

<sup>70</sup> Na' sto shii bi bṅhebe' nake'ne' txen. Na' ka gok zi shloll, beṅ'ka' lle' na' gollgake'ne' sto shii:

—Dii li lenon' nako'ne' txen, la' nakbia' nako' beṅ' Galilea.

<sup>71</sup> Na' Pédróna' wzoloe' chone' zṅia, chi'e:

—Chioza' gone' yel' zi' ṅha' shi chziye'zan nia' bi nom-bi'ane'.

<sup>72</sup> Na' katena' lii wchellte teza' de wchop shii. Na' jadiní Pédróna' daa goll Jesúza'ne': "Ka zi' kwell teza' de wchop shii, na' gak shon' shii bi wṅhebo' shi nombi'o nad'." Na' wzoloe' chbelle'.

**Bdegake' Jesúza' lao Pilátóna'**

(Mt. 27:1-2, 11-14; Lc. 23:1-5; Jn. 18:28-38)

**15** Na' ka wyeeni' bidi'a bṅozka' chṅabia' len beṅ' golka' chṅabia', na' beṅ'ka' chli' chsedi leya' na'ch yog'loḷ beṅ'ka' chṅabia'gake' yell Israela'. Na' bṅhejgake' Jesúza' jwa'gake'ne' lao Pilátóna'. <sup>2</sup> Na' wṅabi Pilátóna'ne', chi'e:

—¿Alin' nako' beṅ' wṅabia' ṅhe beṅ' Israelka'?

Na' che' Jesúza'ne':

—Kan' ba wno'.

<sup>3</sup> Na' bṅozka' chṅabia' dii zan dii chaogake' xya ṅhe'. <sup>4</sup> Na' che' Pilátóna'ne' sto shii:

—¿Abibi inakzo'? Bwialat', dii zan dii chaogake' xya ṅho'.

<sup>5</sup> Na' bibi goll Jesúza'ne'. Na' bibani Pilátóna' daa bibi golle'ne'.

**Bṅhoglogake' guet Jesúza'**

(Mt. 27:15-31; Lc. 23:13-25; Jn. 18:38-19:16)

<sup>6</sup> Na' kat' chaḷ Inina', Pilátóna' chisane' to beṅ'ka' nseje' lillyana', beena' inab beṅ' yellka' wsane'. <sup>7</sup> To beṅ' le Barrabás die' lillyana' len beṅ'ka' benlene' xyana' daa bṅegake' wdila'. <sup>8</sup> Na' bdi'a bllag beṅ' yellka', na' che'gake' Pilátóna' gone' ka chonkze' yog' yiz. <sup>9</sup> Na' che' Pilátóna' [egake':

—¿Acheenile yisan' beṅ' wṅabia' ṅheleni, le' nakle beṅ' Israel?

<sup>10</sup> La' chakbe'ile' nan bṅozka' chṅabia' daa chakxe'zgakile'nen' jwa'gake'ne' lawe'na'. <sup>11</sup> Na' bṅozka' chṅabia' bta bṅegake' beṅ'ka' lle' na' kwenṅhe inab-gake' yisane' Barrabáza'. <sup>12</sup> Na' che' Pilátóna' [egake':

—Na' bera cheenile' gonid' beena' nale nake' beṅ' wṅabia' ṅhele, le' beṅ' Israel.

<sup>13</sup> Na' besyaagake' che'gake':

—jBdee [ee yag cruza'!

<sup>14</sup> Na' che' Pilátóna' [egake':

—¿Bera dii malan' bene'?

Na' zizikli besyaagake' che'gake':

—jBdee [ee yag cruza'!

<sup>15</sup> Na' daa goklall' Pilátóna' yigaane' wen lao beṅ'ka' lle' na', bisane' Barrabáza'. Na' bene' mandad wit ṅhin-gake' Jesúza', na'tech bene'ne' lo na' beṅ'ka' wda'gake'ne' [ee yag cruza'.

<sup>16</sup> Na' b̄che' soldadka' Jesúza' lesh' chyooná' gana' chon Pilátóna' yel' jos̄chisa', na' bití'a bishaggake' yog' soldadka' lle' na'. <sup>17</sup> Na' bwakwgake'ne' to lech' x̄na, na' bengake' to b̄xoón de xis yesh' na' bllingake'n yich-je'na' ka to corona. <sup>18</sup> Na' wzologake' chosyaagake' na-gake':

—¡Soashga beñ' w̄nabia' che beñ' Israelka' mbalaz!

<sup>19</sup> Na' wdingake' xisa' yichje'na', na' bllaa x̄eneeka' le', na' b̄chek' xibe'ka' lawe'na' bengake' ka beñ' chgwee balaan̄. <sup>20</sup> Ka biyoll btitjgake'ne', bikwasgake' lech' x̄nana' daa b̄xoagake' kolleena' na' biwakwgake'ne' xe'na'kzə. Na' wlejpgake'ne' kwenche l̄jada'gake'ne' lee yag cruza'.

### Bda'gake' Jesúza' lee yag cruza'

(Mt. 27:32-44; Lc. 23:26-43; Jn. 19:17-27)

<sup>21</sup> To beñ' yell Cirene lie' Simón, x̄a Alejándrona' na' Rúfona', zizee lyixaa. Na' ka billague' legake', bengake' byen bi'e yag cruz che Jesúza'.

<sup>22</sup> Na' b̄che'gake' Jesúza' latja' le Gólgota, na' zejín: Latj che l̄lit yichj beñ' wet. <sup>23</sup> Na' bshabgake'ne' vino daa n̄chixə mírrana', per bi weeje'n. <sup>24</sup> Na' bda'gake'ne' lee yag cruza'. Na' soldadka' bengake' to wyitj kwenche yilaagake' xe'na' na' ikaagake' daa yido! to togake'.

<sup>25</sup> Na' chida ga kana' bda'gake'ne' lee yag cruza'.

<sup>26</sup> Na' yichj yag cruz che'na' bda'gake' to dii cho'en dill' bīche nda'gake'ne' lee yag cruza', nan: "Beenin beñ' w̄nabia' che beñ' Israelka'." <sup>27</sup> Na' bda'lengake'ne' chop beñ' wban, toe' wda' kwite' de sh̄l̄ina', na' stoe' kwite' de robesá'. <sup>28</sup> Na' billinin ka na Cho'a Xtill' Chioza' daa nan: "Ble'gakilene' ka to beñ' mal."

<sup>29</sup> Na' beñ'ka' chde na', ch̄nelegakile'ne', na' chta yichje'ka' che'gake':

—¡Lin' w̄nazo' yichinjo' yoodo'na' na' lo shon̄ llazə yiyono'n, <sup>30</sup> bislashki kwino' na' biyetj lee yag cruza'!

<sup>31</sup> Na' lekzka' chon b̄xozka' ch̄nabia' len beñ'ka' chli' chsedi leya', ch̄nelegakile'ne', che'gake':

—Beñ' yoblə gok bisle', na' bi chak yisla kwine'. <sup>32</sup> Shi leile' len' Crístona', beñ' w̄nabia' chechona', cho' beñ' Israel, yiyetjshkile' lee yag cruza' naa kwenche ile'tei-cho na' shajle'cho che'.

Na' axt len beñ'ka' da'lene' lee yag cruza' ch̄nelegakile'ne'.

### Ka wit Jesúza'

(Mt. 27:45-56; Lc. 23:44-49; Jn. 19:28-30)

<sup>33</sup> Ka bllin gobill, doxen yell-liona' bīchol, bllinte chida shon̄. <sup>34</sup> Na' chida shon̄ besyaa Jesúza' zillj, chi'e:

—Eloí, Eloí, ¿lama sabactani? † —na' zejín: Chios cha', Chios cha', ¿bīche ba wlej yichjzo' nad'?

<sup>35</sup> Na' ba! beñ'ka' lle' na' bengakile' daa wne' na' che'gake':

—Li wzenag, ba chaxe' Elíaza'.

<sup>36</sup> Na' zejdo toe' na' b̄leeje' to dii chzi' nisa' gana' yolla' vino daa zichj zla' na' bzoe'n to lo xis kwenche bzoe'n cho'ena' x̄ope'n, na' chi'e:

—Jwayishkile'na', wwiashkicho shi wid Elíaza' yil̄et-je'ne'.

<sup>37</sup> Na' besyaadia Jesúza', na'ch wite'. <sup>38</sup> Na' ka wite', lechaa ze loo yoodo'na' bcheza'n gokan choplə. <sup>39</sup> Na' beena' ch̄nabia' soldadka' zie' lao Jesúza', ka benile' besyee na' ble'ile' ka gok wite', na' chi'e:

—Dii li beenin Xiñ Chioza'.

<sup>40</sup> Lekzka' zi ba! noolka' lle'gake' de zit'lə chwiagake'. Na' ladje'ka' len María beñ' Magdálana', na' Saloména', na'ch María, beena' nak x̄na' Joséna' len Jacóbona', beñ' neshaa. <sup>41</sup> Noolkin wnogake' Jesúza' na' goklen-gake'ne' kana' zoe' gana' mbani Galileana'. Na' lekzka' len zanch noolka' beñ'ka' wyajlengake'ne' Jerusaléna'.

### Bkwash'gake' Jesúza'

(Mt. 27:57-61; Lc. 23:50-56; Jn. 19:38-42)

<sup>42</sup> Na' llana' gok ka' nakan llana' chsini'a beñ' Israelka' che llana' chombaangake'. Na' ka go! <sup>43</sup> bllin José beñ' Arimatéana', beena' nak txen beñ'ka' ch̄nabia' beñ' Israelka', na' lene' none' lez beena' wsel' Chioza' in̄abi'e. Na' biyaxjile' wyaje' lao Pilátóna' janabe' lsens yil̄etje' kwerp che Jesúza'. <sup>44</sup> Na' bibani Pilátóna' daa ba wite'. Na' goxe' beena' ch̄nabia' soldadka' kwenche in̄abi-lene' shi dii l̄ikzan ba witen'. <sup>45</sup> Na' ka che' beena' ch̄nabia' soldadka' ba wite' na' wxenlallee, na' bi'e lsens bīletj Joséna' kwerp che'na'. <sup>46</sup> Na' wxi' Joséna' to lech' de lino na' bīletje' kwerp che Jesúza' na' bitobe'ne' lechaa. Na' jlo'ene' to loo blej, na' bisejile'n to yaj xen. <sup>47</sup> Na' María beñ' yell Magdálana', na' María, x̄na' Joséna', chwiayen'gake' gana' jlo'ene'.

### Biban Jesúza' ladj beñ' wetka'

(Mt. 28:1-10; Lc. 24:1-12; Jn. 20:1-10)

**16** Na' ka wde lla sabda', llana' chombaang beñ' Israelka', María beñ' Magdálana' len Saloména', na'ch María, x̄na' Jacóbona', wxi'gake' diika' chla' zix̄ kwenche wlla'gake'n kwerp che Jesúza'. <sup>2</sup> Na' lla nech che x̄manna', shinzə chla' wbilldo'na', wyajgake' cho'a ba che'na'. <sup>3</sup> Na' ka zejgake' che' l̄jwellgake':

—¿Nora gaklen cho' wkwase' yaja' daa chi' cho'a ba che'na', lla?

<sup>4</sup> Per ka bllingake', ble'gakile' bich chi' yaj xenna' cho'a bana'. <sup>5</sup> Na' ka wyoogake' loo bana', ble'gakile' chi' to beñ' xkwid' de sh̄li che bana' nakwe' to lech' lly-ish dii ton̄. Na' le blleb noolka'. <sup>6</sup> Na' chi'e legake':

—Bi illeble. Le' chiyilje Jesús, beñ' Nazareta', beena' bda'gake' lee yag cruza'. Ba biban beena', bich zoe' ni. Li wwiakachi gana' wdixjgake'ne'. <sup>7</sup> Li yiyaj lao beñ'ka' nakgake'ne' txen na' len lao Pédróna', na' li l̄jayell-gake': "Ba ziyaje' zjaleze' le' Galileana', na' na' yile'ile'ne' sto shii, kon ka wne' le'."

<sup>8</sup> Na'ch bichej noolka' loo bana' ziyajdogake' axt chx-iztitgake' daa le chillebgake'. Na' kono bi gollgake' daa le bllebgake'.

**Bli'lao Jesúza' María beṅ' yell Magdálana'**

(Jn. 20:11-18)

<sup>9</sup> Na' ka biban Jesúza' ladj beṅ' wetka' lla nech che xmanna' shzildo', zigaate bli'lawe' María beṅ' yell Magdálana', beena' bibej Jesúza' gall dii xiw'ka'. <sup>10</sup> Na' Maríana' wyaje' lao beṅ'ka' wdalen Jesúza' txen. Na' ka blline' lawe'ka' le chakyesh'gakile' na' chbellgake', na' golle' legake' ba biban Jesúza'. <sup>11</sup> Na' ka beni beṅ'ki mban Jesúza' na' ba ble'teyi Maríana'ne', bi wya-jle'gake'.

**Bli'lao Jesúza' chop beṅ'ka' nakgake'ne' txen**

(Lc. 24:13-35)

<sup>12</sup> Ka biyoll gok ka', chop beṅ'ka' nak Jesúza' txen ngoogake' nez zejgake' lyixaa, na' bli'lawe' legake' na' nake' nlla'lə. <sup>13</sup> Na' biyajgake' gana' lle' beṅ'ka' sto, jayellgake' legake' ba ble'gakile'ne', na' ni chegake' bi wyajle'gake'.

**Jesúza' golle' beṅ'ka' nakgake'ne' txen we'gake' xtilleena' doxen lo yell-lioni**

(Mt. 28:16-20; Lc. 24:36-49; Jn. 20:19-23)

<sup>14</sup> Na' wdetech, bli'lao Jesúza' beṅ'ka' shnej shlak chi'gake' chaogake'. Na' bsheshlene' legake' daa bi

chajle'gake' na' daa nakgake' lall'do' chech, la' bi wya-jle'gake' che beṅ'ka' ble'gakile'ne' ka wde bibane'.

<sup>15</sup> Na' chi'e legake':

—Li shaj doxen yell-lioni, li lljtixje'i yog'loḷ beṅ' dill' wen dill' kob cha'na'. <sup>16</sup> Beena' shajle' na' choe' nisa', gat' yel' mban che' zejli kaṅi, san beena' bi shajle', chogbi'a kwiayee. <sup>17</sup> Na' diikin gon beṅ'ka' nonlilall' nad': wchingake' lia'na' yibejgake' dii xiwaa yoo beṅ'; na' inegake' dill' kob dii bi nombia'gake'; <sup>18</sup> na' shi gonzin gox'gake' no beḷ wa yeejgake' dii nak yierb, aga bi gaggakile'. Na' lekzka' wxoa neeka' yichj beṅ' we'ka' na' yiyakgake'.

**Biyep Jesúza' yabana'**

(Lc. 24:50-53)

<sup>19</sup> Ka biyoll bshaljlene' legake', Xancho Jesúza' biyep'e yabana' na' jachi'e kwit Chioza' shlaa de shlina'. <sup>20</sup> Na' beṅ'ka' nakgake'ne' txen wyajgake' doxen jtixje'gake' cho'a xtilleena' na' Xancho Jesúza' goklene' legake' bengake' yel' wakka' kwenche wyajle' beṅ' dillaa be'gake' nakan dii li.

# San Lucas

## Dga bzej Lúcaza' na' bseleen lao Teófilona'

1 Ben' zan ba goklall'gake' wzejgake' to to diika' ba gok ladjnto'ni<sup>2</sup> kon ka wna ben'ka' bli' bsemi neto', ben'ka' ble'gakile' daa gok dezd nech na' gok lo na'gake' be'gake'n dill'.<sup>3</sup> Na' ka'kz nad', ba wñabyoll' nakyen'an gok dezd nech. Na' chakid' nakan wen wzej' li', Teófilo, kon ka gok to to diiki,<sup>4</sup> kwenche inezilo' daa ba bli' bsemi'gake' li' nakan dowalj dii li.

## Wdixjee anjla' galj Juanna'

<sup>5</sup> Kana' chñabia' rey Heródeza' gana' mbani Judeana' wzoa to ben' wlie' Zacarías, goke' toz bñozka' nonlen dii Abíaza'. Na' xooole', Elizabeta', lekzka' goke' xiin dia che dii bñoz Aarónna'.<sup>6</sup> Na' çhop xooltie' chongake' wen lao Chioza', na' chongake' yog'lo'lte daa nllie' bia'.<sup>7</sup> Na' aga no xiingake' wzoa daa nak Elizabeta' nool will; na' ba naktegake' ben' gol.

<sup>8</sup> Na' to shii ka bidol' bñozka' nak Zacaríaza' txen gongake' xshin Chioza' daa nak lo na'gake',<sup>9</sup> bengake' to wyitj, ka yoologake' chongake', kwenche got'bia' noe' yidol' llijlo' llen yala' loo lill xlatj Xancho Chioza'. Na' bidol' Zacaríaza' gone'n.<sup>10</sup> Na' shlak chgwee llen yala' loo yoodo'na', ben' zan bgaan chyoole' choe'llwill-gake' Chioza'.<sup>11</sup> Na' bli'lao to anj che Xancho Chioza' Zacaríaza', na' anjla' zie' shlaa de shlina' gana' chzey-gake' yala'.<sup>12</sup> Ka ble'i Zacaríaza' anjla', bikzə bi billet-lallee gone' daa le bllibe'.<sup>13</sup> Na' anjla' chi'ene':

—Bi illebo' Zacarías, la' Chioza' ba bzenague' daa chñabilo'ne', na' xoolo' Elizabeta' sane' to xiino' na' wsi'ob' Juan.<sup>14</sup> Na' yibachgailo' kat' galjb', na' lekzka' ben' zan yibayi,<sup>15</sup> la' xiino'na' gakb' to ben' zakii lao Chioza'. Bi chiyal' wnixb' vino wa bichlə dii gonan ka sollib', na' Espíritu Sántona' soloe' inabi'e yichjlall'do'baa ka zi' galjəb'.<sup>16</sup> Na' yigoob' ben' zan xiin dia che Israela' lo xnez Chioza', beena' nak Xan-gake'.<sup>17</sup> Na' kwialob' lao Xanchona', na' soalen Espíritu che Chioza' le' ka wzoalene' Elíaza', na' gapb' ye'l' wak ka daa wdape'. Na' ye'b' ben'ka' bi zoalen xiine'ka' wen, yizoagake' mbalaz. Na' gom' ka wzenag ben'ka' bi cheeni wzenaggake' dill' sin' che ben'ka' zej shji lao Chioza'. Na' diikin gom' kwenche kat' za' Xanchona' na' gonjilall'gake'ne'.

<sup>18</sup> Na'ch che' Zacaríaza' anjla':

—¿Nakra gak inezid' shi lekzilo'n?, la' ba nak' ben' gol na' lekzka' nool cha'na'.

<sup>19</sup> Na'ch che' anjla'ne':

—Nadaan anj Gabriela', na' chon' xshin Chioza', na' kwine' bselee nad' kwenche zaa zidnia' li' dill' wenni.<sup>20</sup> Na' daa bi wyajli'o daa wnia' li', idap shi'ona'. Bich gak inio' axt kat'ch illin lla gak yog' dga ba wnia' li'.

<sup>21</sup> Na' ben'ka' lle' chyoole' chbezgake' yichej Zacaríaza', goklejjgakile' daa wllaile' loo yoodo'na'.

<sup>22</sup> Na' ka bicheje' bich chak inie', senzə chone', na' gokbe'gakile' nan nochodan' bli'lao le' loo yoodo'na'.

<sup>23</sup> Na' ka biyoll' ben' Zacaríaza' daa lla bia' gone' yoodo'na', na'ch biyaje' lille'na'.<sup>24</sup> Na' ka wde gok diiki, na' bia' xooole', Elizabeta'. Na' lao gay' beo' bichkzə ga bcheje', na' wne':<sup>25</sup> "Xancho Chioza' ba goklene' nad' kwenche bich sia' ye'l' zto' lao ben'."

## Wdixjee anjla' galj Jesúza'

<sup>26</sup> Na' ka gok xop beo' noa' Elizabeta', bse'l' Chioza' anjla' le Gabriel yella' le Nazaret daa lla gana' mbani Galileana',<sup>27</sup> gana' zoa to nool wew' lie' María. Na' Maríana' ba nakan wshagna'lene' to ben' le José, na' Joséna' nake' xiin dia che dii rey Davina'.<sup>28</sup> Na' wyoo anjla' gana' zoa Maríana' na' chi'ene':

—iChwap' li' chiox, nool, ben' ba goklen Chioza' kwenche gak dii wen cho'! Xanchona' zoalene' li', na' ba benleeyche' li' aga ka yog'lo'lte nool.

<sup>29</sup> Na' Maríana' bibanile' daa golle'ne' ka', na' gokile' beraçhe naz beeni nad' ka'.<sup>30</sup> Na' che' anjla' le':

—Bi illebo' María, la' Chioza' ba wleje' li' kwenche gone' to dii wen cho'.<sup>31</sup> Na' naa woo to bdo' na' kat' galjb' na' wsi'ob' Jesús.<sup>32</sup> Na' gakb' to ben' zakii na' ye'gake'b' Xiin Chios, beena' nak liizelozi ben' choo ben' xen. Na' Xancho Chioza' gone'b' to ben' wñabia' ka dii xozxto'b' Davina'<sup>33</sup> kwenche toshiizi inabiab' le' ben' Israel, le' nakle xiin dia che dii Jacoba', na' ye'l' wñabia' che'baa bi yiyoll' yidon.

<sup>34</sup> Na'ch wñabi Maríana' anjla', chi'ene':

—¿Nakra gakz wa', lla?, la' aga no ben' byo zoalen'.

<sup>35</sup> Na'ch che' anjla' le':

—Espíritu Sántona' yidsoalene' li', na' ye'l' wak che Chioza', beena' nak liizelozi ben' choo ben' xen, soalenan li'. Na' bi'do'na' galj gakb' lall' na' Chioza' na' ye'gake'b' Xiin Chios.<sup>36</sup> Lekzka' dialla cho' Elizabeta' ba no'e, la'kzi ba nake' ben' gol. Na' la'kzi chaki ben' nake' nool will, ba gok xop beo' no'e.<sup>37</sup> Aga bi de dii bi chak gon Chioza'.

<sup>38</sup> Na'ch che' Maríana' anjla':

—Xmos Xancho Chiozan' nak', na' wak gone' cha' kon ka ba wno'.

Na' biza' anjla' gana' zoa Maríana'.

## Jawia Maríana' Elizabeta'

<sup>39</sup> Na' lli wza'te Maríana' wyaje' to yell dii lliá yaa yao che Judeana'. <sup>40</sup> Na' blline' lill Zacaríaza' na' bwape' Elizabeta' chiox'. <sup>41</sup> Na' ka bwap Maríana' le' chiox, gokbe'i Elizabeta' bxit' bdo'na' loo li'ena'. Na' wzolo wñabia' Espíritu Sántona' loo yichjall'do'ena', <sup>42</sup> na' wñie' zillj, chi'ene':

—Chioza' ba benleeyche' li' ladj yog'loj nool, na' lekz-ka' bdo' cho'na'. <sup>43</sup> zNora nak' nad' zidwia'zə xñá' Xan'na' nad', lla? <sup>44</sup> La' kon ka bwapo' nad' chiox, lli bxit'te bdo' cha'ni loo li'ani daa chibaib'. <sup>45</sup> Chakomba li' wyajli'o ka wna anjla', la' yog' daa wna Xanchona', aga wde bi gakan.

<sup>46</sup> Na'ch wna Maríana':

Do yichj do lallaa choe'lawaa Xancho Chioza'.

<sup>47</sup> Chibayi yichjall'dawaani lao Chioza', beena' chisla nad'.

<sup>48</sup> Ba biyesh'lallile' nad' nak' xmose',

ñaa solo yog' beñ' in'e' nad': "Chakomba li'."

<sup>49</sup> La' Chioza', beena' nap yel' wak choo yel' wak xen, ba bene' dii wen inleeb cha'.

Nake' liizelozi beñ' li beñ' shao',

<sup>50</sup> na' chiyesh'lallile' yog'te beñ'ka' chall chleeb-gake'ne'.

<sup>51</sup> Dii zakii nleeb ba benlene' yel' wak che'na'.

Ba bchinj bselle' yog'loj daa nan gon beñ'ka' chep cha'lall'.

<sup>52</sup> Ba bikwase' yel' wñabia' che beñ' wñabia'ka', na' beñ'ka' ble'gakile' nakzi, Chioza' ba bene' legake' beñ' zakii.

<sup>53</sup> Na' beñ'ka' chbił chdon, ba bzesh bzeljile' legake' kon dii wen dii shao' che'na', na' bilague' beñ' wni'aka' to ka cha'gake'.

<sup>54</sup> Ba goklene' cho' beñ' Israel, cho' nakcho xmose', na' toshiizi chiyesh'lallile' cho',

<sup>55</sup> kon ka bchebe' gone' che dii xozxto'cho Abrahamama' na' yog' beñ' zizaak lo dia che'na'.

<sup>56</sup> Na' Maríana' bgaane' ka do shon beo' lill Elizabeta', na'ch bizee ziyaje' lille'na'.

## Golj Juanna'

<sup>57</sup> Na' ka bllin lla wxan Elizabeta', wxane' to bi' byodo'. <sup>58</sup> Na'ch ka wñezi beñ' wlill che'ka' na' beñ' dialla che'ka', wyajgake' bibalengakile'ne' daa ba biyeshii Xancho Chioza' le'. <sup>59</sup> Na' ka gokib' to xman, jloogake'b' señ daa ne' circuncisión, na' goklall'gake' wsi'gake'b' Zacarías ka le xabaa. <sup>60</sup> Na' che' xña'baa:

—Bi gakan! Juanan chiyał' wsi'nto'b'.

<sup>61</sup> Na' gollgake'ne':

—zBiçe wsi'zo'b' ka? La' aga no dialla cho' le ka'.

<sup>62</sup> Na'ch bengake' señ kwenche wñabgakile' xabaa bi cheenile' wsi'e' bdo'na'. <sup>63</sup> Na'ch wñabe' to yagla'do' kwenche bzeje'n, na' daa bzeje' nan: "Juanan wsi'nto'b'." Na' yog' beñ'ka' bibani. <sup>64</sup> Na' lli gokte bine Zacaríaza', na'ch wzoloe' choe'lawee Chioza'. <sup>65</sup> Na' beñ' wlill che'ka' bllebgake' ka nak daa gok, na' yog'

yellka' lle' ladj yaa yao che Judeana' wze dill' ka gok.

<sup>66</sup> Na' yog' beñ'ka' beni ka gok, gokgakile':

—zNoran gak bi'do'ni, lla?

Wnagake' ka', la' nakbia' zoalen Xancho Chioza' leb'.

## Daa wna Zacaríaza'

<sup>67</sup> Na' Espíritu Sántona' wñabi'e' yichjall'do' xab' Zacaríaza' na' bi'e' cho'a xtill' Chioza', wne':

<sup>68</sup> Choe'lawaa Xanchona', beena' nak Chios checho, cho' beñ' Israel,

la' ba bide' ladjchoni, cho' nakcho beñ' yell che', kwenche yisle' cho' lawi dii mala'.

<sup>69</sup> Na' ba bselee to beñ' nap yel' wak xen yisle' cho', na' zee lo dia che dii Davina', beena' gok xmose'.

<sup>70</sup> Ba chak ka bchebe' gone' kani'yi daa golle' dii beñ'ka' wdixjee cho'a xtilleena', beñ'ka' gok lall' nee.

<sup>71</sup> Bchebe' yisle' cho' lao beñ'ka' bi chle'shii cho', na' lao yog' beñ'ka' chakzi' chakzbani cho'.

<sup>72</sup> Na' golle' dii xozxto'choka' yiyeshile' legake', na' bi gal-lallee ka nak diika' bchebe' gone'.

<sup>73</sup> Ki nak daa bcheb Chioza' gone' che dii xozxto'cho Abrahamama':

<sup>74</sup> Bchebe' yisle' cho' lao beñ'ka' bi chle'shii cho' kwenche we'la'ochone' na' bibi wwall wsheban cho',

<sup>75</sup> na' gon kwinocho lall' nee na' goncho ka yiyoolallile' shlak mbancho.

<sup>76</sup> Na'ch Zacaríaza' chi'e' bdo' che'na':

Na' li', xiindawaa, ina beñ' li' beñ' chiyixjee daa na Chioza', beena' nak liizelozi beñ' choo beñ' xen.

Na' kwialozego' lao Xanchona' kwenche wzenaggake' che' kat' zee.

<sup>77</sup> Wzenilo' beñ' wlall chechoka' daa chiyał' gongake' kwenche yizi'xen Chioza' saaxya che'ka' na' yisle' legake' bi tegake' lo yel' zak'zi'na'.

<sup>78</sup> La' Chios chechona' chakile' cho' na' chiyesh'lallile' cho',

na' wselee to beñ' za' yabana' nsee to beeni' che yichjall'do' beñ' yell-lioni

<sup>79</sup> kwenche sho' beeni'na' loo yichjall'do' beñ'ka' chda gani nak shgasj shchoł' ni che dii mala' daa nsa' yel' wit,

na' wliile' cho' nez li che'na' na' soacho mbalaz.

<sup>80</sup> Shlak bgol Juanna', ben Chioza'ne' beñ' wal. Na' wzoe' to latj gana' bibi chashj chleb axt ka bllin lla wzoloe' be'lene' beñ' Israelka' cho'a xtill' Chioza'.

## Golj Jesúza'

(Mt. 1:18-25)

**2** Kana' chñabia' César Augústona', bene' byen ibab bał beñ' lle' to to yell doxen yell-liona' gana' chñabi'e'. <sup>2</sup> Na' ka wbabgake' dii nech, beena' le Cirenio nake' gobernador che Síriana'. <sup>3</sup> Na' benan byen biyaj yog' beñ' yell che chegake' kwenche jada' lie'ka'. <sup>4</sup> Na' daa nak Joséna' xiñ dia che dii Davina', bizee yell Nazareta' daa lliá gana' mbani Galileana', na' biyaje' yell Belénna' gana' golj dii Davina', daa lliá gana' mbani Judeana'. <sup>5</sup> Na' kwenche ibabgake' biyaje' yell Belénna' len Maríana', beena' ba nakan ikee. Na'

Maríana' ba no'e. <sup>6</sup> Na' shlak zoagake' Belénna', bllin lla sane'. <sup>7</sup> Na' wxane' to bi' byodo' nakb' bi' nech, na' btobe'b' lechaa na' wdixje'b' gana' chao bayix'ka', la' bich bi latj bllel gana' chigaan beñ'.

### Jtixje'i anjla' beñ'ka' chap xil'ka' ba golj Jesúza'

<sup>8</sup> Na' lle'na' goljb', gaozə yell Belénna' lle' xonj beñ' chapgake' xil' che'ka'. <sup>9</sup> Na' gokxe to anjl che Xancho Chioza', na' yel' chey cheeni' che Xanchona' bzeeni'n gana' lle'gake', na' le bllebgake'. <sup>10</sup> Na' che' anjla' le-gake':

—Bi illeble, la' zidtxje'id' le' dill' wen dill' koba' daa gonan ka yibachgayi yog' beñ'. <sup>11</sup> La' naa yell che dii Davina' ba golj beena' yisla le' lao dii mala'. Na' len' Xancho Crístona', beena' chbezle wsel' Chioza'. <sup>12</sup> Na' kwenche yillelileb', ki nak gana' deb': deb' gana' chao bayix'ka' na' ndobb' lech'.

<sup>13</sup> Na' ka biyoll goll anjla' ka', lii bllinte anjl zanch kwite'na', na' choe'la'ogake' Chioza', nagake':

<sup>14</sup> iWe'la'ocho Chioza' zoa yabana'!

Mbalaz beñ'ka' zoa yell-lioni, beñ'ka' ba bli'yi Chioza' yel' goklen che'na'.

<sup>15</sup> Na' ka biza' anjlka' ziyajgake' yabana', na'ch che' ljjwell beñ'ka' chap xil'ka':

—Li yidoshki Belénna', li sho' diwiaszki daa ba gok, daa ba wdixje'i anjl che Xanchona' cho'.

<sup>16</sup> Na'ch ziyajdogake' Belénna' na' bllingake' gana' zoa Maríana' len Joséna', na' bdo'na' deb' gana' chao bayix'ka'. <sup>17</sup> Na' ka biyoll ble'gakile'b', na' be'gake' dill' lao beñ' wlall che'ka' daa goll anjla' legake' che bdo'na'. <sup>18</sup> Na' yog' beñ'ka' beni ka wna wap xil'ka' bibangakile' ka dillaa be'gake'. <sup>19</sup> Na' Maríana' kon ka biyoll bzenague' dill'ka' na' bgaanan loo yichjlall'do'ena', na' gokile' bera zejın dga. <sup>20</sup> Na'ch ziyaj wap xil'ka' choe'la'ogake' Chioza' daa ba ben ble'gakile' yog' daa goll anjla' legake'.

### Jwa'gake' Jesúza' yoodo'na'

<sup>21</sup> Na' ka gokib' to xman, wloogake'b' señ daa le circuncisión, na' bsi'gake'b' Jesús kon ka goll anjla' Maríana' kana' zi' weeb'.

<sup>22</sup> Na' kon ka na ley che dii Moiséza' gongake', wlez-gake' ka bzaa llaka' bixi biyech Maríana' len bdo' che'na', na'ch wyajlengake'b' Jerusalénna' kwenche jengake'b' lo na' Xancho Chioza'. <sup>23</sup> Bengake' ka', la' ley che Xanchona' nan: "Bi' byo nech che yog'loj beñ', chiyal' gongake'b' lo na' Chioza'." <sup>24</sup> Na' jaake' je'la'ogake' Xancho Chioza' jengake' ka na leya' daa nan chiyal' witgake' chop ngolbex wa chop palom.

<sup>25</sup> Na' kana' jwa'gake' Jesúza' yoodo'na', zoa to beñ' le Simeón Jerusalénna'. Nake' to beñ'chon dii wen dii shao' na' choe'lawee Chioza', na' chbeze' batan wsel' Chioza' beena' gaklene' beñ' Israelka'. Na' zoolen Espíritu Santo che Chioza' le'. <sup>26</sup> Na' Espíritu Sántona' ba bzenile'ne' nan aga wete' shi biñ' ile'ile' Crístona', beena' chbezgake' wsel' Xancho Chioza' kwenche inabi'e. <sup>27</sup> Na' Espíritu Sántona'kz bseleene' yoodo'na',

na' na' zie' ka bllinlen xaxna' Jesúza' le'b' kwenche gongakile'b' ka na leya'. <sup>28</sup> Na'ch blen Simeónna' le'b' na' be'lawee Chioza', chi'e:

<sup>29</sup> Chios cha', be' latj guet' mbalaz naa,

la' ba beno' daa bchebo' gono' cha', nad' nak' xmoso'.

<sup>30</sup> La' ba ble'id' beena' yisla neto',

<sup>31</sup> beena' ba bseloo lao yog'loj beñ' yell-lioki.

<sup>32</sup> Len' kwee beeni'na' loo yichjlall'do' beñ'ka' bi nakgake' beñ' Israel.

Na' gone' ka neto' beñ' Israel sho'nto' balaan, neto' naknto' yell cho'.

<sup>33</sup> Na'ch Joséna' len xna'ba bibangakile' ka nak daa wna Simeónna' cheb'. <sup>34</sup> Na'ch wñabi Simeónna' Chioza' gaklene' legake', na' chi'e Maríana', xna' Jesúza':

—Ba nchogbi'a Chioza' che bi'do'ni gom' kwenche zan beñ' Israelka' kwiayi'gake' na' lekzka' zane' yila. Na' wliib' beñ' ka nak yel' wak che Chioza', na' beñ' zan inegake' zban cheb' na' bi shajle'gake' cheb', <sup>35</sup> na'ch gak-bia' ka chza'lall' beñ' loo yichjlall'do'eka'. Na' ka nako' li', loo yichjlall'do'na' gakan ka'kzə ga chaz to spad ka ile'ilo' daa illaglob'.

<sup>36</sup> Na' lekzka' yoodo'na' zoa to nool goldo', beñ' chyix-jee daa che' Chioza'ne', na' lie' Ana. Nake' xiñ dii Fanuela' na' xiñ dia che dii Asera'. Beñ' xkwid'ze' bshagnee, na' gall yizchga wzoalene' beñ' che'na' ka wite'. <sup>37</sup> Nake' noolə wizeb na' ba gokile' taplalj tap yiz. Na' toshiizi zoe' yoodo'na', na' ka wal' ka tella zoe' choe'lawee Chioza', na' tlizi chzoe' wbas' na' choe'lwille'ne'. <sup>38</sup> Na' lekzka' wbiguee kwite'ka' na' bi'e Chioza' yel' choxken daa ba bselee beena' gaklene' beñ' Israelka'. Na' bi'e dill' che Jesúza' lao beñ' Jerusalénka', beñ'ka' chbez wsel' Chioza' beena' yisla legake' lao dii mala'.

### Biyajgake' Nazareta'

<sup>39</sup> Na' ka biyoll bengake' yog' daa nllia ley che Xancho Chioza' bia', na'ch biyajgake' lalle'ka' daa le Nazaret daa lliia gana' mbani Galileana'. <sup>40</sup> Na' Jesúza' bgolb' na' zejch gokb' bi' wal na' bi' sin', na' le goklen Chioza' le'b'.

### Jesúza' jashaljlem' beñ' sin'ka' yoodo'na'

<sup>41</sup> Xaxna' Jesúza' chajgake' Jerusalénna' yog' yiz kat' chal' Inj Paskwa'. <sup>42</sup> Na' ka goki Jesúza' shllin yiz, wyajlengake'b' Injina' kon ka yoologake'. <sup>43</sup> Na' ka wde Injina' biza' xaxna'baa, na' bi gokbe'gakile' bigaan Jesúza' Jerusalénna'. <sup>44</sup> Gokgakile' do ladj beñ'ka' ziyajlengake' zilem', na' kon bigootezgake' nez do lla. Na' ka biyilj-gake'b' ladj beñ' dialla che'ka' na' beñ'ka' nombia'gake' <sup>45</sup> aga billelgakile'b'. Na' bibiigake' jadjiljgake'b' Jerusalénna'.

<sup>46</sup> Na' ka gok shonə lla billelgakile'b' yoodo'na', chi'b' ladj beñ'ka' chli' chsedi leya' chzenagb' xtilleeka' na' chñabib' legake' che daa choe'gake' dill'. <sup>47</sup> Na' yog' beñ'ka' chzenag xtil'baa chibangakile' yel' chajni' che'baa na' ka chilliib' xtil' beñ'ka' chli' chsedi leya'.



<sup>48</sup> Na' ka ble'i xaxna'baab' bibangakile'. Na'ch che' xna'baa:  
—Xiindawaa, ¿biçhe benzilo' neto' ka'? Xo'ni na' nad' ba gokshejlall'chgainto' biyiljnto' li'.

<sup>49</sup> Na'ch che' Jesúza' legake':  
—¿Biçhe chiyiljzle nad'? ¿Abi ñezile chiyal' soa' lill Xa'na'?

<sup>50</sup> Na' aga wyajni'gakile' bi zejin daa gollb' legake'.  
<sup>51</sup> Na'ch Jesúza' biyajlem' legake' Nazareta' na' bzenagb' çhegake' toshiizi. Na' xna'baa aga gol-lallee diika' gok. <sup>52</sup> Na' Jesúza' zejch bgolb' na' wdapchb' ye'l' sin', na' Chioza' bibachile'b', na' lekzka' bibayi beñ' leb'.

### Juanna', beena' bchoa beñ' nis

(Mt. 3:1-12; Mr. 1:1-8; Jn. 1:19-28)

**3** Na' ka gok shin' yiz chñabia' César Tibériona', na' Poncio Pilátona' chñabi'e gana' mbani Judéana', na' Heródeza' chñabi'e gana' mbani Galileana', na' beñ' bishee Felípena' chñabi'e gana' mbani Ituréana' len Traconítana', na' Lisániaza' chñabi'e gana' mbani Abilí-niana', <sup>2</sup> na' Anáza' len Caifáza' nakgake' bxo'z choo bxo'z xen çhe beñ' Israelka'. Na' kana'yen' wñe Chioza' Juanna', xiin Zacaríaza', kana' zoe' to latj gana' bibi chashj chleb. <sup>3</sup> Na'ch wyaj Juanna' jte' doxen yell-liona' de cho'a yao Jordánna' na' wdixje'ile' beñ' chiyal' yiyaj yilengakile' na' çhoagake' nis kwençhe yizi'xen Chioza' çhegake'. <sup>4</sup> Bene' kon ka bzej dii Isaíaza' gana' nan:

To beñ' gosyee latja' gana' bibi chashj chleb, na' ine':  
“Li se kwas wzenagle çhe Xanchona'  
na' wsalj yichjlall'do'leka' kat' zee.

<sup>5</sup> La' le' gone' ka chon beñ' chillée ga nak xitj yao, na' ka beñ' chçhinj yaa kwençhe chileshe'n.  
Na' chilje' yog'lo' nez dii nyok ñlew,  
na' chillée xitjka' chi' lo neza'.

<sup>6</sup> Na' yog'lo' beñ' ile'gakile' ka gon Chioza' yisle' beñ' lawi dii mala'.”

<sup>7</sup> Na' beñ' zan chllin lao Juanna' kwençhe wchoe' le-gake' nisa', na'ch kat' chllingake' lawe'na', chi'e legake':

—Le' naklikzle ka beñ' zña! ¿Achakile wak wxonjile' ye'l' zak'zi' daa wsel' Chioza'? <sup>8</sup> Li gon ka gakbe'i beñ' nan dii li ba biyaj bilenile'. Na' bi gakzile bibi ye'l' zak'zi' ile'ile daa inazle: “Neto' naknto' xiin dia çhe dii Abrahama'.” Ni inia' le' axt yajki wak gon Chioza' xiin dia çhe dii Abrahama'. <sup>9</sup> Yog'lo'le shi bi chonle ka chiyoolallii Chioza' na' gak çhele ka chak çhe to yag dii choe' dii zix dii bi nak wen, na' lii chçhogtegake'n na' chza'l'gake'n lo yi'na'.

<sup>10</sup> Na' beñ'ka' chzenag xtill' Juanna' che'gake'ne':

—¿Beran chiyal' gonnto', shka'?

<sup>11</sup> Na'ch che' Juanna' legake':

—Beena' de çhop kwe' xe', chiyal' wi'e shkwe' çhe beena' bi de çhe'. Na' beena' de dii cheej chawe', chiyal' gaolene'n beena' bi de çheyin.

<sup>12</sup> Na' lekzka' bllin bal beñ' wchixjka' kwençhe wchoa Juanna' legake' nisa', na' wñabgakile'ne':

—Maestro, ¿beran chiyal' gonnto', shka'?

<sup>13</sup> Na'ch che' Juanna' legake':

—Bi wchixjle dii xenchlæ ka to daa chiyal' wchixjle.

<sup>14</sup> Na' lekzka' bal beñ'ka' nak soldad wñabgakile'ne':  
—¿Shera neto', beran chiyal' gonnto' shka'?

Na'ch che' Juanna' legake':

—Bi wwall wsheble beñ' kwençhe ikaazle bi de çhe', ni bi wtobilene' dii bi nak ka'. Li gon banez laxjlana'.

<sup>15</sup> Na' beñ' zan yoo yichjgake' ila' Crístona', beena' wsel' Chioza' kwençhe inabi'e, na' yog'ze' gokgakile' Juanna'ljan Crístona'. <sup>16</sup> Na' Juanna' golle' legake':

—Zi' za' beena' napch ye'l' wak xench ka nad'. Na' nad' ni bi zakaa gak' xmose' kwençhe wleçhj' xe'le'na'. Nad' chchoa' le' nis daa chiyaj chilenile, san len' gone' ka yidsoa Espíritu Sántona' loo yichjlall'do'léna', na' beñ'ka' bi chiyaj chileni, wselee legake' lo yi' gabi'la'. <sup>17</sup> Na' daa gon Crístona' çhe beñ' chzaklebin ka daa chon beena' nox' yag xoz' daa chpa'ile' trígon'a', na' yi-tope' trígon'a' kooshaween na' wzeye' beb çheyinna' lo yi'na' daa biga yiyolkzæ.

<sup>18</sup> Kan' nak diika' bzajni' Juanna' beñ'ka', na' dii zanch dill' dii be'lene' legake' kana' bi'e dill' wen dill' kob çhe Chioza'. <sup>19</sup> Na' Juanna' lekzka' bsheshlene' Heródeza', beena' wñabia' Galileana', daa bikee Herodíaza', xool beñ' bishee Felípena', na' çhe bichlæ dii malka' ba bene'. <sup>20</sup> Na'ch Heródeza' benche' bish' ljjwell dii malka' ba bene' daa wlo'e Juanna' lillyana'.

### Wchoa Jesúza' nisa'

(Mt. 3:13-17; Mr. 1:9-11)

<sup>21</sup> Kana' chchoa Juanna' beñ' nisa', len Jesúza' bchoe'n. Na' shlak choe'lwill Jesúza' Chioza', byalj yabana' <sup>22</sup> na' betj Espíritu Sántona' jsoalene'ne', na' ble'gakile' Espírituna' ka to palom. Na' bengakile' shii Chioza' za'n yabana', chi'e:

—Lin' nako' Xiin', chakchgaid' li' na' le chibaid' li'.

### Beñ'ka' nak dia çhe Jesucrístona'

(Mt. 1:1-17)

<sup>23</sup> Na' do shichoa yizi Jesúza' ka wzoloe' bene' yog' daa lli'a bia' gone'. Na' yog' beñ' wnagake' xiin José-nan'. Na' Joséna' goke' xiin Elína', <sup>24</sup> Elína' goke' xiin Matata', Matata' goke' xiin Levína', Levína' goke' xiin Mélquina', Mélquina' goke' xiin Jánana', Jánana' goke' xiin Joséna'. <sup>25</sup> Joséna' goke' xiin Matatíaza', Matatíaza' goke' xiin Amóza', Amóza' goke' xiin Nahuma', Nahuma' goke' xiin Éslina', Éslina' goke' xiin Nagaina'. <sup>26</sup> Nagaina' goke' xiin Maata', Maata' goke' xiin Matatíaza', Matatíaza' goke' xiin Semeina', Semeina' goke' xiin Joséna', Joséna' goke' xiin Judána'. <sup>27</sup> Judána' goke' xiin Joánana', Joánana' goke' xiin Résana', Résana' goke' xiin Zorobabela', Zorobabela' goke' xiin Salatiela', Salatiela' goke' xiin Nérina'. <sup>28</sup> Nérina' goke' xiin Mélquina', Mélquina' goke' xiin Ádina', Ádina' goke' xiin Cosama', Cosama' goke' xiin Elmodama', Elmodama' goke' xiin Era'. <sup>29</sup> Era' goke' xiin Josuéna', Josuéna' goke' xiin Eliezero', Eliezero' goke' xiin Jorima', Jorima' goke' xiin Matata'. <sup>30</sup> Matata' goke' xiin Levína', Levína' goke' xiin Simeónna', Simeónna' goke' xiin Judána', Judána' goke' xiin Joséna', Joséna' goke' xiin Jonánna', Jonánna' goke' xiin Eliaquima'. <sup>31</sup> Eliaquima' goke' xiin

Meleana', Meleana' goke' xiiñ Mainána', Mainána' goke' xiiñ Matátana', na' Matátana' goke' xiiñ Natánna'. <sup>32</sup> Natánna' goke' xiiñ Davina', Davina' goke' xiiñ Isaína', Isaína' goke' xiiñ Obedá', Obedá' goke' xiiñ Booza', na' Booza' goke' xiiñ Salmónna', Salmónna' goke' xiiñ Naasónna'. <sup>33</sup> Naasónna' goke' xiiñ Aminadaba', Aminadaba' goke' xiiñ Arama', Arama' goke' xiiñ Ezroma', Ezroma' goke' xiiñ Fáreza', Fáreza' goke' xiiñ Judána'. <sup>34</sup> Judána' goke' xiiñ Jacoba', Jacoba' goke' xiiñ Isaaca', Isaaca' goke' xiiñ Abrahama', Abrahama' goke' xiiñ Taréna', Taréna' goke' xiiñ Nacora'. <sup>35</sup> Nacora' goke' xiiñ Seruga', Seruga' goke' xiiñ Ragauna', Ragauna' goke' xiiñ Pelega', Pelega' goke' xiiñ Hebera', Hebera' goke' xiiñ Sálana'. <sup>36</sup> Sálana' goke' xiiñ Cainánna', Cainánna' goke' xiiñ Arfaxada', Arfaxada' goke' xiiñ Sema', Sema' goke' xiiñ Noéna', Noéna' goke' xiiñ Lameca'. <sup>37</sup> Lameca' goke' xiiñ Musalénna', Musalénna' goke' xiiñ Enoca', Enoca' goke' xiiñ Jareda', Jareda' goke' xiiñ Mahalaleela', Mahalaleela' goke' xiiñ Cainánna'. <sup>38</sup> Cainánna' goke' xiiñ Enóza', Enóza' goke' xiiñ Seta', Seta' goke' xiiñ Adánna', na' Adánna' goke' xiiñ Chioza'.

Dii xiwaa goklalliin kooyela'n Jesúza' gone' ka cheenin  
(Mt. 4:1-11; Mr. 1:12-13)

**4** Ka biza' Jesúza' cho'a yao Jordanna', Espiritu Sántona', beena' chñabia' loo yichjall'do'ena', bchi'ene' latja' gana' bibi chashj chleb. <sup>2</sup> Na' na' wzoe' choa lla, na' dii xiwaa goklalliin kooyela'n le' gone' ka cheenin. Na' shlak wzoe' na' ni lat' bibi wdawe', na' ka gok choa lla, wdone'. <sup>3</sup> Na'ch che' dii xiwaane':

—Shi leilo' nako' Xiiñ Chios, goll yaji yiyakan yetxtil.

<sup>4</sup> Na'ch che' Jesúza':

—Cho'a Xtill' Chioza' nan: "Aga toz yel' wawa' choe'n yel' mban che benecha', san lekzka' Cho'a Xtill' Chioza' choe'n yel' mban chegake'."

<sup>5</sup> Na'ch ka wde, bche' dii xiwaa Jesúza' to lo yaa sib wal, na' tolbe'do' bliin le' yog' yellka' lla yell-lioni.

<sup>6</sup> Na'ch che'n le':

—Gon' li' doxen yel' wñabia'na' na' yel' zakiina' daa de che yog' yellki, la' ba nakin cha' na' wak wi'an kon no cheenid'. <sup>7</sup> Na' gon'a'n li' shi wchek' xibo'na' we'la-woo nad'.

<sup>8</sup> Na' che' Jesúza':

—Cho'a Xtill' Chioza' nan: "Be'la'o toz Xano' Chioza' na' kon daa inge', lënnan' gono'."

<sup>9</sup> Na'ch ka wde, bizche' dii xiwaa Jesúza' Jerusalénna' na' blepan le' yichj yoodo'na' gana' nakch sib wal, na' gollan le':

—Shi leilo' nako' Xiiñ Chios, lla bxit'shki ni. <sup>10</sup> La' Cho'a Xtill' Chioza' nan:

Chioza' wselee anj che'ka' gap wwiagake' li',

<sup>11</sup> na' gox'gake' li'

kwenche ki koo wchewo' yajka'.

<sup>12</sup> Na'ch che' Jesúza':

—Lekzka' na Cho'a Xtill' Chioza': "Bi wzo' Chioza' gone' daa nazan cho' kwenche xenlalloo shi gone' ka ba wne'."

<sup>13</sup> Na' ka bi gok kooyel' dii xiwaa Jesúza' gone' ka cheenin, na'ch bkwasan kwite'na' shloll.

**Wzolo Jesúza' bi'e Cho'a Xtill' Chioza' Galileana'**  
(Mt. 4:12-17; Mr. 1:14-15)

<sup>14</sup> Jesúza' billine' gana' mbani Galileana' ziyoochgue' yel' wak che Espiritu Sántona', na' doxenə na' wze dill' daa chone'. <sup>15</sup> Na' chjali' chjasedile' ben' Israelka' gana' chdop chllaggake' choe'lwillgake' Chioza', na' yog' ben' nagake' le xochi cho'e dill'.

**Billin Jesúza' yell Nazareta'**  
(Mt. 13:53-58; Mr. 6:1-6)

<sup>16</sup> Na'ch biyaje' Nazareta', yella' gana' bgole'. Na' ka bllin lla sabda', llana' chombaan ben' Israelka', wyaje' gana' chdop chllaggake' choe'lwillgake' Chioza' kon ka yooloe' chone'. Na'ch wzollee lawe'ka' kwenche blabe' Cho'a Xtill' Chioza'. <sup>17</sup> Na' be'gake'ne' yisha' daa bzej dii Isaíaza', beena' wdixjee daa goll Chioza'ne', na' ka bzeshe'n blabe' gana' na:

<sup>18</sup> Espiritu che Xancho Chioza' zoalene' nad', na' Chioza' ba bzoe' nad' zidyelen' ben' yesh'ka' dill' wen dill' kob che'na'.

Ba bselee nad' kwenche zidtip' lall' ben'ka' chakyeshii yichjall'do'eka',

na' zidtxje'id' ben' wak yisell yiiaagake',

na' gon' ka ile'i ben' lcho'ka',

na' gaklen' ben'ka' chchi' chsak' ben' legake',

<sup>19</sup> na' wi'a dill' ba bllin lla gaklen' Xanchona' ben' yell-li-oki.

<sup>20</sup> Ka biyoll blabe' yisha' na'ch bitobe'n na' biyo'en beena' ngoo lall' neen, na' bibi'e. Na' yog' ben'ka' lle' na' shin chizozgakile' chwiagake'ne'. <sup>21</sup> Na' wzoloe' cho'e dill', chi'e:

—Naa billinin ka na Cho'a Xtill' Chioza' dga ba benile.

<sup>22</sup> Na' yog' ben'ka' lle' na' che' ljjwellgake' le chon beeni, na' chibangakile' ka xochi cho'e dill'. Na' che' ljjwellgake':

—¿Aaga beenin xiiñ Joséna'?

<sup>23</sup> Na'ch che' Jesúza' legake':

—Wnaljale cha' ka dillaa de: "Wen rmech, biyon kwino'." Na' lekzka' wnaljale nad': "Daa beninto' beno' Capernaúma' lekzka' benschkin lallchoni."

<sup>24</sup> Na' be'che' dill' chi'e legake':

—Dii li nia' le', to ben' chyixjee daa che' Chioza'ne' aga no shajle' che' yell che'na'. <sup>25</sup> Na' nia' le', zan nool wizeb wille' gani mbani Israeli kana' wzoa Elíaza', beena' wdixjee daa goll Chioza'ne', kana' aga bi yej gok shon yiz yoo gashjə na' wche'chga wbinna' doxen gani mbani Israeli. <sup>26</sup> Na' bi bsel' Chioza' Elíaza' kwenche gaklene' nool wizebka' lle' ni, san bseleene' to yell zit' daa le Sarepta, daa lla gaozə yell Sidónna', gana' goklene' to nool wizeb zoa na'. <sup>27</sup> Na' lekzka' gok kana' wzoa dii Elisewa', beena' wdixjee daa goll Chioza'ne'. Ben' zan ben' Israelka' che'gakile' yillwe' daa le lepra, per ni toe' bi biyone'. Toz ben' Siriana' biyone', beena' le Naamán.

<sup>28</sup> Na' yog' beŋ'ka' lle' gana' chdop chllaggake' le bllaagake' daa wna Jesúza' ka'. <sup>29</sup> Na' lii wzolla'tegake' bibejgake' Jesúza' yella', na' bche'gake'ne' to ga ze bdiŋj xen wal, goklall'gake' lljachixgake'ne'. <sup>30</sup> Per Jesúza' bicheje' ladje'ka' na' ziyaje'.

### Bibej Jesúza' dii xiwaa yoo to beŋ'

(Mr. 1:21-28)

<sup>31</sup> Jesúza' wyaje' Capernaúma', sto yell daa lliana gana' mbani Galileana', na' bli' bsedile' beŋ'ka' lla sabda', llana' chombaang beŋ' Israelka'. <sup>32</sup> Na' bibangakile' ka chli' chsedi Jesúza', la' bli' bsedile' legake' lega beŋ' nap yel' wŋabia'.

<sup>33</sup> Na' gana' chdop chllaggake', len to beŋ' yoo dii xiwaa na' bgosyaan le' zillj wal, chi'e:

<sup>34</sup> —ijwayi neto', Jesús, beŋ' Nazaret! ¿Abido' kwenche wlliyayoo neton? Nad' nombi'a li', na' neqid' nako' liizelozi beŋ' li beŋ' shao' che Chios.

<sup>35</sup> Na'ch bsheshlen Jesúza' dii xiwaa, golle'ne:  
—iLlizə wzoa! ¡Bichej!

Na' chwiante beŋ'ka' bchix bto! dii xiwaa beena', na' bichejan na' bikzə gayile' bi goki. <sup>36</sup> Na' yog' beŋ'ka' lle' na' bibangakile', na' che' ljwellgake':

—¿Naktekan nak cho'a xtill' beeni, lla? Ka chneze' chillesh dii xiw'ka' yoo beŋ' daa napchgue' yel' wŋabia' na' yel' wak.

<sup>37</sup> Na' doxen na' wze dill' ka nak daa chon Jesúza'.

### Biyon Jesúza' tobiin che Simón Pédrone

(Mt. 8:14-15; Mr. 1:29-31)

<sup>38</sup> Na' biza' Jesúza' gana' chdop chllaggake' na' biyaje' lill Simónna'. Na' tobiin che Simónna' bi shawee, yoochgue' dii lana', na' wŋabgakile' Jesúza' gak-lene'ne'. <sup>39</sup> Na'ch wbig' Jesúza' kwite'na' gana' die' na' bsheshlene' dii lana' na' bichejan. Na' lii biyaste noola' wzoloe' bene' dii weej wdaogake'.

### Jesúza' biyone' beŋ' zan

(Mt. 8:16-17; Mr. 1:32-34)

<sup>40</sup> Na' ka ba chxoa wbillá, beŋ'ka' lle' na' jwa'gake' lao Jesúza' beŋ'ka' chak wde wdeli yillwe'. Na' bxoá neena' to togake' na' biyagakile'. <sup>41</sup> Na' bibeje' dii xiwaa yoo beŋ' zan, na' ka bichejgakan chosyaagakan zillj inleeb, che'gakan:

—Lin' nako' Xiiŋ Chioza'.

Na'ch bsheshlen Jesúza' legakan. Bi bi'e latj inegakan la' nezgakin len' nake' Crístona', beena' chbez beŋ' Israelka' wsel' Chioza' inabi'e.

### Wda Jesúza' bi'e Cho'a Xtill' Chioza' Galileana'

(Mr. 1:35-39)

<sup>42</sup> Ka wyeeni', bchej Jesúza' yella' na' wyaje' ga kono lle'. Per beŋ' yellka' biyiljgake'ne', na' ka bllingake' kwite'na', goklall'gake' wzag'gake'ne' kwenche yigaang-lene' legake'. <sup>43</sup> Na'ch goll Jesúza' legake':

—Lekzka' chiya! chixje'id' beŋ'ka' lle' yell yoblə ka nak yel' wŋabia' che Chioza', la' daan bselee nad'.

<sup>44</sup> Na' wda Jesúza' wdixji'e cho'a xtill' Chioza' to to gana' chdop chllag beŋ' Israelka' choe'lwllgake' Chioza'.

### Wxengake' beŋ' zan

(Mt. 4:18-22; Mr. 1:16-20)

**5** To shii bllin Jesúza' cho'a nisdó' che Genesareta' na' bllin beŋ' zan wal axt bdakwyillgake'ne', daa cheengakile' wzenaggake' cho'a xtill' Chioza'. <sup>2</sup> Na' ble'i Jesúza' chop barkw chi'gakan cho'a nisdó'na'. Ba bichej beŋ' wxen beŋ'ka' na' ba chiyibgake' yixj che'ka'. <sup>3</sup> Na'ch wyoo Jesúza' loo barkw che Simónna', na' wŋabile'ne' wllig' zilateen loo nisdó'na'. Na' wche' Jesúza' loo barkwa' na' wzoloe' bli' bsedile' beŋ'ka'. <sup>4</sup> Na' ka biyoll bli' bsedile' legake', na'ch chi'e Simónna':

—Wyajlen barkwi gana' zitj na' wza! le yixj chelena' kwenche senle beŋ'ka'.

<sup>5</sup> Na'ch che' Simónna':

—Maestro, do yel ba bennto' llinna' na' ni tlish'b bi bdo!into', per shi kan' no', wza! chnto' yixjki.

<sup>6</sup> Na' ka bzal'gake' yixj che'ka', wxenan beŋ' zan inleeb. Na' ka nan yibejgake' yixja' wzolo chcheza'n. <sup>7</sup> Na' blaa neeka' beŋ'ka' lle' loo barkwa' sto kwenche jaklengake' legake'. Na' ka bllin beŋ'ka', na'ch bissha'chagake' chopte barkwka' axt ba chakgakan ka dii kwe' yel. <sup>8</sup> Ka ble'i Simón Pédrone' ka gok, bchek' xibe'na' lao Jesúza' na' chi'ene':

—Bikwasgach kwitii Xan', la' beŋ' saaxyaz nad'.

<sup>9</sup> Golle'ne' ka' daa bibanile', na' ka'kzə beŋ'ka' lene' bibangakile' daa bdo! beŋ' zan inleeb. <sup>10</sup> Na' lekzka' bibani Jacóbona' len Juanna' xiiŋ Zebedewa', la' lengaken' naggake' t xen Simónna'. Na' che' Jesúza' Simónna':  
—Bi illebo'. Kon ka chono' ŋaa chbejo' beŋ'ki loo nisi, ka'kzan gono' yibejo' beŋ' lao dii mala'.

<sup>11</sup> Na' ka billinlengake' barkwka' cho'a nisdó'na', na'zə bkwaangake'n len xshinlaze'ka' na'ch janogake' Jesúza'.

### Biyon Jesúza' to beŋ' chake' yillwe' daa le lepra

(Mt. 8:1-4; Mr. 1:40-45)

<sup>12</sup> Na' shlak zoa Jesúza' to yell, bllin to beŋ' lawe'na' chak doxen kwerp che'na' yillwe' daa le lepra. Na' ka ble'ile' Jesúza', bchek' xibe'na' lawe'na' na' bchek' yichje'na' axt lo yona' na' got'yoile'ne', chi'ene':

—Xan', neqid' wak yikwaso' yillwe'ni chak' shi cheeni-lo'.

<sup>13</sup> Na'ch Jesúza' bxoá neena' yichj beena', na' chi'ene':  
—Cheenid'x. Na' ŋaate yikwasan'.

Na' kon ka golle' ka' lii biyakteyi beena'. <sup>14</sup> Na'ch che' Jesúza'ne':

—Kono yoo ka ba ben' cho'. Lete wyaj lao bxoza' kwenche ile'ile' ba biyakilo', na' jwa' daa chiya! lljoo che Chioza' daa nllia dii Moiséza' bia' kwenche inezi beŋ' ba biyakilo'.

<sup>15</sup> Na' la'kzi golle'ne' ka', zizikchli wzeyi che', na' beŋ' zan bdop blaggake' kwenche bzenaggake' cho'a xtilleena' na' kwenche biyone' bitteza yillwe' dii chak-

gake'. <sup>16</sup> Per Jesúza' yooloe' chaje' ga kono ben' chak kwenche chje|wille' Chioza'.

**Biyon Jesúza' to ben' net ni'a neena'**  
(Mt. 9:1-8; Mr. 2:1-12)

<sup>17</sup> To lla ka chli' chsedi Jesúza', xonj fariseoka' na' ben'ka' chli' chsedi leya', na' ben'ka' za' yog' yellka' daa mbani Galileana' na'ch daa mbani Judeana' na' lekzka' ben' za' yell Jerusalénna', chi'gake' chzenaggake' dill' daa cho'e. Na' yel' wak che Chioza' wzoalenan Jesúza' kwenche gok biyone' ben'ka' bi shao'. <sup>18</sup> Na'ch bllin to chop ben' n'engake' to ben' net ni'a neena' n'xoagake'ne' to lo daa. Goklall'gake' sho'lengake'ne' loo yooná' kwenche lliwa'gake'ne' lao Jesúza', <sup>19</sup> per bi gok sho'lengake'ne' daa nyichachga ben'ka' loo yooná'. Na'ch wyepgake' koll' yooná'lə na' bkwasgake' dexka' kwenche gok bletjgake'ne' do daa che'na' ladj ben'ka' lle' na' kwenche blline' lao Jesúza'. <sup>20</sup> Na' ble'i Jesúza' le n'xenilall'gake'ne', na'ch chi'e ben' we'na':

—Bish'dawaa, ba biyakxen saaxya cho'ka'.

<sup>21</sup> Na'ch ben'ka' chli' chsedi leya' na' fariseoka' wza'lall'gake', chakgakile': "¿Nora beeni chonz kwine' ka Chioza'? ¿La' toz Chiozan' chak chizi'xene' saaxya che ben'!"

<sup>22</sup> Na' gokbe'i Jesúza' daa wza'lall'gake', na'ch golle' legake':

—¿Berache chza'lall'zle ka? <sup>23</sup> ¿Achakile chyalljchid' yel' wak xench yep' beeni: "Ba bizi'xen' saaxya cho'na'", ka daa yepee: "Biyas na' bigoo nez"? <sup>24</sup> Na' wliid' le', nad', Ben' Bsel' Chioza', nap' yel' wñabia' yell-lioni kwenche yizi'xen' saaxya che ben'.

Na'ch golle' beena' net ni'a neena':

—Naa nia' li', biyas, bitob daa cho'na' na' biyaj lil-lo'na'.

<sup>25</sup> Na' llii biyaste beena' chwiate ben'ka' lle' na', bitobe' daa che'na' bizee ziyaje' lill-le' choe'lawee Chioza'. <sup>26</sup> Na' yog'loj ben'ka' bibangakile' na' be'la'ogake' Chioza', na' do chillebzgake' che'gake':

—Naa'na' ba ble'icho dga chonan ka chibanicho.

**Gox Jesúza' Levína'**  
(Mt. 9:9-13; Mr. 2:13-17)

<sup>27</sup> Ka biza' Jesúza', na' ble'ile' to ben' wixhixj lie' Leví, chi'e gana' chchixjgake'. Na' chi'ene':

—Da, dino nad'.

<sup>28</sup> Na'ch llii wzolla'te Levína', wlej yichje' xshine'na' na' janoe' Jesúza'.

<sup>29</sup> Na' Levína' bene' to lni xen che Jesúza' lille'na'. Na' wyaj ben' zan ben' wixhixjka' na' zi bal ben' yoblə wdaogake' txen. <sup>30</sup> Na' fariseoka' na' ben'ka' chli' chsedi leya' wzologake' chakdi'lengake' ben'ka' nak Jesúza' txen, che'gake':

—¿Berache cheej chaolenle ben' wixhixjka' na' ben' malka'?

<sup>31</sup> Na'ch che' Jesúza' legake':

—Beena' zoa shi'a shao' aga no wen rmech chyalljile', san beena' bi shawaan chyalljile'ne'. <sup>32</sup> Aga

bid' ni che ben'ka' nak ben' li ben' shao', san bid' kwenche yep' ben' saaxyaka' chiya|' yiyaj yilengakile'.

**Wñabgakile' Jesúza' che wbasaa**  
(Mt. 9:14-17; Mr. 2:18-22)

<sup>33</sup> Na' wñabgakile' Jesúza', che'gake'ne':

—Ben'ka' nak Juanna' txen na' ben'ka' nak fariseoka' txen zekizezi chzoagake' wbas' na' choe'lwillgake' Chioza'. Na' ¿berache ben'ki nakgake' li' txen bi chzoagake' wbas'?

<sup>34</sup> Na' chi'e legake':

—Kat' de to yel' wishagna', aga wak gonle byen ben'ka' chdop chllag soagake' wbasaa shlak zoalen-gake' bi'na' chshagna'. Na' ka'kzan ben'ki nakgake' nad' txen, cheej chaogake' naa zoalen' legake'. <sup>35</sup> Per wllin lla wkwas ben' nad' ladje'ka', kana'chan soagake' wbasaa.

<sup>36</sup> Na' lekzka' bzoe' sto jempl, chi'e legake':

—Ni to ben' bi chchogue' xa kobe'na' na' chideen lee xe' dii gola'. La' shi gone'n ka', na' wlliyee dii koba', na' dii gola' aga wñelebin lech' koba'. <sup>37</sup> Na' ni kono chgaa vinona' daa zi' chchejte to loo yid golə. La' shi no gon ka', vino koba' wchezaan yid gola' na' chopten kwiayi'. <sup>38</sup> San vino koba' chiya|' shollan loo yid koba'.

<sup>39</sup> Na' lekzka' to ben' ba yooloe' cheeje' vino gola' aga weenile' yeeje' dii koba', daa chziachile' dii gola'.

**Wdishjgake' do che trígona' lla sabda'**  
(Mt. 12:1-8; Mr. 2:23-28)

**6** To lla sabd, llana' chombaañ ben' Israelka', wde-len Jesúza' ben'ka' nakgake'ne' txen to ga naz ben' trígona', na' ben'ka' zejlengake'ne' wzolo wdishjgake' trígona' na' wxobgake'n wdaogake'n. <sup>2</sup> Na' bal fariseoka' gollgake' legake':

—¿Bi'che chonzle daa bi chiya|' goncho llani chombaañcho?

<sup>3</sup> Na'ch che' Jesúza' legake':

—¿Abin' wlable gana' cho'en dill' ka ben dii Davina' len ben'ka' nakgake'ne' txen ka wdongake'? <sup>4</sup> Wyo'e loo lill xlatj Chioza' na' wdooye' yetxtilka' daa naki che Chioza' daa toz b'ozka' de Isens gaogake'. Na' lekzka' bi'en ben'ka' nakgake'ne' txen.

<sup>5</sup> Na' lekzka' chi'e fariseoka':

—Nad', Ben' Bsel' Chioza' Yell-lioni, chñabi'a lao llani chombaañcho.

**Biyon Jesúza' to ben' lla sabda'**  
(Mt. 12:9-14; Mr. 3:1-6)

<sup>6</sup> Na' sto lla sabd, llana' chombaañ ben' Israelka', wyaj Jesúza' gana' chdop chllaggake' choe'lwillgake' Chioza' na' wzoloe' chli' chsedi' legake'. Na' ladj ben'ka' len to ben' net nee de shljina'. <sup>7</sup> Na' fariseoka' na' ben'ka' chli' chsedi leya' lle'gake' chwiayen'gake' shi wiyon Jesúza' beena' llana' chombaañgake', kwenche gaogake' xya che'. <sup>8</sup> Na' gokbe'i Jesúza' daa chza'lall'gake', na'ch golle' beena' net t'laa neena':

—Wzolla' na' wze gcho|a'.

Na'ch wzolla' beena', wzie' gchoła'. <sup>9</sup> Na'ch goll Jesúza' beñ'ka':

—Ni inabid' le': ¿Beran na leya' chiyal' goncho lla sabdka'? ¿Agoncho dii wenna' anti goncho dii mala'? ¿Ayis-lacho beñ' anti witchone'?

<sup>10</sup> Na'ch bwia Jesúza' legake', na' chi'e beena' net tlaa neena':

—Bli noona'.

Na'ch bli neena' na' biyakin. <sup>11</sup> Na' fariseoka' na' beñ'ka' chli' chsedi leya' le bllaagake' na' choe'gake' dill' nak ka gongake' che Jesúza'.

### Wlej Jesúza' postlka' shllin

(Mt. 10:1-4; Mr. 3:13-19)

<sup>12</sup> Na' wyaj Jesúza' to lo yaa kwenche jelwille' Chioza', na' do yel be'lwille'ne'. <sup>13</sup> Ka wyeeni', goxe' beñ'ka' nakgake'ne' txen na' ladj beñ'ka' wleje' beñ'ki shllin na' bsi'e legake' postl: <sup>14</sup> Simónna' beena' bsi'e Pedro, len beñ' bishee Andréza', na' Jacóbona', Juanna', Felípena', Bartoloména', <sup>15</sup> Matewa', Tomáza', Jacobo xiin Alfewa', Simónna', beena' bsi'gake' Zelote, <sup>16</sup> Judas, beñ' bish' Jacóbona' † na' Jud Scariota', beena' bene' Jesúza' lo na' beñ' malka'.

### Bli' bsemi Jesúza' beñ' zan

(Mt. 4:23-25)

<sup>17</sup> Na'ch biyetjlen Jesúza' legake' lo yaana' na' billingake' to ga nak lesh'. Na' na' lle' beñ' zan inleeb, beñ' zaak doxen gana' mbani Judeana' na' yell Jerusalénna', na' beñ' zaak cho'a nido'na' gana' mbani yell Tírona' na' yell Sidónna'. <sup>18</sup> Wyajgake' kwit Jesúza' kwenche wzenaggake' xtilleena' na' yiyakgakile' bi yill-we' dii chakgake'. Na' lekzka' biyaki beñ'ka' chsak'zi' dii xiw'ka' legake'. <sup>19</sup> Yog'z beñ' goklall'gake' idi'gake' Jesúza' daa ba nezgakile' chchej yel' wak che'na' na' chiyaki yog' beñ'.

### Beñ'ka' zoa mbalaz na' beñ'ka' bi zoa mbalaz

(Mt. 5:1-12)

<sup>20</sup> Na'ch bwia Jesúza' beñ'ka' nakgake'ne' txen, na' chi'e legake':

—Chakomba le' nakle beñ' yesh' daa chleble yel' wñabia' che Chioza'.

<sup>21</sup> 'Chakomba le' chbił chdonle ñaa; wllin lla yesh yeljile.

'Chakomba le' chbell-le ñaa; wllin lla yixill-le.

<sup>22</sup> 'Chakomba le' shi chakzbani beñ' le', shi bi chongake' le' txen, shi biya dii nagake' le', na' shi chongakile' le' nakzi ka chongakile' to beñ' wen dii mal ni cha', nad', Beñ' Bsel' Chioza' Yell-lioni. <sup>23</sup> Li yibayi, na' li soa mbalaz kat' ba chongakile' le' ka', la' yabana' gaple to dii wen dii shao'. La' ka'kzə beni dii xozxtoe'ka' beñ'ka' wdixjee daa goll Chioza' legake' kani'yi.

<sup>24</sup> 'Nyesh'laz gak chele, le' nakle beñ' wni'a, la'kzi le wen chak chele ñaa.

† Beñ' bish' Jacóbona': beñ'ka' nsemi nagake' chiyal' inan xiin Jacóbona'.

<sup>25</sup> 'Nyesh'laz gak chele, le' de dii cheej chaole ñaa, la' wllin lla ibił idonle.

'Nyesh'laz gak chele, le' chiyitj chxill-le ñaa; wllin lla kwellyesh'le.

<sup>26</sup> 'Nyesh'laz gak chele, le' choe'la'o yog' beñ' le', la' ka'kzə be'la'o dii xozxto'leka' dii beñ'ka' benzə ka chiyix-jee daa che' Chioza' legake'.

### Chiyal' gakicho beñ'ka' chakzbani cho'

(Mt. 5:38-48; 7:12)

<sup>27</sup> 'Le' chzenagle ñaa, nia' le', li gaki beñ'ka' chakzbani le'. Li gonigake' wen. <sup>28</sup> Li inabi Chioza' gone' ka gak wen che beñ'ka' chyishj bia' blag' chele. Li inabi Chioza' gaklene' beñ'ka' chiya dii nagake' chele. <sup>29</sup> Shi no kap' xag'lana' tlaa, li wze daa zi shlaa. Na' shi no koyo xachel-lena', li we'tega len xkamislena'. <sup>30</sup> Nottezə beñ' shi bi inabe' chele, li we'n. Na' ka', shi no ikaa bi de chele, bi yinabzilene'n. <sup>31</sup> Li goni beñ' kon ka cheenile gongakile' le'.

<sup>32</sup> 'Shi to beñ'ka' nllagzile chakile, ¿garan de dii wenna' daa chonle? La' ka'klen chon beñ' saaxyaka'.

<sup>33</sup> Lekzka' shi to beñ'ka' chonzi le' wen chiyonile wen, ¿garan de dii wenna' chonle? La' ka'klen chon beñ' saaxyaka'. <sup>34</sup> Na' shi choe'le bi choe'le beñ' daa nezile yigwee wzonna', ¿garan de dii wenna' daa chonle? La' ka'klen chon beñ' ssaxyaka', choe'gake' bi choe'gake' daa nongake' lez wigoogake' wzon che'ka'. <sup>35</sup> Na' le', ñaalla, chiyal' gakile beñ'ka' chakzbani le', na' gonle wen chegake'. Na' shi we'le dii we'le legake', bi gonle lez yiyongake'n. Shi ka' gonle, Chioza' yiyone' dii xench chele, na' ñezi beñ' nakle xiin Chios, beena' nak beñ' choo beñ' xen, la' le' chone' wen che beñ'ka' bi choe' le' yel' choxken na' beñ' wen dii malka'. <sup>36</sup> Chiyal' yiyeshii ljwell-le ka chiyeshii Xacho Chioza' yog' beñ'.

### Bi wwia wyile bi chon beñ'

(Mt. 7:1-5)

<sup>37</sup> 'Bi wwia wyile bi chon beñ', kwenche bi gon Chioza' xya chele. Bibi wtobile' beñ', kwenche bi gaple do! lao Chioza'. Li si'xen che ljwell-le, na' Chioza' si'xene' chele.

<sup>38</sup> Li we' beñ' bi chiyalljile' na' Chioza' yiyone'n. Na' yiyonchle' dii xench, ka chon beñ' chzanile' do yichj do lallee kat' bi wi'e, chzoayaa chzoalline'n. La' kon ka chonle chzanile' we'le beñ' bi de chele, ka'kzan goni Chioza' le'.

<sup>39</sup> Na' bzoo Jesúza' to jempl, chi'e legake':

—Ñezicho bi gak to beñ' lchoł wchi'e sto beñ' lchoł, la' choptegake' lljabixgake' to loo yech. <sup>40</sup> Na' beena' chsed bi gak ñe': "Chonch' ka beena' chli' chsedile' nad'." Kat'ch yiyoll yido wsedé', kana'chan gake' ka beena' bli' bsemi'ne'.

<sup>41</sup> '¿Biche chwiazoo' bicha' yoo loo jalao bish' ljwello'na' na' bi chile'ilo' kwagaa yoo loo jalawo'na'? <sup>42</sup> Shi bi chle'ilo' kwagaa yoo loo jalawo'na', ¿nakra gono' yoo bish' ljwello'na': "Beñshki yibej' bicha' yoo loo jalawo'na'?" Beñ' wxiye'! Zigaate bwia cho'na' na' tech wwio' che' bish' ljwello'na'.

## Daa chbia to yag chli'n bi yag daa

(Mt. 7:17-20; 12:33-35)

<sup>43</sup> Biga zoa to yag wen na' kwiazan dii bi nak wen, ni biga zoa to yag dii bi nak wen kwiazan dii nak wen. <sup>44</sup> Ka ile'icho daa chbia to yag, na' chnezicho bi yag daa. Yag yeshaa aga wbian yixwewa', na' lekzka' yag bisgaana' aga wbian uvana'. <sup>45</sup> Ka'kzan beena' nak ben' wen, choe' dill' wen, la' loo yichjlall'do'enan' yoo dii wenna'. Na' beena' nak ben' mal, cho'e dill' dii nak mal, la' loo yichjlall'do'enan' yoo dii mala', la' yog' daa chnecho chchejan loo yichjlall'do'chona'.

## Chop ben' bengake' twej yoo

(Mt. 7:24-27)

<sup>46</sup> '¿Beraçhe nazle nad' "Xan', Xan'", na' bi chonle daa nia' le'? <sup>47</sup> Ni inia' le' no zaklebi beena' chone' nad' txen na' chzenague' cha' na' chone' ka nia'. <sup>48</sup> Zaklebile' beena' ben to yoo. Zigaate wdene' zitj wal na' wleke' leninna' lo yaja'. Ka wde yawa' na' wyoon le'inna', aga bizoyin yisheen daa, la' chi'cha leninna' lo yaja'. <sup>49</sup> Na' beena' cheni cho'a xtilaana' na' bi chone' ka nia', zaklebile' beena' ben lille'na' lo yona' na' bibi lenin wleke'. Na' ka wde yawa' wyoon le'inna', lii billeeten na' wllia-ayi'tekkzan.

## Biyon Jesúza' xmos xan soldadka'

(Mt. 8:5-13)

**7** Ka biyoll be'len Jesúza' ben'ka' dill', biyaje' Capernaúma'. <sup>2</sup> Na' yella' zoa to ben' Roma ben' chñabi'e to guiyoa soldad, na' zoa to xmose' lille'na', beena' le chakile', na' chake' to yillwe' dii chonan ka witan le'. <sup>3</sup> Na' ka beni xan soldadka' choe'gake' xtill' Jesúza', na'ch bselee bał ben' golka' chñabia' Israela' kwenche lljet'yogakile'ne' lljayene' beena' bi shao'. <sup>4</sup> Na' ka bllin ben' golka' kwit Jesúza', got'yogakile'ne', che'gake':

—Xan soldadka' chidolee gakleno'ne', <sup>5</sup> la' le chakile' cho' ben' Israel na' len' bene' yoonaa' gana' chdi'anto' choe'lwilinto' Chioza'.

<sup>6</sup> Na'ch wyajlen Jesúza' legake'. Na' ka ba zoa yillingake' lille'na', xan soldadka' bselee bał ben' nllaguile' kwenche jellgake' Jesúza' dill'ki:

—Xan', bi sio' wneyi yido', la' bi chidołaa shoo loo lillii. <sup>7</sup> Daan bi biyaxjid' yid' kwin' yidtil' li'. La'ch' to chop cho'a dill' shel' ino' na' yiyakile'. <sup>8</sup> La' zoa no chñabia' nad', na' lekzka' chñabi'a soldad cha'ka'. Na' kat' chep' toe': "Wyaj ni", na' chaje'. Na' kat' chep' stoe': "Da ni", na' chide'. Na' kat' chep' xmosaa: "Ben dga", na' chone'n.

<sup>9</sup> Na' ka beni Jesúza' xtill' beena' na' bibanile', na' biyechje' bwie' ben'ka' zjanogake'ne', na' chi'e legake':

—Dii li, ni to ben' Israel bin' illag' ben' gon'jilall'likze' nad' ka chon'jilall' beeni nad'.

<sup>10</sup> Na'ch ziyaj ben'ka' bsel' xan soldadka', na' ka billingake' lille'na' ble'gakile' ba biyaki xmose'na'.

## Bisban Jesúza' xiin to nool wizeb bi' ba wit

<sup>11</sup> Ka wde, na' wyaj Jesúza' sto yell dii le Naín kon ben'ka' nakgake'ne' txen na' lench zan ben' yoblə. <sup>12</sup> Na' ka bllingake' cho'a yella', ble'gakile' zjakwash' ben'ka' to bi' wet. Na' bi'na' wit nakb' bi' tlish', na' xñabaa' nake' noolə wizeb. Na' ben' zan ben' yellka' zjakwash'gake'b'. <sup>13</sup> Na' ka ble'i Xancho Jesúza' noola', na' biyeshile'ne', chi'ene':

—Bi kwello'.

<sup>14</sup> Na'ch jabigueue bexee gana' xoa bi' weta', na' wlez ben'ka' nłengake'b'. Na' golle' bi' weta':

—Bi' xkwid', nia' li', jbiyas!

<sup>15</sup> Na' bi' weta' lii bibanteb' na' bibe'b' na' wzolo chñeb', na' biyon Jesúza'b' lo na' xñabaa'. <sup>16</sup> Na' ka ble'i ben'ka' daa bene', yog'lołze' blleb na' wzologake' choe'la'ogake' Chioza', nagake':

—Ladjchoni ba bla' to ben' zakii ben' chyixjee daa che' Chioza'ne'.

Na' lekzka' nagake':

—Chiozan' ba blee kwenche gaklene' cho' nakcho yell che'.

<sup>17</sup> Na' doxen gana' mbani Judeana' na' yellka' Ilia gaozə wñezgakile' daa ben Jesúza'.

## Ben'ka' bsel' Juanna' lao Jesúza'

(Mt. 11:2-19)

<sup>18</sup> Na' ben'ka' nongake' Juanna' txen jayellgake'ne' yog' diika' chon Jesúza'. Na'ch Juanna' wñie' çhope' <sup>19</sup> na' bselee legake' gana' zoa Jesúza' kwenche janabgakile'ne' shi leyeñ'en' beena' Ilia bia' yid wa shi chiyał' kwezgake' sto ben' yoblə. <sup>20</sup> Na' ka bllin ben'ka' bsel' Juanna' kwit Jesúza', che'gake'ne':

—Juanna', beena' chchoa ben' nisa', bselee neto' kwenche zidñabinto' li' shi li'yen'kzan nako' Crístona', beena' chbeznto' wsel' Chioza' kwenche inñabi'e, wa shi chiyał' kweznto' stoe'.

<sup>21</sup> Na' shlak zegake' na', biyon Jesúza' ben' zan ben' chak yillwe', na' lekzka' bibeje' dii xiw'ka' yoo ben', na' bene' ka ble'i ben' zan ben' lçhołka'. <sup>22</sup> Na'ch che' Jesúza' ben'ka' bsel' Juanna':

—Li yiyaj na' li lljayell Juanna' daa ba ben ble'ile. Li lljayelle' ben' lçhołka' chle'gakile', na' ben'ka' bi chak sa' chza'gake', na' ben'ka' chak yillwe'na' daa le lepra chiyakgakile', na' ben' kwelka' chengakile', na' chiban ben' wetka', na' chyixje'id' ben' yesh'ka' dill' wen dill' kob che Chioza'. <sup>23</sup> Chakomba beena' chajle' cha' na' bi chakçhoplallee.

<sup>24</sup> Na' ka biza' ben'ka' bsel' Juanna', Jesúza' bi'e xtill' Juanna' lao ben'ka' lle' na', chi'e:

—¿Nakra nak beena' jawiale latja' gana' bibi chashj chłeb? ¿Anake' to ben' chakçhoplallii' che dill'ka' cho'e?

<sup>25</sup> Na' shi bi nake' ka', ¿nakran nak beena' jawiale, shka'? ¿Ato ben' nakwe' lech' dii zakii? La' ñezkzile ben'ka' nakw lech' dii zakii, na' naptegake' bittezə dii chze-lall'gake', zoagake' lill ben' wñabia'ka', aga zoagake' latja' gana' bibi chashj chłeb. <sup>26</sup> Na' ¿nakran nak beena' jawiale, shka'? ¿Ato ben' chyixjee daa che' Chioza'ne'?

Dii li kan' chone', na' chontechle' ka to beŋ' chyixjee daa che' Chioza'ne'. <sup>27</sup> La' che beenin cho'e Cho'a Xtill' Chioza' dill' gana' nan:

Wselaa beena' kwialo lawo'na',  
na' chixji'e xtilloona' kwenche soa beŋ' wzenaggake' cho' kat' illino'.

<sup>28</sup> Na' nia' le', lao yog'loite beŋ' yell-lioni, ni to konon' ichej beŋ' zak'teche' ka Juanna'. Per nottezə beena' choe' latj inabia' Chioza' loo yichjall'do'ena', zak'teche' ka Juanna'.

<sup>29</sup> Na' yog'loj beŋ'ka' bchoa Juanna' nisa', no beŋ' wixhixjka' na' zan beŋ' yoblə, ka bengakile' daa wna Jesúsza', gokbe'gakile' dill' li dill' shao' nak cho'a xtill' Chioza'. <sup>30</sup> Na' fariseoka' na' beŋ'ka' chli' chsedi leya' bi goongakile' wchoa Juanna' legake' nisa', ni bi gok-lall'gake' gon Chioza' dii wenna' cheenile' gone' che-gake'. <sup>31</sup> Na'ch goll Xancho Jesúsza' legake':

—¿Bi ka wsaklebid' le' mbanle naa? ¿No ka inia' nakle? <sup>32</sup> Nakle ka bi'do'ka' chbe' gana' chak yaana' na' chosyaagakb' che' ljjwellb': "Bkwellnto' blleja' na' bi byaale, na' beŋ'to' dii chon nyesh', na' ni bi wchell-le."  
<sup>33</sup> La' bid Juan wchoa nisa', na' bi chawe' yetxtil ni bi cheeje' vino, na' nale che': "Dii xiwaan yo'e." <sup>34</sup> Na'ch bid' nad', Beŋ' Bsel' Chioza' Yell-lioni, na' chle'ile cheej chaw', na' nale cha': "Le beŋ' waoxat nak beeni na' cheejtie', na' nllagteile' beŋ' saaxyaka' na' beŋ' wixhixjka'." <sup>35</sup> Per yel' sin' che Chioza' chli'lawin ka nsa' che beŋ'ka' chzenaggake' cheyin.

### Jesúza' wyaje' lill Simónna', beena' nak fariseo

<sup>36</sup> To fariseo wnie' Jesúsza' kwenche gaogake' lille'na'. Ka blline' na' wchi'e cho'a mesa'. <sup>37</sup> Na' to noolə wda zoa yella', ka wnezeile' zjtao Jesúsza' lill farisewa', na'ch wyaje' noxee to lmet de yaj xochi na' yollan set zix.

<sup>38</sup> De chbellzile' jabiguee xni'a Jesúsza' na' bisbisile' ni'ena' nis xchell che'na'. Na' bisbillile'n yish' yichje'na', na' bnop'e'n na' bwazje'n set zixa'. <sup>39</sup> Na' farisewa', beena' wnie' Jesúsza' lille'na', ka ble'ile' ka chon noola', na' gokile': "She'l'ka' dii li nak beeni to beŋ' chyixjee daa che' Chioza'ne', wakbe'ile' nan nooli chox' ni'ena' nake' beŋ' saaxya." <sup>40</sup> Na'ch che' Jesúsza' farisewa':

—Simón, de to dii cheenid' inia' li'.

Na' che' Simónna':

—Wna, Maestro.

<sup>41</sup> Na'ch che' Jesúsza':

—Chop beŋ' chbag'gake' mech che to beŋ' chon yichjin. Toe' chbaguee gay' guioa mech plat †, na' stoe' chbaguee shiyonan. <sup>42</sup> Na' ni toe' bi bllelgakile'n yiyixjgake'n. Na'ch xan mecha' benxenlallee daa chal'gake' che'. Wnashki nad', ¿no beŋ'ka' chop gachchile'ne'?

<sup>43</sup> Na'ch che' Simónna':

—Chakid' beena' chbag' dii xench.

Na' che' Jesúsza'ne':

—Lekzilo', kan' nakan.

<sup>44</sup> Na'ch bwia Jesúsza' noola' na' chi'e Simónna':

† Mech plat: dill' griegona' nan denario, na' nakan to mech dii zak' che shlla llin.

—Bwiakachi nooli. Ka wyo'a loo lillo'ni bi beŋo' nisa' kwenche chib ni'ani, per nooli ba wdibile' nis xchell che'na' ni'ani na' bisbillile'n yish' yichje'na'. <sup>45</sup> Bi bnopo' nad', per nooli kon ka wyo'a chnoptezi chnope' ni'ani. <sup>46</sup> Bi wdebo' yichjii set, per nooli ba bwazje' set zixa' ni'ani. <sup>47</sup> Daan nia' li', la'kzi dii zan saaxya ba ben nooli, ba biyakxengakan daa le chakchgaile' nad'. Na' beena' lat'zə biyakxen che', lekzka' lat'chga chakile' nad'.

<sup>48</sup> Na'ch golle' noola':

—Ba biyakxen saaxya cho'ka'.

<sup>49</sup> Na' beŋ'ka' chi'lengake' Jesúsza' txen wzologake' che' ljjwellgake':

—¿Nora beeni, Ila, axt saaxyaka' chizi'xene'?

<sup>50</sup> Na' Jesúsza' chi'e noola':

—Daa chonjilaloo nad', ba bilo' lao yel' zak'zi'na'.  
Biyaj mbalaz.

### Noolka' goklengake' Jesúsza'

**8** Ka wde dga, wda Jesúsza' zan yell xen na' zan yell-do', chyixji'e dill' koba' nan Chioza' chnabi'e loo yichjall'do' beŋ'ka' chzenag che'. Na' postl che'ka' shllin chdalengake'ne' txen. <sup>2</sup> Na' lekzka' len bal' noolka' ba biyone'. Bale' bibeje' dii xiw'ka' wyoogake', na' zi bale' gogkake' yillwe' na' biyone' legake'. Na' ladje'ka' len Mariana', noola' nsi'gake' Magdalena, beena' bibej Jesúsza' gall dii xiw'ka'. <sup>3</sup> Na' lekzka' len noola' le Juana, xool Chúzana', beena' ngoo lo nee chap chwie' lill Heródeza'. Na' len Susánana', na' zanch noolka' beŋ'ka' jano Jesúsza' na' bchingake' dii de chegake' kwenche goklengake'ne'.

### Jempl che to beŋ' goz goon

(Mt. 13:1-9; Mr. 4:1-9)

<sup>4</sup> Beŋ' zan bllesh to to yell jawiagake' Jesúsza', na' ka bdo'p beŋ' zan wal na'ch bseesile' legake' to jempl, chi'e:

<sup>5</sup> —To beŋ' goz goon wzee zeje' goza'. Na' ka zej chzalee bignā, balan bxop cho'a neza' na' blej bshoshj beŋ' len, na' bllin byin'ka' wdaogakban. <sup>6</sup> Na' zi balan bxop ladj yajka' gana' bitek chi' yona', na' ka bla'gakan to wbillzgakan, la' aga bi gop' de gana' bxopan. <sup>7</sup> Na' zi balan bxop ladj yag yesh'ka', na' ka bla'gakan aga be' yag yesh'ka' latj igolgakan. <sup>8</sup> Na' zi balan bxop lo yo wenna', na' le bgolgakan na' axt do to guioa wej wllia to ton.

Na' ka biyoll bseese jempla', na'ch wnie' zilljə chi'e:

—Le' chenile dga nia', li sen wneyi.

### Bzajni Jesúsza' bighe chzoe' jemplka'

(Mt. 13:10-17; Mr. 4:10-12)

<sup>9</sup> Na'ch wñab beŋ'ka' nakgake'ne' txen bi zejin jempla' daa bseese. <sup>10</sup> Na' che' Jesúsza' legake':

—Chioza' cho'e latj inezile daa kono nezkzi, ka chnabi'e loo yichjall'do' beŋ'ka' chzenaggake' che'. Na' beŋ'ka' sto chseesid' legake' shgal' jempl, la' la'kzi chle'gakile' bin chon', kon chongake' ka beŋ' bi chle'i. Na' la'kzi chengakile' bin nia', aga chajni'gakile'n.

**Bzajinii Jesúza' bi zeji jempl che beŋ' goz gooŋa'**  
(Mt. 13:18-23; Mr. 4:13-20)

<sup>11</sup> 'Kin zeji jempl che beŋ' goz gooŋa': cho'a xtill' Chioza' nakan ka biŋna' daa goze'. <sup>12</sup> Na' zoa beŋ' chzenaggake' cho'a xtill' Chioza', na' lii ze'te dii xiwaa chikwasan daa kwenche bi shajle'gake' na' kwiayi'gake'. Chak chegake' ka gok che biŋna' daa bxop cho'a neza'. <sup>13</sup> Na' zoa beŋ' chibagakile' chzenaggake' cho'a xtill' Chioza' na' chlebgake'n, per kat' chak bi chak chegake' na' chbej yichjgake'n. Chak chegake' ka gok che biŋna' bi bde loinna' daa bxopan lo yaja'. <sup>14</sup> Na' zoa beŋ' chzenague' cho'a xtill' Chioza', per chi'ch yichjgake' daa chak chegake' na' che yel' wni'ana', na' che bichlæ dii chzelall'gake', na' bi chakchagake' lo xŋez Chioza'. Chak chegake' ka gok che biŋna' bxop ladj yag yesh'ka'. <sup>15</sup> Na' zoa beŋ' chzenaggake' cho'a xtill' Chioza' do yichj do lall'gake' na' chongake' ka nan, na' chzo chzakgakile' bittezæ dii chak chegake'. Beŋ'kin chak chegake' ka gok che biŋna' bxop lo yo wenna' daa le wllia.

**Jempl che to kandil**  
(Mr. 4:21-25)

<sup>16</sup> Biga zoa to beŋ' chxene' kandila' na' chdose'n to dii kwashaan daa wa chzoe'n xan xlague'na', san chzoe'n sibæ kwenche ile'i beŋ'ka' sho' loo yooŋa'. <sup>17</sup> Na' lekzka' yog'loŋte dii ngash' ŋaa, wllin lla yila' law-in, na' daa kono ŋezi ŋaa, wllin lla iŋezi beŋaan. <sup>18</sup> 'Li wzenag dga nia' le' ŋaa. Beena' chzenag zizikchli shajni'chile', na' beena' bi chzenag, daa ba bzenague' lat', yog'loŋan yiya-lalle.

**Xŋa' Jesúza' len beŋ' bisheeka'**  
(Mt. 12:46-50; Mr. 3:31-35)

<sup>19</sup> Na'ch bllin xŋa' Jesúza' len beŋ' bisheeka' gana' zoe', na' bi gok ibig'gake' kwite'na' daa lle' beŋ' zan. <sup>20</sup> Na' wbig' to beŋ' golle' Jesúza':  
—Xŋooŋa' len beŋ' bishooka' lle'gake' lesh' chyooŋa' na' cheengakile' wshaljengake' li'.  
<sup>21</sup> Na' goll Jesúza':  
—Beŋ'ka' chzenaggake' cho'a xtill' Chioza' na' chongake' ka nan, legaken' nakgake' xŋa' na' beŋ' bishaa.

**Jesúza' bkweze' to be' wal lo nido'na'**  
(Mt. 8:23-27; Mr. 4:35-41)

<sup>22</sup> To lla wyoo Jesúza' to loo barkw len beŋ'ka' nakgake'ne' txen na' golle' legake':  
—Techo shjaalæ nido'ni.  
Na'ch wza'gake'. <sup>23</sup> Na' shlak ngoo barkwa' nez, wtes Jesúza'. Na'ch wze to be' wal lo nido'na' na' wzolo chas chat' nisa' na' biyollan loo barkwa', na' zi lat'zæ nan kwe'n yel. <sup>24</sup> Na' jasangake' Jesúza', che'gake'ne':  
—¡Maestro! ¡Maestro! ¡Ba chbe'cho yel!  
Na' wyas Jesúza' na' bsheshlene' be'na' len nido'na'. Na' wlezkakan, bich bi gok. <sup>25</sup> Na'ch golle' legake':  
—¿Abi chonjilall'kzle nad'?

Na' legake' le chlebgake' na' le chibangakile' na' che' ljjwellgake':  
—¿Nora beeni lla?, axt be'na' na' nido'na' chzenaggakan che'.

**Bibej Jesúza' dii xiwaa yoo to beŋ' Gadara**  
(Mt. 8:28-34; Mr. 5:1-20)

<sup>26</sup> Na'ch bllingake' yell-lío che beŋ' Gadáraka', daa lliia shlaa nido'na' ndiŋ yell-lío che Galileana'. <sup>27</sup> Ka bichej Jesúza' loo barkwa' jabig' to beŋ' Gadara kwite'na'. Ba wlla yo'e dii xiw'ka', na' bich bi xalaane' nakw, ni bich zoe' lille', san kapsanta' noni lille'. <sup>28</sup> Na' ka ble'ile' Jesúza', besyee na' jaçhek' xibe' lawe'na', na' zillj inlleb chi'e:

—Jwayiz nad', Jesús Xiŋ Chios, beŋ' nak liizelozi beŋ' choo beŋ' xen. Ben goklen bi wsak'zi'o nad'.

<sup>29</sup> Gollan ka' daa ba chon Jesúza' byen yichejan. Ba wlla chŋabi'an le' na' la'kzi chchejgake' ŋi'a neena' gdenna', lobe' chçhogue'n. Na' dii xiwaa chtadon le' na' chjsoe' ga kono beŋ' lle'. <sup>30</sup> Na' che' Jesúza':

—¿Bin lio'?

Na' chi'e:

—Legiónan lia'.

Golle' ka', la' zanannan' yo'e. <sup>31</sup> Na' got'yogakin Jesúza' bi wseleegakan gana' kwiayi'gakan. <sup>32</sup> Na' gaozæ zoa to yaa gana' lle' kush zan chaogakb. Na' dii xiw'ka' wzeyidgakan wŋabgakin Jesúza' wi'e latj yiy-oogakan kushka', na' bi'e latj. <sup>33</sup> Na'ch bichej dii xiw'ka' yoo beena' na' biyoogakan kushka'. Na' lii goklleshtegakib na' jabixgakb to cho'a bdiŋj na' jshoogakb loo nisa' na' witgakb.

<sup>34</sup> Na' beŋ'ka' chap kushka' ka ble'gakile' daa gok, biyajdogake' jazengakile'n beŋ'ka' lle' yella' na' beŋ'ka' lle' lyixaa. <sup>35</sup> Na'ch bllesh beŋ'ka' jawiagake' daa gok. Na' ka bllingake' kwit Jesúza', na' chi' beena' wyoo dii xiw'ka' kwite'na'. Ba biyakw xalaane'na' na' ba biyeen biyeeniile'. Na' bllebgake'. <sup>36</sup> Na' beŋ'ka' ble'gakile' daa gok, gollgake' beŋ'ka' zi' bllin nakan gok biyaki beena' wyoo dii xiw'ka'. <sup>37</sup> Na' yog'loŋ beŋ' Gadáraka' got'yo-gakile' Jesúza' yizee lalle'ka' daa le chlebgake' ka bene'. Na' biyo'e loo barkwa' ziyaje'. <sup>38</sup> Na' beena' bichej dii xiw'ka' got'yoile' Jesúza' wi'e latj shajlene'ne'. Per Jesúza' chi'ene':

<sup>39</sup> —Biyaj lillo'na' na' jaye' dill' ka nak dii wen dii shawaa daa ba ben Chioza' cho'.

Na'ch biyaj beena' jayee dill' doxen yella' ka nak dii wen dii shawaa daa ben Jesúza' che'.

**Biyon Jesúza' noola' bexee xe'na' na' lekzka' xiŋ jairona'**

(Mt. 9:18-26; Mr. 5:21-43)

<sup>40</sup> Ka bllin Jesúza' shlaa nido'na', le chiba chizaki beŋ'ka' lle' na', la' yog'zgake'n chbezgake' le'. <sup>41</sup> Na'ch bllin to beŋ' le Jairo, nake' to beŋ'ka' chgoo xŋezi cheyi diika' chon beŋ' Israelka' gana' chdop chllaggake' choe'llwillgake' Chioza'. Na' bçhek' xibe'na' lao Jesúza' na' got'yoile'ne' shaje' lille'na', <sup>42</sup> daa ba chakshwet bi' nool che'na'. Nakk' to bi' tlish' tyaj, na' ka do shllŋ yiz-



ib'. Na' shlak zej Jesúza' beŋ' zan janogake'ne' axt  
bdakwyillgake'ne'.

<sup>43</sup> Na' ladj beŋ'ka' zjano Jesúza' len to noolə ba gok  
shllin yiz chzoe' wbaana'. Na' ba bliiayee yog' dii de  
che' daa chajtezi chaje' lao beŋ' wen rmechka', na' ni  
to kono gok yiyon le'. <sup>44</sup> Na'ch wbiguee koll' Jesúza'  
bexee xe'na', na' katena' lii biyakteile'.

<sup>45</sup> Na'ch goll Jesúza' beŋ'ka' zjano le':

—¿No beena' ba beŋ' nad'?

Na' ni to kono bcheb. Na'ch goll Pédrone'ne':

—Maestro, beŋ'kin chdakwyillgake' li' na' chllig'gake'  
li' to ki to ka'lə. ¿Biŋhe nazo': "Non ba beŋ' nad'?"

<sup>46</sup> Na' che' Jesúza' legake':

—Nochodan' ba beŋ' nad', la' gokbe'teid' bchej yel'  
wak cha'na'.

<sup>47</sup> Na' noola', ka gokbe'ile' aga wak wkwashee, do  
chllebze' jachek' xibe'na' lao Jesúza'. Na' lao yog'loj  
beŋ'ka' lle' na', golle' biŋhe beŋ'ze' xe'na' na' daa  
beŋ'kean lii biyakteile'. <sup>48</sup> Na'ch goll Jesúza'ne':

—Xiin', daa chonlilalloo nadaan biyakilo'. Biyaj mbal-  
az.

<sup>49</sup> Ni choe'telə Jesúza' dill' ka bllin to beŋ' wzee lill  
Jairona', na' jelle'ne':

—Ba wit bi' cho'na'. Bich gonilo' Maestroni zed.

<sup>50</sup> Na' ka beni Jesúza', na' golle' Jairona':

—Bi illebo'. Wyajle' cha', na' wiyakkzi bi' cho'na'.

<sup>51</sup> Na' ka billingake' lille'na', aga be' Jesúza' latj sho'  
beŋ' yoblə, lete Pédrone', Jacóbona', Juanna' na' xaxŋa'  
bi' weta'zə. <sup>52</sup> Yog'loj beŋ'ka' lle' lill Jairona' chbellgake'  
daa ba wit bi'do'na'. Na' goll Jesúza' legake':

—Bi kwell-le, aga witbaan, cheszbään.

<sup>53</sup> Na' bxill-ləgake' che', la' nezgakile' ba witbaan.

<sup>54</sup> Na'ch beŋ' Jesúza' na' bi' wetdo'na' na' wnie' zilljə,  
chi'e':

—Biyas, bi'do'.

<sup>55</sup> Na'ch bibam' na' lii biyasteb'. Na' goll Jesúza' le-  
gake' we'gake' dii gaob'. <sup>56</sup> Na' xaxŋa'baa le bibangak-  
ile', na' che' Jesúza' legake' ni to kono ye'gake' daa gok.

### Beŋ'ka' shllin jtixje'gake' cho'a xtil' Chioza'

(Mt. 10:5-15; Mr. 6:7-13)

**9** Na' bitop Jesúza' beŋ'ka' shllin, na' bi'e legake' yel'  
wak na' yel' wŋabia' kwenche yibejgake' yog'loj dii  
xiw'ka' yoo beŋ' na' yiyongake' beŋ' che'i yillwe'. <sup>2</sup> Na'  
bselee legake' kwenche lje'gake' dill' ka nak yel'  
wŋabia' che Chioza', na' yiyongake' beŋ'ka' bi shao'.

<sup>3</sup> Na' chi'e legake':

—To ka chazlen li shaj. Bi gox'le yag bar, bi wa'zle yixj  
ga koo xshinlazle, bi wa'le dii gaole, ni mech, na' ni zi  
shkwe' xale. <sup>4</sup> Na' yoona' gana' illinle, na'teza soale axt  
ka illinch lla yiza'le. <sup>5</sup> Na' yella' gana' bi wlebgake' le',  
kat' yiza'le, yishible bishtena' lla ŋi'aleka' kwenche  
gakbe'gakile' aga wenan chongake' bi chlebgake' cho'a  
xtil' Chioza'.

<sup>6</sup> Na'ch wza' beŋ'ka' nakgake'ne' txen na' wyajgake'  
to to yell wdixje'gake' dill' wen dill' kob che Chioza' na'  
biyongake' beŋ'ka' bi shao'.

### Wit Juanna', beena' bchoa beŋ' nisa'

(Mt. 14:1-12; Mr. 6:14-29)

<sup>7</sup> Heródeza', beena' wŋabia' gana' mbani Galileana',  
benile' yog' daa chon Jesúza'. Na' chakile' nora beena',  
la' bal beŋ' nagake' dii Juan wichoa nisan' ba bibane'  
dii yoblə. <sup>8</sup> Na' zi bale' nagake' Elíazan' ba bila' dii  
yoblə. Na' zi bale' nagake' nochod' dii beŋ'ka' wdixjee  
daa goll Chioza' legake' kani'yin ba biban ladj beŋ' wet-  
ka'. <sup>9</sup> Na' Heródeza' wne':

—Nad' ben' mandad wchog yen dii Juanna'. ¿Noraz  
beena' chenzid' nagake' chiya dii chone', lla?

Na' le goklall' Heródeza' ile'ile' Jesúza'.

### Jesúza' bwawe' gayaa mil beŋ'

(Mt. 14:13-21; Mr. 6:30-44; Jn. 6:1-14)

<sup>10</sup> Na' ka billin postlka' shllin, na' gollgake' Jesúza'  
yog'loj diika' jengake'. Na'ch bchi'e to lezgake' yella' le  
Betsaida. <sup>11</sup> Na' ka wŋezi beŋ'ka' ba zej Jesúza', na'ch  
wloogake' nez zjanogake'ne' na' ka bllingake' lawe'na',  
blebe' legake' na' bzajniile' legake' ka nak yel' wŋabia'  
che Chioza', na' biyone' beŋ'ka' bi shao'.

<sup>12</sup> Na' ka ba wlle', beŋ'ka' shllin jabig'gake' kwit  
Jesúza' na' gollgake'ne':

—Goll beŋ'ki yiyajgake' yellka' wa no ranshdo'ka' lla  
gaozə lljadiljgake' dii gaogake' na' ga guesgake', la' ga  
ni zoacho bikzə bi de.

<sup>13</sup> Na' che' Jesúza' legake':

—Len', li we' dii gaogake'.

Na'ch che'gake'ne':

—Gay'lish'tgui yetxtilki napcho na' zi chopchga bel,  
lechozə shi willjxi'chnto' che yoguee.

<sup>14</sup> Gollgake'ne' ka' la' ka do gayaa mil beŋ' byoka' lle'  
na'. Na'ch che' Jesúza' beŋ'ka' shllin:

—Li ye'gake' kwe' shiyon wejgake'.

<sup>15</sup> Na' bzoagake' xtillee na' wlekgake' beŋ'ka'. <sup>16</sup> Na'ch  
beŋ' Jesúza' yetxtilka' gay' na' bel'ka' chop. Na' blis  
jalawe'na' yabana' bi'e Chioza' yel' choxken, na' bxox-  
je'n na' bi'en beŋ'ka' nakgake'ne' txen na'ch be'gake'  
che che beŋ'ka'. <sup>17</sup> Na' yog'gake' wdao ka beljgakile',  
na' diika' bichoonan bitopgake'n biyakten shllin xet'.

### Pédrone' bi'e dill' nan Jesúza'n beena' wlej Chioza' inabi'e

(Mt. 16:13-19; Mr. 8:27-29)

<sup>18</sup> To shii ka choe'llwill Jesúza' Chioza', na' lle' beŋ'ka'  
nakgake'ne' txen, na' wŋabile' legake':

—¿Non na beŋ'ka' nak'?

<sup>19</sup> Na' che'gake'ne':

—Bale' nagake' nako' dii Juan wichoa nisa', na' zi  
bale' nagake' nako' Elíaza', na' zi bale' nagake' nako' to  
beŋ' wdixjee daa goll Chioza'ne' kani'yi, na' ba bibane'  
ladj beŋ' wetka'.

<sup>20</sup> Na'ch chi'e legake':

—Shera le', ¿nora nale nak'?

Na'ch che' Pédrone'ne':

—Lin' Crístona', beena' ncheb Chioza' wselee.

<sup>21</sup> Na'ch goll Jesúza' legake' ni to kono ye'gake' ka'.

**Goll Jesúza' postl che'ka' wit ben' le'**

(Mt. 16:20-28; Mr. 8:30-9:1)

<sup>22</sup> Na' chi'e legake':

—Kon ka nchogbia' cha', nad', Ben' Bsel' Chioza' Yell-lioni, biya dii wchi' wsak'gake' nad'. Na' ben' golka' chnabia' wzoagake' nad' ka'lə na' ka'kzə bχozka' chnabia' na' ben'ka' chli' chsedi leya'. Na' chonan byen witgake' nad', na' ka' gak shon lla yiban' ladj ben' wet-ka'.

<sup>23</sup> Na'ch golle' yog'lole':

—Shi no cheeni gon nad' txen, chiya' wsanlall' kwine' na' izanile' ye' mban che'na' yen ile'ile' bittez ni cha', na' gone' ka chazlallaa. <sup>24</sup> La' beena' bi chzani ye' mban che'na' yen ile'ile' bittez ni cha', beenan' kwiayi'. San beena' chzani ye' mban che'na' ni cha', beenan' gat' to ye' mban che' zejli kan'i. <sup>25</sup> Bibi zjanayin gap ben' yog'lo' daa de yell-lioni, shi le' kwiayee. <sup>26</sup> Nottezə ben' chiyi chido'i nad' na' che cho'a xtillaana', ka'kz nad', Ben' Bsel' Chioza' Yell-lioni, yiyi yido'id' le' kat' yiyed' kon balaan xen cha'na', na' che Xa' Chioza' na' che anjl che'ka'. <sup>27</sup> Na' dii li nia' le', bal-le lle'le ni, ni mbanle kat' wli' Chioza' ye' wñabia' che'na'.

**Jesúza' biyake' nlla'lə**

(Mt. 17:1-8; Mr. 9:2-8)

<sup>28</sup> Ka gok do to xman wna Jesúza' ka', na'ch wyaje' to lo yaa kwenche jelwille' Chioza' na' bchi'e Pédróna', Juanna' na' Jacóbona'. <sup>29</sup> Na' shlak choe'lwille' Chioza', biyak cho'alawe'na' nlla'lə, na' biyak xe'na' xtil ax't chey cheeni'n. <sup>30</sup> Na' gokxe chop ben' bshaljengake'ne', toe' dii Moiséza' na' beena' sto Elíaza'. <sup>31</sup> Na' ye' chey cheeni'na' nechjan legake'. Na' chshaljengake'ne' che ka nak ye' wita' ile'ile' Jerusalénna'. <sup>32</sup> Na' Pédróna' len Juanna' na' Jacóbona' le chakxwesgake', per bendiplall'gake' bi wtesgake', na'ch ble'gakile' ye' chey cheeni' che Jesúza' na' che ben'ka' zi chop bllin kwite'na'. <sup>33</sup> Na' ka ba chikwas dii Moiséza' na' Elíaza' kwit Jesúza', Pédróna' golle' Jesúza':

—Maestro, jle wen zoacho nizə! Gonnto' shonə ransh, to cho', to che dii Moiséza' na' sto che Elíaza'.

Na' ni bi gokbe'i Pédróna' bin golle'. <sup>34</sup> Na' ni choe'tie' dill', ka wze to bej gana' lle'gake' na' bkwashaan le-gake'. Na' le bllebgake' ka gokbe'gakile' ba yoogake' loo beja'. <sup>35</sup> Na' loo beja' bengakile' shii Chioza', chi'e legake':

—Beenin xiinaa, na' le chakidee. Li wzenag che'.

<sup>36</sup> Na' ka wde goll Chioza' legake' ka', na' ble'gakile' stožə Jesúza' ze. Na' ni to kono gollgake' daa ben ble'gakile'.

**Biyon Jesúza' to bi' wew' yoo dii xiwaa**

(Mt. 17:14-21; Mr. 9:14-29)

<sup>37</sup> Betyo, ka biyetjgake' lo yaana', ben' zan wal jatil-gake' legake'. <sup>38</sup> Na'ch ladj ben'ka' wne to ben' byo zillj, chi'e Jesúza':

—Maestro, ben goklen bwiagach bi' cha'ni, la' tlish' tyajchgabaan zoa. <sup>39</sup> Dii xiwaa choxa'n le'b' na' tokon-

ganz chosyaab', na' chonan ka chazb' shon ax't chbia bllin' cho'abaa. Na' chiya dii chonin le'b', na' aga cheenin wsanan le'b'. <sup>40</sup> Ba got'yoid' ben'ki nakgake' li' txen yibejgachgake' dii xiwaa yoob', na' bi gokgake' yibejgake'n.

<sup>41</sup> Na'ch che' Jesúza':

—jZi'tegalə chelena', le' ben' mal na' ben' bi chajle! jZi ka'k'tek chiya' soalen' le'? Na' jzi ka'k'tek chiya' soid' le'? Da diwa' bi' cho'na' ni.

<sup>42</sup> Na' ka zej bi'na' kwit Jesúza' na' wchoon dii xiwaa le'b' lo yona' na' wyazb' shonə sto shii. Na'ch bsheshlen Jesúza' dii xiwaa na' bichejan, na' biyakib'. Na' biyone'b' lall' na' xabaa. <sup>43</sup> Na' yog' ben'ka' lle' na' bibangakile' daa ble'gakile' ye' wak xen che Chioza'.

**Sto shii wdixjee Jesúza' witgake'ne'**

(Mt. 17:22-23; Mr. 9:30-32)

Na' shlak chibani yog' ben'ka' ble'i daa ben Jesúza', na' golle' ben'ka' nakgake'ne' txen:

<sup>44</sup> —Li wzeyen' nagle dga inia' le': gongake' nad', Ben' Bsel' Chioza' Yell-lioni, lall' na' ben'ka' chakzi' chakzbani nad'.

<sup>45</sup> Na' bi wyajni'gakile' bin golle', la' ni ngashaan lawe'ka' kwenche bi shajni'gakile'n. Na' bllebgake' inabgakile'ne' bi zej in daa golle' legake'.

**jNoran zak'chi?**

(Mt. 18:1-5; Mr. 9:33-37)

<sup>46</sup> Na' wzolo chakdi-len ljwellgake' nogaken' nak ben' zak'chi. <sup>47</sup> Ka gokbe'i Jesúza' daa chza'lall'gake', na'ch wdoyoe' to bi'do' na' bzie'b' kwite'na'. <sup>48</sup> Na' chi'e le-gake':

—Nottezə ben' wlebe' laa to bi'do'zə ka bi'do'ni daa chonjilallee nad', nad'kzan chlebe'. Na' beena' chlebe' nad', lekzka' chlebe' Chioza', beena' bsel' nad'. Na' beena' chaki bibi zakee lao yog'le, len' nake' ben' zak'chi ladjlena'.

**Beena' bi chakile' cho' zi', txenkzan nake' cho'**

(Mr. 9:38-40)

<sup>49</sup> Na'ch goll Juanna'ne':

—Maestro, ba ble'into' to ben' chzetje' lio'na' kwenche chibeje' dii xiw'ka' yoo ben'. Na' bllonnto' gone' ka', la' bi nake' cho' txen.

<sup>50</sup> Na' che' Jesúza' legake':

—Bi wllonle gone' ka', la' beena' bi chakile' cho' zi', txenkzan nake' cho'.

**Jesúza' bsheshlene' Jacóbona' len Juanna'**

<sup>51</sup> Na' ka ba zoa yiyaj Jesúza' yabana', na'ch btoblallee yiyaje' Jerusalénna'. <sup>52</sup> Na' bselee ben' wlialozegagake' na' wyajgake' to yell daa mbani Samáriana' jtijlgake' gana' yigaane'. <sup>53</sup> Na' ben' Samáriaka' bi blebgake'ne' daa nezgakile' Jerusalénna'lan yiyaje'. <sup>54</sup> Na' chop ben'ka' nakgake'ne' txen, Jacóbona' len Juanna', ka ble'gakile' ka ben ben' Samáriaka', na' che'gake' Jesúza':

—Xan', zacheenilo' inabinto' Chioza' wselee yi'na' kwenche sheytega be'ki?

<sup>55</sup> Na' biyechj Jesúza' bsheshlene' legake', chi'e:

—Aga nezile non chnabia' yichjlall'do'lena' nazle ka'.

<sup>56</sup> Nad', Ben' Bsej' Chioza' Yell-lioni, aga zaa kwenche wlliyaa ye' mban che be', san zaa kwenche yisla' ye' mban che'kan'.

Na'ch biyajgake' yell yoblə.

### Ben'ka' goklall' Iljano Jesúza'

(Mt. 8:19-22)

<sup>57</sup> Na' ka zejgake' tneza', to be' chi'e Jesúza':

—Xan', cheenid' sa'len' li' gattezə shajo'.

<sup>58</sup> Na' che' Jesúza'ne':

—Zoa yech ga chiyoo bez'ka', na' byindo'ka' non lill-dogakb, san nad', Ben' Bsej' Chioza' Yell-lioni, biga de yigaan'.

<sup>59</sup> Na'ch che' Jesúza' sto be':

—Da dino nad'.

Na' beena' chi'ene':

—Xan', ben goklen be' latj zigaate lljakwashaa xa'na'.

<sup>60</sup> Na'ch che' Jesúza'ne':

—Bibi gakilo', wikwash'kzə ljwell be' wetka'. San li', jtixje'i be' ka nak ye' wñabia' che Chioza'.

<sup>61</sup> Na'ch sto be' yoblə chizi'e Jesúza':

—Xan', cheenid' sa'len' li' per zigaate be' latj lljalaach' dill' bish' ljwell'ka'.

<sup>62</sup> Na' che' Jesúza'ne':

—To be' chwaanə' goon, aga wak wwie' gozkoll'ə. Na' ka'kzan nakan che beena' noe' nad', shi bi nchoglallee aga wak gone' ka cheeni Chioza'.

### Jesúza' bselee guiyon shllin be' jtixje'gake' cho'a xtilleena'

**10** Na' ka wde dga, Jesúza' wleje' zi guiyon shi be' † na' bselee chop weje' wllialogake' lawe'na' kwenche llje'gake' cho'a xtilleena' yellka' gana' llia bia' shaje'. <sup>2</sup> Na' golle' legake':

—Dii li nia' le', dii xen wal daa yizi' yilaple de, na' to choptgui wen llinka' zoa. Na' li inabi Chioza', beena' nak xan llinna' wsej'stoe' wen llinka' kwenche yizi' yilapgabe'n. <sup>3</sup> Li shajshki naa, nad' chsejaa le' ka xil'do' ba zej ladj ba zña. <sup>4</sup> Bi wa'le ga koo xshinlazole, ni mech, ni zi shkwe' xel-le; na' bi shazile wwaple be' chiox tneza'. <sup>5</sup> Na' ka sho'le to lill be', zigaate wwaplene' chiox, ye'lene': "Soashgale mbalaz, le' zoale yooni." <sup>6</sup> Na' shi zoa be' cheenile' soe' mbalaz, na' ye' mbalaza' yigaanlenan le'. Na' shi bi cheenile', na' yibi-ilenan le'. <sup>7</sup> Na' yoonā' gana' illinle na'tezə yigaanle na' yeej gaole kon bi gongake' le', la' to wen llin chiya' l' ikaa laxje'. Na' bi lljsoale to to yoo. <sup>8</sup> Kat' illinle to yell ga wlebgake' le', yeej gaotezle bittezə dii gongake' le'. <sup>9</sup> Na' yiyonle be'ka' bi shao' yella', na' ye'le legake': "Ye' wñabia' che Chioza' ba bla'n laoleni." <sup>10</sup> Na' shi illinle to yell ga bi wlebgake' le', li yide lyell, li ye'gake': <sup>11</sup> "Axt bishte che yell cheleni wllia ni'anto'ni chibibn-

to'n kwenche gakbe'ile aga wenan chonle bi chleble cho'a xtill' Chioza'. Na' li koosha yichjle dga inanto' le', ye' wñabia' che Chioza'n ba bla'n laoleni." <sup>12</sup> Na' nia' le', be'ka' lle' yellka' gana' bi wlebgake' le', dii xench nak ye' zak'zi'na' ile'gakile' aga ka be' yell Sodómaka' llana' wchoglo Chioza' che be'.

### Ben'ka' bi bzenag xtill' Jesúza'

(Mt. 11:20-24)

<sup>13</sup> 'Nyesh'laz gak chele, le' be' yell Corazín na' le' be' yell Betsaida! La' shel' gok ye' wakka' yell Tírona' na' Sidónna' ka diika' ba gok ladjlena', kana'telja biyaj bilengakile' saaxya che'ka', na' ba wche'gake' bwazj-gake' dena' yichjlaogake' na' gokwgake' lech' zeshaa, kwenche wli'gake' nan ba biyaj bilengakile' daa chongake', shel'ka'. <sup>14</sup> Kat' illin lla wchoglo Chioza' che be', ye' zi' xench ile'ile aga ka be' yell Tíroka' na' be' yell Sidonka'. <sup>15</sup> Na' le' be' yell Capernaúm, bi gonle lez yillinle yabana', la' Chioza' wazlee le' gana' sak'zi'le.

<sup>16</sup> Na'ch che' Jesúza' be'ka' bselee:

—Ben'ka' chzenaggake' chele, cha'kzan chzenaggake'. Na' be'ka' bi chlebgake' le', nad'kzan bi chlebgake'. Na' beena' bi chlebe' nad', lekzka' bi chlebe' Chioza', beena' bsej' nad'.

### Billin be'ka' guiyon shi

<sup>17</sup> Na' be'ka' guiyon shi † le chibagakile' ka billingake' kwit Jesúza', na' che'gake'ne':

—Xan', axt dii xiw'ka' chilleshgakan ka chzetzjnto' lio'na'.

<sup>18</sup> Na'ch che' Jesúza' legake':

—Ble'id' Satanáza' daa chnabia' dii xiw'ka' bxopan yabana' ka chxop to yi' wziw'. <sup>19</sup> Nad' ba be' le' ye' waka' kwenche la'kzi gad' no be' zña wa no be'xjoni' le' aga bi gakile', na' wlej wshoshjtele yog' daa chon dii xiwaa. <sup>20</sup> Per bi yibaile daa chisheshle dii xiw'ka', san li yibayi daa ba da' lelana' lee libra' de yabana'.

### Jesúza' bibaile'

(Mt. 11:25-27; 13:16-17)

<sup>21</sup> Na' katena' Espíritu Sántona' bene' ka bibachgayi Jesúza', na' wne':

—Xa, li' nako' Xan yabana' na' yell-lioni, na' choe'lawa' li' daa ba bliilo' be'ka' bibi chajni' daa bi bliilo' be' sin'ka' na' be'ka' nteyi. Kan' ba wyazlalloo gono', Xa.

<sup>22</sup> Xa'na' ba none' lall' na' yog'te dii de. Na' ni to kono nezi noyən'an nak' nad' Xiine'; toz Xa'na' nezile'n. Na' ni to kono nezi noyən'an nak' Xa'na'; toz nad' Xiine' nezid', na' chon' ka nezi be'ka' cheenid' ne'zgakile'n.

<sup>23</sup> Na'ch biyechje' bwie' be'ka' nakgabe'ne' txen, chi'e legake':

—Chakomba be'ka' chle'gakile' diika' chle'ile naa.

<sup>24</sup> Nia' le' ka', la' zan be'ka' wdixjee daa goll Chioza' legake' na' zan be' wñabia'ka' goklall'gake' ile'gakile' di-

iki chle'ile naa, na' bi ble'gakile'n. Goklall'gake' yengak-ile' dga chenile naa, na' bi bengakile'n.

### To beṅ' Samaria bene' to dii wen

<sup>25</sup> Na'ch wbig' to beṅ' chli' chsedi leya' wṅabile' Jesúza' kwenṅheza inēzile' shi wak yillii Jesúza' xtilleena', na' wṅabile'ne':

—Maestro, ḡbin chiyaḡ gon' kwenṅhe gat' to yel' mban ḡha' zejli kaṅi?

<sup>26</sup> Na'ch che' Jesúza'ne':

—ḡBin na leya' chiyaḡ goncho? ḡBi na daa chlabo'?

<sup>27</sup> Na'ch beena' chli' chsedi leya' chi'e:

—“Chiyaḡ' gakicho Ḳancho Chioza' do yichj do lall'cho, do ka nak fuerz ḡhechona', na' axt ga zeelo chajniicho; na' gaki bish' ljwellcho ka chaki kwinchō.”

<sup>28</sup> Na'ch che' Jesúza'ne':

—Kayen'nan nakan ka ba wno'. Shi gono' ka nan, na' gat' to yel' mban ḡho' zejli kaṅi.

<sup>29</sup> Na' beena' bi goklall' wṅit kwine', na'ch chi'ene':

—ḡNoran bish' ljwell'?

<sup>30</sup> Na'ch che' Jesúza'ne':

—To beṅ' ziyo'e nez daa ziza' Jerusalenna' daa ziyaj Jericólā, na' bchej wbanka' tneza' wlangake' yog'te di-ika' zino'e axt len xe'na' daa nakwe' goljgake', na' bet wdingake'ne', sto chdoaze' bengake', na' bixonjgake'.

<sup>31</sup> Na' shintk gok ka' ka wde to bḡoz lo neza'. Na' ka ble'ile' beena' de na', to wdeze' ka'lā. <sup>32</sup> Na' lekzka' wde to beṅ' nake' xiṅ dia ḡhe dii Levína'. Na' ka ble'ile' chtoḡ beena' na', lekzka' to wdeze' ka'lā. <sup>33</sup> Na' sto beṅ' Samaria lekzka' zeje' tneza' ka ble'ile' beena' chtoḡ na', na' biyeshile'ne'. <sup>34</sup> Na' jabiguee kwite'na', na'ch blie' lo we'na' set na'ch vino, na' bḡheje'n. Na' bilepe'ne' koll' bayix' ḡhe'na', biḡhi'ene' to yoo gana' wdape'ne'. <sup>35</sup> Na' betiyo, ka ba zoa yiza' beṅ' Samáriana', wleje' ḡhop mech plat †, na' bi'en ḡan yoona' kwenṅhe gap wwie'ne' zan lla, na' chi'ene': “Wdap bwiagach beeni, na' shi bi gaki mech chkwaan', na' yiyixja'n kat' zizaa dii yoblā.”

<sup>36</sup> Na' ḡnora beṅ'ki shoṅ chakilo' beni bish' ljwell beena' wlan beṅ' wbanka'?

<sup>37</sup> Na' beena' chli' chsedi leya' chi'ene':

—Beena' biyeshile'ne'.

Na' che' Jesúza'ne':

—Lekzka' li', kan' chiyaḡ' gono'.

### Jesúza' jawie' Márta'na' na' Maríana'

<sup>38</sup> Na' shlak ngoo Jesúza' nez, blline' to yelldo' na' to noolā le Marta blebe'ne' lille'na'. <sup>39</sup> Na' zoa to beṅ' bil Márta'na' lie' María, na' Maríana' wchi'e lao Jesúza' chzenague' dillaa cho'e. <sup>40</sup> Na' Márta'na', dechga daa gone' na' wzeche' wṅeyi ḡheyin, na'ch wyaje' kwit Jesúza', chi'ene':

—Ḳan', goll-lat' beṅ' bila'ni gaklene' nad'. Toz' ndakw' yog' mandadka'.

<sup>41</sup> Na' che' Jesúza'ne':

† Mech plat: dill' griegona' nan denario, na' nakan to mech dii zak' ḡhe shlla llin.

—Marta, Marta, chi'chga yichjo' na' zechgo' wneyi ḡheyi diika' gono'. <sup>42</sup> Per toz daa de nakan dii llialloch na' Maríani ba wleje'n, na' kono gak yikaan lawe'na'.

### Bli' Jesúza' nak we'ljwillgake' Chioza'

(Mt. 6:9-15; 7:7-11)

**11** Shlin choe'ljwill Jesúza' Chioza' to latj, na' ka biy-oll be'ljwille'ne', to beena' nake'ne' txen golle'ne':

—Ḳan', bli'yi neto' nakan chiyaḡ' we'ljwillnto' Chioza', ka ben Juanna' bli' bsdile' beṅ'ka' bengake'ne' txen.

<sup>2</sup> Na'ch che' Jesúza' legake':

—Kat' we'ljwill-le Chioza' kin ināle:

Ḳanto' Chios, beṅ' zoa yaba,

we'la'oshga yog'loḡ beṅ' li'.

Na' inābia'gacho' loo yichjlall'do' yog'loḡ beṅ' kwenṅhe gak lo yell-lioni ka chazlalloo, kon ka chak yabana'.

<sup>3</sup> Ka nak daa choṅo' cheej chaonto' yog' lla, beṅ-gachan ṅaanlla.

<sup>4</sup> Wxi'xen ḡhento', ka chon neto' chzi'xennto' bitteza dii choni beṅ' neto'.

Bi we'gacho' latj ibixnto' gonnto' daa bi nak wen, san bislagach neto' lo ṅi'a na' dii mala'.

<sup>5</sup> Na'ch che' Jesúza' legake':

—Inātezcho shi zoa to beṅ' nllaguile na' do chel shajle lille'na' na' ye'lene': “Beṅ' bish'dawaa, beṅ' shloll nad' shoṅ yetxtil, <sup>6</sup> la' ba bla' lilla'na' to beṅ' nllaguid', zee zit', na' bikza' bi de ḡha' wshabidee.” <sup>7</sup> Na'ch beena' yoo loolā lii inātie' le': “Bi gonzilo' nad' zed, ba nsej' lillii na' ba delen' bi' ḡha'ki. Aga wak ḡhas' gon' daa chyalljilo'.” <sup>8</sup> Na' nia' le', la'kzi nllagteile'ne', bi ḡhase' wi'ene' daa chṅabile'ne'. San shi seyide' inābe'n, chen ki cheenile' ḡhase' wi'e yog' daa chyalljile. <sup>9</sup> Daan nia' le': Li inābi Chioza' bin cheenile na' goṅe'n. Li yiyiljan na' willelkzilen. Li wtankw lee puerta', na' wsaljke'n. <sup>10</sup> La' beena' chṅabile' to bi chṅabile' beṅ', cho'ene'n; na' beena' chiyilje' bi chiyilje', chillelkzile'n; na' beena' chtankwe' to lee puert, na' chsaljkzgabe'n.

<sup>11</sup> “Ka chak ḡhele le' nakle beṅ' chisgol chischoo bi'do', ka inābi xiṅlana' le' yetxtila', aga we'leb' to yaj. Wa shi inābib' le' to beḡ gaob', aga we'leb' to beḡ zṅia. <sup>12</sup> Wa shi inābib' le' to llit gaob', aga we'leb' to beḡjoni”. <sup>13</sup> Le' naktele beṅ' mal, chak we'le xiṅleka' daa nak dii wen. Na' Ḳacho Chioza' zoa yabana' nakteche' beṅ' wench! Na' wi'e Espiritu Santo ḡhe'na' soe' loo yichjlall'do' yog' beṅ' inābe'ne'.

### Nagake' Jesúza' chibeje' dii xiw'ka' kon yel' wak ḡhe Bezlona'

(Mt. 12:22-30; Mr. 3:19-27)

<sup>14</sup> Jesúza' chibeje' to dii xiw' yoo to beṅ' bi chak inie', na' ka bichejan na'ch gok binie'. Na' beṅ'ka' lle' na', bibangakile' daa bene'. <sup>15</sup> Na' baḡe' che'gake':

—Kon yel' wak ḡhe Bezlona', daa chṅabia' dii xiw'kan', chibeji beeni dii xiw'ka'.

<sup>16</sup> Na' zi baḡe' wṅabgakile'ne' gone' to yel' wak dii ile'gakile' kwenṅhe wli'n shi Chioza'kzan bseleene'.

<sup>17</sup> Na' ba nezli Jesúza' daa chza'lall'gake', na'ch chi'e le-gake':

—Shi ben'ka' lle' to yell gake' choplə na' til-len ljuwellgake', na' kwiayi' yella', shi naa. Na' lezkza' shi ben'ka' lle' toz yoo til-len ljuwellgake', aga ssha soagake' toz. <sup>18</sup> Na' ka'kzə Satanáza' na' dii xiw'ka' yoo lo na'yin, shi gake' choplə na' kwiayi' yel' wñabia' cheyinna'. Nia' le' ka' daa nale yel' wak che Bezlonan † chibejid' dii xiw'ka' yoo ben'. <sup>19</sup> Shi chibej' dii xiwaa yoo ben' kon yel' wak che Bezlonan, †† ¿sheralə ben'ka' nakle txen? ¿Alezkza' l'ennan' chibejlengake' dii xiwaa yoo ben'? Daa bi nakan ka', chli'n naklejljen. <sup>20</sup> Na' daa chibej' dii xiwaa yoo ben' kon yel' wak che Chioza', l'ennan' chli'n ba bla' yel' wñabia' che Chioza' ladjleni.

<sup>21</sup> 'Kat' to ben' wal nape' dii gonile' zña na' chape' lille'na', aga no gak lljtoyo dii de che'. <sup>22</sup> Per shi illin sto ben' walch til-lene'ne', na' gone'ne' gan, na'ch yigoyoe' yog' daa none' lez wñiaile', na' kwantie' yog' daa yoo loo lille'na' na' wi'e lat' wej che ben'ka' nakgake'ne' tx-en.

<sup>23</sup> 'Beena' bi nake' nad' txen, chakzbanile' nad'. Na' beena' bi chaklen kwenche wzenag ben' cho'a xtill' Chioza', len' chsej chlone' wzenaggake'n.

#### Chillin dii xiwaa sto shii gana' bichejan

(Mt. 12:43-45)

<sup>24</sup> 'Kat' chichej to dii xiw' dii yoo ben', na' chjadan ga bibi dekzə na' chyiljan gana' yizi'lalliin. Na' shi bi chillelin gana' yizi'lalliin na'ch chakin: "Yiyaachkz' dii yoblə gana' bichejkz'." <sup>25</sup> Na' ka' chillinan gana' bichejan, nakan ka to loo yoo dii nxi nloa na' nakan xochi. <sup>26</sup> Na'ch chza'n chjxi'n zi gall dii xiw'ka' daa nakch dii malch aga ka len, na' yogaan choogakan beena'. Na' chaktechlə mal che beena' aga ka gok che' dii nech.

#### Chakomba beena' chzenag cho'a xtill' Chioza'

<sup>27</sup> Na' shlak che' Jesúza' ka', to noolə zie' ladj ben'ka' lle' na' wñie' zilljə, chi'e:

—iChakomba noola' wxane' li' na' bwall bxo'pe' li'!

<sup>28</sup> Na' che' Jesúza'ne':

—iMbalazch ben'ka' chzenaggake' cho'a xtill' Chioza' na' chongake' ka nan!

#### Ben'ka' bi chajle' che Jesúza' wñabgake' wli'e to yel' wak

(Mt. 12:38-42; Mr. 8:12)

<sup>29</sup> Na' bdi'a bllagch ben'ka' kwit Jesúza' na' golle' le-gake':

—Le' zoale naa, nxinj yichjlall'do'leka'. Chñable wliid' le' to yel' wak, na' aga wliid' le' daa cheenile. Lete ile'ile to dii nak ka yel' waka' daa ben Chioza' che dii Jonáza'.

<sup>30</sup> Daa gok che Jonáza' bli'n yel' wak che Chioza' lao ben' Níniveka'. Kakzə nad', Ben' Bse! Chioza' Yell-lioni, wli'a yel' wak che Chioza' laolena', le' zoale naa. <sup>31</sup> Na' llana' wñoglo Chioza' che ben', na' yiban noola'

† Bezlonan': lezkzannan' Beelzebú de xtil na' nakan sto le Satanáza'. †† Bezlonan': lezkzannan' Beelzebú de xtil na' nakan sto le Satanáza'.

wñabia' do lli'lə, na' gawe' xya chele lao Chioza', le' zoale naa, iñe' chiya! sak'zi'le. La' noola', zit' wal wzee bidzenague' dill' sin'na' daa be' dii Salomónna', na' nad' zoa' ni, nak' ben' zak'chi ka dii Salomónna', na' bi chzenagle cha'. <sup>32</sup> Na' lezkza' llana' wñoglo Chioza' che ben', na' yiban ben' Níniveka' na' gaogake' xya chele lao Chioza', le' zoale naa, inagake' chiya! sak'zi'le. La' legake' biyaj bileni saaxya che'ka' ka be'len Jonáza' legake' cho'a xtill' Chioza', na' nad' zoa' ni, nak' ben' zak'chi ka dii Jonáza', na' bi chzenagle cha'.

#### Jalaochona' nakan ka to yi' che kwerp chechona'

(Mt. 5:15; 6:22-23)

<sup>33</sup> Na' lezkza' chi'e legake':

—Biga zoa ben' chxene' to kandil na' chzoe'n to ga ngash' wa wdoseen to dii kwashaan len, san chzoe'n sibə kwenche ile'i ben'ka' sho' loo yona'. <sup>34</sup> Jalawo'ka' nakan ka to yi' che kwerp cho'na'. Shi jalawo'na' nakan wen, doxen kwerp cho'na' zoan lo beeni'na'. San shi bi chle'i jalawo'na', kwerp cho'na' zoan lo yel chola'. <sup>35</sup> Na' bsak' wze wñeyi kwenche ki lwaa to' lo beeni'na', tazo' lo yel cho'la'lə. <sup>36</sup> Shi doxen kwerp cho'na' yoon beeni', na' ni to dii shgasj shcho! bi yoon, na' ile'ilo' kwaslo! ka chle'ilo' kat' ze to yi' chzeeni'n doxen.

#### Jesúza' chsheshlene' fariseoka' na' ben'ka' chli' chsedi leya'

(Mt. 23:1-36; Mr. 12:38-40; Lc. 20:45-47)

<sup>37</sup> Na' ka biyoll be' Jesúza' dillaa, na' bche' to fariseo le' lljtawe' lille'na'. Na' wyoo Jesúza' lille'na' na' wchi'e cho'a mesa'. <sup>38</sup> Na' farisewa' bibanile' ka ble'ile' bi bina' Jesúza' ka yoologake' chongake' ka zi' gaogake'.

<sup>39</sup> Na'ch che' Xancho Jesúza'ne':

—Le' fariseo nakle ka xig' yeen dii nyib xise' tcho'a tlawin na' lo'inna' besjan. Chaki ben' le ben' wen nakle, len le' chibaile chkaale bi de che ben' na' chibaile chonle bichlə dii mal. <sup>40</sup> iLe' ben' bi nteyi! ¿Abi chakbe'ile Chioza', beena' ben kwerp chechoni, lekke'n bene' yichjlall'do'choni? <sup>41</sup> Li izani bi de chele, li we'n ben' bibi de che', na'ch yixi' yiyech yichjlall'do'lena'.

<sup>42</sup> iNyesh'laz gak chele, le' fariseo! Choe'le Chioza' lat' wej ‡ no yixwej, no kwanirod na' bichlə yix' kwan dii mbekle. Na' bi chonle daa nak shlichə na' bi chakteile' Chioza'. La' daayen'an llialoch gonle per lezkza' bi wsanle kwejle daa chñab Chioza'.

<sup>43</sup> iNyesh'laz gak chele, le' fariseo! Le chibaile kwe'le gana' chbe' ben'ka' zakii gana' chdop chllagcho choe'llwillcho Chioza', na' cheenile yog' ben' kwee le' balaan ga lle' lla' ben'.

<sup>44</sup> iNyesh'laz gak chele, daa nakle ben' wxiye'! Nakle ka to ba che ben' wet dii bi nla' lawinna' dii bi chle'i ben' na' chaj chdegake' lawinna', ni bi chakbe'gakile' bin naki loolə.

<sup>45</sup> Na'ch to beena' chli' chsedi leya' golle' Jesúza':

—Maestro, daa no' ka' len neto' choazi'yoo.

<sup>46</sup> Na' goll Jesúza':

‡ Lat' wej: literalmente la décima parte.

—İlekzka' nyesh'laz gak çehe, le' chli' chsedile leya'! Dii zan dii che'le beŋ' chiya' gongake', na' nakan ka to yoa' xen dii chwa'le İegake' dii kono soyi, na' le' bikz bi chda na'le kwençe gaklenle İegake'.

<sup>47</sup> İNyesh'laz gak çehe! Le' chonshao'zle cho'a ba çe dii beŋ'ka' wdixjee daa goll Chioza' İegake', beŋ'ka' bet dii xozxto'leka'. <sup>48</sup> Na' daa chonle ka' zejın chonle txen dii xozxto'leka' ka nak daa bengake'. İa' İegaken' bet-gake' beŋ'ka', na' le' chonshao'le cho'a ba çe'ka'.

<sup>49</sup> Na' daan, lo ye' sin' çe Chioza' wne': "Wselaa beŋ' chixjee daa yepee na' len beŋ' wi'e cho'a xtillaana', na' baİe' witgake' na' zi baİe' biya dii gongakile'ne'." <sup>50</sup> Na' le' zoale İaa, lenle ile'ile ka ye' zi'na' ile'i beŋ'ka' blalj xçhen dii beŋ'ka' wdixjee daa goll Chioza' İegake', wzolozan ka wxe wzil yell-lioni. <sup>51</sup> Le' zoale İaa, lenle chido'le sak'zi'le ni çe ye' wit çe dii Abela' axt dii Zacarıaza', beena' betgake' cho'a yoodo'na' kwit gana' chzeygake' bayix'ka'.

<sup>52</sup> İNyesh'laz gak çehe, le' chli' chsedile leya'! İa' na'zle chsedile beŋ' çe Chioza', per ni le' bi cheenile wzenagle daa nan, na' chllontele shajniı beŋ'ka' chzenagan.

<sup>53</sup> Na' ka goll Jesúza' ka', beŋ'ka' chli' chsedi leya' na' fariseoka' zizikli İllaagake' na' wzologake' chongakile'ne' zed wal wıabgakile'ne' chiya dii nak lallj, <sup>54</sup> gok-lall'gake' we' Jesúza' dill' dii wchixa'n İe'.

#### Dill' wxiye' çe fariseoka' zaklebin levadúrana'

**12** Na'ch bdop İllag beŋ' zan inlebb gana' zoa Jesúza' axt chdakw İjwellgake', na' wzoloe' zi-gaate be'lene' beŋ'ka' nakgake'ne' txen dill', chi'e:

—Wsak'gale bi shajİe'le dill' wxiye' çe fariseoka' daa zaklebi levadúrana'. <sup>2</sup> İa' daa kono İezi İaa, wllin İla İzezi beİaan, na' yog'İoİ daa ngash' İaa, wllin İla İla' lawin. <sup>3</sup> Na' yog' daa chakile kono beni daa wnale, wllin İla İnezgakile'n. Na' daa wnale ka yoole İoolə nse-jshoshle yoona', axt gosya'i beŋ' wzie'n dill'.

#### Beena' chiya' illebcho

(Mt. 10:26-31)

<sup>4</sup> Le' nllaguid', nia' le' bi illeble beŋ'ka' witgake' le', İa' kachokzan zeelo gak gongakile' le'. <sup>5</sup> Per ni İnia' le' non chiya' illeble: İi illeb Chioza', İa' ka yiyoll yiıee ye' mban çhelena' İekzka' nape' ye' wıabia' wzaİee le' lo yi' gabiİa'. İen', İi illeb.

<sup>6</sup> Neziıo wak si'cho gay' byııdo' kon çhop sintabdo'. İa'kzi aga bitek zak'gakb, ni tob bi mbej yiçhj Chioza'. <sup>7</sup> Na' ka'kzə le', axt to to yish' yiçjİlena' mbab. Na' bi illeble, İa' zak'chle aga ka zan byııdo'ka'.

#### Beŋ'ka' chçhebgake' nakgake' Crıstona' txen

(Mt. 10:32-33; 12:32; 10:19-20)

<sup>8</sup> Na' nia' le', beena' wçheb lao beŋ' nake' nad' txen, İekzka' nad', Beŋ' Bsel' Chioza' Yell-lioni, wi'a dill' lao yog'İoİ anjİ çe Chioza', yepgakee beeni nake' nad' tx-en. <sup>9</sup> San beena' bi wçheb nake' nad' txen, İekzka' nad',

wi'a dill' lao yog'İoİ anjİ çe Chioza', yepgakee beeni bi nake' nad' txen.

<sup>10</sup> Na' beena' biz gon İıa çha', nad', Beŋ' Bsel' Chioza' Yell-lioni, wizi'xen Chioza' çe', san beena' İıe zban çe Espıritu Sántona', aga wizi'xen Chioza' çe'.

<sup>11</sup> Kat' İİjwa'gake' le' lao beŋ'ka' chıabia' gana' chdop chllagcho choe'İwill-cho Chioza', wa lao beŋ' chçhog-bia' çe beŋ' wa lao josçhis, bi sele wıeyi nakİe yillile cho'a xtilİ' beŋ'ka' wa bin İıale. <sup>12</sup> İa' kat' İıele, Espıritu Sántona'kzan wzajniile' le' daa chiya' İıale.

#### Dii nxolla' nsa' ye' wni'ana'

<sup>13</sup> Na' ladj beŋ'ka' ndop nllag wıe to beŋ', golle' Jesúza':

—Maestro, gollgach beŋ' bishaana' goıe' daa chido'İ İkaa çe dii xanto'na'.

<sup>14</sup> Na' che' Jesúza'ne':

—İNora bzoa nad' ladjİeni ka to beŋ' çon ye' josçhis çe beŋ' wa beŋ' chİaa bi dii de çe beŋ'?

<sup>15</sup> Na' İekzka' chi'e:

—İı wsak' kwençe bi selall'le gat'ch bi gat' çehe, İa' aga dii kan' İlıalo lo ye' mban çhelena'.

<sup>16</sup> Na'ch bzoe' to jempl, chi'e İegake':

—Wzoa to beŋ' wni'a na' dii zan bizi' bilape' lo yell-İio çe'na'. <sup>17</sup> Na'ch chakile': "İNakra ka gona'n İaa? Biga de kooshawaa dga bizi' bilap'." <sup>18</sup> Na'ch wne': "Ba İezid' bi gon'. Yiçhiıj' yoona' gana' chgooshawaa daa chizi' chilap' na' yiyona'n dii xench, na' kooshawaa daa bizi' bilap' na' bichİe dii de çha'. <sup>19</sup> Na'ch zan yiz yizia' banez çe daa ngooshawaa, na' yizi'lallaa na' yeej gaw', na' soa' mbalaz." <sup>20</sup> Na' goll Chioza'ne': "İı, beŋ' bi nteyi, İaanİle' gueto' na' daa ngooshawoo, nola çheyi gakan." <sup>21</sup> Kan' gak çe beena' chtop chshag ye' wni'ana', na' bibi zakee lao Chioza'.

#### Chioza' chap chwie' beŋ'ka' nak xiııe'

(Mt. 6:25-34)

<sup>22</sup> Ka wde dga, Jesúza' golle' beŋ'ka' nakgake'ne' txen:

—İaa nia' le': Bi sele wıeyi çe daa yeej gaole, ni bi sele wıeyi çe xalaanİena'. <sup>23</sup> İa' zak'techİe ye' mban çhelena' aga ka daa yeej gaole, na' zak'tech xkwerple-na' aga ka xalaanİena'. <sup>24</sup> İı wwiakachi beçhjka', İa'kzi bi çaz chaangakb na' bibi chizi' chilapgakb, ni bi zoa ga chgooshao'gakb dii gaogakb, len chweej chwaokz Chioza' İegakb. Na' le', İaa, zak'techle aga ka bado'ka' ze lo İİazə. <sup>25</sup> Ni tole bi gak yisçhoochle ye' mban çhelena' ni zi tgor İa'kzi nall inlebb selen wıeyi. <sup>26</sup> Shi dga nak diido'zə bi çak gonİen, İberaçe zezle wıeyi çe bichİe dii yoblə?

<sup>27</sup> İı wwiakachi ka chgol yeıdo'ka', İen aga bi İlin chongakan ni bi çolİakan do. Na' nia' le', ni Salomón-na', beena' wdapçga ye' shao'ka', bi İllin gak xe'na' xochi ka yeıdo'ka'. <sup>28</sup> Shi Chioza' none' xochi yeıdo'ka' ze İyİxaa, İa'kzi xtitchgan mbanan na'ch wtop beŋ' İen wllıen lo yi'na', İalechİin ki gone' çehe, İa'kzi bitek çajİe'le gakİene' le'? <sup>29</sup> Na' daan bi setekle wıeyi ga sa' daa yeej gaole. <sup>30</sup> İa' beŋ'ka' bi nonİıİall'gake' Chioza' to daazə çinogake'. Per le', Chioza' nake' İıale, na'

nezile' chyaljilen. <sup>31</sup> Li se wneyi wzenagle che Chioza' kwenche inabi'e le', na' gonkze' yog' daa chyaljile.

**Yel' shao' daa de yabana'**  
(Mt. 6:19-21)

<sup>32</sup> Bi illeble. La'kzi bi nyanle, Xacho Chioza', yel' ben' wen che'na', chaklallee yillinle inabia'lenlene' gana' chnabi'e. <sup>33</sup> Li wit' wde bi de chele, na' li gaklen ben' bibi de cheyin. Shi ka' gonle, na' gat' yel' shao' chele dii bi te cheyin yabana' gana' bi gak kwan wbanna'n, ni bi iteban. <sup>34</sup> Na' gana' de yel' shao' chelena', na'kzan se yichjlall'do'lena' wneyi.

**Chiyal' se kwascho ka yiyed Jesúza'**

<sup>35</sup> Na' lekzka' chi'e legake':

—Li gaktō ka wen llinka', ben'ka' chbezgake' xane'ka' yilline' daa zeje' to ga chak wishagna'. Na' toshiizi chi'gake' chbezgake'ne' na' nox'tegake' yi' che'ka' kwenche kate wtankwe' lee puerta' lii wsaljtegake'n. <sup>37</sup> Chakomba wen llinka' chbezgake' kat' yillin xane'ka', la' dii li nia' le', kwine' kweke' legake' cho'a mesa' na' wi'e dii gaogake'. <sup>38</sup> Chakomba ben'ka' chbezgake' yillin xane'ka' la'kzi yilline' do chel wa do zbalzā. <sup>39</sup> Na' chiyal' shajniile dga, shel'ka' to xan yoo inezile' bi gor illin wbanna' lille'na', wbe'noe'ne' na' bi wi'e latj sho'e lille'na' kwane'. <sup>40</sup> Ka'kzan le' chiyal' sele wneyi toshiizi kwezle nad', Ben' Bsel' Chioza' Yell-lioni, la' tokonganza' yiyed'.

**Wen llinna' chon wen na' beena' bi chon wen**  
(Mt. 24:45-51)

<sup>41</sup> Na'ch wñabi Pédrōna' Jesúza', chi'ene':

—Xan', zato neto'zan no' ka', anti che yog' beñaan no' ka'?

<sup>42</sup> Na'ch goll Xancho Jesúza':

—zNakra chakile chon to wen llin wen, ben' nezi nak gone' llinna', shi xane'na' gone' lall' nee yog'te ben'ka' zoa loo yoo lille'na' kwenche wwewj wwawe' legake' gor cheyin? <sup>43</sup> Chakomba wen llinna' chilalile' chone' daa nak lall' nee ka yillin xane'na'. <sup>44</sup> Dii li nia' le', xane'na' gone' lall' nee yog'lo' dii de che'. <sup>45</sup> Na' shi wen llinna' gakile': "Akza naa yila' xan'na'", na'ch soloe' gonile' zban wen llinka' sto, ka nool ka ben' byo, na' soloe' yeej gawe' na' sollile'. <sup>46</sup> Na' tokonganzi yillin xane'na' llana' bi none' lez, na' wdie'ne' to yel' zi' wal kon ka ba nchogloe' gak che ben'ka' bi chongake' daa chiyal' gongake'.

<sup>47</sup> Ben' wen llinna' nezi bin cheeni xane'na' gone', na' bi chone'n ni bi zie'n wneyi, na' wit chinchga xane'na' le'. <sup>48</sup> Per beena' bi nezi bin cheeni xane'na' gone', na' chone' dii chonan ka wsak'zi' xane'na'ne', agalē wsak'zi'teke'ne'. La' beena' be'lenyenee dill' nakan gone', chonan byen gonyenee ka bzajniile'ne'. Na' beena' ba bene' lall' nee gone' dii zan dii cheenile' gone', chonan byen gone' yog'lo'te diika' bene' lall' nee.

**Gak ben' choplā ni che Jesúza'**  
(Mt. 10:34-36)

<sup>49</sup> Daa bid' yell-lioni nakan ka inacho yin' bidxen'. Na' cheenchgaid' shel' naate ba chal'ñinan. <sup>50</sup> Biya dii yen ile'id', na' le ba chakyeshid' axt ni illini llana'. <sup>51</sup> zAchakile bid' yell-lioni kwenche gon' ka soalen ljwell ben' mbalaz? Aga kan', san daa bid' illaa ljwellgake' na' gak-gake' choplā. <sup>52</sup> La' naa, shi to yoo lle' gayee, na' gak-gake' choplā, shone' ti'l-lengake' ben'ka' chop, na' ben'ka' zi chop ti'l-lengake' ben'ka' zi shonā. <sup>53</sup> Xa bi' byona' ti'l-lene'b', na' leb' ti'l-lem' xabaa. Na' xna' bi' noola' ti'l-lene'b', na' leb' ti'l-lem' xna'baa. Na' noola' ti'l-lene' xoolille'na', na' xoolille'na' ti'l-lene' le'.

**Bi chajni'gakile' bi zejin daa chon Jesúza'**  
(Mt. 16:1-4; Mr. 8:11-13)

<sup>54</sup> Na' lekzka' che' Jesúza' ben'ka' lle' na':

—Kat' chle'ile ziza' beja' gana' chxoalē wbillā, lii natele: "Wakē jeja'", na' kayen' chak. <sup>55</sup> Na' kat' chde be'na' daa za' lli'lā, na' nale: "Le zey'chga yizak'", na' kayen' chak. <sup>56</sup> Le' ben' wxiye! Kat' chle'ile bin chak xan yabana' na' lo yell-lioni nezile beran gak. zBi'che bi chakbe'ile bin zeji daa chon Chioza' llaki zoacho naa?

**Chiyal' yiyoe'xenko ben'ka' chao xya checho**  
(Mt. 5:25-26)

<sup>57</sup> zBi'che ki chiyilje to kwizle daa nak dii li dii shao'? <sup>58</sup> Shi no chao xya chele na' wchi'e le' lao joschiska', li gon byen yiyoe'xenlene' tneza'. La' shi lljwee le' lao beena' chchogbia' che ben', na' le' gone' le' lo na' beena' wseje' le' lillyana'. <sup>59</sup> Na' nia' le', aga wichejle lillyana' axt ki chixjle doxen daa chiyal' chixjle.

**Chiyal' yiyaj yilenicho dii malka' choncho**

**13** Na' lo llana'tezā bllin ba' ben' lao Jesúza' goll-gake'ne' ka ben Pilátōna' bene' mandad bet-gake' ba' ben' Galiléaka' ka chitgake' bayix'ka' choe'la'ogake' Chioza'. Na' xchene'ka' biyakan toz kon xchen bayix'ka' betgake'. <sup>2</sup> Na' che' Jesúza' legake':

—zAchakile ben' Galiléaka' betgake' nakchgage' ben' malch aga ka nochlā ben' wlall' che'ka'? <sup>3</sup> Nia' le' bi nakan ka'. Shi le' bi yiyaj yilenile dii malka' chonle, lekzka' yog'le kwiayi'. <sup>4</sup> Shera ben' Jerusalénka' shiñ'shonā, ben'ka' wit daa bdakwgake' yoo siba' daa zoa Siloéna', zachakile' napchgage' dol' aga ka ben' wlall' che'ka'? <sup>5</sup> Nia' le' bi nakan ka'. Na' shi le' bi yiyaj yilenile dii malka' chonle, lekzka' yog'le kwiayi'.

**Jempl che yag yixwewa' daa bi wllia**

<sup>6</sup> Na'ch bzoa Jesúza' to jempl, chi'e ben'ka':

—To ben' zoa to yag yixwew lo yell-lío che'na' gana' naze' yag uvaka', na' wyaje' jawie' shi llian yixwewa', na' ka blline' ni tlish' bi llian. <sup>7</sup> Na'ch chi'e beena' chap yell-lío che'na': "Ba gok shon yiz chidwia' shi llian yixwewa', na' ni to bibi chbian. Bchogchoklan, la' nlan-chokzan yell-lioni." <sup>8</sup> Na' beena' chape' yell-lío che'na'

chi'e: "Xan', zi zoashkin zi twiz na' wçheen' xaninna' na' wlla'n ben'na'.<sup>9</sup> Shera shicholə wbian. Na' shi bi wlliakzan, na' wçhogo'n."

### Biyon Jesúza' to noolə llana' chombaən beŋ' Israelka'

<sup>10</sup> Na' to lla sabd, llana' chombaən beŋ' Israelka', chli' chsedi Jesúza' beŋ'ka' chdop chllag gana' choe'lwill-gake' Chioza'.<sup>11</sup> Na' len to noolə ba gok shiŋ'shoŋ yiz nlew dii xiwaa le', na' bichkzə gok yizie' shli'.<sup>12</sup> Na' ka ble'i Jesúza'ne' wŋie'ne' na' golle'ne':

—Noolə, ba bikwas yillwe' çho'na'.

<sup>13</sup> Na'ch bçxa neena' koll' noola' na' katena' lli bizetie' shljcha, na' wzoloe' choe'lawee Chioza'.<sup>14</sup> Na' beena' chgoo xŋezi çheyi diika' chongake' gana' chdop chllag-gake' bllee daa biyon Jesúza' noola' llana' chombaən-gake', na'ch chi'e beŋ'ka' lle' na':

—De çop lla goncho llinna', na' bittezə llaka' yidle kwençe yiyakile, na' bi gonle lez yiyakile' llani chombaəncho.

<sup>15</sup> Na'ch che' Xancho Jesúza' legake':

—Le' beŋ' wxiye', çabi wsell-le goon çheleka' wa burr çheleka' lljaweejlegakb nisa' llani chombaəncho?

<sup>16</sup> Nooli nake' xiŋ dia çhe dii Abraham'a, na' ba gok shiŋ'shoŋ yiz Satan'aza' daa chŋabia' dii xiw'ka' nonan le' ka beŋ' ncheje'. çAna' chakile bi nakan wen biyonee llani chombaəncho?

<sup>17</sup> Na' ka goll Jesúza' ka', yog' beŋ'ka' chakzbangakile'ne' biyii bido'gakile', na' yog' beŋ'ka' sto bibagakile' daa ble'gakile' yel' wakka' chone'.

### Jempl çhe sa mostásana'

(Mt. 13:31-32; Mr. 4:30-32)

<sup>18</sup> Na'ch wna Jesúza':

—çNakra ka nak yel' wŋabia' çhe Chioza', lla? Na' çbera ka wsaklebida'n?<sup>19</sup> Zaklebin sa mostásana' daa goz to beŋ' lo yell-lío çhe'na', na' ka bla'n na' bgolan gokan to yag xen na' axt byiŋdo'ka' ben lillbka' lo xozinna'.

### Jempl çhe lewadúrana'

(Mt. 13:33)

<sup>20</sup> Na' lezkka' chize' Jesúza':

—Dga sto wsaklebida'n yel' wŋabia' çhe Chioza'.

<sup>21</sup> Zaklebin lewadúrana' daa chçhiç to noolə shoŋa rob yezj kwençe yisgolan kwa çhe yetxtila'.

### Chiyal' sho'cho puertdo'naz

(Mt. 7:13-14, 21-23)

<sup>22</sup> Shlak ziyaj Jesúza' Jerusalénna', bidie' yell yejka' na' yell'do'ka' na' bli' bsedile' beŋ'.<sup>23</sup> Na' bchej to beŋ' wŋabile'ne', chi'ene':

—Maestro, çato çopchga beŋ' yila bi kwiyai'gake'? Na'ch che' Jesúza'ne':

<sup>24</sup> —Li gon byen sho'le cho'a puert daa nak diido'zə kwençe soalenle Chioza'. La' beŋ' zan gaklall'gake' sho'gake'n, na' bi gak sho'gake'.<sup>25</sup> Na' ka solla' çan yoona' wseje' puerta', na' le', igaanle cho'a puerta' wtankwle le'inna' na' ye'lene': "Beŋ'do', bsaljgach

kwençe sho'nto'." Na' çan yoona' iŋe' le': "Bi nombi'a le' ni bi ŋezid' ga beŋ' le'."<sup>26</sup> Na'ch ye'lene': "Weej wdaolennto' li' txen, na' bli' bsedilo' neto' yell çhen-to'na'."<sup>27</sup> Na'ch iŋe' le': "Bi nombi'a le', ni bi ŋezid' ga beŋ' le'. Li lljayaak do na'lə yog'loj-le le' beŋ' wen dii mal'."<sup>28</sup> Na' kwelchgale axt gaoçaxj leylena' daa le gak-shejlall'le ka ile'ile dii Abraham'a, dii Isaaca', dii Jacoba' na' yog' dii beŋ'ka' wdixjee daa goll Chioza' legake' lle'gake' yabana' gana' chŋabia' Chioza', na' le', bi gok yiyooole.<sup>29</sup> Na' wde wdeli beŋ' lle' zbii zkaan yell-lioni yillingake' yabana' gana' chŋabia' Chioza' na' kwe'gake' gaogake'.<sup>30</sup> Na' bal beŋ' bi nak beŋ' zakii ŋaa gakgake' beŋ' zakii, na' beŋ'ka' nak beŋ' zakii ŋaa bich gakgake' beŋ' zakii.

### Wchell Jesúza' ni çhe beŋ' Jerusalénka'

(Mt. 23:37-39)

<sup>31</sup> Na' lo llana'tezə bllin bal fariseoka' kwit Jesúza' na' che'gake'ne':

—Biyaj gan yoblə. Cheeni Heródeza' wite' li'.

<sup>32</sup> Na' che' Jesúza' legake':

—Li yiyaj na' li lljayell beŋ' wxiye'na': "Nin soa' to çop shoŋ lla kwençe yibej' dii xiw'ka' yoo beŋ' na' yiyon' beŋ' bi shao', na' sheelo diika' chon'."<sup>33</sup> Chonan byen kooch' nez ŋaa, wxe len willj kwençe yiyaa Jerusalénna' gana' chitgake' beŋ'ka' chyixjee daa che' Chioza', la' agagan' witgake' legake' gan yoblə.

<sup>34</sup> "Le' beŋ' Jerusalén, chitle beŋ'ka' chiditixjee daa che' Chioza' legake', na' yaja' chitile beŋ'ka' chselee choe'gake' cho'a xtilleena'! Dii zan shii goklallaa yitop' le' ka chon jeda' chiyellb xiŋdobka' xan xilba', na' le' bi goonile'.<sup>35</sup> Li koo yichjle dga iŋia' le', Chioza' kwej yichje' gani zoale. Na' nia' le', aga wle'chile nad' axt kat'ch illin lla iŋale: "çGaklenshga Xancho Chioza' beeni ba bselee!"

### Jesúza' biyone' to beŋ' yo'e yi

**14** To lla sabd, llana' chombaən beŋ' Israelka', wyaj Jesúza' jtawe' lill to fariseo, beŋ' chŋabia', na' fariseoka' sto china' chinogake'ne'.<sup>2</sup> Na' lawe'na' ze to beŋ' yo'e yi.<sup>3</sup> Na'ch Jesúza' wŋabile' fariseoka' na' beŋ'ka' chli' chsedi leya', chi'e legake':

—çAde lsens yiyoncho to beŋ' bi shao' llani chombaəncho, anti bi den?

<sup>4</sup> Na' legake' bikzə bi gollgake'ne'. Na'ch Jesúza' beçee beena' yoo yina' na' biyone'ne', na' golle'ne':

—Wak yiyajo'.

<sup>5</sup> Na'ch chi'e fariseoka':

—Shi to burr çhele wa to goon çhele ixopb to loo yech to lla chombaəncho, çabi yibejleb katena' la'kzi nakan llana' chombaəncho?

<sup>6</sup> Na' bikz bi billet-lall'gake' ye'gake'ne'.

### Beŋ'ka' chaxgake' to ga çhak wishagna'

<sup>7</sup> Na' ble'i Jesúza' ka chon beŋ'ka' wdaolene' lill farise-wa', wche'gake' gana' chbe' beŋ'ka' zakii. Na'ch bseese to jempl, chi'e legake':



<sup>8</sup>—Kat' no gax le' to ga chak wishagna', bi kwe'le gana' chbe' beñ'ka' zakii. La' shera shi ila' beñ' zak'chi ka le', <sup>9</sup> na' beena' goxe' le' ñe': "Wzolla' kwenche kwe' beeni gani chi'o." Na'ch do chido'zile yizolla'le na' ll-jache'le xanteyin. <sup>10</sup> Na' bi gonle ka'. San kat' no gax le', chiya' lljche'le xanteyin kwenche kat' ila' beena' goxe' le' na' ñe': "Bish'dawaa, nilə wda kwi'o gani zak'chi." Na' ka' sho'le balañ lao beñ'ka' chi'lenle cho'a mesa'. <sup>11</sup> La' beena' chon kwine' beñ' choo beñ' xen, Chioza' gone'ne' beñ' bibi zakii; na' beena' chakile' bibi zakee, Chioza' gone'ne' beñ' choo beñ' xen.

<sup>12</sup> Na' lekzka' che' Jesúza' beena' goxe'ne' lille'na':

—Kat' cheenilo' wwawo' beñ', bi gaxo' beñ' zoalanzo' wen, no beñ' bishoo, no beñ' dialla cho', ni no beñ' wllil cho', beñ' nake' beñ' wni'a, la' legake' lekzka' wak yi-googake' wzonna' yiwaogake' li' ka beno' chegake'.

<sup>13</sup> Aga kan' gono', san byi beñ' yesh', beñ' net ñi'a nee, beñ' bi chak sa' wen na' beñ' lcho'. Beñ'kan' chiya' gaxo', <sup>14</sup> na'ch so' mbalaz. La' beñ'kan' aga wak yi-googake' wzon cho', san Chiozan' yigwee wzon cho'na' llana' kat' yisbane' beñ' wenka' ladj beñ' wetka'.

### Jempl che to beñ' ben to lñi xen

<sup>15</sup> Na' to beena' chi'lene' Jesúza' cho'a mesa', ka be-nile' wne' ka', na' chi'ene':

—iChakomba beñ'ka' lljadaogake' gana' chñabia' Chioza'!

<sup>16</sup> Na'ch che' Jesúza'ne':

—Wzoa to beñ' bene' to lñi xen, na' goxe' beñ' zan kwenche shajgake' lille'na' lljtaogake'. <sup>17</sup> Na' ka gol' gaogake', bselee to wen llin che'na' jelle' beñ'ka' ba bye': "Li dagach, la' ba gok daa gaocho." <sup>18</sup> Na' yog' beñ'ka' janie' wzologake' chche'gake' dill'. Toe' golle'ne': "Zi' bizi'a lat' yell-lío na' chonan byen lljawia'n. Ye'gacho'ne' si'xene' bi gak yid'." <sup>19</sup> Na' beena' sto chi'ene': "Zi' bizi'a gay' kwe' goon na' chonan byen wwia' shi wak gaangakb. Ye'gacho'ne' si'xene' bi gak yid'." <sup>20</sup> Na' beena' sto chi'ene': "Zi' bshagna', na' bi gak yid'." <sup>21</sup> Na'ch biza' wen llinna' jayelle' xane'na' yog' daa goll beñ'ka' le'. Na'ch bllaa xane'na' na' chi'e wen llin che'na': "Lobe' jta lyell na' bche' kon no beñ' yillago', no beñ' yesh', no beñ' net ñi'a nee, no beñ' lcho', na' no beñ' bi chak sa' wen." <sup>22</sup> Na' ka jasane' beñ'ka' jatope', na'ch chi'e xane'na': "Xan', ba ben' ka wno', na' ni dech latj sho' beñ'." <sup>23</sup> Na'ch che' xane'na': "Wyaj do yawi nezka' na' ben byen yid beñ'ka' yillago' kwenche yilla' loo lilla'ni. <sup>24</sup> Na' nia' le', ka nak beñ'ka' bya' dii nech, ni toe' bi gaogake' daa ba bsini'a."

### Yel' zak'zi'na' yen ile'icho ni che Jesucristona'

<sup>25</sup> Beñ' zan zjanogake' Jesúza', na'ch biyechje' chi'e le-gake':

<sup>26</sup> —Shi nole cheeni gakle nad' txen, chiya' gachile nad' aga ka xaxña'le, xool-le, xiñle, beñ' bish'le, beñ' zanle, na' axt yel' mban chelena'. Shi bi gakile' nad', aga wak gakle nad' txen. <sup>27</sup> Na' lekzka' beena' bi chzanile' yel' mban che'na', gak bittezə dii gak che',

kwenche gone' daa chazlallaa, aga wak gake' nad' tx-en. <sup>28</sup> Shi nole cheenile gonle to yoo sib wal, zigaate chiya' wwiale ka'k' gaki na' shi waki xmechlana' sheeloin. <sup>29</sup> La' shi ba wlekwle leninna' na' tena' bich bi de wzeeloilen, na' yog' beñ'ka' ile'gakile' bi biyollan wx-illgakile' le'. <sup>30</sup> Na' ñagake': "Kon wdishj beena' len yoonā na' bi goki xmeche'na' wzeeloe'n." <sup>31</sup> Na' ka'kz to beñ' wñabia', shi cheenile' til-lene' sto wñabia' yoblə, na' lekzka' chiya' wsakee shi wzo' shi mil beñ'ka' nape' til-lengake' beena' nap galja mil beñ'. <sup>32</sup> Na' shi gakbe'ile' bi soi beñ'ka' nape', na' zi' illinlə beñ' wñabia'na' sto, wselee to chop beñ' lljellgake'ne': "Bizə tilcho." <sup>33</sup> Na' ka' le', shi bi choonlall'le yog' dii de chele, aga wakə gakle nad' txen.

### Kat' bich xzi' zedaa

(Mt. 5:13; Mr. 9:50)

<sup>34</sup> Zedaa nakan dii wen, na' shi bich xzi'n aga wakch yiyonchon xzi' dii yoblə kwenche wchinchon. <sup>35</sup> Ni bi gak wchinchon lwaā beñ', san choonchon. Na' le' che-nile dga nia', li sen wneyi.

### Jempl che xilaa wnit

(Mt. 18:10-14)

<sup>15</sup> Yog' beñ' wixhixjka' na' beñ' saaxyaka' jabig'gake' kwit Jesúza' kwenche bzenaggake' diillaa cho'e. <sup>2</sup> Na' fariseoka' na' beñ'ka' chli' chsedi leya' wzologake' biz chon chnagake' che Jesúza', che'gake': —Chlebtezə beeni beñ' saaxyaka' na' chaolenteze' le-gake'.

<sup>3</sup> Na'ch bzoa Jesúza' to jempl, golle' legake':

<sup>4</sup> —Shi tole nape to guiyoa xil' na' ñit tob, na' wk-waanle baka' taplalj twalj lyixaa na' lljadilje bana' wnit, na' axt kon ka yillelb gonle. <sup>5</sup> Na' ka yillelb, yibaile yixoa'le yaaxizlena'. <sup>6</sup> Na' ka yillinle lill-lena' wtope beñ'ka' nllaguile na' beñ' wllil cheleka', na' ye'le le-gake': "Li yibaleni nad', la' ba billet xil' cha'na' bana' wnit." <sup>7</sup> Na' nia' le', ka'kzan chibayi Chioza' len anjl che'ka' yabana' kat' to beñ' wen dii mal chiyajile' saaxya che'na' aga ka taplalj twalj beñ'ka' bi chonan byen yiyajgakile'.

### Jempl che mecha' wnit

<sup>8</sup> Wa shi to noolə de shi mech plat che' na' ñit ton, na' wxene' yi' che'na' na' wloe' loo lille'na' na' yiyilje'n axt ki yillelile'n. <sup>9</sup> Na' ka yillelile'n na' wtope' noolka' nllaguile' na' beñ' wllil che'ka', na' yee legake': "Li yibaleni nad', la' ba billet mech cha'na' daa wnit." <sup>10</sup> Na' nia' le', ka'kzan chibayi Chioza' len anjl che'ka' kat' chiyaj chileni to beñ' saaxya.

### Jempl che bi'na' benditj xmech xabaa

<sup>11</sup> Na' lekzka' che' Jesúza' legake':

—To beñ' wzoa chop xiine', <sup>12</sup> na' bi' neshaa gollb' xabaa: "Xa, bllaa daa de cho' na' beñ' nad' daa chiya' l'ikaa." Na'ch bllaa xabaa daa de che' na' bi'en legakb'. <sup>13</sup> Na' aga wlla, biyit' bide bi' neshaa daa bi'eb', na'

mecha' daa bex'b' cheyin wyajlema'n to yell zit' na' jenditjba'n na' jem' kon daa nazan cheb'. <sup>14</sup> Na' ka biyoll benditj xmechbaa wche' to wbin xen yella' gana' chdab', na'ch wzolo chdeb' wbinna'. <sup>15</sup> Na' wyajb' janabb' llinna' gom' lao to ben' yella' gana' chdab', na' beena' bseleeb' lyixaa gana' nillee kushka' kwenche jtabp' legakb'. <sup>16</sup> Na' daa le chdom' goklall'b' gaob' daa chao kushka', na' ni len bi be'gake'b'. <sup>17</sup> Na' gokib': "Ben' zan wen llin che xa'na' lle' na' chichoonzan dii cheej chaogake', na' nad', ba chetid' wbinni. <sup>18</sup> Ba ziaaachokla kwit xa'na' na' yeppe: Xadawaa, ba bxinj' bjen' lao Chioza' na' lawo'na'. <sup>19</sup> Bich chido'aa gak' xi'ino', san beni nad' ka notteza' wen llin cho'ki." <sup>20</sup> Na'ch biza'b' ziyajb' lill xabaa.

'Na' zi dii xench yillim' lillbaa ble'i xabaa leb' na' biyesh'lallile'b'. Na'ch zejdoe' jatile'b' na' wdele'b' na' bnoppe'b'. <sup>21</sup> Na'ch che'b' xabaa: "Xadawaa, ba bxinj' bjen' lao Chioza' na' lawo'na', bich chido'aa gak' xi'ino'." <sup>22</sup> Na' xabaa chi'e wen llin che'ka': "Lobe'za' li lljlej tgot lech' daa liizelozi nakch na' li wwakwba'n, na' lekzka' li wllin to niy xbemaa na' li wllin yel ni'abaa. <sup>23</sup> Na' li lljxi' me'do'na' mbejchlawin, li witb kwenche gaochob na' goncho to lni, <sup>24</sup> la' xiindawaani gok cheb' ka bi' ba wit, na' naa ba bila'b' mbam'. Gok cheb' ka bi' wnit, na' naa ba billelb'." Na'ch wzologake' bengake' lnina'.

<sup>25</sup> Na' ka wzolo lnina', xiine' bi' necha' chdab' lyixaa. Na' ka billim' gaoza' lillbaa, benib' chkwell wikwellka' na' chakte wiyaana'. <sup>26</sup> Na'ch wneb' to wen llinka' na' wnapabee bin chak lillbaa. <sup>27</sup> Na' wen llinna' chi'e: "Bi' bishoonan' ba bila', na' ben xo'na' mandad betgake' me'do'na' mbejchlawin daa bila'b' shi'a shao'." <sup>28</sup> Na' xi'ine' bi' necha' blaab' na' bi goonib' yiyoob'. Na'ch bchej xabaa got'yoile'b' kwenche yiyoob'. <sup>29</sup> Na'ch che'b' xabaa: "Nezkzilo' ba gok zan yiz chon' yog' daa no', na' ni shlin bin' chishj' cho'a xtilloona'. Na' bigan' gonon' nad' la'ch' to shibdo' kwenche wit'b yeej gaolem' bi'ka' nllaguid'. <sup>30</sup> Na' naa bila' xiino'ni biyit' bideb' yog' daa bi'ob' na' benditj' xmecho'na' kon noolə wdaka', na' ba betzo' me'do'na', bana' le nak, ni cheb'." <sup>31</sup> Na'ch che' xabaa: "Xiindawaa, li zoaleno' nad' toshiizi, na' yog' bi' de cha' chekzo' daa. <sup>32</sup> Per chonan byen naa yibaicho na' goncho lnini, la' ba bila' bi' bishooni. Ba gok cheb' ka bi' ba wit, na' naa ba bila'b' mbam'; gok cheb' ka bi' wnit, na' naa ba billelb'."

**Jempl che wen llinna', beena' benditj daa de che xane'na'**

**16** Na' lekzka' goll Jesúza' ben'ka' nakgake'ne' txen: —Wzoa to ben' wni'a nape' to wen llin che', na' bene' lo nee yog' dii de che'. Na' wyaj ba' ben' jell-gake'ne': "Le chonditj beena' daa beno' lo nee." <sup>2</sup> Na'ch wne xane'na' le', chi'ene': "Ba benid' ka nagake' chono', na' chiya' yidio' kwent diika' ngoo lo no', la' bich gon' xshino'na'." <sup>3</sup> Na'ch chaki wen llinna': "¿Nakra gona'n naa, bich gon' xan'na' llinna' gon'? Bi soid' gon' llin wal, na' chido'id' yep' ben' yiyesh'gakile' nad' gongake' lat' wej xmech'. <sup>4</sup> Ba nezid' nak gon' kwenche wleb' ben' nad' lille'ka' kat' bich gat' llin cha'na'." <sup>5</sup> Na'ch goxe' to

to ben'ka' chal'gake' che xane'na', na' ben' necha' wnapabile'ne', chi'ene': "¿Ka'k' chaloo che xan'na'?" <sup>6</sup> Na' beena' chi'e: "Chalaa to guiyoa medid † set." Na'ch chi'ene': "Ni de yisha', lobe'za' wche' na' bda'n shiyonzannan' chaloo." <sup>7</sup> Na' ka wde, wnapabile' beena' sto, chi'ene': "¿Shera li? ¿Ka'k' chaloo?" Na' beena' chi'ene': "Chalaa to guiyoa gush trigo." Na'ch chi'ene': "Ni de yisha' na' bda'n taplalj gushzannan' chaloo." <sup>8</sup> Na' xan wen llinna' be'lawee wen llin mal che'na' daa biyiljallee naklan gone'n. La' ben'ka' zech wneyi che daa chak lo yell-lioni, chiyiljal'ch'gake' nak soalen ljwellgake' wen kwenche ile'shii ljwellgake', aga ka ben'ka' ba yoo beeni' che Chioza' loo yichjlall'do'eka'.

<sup>9</sup> Na' nia' le', li wchin yel' shawaa de chele yell-lioni kwenche gaklenle ben', na' kat' ba wde che yel' shawaa, Chioza' wlebe' le' soalenlene' zejli kanj.

<sup>10</sup> Na' beena' chon ka chiya' kon lat' daa nak lall' nee, ka'kzan gone' shi bichlə dii xench koo lall' nee. Na' beena' bi chon ka chiya' kon daa nak lall' nee, ka'kza gone' shi bitekchlə dii xench koo lall' nee. <sup>11</sup> Shi bi chonle ka chiya' kon yel' shawaa de yell-lioni, bi gon-zle lez ikaale yel' shawaa de yabana'. <sup>12</sup> Na' shi bi chonle ka chiya' kon yel' shawaa nak lall' na'le yell-lioni, zakra gon Chioza' gणे' le' yel' shawaa daa gaki chele?

<sup>13</sup> Aga ga zoa to ben' wlane' xshin chop ben', la' wakzbanile' beena' to, na' gakchile' beena' sto, wa gone' xshin beena' to do lallee na' xshin beena' sto gone'n nakzi. Aga wak gonle ka cheeni Chioza' shi le chzelall'le yel' wni'ana'.

<sup>14</sup> Na' fariseoka' le chzelall'gake' mecha', na' ka bengakile' dillaa choe' Jesúza', bxillgakile'ne'. <sup>15</sup> Na'ch che' Jesúza' legake':

—La'kzi nale nakle ben' wen, Chioza' nezile' nakan nak yichjlall'do'lena'. La' daa chaki ben' yell-lioni nakan dii lliyalote, leyen'lannan' chakzbani Chioza'.

**Leya' na' yel' wnapia' che Chioza'**

<sup>16</sup> Na' lekzka' che' Jesúza':

—Leya' na' daa bli' bsemi dii ben'ka' wdixjee daa goll Chioza' legake', legakannan' wnapia'gakan axt ka bllin lla bid Juanna'. Na' ka bid Juanna', wzolo chzenag ben' dill' wen dill' kob che yel' wnapia' che Chioza', na' chongake' to dii byen kwenche inabi'e loo yichjlall'do'eka'.

<sup>17</sup> Dii li nia' le', lobe'ch te che yabana' len yell-lioni, aga ka daa tegonz shcho'a daa na leya'.

**Bi chiya' yilaa ben'ka' nshagna'**

(Mt. 19:1-12; Mr. 10:1-12)

<sup>18</sup> Shi to ben' byo yilee xoolle'na' na' yikee noolə yoblə, chone' ka chon beena' zoate nool che'na' na' chdalene' noolə yoblə. Na' beena' yikee noola' bilaa ben' che'na' le', lekzka' chone' ka chon beena' zoalente nool che'na' na' chdalene' noolə yoblə.

† Medid: to to medidki gokan ka do 37 litr.

### Ben' wni'ana' na' Lázaroná'

<sup>19</sup> Na' chize' Jesúza' ben'ka':

—Wzoa to ben' wni'a na' chakwe' shgal' lech' dii wen na' yog' lla chaoshawe'. <sup>20</sup> Na' lekzka' wzoa to ben' yesh' wlie' Lázaro, na' lliá we'na' doxen kwerp che'na'. Na' tlizi chjchi'e cho'a yoo che ben' wni'ana', <sup>21</sup> gokile' gawe' la'ch' bl'aaka' chxop xan mes che'na', na' axt bekw'ka' chleegakb we'na' lli'e'. <sup>22</sup> Na' bllin lla wit ben' yeshaa, na' bi'che' anjl che Chioza'ne' kwenche jazoa-lene' dii Abrahama'. Na' lekzka' wit ben' wni'ana' na' bkwash'gake'ne'. <sup>23</sup> Na' dii ben' wni'ana' chdezi'chgue' gana' lle' ben' wetka', na' bl'is jalawe'na' na' zit'lə ble'ile' dii Lázaroná' chi'e kwit dii Abrahama'. <sup>24</sup> Na'ch wnie' zilljə chi'e: "Xadawaa Abraham, biyesh'gachi nad' na' bsel' Lázaroná' kwenche wleejlat' xbene'na' loo nisa' na' yidshone'n lo lollaani, la' le chllaglochgan' lo yi'ni." <sup>25</sup> Na' Abrahama' chi'ene': "Xiin, jadini ka mbalaz gok cho' shlak wbano' yell-liona', na' Lázaroni aga bi dii wen gok che'. Na' naa chizi'e banez ni, na' li' chzak'zi'o. <sup>26</sup> Na' ziznakan sto, ze to bdiñj xen gcho'li, na' aga wak te ben'ki yidgake' gana' lle'le, na' ben'ka' lle' na' aga wak tegake' yidgake' gani zoanto'." <sup>27</sup> Na'ch che' ben' wni'ana'ne': "Chñabid' li' shka', xadawaa Abraham, ben goklen bsel'gach Lázaroná' lill xa'na' <sup>28</sup> gana' zoa zi gay' ben' bishaaka', llje'lene' legake' dill' kwenche bi lengake' yiyedgake' gani de yel' zak'zi'ni." <sup>29</sup> Na' Abrahama' chi'ene': "Napkzgage' daa bzej dii Moiséza' na' daa bzej dii ben'ka' wdixjee daa goll Chioza'. iNa' chiya' wzenaggake'n!" <sup>30</sup> Na' che' ben' wni'ana'ne': "Aga wakan, xadawaa Abraham, san shel' to ben' ba wit yibane' na' yiyaje' lljaye'lene' legake' dill', na' wiyaj wilengakile' saaxya che'ka'." <sup>31</sup> Na' che' Abrahama'ne': "Shi bi chzenaggake' daa bzej dii Moiséza' na' daa bzej dii ben'ka' wdixjee daa goll Chioza', lekzka' aga wya-jle'gake' la'kzi yiban to ben' wet."

### Bi goncho ka ixop ben' yoblə gone' dii mala'

(Mt. 18:6-7, 21-22; Mr. 9:42)

**17** Na'ch che' Jesúza' ben'ka' nakgake'ne' txen: —Bia'kzə de dii gon ka ixop ben' gone' dii mala', per jnyesh'laz gak che beena' wchixe' ben' yoblə gone' dii mala'! <sup>2</sup> Wenlan shel' wwal'gake' yene'na' to yaj che molin na' lljaza'lgake'ne' loo nisdona' aga ka daa wchixe' to ben'ki chajle'gake' cha'. <sup>3</sup> Daan, li' wsak'. 'Shi to bish' lljwell-le gone' mal chele, li' wsheshlene', na' shi yiyajile' daa bene' chele, li' yizi'xen che'. <sup>4</sup> La'kzi axt gall shii shlla gone' bi gone' chele, na' gall shiite ine' le': "Chiyajid' daa ben' cho'", chiya' yizi'xenle che'.

### Daa gak gon to ben' chajle'

<sup>5</sup> Na'ch goll postlka' Xancho Jesúza':

—Goklen neto' gonllilall'chnto' Chioza'.

<sup>6</sup> Na'ch che' Xancho Jesúza' legake':

—Shel' yel' chajle' chelena' nakan la'ch' ka nak sa mostásana', daa nak diido'zə, wak ye'le yag xen wala':

"Blall'shki, na' jsoa loo nisdona' na'la", na' gon yaga' daa ye'len, shel'ka'.

### Daa chiya' gon to wen llin

<sup>7</sup> Shi nole zoa to wen llin chele na' zizee lyixaa jawaane' goonna' wa jtapeeb, aga we'lene': "Biyoo, na' wche' kwenche gawo'." <sup>8</sup> Aga we'lene' ka', san ye'l-lene': "Bsini'a daa gaw' xshe'na', na' wze wneyi kwenche wdio' daa yeej gaw', na'techlə yeej gawo'." <sup>9</sup> Na' ni bi we'lene' yel' choxken daa ba bene' daa che'lene' gone'. <sup>10</sup> Lekzka' le', kat' ba biyoll benle yog' daa non Chioza' mandad gonle, chiya' inale: "Neto' bi chizo chizakinto' gonnto' yog'lolten, shinchga bizointo' ba bennto' daa chonan byen gonnto'."

### Biyon Jesúza' shi ben' chak yillwe' daa le lepra

<sup>11</sup> Na' shlak zjada Jesúza' Jerusalenna', wdie' gana' ndil' yell-lioka' mbani Samáriana' na' Galileana'. <sup>12</sup> Na' ka blline' to cho'a yelldo', bllesh shi ben' chakgake' yillwe' daa le lepra kwenche lljatil'gake'ne', na' de zit'lə wzegake' <sup>13</sup> besyaagake' zilljə, che'gake'ne':

—iJesús, Maestro, biyesh'lall'gachi neto'!

<sup>14</sup> Na' ka ble'i Jesúza' legake', na' golle':

—Li shaj lao bxozka' kwenche ile'gakile' le'.

Na' shlak zejgake' bigaa yillwe' che'ka'. <sup>15</sup> Na'ch toe' bibi'e ka gokbe'ile' ba biyakile', na'ch axt chosya'ile' choe'lawee Chioza'. <sup>16</sup> Na' b'chek' xibe'na' lao Jesúza' na' bdose' lo yona' kwenche bi'ene' yel' choxken. Na' beena' ben'ka' nake' ben' Samaria. <sup>17</sup> Na'ch che' Jesúza':

—¿Aaga shigaken' biyaki? ¿Garañ ben'ka' zi ga?

<sup>18</sup> ¿Atochga ben' zitiin bibi'e choe'lawee Chioza'?

<sup>19</sup> Na'ch che' Jesúza' beena':

—Bizolla' na' biyaj. Ba biyakilo' daa wyajli'o cha'.

### Yel' wñabia' che Chioza'

(Mt. 24:23-28, 36-41)

<sup>20</sup> Na'ch wñabi fariseoka' Jesúza' batran solo inabia' Chioza' lo yell-lioni. Na' chi'e legake':

—Ka nak yel' wñabia' che Chioza', aga nakan ka to dii ile'tekzicho. <sup>21</sup> Aga no ina: "Ni chñabia' Chioza'", wa "Na' chñabi'e", la' ladjlenikzan ba bla' yel' wñabia' che'na'.

<sup>22</sup> Na'ch chi'e ben'ka' nakgake'ne' txen:

—Wllin lla kat' gaktall'le la'ch' zi shlla ile'chile inabi'a, nad', Ben' Bsel' Chioza' Yell-lioni, na' aga wle'chile nad'.

<sup>23</sup> Na' ichej ben' ine': "Ni zoe'", wa "Na' zoe'." Na' bi shajle, ni bi gonle ben'ka' txen. <sup>24</sup> La' ka chak kat' chep yes, chzeeni'n doxen xan yabana', ka'kzan gak llana' kat' zizaa, nad', Ben' Bsel' Chioza' Yell-lioni. <sup>25</sup> Na' chonan byen zigaate biya daa yen ile'id', na' ben'ki zoa naa wzoagake' nad' ka'la. <sup>26</sup> Kon ka gok kana' wzoa dii Noé'na', ka'kzan gak kat' ba zoa illin lla yiyed' dii yoblə, nad', Ben' Bsel' Chioza' Yell-lioni. <sup>27</sup> Kana' wzoa dii Noé'na', ben' yell-lioka' cheej chaogake', chshagna'gake', na' choe'gake' yel' wishagna' che xiine'ka' bllinte llana' wyoo dii Noé'na' loo barkwa'. Na' wzolo chak yejsiwa

yell-lioni axt billa'cha lawinna' nisa', na' blliyai'n yog'lole'. <sup>28</sup> Na' lekzka' wizak kana' wzoa dii Lota'. Cheej chaogake', chiya'o chidegake' bi de chegake', na' chaz chaogake', na' chon lillgake'. <sup>29</sup> Per ka bchej dii Lota' yell Sodómana', Chioza' bletje' yi'na' xan yabana' nchixan daa ne' azufre na' betan yog' beñ' yell Sodó-maka'. <sup>30</sup> Na' ka'kzan gak llana' kat' yiyed', nad', Ben' Bsel' Chioza' Yell-lioni.

<sup>31</sup> 'Llana' zizaa, shi to beñ' llie' yichj lille'na' na' xsh-inlaze'na' den loo yoo che'na', bi yiyetje' kwenche ll-jaleje'n. Na' shi to beñ' zeje' lyixaa, bi yiyajze' lille'na'. <sup>32</sup> Li lljadini ka gok che dii xool Lota'. <sup>33</sup> Beena' bi chsan-lall' yel' mban che'na', beenan' kwiayi'; san beena' chsanlall' yel' mban che'na', beenan' gat' to yel' mban che' zejli kanj.

<sup>34</sup> Na' nia' le', lle'na' kat' zizaa, chop beñ' die' toz blag, toe' yichi'a na' stoe' yigaan. <sup>35</sup> Na' gana' lle' chop noolə chotgake', toe' yichi'a na' stoe' yigaan. <sup>36</sup> Na' chop beñ' byo chongake' llin lyixaa, toe' yichi'a na' beena' sto yigaane'.

<sup>37</sup> Na'ch wñabgakile'ne':

—¿Garan gak dga, Xan'?

Na' chi'e legake':

—Gana' de ba weta', nan' chdop chllag llodka'.

**Jempl che to nool wizeb na' to beñ' wen yel' joschis**

**18** Na' bzoa Jesúza' to jempl kwenche bli' bsedile' legake' bi llshyagakile' we'llwillgake' Chioza'.

<sup>2</sup> Chi'e legake':

—Wzoa to beñ' wen yel' joschis to yell, na' bi chall chllebe' Chioza', ni bibi chakile' shi bi chiyoolallii beñ' ka chone'. <sup>3</sup> Na' yella' wzoa to noolə wizeb na' chajtezi chaje' lawe'na', chi'ene': "Bensha yel' joschis cha'ni."

<sup>4</sup> Na' ssha ba gok chaje' lawe'na' na' bikzə chone' bin chi'ene', na' bllin lla kat' chakile': "La'kzi bi chall chlleb' Chioza' na' ni bibi chakid' shi bi chiyoolallii beñ' ka chon', <sup>5</sup> gonch' yel' joschis che nooli kwenche bich yidyembeguile' nad'."

<sup>6</sup> Na' Xancho Jesúza' chi'e legake':

—Li wzenag ka ben beñ' wen yel' joschisa', beena' bi chall chlleb' Chioza'. <sup>7</sup> ¿Achakile Chioza' bi gaklene' beñ'ka' ba wleje' nakgake' lall' nee, beñ'ka' choe'llwill-gake'ne' ka wal' ka tella? ¿Awillale' gaklene' legake'? <sup>8</sup> Bi nakan ka', san nia' le' katena' gaklene' legake'. Per kat' zizaa, nad', Ben' Bsel' Chioza' Yell-lioni, ¿alle'ch beñ' non'llilall' nad' yell-lioni, lla?

**Jempl che to fariseo na' to beñ' wıchixj**

<sup>9</sup> Na' bzoa Jesúza' sto jempl che beñ'ka' chakgakile' nakgake' beñ' wen lao Chioza' na' chongakile' beñ' yoblə nakzi. Na' wne':

<sup>10</sup> —Chop beñ' wyajgake' yoodo'na' kwenche je'llwill-gake' Chioza'. Toe' nake' fariseo na' beena' sto nake' beñ' wıchixj. <sup>11</sup> Na' farisewa' zie' chshalj chshon che kwine', chi'e: "Chios cha', choxkeno' bi chon' ka chon beñ' yoblə, bi chzi' chban', bi nak' beñ' wen dii mal, agagan' kwey yichj' nool cha'na' kwenche soalen' nool

yoblə, na' ni bi chon' ka chon beñ' wıchixj. <sup>12</sup> Chop shii to xman chzoa' wbas', na' lawi yog' daa chon' gan chbej' daa chido'loo ikoo." <sup>13</sup> Na' beñ' wıchixja', zit'le' wzie' na' ni bi biyaxjile' wıjs lawe'na' wwie' yabana', san chballee cho'a lcho'ena' chi'e: "ıChios cha', biyesh'gachi nad' daa nak' beñ' saaxya!" <sup>14</sup> Na' nia' le', Chioza' bzenague' che beñ' wıchixja' na' bizee biyaje' lille'na' ba biyakxen saaxya che'na'. San bi bzenague' che farisewa'. La' beena' chon kwine' beñ' choo beñ' xen, Chioza' gone'ne' beñ' bibi zakii. Na' beena' chakile' bibi zakee, Chioza' gone'ne' beñ' choo beñ' xen.

**Benleey Jesúza' bi'do'ka'**

(Mt. 19:13-15; Mr. 10:13-16)

<sup>15</sup> Na' lekzka' beñ' zan jwa' bi'do' che'ka' lao Jesúza' kwenche bxoə neena' yichjb'ka' na' wñabile' Chioza' gaklene'gakb'. Na' ka ble'i beñ'ka' nakgake'ne' txen, bsheshlengake' legake'. <sup>16</sup> Na' Jesúza' goxe' bi'do'ka', na' chi'e beñ'ka' nakgake'ne' txen:

—Li we' latj yid bi'do'ki lawa'ni, bi wllonle, la' Chioza' chñabi'e loo yichjlall'do' beñ'ka' nak ka legakb'. <sup>17</sup> Dii li nia' le', beena' bi yiyak yichjlall'do'ena' ka che bi'do'ki kwenche inabia' Chioza' le', bi yilline' gana' zoa Chioza'.

**To beñ' zakii beñ' nak beñ' wni'a be'lene' Jesúza' dill'**

(Mt. 19:16-30; Mr. 10:17-31)

<sup>18</sup> To beñ' zakii wñabile' Jesúza', chi'ene':

—Maestro, li' nako' beñ' wen. Wna nad' beran chiya' gon' kwenche gat' to yel' mban cha' zejli kanj.

<sup>19</sup> Na'ch che' Jesúza'ne':

—¿Berache nazo' nad' beñ' wen? Toz Chioza' nake' beñ' wen. <sup>20</sup> Ba nezkzilo' daa nllia Chioza' bia' goncho: "Bi soaleno' nool bi nak nool cho', bi wito' beñ', bi kwano', bi çiljllalloo bizə gon ino' che beñ', na' wdap balaan' xaxnoo."

<sup>21</sup> Na'ch che' beena'ne':

—Kana' naktia' bi' xkwid' chon' yog' diika'.

<sup>22</sup> Na'ch ka beni Jesúza' ka goll beena'ne', na' chi'ene':

—Stozə daa chyallj gono': jayet' jade yog' daa de cho' na' be'n beñ' yesh'ka'. Na' shi gono' ka', na' gat' to yel' shao' cho' yabana'. Na' da, dino' nad'.

<sup>23</sup> Na' ka beni beena' ka goll Jesúza'ne', le gokyeshile', la' beñ' wni'a nlliban'. <sup>24</sup> Na' ka ble'i Jesúza' le gokyeshile', na' chi'e:

—ıLallj inlleb chonan che beñ' wni'aka' we'gake' latj inabia' Chioza' legake'! <sup>25</sup> Lobe'ch te to kamey xan yeshaa aga ka to beñ' wni'a yiyo'e yabana'.

<sup>26</sup> Na' beñ'ka' beni, gollgake'ne':

—¿Noran yila shka'?

<sup>27</sup> Na'ch che' Jesúza' legake':

—Daa bi chak gon benecha', Chioza' chak gone'n.

<sup>28</sup> Na'ch che' Pédrona' Jesúza':

—Xan', ba wlej yichjnto' yog' dii de çhento' kwenche naknto' li' txen.

<sup>29</sup> Na'ch che' Jesúza' legake':

—Dii li nia' le', nottezə beñ' ba bzanile' no lille', no xaxnee, no beñ' bishee, no beñ' zane', no xiñ xooole'

† Daa chido'loo ikoo: literalmente la décima parte.

kwenche cho'e latj chnabia' Chioza'ne', <sup>30</sup> Chioza'kzə wi'e dii zak'chi che' yell-lioni aga ka diika' wlej yichje', na' ka yilline' yabana' wi'ene' to yel' mban zejli kani.

### De wyon shii wdixjee Jesúza' guete'

(Mt. 20:17-19; Mr. 10:32-34)

<sup>31</sup> Na'ch wlej Jesúza' ben'ka' shllin ka'lə, ben'ka' nakgake'ne' txen, chi'e legake':

—Dga ziyajcho Jerusalénna' naa, yillinin daa bzej dii ben'ka' wdixjee daa goll Chioza' kani'yi daa gak cha', nad', Ben' Bsel' Chioza' Yell-lioni. <sup>32</sup> La' gongake' nad' lo na' ben'ka' bi nombia' Chioza', na' gonlegake' cha', biya dii inagake' nad', na' wlla' xeneeka' nad'. <sup>33</sup> Na' wit chingake' nad' na'tech witgake' nad', na' yiyon lla yiban' ladj ben' wetka'.

<sup>34</sup> Na' ben'ka' nakgake'ne' txen ni lat' bi wyajni'gakile' daa golle' legake', na' ni bi wnezgakile' berache' chi'e legake' ka', la' daa golle' legake' nakan dii bi gak shajni'gakile'.

### Biyon Jesúza' to ben' lchoj yell Jericóna'

(Mt. 20:29-34; Mr. 10:46-52)

<sup>35</sup> Na' ka ba chllin Jesúza' yell Jericóna', na' chi' to ben' lchoj cho'a neza' chnabile' ben' yiyesh'lall'gakile'ne' we'gake' lat' wej xmeche'. <sup>36</sup> Na' ka benile' chde ben' zan na'ch wñabe' bin chak. <sup>37</sup> Na' gollgake'ne':

—Jesús, ben' Nazaretan', chda ni.

<sup>38</sup> Na'ch besyee, chi'e:

—Jesús, Xiin dia che dii Daví, biyesh'lall'gachi nad'!

<sup>39</sup> Na' ben'ka' llialo lao Jesúza' chsheshlengake'ne' kwenche kwi'e lizə, na' zizikchlə chosyee, chi'e:

—Xiin dia che dii Daví, biyesh'lall'gachi nad'!

<sup>40</sup> Na'ch wlez Jesúza' na' bene' mandad lljxi'gake'ne'. Na' ka bllin ben' lchoja' lawe'na' na'ch wñabile'ne':

<sup>41</sup> —¿Beran cheenilo' gon' cho'?

Na'ch che' ben' lchoja'ne':

—Xan', cheenid' ile'id'.

<sup>42</sup> Na'ch che' Jesúza'ne':

—Daa ba chonjilaloo nad' na' ile'ilo'.

<sup>43</sup> Na' katena' llii bile'teile', na'ch janoe' Jesúza' choe'lawee Chioza'. Na' yog' ben'ka' ble'i daa ben Jesúza' be'la'ogake' Chioza'.

### Jesúza' na' Zaquewa'

**19** Na'ch bllin Jesúza' yell Jericóna' na' wdie' gchoj yella'. <sup>2</sup> Na' yella' zoa to ben' wni'a lie' Zaqueo, na' ngoo lall' nee xonj wixhixjka'. <sup>3</sup> Na' goklallee ile'ile' Jesúza', per bi gok ile'ile'ne' daa nake' ben' bchekwdo' na' daa zejlen Jesúza' ben' zan. <sup>4</sup> Na'ch wllialodoe' lawe'ka' na' wyep'e' to lo yag xen kwenche ile'ile'ne' ka tie'. <sup>5</sup> Na' ka bllin Jesúza' xan yaga', na' blis lawe'na' chi'ene':

—Zaqueo, btalaloo biyetj, la' lillo'nana' yigaana' naa.

<sup>6</sup> Na'ch biyetjdo Zaquewa' chibaile' bichi'e Jesúza' lille'na'. <sup>7</sup> Na' ka ble'i ben'ka' lle' na' ka gok, yog'ze' wzolo biz chon chnagake' che', che'gake':

—Yigaanxgale' lill ben' saaxyani, na.

<sup>8</sup> Na'ch wzolla Zaquewa' na' chi'e Xancho Jesúza':

—Xan', cheenid' wi'a gashjə daa de cha' ben' yesh'ka', na' yog' ben'ka' ba bchixj' dii xench, yiy-oe'gakee taplə ka daa ba wlan' chegake'.

<sup>9</sup> Na'ch che' Jesúza'ne':

—Naanlla ba bisla Chioza' ben'ki zoa loo yooni kwenche bi kwiaiyi'gake', daa len Zaquewi nake' xiin dia che dii Abraham'a'. <sup>10</sup> La' ka nak' nad', Ben' Bsel' Chioza' Yell-lioni, bid' kwenche yiyilj' na' yisla' ben'ka' yoo nez daa wlliaiy'n legake'.

### Jempl che beena' bkwaanlen wen llin che'ka' mech

<sup>11</sup> Shlak chzenag ben'ka' daa che' Jesúza', bseesile' legake' to jempl, daa ba zoa illine' Jerusalénna' na' legake' gokgakile' daa nake' ben' bsel' Chioza' lli solotie' inabi'e. <sup>12</sup> Na'ch chi'e legake':

—To ben' zakii bcheje' wyaje' to yell zit' wal kwenche lljajane' yel' wñabia' che lalle'na', na' ka yilline' inabi'e.

<sup>13</sup> Na' ka zi' see, wñie' shi wen llin che'ka' na' bi'e legake' twej mech dii zak' dii xen na' chi'e legake': "Ni de mech, li gonlenan delgens shlak bi soa'." <sup>14</sup> Na' ben' wlall' che'ka' le chakzbangakile'ne', na' ka wde wzee bsel'gake' xonj ben' wyajgake' lao beena' we' lsens inabi'e kwenche jellgake'ne': "Bi cheeninto' inabia' beeni neto'." <sup>15</sup> Per bia'kzə gok lo nee inabi'e, na' biyaje' lalle'na'. Na' ka billine' goxe' ben'ka' bkwaanlene' mecha' kwenche inezile' ka'k' wej ben mecha' gan daa bkwaanlene' to toe'. <sup>16</sup> Na' ka bllin ben' necha' lawe'na' na' chi'ene': "Xan', xmecho'na' bkwaan'leno' nad' be-na'n gan shin." <sup>17</sup> Na'ch ben' wñabia'na' chi'ene':

"Wenzan beno'. Daa beno' ka chiya' kon lat' mecha' bkwaanlen' li', wzoa' li' inabi'o shi yell." <sup>18</sup> Na' ka bllin beena' sto lawe'na' na' chi'ene': "Xan', xmecho'na' bkwaan'leno' nad' be-na'n gan gayaan." <sup>19</sup> Na' lekzka' chi'e beena': "Wzoa' li' inabi'o gay' yell." <sup>20</sup> Na'ch bllin stoe' lawe'na' na' chi'ene': "Xan', ni de xmecho'na' bkwaan'leno' nad'. Bllal'tipteza'n to lech' na' wlooshawaan <sup>21</sup> daa blleb' li', la' le ben' zña nako'. Chkaatezo' dii bi naki cho', na' chizi' chilaptezo' dii goz goon ben' yoblə." <sup>22</sup> Na'ch che' ben' wñabia'na' le':

"Bikzbi yejni'alallii beno'. Kon ka ba wno' ka'kzan gak cho'. Nezi'lo' nak' ben' zña, na' chkaatez' dii bi naki cha' na' chizi' chilap' dii goz goon ben' yoblə. <sup>23</sup> Na' daa nezi'lo' ka' chon', ¿berache' ki bi'o xmechaa gon yichjin kwenche yikaan naa ba biyed'?" <sup>24</sup> Na'ch chi'e ben'ka' lle' na': "Li yikaa mecha' daa bi'ane' na' li we'n beena' bene' gan shin." <sup>25</sup> Na'ch che' ben'ka'ne': "Xan', ba napkzə beena' shin." <sup>26</sup> Na' che' ben' wñabia'na' legake': "Nia' le', beena' chonlene' llin daa yoo lo nee, wakch lall' nee dii xench; san beena' bi chonlene' llin daa yoo lo nee, axt daa ngoo lo nee lat' yidoyo. <sup>27</sup> Na' ka nak ben'ka' chakzbangakile' nad', ben'ka' bi cheengakile' inabi'a, li lljxi'gake' ni na' li witgake' ile'teid'."

### Billin Jesúza' Jerusalénna'

(Mt. 21:1-11; Mr. 11:1-11; Jn 12:12-19)

<sup>28</sup> Na' ka wde wna Jesúza' ka', na'ch bigoolene' nez ben'ka' nakgake'ne' txen ziyajgake' Jerusalénna'. <sup>29</sup> Na'

ka billingake' xñi'a yaa daa le Yaa Olivos, gaozə yellka' le Betfagé na' Betania, na'ch bselee chop beñ'ka' nalgake'ne' txen, <sup>30</sup> na' chi'e legake':

—Li shaj yella' lli'a na', na' ka illinle ile'ile to burr chbando', ba konoñ' kwia, da'b yag. Na' wsel-leb wche'leb nilə. <sup>31</sup> Na' shi no inaz le': "¿Berache chsell-zleb?", na' ye'lene': "Xanchonan' chyalljile'b."

<sup>32</sup> Na'ch wyaj beñ'ka' bselee, na' ka bllingake' ble'gak-ile' to burr chbando' da'b yag, kon kayen' goll Jesúza' legake'. <sup>33</sup> Na' ka chsellgake' burra' na'ch che' xama' le-gake':

—¿Berache chsell-leb?

<sup>34</sup> Na'ch che'gake'ne':

—Xanchonan' chyalljile'b.

<sup>35</sup> Na'ch bche'gake'b jwa'gake'b lao Jesúza' na' bxoagake' xe'ka' koll'ba' na' blligake' Jesúza' koll'ba'. <sup>36</sup> Na' shlak zej Jesúza' lli'e burra', chshilj xa beñ'ka' tlo neza'. <sup>37</sup> Na' ka ba chillingake' gaozə gana' chiyetj nez daa ziza' Yaa Olivoza', yog'loj beñ'ka' nalgake'ne' txen chosyaagake' daa chibagakile' na' choe'la'ogake' Chioza' daa ble'gakile' yog' yel' wakka' bene'. <sup>38</sup> Na'ch nagake':

—iGaklenshga Xancho Chioza' beeni ba bselee inabi'e! jLi da, we'la'ocho Chioza' zoa yabana' daa bene' ka zoalenchone' mbalaz!

<sup>39</sup> Na' baj fariseoka' len ladj beñ'ka' no Jesúza', che'gake'ne':

—Maestro, goll beñ'ki nalgake' li' txen soagake' llizə.

<sup>40</sup> Na' che' Jesúza' legake':

—Nia' le', shi beñ'ki soagake' llizə, na' yaj kilə solo gosyaagakan we'la'ogakan nad'.

<sup>41</sup> Na' ka billine' gaozə yell Jerusalenna', gokyeshile' ka ble'ile'n na' wchelle' che beñ'ka' zoa na'. <sup>42</sup> Na' chi'e:

—iShe'l'ka' ñaanlla gakbe'ile nakan gonle kwenche soale mbalaz! Per ngashaan laolena' na' aga wakbe'kzile. <sup>43</sup> Wllin lla ila' beñ'ka' chakzbangakile' le' na' wzechjgake' yelli leej na' kono gak sho' ichej. <sup>44</sup> Na' ni sto yaj che lill-leka' bich yikwaangake' koll' lllwellin, na' witgake' le' len xiinleka', ja' bi gokbe'ile ka bla' Chioza' ladjleni.

**Bishesh Jesúza' beñ'ka' chit' chde lesh' chyoodo'na'**  
(Mt. 21:12-17; Mr. 11:15-19; Jn 2:13-22)

<sup>45</sup> Na'ch ka bllin Jesúza' cho'a yoodo'na' na' bisheshe' beñ'ka' chit' chde. <sup>46</sup> Na' chi'e legake':

—Cho'a Xtill' Chioza' nan: "Lilla'na' nakan ga choe'lwill beñ' nad'", na' le' ñaa ba nonzlen ka to ga chdop chllag wban.

<sup>47</sup> Na' yog' lla bli' bselele Jesúza' beñ' gana' zoa yoodo'na', na' bxoazka' chñabia' na' beñ'ka' chli' chsedi leya' na' nochlə beñ' wñabia' che beñ' Israelka' ja'kzi biy-iljall'gake' naklə gongake' kwenche witgake'ne' <sup>48</sup> bikzə bi gok gongake', ja' yog'zə beñ' chibagakile' chzenaggake' dill'ka' cho'e.

**Yel' wñabia' che Jesúza'**  
(Mt. 21:23-27; Mr. 11:27-33)

**20** Na' bllin to lla, shlak chli' chsedi Jesúza' beñ'ka' lesh' chyoodo'na' na' chyixje'ile' legake' dill' wen dill' kob che Chioza', bllin bxoazka' chñabia' na' beñ'ka' chli' chsedi leya' len beñ' golka' chñabia'. <sup>2</sup> Na' che'gake'ne':

—Wnashki neto', ¿bi yel' wñabia' napo' chono' diiki? Na' znora beñ' li' yel' wñabia'ni?

<sup>3</sup> Na'ch che' Jesúza' legake':

—Lekzka' nad' de to dii inabid' le', li inashki nad':

<sup>4</sup> ¿Noran bsel' Juanna' kwenche bidchoe' beñ' nisa? ¿AChiozan' bseleene'? ¿Anti beñ' yell-liona'zan bseleene', lla?

<sup>5</sup> Na'ch wzologake' choe'len lljwellgake' dill', che'gake':

—¿Nakra ka ye'chone', lla? Shi ye'chone' Chioza' bseleene', lobe' ine' cho': "¿Berache ki wyajle'le che', shka'?" <sup>6</sup> Na' shi yize'chone' nozə beñ' bseleene', yog' beñ'ki wlligake' cho' yaj witgake' cho', ja' yog'gake' chajle'gake' Juanna' bi'e dill' daa goll Chioza'ne'.

<sup>7</sup> Na'ch gollgake' Jesúza':

—Bi nezinto' no bsel' beena'.

<sup>8</sup> Na'ch che' Jesúza' legake':

—Lekzka' nad' aga wnia' le' noran beñ' nad' yel' wñabia'na' kwenche chon' diiki.

**Jempl che wen llin malka'**  
(Mt. 21:33-44; Mr. 12:1-11)

<sup>9</sup> Na' Jesúza' bseese to jempl lao beñ'ka' lle' na':

—To beñ' billee yag uva, na' bene'n lall' na' beñ'ka' gap wwian, na' wzee wyaje' ssha gan yoblə. <sup>10</sup> Na' ka bizi' bilap beñ'ka' uvana', xaninna' bselee to wen llin che' kwenche lljelle' beñ'ka' nak lall' na'gake' yag uva-ka' we'gake'ne' daa chidolee yikee. Na' beñ'ka' chap-gake' yag uvaka' be'gake'ne' bet wdingake'ne', na'tech bilaggake'ne' to ka' che'. <sup>11</sup> Na'ch bselee sto wen llin che'na'. Na' lekzka' bet wdingake'ne', na' biya dii bengakile'ne', na' bizlaggake'ne' to ka' che'. <sup>12</sup> Na'ch de wyon shii, bizselee wen llin yoblə, na' lekzka' bengake'ne' bido we'zi, na' bizlaggake'ne'.

<sup>13</sup> Na'ch chaki xan yag uvaka': "¿Nakra ka gona'n? Wsel'shkid' bi' cha'ni, bi'ni le chakid'. Shera shicholə wzenaggake' cheb'." <sup>14</sup> Na' ka ble'i beñ'ka' chap yag uvaka' xiine'na', na'ch che' lljwelle': "Bi'nin yigaanlem' yell-lioni. Li da witchob' kwenche yigaanlenchon."

<sup>15</sup> Na' wlelgake'b' gana' lle' yag uvaka' na' betgake'b'.

Na'ch wñabi Jesúza' beñ'ka' chzenag:

—¿Nakra ka chakile goni xan yag uvaka' beñ'ka', lla?

<sup>16</sup> Ba naktan shaje' na' lljete' beñ'ka' chap yag uva che'na' na' yiyone' yell-lio che'na' lall' na' beñ' yoblə.

Na' ka beni beñ'ka' wne' ka', na' wnagake':

—iBat we' Chioza' latj gak ka'!

<sup>17</sup> Na' bwia Jesúza' legake', chi'e:

—¿Beran zejjin Cho'a Xtill' Chioza' gana' na: Yaja' daa bi wyoolall' wen yooka', leyen'lannan' yaja' daa ba nchejcha yoonā?

<sup>18</sup> Nottezə beŋ' lɪjɕhaze' lawinna' kwiayee, na' shi idak-wan beŋ', axt wshoshjan ɪe'.

**Janabgakile' Jesúza' shi chiyaɪ' çhixjgake' daa chɲab beena' chɲabia' Rómána'**

(Mt. 21:45-46; 22:15-22; Mr. 12:12-17)

<sup>19</sup> Na' bɔzoka' chɲabia' na' beŋ'ka' chli' chsedi leya' goklall'gake' gox'gake' Jesúza' ka biyoll' golle' ka', ɪa' gokbe'gakile' chezgaken' wɲie' daa bi chajɪe'gake' che'. Per blleb'gake' beŋ'ka' ndop nllag na'. <sup>20</sup> Na'ch bseɪ'gake' to çhop beŋ' wiwia wiyi, na' bentezgake' ka beŋ' cheenchgayi wzenag che'. Per aga do lall'gaken' wyajgake', san kwençhezə kwejyelgakile' Jesúzan' na' lɪjadaogake' xya che' lao beena' chɲabia' gana' mbani Judeana'. <sup>21</sup> Na' wɲabgakile'ne':

—Maestro, ɲezinto' daa no' na' daa chli'o nakan dii ɪi, na' aga chwio' nak nak beŋ', shi nake' beŋ' zakii wa shi bi nake'. ɲezinto' chli'o nez ɪi che Chioza' kon ka nakan. <sup>22</sup> Wnashki neto': ¿Achiyaɪ' çhixjcho daa chɲab Césara', beena' chɲabia', anti bi chiyaɪ' çhixjchon?

<sup>23</sup> Na' gokbe'i Jesúza' aga do lall'gaken' wɲabgakile'ne', na'ch chi'e':

<sup>24</sup> —ɪi wli'shkayi nad' to mech. ¿Nora cho'alawin na' no leyin da'n?

Na' che'gake'ne':

—Çhe Césaran', beena' chɲabia' Rómána'.

<sup>25</sup> Na'ch chi'e':

—Na'len, ɪi we' Césara' daa naki che', na' ɪekzka' ɪi we' Chioza' daa naki che'.

<sup>26</sup> Na' ni shcho'a dill' daa bi'e lao beŋ'ka' bi gok wçhingake'n kwençhe gaogake' xya che'. Na' biban-gakile' ka golle' ɪegake' na' bibe'gake' llizə.

**Wɲabgakile' Jesúza' nak gak kat' yiban beŋ' wetka'**

(Mt. 22:23-33; Mr. 12:18-27)

<sup>27</sup> Ka wde dga, bllin baɪ saduceoka' lao Jesúza', beŋ'ka' bi chajɪe' daa yiban beŋ' wetka'. Na'ch che'gake' Jesúza':

<sup>28</sup> —Maestro, leya' bzej dii Moiséza' nan: shi to beŋ' byo guete' na' igaan xoole'na' wizeb na' kono xiingake' wzoa, beŋ' bish' beŋ' weta' chiyaɪ' yikee nool wizeba' kwençhe soa xiin dia che dii beŋ' bisheena'. <sup>29</sup> Ki gok to shii, wzoa gall bish' beŋ', na' beŋ' necha' bshagnee, na' wite' na' kono xiine' wzoa. <sup>30</sup> Na' beŋ' wchopina' bikee noola', na' ɪekzka' wite' na' kono xiine' wzoa. <sup>31</sup> Na' beŋ' wyonina', ɪekzka' bizkee noola', na' wizete' na' kono xiine' wzoa. Na' ɪekzka' beŋ'ka' zi tap bizkaagake' noola' na' witgake', na' ni to beŋ'ka' gall bi wzoa xiingake' kon noola'. <sup>32</sup> Na' ka bllin lla ɪekzka' wit noola'. <sup>33</sup> Na' kat' yiban beŋ' wetka', çnorayen'en' gak beŋ' che', lla?, ɪa' galltien' wzoalene'.

<sup>34</sup> Na'ch che' Jesúza' ɪegake':

—Beŋ'ka' lle' yell-lioni ɲaa chkaa ɪjwellgake', na' ɪekzka' choe' yeɪ' wishagna' che xiine'ka'. <sup>35</sup> San beŋ'ka' inɔ Chioza' zak'gake' yiyajgake' gana' zoe' ka yibangake' ladj beŋ' wetka', aga ka'chan gongake'. ɪa' koch no wshagna' gana' zoa Chioza', <sup>36</sup> ni koch no guet, san soagake' ka zoa anjka'. Na' gagkake' xiin Chios daa ba

bisbane' ɪegake' ladj beŋ' wetka'. <sup>37</sup> Kwin dii Moiséza' bzeje' kwençhe inezicho yiban beŋ' wetka' kana' bzeje' che yag yeshaa daa ble'ile' chaɪ'ɲin. Na' wne' Xancho Chioza' nake' Chios che Abrahamá', Isaaca' na' Jacoba'. <sup>38</sup> Na' Chioza' aga nake' Chios che beŋ' wet, san nake' Chios che beŋ' de yeɪ' mban cheyin. ɪa' yog'ɪoɪ beŋ' nɣenilalii Chioza', dekwə yeɪ' mban chegake'.

<sup>39</sup> Na'ch baɪ beŋ'ka' chli' chsedi leya' gollgake'ne':

—Maestro, ka ba wɲayenoon nakan.

<sup>40</sup> Na' bich bi biyaxjchgakile' inabchgakile'ne'.

**Crístona' nake' xiin dia che dii Davina'**

(Mt. 22:41-46; Mr. 12:35-37)

<sup>41</sup> Na' che' Jesúza' ɪegake':

—¿Beraçhe nazə beŋ' Crístona' nake' xiin dia che dii Davina'?, <sup>42</sup> len kwin dii Davinan' bzeje' lee libr che Sálmoka' gana' na:

Xancho Chioza' golle' Xan'na':

“Wche' kwit' de shɪi ni

<sup>43</sup> shlak wzoa' xɲi'ona' beŋ'ka' chakzbani li'.”

<sup>44</sup> ¿Beraçhe chakzile Crístona' nake' xiin dia che dii Davina', len kwin Davina' golle'ne': “Xan”?

**Jesúza' wne' nan beŋ'ka' chli' chsedi leya' chongake' mal**

(Mt. 23:1-36; Mr. 12:38-40; Lc. 11:37-54)

<sup>45</sup> Na' shlak chzenag yog' beŋ'ka' lle' na', Jesúza' golle' beŋ'ka' nakgake'ne' txen:

<sup>46</sup> —ɪi wsak' bi gonle ka chon beŋ'ki chli' chsedi leya'.

ɪe chibagakile' gon xe'ka' dii ton, na' cheengakile' yog'zə beŋ' gapgake' ɪegake' balaan ladj lkwe' beŋ'. Na' gana' chdop chllagcho choe'ɪwillcho Chioza' chbagakile' kwe'gake' gana' chbe' beŋ'ka' zakii, na' ka'kzə chongake' ga de yeɪ' waw. <sup>47</sup> Na' ɪekzka' chkaatezgake' lill nool wizebka', na' chongake' ka chshaljlen Chioza' ssha nllab kwençhe gaki beŋ' ɪe wen chongake'. Na' daa chongake' ka', ba naktan ile'gakile' yeɪ' zak'zi' wala'.

**Daa bzani to nool wizeb, bi'en Chioza'**

(Mr. 12:41-44)

**21** Na' ble'i Jesúza' ka chgoo beŋ' wni'aka' mecha' gana' chgoo beŋ' mech che yoodo'na'. <sup>2</sup> Na' ɪekzka' ble'ile' to nool yesh', beŋ' wizeb, wlo'e çhop sintabdo'. <sup>3</sup> Na' goll Jesúza' ɪegake':

—Dii ɪi nia' le', ɪa'kzi nool wizebi nake' beŋ' yesh', ba be'che' dii xench aga ka yog'te beŋ'ka'. <sup>4</sup> ɪa' yog'gake' choe'gake' daa chichoonan che'ka', na' ɪe', naktie' beŋ' yesh', wlo'e doxen daa nape', ɪa'kzi chyalljile'n.

**Jesúza' chi'e' wllin to lla kwiayi' yoodo'na'**

(Mt. 24:1-2; Mr. 13:1-2)

<sup>5</sup> Na' baɪ beŋ'ka' choe'gake' xtill' yoodo'na' ka xochi nak yajka' nongakile'n na' diika' bzani beŋ' be'gake'n yoodo'na'. Na'ch che' Jesúza' ɪegake':

<sup>6</sup> —Ka nak diiki chwiale ɲaa, wllin lla kwiayi' yogaan, ni sto yaj bich kwia koll' ɪjwellin.

**Diika' gak kat' ba zoa te che yell-lioni**

(Mt. 24:3-28; Mr. 13:3-23)

<sup>7</sup> Na'ch wṇabgakile' Jesúza', che'gake'ne':

—Maestro, ¿batran gak dga ba wno'? ¿Bera ka ile'in-to' gak kwenche inezinto' nan ba zoa gaoshosh gakan?

<sup>8</sup> Na'ch che' Jesúza' legake':

—Li wsak' bi we'le latj no siye' le'. La' ben' zan zi ichej gonzgake' ka nad', na' inazgake': "Nadaan Cristona", na' lekzka' inazgake': "Ba bllin lla kwiayi' yell-lioni." Bi gonle legake' txen. <sup>9</sup> Na' ka yenile chak no wdil wa chtop chshag ljwell ben' kwenche soshiy'gake' ben' wṇabia'ka', bi illeble. Chonan byen zigaate gak diiki, per aga lli tete che yell-lioni kat' ba chakgakan.

<sup>10</sup> Na'ch golle' legake':

—Ganga kwe' wdila' na' tiḷ yell kon yell. <sup>11</sup> Na' gak no bedxo' wal, na' gat' wbin, na' biya yillwe' kwe' lo yell-lioni, na' biya dii gak xan yabana' dii wwall wsheban ben'.

<sup>12</sup> Na' ka zi gak diiki, gox'gake' le' na' biya dii gongak-ile' le'. Na' lljwa'gake' le' gana' chdop chllagcho choe'ljwill-cho Chioza' na' yiya yiyiljgake' le' na' koogake' le' lillya, na' lljwa'gake' le' lao ben' wṇabia' xenka' na' lao ben' wṇabia'ka' sto ni cha'. <sup>13</sup> Na' kat' gak chele ka', na'chlə gat' latj we'le cho'a xtillaana' lawe'ka'. <sup>14</sup> Na' bi sezle wṇeyi naklə inale kat' lljsele lao ben' wṇabia'ka', <sup>15</sup> la' nad'kzan wzajniid' le' nakan inale na' gon' le' yeḷ' sin'na' kwenche ni to ben'ka' chakzban-gakile' le' bi sogakile' inagake' bi nakan ka nale. <sup>16</sup> Na' no xaxna'tezle, no ben' bish'le, no dialla chele, na' no ben' zoalenle wen gongake' le' lo na' ben' wṇabia'ka', na' witgake' baḷ-le. <sup>17</sup> Na' axt yog'zə ben' gakzbangak-ile' le' daa nonjlilall'le nad'. <sup>18</sup> Per li koo yichjle, Chioza' gaklene' le' na' ni tlish' yish' yichjlēna' bi kwiayi'. <sup>19</sup> Na' shi sechale lawi daa yen ile'ile na' bi gakchoplall'le, na'chan gat' to yeḷ' mban chele dii bi te cheyin.

<sup>20</sup> Na' kat' ile'ile nechj soldadka' Jerusalenni, kanan' inezile nan ba zoa kwiayi'n. <sup>21</sup> Na'ch ben'ka' lle' gani mbani Judeani, chiyaḷ' wxonjgake' lljakwash'gake' do yaa yaoka', na' ben'ka' lle' yelli, chiyaḷ' wxonjgake', na' ben'ka' zej lyixaa, bichoklə yiyedgake' yelli. <sup>22</sup> La' kanan' gon Chioza' yeḷ' zi' che yog'ze' kwenche yillinin doxen ka na Cho'a Xtilleena'. <sup>23</sup> Nyesh'laz wal gak che noolka' noa' na' noolka' chwall' chxop llana' gak diiki! La' dii xen daa yen ile'i ben' Israelki. <sup>24</sup> Baḷgake' guet lo wdila' na' zi baḷe' wche'gake' pres yell zit'ka'. Na' ben' zit'ka' wlej wshoshjgake' yell Jerusalenni axt kat'ch illin lla yiyoll yido ka lli bia' gongake'.

**Kat'ka' yiyed Jesúza'**

(Mt. 24:29-35, 42-44; Mr. 13:24-37)

<sup>25</sup> Na' lo wbillā, lo bewaa na'ch lo beljka' gak dii gon-nan ka yibani ben'. Na' ben'ka' lle' yell-lioni gakshe-llall'gake' na' illebgake' kat' gon nisdona' sshag wal daa so' kwe'n. <sup>26</sup> Na' axt ichoḷ-lall' ben' daa chllebgake' kwiayi'lengake' yell-lioni, la' axt yog' diika' lli xan ya-bana' inibgakan. <sup>27</sup> Na'ch ile'gakile' nad', Ben' Bsel' Chioza' Yell-lioni, zizaa to lo bej kon yeḷ' wak xen na'

balaan xen. <sup>28</sup> Na' kat' solo gak diiki, li wtipch lall'le, la' ba zoa gaoshosh yidsla' len'.

<sup>29</sup> Na' lekzka' bsees' Jesúza' to jempl chi'e:

—Li wwiakachi yag yixwewa' wa bichlə yag. <sup>30</sup> Kat' chle'ile ba chibia xlaguiinka', chakbe'ile ba zoa yiyoo la'o linna'. <sup>31</sup> Ka'kzə, kat' ile'ile ba chak diiki ba wnia', chiyaḷ' inezile ba zoa gao wli' Chioza' yeḷ' wṇabia' che'na'.

<sup>32</sup> Dii li nia' le', aga ba wit ben'ka' zoa ṇaa kat' gak yog' diiki. <sup>33</sup> Yabana' na' yell-lioni te chegakin, san cho'a xtillaana' aga wde bi gak ka nan.

<sup>34</sup> Li wsak' bi we'le latj sho' diika' wxinjan yichjlall'do'lena'. Bi wlanze yeḷ' weezo, na' bi sezle wṇeyi bi chak chele. Li wsak' kwenche aga sha chele-le chon llana' zizaa. <sup>35</sup> La' tokonganzen gak diiki yen ile'i yog'te ben'ka' lle' doxen yell-lioni. <sup>36</sup> Na' le', li se wṇeyi, li inabi Chioza' toshiizi gaklene' le' kwenche yilale lao yog' diiki lli bia' gak, na' kwenche bi gall illeble sele lawa'na', nad', Ben' Bsel' Chioza' Yell-lioni.

<sup>37</sup> Na' Jesúza' bli' bsdile' ben' yog' lla yoodo'na', na' ka chaḷ, chjagaane' lo Yaa Olivoza'. <sup>38</sup> Na' yog' zil yog' ben' chajgake' yoodo'na' chjazengagake' daa chli' chsdile'.

**Wloogake' xnezin witgake' Jesúza'**

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Ba zoa gaozə lni Paskwa' kat' chaogake' yetxtil daa bi nchix levadurana'. <sup>2</sup> Na' bxoza' chṇabia' len ben'ka' chli' chsedi leya' chiyiljall'gake' naklə gongake' witgake' Jesúza' ka kono gakbe'i, la' blleb-gake' shi bi goni ben' wllal che'ka' legake'.

<sup>3</sup> Na'ch xan dii xiw'ka' daa le Satanx wyoon loo yichjlall'do' Jud Scariota', beena' nak txen ben'ka' shllin. <sup>4</sup> Na' wyaje' lao bxoza' chṇabia' len lao ben'ka' ngoo lall' na' ben'ka' chap yoodo'na', na' bi'e dill' nakan gone' Jesúza' lall' na'gake'. <sup>5</sup> Na' le bibagakile' na' bche-bgake' we'gake'ne' mech. <sup>6</sup> Na'ch bchebe' gone'ne' lall' na'gake'. Na' wzolo chinoe' batan gat' latj kat' kono ben' lle' gone' Jesúza' lall' na'gake'.

**Lle'na' zeelo wdaolengake' Jesúza'**

(Mt. 26:17-29; Mr. 14:12-25; Jn. 13:21-30; 1 Co. 11:23-26)

<sup>7</sup> Na' bllin llana' chsini'agake' che llnina', llana' chzolo chaogake' yetxtil daa bi' nchix levadurana' na' chit-gake' to xil'do', bana' gaogake' lle' Paskwa'. <sup>8</sup> Na'ch wlej Jesúza' Pédrone' len Juanna' na' chi'e legake':

—Li lljasini'a daa gaocho lni Paskwi.

<sup>9</sup> Na'ch che'gake'ne':

—¿Garan cheenilo' lljasini'anto'n?

<sup>10</sup> Na' che' Jesúza' legake':

—Ka sho'le Jerusalenna', na' ile'ile to ben' byo zino'e to chee nis, na' li lljanoe' axt yoona' gana' yilline'. <sup>11</sup> Na' ye'le xan yoona': "Maestrona' chṇabile' li': ¿Garan zoa yoona' wyoone' gana' gaolene' ben'ka' nakgake'ne' tx-en lle' Paskwi?" <sup>12</sup> Na' wliile' le' to yoo xen dii lli shk-wiana' cha'lə ga ba nonshao'tie'. Nan' wsini'ale daa gaocho xshe'na'.



<sup>13</sup> Na' wloogake' nez zejgake', na' kon kayen' golle' le-gake' gok. Na' bsini'agake' daa wdaogake' lle' Inj Paskwa'.

<sup>14</sup> Na' ka goj' gaogake' xshe'na', Jesúza' wche'lene' postl' che'ka' cho'a mesa'. <sup>15</sup> Na'ch chi'e legake':

—Ba goklall'chga' yeej gaolen' le' Inj Paskwi' naa biñ' witgake' nad'. <sup>16</sup> Na' ba nia' le', zeelo' naa cheej chaw' dga. Bichga' yeej gawa'n axt ki illin llana' wli' Chioza' yel' wñabia' xen che'na', kana'ch yeej gawa'n dii yoblə.

<sup>17</sup> Na' bexee kopa' na' bi'e Chioza' yel' choxken, na' chi'e:

—Li gox' dga, li yeejan lat' wej. <sup>18</sup> Na' nia' le', bichga' yeej' nis uvani axt ki illin lla wli' Chioza' yel' wñabia' xen che'na'.

<sup>19</sup> Na'ch bexee yetxtila' na' bi'e yel' choxken Chioza'. Na' bxoje'n bi'en legake' kwenche wdaogake'n, na' chi'e:

—Dgan kwerp' cha'ni, chzanlallidaan ni chele. Kin gonle kwenche lljadinile nad'.

<sup>20</sup> Na' lekzka' bene' ka wde wdaogake' xshe'na', bexee kopa' sto shii, na'ch chi'e:

—Dga yoll' loo kopi zej in xchen'na' daa laljə ni chele daa gonan ka galkj dii koba' bcheb Chioza' gone'.

<sup>21</sup> Na' naa, beena' gone' nad' lo na' beñ'ka' chakzi'gakile' nad' chi'lene' nad' cho'a mesi. <sup>22</sup> La' ba bllin lla gak ka nak daa llia bia' gak cha', nad', Beñ' Bsel' Chioza' Yell-lioni, per inyesh'laz gak che beena' gone' nad' lo na' beñ' malka'!

<sup>23</sup> Na'ch beñ'ka' nakgake'ne' txen wzologake' chñabi lljwellgake' noen' gone'ne' lo na' beñ'ka'.

### Gokgued beñ'ka' nak Jesúza' txen nogaken' zak'chi

<sup>24</sup> Na' lekzka' chakdi'l-len lljwellgake' nogaken' nak beñ' zak'chi. <sup>25</sup> Na' che' Jesúza' legake':

—Zoa beñ' wñabia' to to nación, na' chongake' byen chzenag beñ' chegake', na' nagake' che kwingake' le chaklengake' beñ'. <sup>26</sup> San le', bi chiya' gonle ka'. Shi nole nakle beñ' zakii, chiya' wchek' yichjle ka to bi' xk-wid', na' shi nole chñabia', chiya' gonle ka notteza beñ' wen mandad. <sup>27</sup> ¿Noran nak beñ' zak'chi?, ¿abeena' chbe' cho'a mesa' chawe'?, ¿anti beena' chon mandadan', lla? Beena' chi' cho'a mesan' nake' beñ' zak'chi. San nad', la'kzi naktia' xanle, zoa' ladjleni ka to beñ' wen mandad chele.

<sup>28</sup> Le' ba wzoalenle nad' lao yog'te daa ba gok cha'.

<sup>29</sup> Na' daan, gon' le' yel' wñabia'na' ka daa beñ' Xa'na' nad'. <sup>30</sup> Na' yeej gaolenle nad' gana' inabi'a. Na' kwe'le gana' inabi'a'le yizi'le kwent che shllin kwen beñ'ka' nak xiiñ dia che dii Israela'.

### Jesúza' wne' bi wcheb Pédróna' shi nombi'ene'

(Mt. 26:31-35; Mr. 14:27-31; Jn. 13:36-38)

<sup>31</sup> Na' lekzka' golle' Simón Pédróna':

—Simón, Simón, Satanáza', daa chñabia' dii xiw'ka', ba wñaban le' gakte lo na'yin kwenche gondinj gonganin le'. <sup>32</sup> Na' nad' ba wñabid' Chioza' gaklene' li', Simón, kwenche gonllilall'cho nad'. Na' kat' ba biyajilo'

cheyi daa gono', na' gakeno' beñ'ki nako' txen kwenche soachechgake' gonllilall'gake' nad'.

<sup>33</sup> Na' che' Simónna':

—Xan', ba nchogllalaa llaa lillyana' sa'len' li' wa axt guetlen' li' txen.

<sup>34</sup> Na' che' Jesúza':

—Pedro, nia' li', naanlle' shon shii bi wchebo' shi nombi'o nad' ka zi' kwell shikwteza'.

### Ba zoa gaoz wtil' Jesúza' daa gak che'

<sup>35</sup> Na'ch che' Jesúza' legake':

—¿Azyalljile bi byalljile kana' bselaa le' na' bibi beñ'le, ni ga koo xalaanle, ni mech na' ni xel-le?

Na' che'gake':

—Bibi byalljinto'.

<sup>36</sup> Na'ch golle':

—Per naach nia' le', shi de ga chgoo xalaanle, li goxaan, na' shi de xmechle, li wa'n; na' shi nole bi de spad chele, li lljayet' xalena' na' li si' tlisha'n. <sup>37</sup> Nia' le', chonan byen gak cha' kon ka na Cho'a Xtill' Chioza' gana' na: "Gongakile'ne' ka chongakile' to beñ' wen dii mal."

<sup>38</sup> Na' che'gake':

—Xan', ni napnto' chop spad.

Na' chi'e:

—Lliz li soachoklə.

### Be'llwill Jesúza' Chioza' gana' le Getsemaní

(Mt. 26:36-46; Mr. 14:32-42)

<sup>39</sup> Na'ch biza' Jesúza', na' kon ka yooloe' chone' biyaje' lo Yaa Olívoza', na' zjano beñ'ka' nakgake'ne' txen.

<sup>40</sup> Na' ka bllingake' latja', na' chi'e legake':

—Li we'llwill Chioza' kwenche bi we'zle latj gon beli chenna' le' gan.

<sup>41</sup> Na' bkwase' kwite'ka', ka to ga zeelo chllin to yaj dii chzal'cho, na'ch bchek' xibe'na' be'llwille' Chioza'. <sup>42</sup> Na' golle':

—Xa, shi li' cheenilo', bislagach nad' lawi dga ba zoa idi' illag'; per aga gak ka cheenid', san gak ka cheenilo'.

<sup>43</sup> Na'ch bli'lao to anj beñ' za' yabana' le', na' biyo'ene' fuerz. <sup>44</sup> Na' daa le chakyesh'chgaile', zizikli be'llwillche' Chioza' axt biyaklolje'. Na' nis yes che'na' daa chxop lo yona' nakan ka to bllon wej chen.

<sup>45</sup> Biyoll' be'llwille' Chioza', na' bizollee biyaje' gana' lle' beñ'ka' nakgake'ne' txen, na' ka billine' kwite'ka' ba chesgake' daa chakyesh'gakile'. <sup>46</sup> Na' chi'e legake':

—¿Berache cheszele? Li chas na' li we'llwill Chioza' kwenche bi we'zle latj gon beli chenna' le' gan.

### Be'x'gake' Jesúza'

(Mt. 26:47-56; Mr. 14:43-50; Jn. 18:2-11)

<sup>47</sup> Ni choe'te Jesúza' dill', ka bllin beñ' zan, na' beena' le Jud, beena' nak txen beñ'ka' shllin, nchi'e legake'.

Na' ka blline' jabiguee kwit Jesúza' na' bnope' xagueena'. <sup>48</sup> Na'ch che' Jesúza'ne':

—Jud, ¿akon dga bnopo' nad' chono' nad', Beñ' Bsel' Chioza' Yell-lioni, lo na' beñ'ki?

<sup>49</sup> Na' beṇ'ka' lle'len Jesúza', ka ble'gakile' ka ba chak che', na'ch gollgake'ne':

—Xan', ¿awñiyainto' spadki?

<sup>50</sup> Na' toe' lii wdintie'n to mos che b̄ox choo b̄ox xenna' b̄chogtie' nague' de sh̄l̄ina'. <sup>51</sup> Na' che' Jesúza':

—Bich bi gonile beṇ'ka'.

Na'ch bida' Jesúza' nag beena'. <sup>52</sup> Na' daa bllin b̄ox-ka' chñabia' len beṇ'ka' chap yoodo'na', na' beṇ' golka' chñabia', kwenche gox'gake'ne', chi'e legake':

—¿Berache za'zle nox'le yag na' spad kwenche zidñizle nad' ka to no beṇ' wban? <sup>53</sup> Yog' lla wzoa' ladjlena' yoodo'na' na' bi beṇ'le nad'. Per ñaach bllin lla gonle ka cheenile na' ñaayen' chñabia' dii mala' daa chñabia' gana' shgasj shçhoj.

### Bi b̄cheb Pédrona' shi nombi'e Jesúza'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Na'ch bñizgake' Jesúza' na' b̄che'gake'ne' lill b̄ox choo b̄ox xenna', na' zit' zit'lə zjano Pédrona'ne'. <sup>55</sup> Na' bxengake' yi'na' lesh' chyoo che b̄ox choo b̄ox xenna' na' wche'gake' cho'a yi'na', na' wlen Pédrona' legake'.

<sup>56</sup> Na' to noolə wen mandad, ka ble'ile' chi' Pédrona' cho'a yi'na', lii wzetie' chwie'ne', na' chi'e:

—Lekzka' len beenin nake' Jesúza' txen.

<sup>57</sup> Na' Pédrona' aga b̄chebe', na' chi'ene':

—Noolə, aga nombi'a beena'.

<sup>58</sup> Na' gokzə xtít bizle'i beṇ' yoblə Pédrona' na' chizi'ene':

—Lekzka' lenon' nako' beṇ'ka' txen.

Na' Pédrona' chi'ene':

—Bi len' nak' beṇ'ka' txen.

<sup>59</sup> Na' wizak ka do zi' tgor na' wize' sto beṇ' yoblə:

—Dii likzan len beeni nake' txen Jesúza' la' lekzka' beṇ' Galilean.

<sup>60</sup> Na'ch che' Pédrona'ne':

—Ni bi ñezid' bi dillaan choo!

Na' ni che'telə Pédrona' ka', ka wchell to shikwtez.

<sup>61</sup> Na'ch biyechj Xancho Jesúza' bwie' Pédrona', na' Pédrona' jadinile' daa golle'ne', kana' chi'e: "Ñaanille' shon shii bi wchebo' shi nombi'o nad' ka zi' kwell shikwteza'." <sup>62</sup> Na' bichej Pédrona' gana' lle' beṇ'ka' na' wchellyeshee.

### Btitgakile' Jesúza'

(Mt. 26:67-68; Mr. 14:65)

<sup>63</sup> Na'ch beṇ'ka' chapgake' Jesúza' btitgakile'ne' na' wdap' wlall'gake'ne'. <sup>64</sup> Na' bsejgake' jalawe'na', na'ch wlall'gake'ne', che'gake'ne':

—Wnashki non wlall' li'!

<sup>65</sup> Na' biya dii gollgake'ne' kwenche gakile' zi'.

### Wde Jesúza' lao beṇ'ka' chñabia'gake' beṇ' Israelka'

(Mt. 26:59-66; Mr. 14:55-64; Jn. 18:19-24)

<sup>66</sup> Na' ka wyeeni', bidop beṇ'ka' chñabia' beṇ' Israelka', len b̄oxzka' chñabia' na' beṇ'ka' chli' chsedi leya'. Na' bdegake' Jesúza' lawe'ka'. Na'ch wñabgakile'ne', che'gake':

<sup>67</sup> —Wnashki neto' shi li'kzan Crístona', beena' chbeznto'.

Na' che' Jesúza':

—Shi ñña' le': "Awe, nadaan", aga wyajle'le çha'. <sup>68</sup> Na' shi ññabid' le' bi dii ññabid' le', aga williilen na' ni bi yisanle nad', shi ñaa. <sup>69</sup> Na' ñaate, nad', Beṇ' Bsel' Chioza' Yell-lioni, kwi'a kwit de sh̄l̄i che Chioza', beena' nap yej' wak xenna'.

<sup>70</sup> Na'ch yog'ze' wñabgakile'ne':

—¿Ana' lin' nako' Xiñ Chioza'?

Na'ch che' Jesúza':

—Awe, sh̄likzan ba wnale.

<sup>71</sup> Na'ch che' ljwellgake':

—Kochno chyalljicho gawe' xya che beeni. Kwintekzcho ba benicho ka ba wne'.

### Wde Jesúza' lao Pilátona'

(Mt. 27:1-2, 11-14; Mr. 15:1-5; Jn. 18:28-38)

**23** Na'ch yog'loj beṇ'ka' bizolla'gake' na' jwa'gake' Jesúza' lao Pilátona'. <sup>2</sup> Na'ch wzologake' chao-gake' xya che Jesúza', che'gake':

—Ba bidojinto' beeni chta chñie' beṇ' wlall çhentoka'. Chi'e bi chiya' chixjcho daa chñab Césara', beena' chñabia', na' lekzka' naze' nake' Crístona', na' daa ne' ka' zejín nake' to beṇ' wñabia'.

<sup>3</sup> Na'ch wñabi Pilátona' Jesúza', chi'ene':

—¿Alin' nako' beṇ' wñabia' che beṇ' Israelki?

Na'ch che' Jesúza'ne':

—Kan' nakan.

<sup>4</sup> Na'ch che' Pilátona' b̄oxzka' chñabia' na' yog' beṇ'ka' lle' na':

—Ni to dii mal bi chillelid' chon beeni.

<sup>5</sup> Na' zizikchli che'gake':

—Diika' chli' chsedile' chta chñen yog'loj beṇ' lle' doxen lallinto'ni. Wzoloze' Galileana', na' axt Judeani ba bide'.

### Bde Pilátona' Jesúza' lao Heródeza'

<sup>6</sup> Ka gollgake' Pilátona' ka', na'ch wñabile' legake' shi nak Jesúza' beṇ' Galilea. <sup>7</sup> Na' ka wñezile' nake' beṇ' Galilea, na'ch bdi'e'ne' lao Heródeza', beena' ññane' chñabi'e Galileana', la' kana'yen' zoa Heródeza' Jerusaléna'. <sup>8</sup> Na' le bibayi Heródeza' ka ble'ile' Jesúza', la' ba wlla cheenile' ile'ile'ne' daa ba benile' choe' beṇ' xtilleena'. Na' goki Heródeza' ile'ile' gone' to yej' wak. <sup>9</sup> Na' biya dii wñabile' Jesúza', na' ni to daa wñabile'ne' bi billi'e. <sup>10</sup> Na' lekzka' na' lle' b̄oxzka' chñabia' len beṇ'ka' chli' chsedi leya', na' zizikli chao-gake' xya che Jesúza'. <sup>11</sup> Na'ch Heródeza' len soldad che'ka' biya dii bengakile'ne', na' btitgakile'ne' bwakw-gake'ne' to lech' ka daa chakw to beṇ' wñabia'. Na'tech bizsel' Heródeza'ne' lao Pilátona'. <sup>12</sup> Na' lo llana' bi-zoalen Pilátona' Heródeza' wen, la' kana'te chakzbani ljwelle'.

**Bchoglogake' guet Jesúza'**

(Mt. 27:15-26; Mr. 15:6-15; Jn. 18:39-19:16)

<sup>13</sup> Na'ch bitia' Pilátona' b̄xozka' ch̄n̄abia', na' beñ'ka' ch̄n̄abia'gake' beñ' Israelka' na'ch beñ' yell, <sup>14</sup> na' golle' legake':

—Le' bidwa'le beeni lawii, nale chta ch̄nie' beñ', na' nad' ba w̄n̄abidee laoleni, na' bi chillid' ni to daa nale che' shi li ka chone'n. <sup>15</sup> Na' ni Heródeza' bi billelile' shi bi doł' nap beeni, na' ba bizseleene' laochoni. Na' ba ble'teile aga bi bene' in̄acho w̄choglozcho guete'. <sup>16</sup> Na' naa gon' mandad wit ch̄ingake'ne' na'tech yisane.

<sup>17</sup> Na' ka chakz yog' yiz, chiyal' yisane' to beena' nej lillyana' kat' chal' ln̄i Paskwa'. <sup>18</sup> Na' yog' beñ'ka' ndop nllag na', wzologake' chosyaagake', che'gake':

—¡Guettega beeni! ¡Na' bisan Barrabáza'!

<sup>19</sup> Nyixjgake' Barrabáza' lillyana' daa bxie' wdił'a' yell Jerusaléna', na' bettie' to beñ'. <sup>20</sup> Na' daa cheeni Pilátona' yisane' Jesúza', na' stokzə w̄n̄abile' beñ'ka' shi wisane'ne'. <sup>21</sup> Na' beñ'ka' zizichli chosyaagake', che'gake':

—¡Bdee lee yag cruza'! ¡Bdee lee yag cruza'!

<sup>22</sup> Na' de wyon̄ shiyi che' Pilátona' legake':

—¿Bera dii malan' n̄ezile ba ben beeni, lla? Bi chillid' ni to dii mal dii ba bene' kwenche guete'. Gonch' mandad wit ch̄ingake'ne' na'tech yisane.

<sup>23</sup> Na' beñ'ka' wzeyidgake' chosyaagake' ch̄n̄abgake'ne' wdeene' lee yag cruza'. Na' daa wzeyidgake' chosyaagake', bengake' gan wzoa xtilleeka'. <sup>24</sup> Na' b̄choglall' Pilátona' gone' ka cheeni beñ'ka'. <sup>25</sup> Na' bisane' beena' w̄n̄abgake', beena' de lillyana' daa bxie' wdił'a' na' daa bettie' to beñ'. Na' bene' Jesúza' lo na'gake' kwenche gongakile'ne' ka chaklall'gake'.

**Bda'gake' Jesúza' lee yag cruza'**

(Mt. 27:32-44; Mr. 15:22-32; Jn. 19:17-27)

<sup>26</sup> Na' ka n̄che'gake' Jesúza' lljada'gake'ne' lee yag cruza', billaggake' to beñ' Cirene lie' Simón zizee lyixaa. Na' beñ'gake'ne' bwa'gake'ne' yag cruz che Jesúza' na'ch janoe'ne'.

<sup>27</sup> Na' beñ' zan zjanogake'ne', na' zan noolka' chbell-gake' na' chosyaagake' ni che Jesúza'. <sup>28</sup> Na' biyeçhj Jesúza' bwie' legake' na' golle':

—Le' nool Jerusalén, bi kwellzle cha'; li kwell che kwinle na' che xiinleka'. <sup>29</sup> Ła' wllin lla kat' in̄a beñ': "Chakomba nool willka', beñ'ka' bi wxan na' bi bwall b̄xopgake'." <sup>30</sup> Na'ch beñ'ka' zoa llana' gak ka', solo in̄a-gake': "Shel' iyinjtega yaa yaoki idakwtegan neto'."

<sup>31</sup> Shi yag yaa yag banna' chongakile'n kon daa nazan ch̄egake', zalechla ki gongakile' yag billa'?

<sup>32</sup> Na' lekzka' n̄che'gake' chop beñ' wen dii mal kwenche witgake' legake' txen len Jesúza'. <sup>33</sup> Na' ka billingake' latja' gana' le Llit Yichj Beñ' Wet, bda'gake' Jesúza' lee yag cruza'. Na' lekzka' bda'gake' chopte beñ' wen dii malka' shłaa wej kwite'na'. <sup>34</sup> Na' ka chda'gake' Jesúza' lee yag cruza', chi'e:

—Xa, wxi'xen ch̄egake', la' aga n̄ezgake' bin chon-gake'.

Na' soldadka' bengake' to wyitj kwenche w̄nezgake'ne' nogake' yidoł' xe'na'. <sup>35</sup> Na' lle' beñ' zan chwiagake', na' axt beñ'ka' ch̄n̄abia'gake' beñ' Israelka' btitjgake'ne', nagake':

—Gok bisle' beñ' yoblə, na' naa yislashki kwine' shi leile' len' Crístona', beena' ba wlej Chioza'.

<sup>36</sup> Na' lekzka' soldadka' btitjgake'ne', na' jabig'gake' kwit yag cruza' gana' nda'gake'ne' na' bshabgake'ne' to vino dii nak zichj zła'. <sup>37</sup> Na' che'gake'ne':

—Shi lin' nako' beñ' w̄n̄abia' che beñ' Israelki, bislashki kwino'.

<sup>38</sup> Na' yichj yag cruz che'na' bda'gake' to dii cho'en dill' biçhe nda'gake'ne' lee yag cruza', nan: "Beenin beñ' w̄n̄abia' che beñ' Israelka'." Bzejgake'n dill' griego, dill' latín na' dill' hebreo.

<sup>39</sup> Na' to beñ' wen dii mala', beena' da' kwit Jesúza', biya dii golle'ne', chi'ene':

—Shi lin' Crístona', Beena' Bsel' Chioza' in̄abia', bislashki kwino' na' lekzka' bisla neto'.

<sup>40</sup> Na' beena' sto bsheshlene'ne', chi'e:

—¿Abikzə chall chlleblatoo Chioza'?, len kon ka chak chen' ba chak cho'. <sup>41</sup> Cho', ka chiyal'kz gak chechon' kwenche ch̄ixjcho che dii mala' daa bencho; san beeni aga bi dii mal bene'.

<sup>42</sup> Na'ch golle' Jesúza':

—Jesús, lljadingachilo' nad' kat'ka' solo in̄abi'o.

<sup>43</sup> Na'ch che' Jesúza'ne':

—Dii li nia' li', naanlla soaleno' nad' latja' gana' nak mbalaz.

**Wit Jesúza'**

(Mt. 27:45-56; Mr. 15:33-41; Jn. 19:28-30)

<sup>44</sup> Na' do ka gobill biçhoł doxen yell-liona', bllinte do ka chida shoñ, <sup>45</sup> daa bich bzeeni' wbilla'. Na' lechaa ze loo yoodo'na' bllon' gokan chop laalə. <sup>46</sup> Na'ch besyaa Jesúza' zilljə, chi'e:

—Xa, chiyon' bishbe cha'ni lall' noo.

Na' biyoll golle' ka' na'ch wite'.

<sup>47</sup> Na' ka ble'i beena' ch̄n̄abia' soldadka' diika' gok, be'lawee Chioza', chi'e:

—Dii li beeni nake' dowalj beñ' wen.

<sup>48</sup> Na' yog' beñ'ka' lle' na', ka ble'gake' ka gok, ziyaj-gake' chball'gake' cho'alçho'eka'. <sup>49</sup> Na' yog' beñ'ka' nombia'gake' Jesúza', do noolka' za'lengake'ne' axt Galileana', wze'gake' zit'lə chwiagake' ka gok.

**Bkwash'gake' Jesúza'**

(Mt. 27:57-61; Mr. 15:42-47; Jn. 19:38-42)

<sup>50</sup> Wzoa to beñ' wlie' José, beñ' yell Arimatea, daa mbani Judéana'. Na' Joséna' nake' txen beñ'ka' ch̄n̄abia' beñ' Israelka'. Nake' to beñ' wen na' to beñ' chon ka cheeni Chioza', <sup>51</sup> na' zoe' chbeze' wsel' Chioza' beena' in̄abia'. Na' Joséna' aga wyoolallee ka ben beñ'ka' ch̄n̄abia'lene' daa betgake' Jesúza', na' bi benlene' legake' txen. <sup>52</sup> Na'ch wyaje' lao Pilátona' na' w̄n̄abe' lsens yiletje' kwerp che Jesúza'. <sup>53</sup> Na' biłetje'ne' lee yag cruza', na'ch bitobe'ne' to lech' xen na' jlo'ene' to loo blej daa beshawee, ga biñ' wkash'gake' ni tlis'

ben' wet. <sup>54</sup> Na' llana' gok diiki nakan lla chsini'a ben' Israelka' chegake' kwenche bibi llin gongake' lla sabda', llana' chombaangake', na' zi lat'zə chyalj solo llana' chombaangake'.

<sup>55</sup> Na' noolka' za'lengake' Jesúza' axt Galileana', wyajgake' jawiagake' bleja' na' jale'gakile' nak wdixjgake' kwerp che'na'. <sup>56</sup> Na'ch biza'gake', na' ka billingake' gana' zoagake', benshao'gake' daa chla' zix. Na' bizi'lall'gake' lla sabda' kon ka na leya'.

**Biban Jesúza' ladj ben' wetka'**  
(Mt. 28:1-10; Mr. 16:1-8; Jn. 20:1-10)

**24** Na' lla necha' chizolo xmanna', wizaj noolka' ni bal' cho'a bana', nox'gake' diika' chla' zix daa benshao'gake', na' wyaj zi bal' noolə yoblə kon legake'. <sup>2</sup> Na' ble'gakile' aga chi'ch yaja' cho'a bana'. <sup>3</sup> Na' wyoogake' loo bleja', na' ble'gakile' aga bich bi kwerp che Xancho Jesúza' de na'. <sup>4</sup> Na' shlak chakgakile' bera zejini dga, kat'kzali ble'gakile' chop ben' byo, nakw-gake' lech' dii chey cheeni', zegake' kwite'ka'. <sup>5</sup> Na' noolka' bllebchagake' na' bchek' yichje'ka' axt lo yona'. Na'ch ben'ka' zena' che'gake':

—¿Berache chiyilzle beena' mban ladj ben' wetki? <sup>6</sup> Kochno de ni. Ba bibane' ladj ben' wetki. Li ljadini daa wne' le' kana' zoalene' le' Galileana'. <sup>7</sup> Wne' chonan byen Beena' Bsel' Chioza' Yell-lioni gake' lo na' ben' malka', na' witgake'ne' lee yag cruza', na' ka yiyon lla yibane' ladj ben' wetka'.

<sup>8</sup> Na'ch jadini noolka' daa goll Jesúza' legake'. <sup>9</sup> Na' biza'gake' biyajgake' gana' lle' postlka' shnej len yog' ben'ka' sto gogkake'ne' txen, na' be'gake' dill' yog' daa gok chegake'. <sup>10</sup> Na' noolkin jayellgake' postlka' daa gok chegake': María ben' yell Magdálana', Juánana', María xhə' Jacóbona', na' len zi bal' nool yoblə. <sup>11</sup> Na' postlka' ni lat' bi wyajle'gake' daa goll noolka' legake' daa gogkake' bizan chon chnagake'.

<sup>12</sup> Na' Pédrone' wzee zejdoe' cho'a bana', na' ka blline', bwie' loo bleja' na' ble'ile' lech'ka' chi'gakan ka'lə. Na'ch bizee zjade' gana' zoe' chibanile' ka nak daa ba gok.

**Bli'lao Jesúza' chop ben' tnez Emaúza'**  
(Mr. 16:12-13)

<sup>13</sup> Na' lo llana' gok ka', chop ben'ka' nak Jesúza' txen wyajgake' to yell dii le Emaús, na' nlaa ljwellin ka do shnej kilometro kon Jerusalénna'. <sup>14</sup> Na' lo zej ngoogake' nez choe'gake' dill' cheyi diika' ba gok.

<sup>15</sup> Na' shlak choe'gake' dill' cheyi diika' gok, na' jabig' kwin Jesúza' kwite'ka' na' zejlene' legake' txen. <sup>16</sup> Na' la'kzi chwiagake'ne', aga gokbe'gakile' no beena'.

<sup>17</sup> Na'ch wñabi Jesúza' legake':

—¿Bera dillaan choe'le za'le ni? ¿Berache chakyesh'zile?

<sup>18</sup> Na' toe', beena' le Cleofas, chi'ene':

—Yog'zə ben' nezgakile' daa ba gok Jerusalénna' llaki ba wde. ¿Astozo' li' bi nezero' daa ba gok?

<sup>19</sup> Na'ch chi'e legake':

—¿Beran gok?

Na'ch che'gake':

—Diika' gok che Jesús, ben' Nazareta'. Goke' to ben' wdixjee daa che' Chioza'ne', na' bene' yel' wak na' bi'e dill' zakii dii nak shli lao Chioza' na' lao ben'. <sup>20</sup> Na' bxozka' chñabia' na' ben'ka' chñabia'gake' cho' ben' Israel bengake'ne' lo na' joschiska' kwenche bchoglogake' che' guete', na' bda'gake'ne' lee yag cruza'. <sup>21</sup> Neto' nonnto' lez nan len' yibeje' cho' ben' Israel lo na' ben' zit'ka'. Na' ba gok shon' lla gok diiki. <sup>22</sup> Na' bal' noolka' nak neto' txen wyajgake' cho'a bana' daa baabalj, na' le bibaninto' ka wnagake' <sup>23</sup> bich ble'gakile' kwerp che'na' gana' bkwash'gake'ne'. Na'ch bila'gake' nagake' ble'gakile' chop anjl, ben' goll legake' mbankzə Jesúza'. <sup>24</sup> Na'ch wyaj bal' ben' byoka' nonlento' txen cho'a bleja', na' nakan kon ka wna noolka', per aga no Jesúza' ble'gakile'.

<sup>25</sup> Na'ch che' Jesúza' legake':

—¿Le' ben' bi chajni! ¿Bi llabia' bat shajle'le daa bzej dii ben'ka' wdixjee daa goll Chioza' legake'? <sup>26</sup> ¿Abi nezero' lliakzə bia' biya daa yen ile'i beena' nak Cristona' ka zi' yiyo'e gana' sho'e balaan xenna'?

<sup>27</sup> Na'ch wzoloe' chzajniile' legake' Cho'a Xtill' Chioza' gana' cho'en dill' che kwine', wzoloe' zigaate kon daa bzej dii Moiséza', na'tech diika' bzej yog' ben'ka' wdixjee daa goll Chioza' legake'.

<sup>28</sup> Na' ka bllingake' yella' gana' zejgake', bentezə Jesúza' ka ben' shaj gan yoblə. <sup>29</sup> Na' ben'ka' bengake' byen yigaanlene' legake', che'gake'ne':

—Bigaanlen neto', la' ba wlle' naa, na' ba chal.

Na'ch wyoo Jesúza' bigaanlene' legake'. <sup>30</sup> Na' ka ba chi'gake' cho'a mesa', bexee to yetxtil na' bi'e yel' choxken Chioza', na'tech bxoxje'n na' bi'en legake'.

<sup>31</sup> Na'ch biyombia'yen'gake' nan len' Jesúza', na' to binitloze'. <sup>32</sup> Na'ch che' ljwelle':

—¿Bera daan, axt mbalaz inlleb chibayi lall'do'chona' kana' za'cho tneza' choe'lene' cho' dill' chzajniile' cho' Cho'a Xtill' Chioza'!

<sup>33</sup> Na'ch lii biza'tegake' ziyajgake' Jerusalénna'. Na' ka billingake', ndop nllag postlka' shnej na' nochlə ben'ka' nakgake'ne' txen, <sup>34</sup> na' gollgake' legake':

—Dii likzan ba biban Xanchona' ladj ben' wetka'. Ba bli'lawe' Simónni.

<sup>35</sup> Na'ch ben'ka' chop gollgake' legake' ka gok che-gake' tneza', na' ka biyombia'gake' Jesúza' ka bxoxje' yetxtila' bi'en legake'.

**Jali'lao Jesúza' ben'ka' nakgake'ne' txen**  
(Mt. 28:16-20; Mr. 16:14-18; Jn. 20:19-23)

<sup>36</sup> Na' shlak ni choe'gake' dillaa, tokonganzi jaze Jesúza' ladje'ka' na' bwape' legake' chiox, chi'e legake':  
—Soashgale mbalaz.

<sup>37</sup> Na' le bllebgake' daa chakgakile' yel bxenzan chwiagake'. <sup>38</sup> Na' che' Jesúza' legake':

—¿Berache chllebzle? ¿Bi'che chak choplall'zle? <sup>39</sup> Li wwia ni'a na'ki kwenche inezile nad'kzan. Li gox' nad' kwenche inezile aga nak' to yel bñen, la' to yel bñen bibi bel' bibi llit yoon ka nak' nad'.

<sup>40</sup> Na' ka golle' legake' ka', bliile' legake' ni'a neena'.  
<sup>41</sup> Na' ye'l' chiba chizaki che'ka' na' ye'l' chibanina', ni bi chakbe'gakile' shi lekzen'. Na'ch chi'e legake':  
 —¿Abi de lat' dii gaocho?  
<sup>42</sup> Na'ch be'gake'ne' lat' be'l' ba bwey'gake' lo yi'na'.  
<sup>43</sup> Na' be'xeb wdawe'b chwiategake'. <sup>44</sup> Na' chi'e:  
 —Ka nak daa ba gok cha', lennan' wnia' le' kana' ni zoalen' le', kana' wnia' llia bia' yillinin gak cha' yog' di-ika' bzej dii Moiséza', na' diika' bzej dii be'n'ka' wdixjee daa goll Chioza' legake' na' diika' da' lee sálmoka'.  
<sup>45</sup> Na'ch ben Jesúsza' ka wyajni'gakile' diika' na Cho'a Xtill' Chioza', <sup>46</sup> chi'e legake':  
 —Cho'a Xtill' Chioza' nan: chonan byen Crístona', biya dii yen ile'ile' na' witgake'ne' na' yiyon lla yibane' ladj be'n' wetka'. <sup>47</sup> Na' lekzka' nan: ides cho'a xtillena' daa nan shi yiyaj yileni be'n' dii malka' chongake' na'

yiyakxen chegake'. Na' solozan Jerusalénni na' illiljan doxente. <sup>48</sup> Na' le' chiya'l' ye'le be'n' yog' diiki ba ble'ile gok cha'. <sup>49</sup> Na' nad' wselaa beena' bcheb Xa' Chioza' go'ne' gaklene' le', na' li soatezə Jerusalénni axt kat'ch Xa'na' go'ne' le' ye'l' waka' daa za' yabana'.

### Biyep Jesúsza' yabana'

(Mr. 16:19-20)

<sup>50</sup> Na'ch bche' Jesúsza' legake' wyajgake' yell Betáni-ana'. Na' blis neena' benleeye' legake'. <sup>51</sup> Na' ni chonleeytie' legake', ka bikwase' kwite'ka' na' biyep'e yabana'. <sup>52</sup> Na' be'n'ka' nakgake'ne' txen, biyoll be'la'ogake'ne', biza'gake' ziyajgake' Jerusalénna' chiba chizakgakile'. <sup>53</sup> Na' wzoatezi wzoagake' be'la'ogake' Chioza' yoodo'na'.

# San Juan

## Beena' nak Xtill' Chioza' golje' goke' to beŋ'

**1** Ba zoakzə beena' le Xtill' Chios ka wxē wzil yog'lołte dii de. ƭen' ba zoalene' Chioza', na' ƭekzen' Chioza', <sup>2</sup> na' dezd nechte ba zoalenkze' Chioza'. <sup>3</sup> ƭen' bene' yog'te dii de, na' biga de to dii bi bene'. <sup>4</sup> ƭen' cho'e yeƭ' mban, na' nake' beeni' che beŋ' yell-lioni. <sup>5</sup> Na' beeni' che'na' chzeeni'n yell-lioni gani nak shgasj shchoƭ ni che dii mala', na' yeƭ' choƭa' bi bizoyin yisolān beeni'na'.

<sup>6</sup> Wzoa to beŋ' bseƭ' Chioza' wlie' Juan. <sup>7</sup> Juanna' bidy-ee dill' che beena' nsa' beeni'na' kwenche yog' beŋ' gonƭilall'gake'ne'. <sup>8</sup> Aga Juanna'yen'nan nsee beeni'na', san to bidtixje'ze' che beena' nsa' beeni'nan'. <sup>9</sup> Beena' nsa' beeni'na' daa nak dowalj daa wzeeni'n lao yog'loƭ beŋ', ba zee yell-lioni.

<sup>10</sup> Na' beena' nsa' beeni'na' bidsoe' yell-lioni, na' ƭa'kzi ƭe' bxe bsile' yell-lioni, beŋ'ka' ƭle' lawinna' aga gokbe'gakile' non nake'. <sup>11</sup> Blline' ƭadj beŋ'ka' nak beŋ' yell che', na' ƭegake' bi blebgake'ne'. <sup>12</sup> Per yog' beŋ'ka' blebgake'ne' na' benƭilall'gake'ne', bene' ƭegake' xiin Chios. <sup>13</sup> Na' aga daa nakgake' beŋ' de beli chenan, wa daa cheeni beŋ' soalen ƭjwellen', ni aga daa cheeni beŋ' soa xiinēn', san daa benƭilall'gake'nen' gokgake' xiin' Chios.

<sup>14</sup> Na' beena' le Xtill' Chios golje' goke' to beŋ' de beli chen na' wzoe' ƭadjnto'ni. Na' ble'into'ne' nake' beŋ' za-kii nƭleb daa nake' Xiin tlish' tyaj Xacho Chioza', na' nake' beŋ' ƭall'do' xen inƭleb na' bli'e do ka nak dii ƭina'.

<sup>15</sup> Na' Juanna' bi'e dill' che' wne':

—Che beenin bzajniid' le' kana' wnia': "Beena' zi' za' nake' beŋ' zak'chi aga ka nad', ƭa' ba zoakze' kana' zi' soa' nad'."

<sup>16</sup> Daa nake' beŋ' wen inƭleb na' daa chakchgaile' cho', dii zan dii wenka' ba bene' che yog'cho. <sup>17</sup> Dii Moiséza' bzajniile' cho' diika' bllia Chioza' bia' goncho; per Jesucristona' bli'e yeƭ' chiyesh'ƭalli che Chioza' ƭen dii ƭi che'na'. <sup>18</sup> Ni to konoŋ' ƭle'i Chioza', per Xiine'na' nak tlish' tyaj, beena' zoalene'ne', ƭen' bidliile' cho' ka nake'.

**Juanna', beena' bchoa beŋ' nisa', bi'e xtill' Jesucristona'**  
(Mt. 3:11-12; Mr. 1:7-8; Lc. 3:15-17)

<sup>19</sup> Beŋ' wŋabia' che beŋ' Israelka' ƭle' Jerusalēna' bseƭ'gake' to chop bxoƭ na' sto chop beŋ'ka' nak xiin dia che dii Levina' kwenche jaŋabgakile' Juanna' non nake'. <sup>20</sup> Na' bi bkwashee non nake', san golle' ƭegake':

—Aga nadaan Crístona', beena' chbezcho wseƭ' Chioza'.

<sup>21</sup> Na'ch wizŋabgakile'ne':

—ƷNorakzan nako' shka'? ƷAlin' Elíaza', beena' wdix-jeē daa goll Chioza'ne' kani'yi?

Na' Juanna' chi'e:

—Aga ƭe' nad'.

Na'ch chize'gake'ne':

—ƷAlin' beena' ba ƭlia bia' yid kwenche chixji'e daa che' Chioza'ne', shka'?

Na' che' Juanna':

—Akza ƭe' nad'.

<sup>22</sup> Na'ch che'gake'ne':

—ƷNorakzə ƭi', shka'? Cheeninto' inezinto' kwenche ƭl-jayellnto' beŋ'ka' bseƭ' neto' non nako'. ƷBi ka ino' che kwino'?

<sup>23</sup> Na'ch che' Juanna' ƭegake':

—Dii Isaíaza', beena' wdixjeē daa goll Chioza'ne' kani'yi, dill' chan' bi'e kana' wne': "To beŋ' gosyee zillj ƭatja' gana' bibi chashj chƭeb, na' inē': ƭi se kwas kwenche wzenagle che Xanchona' kat' zee."

<sup>24</sup> Na' beŋ'ka' bseƭ' fariseoka' <sup>25</sup> wŋabgakile'ne':

—ƷBerache chchoazo' beŋ' nis shi aga ƭin' Crístona', ni Elíaza', ni beena' ƭlia bia' wseƭ' Chioza' kwenche chixji'e daa chi'ene'?

<sup>26</sup> Na' che' Juanna' ƭegake':

—Nad' chchoa' beŋ' nis, per ƭadjleni zoa to beŋ' bi nombia'le, <sup>27</sup> na' ƭen' zi' wli'lawe'. Na' nad' ni bi zakaa gak' xmose' kwenche galj' ƭa'ch' xele'na'.

<sup>28</sup> Yog' diiki gok gana' le Betania, daa ƭlia shƭaa yao Jordanna', gana' bchoa Juanna' beŋ' nisa'.

**Jesúza', beena' bseƭ' Chioza', zaklebile' xil'do'na' chit-gake'**

<sup>29</sup> Na' betiyo ble'i Juanna' Jesúza' zeje' kwite'na', na' chi'e:

—ƭi wwia, beenin bseƭ' Chioza' na' zaklebile' xil'do'na' chitcho, ƭa' ƭen' yikwase' saaxya che beŋ' yell-lioni.

<sup>30</sup> Na' xtill' beenin bi'a kana' wnia': "Zi' za' to beŋ' zak'chi ka nad', na' ba zoakz beeni kana' zi' soa'." <sup>31</sup> Ni nad' bi wŋezid' no xtilliin bi'a, per kwenche gombia' beŋ' Israelki ƭe', bidchoa' beŋ' nis.

<sup>32</sup> Na' Juanna' wizne':

—Ble'id' Espíritu che Chioza' betje' yabana' nake' ka to palom na' jsoalene' ƭe'. <sup>33</sup> ƭa' ni nad' bi wŋezid' no xtilliin bi'a, per Chioza', beena' bseƭ' nad' chchoa' beŋ' nis, wne': "ƭle'ilo' yetj Espíritu cha'na' ƭlsoalene' beena' wleji', na' ƭen' gone' ka yidsoa Espíritu Sántona' ƭoo

yichjall'do' beñ'." <sup>34</sup> Ba ble'id' gok ka wna Chioza' nad', na' ḡaa nia' le' beenin Xiñ Chioza'.

### Beñ'ka' bengake' Jesúza' txen dii nech

<sup>35</sup> Na' betiyo Juanna' zelene' ḡhop beñ'ka' nakgake'ne' txen. <sup>36</sup> Na' ka ble'ile' chda Jesúza' na', na'ch chi'e:

—Li wwia, beenin bsel' Chioza' na' zaklebile' xil'do'na' chitcho kwenḡhe chiyakxen saaxya ḡhechoka'.

<sup>37</sup> Na' ḡhop beñ'ka' nak Juanna' txen, ka bengakile' wna Juanna' ka', na' janogake' Jesúza'. <sup>38</sup> Na'ch ka biyeḡhj Jesúza', ble'ile' zjanogake'ne' na' chi'e legake':

—ḡBin cheenile?

Na' che'gake'ne':

—Rabí, ḡgaran zo'?

(Na' Rabí zejín: beñ' chli' chsedi beñ'.) <sup>39</sup> Na' che' Jesúza':

—Li da wwiale.

Na'ch wyajlengake'ne' na' jale'gakile' gana' zoe', na' bigaanlengake'ne' axt ka wde llana', la' ka do chida tapan billinlengake'ne' gana' zoe'.

<sup>40</sup> Na' beena' le Andrés, beñ' bish' Simón Pédróna', len sto beñ' yoblə gokgake' ḡhopə janogake' Jesúza' ka bengakile' daa wna Juanna' ḡhe'. <sup>41</sup> Na' Andréza' lii jadiljtie' beñ' bishee Simónna', na' chi'ene':

—Ba bilhelinto' beena' nak Mesíaza'—. Na' Mesías zejín Cristo, beena' chbezgake' wsel' Chioza' kwenḡhe inabi'e.

<sup>42</sup> Na'ch Andréza' bḡhi'e Simónna' gana' zoa Jesúza', na' ka ble'i Jesúza'ne', chi'ene':

—Lin' Simón, xiñ Jonáza', na' ḡaa yilio' Cefas—. Na' Cefas zejín Pedro.

### Jesúza' golle' Felípena' len Natanaela' gakgake'ne' txen

<sup>43</sup> Na' betiyo ka zi' yiyaj Jesúza' gana' mbani Galileana', billague' Felípena' na' chi'ene':

—Da dino nad'.

<sup>44</sup> Felípena' nake' beñ' yell Betsaida, gana' nak lall Andréza' na' Pédróna'. <sup>45</sup> Na'ch jadilj Felípena' Natanaela' na' chi'ene':

—Ba bilhelinto' beena' bzej dii Moiséza' xtilleena' lee libr ḡhe leya'. Na' lekzka' ḡhen' bzej dii beñ'ka' wdixjee daa goll Chioza' legake' kani'yi. Len' Jesúza', beñ' Nazareta', xiñ Joséna'.

<sup>46</sup> Na' Natanaela' chi'ene':

—ḡAka Nazareta' ichej to beñ' zakii?

Na' Felípena' golle'ne':

—Dakachi kwenḡhe gakbe'ilo'.

<sup>47</sup> Na' ka ble'i Jesúza' zej Natanaela' gana' zie', golle':

—Ni za' to beñ' nak dowalj beñ' Israel, to beñ' bi nak beñ' wxiye'.

<sup>48</sup> Na'ch goll Natanaela'ne':

—ḡNakra chak nombi'o nad'?

Na' Jesúza' golle'ne':

—Ka zi' yidḡelə Felípena' li', ble'id' li' xan yag yixwe-wa'.

<sup>49</sup> Na' goll Natanaela'ne':

—Maestro, lin' nako' Xiñ Chioza'. Na' lin' beena' zidḡabia' neto' beñ' Israel.

<sup>50</sup> Na' goll Jesúza'ne':

—ḡAada wnia' ble'id' li' xan yag yixwewan' chajli'o ḡha? Zi' ile'chilo' dii xench aga ka dga.

<sup>51</sup> Na' lekzka' gollch Jesúza':

—Dii li' nia' le', ile'ile' yabana' nyaljan, na' beñ'ka' nak anjl ḡhe Chioza' chep chetjgake' lawa', nad', Beñ' Bsel' Chioza' Yell-lioni.

### Got' to wishagna' yella' le Caná

**2** Na' biyoñ lla got' to wishagna' yella' le Caná daa lla gana' mbani Galileana', na' na' len xḡa' Jesúza'.

<sup>2</sup> Na' lekzka' goxgake' Jesúza' na' beñ'ka' nakgake'ne' txen. <sup>3</sup> Na' shlak chak lḡina' bibill vino ḡhe'ka', na' goll xḡa' Jesúza'ne':

—Ba bibill vino ḡhe beñ'ki.

<sup>4</sup> Na'ch che' Jesúza'ne':

—ḡBerəḡhe nazo' nad' ka? Biñ' gal' gon' daa lla bia' gon'.

<sup>5</sup> Per xḡeena' golle' wen mandadka':

—Li gon kon bin iḡe' le'.

<sup>6</sup> Na' na' zoa xop yes' xen de yaj, dii choll nis, diika' chon llin kat' beñ' Israelka' chixi chiyechgake' kon ka na ley ḡhe'ka'. Na' to to yes'ka' chollan ka do shoñ yid nis. <sup>7</sup> Na' che' Jesúza' wen mandadka':

—Li kaa nisa' loo yes'ki.

Na' wda'gake'n axt ka billa'chagakan. <sup>8</sup> Na'ch che' Jesúza' legake':

—Li gash' lataan ḡaa na' li' ljeen beena' ngoo lo neen.

Na' bengake' ka golle'. <sup>9</sup> Na' beena' ngoo lo neen bniḡe' nisa' daa biyak vino, ni bi ḡezile' ga wza'n. Tochga wen mandadka' ḡezgakile', la' legaken' wdaa-gake' nisa'. Na'ch beena' ngoo lo neen goxe' bi'na' chshagna', <sup>10</sup> chi'eb':

—Yog' beñ' zigaate chdie' vino wenna', na' kat' ba weej beñ'ka' len lḡina' dii zil, na'ch chdie' daa bi naktek wen. San li', ba bzagoo vino wenni na' axt ḡaach chdio'n.

<sup>11</sup> Yel' waki dga ben Jesúza' yell Canána' daa lla gana' mbani Galileana', lḡennan' bene' dii nech. Na' ka' bli'e yel' wak ḡhe'na' nape', na'ch beñ'ka' nongake' le' txen beñ'ilall'gake'ne'.

<sup>12</sup> Na' ka wde, biyaje' Capernaúma' len xḡeena', len beñ' bisheeka' na' len beñ'ka' nakgake'ne' txen, na' wzoagake' na' to ḡhop shoñ lla.

**Bishesh Jesúza' beñ'ka' chit' chde lesh' chyoodo'na'**  
(Mt. 21:12-13; Mr. 11:15-18; Lc. 19:45-46)

<sup>13</sup> Na' ka ba zoa gal' lḡi Paskwa' daa chon beñ' Israelka', wyaj Jesúza' Jerusaléna'. <sup>14</sup> Na' ka blline' lesh' chyoodo'na', ble'ile' lle' beñ' chit'gake' gooñ, xil', na' palom, na' lekzka' na' chi' beñ'ka' chisha' mecha'. <sup>15</sup> Na' ka ble'ile' ka chak, bene' to do tashj, na' kon len bisheshile' yog'lole' lesh' chyoodo'na' lente gooñka' na' xil'ka'. Na' bzaḡlee xmech beñ'ka' chisha' mecha' lo

yona' na' bishi'e mes che'ka'. <sup>16</sup> Na' beṅ'ka' chit' palom-ka', golle' legake':

—İli yishesh baki ni! İBi gonzle lill Xa'na' ka lao yaa!

<sup>17</sup> Na'ch beṅ'ka' nakgake'ne' t xen jadingakile' Cho'a Xtill' Chioza' gana' nan: "Daa İe chakid' lill xlatjo'na' İen wlliyai'n nad'."

<sup>18</sup> Na'ch beṅ' Israelka' İle' na' che'gake' Jesúza':

—İBi yel' wak gono' dii wli'n napo' yel' wṅabia' kwenche chono' diiki?

<sup>19</sup> Na' che' Jesúza' legake':

—İli yichinj yoodo'ni na' lo shonə İlazə yiyona'n.

<sup>20</sup> Na'ch che' beṅ' Israelka' İe':

—Xopiyon yiz bengake' yoodo'ni, na' İi' nazo' shonə İlazə yiyona'n.

<sup>21</sup> Per daa goll Jesúza' legake' ka', kwerp che'nan' bsaklebile' yoodo'na'. <sup>22</sup> Na'ch ka biban Jesúza' ladj beṅ' wetka', jadini beṅ'ka' nakgake'ne' t xen daa wne', na' wyajlegake' Cho'a Xtill' Chioza' na' dill'ka' be' Jesúza'.

### Nombia' Jesúza' yichjall'do' yog'cho

<sup>23</sup> Na' shlak zoa Jesúza' İni Paskwa' Jerusalenna', beṅ' zan wyajlegake' che' daa ble'gakile' yel' wakka' bene'.

<sup>24</sup> Per Jesúza' bi bxnılalle legake', İa' nombi'e yichjall'do' yog'İoİ beṅ'. <sup>25</sup> Aga byalljile' no yee İe' nakan nak beṅeḅha', İa' kwasİoİ nombi'e yichjall'do'eka'.

### Jesúza' bshaljlene' Nicodémona'

**3** Wzoa to fariseo beṅ' wle Nicodemo, na' goke' to beṅ' wṅabia' ladj beṅ' Israelka'. <sup>2</sup> Na' Nicodémona' wyaje' jawie' Jesúza' waİ-lə na' chi'ene':

—Maestro, nezinto' Chioza' bseİee İi' kwenche wli' wsedilo' neto', İa' bi gak gono' yel' wakka' chono' shel' bi zoalen Chioza' İi'.

<sup>3</sup> Na'ch Jesúza' chi'ene':

—Dii İi' nia' İi', beena' bi yiyalj dii yoblə aga wak İljazoe' gana' chṅabia' Chioza'.

<sup>4</sup> Na' che' Nicodémona'ne':

—İNakra gon to beṅ' gol yiyaljze' dii yoblə? İa' aga wak yiyo'e İoo İee xṅeena' kwenche yiyalje' sto shii.

<sup>5</sup> Na' Jesúza' chi'ene':

—Dii İi' nia' İi', kono gak yiyaj gana' zoa Chioza' chṅabi'e shi biṅ' galjlenile' nis † na' yikob Espírıtu che Chioza' yichjall'do'ena' kwenche gake' ka beṅ' galj sto shii. <sup>6</sup> Beena' nak xiiṅ beṅ' de beli chen, de beli chen-chokzan nake'. Per beena' chikob Espírıtu che Chioza'ne', nake' xiiṅ Chios na' de to yel' mban che' daa bi te cheyin. <sup>7</sup> Bi İibanilo' daa nia' İi': "Yog' beṅ' chiyal' galje' dii yoblə." <sup>8</sup> Kat' chze be'na' na' chajan kon ga cheenin, na' İa'kzi chenicho ka sshag chonan aga nezicho galan za'n, ni bi nezicho galan zejan. İekzkan' aga nezicho nakan chon Espírıtu che Chioza' kwenche chiyalj beṅ' dii yoblə.

<sup>9</sup> Na'ch wizṅabi Nicodémona'ne':

† Galjlenile' nis: baİ beṅ'ka' nsed nagake' zejin daa chchoacho nisa', na' zi balgake' nagake' zejin nisa' daa chzani xṅa'chona' cho', na' zi balgake' nagake' zejin daa chixis chiyib Espírıtuna' cho' kat' chonİilall'cho Cristona'.

—İNakra gak gakz dga?

<sup>10</sup> Na' che' Jesúza'ne':

—Len naktio' to beṅ' chli' chsedi beṅ' Israelki, İana' bi nezilo' diiki? <sup>11</sup> Dii İi' nia' İi', choe'nto' dill' che daa nezinto' na' daa ben ble'into', per bi chajle'le daa nanto' le'. <sup>12</sup> Shi bi chajle'le daa wnia' le' che diika' chak yell-lioni, İalechlə shi we'İen' le' dill' che daa nak che yabana'?

<sup>13</sup> 'Ni to konon' shep yabana', toz nad', Beṅ' Bsel' Chioza' Yell-lioni, nak' beṅ' za' yabana'. <sup>14</sup> Na' ka ben dii Moiséza' gana' bibi chashj chİeb bdee beİ de broncena' İee yaga', ka'kzan gongakile' nad', Beṅ' Bsel' Chioza' Yell-lioni. Wda'gake' nad' İee yaga' <sup>15</sup> kwenche nottez beṅ' gonİilall' nad' bi kwiayee, san gat' to yel' mban che' zejİi kaṅi.

### Chaki Chioza' yog' beṅ' yell-lio

<sup>16</sup> Daa İe chakchgayi Chioza' beṅ' yell-lioni, bseİee Xi-İne'na' tlısh' tyaj kwenche nottez beṅ' gonİilalleene' bi kwiayee, san gat' yel' mban che' zejİi kaṅi. <sup>17</sup> Chioza' bseİee xiİne'na' yell-lioni aga kwenche wlliyayee beṅaan, san kwenche yisle' legaken'.

<sup>18</sup> Beena' nonİilall' Xiiṅ Chioza', bich nchoglo che' sak'zi'e, san beena' bi nonİilalleene', ba nchoglo che' kwiayee daa bi nonİilalle Xiiṅ tlısh' tyaj Chioza'. <sup>19</sup> Ba nchoglo kwiayi' beṅ' yell-lioni daa ba bla' beena' nsa' beeni'na', na' daa chongake' dii mala', wyazlall'chgake' yel' choİa' aga ka beeni'na'. <sup>20</sup> Yog' beṅ'ka' chon diika' bi yejni'alallii chakzbangakile' beeni'na', na' aga will-jabig'lat'gake' lawinna' daa chİlebgake' wli'lawi dii mala' chongake'. <sup>21</sup> San beṅ'ka' zoagake' chongake' ka na dill' İi' che Chioza', chbig'gake' lao beeni' che'na' kwenche gakbia' chongake' ka cheeni Chioza'.

### Juanna', beena' bchoa beṅ' nisa', be'che' xtill' Jesúza'

<sup>22</sup> Ka wde, wyaj Jesúza' Judeana' İen beṅ'ka' nakgake'ne' t xen na' wzoagake' na' xtit wen, na' bchoagake' beṅ' nis. <sup>23</sup> Na' Juanna' İekzka' chchoe' beṅ' nis gana' İe Enón, gaozə gana' İe Salim, İa' na' de nis zil, na' chaj beṅ' kwenche chchoe' legake' nisa'. <sup>24</sup> Diiki gokgakan kana' zi' koogake' Juanna' lillyana'.

<sup>25</sup> Na'ch beṅ'ka' nakgake' Juanna' t xen gokdiİ-lengake' sto beṅ' Israel ni cheyi diika' yoologake' chongake' kwenche chixi chiyechgake' lao Chioza'. <sup>26</sup> Na' wyajgake' jellgake' Juanna':

—Maestro, beena' wzeleno' shİaa yao Jordanna', beena' bi'o xtılleena', ba chchoe' beṅ' nis na' yog'zə beṅ' chajgake' kwite'na'.

<sup>27</sup> Na'ch che' Juanna' legake':

—Kono gak bi gon shi Chioza' bi wi'e İatj. <sup>28</sup> Kwinkzle benile kana' wnia' aga nadaan Crıstona', beena' chbezcho wsel' Chioza', san nak' to beṅ' bseİee kwenche kwialoa' lawe'na' na' yep' beṅ' wzenaggake' che'. <sup>29</sup> To ga chak wishagna', bi'na' chshagnan' İkaab' noola'. Na' bi'na' nllaguib' chi'b' kwitbaa, İe chibaib' ka chenib' chshaljİb'. Kayeṅ'nan chak İha', İe chibaid' daa



chzenaggake' che Crístona'. <sup>30</sup> Len' zizikchli seyi che', na' nad' bichtek seyi cha'.

### Beena' za' yabana'

<sup>31</sup> 'Ka nak beena' za' yabana', len' zak'chi' aga ka yog'loj ben'. Na' ben'ka' lle' yell-lioni, chinogake' daa de lo yell-lioniza, na' che yell-lioniza choe'gake' dill'. San beena' za' yabana' zak'che' aga ka yog'lojte ben', <sup>32</sup> na' choe' dill' cheyi diika' ba ben ble'ile' yabana', per balchga ben' chajle' xtilleena'. <sup>33</sup> Na' nottez beena' chajle' che', chli'e Chioza' cho'e dill' li. <sup>34</sup> Beena' bsel' Chioza', cho'a xtill' Chiozan' cho'e, la' Chioza' no'ene' do ka nak Espíritu che'na'. <sup>35</sup> Chioza' chakile' Xiine'na', na' ba bene' lall' nee yog'lojte dii de. <sup>36</sup> Na' beena' gonlilall' Xiin Chioza' gat' yel' mban che' zejli kañi. Per beena' bi cheeni gonlilalleene' bi gat' yel' mban che' zejli kañi, san ile'ile' yel' zak'zi'na' we' Chioza'.

### Bshaljlen Jesúza' to nool Samaria

**4** Fariseoka' gokbe'gakile' ben' zanch nakgake' Jesúza' txen, na' ben' zanch chchoe' nisa' aga ka Juanna', <sup>2</sup> la'kzi aga kwin Jesúzan' bchoe' ben' nisa', san ben'ka' nakgake'ne' txenan. <sup>3</sup> Na' ka gokbe'i Jesúza' ba nezi fariseoka' ben' zanch nakgake'ne' txen, na'ch bizee gana' mbani Judeana' ziyaje' gana' mbani Galiléana'lə.

<sup>4</sup> Na' kwenche yilline' gana' mbani Galileana' chiya' yidie' gana' mbani Samáriana'. <sup>5</sup> Na' billingake' to yell dii le Sicar, daa lliana' mbani Samáriana'. Na' yella' llian gaoza' gana' de yell-liona' be' dii Jacoba' xiine' dii Joséna'. <sup>6</sup> Na' lo yell-liona' lliana' posa' wden dii Jacoba'. Na'ch wche' Jesúza' cho'a posa' daa ba chjxakchgaile' zingwee neza'. Na' ba chonan ka gobill. <sup>7</sup> Na' ben'ka' nakgake'ne' txen zejgake' yella' zjxi'gake' daa gaolengake'ne'. Na' cho'a posa' chi' Jesúza' ka bllin to noolə Samaria zjxi'e nisa'. Na' che' Jesúza'ne':

—Ben' lat' nis yeej'.

<sup>9</sup> Na'ch che' noolə Samáriana'ne':

—¿Berache chnabzilo' nad' nisa' yeejo?', la' ben' Israel li', na' nool Samaria nad'.

Golle' ka' la' ben' Israelka' bi zoalengake' wen ben' Samáriaka'. <sup>10</sup> Na'ch che' Jesúza'ne':

—Shel'ka' nezhailo' daa chon Chioza' na' no nad' chnabid' li' nisa' yeej', ba wñabilo' nad' gon daa yeejo', shel'ka', la' nap' to nis yaa nis ban daa gon li'.

<sup>11</sup> Na' noola' chi'ene':

—Ben'do', bibi noxoo wlepilo' nisa', na' posi le zitjan. ¿Gara lljxi'o nis yaa nis banna' goño' nad' nazo' ka'?

<sup>12</sup> Dii xozxto'cho Jacoba' bkwaanlene' neto' posi gani weej', na' weej xiine'ka' na' bayix' che'ka'. ¿Achakilo' zak'chilo' ka le'?

<sup>13</sup> Na' che' Jesúza'ne':

—Nottezə ben' cheeje' nis che posi, wbilchzkile' dii yoblə. <sup>14</sup> San beena' yeej nisa' daa wi'ane', aga wbilchile'. La' nisa' daa wi'ane' nakan ka to dii galchga loo yichjlall'do'ena' na' gonan ka gat' yel' mban che' zejli kañi.

<sup>15</sup> Na'ch che' noola'ne':

—Ben'do', ben' nad' nisa' no' ka' kwenche bich ibilid' na' bich yid beja' ni.

<sup>16</sup> Na' che' Jesúza'ne':

—Biyaj jane ben' cho'na', na' dalene' ni.

<sup>17</sup> Na' che' noola'ne':

—Aga no ben' cha' zoa.

Na' Jesúza' chi'ene':

—Lekzilo' no' ka', aga no ben' cho' zoa. <sup>18</sup> La' ba gok gay' ben' cho'ka', na' beena' zoaleno' naa ni bi nshagna'lenkzo'ne'. Shlikzan ba wñio'.

<sup>19</sup> Na'ch noola' chi'ene':

—Ben'do', ba gokbe'id' nako' to ben' chyixjee daa na Chioza'. <sup>20</sup> Dii xozxto'nto'ka' be'la'ogake' Chioza' lo yaani, na' le' ben' Israel nale chonan byen we'la'ochone' Jerusalenna'.

<sup>21</sup> Na' che' Jesúza'ne':

—Noolə, wyajle' cha', wllin lla kat' bich gonan byen yidle lo yaani, ni bich gonan byen shajle Jerusalenna' kwenche we'la'ole Xacho Chioza'. <sup>22</sup> Le' ben' Samaria ni bi nombia'le non choe'la'ole, san neto' ben' Israel nombia'nto' Chioza', beena' choe'la'onto', la' ladjn-to'nan' ichej beena' yisle' ben' kwenche bi kwiayi'gake'.

<sup>23</sup> Ba zoa illin lla, wa ba bllinkz llana' ben'ka' dii li choe'la'ogake' Xacho Chioza' we'la'ogake' beena' nak dowalj Chios do yichj do lallgake', la' kan' chaklall' Xacho Chioza' we'la'ochone'. <sup>24</sup> Chioza' nake' Espíritu, na' ben'ka' cheengakile' we'la'ogake'ne', chiya' we'la'ogake'ne' dowalj na' do yichj do lall'gake'.

<sup>25</sup> Na' che' noola'ne':

—Nezid' wla' beena' chbezcho wsel' Chioza' beena' nsi'e Mesías wa Cristo. Na' kat' yide', wzajniile' cho' yog' diiki.

<sup>26</sup> Na' che' Jesúza'ne':

—Nad'kzan' beena' no' ka', na' len' chshaljlene' li'.

<sup>27</sup> Na' shlak choe'lene' noola' dill', billin ben'ka' nakgake'ne' txen na' bibangakile' daa chshaljlen Jesúza' to noolə. Per ni toe' bi biyaxji inabile'ne' bin cheeni noola' wa bi dillaan chshaljlene'ne'. <sup>28</sup> Na'ch noola' bkwaane' chee nis che'na' na'zə, na' biyaje' jayelle' ben' wllal che'ka':

<sup>29</sup> —Li da lljawiacho to ben' ba wne' nad' yog' diika' ba ben'. ¿Aaga len' Crístona', lla?

<sup>30</sup> Na'ch blleshgake' yella' wyajgake' gana' chi' Jesúza'. <sup>31</sup> Na' shlak ziyaj noola' zeyid ben'ka' nak Jesúza' txen che'gake'ne':

—Maestro, wdao lat'.

<sup>32</sup> Na' Jesúza' chi'e legake':

—De to yel' wao cha' daa bi nombia'le.

<sup>33</sup> Na'ch che' ljwell ben'ka' nakgake'ne' txen:

—¿Anti no ba bidwa' dii wdawe', lla?

<sup>34</sup> Na' che' Jesúza' legake':

—Yel' wao cha'na' nakan daa chon' ka cheeni beena' bsel' nad' na' wzeeloa' daa cheenile' gon'. <sup>35</sup> Le' nazle: "Chyalljch zi tap beo' kwenche yizi' yilapcho." Per nad' nia' le', li' wwiakachi ba de daa yizi' yilapcho. <sup>36</sup> Beena' chyixjee cho'a xtill' Chioza' naa, zaklebile' to ben' ba chila'ile' chizi' chilape'. Na' ben'ka' chzenag daa chy-

ixji'e, gat' to yel' mban chegake' zejli kañi, na' beena' goz yibalenile' beena' chizi' chilap. <sup>37</sup> Nakan ka dillaa de daa na: "Ben' yoblan chaz na' ben' yoblə chizi' chilap." <sup>38</sup> Nad' ba bseġaa le' ljalaple gana' bi bllaglole gozle, la' le' gonle ka wzenag ben' cho'a xtill' Chioza' daa wdxjee ben' yoblə.

<sup>39</sup> Ben' zan ben' Samáriaka', ben'ka' lle' yell Sicara' benġilall'gake' Jesúza' daa goll noola' ġegake': "Ba wne' nad' yog'te dii ba ben'." <sup>40</sup> Na'ch ka bllingake' gana' chi' Jesúza', got'yogakile'ne' kwenche yigaanlene' ġegake'. Na' bigaane' na' chop lla. <sup>41</sup> Na' ben' zanch benġilall'gake'ne' daa bengakile' dillaa cho'e. <sup>42</sup> Na'ch che'gake' noola':

—Naach ba chajle'nto', aga daa wnazo' neto' kan', san kwinkznton' ba beninto' cho'e dillaa na' ġezinto' dii ġi ġekzen' beena' yisla ben' yell-lioni kwenche bi kwiayi'gake'.

### Jesúza' biyone' xiñ to ben' wñabia'

<sup>43</sup> Na' ka gok chop lla, bizee biyaje' gana' mbani Galileana'. <sup>44</sup> Kwinkz Jesúza' wne' nan to ben' chyixjee daa che' Chioza'ne' aga no chgoo ġe' balaan lalle'na'. <sup>45</sup> Na' ka billine' gana' mbani Galileana', blebgake'ne' daa ble'gakile' yog' daa bene' Jerusalénna' ka gol' ġni Paskwa'.

<sup>46</sup> Na' dii yoblə wizaj Jesúza' yell Canána' daa lla gana' mbani Galileana', gana' biyone' nisa' vino. Na' yella' zoa to ben' zakii ben' chon llin che ben' wñabia'na', na' zoa to xiñe' bi' byo bi shao'b'. <sup>47</sup> Na' ka wñezile' ba billin Jesúza' Galileana' zizee Judeana'lə, na' wyaje' lawe'na' got'yoile'ne' shaje' lġayene' bi' che'na' daa ba chakshwetb'. <sup>48</sup> Na'ch che' Jesúza'ne':

—Aga wyajle'le' cha' shi bibi yel' wak gon' ile'ile.

<sup>49</sup> Na' ben' wñabia'na' chi'ene':

—Ben'do', ben goklen dagach ġaate, shategali bin' guet bi' cha'na'.

<sup>50</sup> Na'ch che' Jesúza'ne':

—Biyaj, jawia. Aga wet bi'na'.

Na' beena' wyajli'e daa goll Jesúza'ne' na' bizee. <sup>51</sup> Na' ka ba zoa yilline' lille'na' jatiġ xmoose'ka' ġe', che'gake'ne':

—Ba biyaki bi' cho'na'.

<sup>52</sup> Na'ch wñabile' ġegake' ka do bi gor wzolo chiyak-shao'lall'b'. Na' che'gake'ne':

—Daa ġeji do ka chida to bichejb' dii ġana'.

<sup>53</sup> Na'ch gokbe'i xabaa biyakshao'lall'b' ka gora' goll Jesúza'ne': "Biyaj jawia. Aga wet bi'na'." Na' ġe' len yog' ben'ka' zoa lille'na' benġilall'gake' Jesúza'.

<sup>54</sup> Dga gok de wchopi yel' wakka' ben Jesúza' Galileana' ka zizee Judeana'.

### Biyon Jesúza' to ben' net ġi'a nee

**5** Ka wde gok diiki, gol' to ġni che ben' Israelka' Jerusalénna', na' biyaj Jesúza' ġni'na'. <sup>2</sup> Na' Jerusalénna', gaozə cho'a puerta' le Puert Che Xil'ka' lla to tang dii le Betesda dill' hebreo. Na' gay' koridor neġhjan tanga'. <sup>3</sup> Na' ġoo koridorka' de ben' zan ben'

wel', no ben' ġchoġ, no ben' bi chak sa' wen, na' no ben' net ġi'a nee, chbezgake' ta nisa'. <sup>4</sup> ġa' zoa kat' chetj to anġi cho'a tanga' chte' nisa', na' beena' chyobi cho'e ġoo nisa' chiyoll chta anġla'n chiyakile' bittezə yillwe' che'ile'. <sup>5</sup> Na' ladj ben'ka' lle' na' len to ben' ba gok shin'shonicho'a yiz bi shawee. <sup>6</sup> Na' ble'i Jesúza'ne' na' gokbe'ile' ba wlla die' ka', na'ch chi'ene':

—ġAcheenilo' yiyakilo'?

<sup>7</sup> Na'ch beena' bi shao' chi'ene':

—Ben'do', aga no zoa cha' wletje' nad' ġoo nisi kat' chdan. Na' kat' chakid' yetj' ġoo nisa', ben' yoblə lii chjsho'tie' ġo'inna'.

<sup>8</sup> Na'ch che' Jesúza'ne':

—Biyas, bitob daa cho'na' biyoa'n na' bigoo nez.

<sup>9</sup> Na' katena' biyakile' na' lii bitobtie' daa che'na' biyo'en na' bigwee nez. Gok dga lla sabda', llana' chombaangake'. <sup>10</sup> Na' ben'ka' chñabia' ben' Israelka' gollgake' beena' biyaki:

—Lla chombaangcho ġaa. Aga bi ġsens de woo daa cho'na'.

<sup>11</sup> Na'ch che' beena' ġegake':

—Beena' biyone' nad' ġen' wne': "Bitob daa cho'na' biyoa'n na' bigoo nez."

<sup>12</sup> Na'ch che'gake'ne':

—ġNora beena' wna li': "Bitob daa cho'na' biyoa'n na' bigoo nez'?"

<sup>13</sup> Na' beena' biyaki aga ġezile' non biyon ġe', ġa' Jesúza' ba bikwase' ladj ben'ka' lle' na'. <sup>14</sup> Na'tech billag Jesúza'ne' lesh' chyoodo'na', na' chi'ene':

—Ba biyakilo' ġaa. Bich bi dii mal gono' kwenche ki wtġcho' dii walch.

<sup>15</sup> Na'ch beena' biyaje' lao ben' wñabia' che ben' Israelka' jayelle' ġegake' nan Jesúza' biyone'ne'. <sup>16</sup> Na' daa ben Jesúza' yel' waka' lla sabda', llana' chombaangake', goklall'gake' witgake'ne'. <sup>17</sup> Na' Jesúza' chi'e ġegake':

—ġa'na' bittezə lla chone' llin na' ka'kzə nad'.

<sup>18</sup> Na'ch ben' wñabia' che ben' Israelka' goklall'gake' witgake'ne' aga toz daa wdishje' leya' daa cho'en dill' che llana' chombaangake', san ġekzka' daa chon kwine' ka Chios daa chi'e Chioza' nake' Ĥe'.

### Yel' wñabia' daa nap Xiñ Chioza'

<sup>19</sup> Na' Jesúza' chi'e ġegake':

—Dii ġi nia' le', nad', Xiñ Chios, aga bi gak gon' to-bia'loz', san daa chle'id' chon Ĥa'nan' ġekzannan' chon'.

<sup>20</sup> ġa' Ĥa'na' chakile' nad' na' chliile' nad' yog' diika' chone'. Na' wli'chile' nad' dii zak'techlə ka diiki, dii gonan ka yibanchile. <sup>21</sup> Ka chon Ĥa'na' chisbane' ben' wetka' na' chiyo'e yel' mban chegake', ka'kzə chon nad', Xiñe', cho'a yel' mban che nottezə ben' cheenid' wi'an.

<sup>22</sup> Na' Ĥa'na' aga ga chchogloe' che ben', san nad' nak' Xiñe', ba bene' lall' na' wchogloa' che yog'ġoġ ben'.

<sup>23</sup> Bene' ka' kwenche yog' ben' koogake' nad' balaan'na' ka daa chgoogake' Ĥa'na'. Beena' bi chgwee nad' balaan', nad' nak' Xiñ Chios, ġekzka' bi chgwee Ĥa'na' balaan', beena' bseġ' nad'.

<sup>24</sup> Dii ġi nia' le', beena' chzenag xtillaana' na' chonġilallee beena' bseġ' nad', gat' yel' mban che zejli kañi.

Na' aga bi de dii gonan ka choglo che' sak'zi'e, san ba bile' lo yel' wita' na' ba zoe' lo yel' mban daa bi te cheyin. <sup>25</sup> Dii li nia' le', wllin lla kat' ben' wetka' yengakile' inia' legake', nad' nak' Xiin Chios, na' ben'ka' yengakile' kat' inia' na' yibangake'. <sup>26</sup> Xa'na' nape' yel' wak kwenche wi'e yel' mban che ben' daa bi te cheyin. Ka'kzə ba bene' nad' Xiine' yel' wak kwenche wi'a yel' mban che ben' daa bi te cheyin. <sup>27</sup> Na' lekzka' ba bene' nad' yel' wñabia' kwenche gon' yel' joschis daa nak' Ben' Bsel' Chioza' Yell-lioni. <sup>28</sup> Bi yibanile daa nia' ka', la' wllin lla wllin gor yeni yog'te ben' wetka' kat' inia' legake'. <sup>29</sup> Na' ka yengakile' inia' na'ch yichejgake' loo banna'. Na' ben'ka' ben dii wenna' yibangake' na' si'gake' banez to yel' mban daa bi te cheyin, na' ben'ka' ben dii mala', yibangake' na' choglo tegake' lo yel' zak'zi'na' zejli kani.

### Jesúza' bli'e yel' wñabia' che'na'

<sup>30</sup> Ni to bibi gak gon' tobia'loz', san chchogloa' che ben' kon ka nllia Chioza' bia' gon', na' kon ka nakanan' wchogloa'n. La' aga chon' kon ka cheenid', san daa cheeni Xa'na', beena' bsel' nad', lënnan' chon'. <sup>31</sup> Na' shi nad' wi'a dill' che kwini', nezid' aga no shajle' cha'. <sup>32</sup> San zoa to ben' cho'e xtillaana', na' nezid' daa ne' cha' nakan shlich'a. <sup>33</sup> Le' bsel'le ben' janabgakile' Juanna' bi ka in'e' cha', na' dillaa daa bi'e' cha' nakan dii li. <sup>34</sup> La'kzi nad' bi chyaljid' we' ben' yell-lioni xtillaa; nia' le' diiki kwenche yilale na' bi kwiayi'le. <sup>35</sup> Juanna' goke' ka to yi' dii bzeeni' na' le bibaile bzenagle che' tolde. <sup>36</sup> Daa chon' diika' non Xa' Chioza' lall' na' gon' choe'n dill' cha', na' zak'chin aga ka daa wna Juanna'. Na' chli'lawin Chiozan' bselee nad'. <sup>37</sup> Xa'na', beena' bsel' nad', lekzka' ba bi'e' dill' cha'. Ni shlin bigan' yenile inie' ni bin' ile'ilene' nak nake'. <sup>38</sup> Na' cho'a xtilleena' bin' sho'n loo yichjall'do'lëna', la' bi chajle'le cha', nad' ben' bselee. <sup>39</sup> Le' chsedchgale Cho'a Xtill' Chioza' daa chakile le'inna' yillelele naklə ka gonle kwenche gat' yel' mban chele zejli kani. Na' la'kzi Cho'a Xtill' Chioza' choe'n xtillaana', <sup>40</sup> aga cheenile gakle nad' txen kwenche gat' yel' mban chele daa bi te cheyin. <sup>41</sup> Aga chyaljid' no koo nad' balaan. <sup>42</sup> Na' nombia' le', na' nezid' aga chakile Chioza'. <sup>43</sup> Xa' Chioza' bselee nad' na' ba bid', na' bi chzenagle cha'. San shi yid ben' yoblə tobia'loze', beena'lan le gak chele. <sup>44</sup> Nakrakzə gonle shajle'le cha'? La' gangazə chgoo ljwell-le balaan, na' bi chinole sho'le balaan che beena' zeelo nak Chios. <sup>45</sup> Bi gakile nad' gaw' xya chele lao Xa' Chioza', la' zoa sto ben' gawe' xya chele. Dii Moiséza', beena' nonle lez gaklene' le', len' gawe' xya chele lao Xa' Chioza'. <sup>46</sup> La' shel' chajle'le daa bzej dii Moiséza', lekzka' wyajle'le cha', shel'ka'. La' len' bzeje' xtillaana'. <sup>47</sup> Na' daa bi chajle'le che daa bzej dii Moiséza', zakra gonle shajle'le che diiki nia'?

**Bwao Jesúza' wdeli gayaa mil ben'**  
(Mt. 14:13-21; Mr. 6:30-44; Lc. 9:10-17)

**6** Na' ka wde, Jesúza' wyaje' shlaa nisdō' che Galileana', daa lekzka' le nisdō' che Tiberias. <sup>2</sup> Na'

ben' zan janogake'ne' daa ble'gakile' yel' wakka' bene' kana' biyone' ben'ka' bi shao'. <sup>3</sup> Na'ch wyep Jesúza' to lo yaa na' wche'lene' ben'ka' nakgake'ne' txen. <sup>4</sup> Na' ba zoa gal' In'i Paskw che ben' Israelka'. <sup>5</sup> Ka ble'i Jesúza' ben' zan ba bllin gana' chi'e, na' chi'e Felípena':  
—¿Gara ljxi'cho dii gao yog' ben'ki?

<sup>6</sup> Golle' ka' daa chakile' la'shki bi yee Felípena', la' ba nezczile' nakan gone'. <sup>7</sup> Na' Felípena' chi'ene':

—Aga waki laxj to ben' che xon' beo' ljxi'yicho dii gao yog' ben'ki lat' wej.

<sup>8</sup> Na' sto beena' nak Jesúza' txen lie' Andrés, ben' bish' Simón Pédróna', chi'ene':

<sup>9</sup> —Ni ze to bi' xkwid' no'ab' gay' yetxtil de cebada na' zi chop bel. Per bizə daa par yog' ben'ki.

<sup>10</sup> Na'ch Jesúza' chi'e:

—Li yee yog' ben'ka' kwe'gake'.

Na' dechga yixdo' gana' lle'gake', na' yog'tie' wche', na' to ben' byoka'zə gok ka do gayaa mil. <sup>11</sup> Na'ch bex' Jesúza' yetxtilka', na' bi'e Chioza' yel' choxken, na' bgone' che che ben'ka' nakgake'ne' txen na' legake' be'gake' che yog' ben'ka' chi' na' axt ka beljgakile'. Na' lekzka' bene' che belka'. <sup>12</sup> Na' ka beljgakile', na'ch chi'e ben'ka' nakgake'ne' txen:

—Li yitop yog'lo dii lao'ka' bichoonan kwenche bibi gaktitj.

<sup>13</sup> Na'ch bitopgake'n, biyakte shllin xet' diika' bichoonan lao yetxtilka' gay'. <sup>14</sup> Na' ka ble'i ben'ka' yel' waka' daa ben Jesúza', na'ch che' ljwellgake':

—Dii li beenin nake' beena' lla bia' yid yell-lioni kwenche chixji'e daa che' Chioza'ne'.

<sup>15</sup> Na' daa gokbe'i Jesúza' cheengakile' yiche'gake'ne' kwenche wzoagake'ne' inabi'e legake', bicheje' ladje'ka' na' wyepe' toze' zi lat' cha'ch lo yaana'.

**Wza' Jesúza' lo nisdō'na'**  
(Mt. 14:22-27; Mr. 6:45-52)

<sup>16</sup> Ka ba chal, ben'ka' nak Jesúza' txen biyetjgake' cho'a nisdō'na'. <sup>17</sup> Na' biyoogake' to loo barkw kwenche ziyajgake' yell Capernaúma'. Ba gol' na' bin' yillin Jesúza' kwite'ka'. <sup>18</sup> Na'ch wzolo wzechga be'na' na' wzolo chas chat' nisdō'na'. <sup>19</sup> Na' ka do gay' wa xop kilómetro ba wza'len barkwa' legake' lo nisdō'na' kat' ble'gakile' Jesúza' zeje' tlo nisdō'na' zjati'le' barkwa' na' le bblebgake'. <sup>20</sup> Na' Jesúza' chi'e legake':

—Nad'kzan, jbi illeble!

<sup>21</sup> Na' chibagakile' bigoogake'ne' loo barkwa', na' lii bllintekzgake' gana' chwiagake' illingake'.

### Zan ben' chiyiljgake' Jesúza'

<sup>22</sup> Na' betiyo gokbe'i ben'ka' bigaan shlaa nisdō'na' nan tochgā barkwa' got' na' to ben'ka' nonz Jesúza' txen biyoogake'n na' bi len Jesúza' biyoolene' legake'. <sup>23</sup> Na' gaozə gana' wdaogake' yetxtilka' ka wde be' Xancho Jesúza' Chioza' yel' choxken, bllin sto chop barkw dii za' yell Tibéria'za'. <sup>24</sup> Na' ka gokbe'i ben'ka' aga no Jesúza' nla' ni ben'ka' nakgake'ne' txen, na'ch biyoogake' loo barkwka' ziyajgake' Capernaúma' jadiljgake'ne'.

### Jesúza' nake' ka to yel' wao dii choṅa'n yel' mban

<sup>25</sup> Na' ka bllingake' shḷaa nisdona' jadi'gake'ne', na' gollgake'ne':

—Maestro, ḷbat biyedo' ni?

<sup>26</sup> Na' Jesúza' chi'e ḷegake':

—Dii ḷi nia' le', chiyilḷe nad' aga daa wyajni'lati'le bi zejḷin yel' wakka' benan', san daa wdaoḷe aḷt ka beljilen. <sup>27</sup> Bi yilaḷ yizodzile kwenḷe gat' dii yeej gaole, ḷa' dii te ḷheyin nak daa. San ḷi gal' kwe'no daa goṅ yel' mban ḷeḷe zejḷi kaṅi, daa goṅ' nad', Ben' Bseḷ' Chioza' Yell-lioni. ḷa' ḷa' Chioza' ba bene'n lall' na' wi'an.

<sup>28</sup> Na' che'gake'ne':

—ḷBeran chiyal' gonnto' kwenḷe gonnto' daa cheeni Chioza'?

<sup>29</sup> Na' che' Jesúza' ḷegake':

—Daa cheeni Chioza' gonle, gonḷilall'le nad', beṅ' bselee.

<sup>30</sup> Na'ch che'gake'ne':

—ḷBera yel' wak gono' ile'into' kwenḷe shajḷe'nto' ḷho'? ḷBi ka gono'? <sup>31</sup> Dii ḷoxzto'choka' wdaogake' daa le maná latja' gana' bibi chashj chḷeb, ka na Cho'a Xtilḷ Chioza' gana' na: "Yel' wawa' daa za' yabana' bi'en wdaogake'."

<sup>32</sup> Na' che' Jesúza' ḷegake':

—Dii ḷi nia' le', aga dowalḷyēn' yel' wao daa za' yabanan' be' dii Moiséza' ḷegake', san ḷa'na' choṅe' daa nak dowalḷ yel' wao daa za' yabana'. <sup>33</sup> ḷa' nad', beṅ' za' yabana', nak' ka to yel' wao dii choe' Chioza' beṅ' yell-lioki kwenḷe ibangake'.

<sup>34</sup> Na'ch che'gake'ne':

—Beṅ'do', beṅgach neto' toshiizi yel' wawa' no' ka'.

<sup>35</sup> Na' che' Jesúza' ḷegake':

—Nad' nak' ka yel' wawa' daa choe'n yel' mban ḷe beṅ'. Beena' gake' nad' txen, gake' ka beṅ' nelj nlla'i toshiizi. Na' beena' gonḷilallee nad', gake' ka to beṅ' bichga ibilḷi. <sup>36</sup> Per kon ka ba wnia' le', ḷa'kzi ba ble'ile nad' bi chajḷe'le. <sup>37</sup> Yog' beṅ'ka' chon ḷa'na' lall' na', gakgake' nad' txen. Na' beena' gake' nad' txen aga wzoa'ne' ka'ḷe. <sup>38</sup> ḷa' zaa yabana' na' zoa' yell-lioni aga kwenḷe gon' daa nazan ḷhan', san zaa kwenḷe gon' daa cheeni ḷa'na', beena' bseḷ' nad'. <sup>39</sup> Na' ḷa'na', beena' bseḷ' nad', cheenile' bi wi'a latj kwiayi' ni to beṅ'ka' ba wleje' kwenḷe gakgake' nad' txen. San cheenile' yisban' ḷegake' ladj beṅ' wetka' kat' illin ḷla te ḷe yell-lioni. <sup>40</sup> Na' dgan cheeni ḷa'na', beena' bseḷ' nad': chaklallee gat' yel' mban zejḷi kaṅi ḷe yog'ḷoḷ beṅ' gakbe'i nak' ḷiine' na' gonḷilallee nad'. Na' nad' yisbanee ladj beṅ' wetka' kat' te ḷe yell-lioni.

<sup>41</sup> Na'ch beṅ' wṅabia' ḷe beṅ' Israelka' wzologake' biz chon chnagake' ḷe Jesúza' daa wne': "Nad' nak' yel' wao daa za' yabana'." <sup>42</sup> Na' che'gake':

—ḷAga beenin Jesús, xiṅ Joséna'? Nombia'cho ḷaṅṅa' beeni. ḷBeraḷe naze': "nad' za' yabana'?"

<sup>43</sup> Na'ch che' Jesúza' ḷegake':

—Bibi gon inazle ḷheyi daa wnia' le'. <sup>44</sup> Ni to kono gak gon nad' txen shi ḷa'na', beena' bseḷ' nad', bi gone' le' lall' na'. Na' beṅ'ka' nak nad' txen, yisban' ḷegake' kat'

te ḷe yell-lioni. <sup>45</sup> ḷee librka' bzej dii beṅ'ka' wdiḷjee daa goll Chioza' ḷegake' kani'yi nan: "Chioza' wli' wsedile' yog'ḷoḷte beṅ'." Na' yog' beṅ' chzenag ḷe ḷa'na' na' chajni'gakile' daa ne', ḷegaken' chongake' nad' txen.

<sup>46</sup> Aga ga zoa beṅ' ba ble'ile' ḷa'na'; toz nad', beṅ' za' yabana', ba ble'idee. <sup>47</sup> Dii ḷi nia' le', nottez beṅ' nonḷilallee nad' de yel' mban ḷe' zejḷi kaṅi. <sup>48</sup> Nadaan nak' ka yel' wawa' daa choe'n yel' mban ḷe beṅ' zejḷi kaṅi. <sup>49</sup> Dii ḷoxzto'leka' wdaogake' daa le maná latja' gana' bibi chashj chḷeb na' bia'kzə witgake'. <sup>50</sup> San nad' cho'a dill' ḷe yel' wao daa za' yabana', na' beena' gawe'n aga bi yel' wit zejḷi kaṅi ile'ile'. <sup>51</sup> Nadaan nak' yel' wao daa za' yabana' daa cho'e'n yel' mban ḷe beṅ'. Beena' gao yel' wawi, ibane' zejḷi kaṅi. Na' yel' wawa' daa wi'ane', ḷennan' beli chen ḷa'ni daa chzanid' kwenḷe gat' yel' mban ḷe beṅ' yell-lioni.

<sup>52</sup> Na'ch beṅ' Israelka' wzolo chshesh chṅegake', che' ḷjwelle':

—ḷNakra gon beeni goṅe' beli chen ḷe'na' gaochon?

<sup>53</sup> Na' che' Jesúza' ḷegake':

—Nad', Beṅ' Bseḷ' Chioza' Yell-lioni, dii ḷi nia' le', shi bi gaole kwerp ḷa'ni na' shi bi yeejle chen ḷa'ni, aga wat' yel' mban ḷeḷe daa bi te ḷheyin. <sup>54</sup> ḷa' beṅ'ka' gaogake' kwerp ḷa'ni na' yeejgake' chen ḷa'ni, beṅ'kan' gat' yel' mban ḷegake' zejḷi kaṅi. Na' kat' illin ḷla te ḷe yell-lioni, nad' yisbangakee ladj beṅ' wetka'.

<sup>55</sup> ḷa' kwerp ḷa'ni nakan dowalḷ yel' wao, na' chen ḷa'ni nakan dowalḷ dii cheeje'. <sup>56</sup> Beena' gao kwerp ḷa'ni na' yeeje' chen ḷa'ni, nake' nad' txen, na' ḷekzka' nad' nakee txen. <sup>57</sup> ḷa'na', beena' bseḷ' nad', zoe' zejḷi kaṅi na' de yel' mban ḷa' daa mbane' ḷe'. Na' ka'kzan beena' gao beli chen ḷa'ni ibane' daa wi'ane' yel' mbanna'. <sup>58</sup> Beli chen ḷa'ni nakan yel' waw dii za' yabana'. Ka nak yel' wawi, aga nakan ka daa le maná daa wdao dii ḷoxzto'leka' na' bia'kzə witgake'. Beena' gao yel' wawa' daa za' yabana', ibane' zejḷi kaṅi.

<sup>59</sup> Diikin wna Jesúza' shlak bli' bsdile' beṅ' gana' chdop chllag beṅ' Israelka' choe'ḷwillgake' Chioza' yell Capernaúma'.

### Dill' dii nsa' yel' mban

<sup>60</sup> Na' zan beṅ'ka' nogake'ne', ka bengakile' daa wna Jesúza', na' wnagake':

—Lallj inḷleb nak dga chli' chsedi beeni. ḷNotgui gon ka ne'?

<sup>61</sup> Na' Jesúza' gokbe'ile' bi wyazlall'gake' xtillee'na', na'ch wṅabile' ḷegake':

—ḷAchakzbanile dga ba wnia' le'? <sup>62</sup> ḷNakra gonle shel'ka' ile'ile nad', Beṅ' Bseḷ' Chioza' Yell-lioni, yiyep' gana' wzaa? <sup>63</sup> Espiritu ḷe Chioza' cho'e yel' mban ḷe beṅ', ḷa' beli chenna' aga bi zakiin. Dill'ka' ba wnia' gonan ka soalen Espirituna' le' na' gat' yel' mban ḷeḷe. <sup>64</sup> Per bia'kzə zoa baḷ-le bi chajḷe'le.

Goll Jesúza' ḷegake' ka', ḷa' dezd nechte ba nezkzile' no beṅ'ka' bi chajḷe' ḷe' na' non gon ḷe' lo na' beṅ' malka'. <sup>65</sup> Na' chi'e ḷegake':

—Ba wniakz' le' ni to kono gak gon nad' txen shi Xa'na' bi gone'ne' lall' na'.

<sup>66</sup> Na' lo llana'tez beñ' zan beñ'ka' nakgake'ne' txen bkwasgake' bich janogake'ne'. <sup>67</sup> Na'ch che' Jesúza' beñ'ka' shllin, beñ'ka' nakgake'ne' txen:

—¿Alekzka' lenle cheenile yiyajle?

<sup>68</sup> Na' Simón Pédróna' chi'ene':

—Xan', aga nochlè cheyi zakii wzenagnto', la' tozo' lin' choo dillaa daa chonan ka gat' yel' mban chento' zejli kaní. <sup>69</sup> Ba wyajle'nto' cho', na' ñezinto' lin' Crístoná', Xiñ Chios yaa Chios banna'.

<sup>70</sup> Na' Jesúza' chi'e legake':

—Ba wlej' shllinle gake nad' txen. Per tole nakle dii xiwaa txen.

<sup>71</sup> Wne' ka' che Jud Scariota', xiñ to beñ' le Simón, la' ñezile' nan Juda' gone'ne' lall' na' beñ' malka', la'kzi wlene' beñ'ka' shllin.

**Beñ'ka' nak beñ' bish' golj Jesúza' bi wyajle'gake' che'**

**7** Ka wde dga, Jesúza' wde' doxen gana' mbani Galileana'. La' bi goklallee shaje' gana' mbani Judeana' daa cheeni beñ' wñabia' che beñ' Israelka' witgake'ne'. <sup>2</sup> Na' ka ba zoa gal' lñi che ranshdo'ka' daa chon beñ' Israelka' yog' yiz, <sup>3</sup> beñ'ka' nak beñ' bish' golj Jesúza' che'gake'ne':

—Bi yigaano' nizè, san wyaj Judeana' kwenche beñ'ka' ba non li' txen ile'gakile' yel' wakka' chono'.

<sup>4</sup> La' beena' cheeni seyi che', aga chkwashee diika' chone'. Bachgali chono' yel' wakki, jentegan lao yog'lol beñ'.

<sup>5</sup> La' ni beñ' bisheekan' bi wyajle'gake' che'. <sup>6</sup> Na'ch che' Jesúza' legake':

—Biñ' illin lla illin gor gon' daa lla bia' gon'. San le', bat'tez wak shajle. <sup>7</sup> Beñ' yell-lioki bibi de dii gonan ka gakzbangakile' le', san nadaan chakzbangakile' daa chepgakee malan' chongake'. <sup>8</sup> Li shaj le' lñina'. San nad' bi saa, la' biñ' illin lla illin gor gak cha' daa lla bia'.

<sup>9</sup> Biyoll golle' legake' ka' na' bigaane' Galileana' zi xtit.

### Wyaj Jesúza' lñina'

<sup>10</sup> Na' ka wde wza' beñ' bisheeka', lekzka' wzee wyaje' lñina' do ngash'z. <sup>11</sup> Na' beñ'ka' chñabia' beñ' Israelka' chiyiljgake'ne' lo lñina', che' ljwellgake':

—¿Garanzi beena', lla?

<sup>12</sup> Na' ladj beñ'ka' lle' lñina', beñ' zan choe'gake' xtill' Jesúza'. Bañe' che': "Nake' beñ' wen." Na' zi bañe' che': "Bi nake' beñ' wen, la' chdaze' chziyee beñ'."

<sup>13</sup> Per ni to kono biyaxji we' xtill' Jesúza' ka nja'z daa chllebgake' beñ'ka' chñabia' beñ' Israelka'.

<sup>14</sup> Na' ba zej shon tap lla chak lñina' ka bllin Jesúza' gana' zoa yoodo'na' na' wzoloe' chli' chsedile' beñ'.

<sup>15</sup> Na' chibani beñ' Israelka', na' che' ljwelle':

—¿Nakra chak chli' chsedi beeni beñ', len aga bi nside'?

<sup>16</sup> Na' che' Jesúza' legake':

—Diika' chli' chsedid' aga nakan dii chiyiljall'z', san beena' bsel' nad', len' bli' bsdile' nad' diiki. <sup>17</sup> Nottez

beñ' cheenile' gone' ka cheeni Chioza', wakbe'ile' shi daa chli' chsedid' nakan che Chios wa shi nakan dii chiyiljall'z'. <sup>18</sup> Beena' tobia'loze' cho'e xtillee, balaan che kwinzen' chiyilje', san beena' chiyilje' sho' beena' bsel' le' balaan, len' cho'e dill' li, na' aga bi dill' wxiye' cho'e.

<sup>19</sup> Dii Moiséza' beñe' le' ley che Chioza', na' ni tole bi chonle ka nllian bia' gonle. ¿Biñe cheenzile witle nad'?

<sup>20</sup> Na'ch beñ'ka' lle' na' che'gake'ne':

—Dii xiwaan yoo no' ka'. ¿Noran cheeni wit li'?

<sup>21</sup> Na' che' Jesúza' legake':

—Tochga yel' waka' ba ble'ile beñ' llana' chombaancho na' yog'le chibanile. <sup>22</sup> Dii li dii Moiséza' bene' byen yog'tele nakle beñ' byo chiyal' sho'le señ daa le circuncisión, la'kzi aga len' wzololene'n, san dii xoxxto'le-

ka'ten. Daan chgoole bi' byodo'ka' seña' la'kzi nakan lla chombaancho. <sup>23</sup> Na' shi choe'le latj sho' bi' byodo'ka' señ daa le circuncisión lo llana' chombaancho kwenche gak ka na leya' daa bzej dii Moiséza', ¿biñe chllaazle nad' daa biyon' to beñ' llana' chombaancho?

<sup>24</sup> Bi wchoglizle che beñ' shi bi chle'ile chone', san cheenin ñezile nakyen'an nakan kwenche we'le dill' kon ka nakan.

### Jesúza' wne' zee gana' zoa Chioza'

<sup>25</sup> Na'ch bal beñ' Jerusalénka' nagake':

—¿Aaga beenin cheengakile' witgake', lla? <sup>26</sup> Li wwia ka cho'e dill' ladj lkwe' beñ', na' ni to kono bi che'. ¿Anti ba chajle'lza beñ' wñabia'ka' nan dii li beeni nake' Crístoná', beena' wsel' Chioza' inabi'e, lla? <sup>27</sup> Cho' ñezicho ga beñ' beeni. San kat' yid beena' nak Crístoná', ni to kono ñezi galè za' beena'.

<sup>28</sup> Jesúza' chli' chsedile' beñ'ka' yoodo'na', na' ka benile' daa wna beñ'ka' che', na' wñie' zillj chi'e:

—Chakzile nombia'le nad' na' ñezile ga beñ' nad'. Aga zaa tolazz', san zoa beena' bsel' nad', beena' chon kon ka chchebe' gone'. Na' le' bi nombia'lene', <sup>29</sup> san nad' nombiane', la' gana' zoen' wzaa, na' len' bselee nad'.

<sup>30</sup> Na'ch bañe' goklall'gake' gox'gake'ne', per ni toe' bi beñ' le', la' biñ' illin lla illin gor gak che' daa lla bia'.

<sup>31</sup> Na' beñ' zan wyajle'gake' che', na' wnagake':

—Kat' yid beena' nak Crístoná', beena' wsel' Chioza' inabi'e, ¿awli'techle' yel' wak aga ka daa chli' beeni, lla?

### Goklall'gake' gox'gake' Jesúza'

<sup>32</sup> Na' fariseoka' bengakile' dillaa daa choe' beñ'ka' che Jesúza'. Na' legake' len bxo'zka' chñabia' bsel'gake' beñ'ka' chap yoodo'na' kwenche lljex'gake' Jesúza'.

<sup>33</sup> Na' Jesúza' golle':

—Aga sshach soalen' le', na'ch yiyaa gana' zoa beena' bsel' nad'. <sup>34</sup> Na' yiyilje nad' per aga willelile nad' daa bi gak yidle gana' lljzoa'.

<sup>35</sup> Na'ch beñ' Israelka' che' ljwellgake':

—¿Garan yiyaj beeni na' bich yillelichone', lla? ¿Anti gana' lle' beñ' wlall chechoka', beñ'ka' lle' lall beñ' zit'kan' shaje' kwenche lljasedile' beñ' griegoka', lla?

<sup>36</sup> ¿Beran zejin daa ne': "Yiyilje nad', per aga willelile nad' daa bi gak yidle gana' lljazoa'?"

### Espíritu ɔhe Chioza' nake' ka nis yaa nis ban

<sup>37</sup> Na' llana' zeelo gok lɔnina', llana' nak lla choo lla xen, wzolla' Jesúza' na' wɔnie' zillj, chi'e:

—Shi nole chbɔli, li da yeejle nisa' daa gon' le'. <sup>38</sup> Na' gak kon ka na Cho'a Xtill' Chioza' gana' nan beena' gonlilallee nad', gak loo yichjall'do'ena' ka ga chaltit nis yaa nis ban.

<sup>39</sup> Na' daa wna Jesúza' ka', zejin soa Espiritu ɔhe Chioza' loo yichjall'do' beena' gonlilall' le'. La' ka gora' biɔ' yidsoa Espirituna' loo yichjall'do' beɔ' daa biɔ' sho' Jesúza' balaan'na' daa llia bia' sho'e kat' yiyepe' gana' zoa Chioza'.

### Gok beɔ'ka' ɔhop shoɔ kwenlɔ

<sup>40</sup> Na' baɔ beɔ'ka' bengakile' daa wna Jesúza' na' wna-gake':

—Dii li beeni nake' beena' llia bia' yid kwenɔhe ɔhixji'e daa che' Chioza'ne'.

<sup>41</sup> Na' zi baɔe' che'gake':

—Beenkzan' Crístona', beena' chbezcho wsel' Chioza' inabi'e.

Na' zi baɔe' che'gake':

—¿Achakile ladj beɔ' Galileaka' ichej beena' wsel' Chioza' inabi'e? <sup>42</sup> Cho'a xtill' Chioza' nan lo dia ɔhe dii Davina' galj beena' nak Crístona', na' gake' beɔ' yell Belén ka dii Davina'.

<sup>43</sup> Ka' gok, gogkake' ɔhop shoɔ kwenlɔ ni ɔhe Jesúza'.

<sup>44</sup> Baɔe' goklall'gake' gox'gake'ne', per ni toe' bi biyaxji.

### Beɔ'ka' wɔnabia' beɔ' Israelka' bi wyajle'gake' ɔhe Jesúza'

<sup>45</sup> Na'ch beɔ'ka' chap yoodo'na' billingake' gana' zoa fariseoka' len bɔzoka' chɔnabia'. Na'ch che'gake' le-gake':

—¿Biɔhe bi bɔhe'lene'?

<sup>46</sup> Na' beɔ'ka' chap yoodo'na' che'gake':

—Ni to konoɔ' we' dill' ka dillaa choe' beena'.

<sup>47</sup> Na'ch che' fariseoka':

—¿Alezkka' lenle ba wxiyee? <sup>48</sup> Ni to beɔ' wɔnabia' ɔhechoka', ni neto' fariseo bi chajle'nto' che'. <sup>49</sup> Per beɔ'ki bi nombia'gake' leya', ba wlliyi'gake'.

<sup>50</sup> Na' farisewa' le Nicodemo, beena' wyaj lao Jesúza' waɔ-lɔ, chi'e legake':

<sup>51</sup> —Ley ɔhechona' nan aga wak wɔhoglocho ɔhe to beɔ' inacho chone' mal shi biɔ' wzenagcho dillaa wi'e kwenɔhe inezicho bin chone'. ¿Anti aga kan' nakan?

<sup>52</sup> Na'ch che'gake'ne':

—¿Alezkka' beɔ' Galilea li'? Bsed kwenɔhe inezilo' ni to beɔ' chyixjee daa che' Chioza'ne' biɔ' ichej gana' mbani Galileana'.

<sup>53</sup> Na'ch billeshgake' ziyaj lill ɔhe ɔhegake'.

### Noola' bidol'len beɔ' byona'

**8** Na' Jesúza' wyaje' lo Yaa Olívoza'. <sup>2</sup> Na' betiyo ka wyeeni' wizaje' yoodo'na'. Na' beɔ' zan inlleb wbig' kwite'na', na' wchi'e wzoloe' bli' bsdile' legake'. <sup>3</sup> Na'ch beɔ'ka' chli' chsedi leya' len fariseoka' nɔhe'gake' to noolɔ bidol'lene' to beɔ' byo, na' bzegake'ne' ladj beɔ'ka' lle' na'. <sup>4</sup> Na' che'gake' Jesúza':

—Maestro, ba bidoljinto' nooli kon to beɔ' byo. <sup>5</sup> Na' ɔnezinto' leya' daa bzej dii Moiséza' nan chiyaɔ' witcho noolka' chon ka' kon yaj. ¿Shera li', bi ka ino'?

<sup>6</sup> Che'gake'ne' ka' kwenɔhez kwejgake'ne' dill' ga si' sengake' na' gaogake' xya ɔhe'. Na'ch Jesúza' bchekee bzeje' lo yona' kon xbene'na'. <sup>7</sup> Na' daa zeyidgake' chɔnabgakile'ne', na' bibe'shawee chi'e legake':

—Beena' bibi saaxya ɔhe' de, wak soloe' wtakwe'ne' yaja'.

<sup>8</sup> Na'ch bizchekee chizzeje' lo yona'. <sup>9</sup> Na' ka goll Jesúza' legake' ka', na' biza' twej tweje', wzolozan beɔ' golka' na'tech beɔ' xkwid'ka', na' stoz noola' bgaan-lene' Jesúza'. <sup>10</sup> Na' bibe'shao' Jesúza' dii yoblɔ, na' chi'ene':

—Noolɔ, ¿garan beɔ'ka' chao xya ɔho'? ¿Ani toe' bibi beni li'?

<sup>11</sup> Na' che' noola'ne':

—Ni toe', beɔ'do'.

Na'ch che' Jesúza'ne':

—Ni nad' bibi gonid' li'. Biyaj, na' bich wxinj wleno'.

### Jesúza' nsee beeni' ɔhe beɔ' yell-lioni

<sup>12</sup> Na'ch Jesúza' bizoloe' choe'lene' beɔ'ka' lle' na' dill', chi'e:

—Nad' nak' beeni' ɔhe beɔ' yell-lioni. Beena' gone' nad' t xen bich soe' lo yel ɔhoɔ ɔhe dii mala', san loo yichjall'do'ena' gape' beeni' daa nsa' yeɔ' mban zejli kani.

<sup>13</sup> Na'ch che' fariseoka'ne':

—Li' choe'zo' xtill' kwino', na' daa choe' xtill' kwino' bi nakan dii shajle'cho.

<sup>14</sup> Na' che' Jesúza' legake':

—La'kzi choa' dill' ɔhe kwin', ɔnezid' nakan dill' li, la' ɔnezid' gan zaa na' gan yiyaa. San le', aga ɔnezile gan zaa, ni bi ɔnezile gan yiyaa. <sup>15</sup> Le' chɔhoglolo ɔhe beɔ' le-ga beɔ' yell-lio. San nad' bi chɔhogloa' ɔhe beɔ'. <sup>16</sup> Per shi nad' wɔhogloa' ɔhe beɔ', kon ka nakannan' wɔhogloa'n, la' aga tobia'lozaan chɔhogloa'n, san Xa'na', beena' bsel' nad', naknto' t xen chɔhoglonto' ɔhe beɔ'. <sup>17</sup> Ley ɔhelena' nan shi ɔhop beɔ' toz ka chitili xtilleeka' chiyaɔ' shajle'cho ɔhegake'. <sup>18</sup> Na' nak ɔhopnto', nad' cho'a dill' ɔhe kwin', na' lekzka' Xa'na', beena' bsel' nad', cho'e dill' ɔha'.

<sup>19</sup> Na'ch che'gake'ne':

—¿Garan zoa Xo'na'?

Na' che' Jesúza' legake':

—Ni nad' ni Xa'na' bi nombia'le. La' shel' nombia'le nad', lekzka' nombia'le Xa'na', shel'ka'.

<sup>20</sup> Jesúza' bi'e dill'ki shlak bli' bsedile' beṇ' latja' gana' chi' daa chgoogake' mech che yoodo'na', per ni to kono bex' le' daa biṇ' illin lla biṇ' illin gor gak che' daa lla bia'.

### Jesúza' wne' kono gak yiyaj gana' yiyaje'

<sup>21</sup> Na'ch Jesúza' wizi'e legake':

—Nad' yiyaa, na' yiyilje nad', na' gana' yiyaa aga wak sa'le, la' lao saaxya cheleka' guetle.

<sup>22</sup> Na'ch beṇ' wṇabia' che beṇ' Israelka' che' l'jwell-gake':

—¿Acheenile' yiyit kwinen', lla? ¿Adaan naze': "Gana' yiyaa bi gak sa'le'?"

<sup>23</sup> Na'ch che' Jesúza' legake':

—Le' nakle beṇ' yell-lío, na' nad' zaa yabana'. Le' chonle lega beṇ' yell-lío, san nad' bi chon' ka le' beṇ' yell-lío. <sup>24</sup> Daan nia' le', guetle lao saaxya cheleka'. La' shi bi chajle'le nadaan nak' beena' ba wnia' nak', na' guetle lao saaxya cheleka'.

<sup>25</sup> Na'ch che'gake'ne':

—¿Norakzə li', shka'?

Na' che' Jesúza' legake':

—Nadaan nak' beena' ba wṇiakz' le' dii nechte. <sup>26</sup> Dii zan dii gak inia' dii gaogakan xya chele. Per beena' bsele' nad' cho'e dill' li, na' daa wne' nad' lennan' choe'len' beṇ' yell-lioni dill'.

<sup>27</sup> Na' legake' aga wyajni'gakile' shi xtill' Xe'nan' choe'lene' legake'. <sup>28</sup> Na' daan chi'e legake':

—Kat' ba bda'le nad', Beṇ' Bsele' Chioza' Yell-lioni, to lee yag, kana'chan gakbe'ile nak' beena' ba wnia' nak'. Na' gakbe'ile aga ga de to dii ben' to bia'loz', san kon daa bsele' Xa'na' nad', lennan' cho'a dill'. <sup>29</sup> La' Xa'na', beena' bsele' nad', lekzen' zoalene' nad'. Bi chbej yichje' nad', la' toshiizi chon' ka chazlallee.

<sup>30</sup> Na' ka biyoll be' Jesúza' dill'ka', beṇ' zan ben'li-lall'gake'ne'.

### Beṇ'ka' chṇabia' dii mala' yichjlall'do'eka'

<sup>31</sup> Na'ch che' Jesúza' beṇ' Israelka' ba chajle' che':

—Shi le' soachechle gonle ka ba wnia', dii li txenan ba nakle nad', shi ṇaa. <sup>32</sup> Na' gombia'le dill' li cha'na', na' kat' ba nombia'len, gakle ka to beṇ' ba biyell bila' lao daa ntakw nchejan le'.

<sup>33</sup> Na'ch che'gake'ne':

—Neto' naknto' xiṇ dia che dii Abrahamama' na' axt ṇaanlla aga non' inabia' neto' kwenche gonznto' kon daa iṇe'. ¿Beraḇhe nazo' yiyell yila'nto'?

<sup>34</sup> Na' che' Jesúza' legake':

—Dii li nia' le', nottez beena' chon dii mala' nake' ka beṇ' ndoo lawinna' daa chṇabi'an le'. <sup>35</sup> To wen llin aga toshiizi soe' lill xane'na', san xiṇ xan llinna', toshiizi soe' lill xe'na'. <sup>36</sup> Na' shi nad', Xiṇ Chios, yisell yilaa le' lawi dii mala', dii li wiyell wila'le lawinna'. <sup>37</sup> Nezkzid' nakle xiṇ dia che dii Abrahamama', per cheenile witle nad' daa bi chleble cho'a xtillaani. <sup>38</sup> Nad' cho'a dill' che daa ba ble'id' gana' zoa Xa'na', na' le', chonle ka na xalena'.

<sup>39</sup> Na' che'gake'ne':

—Xiṇ dia che dii Abrahamama' neto'.

Na' Jesúza' chi'e legake':

—Shele' nakle dowalj xiṇ dia che dii Abrahamama', kon ka ben dii Abrahamama' chonle, shele'ka'. <sup>40</sup> La'kzi ba wnia' le' dill' li daa wna Chioza' nad', kon cheenkzile witle nad'. Dii Abrahamama' agaga bene' ka chonle. <sup>41</sup> Le' chonle kon ka chon xalena'.

Na'ch che'gake'ne':

—Aga naknto' ka to beṇ' bi wyoo xayin. Toz Chioza' nake' Xanto'.

<sup>42</sup> Na'ch che' Jesúza' legake':

—Shele' lezkzile Chioza' nake' Xale, wakile nad' shele'ka', la' kwite'nan' wzaa. Aga tobia'lozaan bid', san Chiozan' bselee nad'. <sup>43</sup> Na' aga chajniile diika' nia' le' daa bi cheenile wzenagle dill'ka' cho'a. <sup>44</sup> Dii xiwaan nak xale na' chibaile chonle daa chaklalliin. La' kana'te dii xiwaa nakan to wen xya, na' ni shlin biṇ' gonan daa nak shli, ni bi choe'n dill' li. Kat' chziye' chonan kon ka nan loo lall'do'inna', la' nakan liizelozi dii wxiye' na' naktan xan yel' wxiye'na'. <sup>45</sup> Na' nad', daa cho'a dill' lina' aga chajle'le cha'. <sup>46</sup> Ni tole bi gak wli'le shi de saaxya cha'. Na' shi cho'a dill' li, ¿beraḇhe bi chajle'le cha'? <sup>47</sup> Beena' nak xiṇ Chioza' chzenague' xtilleena'. Na' le', bi chzenaglen daa bi nakle xiṇe'.

### Ba zoakz Crístona' kana' zi' galj dii Abrahamama'

<sup>48</sup> Na'ch beṇ' wṇabia' che beṇ' Israelka' che'gake'ne':

—¿Aga naznto' nanto' nako' beṇ' Samaria na' yootio' to dii xiw'!

<sup>49</sup> Na' che' Jesúza' legake':

—Aga no dii xiw' yo'a, san Xa'nan' chgwaa balaan, per le', chṇit chdele nad'. <sup>50</sup> Aga chyilj' koo beṇ' nad' balaan. San zoa beena' cheeni sho'a balaan, na' len' chḇhogloe' che beṇ' kon ka nakan. <sup>51</sup> Dii li nia' le', beena' chon ka nia', ibane' zejli kaṇi.

<sup>52</sup> Na'ch beṇ' wṇabia' che beṇ' Israelka' che'gake'ne':

—Naach ba wṇezinto' dii xiw'kzan yoo. Dii xoxzto'cho Abrahamama' wite' na' lekzka' yog' beṇ'ka' wdixjee daa goll Chioza' legake' kani'yi. Na' li ṇaa, nazo': "Beena' chzenag cha' ibane' zejli kaṇi." <sup>53</sup> ¿Achakilo' zak'cho' aga ka dii xoxzto'cho Abrahamama'? Le' wite' na' ka'kzə dii beṇ'ka' wdixjee daa goll Chioza' legake' kani'yi. ¿Nora-ka chakzi kwino'?

<sup>54</sup> Na'ch che' Jesúza' legake':

—Shele' nadaan chgwaa kwinn' balaan aga bi zakiin, shele'ka'. Per Xa'na', beena' nale nake' Chios chele, len' chgwee nad' balaan. <sup>55</sup> La'kzi bi nombia'lene', nad' nombi'ane'. Shele'ka' nia' bi nombi'ane', na' nak' ka le' beṇ' wxiye'. Per nombi'ane' na' chon' ka ne'. <sup>56</sup> Dii xoxzto'cho Abrahamama' bibaile' daa wṇezile' ile'ile' llaki zoa' yell-lioni. Na' ba ble'ile'n na' bibaile'.

<sup>57</sup> Na'ch beṇ'ka' chṇabia' beṇ' Israelka' che'gake'ne':

—Ni shiyon yiz biṇ' gakilo' na' nazo' zle'ilo' dii Abrahamama'.

<sup>58</sup> Na'ch che' Jesúza' legake':

—Dii li nia' le', kana' zi' galjte dii Abrahamama', bakz zoa' nad'.

<sup>59</sup> Na'ch lii wdooyotegake' yaja' nan wtakwgake'ne'n, per lii bkwash'tie' na' bizee gana' zoa yoodo'na'. Na' ni bi gokbe'gakile' bidie' ladje'ka' ziyaje'.

### Biyon Jesús'a to beñ' lçhol

**9** Ka zej Jesús'a na' ble'ile' to beñ' byo beñ' golje' nçholé'. <sup>2</sup> Na' beñ'ka' nakgake'ne' txen che'gake'ne':

—Maestro, çberaçhe golj beeni nçholé', lla? çAnçholé' ni çhe saaxya çhe'na', anti ni çhe saaxya çhe çaxñeekan', lla?

<sup>3</sup> Na' che' Jesús'a legake':

—Aga ni çhe saaxya çhe'nan' ni aga ni çhe saaxya çhe çaxñeekan', san kwençhe wli'lawi yel' wak çhe Chioza' lo yel' mban çhe'nan' nake' ka'. <sup>4</sup> Shlak ñaa ni de latj, chiyal' goncho xshin beena' bsel' nad'. Ça' wllin lla kat' kochno bi gak gon. <sup>5</sup> Shlak ni zoa' yell-lioni nak' beeni' çhe beñ' yell-lioni.

<sup>6</sup> Na' ka biyoll wna Jesús'a ka', na'ch blle' çeneena' lo yona' na' bene' lat' benj kon çeneena', na'ch wdebe'n jalao beñ' lçholá'. <sup>7</sup> Na' chi'ene':

—Wyaj jadib jalawo'na' cho'a tanga' daa le Siloé —na' Siloé zejín Beñ' Nselee.

Na'ch wyaj beñ' lçholá' jadib jalawe'na', na' ka bizee na', ba chle'ile'. <sup>8</sup> Na'ch beñ' wllil çhe'ka' na' beñ'ka' ble'gakile'ne' kana' nçholé' che'gake':

—çAga beenin chbi'e chñabe' mecha'?

<sup>9</sup> Na' ba'le' che':

—Awe, len'.

Na' zi ba'le' che':

—Aga len', per ka'tekzə nake'.

Na' beena' chi'e:

—Nad'kzan'.

<sup>10</sup> Na'ch wñabgakile'ne':

—çNakra gok ba chle'ilo'?

<sup>11</sup> Na' chi'e legake':

—To beñ' le Jesús bene' benja' na' wdebe'n jalaw'ki na'ch wne' nad': "Wyaj gana' lliá tanga' daa le Siloé na' jadib jalawo'na'." Na'ch wyaa na' ka biyiba'n, na' gok ble'id'.

<sup>12</sup> Na'ch che'gake'ne':

—çGarañ beena' no' ka'?

Na' chi'e legake':

—Bi ñezid'.

### Wñabyolli fariseoka' nak gok ble'i beñ' lçholá'

<sup>13</sup> Na'ch jwa'gake' beena' gok beñ' lçhol' lao fariseoka'. <sup>14</sup> Na' llana' wdeb Jesús'a' benja' jalao beena' kwençhe ble'ile' nakan lla chombaangake'. <sup>15</sup> Na'ch fariseoka' lekzka' wñabgakile'ne' nak gok chle'ile'. Na' chi'e legake':

—Beena' biyone' nad' wdebe' benja' jalaw'ki, na' ka biyiba'n gok ble'id'.

<sup>16</sup> Na'ch ba' fariseoka' che'gake':

—Aga Chiozan' bselee beena', la' chone' daa bi chiyal' goncho llani chombaangcho.

Na' zi ba'le' che'gake':

—çNakra gon to beñ' saaxya gone' yel' wak ka diiki chon beeni'?

Na'ch gokgake' çhoplə. <sup>17</sup> Na'ch dii yoblə gollgake' beena' gok beñ' lçhol':

—çShera li'? çBi ino' çhe beena' ben ka chle'ilo'?

Na' chi'e legake':

—Nad' nia' nake' to beñ' chyixjee daa che' Chioza'ne'.

<sup>18</sup> Na' beñ'ka' chñabia' beñ' Israelka' bi wyajle'gake' shi dii li gok beena' beñ' lçhol' na' ñaa ba chle'ile'. Na'ch goxgake' çaxñeena', <sup>19</sup> na' wñabgakile' legake':

—çAbeenin xiñlana', beena' nale nçholé' ka golje'? Na' çnakra gok ba chle'ile' ñaa, shka'?

<sup>20</sup> Na' çaxñeena' billiigake' xtillleeka':

—Ñezinto' beenin xiñnto'na' na' golje' nçholé'. <sup>21</sup> Per aga ñezinto' nak gok chle'ile' ñaa, ni bi ñezinto' non biyon le'. Li inabile', la' aga nake' bi'do' inacho bi gak iné' non biyon le'.

<sup>22</sup> Goll çaxñeena' ka' daa chllebgake' beñ'ka' chñabia' beñ' Israelka', la' ba bgaangake' dill' nottezə beñ' iné' Jesús'a' nake' Crístona' bi wlebgake'ne' gana' chdop chllaggake' choe'llwillgake' Chioza'. <sup>23</sup> Daan golltezə çaxñeena': "Li inabile', la' aga nake' bi'do' inacho bi gak iné' non biyon le'."

<sup>24</sup> Na'ch dii yoblə goxgake' beena' gok beñ' lçhol', che'gake'ne':

—Bzoashki Chioza' de tasçhiw shi leilo' choo dill' li, la' ñezinto' beena' biyon li' nake' beñ' saaxya.

<sup>25</sup> Na'ch golle' legake':

—Bi ñezid' shi nak beena' beñ' saaxya. Lete dii ñezid', golj' nçhol' na' ñaa ba chle'id'.

<sup>26</sup> Na'ch che'gake'ne':

—çBeran benile' li'? çNak bene' kwençhe chle'ilo'?

<sup>27</sup> Na' chi'e legake':

—Ba wniakz' le', na' bi chzi'le cho'a xtillaana'. çBiçhe cheenzile inia'n dii yoblə? çAnti lekzka' lenle ba cheenile gonlene' txen?

<sup>28</sup> Na'ch wñegake'ne' zibia', che'gake'ne':

—Lin' nako' beena' txen, san neto' Moisézan' naknto' txen. <sup>29</sup> Ñezinto' Chioza' wñie' Moiséza', san beena', ni bi ñezinto' ga zee.

<sup>30</sup> Na'ch beena' gok beñ' lçhol' chi'e legake':

—çNakkzan dii yibanicho daa bi ñezile ga za' beena' na' ba bene' ka chle'id'! <sup>31</sup> Ñezkzicho aga chzenag Chioza' çhe beñ' saaxyaka', san chzenague' çhe beñ'ka' choe'la'ogake'ne' na' chongake' daa chazlallee. <sup>32</sup> Dezd ka wxw wzil yell-lioni bin' yenicho shi zoa beñ' chak chone' ka chle'i to beñ' golje' nçholé'. <sup>33</sup> Shel' beeni bi nake' to beñ' bsel' Chioza', ni to yel' wak bi gak gone', shel'ka'.

<sup>34</sup> Na'ch che'gake'ne':

—Dezd ka goljo' nako' beñ' saaxya. çAna' chakilo' wli' wsedilo' neto'?

Na'ch bibejgake'ne' ladje'ka'.

### Beñ'ka' nçhol' nnti yichjlall'do'eka'

<sup>35</sup> Na' wñezi Jesús'a' bibej fariseoka' beena' gok beñ' lçhol' ladje'ka', na' ka billague'ne' na'ch chi'ene':

—çAchonlilalloo Beena' Bsel' Chioza' Yell-lioni?



<sup>36</sup> Na' beena' chi'ene':  
—Ben'do', wnashki nad' nora beena' kwenche gonli-  
lallaane'.

<sup>37</sup> Na' che' Jesúza'ne':

—Ba ble'kzilo'ne', na' lekzen' chshaljeno' naa.

<sup>38</sup> Na'ch lii bchek'te xibe'na' lao Jesúza', na' chi'ene':

—Chonjilallaa li', Xan' —na'ch be'laweene'.

<sup>39</sup> Na'ch che' Jesúza':

—Ba bid' yell-lioni kwenche wchogloa' che beñ' yell-  
lioni. Zaa kwenche beñ'ka' nak ka beñ' lchoj ile'gakile',  
na' beñ'ka' chakgakile' chle'gakile' yiyakgake' ka beñ'  
lchoj.

<sup>40</sup> Na'ch bal' fariseoka' lle' na', ka bengakile' chi'e ka',  
che'gake'ne':

—¿Achakilo' lennton' naknto' beñ' lchoj?

<sup>41</sup> Na'ch che' Jesúza' legake':

—Shel' nakle beñ' lchoj, aga bi xtol'le de, shel'ka'. Per  
daa nale chle'ile, daan de xtol'le.

### Jempl che leej che xil'ka'

**10** 'Dii li nia' le', beena' bi choo cho'a leej che xil'ka'  
san chiyiljallee cho'e gan yoblə, beenan' beñ'  
wbanna'. <sup>2</sup> San beena' choo cho'a leeja', len' ngoo lall'  
nee chape' legakb. <sup>3</sup> Na' beena' chap cho'a leej chebka'  
chsalje'n kwenche cho'e, na' xil'ka' lii chiyombia'tegakb  
shi'ena'. Na' cho'e le to tob na' chbeje' legakb loo leej  
chebka'. <sup>4</sup> Na' chde chbeje' yog' xil' che'na' na'ch  
chbialoe' laobka'. Na' xil'ka' xochi chjanogakb le' daa  
nombia'gakb shi'ena'. <sup>5</sup> Aga willjanogakb beñ' yoblə,  
san wxonjdogakib le' daa bi nombia'gakb shi'ena'.

<sup>6</sup> Bzoa Jesúza' jempli kwenche bzajniile' beñ'ka'. Per  
legake' aga wyajni'gakile' bin zeji daa golle' legake'.

### Jesúza' chapshi'e cho' ka beñ' chapshi'e xil' che'

<sup>7</sup> Na'ch chize' Jesúza' legake':

—Dii li nia' le': Nad' nak' ka cho'a leej che xil'ka'.

<sup>8</sup> Yog' beñ'ka' bid kana' bin' yid', nakgake' ka beñ'  
wban. Na' beñ'ka' nia' nakgake' xil' cha' bi bzenaggake'  
chegake'. <sup>9</sup> Nad' nak' ka cho'a leej che xil'ka', na' beena'  
gonjilallee nad' bi kwiajee, san gake' ka xilaa, bana'  
mbalaz choob na' chchejb cho'a leej cheba' na' chllelib  
dii cheej chaob.

<sup>10</sup> 'Ka nak wbanna', za'ze' kwenche kwane' na' wite'  
na' williajee legake'. San nad', zaa kwenche wi'a to yel'  
mban shao' chegake', na' soagake' mbalaz. <sup>11</sup> Nad' nak'  
ka to beñ' chapshi'e xil' che'na', beena' ax't chzani yel'  
mban che'na' ni che xil'do'ka' nape'. <sup>12</sup> San beena' chap  
xil'ka' ni che mba laxje'na', ka chle'ile' ba za' to ba zña  
gaob xil'ka', lii chchoonlall'tie'gakb na' chxonje' daa bi  
nakgakb ba che'. Na'ch chillin ba zñiana' chox'b xil'ka'  
na' chsheshlesb legakb. <sup>13</sup> Beena' chzi' laxje'na' chx-  
onjtezile' xil'ka', la' daa ikaaz laxje'nan' chibaile', na' bi  
chakile' legakb.

<sup>14</sup> 'Nad' nak' ka to beñ' chapshi' xil'do'. Na' beñ'ka'  
chonjilall'gake' nad' nakgake' ka xil'do' cha'. Nad' nom-  
bi'a legake' na' legake' lekzka' nombia'gake' nad'. <sup>15</sup> Ka  
chak che Xa'na' nombi'e nad', na' nad' nombi'ane',

ka'kzan nad' nombi'a legake', na' chzanid' yel' mban  
cha'ni ni chegake'. <sup>16</sup> Na' lekzka' zoach beñ' yoblə, beñ'  
zi' gonjilall' nad', na' lekzka' nakgake' ka xil' cha', per  
bin' gagake' txen xil' cha'ka'. Na' chiya' gaxgakee  
kwenche wzenaggake' cha', na' yog'gake' gagake'  
tozə, na' toz nad' gak lall' na'gake'.

<sup>17</sup> 'Chaki Xa'na' nad' daa chzanid' yel' mban cha'ni wit-  
gake' nad', na'tech yiban' sto shii. <sup>18</sup> Ni to kono yikaa  
yel' mban cha'ni, san kwinkza'n wi'an. Nap' yel' wñabia'  
kwenche wi'a yel' mban cha'ni witgake' nad', na' lekz-  
ka' nap' yel' wñabia' kwenche yiban'. La' kan' nllia  
Xa'na' bia' gon'.

<sup>19</sup> Na'ch dii yoblə beñ' Israelka' lle' na' gokgake' cho-  
plə ka bengakile' daa wne'. <sup>20</sup> Zane' che'gake':

—¿Bi'che chzenagzle che beena'? Dii xiwaan yo'e, na'  
chaktonte'n.

<sup>21</sup> Na' zi ba'le' che'gake':

—Aga choe' beeni dill' ka beñ' yoo dii xiw', la' aga bi  
yel' wak nap' dii xiwaa yiyonan to beñ' lchoj.

### Beñ'ka' chñabia' beñ' Israelka' bi bzenaggake' che Jesúza'

<sup>22</sup> Na' do kana', gol' lñina' Jerusalenna' daa  
chisa'lall'gake' llana' bengake' lall' na' Chioza' yoo-  
do'na', na' nak beo' zag. <sup>23</sup> Na' chda Jesúza' loo koridor  
che dii Salomónna' daa ze kwit yoodo'na'. <sup>24</sup> Na'  
beñ'ka' chñabia' beñ' Israelka' wye'chjyobgake'ne',  
che'gake'ne':

—¿Axt batrakzə yikwaso' yel' chakchoplall' chento'ni?  
Shi li'kzan Crístona', beena' chbeznto' wsel' Chioza', lla  
wnatega neto' kwenche inezinto'.

<sup>25</sup> Na' che' Jesúza' legake':

—Ba wniakz' le' kan', na' bi chajle'le. Yel' wakka'  
chon', chonlana' yel' wñabia' che Xa'na', na' chli'n nan  
len' bselee nad'. <sup>26</sup> Na' le', bi chajle'le daa bi nakle txen  
beñ'ka' nia' nakgake' xil' cha'. <sup>27</sup> Nombi'a beñ'ka' nia'  
nakgake' xil' cha', na' legake' chzenaggake' xtillaana'  
na' nogake' nad'. <sup>28</sup> Na' cho'a legake' yel' mban zejli  
kan', na' bi kwiaji'gake'. Na' ni to kono gak yibej le-  
gake' lo' ni'a na'ni. <sup>29</sup> Xa'na' ba bene' legake' lall' na'  
gapshiigakee, na' len' chñabia'che' lao nottez. Na' ni to  
kono gak yikwas legake' lo' ni'a neena'. <sup>30</sup> Ka Xa'na'kz,  
nad'.

<sup>31</sup> Na'ch beñ' Israelka' bizgoyogake' yaja' kwenche  
nan wtakwgake'n Jesúza'. <sup>32</sup> Na' chi'e legake':

—Dii zan dii wen ba ble'ile chonlen' yel' wak che  
Xa'na'. Na' znonnan' bi choolall'le daa cheenile' wtak-  
wle nad' yaja'?

<sup>33</sup> Na' beñ'ka' chñabia' beñ' Israelka' che'gake'ne':

—Aga ni che dii wenka' ba benon' cheeninto' wtak-  
wnto' li' yaja', san daa chonz kwino' ka Chiozan', la'  
beñ'zə li'.

<sup>34</sup> Na'ch che' Jesúza' legake':

—Ley chelena' nan, Chioza' ne': "Nad' wnia' le' nakle  
chios." <sup>35</sup> Cho'a Xtill' Chioza' toshiizi nakan ka wne', na'  
shi cho'en dill' bsi'e "chios" beñ'ka' wdxijee xtilleena',  
<sup>36</sup> ¿bi'che nazle nad' chñia' che Xacho Chioza' daa nia'  
nak' Xiine', len' len' wleje' nad' na' bselee nad' yell-lioni?

<sup>37</sup> Shi bi chon' ka chon Xa'na', aga wyajle'le cha'. <sup>38</sup> Na' shi chle'ile chon' ka diika' chon Xa'na', li shajle' che di-ika' chon', la'kzi bi cheenile shajle'le cha', kwenche inezyen'ile Xa'na' zoalene' nad' na' nad' zoalenee.

<sup>39</sup> Na'ch dii yoblə goklall'gake' gox'gake'ne' na' bene' gan bile' lawe'ka'.

<sup>40</sup> Na'ch bizyaj Jesúza' dii yoblə shlaa yao Jordánna' ja-zoe' latja' gana' bchoa Juanna' beñ'ka' nisa' kana'.

<sup>41</sup> Na' beñ' zan wyajgake' gana' zoe' na' che'gake':

—La'kzi bibi yel' wak bli' Juanna', yog' diika' wne' che beeni nakan dii li.

<sup>42</sup> Na' beñ' zan wyajle'gake' che Jesúza' na'.

### Wit Lázaroná'

**11** Yell Betániana' wzoa to beñ' bi shao' wlie' Lázaro, na' lekzka' na' wzoa beñ' zane'ka' Maríana' len Mártana'. <sup>2</sup> Maríana', beñ' zan Lázaroná', len' bwazje' set zixa' ni'a Xancho Jesúza' na' bisbillile'n yish' yichje'na'. <sup>3</sup> Na' chop bilte beñ' zan Lázaroná' bsel'gake' rson lao Jesúza' che'gake'ne':

—Xan', bi shao' beñ' zannto'ni, beeni nllaguilo'.

<sup>4</sup> Na' ka beni Jesúza' rsonna', chi'e:

—Bi guetile' yillwe'na', san chak che ka' kwenche sho' Chioza' balaan, na' lekzka' nad', nak' Xiine', sho'a balaan.

<sup>5</sup> La'kzi Jesúza' chakchgaile' Mártana', na' beñ' bile'na' na' Lázaroná', <sup>6</sup> ka benile' rson bi shao' Lázaroná', w-lachile' zi chop lla gana' zoe'. <sup>7</sup> Na' ka wde, chi'e beñ'ka' nakgake'ne' txen:

—Li sho' Judeana' sto shii.

<sup>8</sup> Na'ch beñ'ka' nakgake'ne' txen che'gake'ne':

—Maestro, kani batchgana' goklallii beñ' Israelka' lle' na' witgake' li' kon yaja'. ¿Ana' cheenilo' yizajo' na'?

<sup>9</sup> Na' che' Jesúza' legake':

—¿Aaga shllin goran' de beeni'na' shlla? Na' beena' chda tellalə aga willjachewee daa de beeni'na' yell-lioni. <sup>10</sup> San shi chde' wal-lə, willjachewee daa bi nla'.

<sup>11</sup> Na'tech golle' legake':

—Ba ches Lázaroná', beena' nllaguicho, na' sha' lljas-banee.

<sup>12</sup> Na'ch che' beñ'ka' nakgake'ne' txen:

—Xan', shi ba chese', wiyakshao'lall'kzile'.

<sup>13</sup> Jesúza' golle' ka' daa nezile' ba wit Lázaroná', na' legake' chakgakile' daa cheszen' golle' ka'. <sup>14</sup> Na'ch be'len Jesúza' legake' dill' ka to shajni'gakile', chi'e:

—Ba wit Lázaroná'. <sup>15</sup> Na' chibaid' bi wzoa', la' chyalljch gon' ka shajle'chle cha'. Li sho' shajcho gana' die'.

<sup>16</sup> Na'ch Tomáza', beena' che'gake' Dídimo †, chi'e beñ'ka' sto:

—Li sho'lene' kwenche lencho guetlenchone' shi witgake'ne'.

### Jesúza' chak yisbane' beñ' wetka'

<sup>17</sup> Na' ka bllingake' yella', na' che'gake'ne' ba gok tap lla bgash' Lázaroná'. <sup>18</sup> Na' Betániana' llian gaoza

†

Jerusalénna', ka do shon kilómetro nlaagakan. <sup>19</sup> Na' beñ' zan beñ' Israelka' lle' Jerusalénna' wyajgake' jex-enlall'gake' Mártana' len Maríana' daa wit beñ' zane'ka'. <sup>20</sup> Na' ka wnezi Mártana' ba zoa illin Jesúza', na'ch jatile'ne', per Maríana' bigaane' lille'ka'. <sup>21</sup> Na' ka blline' kwite'na', chi'ene':

—Xan', shel' zo' ni kana' wlen yillwe' che beñ' zan'na' bi wite', shel'ka'. <sup>22</sup> Na' naa la'kzi ba wite', nezid' gon Chioza' bittezə dii inabilo'ne'.

<sup>23</sup> Na' che' Jesúza'ne':

—Wiban beñ' zano'na'.

<sup>24</sup> Na'ch che' Mártana':

—Awe, nezid' wibane' kat' yiban beñ' wetka' llana' te che yell-lioni.

<sup>25</sup> Na' che' Jesúza'ne':

—Nad' chon' ka chiban beñ' wetka' na' nap' yel' mban dii bi te cheyin. Beena' chonlilallee nad', la'kzi ba wite', wibanchkze'. <sup>26</sup> Na' yog' beñ'ka' mban na' chonlilall'gake' nad' bi guetgake' toshiizi. ¿Achajli'o dga nia' li'?

<sup>27</sup> Na' che' Mártana'ne':

—Awe, Xan', chajli'a lin' nako' Crístoná', na' lin' Xiin Chioza', beena' llia bia' yid yell-lioni.

### Wchell Jesúza' gana' bkwash'gake' Lázaroná'

<sup>28</sup> Na' biyoll wna Mártana' ka', na'ch ziyaje' zjanie' beñ' bile' Maríana', na' chi'ene' xochizi:

—Ba bid Maestrona' chnie' li'.

<sup>29</sup> Na' kon ka golle' Maríana' ka', lii wzolla'tie' jawie' Jesúza'. <sup>30</sup> Bilan' sho' Jesúza' yella', ni zetie' gana' jatil' Mártana'ne'. <sup>31</sup> Na' beñ' Israelka', beñ'ka' chonxen-lall'gake' Maríana' lille'na', ka ble'gakile' wzollee na' zej-doe', na'ch zjanogake'ne' chakgakile' lljchelle' cho'a banan'.

<sup>32</sup> Na' ka bllin Maríana' kwit Jesúza', lii bchek'te xibe'na' lawe'na' chi'ene':

—Xan', shel' zoasho' ni, bi wit beñ' zan'na', shel'ka'.

<sup>33</sup> Na' ka ble'i Jesúza' chbell Maríana', na' ka'kzə beñ'ka' zejlengake'ne', na' to dii wal inlleb gokile'.

<sup>34</sup> Na' chi'e legake':

—¿Gara jakwash'lene'?

Na'ch che'gake'ne':

—Sho' lljawiacho gana' die', Xan'.

<sup>35</sup> Na' wchell Jesúza'. <sup>36</sup> Na'ch che' lljwell beñ' Israelka' lle' na':

—Li wwia ka gokchgaile'ne'.

<sup>37</sup> Na'ch ba'le' che'gake':

—Beeni bene' ka ble'i beñ' lcho'la', ¿Aaga zak bisle' Lázaroná', na' bi wite' shel'ka', lla?

### Bisban Jesúza' Lázaroná' ladj beñ' wetka'

<sup>38</sup> Na'ch Jesúza' wizakile' dii wal ka bllingake' cho'a bana'. Na' bana' nakan to blej, na' chi' to yaj nkwasha'n cho'ayinna'. <sup>39</sup> Na'ch che' Jesúza':

—Li yikwas yaja' ka'lə.

Na' Mártana', beñ' zan beñ' weta', chi'ene':

—Xan', ba chl'a' beena' zban, la' ba gok tap lla wite'.

<sup>40</sup> Na' che' Jesúza'ne':

—¿Aaga ba wnia' li' shi shajli'o, na' ile'ilo' ye'l' wak choo ye'l' wak xen che Chioza'?

<sup>41</sup> Na'ch bikwasgake' yaja' cho'a bana' gana' die'. Na' blis jalao Jesúza' yabana', na' chi'e:

—Xa, choxkeno' ba bzenago' cha'. <sup>42</sup> Nezid' toshiizi chzenago' cha', per chña' li' kwenche shajle' beñ'ki lle' ni nan lin' bseloo nad'.

<sup>43</sup> Na' ka biyoll wne' ka', na'ch wñie' zillj, chi'e:

—¿Lázaro, bichej na'!

<sup>44</sup> Na' lii bichejte Lázaroná' ndob ñi'a neena' lech'ka', na' cho'alawe'na' ndoban to lech'. Na'ch che' Jesúza' le-gake':

—¿I yizeshe' lechaa na' li yisane' yiyaje'.

### Wloogake' xnezin gox'gake' Jesúza'

(Mt 26:1-5; Mr. 14:1-2; Lc 22:1-2)

<sup>45</sup> Na' zan beñ' Israelka', beñ'ka' jen Maríana' txen daa wit beñ' zane'na', ble'gakile' ka ben Jesúza' na' benlilall'gake'ne'. <sup>46</sup> Per bale' wyaj lao fariseoka' na' jell-gake' legake' ka ben Jesúza'. <sup>47</sup> Na'ch bñozka' chñabia' na' fariseoka' bitopgake' yog' beñ'ka' chñabia' beñ' Israelka', na' che'gake':

—¿Nakraz ka gonchon, Ila? La' zan ye'l' wak chli' beeni. <sup>48</sup> Na' shi inacho jwayi beena', yog'z beñ' gonlilall'gake'ne' na'ch yid beñ' Rómaka' na' wlliyi'gake' yoodo' chechoni len yell chechoni.

<sup>49</sup> Na' len to beñ' le' Caifás, nake' bñoz choo bñoz xen ka lo yiza'. Na' chi'e legake':

—Bi ñezzen, <sup>50</sup> ni bi chakbe'ile wenlan toz beñ' guet ni che beñ' wlall chechoka', aga ka daa kwiayi' doxen lallchoni.

<sup>51</sup> Na' aga kon ka wnaz Caifáza' kan', san daa nake' bñoz choo bñoz xen lo yizan', ben Chioza' ka bi'e dill' guet Jesúza' ni che beñ' Israelka'. <sup>52</sup> Na' aga ni che toz beñ' Israelkan' guet Jesúza', san lekzka' ni che yog' beñ'ka' ba wleje' gaggake' xiine' doxen yell-lionin, kwenche gaggake' toz. <sup>53</sup> Na' daa goll Caifáza' ka', lo llana' wzolo bengake' toz dill' kwenche witgake' Jesúza'.

<sup>54</sup> Na' daa wzolo chongake' ka', aga wdatekch Jesúza' ladj beñ' Israelka', san wzee wyaje' to yell dii le Efraín, daa lliá gaozə latja' gana' bibi chashj chleb, na' na'z wzoe' len beñ'ka' nakgake'ne' txen.

<sup>55</sup> Na' ba zoa gao gal' Iní Paskw che beñ' Israelka', na' beñ' zan beñ' yell yoblə wyajgake' Jerusalénna' ka zi' gal' Inína' kwenche yixi yiyechgake' ka nllia leya' bia'.

<sup>56</sup> Na' chdagake' chiyiljgake' Jesúza', na' shlak lle'gake' lesh' chyoodo'na', chñabi ljwelle':

—¿Beraka chakile? ¿Awide' Inína', Ila?

<sup>57</sup> Na' bñozka' chñabia' len fariseoka' bengake' mandad shi no ñezi ga chda Jesúza' do na' lljellgake' le-gake' ka' kwenche gox'gake'ne'.

### Bwazj Maríana' set zixa' ñi'a Jesúza'

(Mt 26:6-13; Mr. 14:3-9)

**12** Zi' xop Ila gal' Iní Paskwa' wyaj Jesúza' yell Betániana', gana' zoa Lázaroná', beena' bisbane' ladj

beñ' wetka'. <sup>2</sup> Na' beñ'ka' lle' Betániana' bsini'agake' to xshe' che Jesúza', na' Mártana' bdie' ye'l' wawa'. Na' Lázaroná' wche'lene' Jesúza' cho'a mesa' na' nochlə beñ'ka' wdaolengake'ne'. <sup>3</sup> Na'ch beñ' Maríana' ka do gashj litr set zixa' daa le nardo, daa le zak'chga, na' bwazje'n ñi'a Jesúza', na' tech bisbillile'n yish' yichje'na'. Na' doxen loo yoona' wche' shii set zixa'. <sup>4</sup> Na' len Jud Scariota', beena' nak Jesúza' txen, beena' gone'ne' lo na' beñ' malka'. Na' golle':

<sup>5</sup> —¿Berache bi betee set zixa' na' wi'e mecha' gakle-nan beñ' yesh'ka', Ila? Len la' ka che twiz laxj beñaan zakaan.

<sup>6</sup> Juda' wne' ka' aga inacho daa chiyeshile' beñ' yesh'kan', san daa nake' to beñ' wbanan. La' len' gok lall' nee xmeche'ka' na' chbane' lat' wejan. <sup>7</sup> Na'ch che' Jesúza'ne':

—Bi wllono' gone' ka'. Ba nzoashao'kze' daa kwenche wgone'n llin kat'ka' kwkash'gake' nad'. <sup>8</sup> Ka nak beñ' yesh'ka', toshiizin soakz beñ'ka' ladjleni, san nad', aga toshiizin soalen' le'.

### Wloogake' xnezin witgake' Lázaroná'

<sup>9</sup> Na' zan beñ' Israelka' wñezgakile' zoa Jesúza' yell Betániana' na' wyajgake' na'. Per aga wyajgake' yella' ni che toz Jesúzan', san lekzka' kwenche ile'gakile' Lázaroná', beena' bisban Jesúza' ladj beñ' wetka'.

<sup>10</sup> Na'ch bñozka' chñabia' bengake' toz dill' witgake' len Lázaroná'. <sup>11</sup> La' daa biban Lázaroná' ladj beñ' wetka', zan beñ' Israelka' benlilall'gake' Jesúza' na' bich bzenaggake' che bñozka'.

### Ka biyoo Jesúza' Jerusalénna'

(Mt. 21:1-11; Mr. 11:1-11; Lc. 19:28-40)

<sup>12</sup> Na' betiyo beñ' be beñ' zil, beñ'ka' lle' yell Jerusalénna' daa chal' Iní Paskwa', wñezgakile' ba ngoo Jesúza' nez yilline' yella'. <sup>13</sup> Na'ch wyajgake' jlezgake'ne' nox'gake' zinka', na' choe'la'ogake'ne', nagake':

—¿Li we'la'o Chioza'! ¿Gonleeyshga Xancho Chioza' beeni ba bselee inabi'e cho' beñ' Israel!

<sup>14</sup> Na' billesi Jesúza' to burr chbando' na' wllie'b. Na' gok kon ka na Cho'a Xtill' Chioza', gana' na:

<sup>15</sup> Le' beñ' yell Jerusalén, bi illeble.

Li wwia, ni ba za' beena' inabia' le' na' llie' to burr chbando'.

<sup>16</sup> Na' beñ'ka' nakgake'ne' txen aga wyajni'gakile' diiki ka lo gora'. Ka bibanch Jesúza' ladj beñ' wetka', kana'ch gokbe'gakile' nan Cho'a Xtill' Chioza' daa bzej beñ'ka' kani'yi choe'n dill' che', na' che diika' bengakile'ne'.

<sup>17</sup> Na' beñ'ka' lle'len Jesúza' kana' bisbane' Lázaroná' ladj beñ' wetka', beñ'ka' bengakile' biñie'ne' kwenche bicheje' loo bana', legaken' be'gake' dill' daa bene'.

<sup>18</sup> Daan beñ' zan jatilgake' Jesúza' daa bengakile' ka nak ye'l' waka' bene'. <sup>19</sup> Na'ch fariseoka' che' ljwellgake':

—Li wwia ka ba chak, bibi de goncho. Li wwia, yog'lozə beñ' ba nogake' le'.

### Baḷ beṅ' griegoka' chiyiljgake' Jesúza'

<sup>20</sup> Ladj beṅ'ka' wyaj Ḥina' Jerusalénna' je'la'ogake' Chioza' na' len baḷ beṅ' griego. <sup>21</sup> Na' beṅ'ki jabig'gake' gana' ze Felípena', beena' nak beṅ' yell Betsaida daa lliá yell-lío daa mbani Galileana', na' che'gake'ne':

—Beṅ'do', cheeninto' we'lennto' Jesúza' dill'.

<sup>22</sup> Na' Felípena' jelle' Andréza' ka', na' ḥoptie' wyaj-gake' jellgake' Jesúza' ka'. <sup>23</sup> Na'ch che' Jesúza' legake':

—Ba bllin lla, nad', Beṅ' Bsel' Chioza' Yell-lioni, sho'a balaan xenna'. <sup>24</sup> Dii ḷi nia' le', shi to biṅ ḥe trígona' bi igasha'n ḷoo yona', ka'chokzə kwe'n. Per shi igasha'n ḷoo yona', na' yila'n na' yiyakan dii zan wal. <sup>25</sup> Beena' ze wṅeyi ḥe yell' mban ḥe'na' yell-lioni, ḷen' kwiayee. San beena' ḥzani yell' mban ḥe'na' bittetzə dii gak ḥe', beenan' gat' yell' mban ḥe' zejli kaṅi. <sup>26</sup> Nottezə beṅ' cheenile' gone' xshin'na' chiyal' gone' nad' txen. Na' gana' soa', na'kzə soe'. Na' beena' gon xshin'na', Ḥa'na' kwee ḷe' balaan.

### Wdixjee Jesúza' witgake'ne'

<sup>27</sup> 'Naatek chakyeshid' dii wal inlleb. ḶAwṅabid' Ḥa'na' yisle' nad' lawi dga wtiḷ', lla? Bi gak gon' ka', ḷa' ni ḥheyi dgayen'kzan bid'. <sup>28</sup> Na'ch golle':

—Ḥa, beshki ka shoo balaan.

Na'ch wṅe Chioza' yabana', chi'e:

—Ba ben' kwenḥe wyo'a balaan, na' ṅaa gon' ka sho'a balaan sto shii.

<sup>29</sup> Na' beṅ'ka' lle' na' bengakile' shii Chioza', na' baḷe' wṅagake' wziwa'zan wṅe. Na' zi baḷe' wna to anjlan' ba wṅie' ḷe'.

<sup>30</sup> Na'ch Jesúza' chi'e legake':

—Aga ni ḥa' nadaan wṅe Chioza', san ni ḥe len'.

<sup>31</sup> Na' ba bllin lla gone' yell' josḥis ḥe yog' beṅ' lle' yell-lioni, na' ṅaa kweje' dii xiwaa daa ḥṅabia' yell-lioni. <sup>32</sup> Na' kat'ka' wḷisgake' yaga' cha'lə gana' nda'gake' nad', kanan' gat' latj gonḷilall' nottezə beṅ' nad'.

<sup>33</sup> Na' daa wne' ka', bzajniile' legake' nakan guete'.

<sup>34</sup> Na' beṅ'ka' lle' na' che'gake'ne':

—Ba beninto' chlabgake' Cho'a Xtill' Chioza' gana' nan Crístona', beena' wsel' Chioza' inabi'e, soe' zejli kaṅi. Na' Ḷbiḥe nazo' Beena' Bsel' Chioza' Yell-lioni wḷisgake'ne' cha'lə wwia beṅ' ḷe' lee yaga' gana' dee? ḶNora Beena' Bsel' Chioza' Yell-lioni no' ka'?

<sup>35</sup> Na'ch che' Jesúza' legake':

—Nad' nak' beeni' ḥe beṅ' yell-lioni, per zi shlollch-ga soalen' le'. ḷi sho' lo nez ḷina' shlak ni de beeni'na' kwenḥe bi gak ḥele ka chak ḥe to beṅ' ḥaḷile' kat' ngwee' nez. Ḷa' beena' ḥda' gana' shḥoḷ bi ṅezile' galan zeje'. <sup>36</sup> Ḷi gonḷilall' nad' ṅaa shlak ni zoalen' le' kwenḥe sho' beeni' ḥa'na' ḷoo yichjllall'do'lena'.

Biyoḷl wna Jesúza' ka' na'ch bizee jakwashi'le' legake'.

### Beṅ' zan beṅ' Israelka' bi wyajle'gake' ḥe Jesúza'

<sup>37</sup> Ḷa'kzi beṅ' Israelka' ble'gakile' yell' wak zan daa ben Jesúza', zangake' bi benḷilall'gake'ne'. <sup>38</sup> Na' daa ben-

gake' ka', gok ka wna dii Isaíaza', beena' wdixjee daa goll Chioza'ne' kani'yi, daa wne':

Ḷan' Ḷazoa beṅ' ba wyajli'e dillaa ḥyixje'nto'?

Na' Ḷazoa beṅ' ba gokbe'ile' bli'o yell' wak ḥo'na'?

<sup>39</sup> Na' bi wyajle'gake', Ḷa' Chioza' bene' ḥegake' ka na sto dii bzej dii Isaíaza':

<sup>40</sup> Bene' legake' ka beṅ' Ḷḥoḷ na' lall'do' ḥeḥ

kwenḥe bi gakbe'gakile' bi zejin diika' ḥle'gakile',

ni bi shajni'gakile' diika' chengakile',

kwenḥe ki yiyaj yilengakile' na' yiyone' legake' beṅ' wen.

<sup>41</sup> Wna Isaíaza' ka' daa ble'ile' ka nak balaan xen wala' nap Jesúza', na' bi'e dill' ḥe'.

<sup>42</sup> Na' Ḷa'kzi ka', beṅ' zan beṅ' Israelka' lente no beṅ' wṅabia' ḥe'ka' benḷilall'gake' Jesúza'. Per bi be'gake'n dill' daa blleb'gake' bich wleb fariseoka' legake' gana' ḥdop ḥllaggake' choe'ḷwillgake' Chioza', <sup>43</sup> Ḷa' wyoolall'ḥgake' inā beṅ' nakgake' beṅ' wen aga ka daa inā Chioza' nakgake' beṅ' wen.

### Cho'a xtill' Jesúza' nakan dii llialo

<sup>44</sup> Na'ch wṅe Jesúza' zillj chi'e:

—Nottez beṅ' chonḷilall' nad', aga toz' nadaan chonḷilallee, san len beena' bsel' nadaan chonḷilallee. <sup>45</sup> Na' nottezə beṅ' ḥle'ile' nad', lekzka' ḥle'ile' beena' bsel' nad'. <sup>46</sup> Zaa yell-lioni kwenḥe beena' gonḷilallee nad' te' lo beeni' ḥa'na' na' bich soe' lo yell' ḥoḷa'. <sup>47</sup> Na' shi no beṅ' chenile' cho'a xtilaani na' bi chone' ka nia', aga nadaan wḥogloa' ḥe', Ḷa' aga zaa kwenḥe wḥogloa' ḥe' beṅ' yell-lionin, san zaa kwenḥe yislagakee na' bi kwiayi'gake'. <sup>48</sup> Beena' bi cheenile' gonḷilallee nad' na' bi chzenague' ḥa', de daa gawan xya ḥe'. Cho'a xtil-laana' daa ba bi'a, lennan' gawan xya ḥe' kat' illin lla te ḥe yell-lioni. <sup>49</sup> Ḷa' dillaa daa ba bi'a aga to bia'lozan' wnia' ka'. Ḷa'na', beena' bsel' nad', ḷen' nllie' bia' bin chiyal' inā na' bin chiyal' wli' wsedid' beṅ'. <sup>50</sup> Na' ṅezid' dill' daa nllia Ḷa'na' bia' inā nsa'n yell' mban zejli kaṅi. Daan, yog'ḷoḷ diika' nia', nakan kon ka wna Ḷa'na' nad'.

### Wdib Jesúza' ṅi'a beṅ'ka' nakgake'ne' txen

**13** Ka ba zoa gaḷ' Ḷni Paskwa', na' ṅezi Jesúza' ba zoa gao yizee yell-lioni kwenḥe yiyaje' kwit Ḷe'na'. Na' chakḥgaile' beṅ'ka' nonḷilall'gake'ne' yell-lioni, na' ka' gokile' legake' axt ga zeelo.

<sup>2</sup> Na' ka chaogake' xshe'na', ba wloolə dii xiwaa ḷoo yichjllall'do' Jud Scariota', xiṅ Simónna', gone' Jesúza' lo na' beṅ' malka'. <sup>3</sup> Na' ṅezi Jesúza' Ḷe'na' bene' lall' nee yog' dii de, na' ṅezile' wzee gana' zoa Chioza' na' kwite'na'kzə yilline' dii yoblə. <sup>4</sup> Na' lo zej chaogake' xshe'na', wzolla' Jesúza' na' bkwise' xe' dii toṅa' ka'lə, na' bḥeḷe' to lech' Ḷsineena'. <sup>5</sup> Na'ch wdee nisa' to ḷoo sha' na' wzoloe' ḥyibe' ṅi'a to to beṅ'ka' nakgake'ne' txen, na' bisbillile'n lechaa ṅḥeje' Ḷsineena'.

<sup>6</sup> Na' ka bidol' ḥhibe' ṅi'a Simón Pédróna', na'ch che' Pédróna'ne':

—Ḷan', Ḷali'lə ḥhibzo' ṅi'ani?

<sup>7</sup> Na' che' Jesúza'ne':

—Aga chajniilo' dga chon' n̄aa, per techl̄a shajniilo'n.

<sup>8</sup> Na'ch che' Pédrona'ne':

—Bat wi'a latj̄ çhibo' n̄i'ani.

Na'ch che' Jesúza'ne':

—Shi bi çhib' n̄i'ona', bich gako' nad' txen.

<sup>9</sup> Na'ch chize' Pédrona'ne':

—Shi kan' nakan, X̄an', aga toz n̄i'ani çhibo' san len̄ yich̄ji na' na'ki.

<sup>10</sup> Na'ch che' Jesúza'ne':

—Beena' nosh' nazje', toz n̄i'enan' chiyał' shech, la' ba nechkz kwerp çhe'na'. Ka'kzan le', ba nxi nyechle, la'kzi aga yog'le.

<sup>11</sup> Daa ñezi Jesúza' non gon le' lo na' beñ' malka', daan chi'e legake': "Aga yog'le ba nxi nyech."

<sup>12</sup> Na' ka biyoll wdibe' n̄i'eka', na'ch biyakwe' xe' dii toña' na' jachi'e cho'a mesa' sto shii. Na' chi'e legake':

—¿Añezile bi zejın dga ba ben'? <sup>13</sup> Le' nale nad' Maestro na' X̄an', na' lekzile, la' kan' nakan. <sup>14</sup> Na' shi nad', naktia' Maestro chele na' X̄anle, ba wdib' n̄i'alena', lekzka' le' chiyał' çhib n̄i'a ljwell-le. <sup>15</sup> Ba ben' dga kwençhe bliid' le' kan' chiyał' gon çhe ljwell-le. <sup>16</sup> Dii li nia' le', aga zak'chi to mos ka xane'na', na' to beñ' zej mandad aga zak'che' ka beena' bseleene'. <sup>17</sup> Shi chajniile diiki ba wnia' na' gonlen, na' soale mbalaz.

<sup>18</sup> Na' aga yog'len nia' ka'. Ñezid' nolen ba wlej' kwençhe nonlilall'le nad'. Na' chiyał' gak ka na Cho'a Xtill' Chioza', gana' na: "Beena' chaolentie' nad' txen ba chiyeçhje' nad' gone' mal çha'." <sup>19</sup> Naa nia' le' dga zi' gak, kwençhe kat' ba chakan shajle'le nak' beena' ba wnia' nak'. <sup>20</sup> Na' dii li nia' le', beena' wlebe' notteza beena' wsejaa, nad'kzan chlebe'. Na' beena' chlebe' nad', lenkz beena' bsel' nadaan chlebe'.

**Wdixjee Jesúza' ka gon Juda' wdie'ne' lo na' beñ' malka'**  
(Mt 26:20-25; Mr. 14:17-21; Lc 22:21-23)

<sup>21</sup> Na' biyoll wna Jesúza' ka', le gokyeshii loo yich̄jlall'do'ena', na' bi'e dill' kwasloł, chi'e:

—Dii li nia' le', tole gonle nad' lo na' beñ' malka'.

<sup>22</sup> Na'ch beñ'ka' nakgake'ne' txen chwia ljwellgake' chakgakile' nogaken' chi'e ka'. <sup>23</sup> Na' to beena' nak Jesúza' txen, beena' chakchgaile', chi'e kwite'na'. <sup>24</sup> Na' Simón Pédrona' bene' señ kwençhe in̄abi beena' chi' kwit Jesúza' noen' chi'e ka'. <sup>25</sup> Na'ch jabig'ch beena' gaoch kwit Jesúza' na' wñabile'ne', chi'ene':

—¿Noran gon ka', X̄an'?

<sup>26</sup> Na'ch che' Jesúza'ne':

—Wleejch' lat' yetxtili lo'i dga yoll loo yeeni, na' kon beena' wi'an, len' gon ka'.

Na'ch bleeje' lat' yetxtila' na' bi'en Jud Scariota', xiñ beena' le Simón. <sup>27</sup> Na' kon ka biyoll be' Jesúza' Juda' yetxtila', lii wyoote Satanáza' loo yich̄jlall'do'ena'. Na'ch che' Jesúza'ne':

—Daa ba ngoo yich̄jo' gono', bentegan.

<sup>28</sup> Na' ni to beñ'ka' chaolengake'ne' bi wyajni'gakile' biçhe gollze'ne' ka'. <sup>29</sup> Bale' gokgakile' goll Jesúza' Juda' l̄jxi'e bi dii chyall̄gakile' che xshe' che'ka', wa wi'e lat' mech beñ' yesh'ka'. La' len' nak lall' nee xmeche'ka'.

<sup>30</sup> Na' ka wde wdao Juda' yetxtila' daa be' Jesúza'ne', lii wza'tie'. Na' ba goł ka wzee.

**Dii koba' daa nllia Chioza' bia'**

<sup>31</sup> Na' ka wde wza' Juda', na'ch che' Jesúza':

—Ba bllin lla sho'a balaan, nad', Beñ' Bsel' Chioza' Yell-lioni, na' lekzka' dga gon', gonan ka sho' Chioza' balaan. <sup>32</sup> Na' daa gon' ka sho' Chioza' balaan, lekzka' kwın Chioza' gone' kwençhe nad', Beñ' Bsel' Chioza' Yell-lioni, sho'a balaan, na' lii gontie'n. <sup>33</sup> Le' xiındawaa, zi shlollchga zoalen' le'. Na' yiyiljle nad', na' chiznia' le' ka gosh' beñ'ka' chñabia' beñ' Israelka': Gana' yiyaa, bi gak sa'le. <sup>34</sup> Na' to dii kob chllia' bia' gonle n̄aa: Li gaki ljwell-le. Ka chakid' le', kan' chiyał' gaki ljwell-le. <sup>35</sup> Shi gaki ljwell-le, na'ch in̄ezi yog'lołte beñ' nakle nad' txen.

**Wdixjee Jesúza' bi wçheb Pédrona' shi nombi'ene'**

(Mt. 26:31-35; Mr. 14:27-31; Lc. 22:31-34)

<sup>36</sup> Na'ch Simón Pédrona' wñabile' Jesúza', chi'ene':

—X̄an', ¿garan yiyajo'?

Na' che' Jesúza'ne':

—Aga wak soo gana' yiyaa n̄aa, per wllin lla soo.

<sup>37</sup> Na'ch che' Pédrona'ne':

—X̄an', ¿beraçhe bi gak sa'len' li' n̄aa? Ba nçhoglallaa guet' ni çho'.

<sup>38</sup> Na' Jesúza' chi'ene':

—¿Achakilo' ba nçhoglalloo gueto' ni çha'? Dii li nia' li', shon̄ shii bi wçhebo' shi nombi'o nad' ka zi' kwell-l̄a shikwteza'.

**Jesúza' nake' neza' chillin kwit X̄e' Chioza'**

**14** Bi gakshejlall'le. Li gonlilall' Chioza' na' lekzka' li gonlilall' nad'. <sup>2</sup> Lill xlatj̄ X̄a'na' dii xen latj̄ de.

Sheł' bi nakan ka', ba wnia' le' ka', sheł'ka'. Na' n̄aa yiyaa l̄jayenshawaa gana' yidzoale. <sup>3</sup> Na' kat' ba ben-shawaan, na'ch yiyed' yidxia' le' kwençhe lenle soale gana' zoa'. <sup>4</sup> Na' ba nombia'le neza' daa chillin gana' ll-jazoa'.

<sup>5</sup> Na'ch Tomáza' chi'ene':

—X̄an', bi ñezinto' gan yiyajo'. ¿Nakran gonnto' yil-lelinto' neza'?

<sup>6</sup> Na' che' Jesúza'ne':

—Nadaan' neza' daa chillin lao Chioza', na' chli'a daa nak dii li, na' cho'a beñ' yeł' mban zejli kan̄i. Aga no yillin kwit X̄a'na' shi bi gonlilallee nad'. <sup>7</sup> Daa ba nombia'le nad', lenkz X̄a'nan' ba nombia'le. Na' n̄aa ba nombia'lene' na' ba ble'ilene'.

<sup>8</sup> Na'ch che' Felípena'ne':

—X̄an', ben ka ile'into' X̄o'na' na' x̄enlall'nto'.

<sup>9</sup> Na'ch billii Jesúza' xtillena', chi'e:

—Felipe, ba wlla zoalen' le', ¿ana' bikzan' gom-bia'yenoo nad'? Beena' ba ble'ile' nad' lekzka' ba ble'ile' X̄a'na'. ¿Beraçhe chñabzo' gon' ka ile'ilene'? <sup>10</sup> ¿Abi chajli'o zoalen' X̄a'na' nad' na' nad' zoalenee? Diika' nia' le' aga to bia'lozan' chñia'n, san daa cheeni kwın X̄a'na', beena' zoalene' nad', lennan' cho'a dill' na' lennan' chon'. <sup>11</sup> Li shajle' daa nia' zoalen' X̄a'na' nad', na' nad'

zoalen' le'. Na' shi bi chajle'le dga nia', la'ch' li shajle' cha' ni che yel' wakki chle'ile' chon'. <sup>12</sup> Dii li nia' le', nottez ben' chonlilallee nad', gone' ka diika' chon'. Na' dii zak'techi gone' aga ka diika' chon', daa yiyaa kwit Xa'na'. <sup>13</sup> Na' gon' bittez daa inabile Xa'na' daa nakle nad' txen kwenche sho'e balaan ni cha'. <sup>14</sup> Nad' gon' bittez daa inabile daa nakle nad' txen.

### Bcheb Jesúsza' wselee Espíritu Sántona'

<sup>15</sup> Shi chakile nad', li gon diika' nllia' bia' gonle. <sup>16</sup> Na' inabid' Xa'na' wselee sto ben' gaklene' le' na' soalene' le' toshiizi. <sup>17</sup> Len' Espíritu Sántona', beena' chli' daa nak dii li. Na' ben' yell-lioki aga wak wlebgake'ne', la' bi chle'gakile'ne' ni bi nombia'gake'ne'. San le', ba nombia'lene' daa zoalene' le' na' soe' loo yichjall'do'lena'. <sup>18</sup> Aga wikwaan' le' ka bi' wizeb, san wiyedch' soalen' le'. <sup>19</sup> Aga chllach bich ile'i ben' yell-lioni nad', san le' wle'chzkzile nad'. Na' daa mban' toshiizi, lekzka' le' toshiizi ibanle. <sup>20</sup> Kat' illin llana' nia' ka', na' gakbe'ile zoalen' Xa'na', na' le' zoalene' nad' na' nad' zoalen' le'. <sup>21</sup> Nottez ben' chzenague' daa nllia' bia' na' chone' ka nan, beenan' chakile' nad'. Na' beena' chakile' nad', lekzka' gaki Xa'na'ne', na' nad' lekzka' gakidee na' gon' kwenche gombia'che' nad'.

<sup>22</sup> Na' Júdaza' (beena' sto, aga Jud Scariota',) chi'ene': —Xan', ¿berache to neto'z gonzo' ka gombia'chnto' li' na' bi len ben' yell-lioki, ben'ka' bi chonlilall'gake' li'?

<sup>23</sup> Na' billii Jesúsza' xtilleena':

—Beena' chakile' nad', wzoe' xtillaa, na' Xa'na' gakile'ne', na' nad' kon Xa'na' yidsoalennto'ne'. <sup>24</sup> Na' beena' bi chakile' nad', bi chzoe' xtillaa. Na' diika' chli' chsedid' aga dii chyiljall'zaan, san Xa'na', beena' bsel' nad', chzajniile'n nad'.

<sup>25</sup> 'Yog' diiki chole'len' le' dill' naa shlak ni zoalen' le'.

<sup>26</sup> Na' kat' bich soa' len le', Espíritu Sántona', beena' wsel' Xa'na', gaklene' le' na' wzajniile' le' yog' dii chiya' inezile, na' gone' ka lljadinile' yog' diika' ba wnia' le'.

<sup>27</sup> 'Yel' mbalaza' chkwaan'lana'n le'. Na' yel' mbalaz cha'na' chon' le' bi nakan ka yel' mbalaz che ben' yell-lioka'. Bi gakshejlall'le, ni bi gall illeble. <sup>28</sup> Ba benzkzile nia' yiyaa gana' zoa Xa'na' na' lekzka' wiyedchkz' yidzoalen' le'. Na' shi chakile' nad', chiya' yibaile daa yiyaa gana' zoa Xa'na', la' zak'che' aga ka nad'. <sup>29</sup> Na' ba nia' le' diiki zi' gak kwenche kat' gakan shajle'le.

<sup>30</sup> 'Na' bich bitek dill' we'lench' le' naa, la' ba za' dii xi-waa, daa chnabia' yell-lioni. Per aga wak inabia'n nad'.

<sup>31</sup> La' chon' kon ka nllia Xa'na' bia' gon' kwenche inezi ben' yell-lioki chakid' Xa'na'. Li yizolla'. Li yidó.

### Jesúza' chzaklebi kwine' to yag uva

**15** 'Nad' nak' ka yag uva daa nak dowalj, na' Xa'na' nake' ka beena' chaz chaan'an. <sup>2</sup> Na' yog' lo' xoz' xka'inna' daa bi chbia, chchogue'n. Na' diika' chbia, chonshao'che'n kwenche zizikli kwian. <sup>3</sup> Na' le', nakle ka xoz' xka'inna' daa chbia, daa bzenagle ka nak dill'ka' be'len' le'. <sup>4</sup> Li soatezi soa gonle nad' txen, na' ka'kz nad' soatezi soalen' le'. Ka xoz' xka'inna', shi bi ndi' n-

lagan xyaguinna' aga bi chbian, ka'kzan le' shi bi soatezi soale gonle nad' txen bi gak gonle daa chibaid'.

<sup>5</sup> 'Nad' nak' ka to yag uva, na' le' nakle ka xoz' xka'inna'. Shi le' soatezi soale gonle nad' txen na' nad' soatezi soalen' le', na' gake' ka xoz' xka'inna' daa chbi-achga. Shi le' bi nakle nad' txen aga bi gak gonle.

<sup>6</sup> Beena' bi gone' ka dii le gone' nad' txen, nake' ka xoz' xka'inna' daa ba bchogue' na' ibillan, na' yitope'n wza-leen lo yi'na' kwenche sheyan.

<sup>7</sup> Shi le' soatezi soale gonle nad' txen na' toshiizi chzoale xtillaana', li inab daa cheenile na' gakan.

<sup>8</sup> Xa'na' cho'e balaan kat' chonle dii wenna', na' daa chonle ka', chli'lawin dii li nakle nad' txen. <sup>9</sup> Ka chaki Xa'na' nad', ka'kzan chakid' le'. Li soatezi soa gonle nad' txen kwenche gakbe'ile chakid' le'. <sup>10</sup> Shi gonle daa nllia' bia' gonle, na'ch gakbe'ile le chakid' le', ka chon' nad', chon' daa nllia Xa'na' bia' gon', na' ka' chakbe'id' le chakile' nad'.

<sup>11</sup> 'Ba wnia' le' ka' kwenche yiba yizaklenile' nad', na' yiyoll yido soale mbalaz. <sup>12</sup> Na' dgan nllia' bia' gonle: Gaki ljwell-le ka chakid' le'. <sup>13</sup> Bich bi yel' chaki dii xench de ka che beena' chzani yel' mban che'na' guete' ni che ben'ka' nllaguile'. <sup>14</sup> Len' nakle ben'ka' nllaguid' shi chonle ka nllia' bia' gonle. <sup>15</sup> Bich gon' le' ka mos, la' beena' nak mos aga nezele' bin chon xane'na'. San nakle ben' nllaguid' la' ba bzajniid' le' yog' diika' wna Xa'na' nad'. <sup>16</sup> Aga len' wleje' nad', san nadaan wlej' le' na' ba bzoa' le' shajle lljenle dii wenna' daa bi te cheyi. Na' Xa'na' gone' yog' daa inabilene' daa nakle nad' txen. <sup>17</sup> Na' dgan chllia' bia' gonle: Gaki ljwell-le ganga.

### Ben'ka' bi nombia' Chioza' gakzbangakile' ben'ka' nak Crístona' txen

<sup>18</sup> 'Bibi' gakile' shi ben'ka' bi nombia' Chioza' gakzbangakile' le', la' nezkzile ka'kzan gokzbangakile' nad'.

<sup>19</sup> Shel' nakle legake' txen na'ch gaggakile' le', shel'ka'. Per daa ba wlej' le' kwenche gake' nad' txen, daan chakzbangakile' le'. <sup>20</sup> Li lljadini ka ba wniakz' le': "Aga inacho zak'chi to mos ka xane'na'." Ka ba bsak'zi'gake' nad', ka'kzan wsak'zi'gake' le'. Na' shi bzenaggake' cho'a xtillaana', lekzka' wzenaggake' chele. <sup>21</sup> Yog' di-ikin gongakile' le' daa nakle nad' txen, la' bi nombia'gake' Xa'na' beena' bsel' nad'.

<sup>22</sup> 'Ben'ka' bi nombia' Chioza', aga bi dol' napgake' shel'ka' bi bidye'len' legake' xtilleena'. Per daa ba bidye'len' legake' xtilleena' bi gak inagake' bi chakbe'gakile' chongake' dii mala'. <sup>23</sup> Beena' chakzbanile' nad' lenkz Xa'nan' chakzbanile'. <sup>24</sup> Aga bi dol' napgake' shel'ka' bi bli'a yel' wakka' daa konon' gon lad-je'ka'. Na' la'kzi ba ble'gakile' diika' chon', bia'kzə chakzbangakile' nad' na' Xa'na'. <sup>25</sup> Chak dga kwenche chillinin ka na ley che'ka' gana' nan: "Kon gokzi' gokzbangakile' nad' la'kzi aga bi ben' chegake'."

<sup>26</sup> 'Na' wselee Espíritu che Xa' Chioza', beena' gaklene' le'. Espírituna', beena' chli' daa nak dii li, see gana' zoa Xa' Chioza' na' yidyee xtillaa. <sup>27</sup> Na' lekzka'

lenle we'le cho'a xtilaana', la' ba gokle nad' txen ka wzoloa' chli' chsedid' beŋ'.

**16** 'Ba wnia' le' diiki kwenche bi yidinjile' daa chonlilall'le nad'. <sup>2</sup> La' bich wlebgake' le' gana' chdop chllagcho choe'lwillocho Chioza', na' wllin lla axt wit beŋ' le' daa gakile' kan' chazlall' Chioza'. <sup>3</sup> Gongake' ka' daa bi nombia'gake' xa'na', ni bi nombia'gake' nad'. <sup>4</sup> Na' nia' le' diiki kwenche kat' ba bllin lla ile'ile yel' zak'zi'ka', lljadinile ka'kzan ba wnia' gak chele. Bi wnia' le' ka' dii nechte daa ni zoalen' le'.

### Daa chon Espiritu Sántona'

<sup>5</sup> Na' naa ziyaa lljazoalen' xa'na' beena' bsej' nad', na' ni stole bich chñabile nad' gan ziyaa. <sup>6</sup> Na' daa ba wnia' le' ka' le' chakyesh'zi'le'. <sup>7</sup> Per dii li nia' le', wakch wen chele shi ziyaa. La' shi bi ziyaa, beena' gaklene' le' bi yidsoalene' le'. San shi ba ziyaa, na' wsejaane'. <sup>8</sup> Na' kat' yide', gone' kwenche gakbe'i beŋ' yell-lioki nakgake' beŋ' saaxya daa bi biyombia'gake' beena' nak dowalj beŋ' li beŋ' shao', na' gakbe'gakile' chidol'gake' wchoglo Chioza' chegake' ni che xtoleeka'. <sup>9</sup> Yiyakbe'gakile' napgake' dol' daa bi chonlilall'gake' nad'. <sup>10</sup> Na' yiyakbe'gakile' nak' beŋ' li beŋ' shao' daa ziyaa gana' zoa xa'na' na' aga wle'chile nad'. <sup>11</sup> Na' lekzka' yiyakbe'gakile' Chioza' wi'e yel' zak'zi' che beŋ'ka' bi chzenag cha', la' ba bchogloe' sak'zi' dii xiwaa daa chñabia' yell-lioni.

<sup>12</sup> Dii zanch de dii inia' le', dii bi shajniile naa. <sup>13</sup> Per kat' ila' Espiritu Sántona', beena' chli' daa nak dii li, len' wzajniile' le' kwas'loj daa nak dii li. La' aga dii chlljall'ze'n ine', san ine' daa che' xa'na'ne', na' chix-je'ile' le' diika' zi' za' gak. <sup>14</sup> Na' gone' ka' sho'a balaan, la' wzajniile' le' diika' ba wnia'. <sup>15</sup> La' yog'lojte daa na' xa'na' lennan' cho'a dill'. Daan nia', Espirituna' wzajniile' le' diika' ba wnia'.

### Yel' chakyeshiina' yiyakan yel' xaba

<sup>16</sup> Aga chllach bich ile'ile nad', na' lekzka' aga wlla yizle'ile nad'.

<sup>17</sup> Na' bal beŋ'ka' nakgake'ne' txen wñabi lljwelle':  
—¿Bera zejin daa ne' aga chllach bich ile'ichone', na' lekzka' aga wlla yizle'ichone', na' daa natelze' yiyaje' kwit Xe'na'? <sup>18</sup> ¿Bi zejin daa naze' "aga chllach"? Bi chajniicho bi che naze' ka'.

<sup>19</sup> Na' Jesúsza' gokbe'ile' cheengakile' inabgakile'ne' bi zejin daa wne', na'ch chi'e legake':

—¿Achñabi lljwell-le bi zejin daa wnia' le' aga chllach bich ile'ile nad', na' lekzka' aga wlla yizle'ile nad'? <sup>20</sup> Dii li nia' le', kwell-le na' gakyeshile shlak beŋ'ka' bi nombia' Chioza' yibagakile'. Na' la'kzi gakyeshile, yel' chakyeshii chelena' yiyakan yel' xaba. <sup>21</sup> Kat' chzan to noolə, chey chle' daa ba bllin gor sane'. Na' ka chiyoll chzane' ni bich chjtinile' yel' chey chlana', daa le' chibaile' ba zoa to bi'do' che' yell-lioni. <sup>22</sup> Ka'kzan chak chele. Naa chakyeshile, na' ka yillagcho dii yoblə kanan' yiba yizakile, na' ni to kono wsej wllon yibaile.

<sup>23</sup> Na' kana'chan bich bi inabile nad'. Dii li nia' le', bittezə dii inabile xa'na', gonkze'n, daa nonlilall'le nad'.

<sup>24</sup> Axt naa ni to bibin' inabile xa'na' daa nonlilall'le nad'. Li inab bittez dii cheenile inabilene' na' gonkze'n kwenche yiyoll yido soale mbalaz.

### Jesucrístona' ba bene' gan daa chñabia' yell-lioni

<sup>25</sup> Ba bseesaa jemplka' bzajniid' le' diiki, na' wllin lla kat' bich wzajniid' le' kon jempl, san we'len' le' dill' che xa'na' ka to shajniilen. <sup>26</sup> Na' kat' ba bllin llana', kanan' inabile xa'na' bittezə dii inabilene' daa nonlilall'le nad', na' bi chonan byen kwin' inabidee gaklene' le', <sup>27</sup> la' kwinkz xa'na' chakile' le' daa chakile nad' na' daa chajle'le bselee nad'. <sup>28</sup> Wzaa gana' zoa xa'na' kwenche bid' yell-lioni, na' naa yizaa yell-lioni kwenche ziyaa gana' zoe'.

<sup>29</sup> Na'ch che' beŋ'ka' nakgake'ne' txen:

—Naach ba choo dill' dii najnii, na' bich bi jempl chchino'. <sup>30</sup> Na' chakbe'into' ne'z nle'ilo' yog'lojte, na' aga chonan byen no bi inabzi li', la' ba nezlilo' bin inabile' li'. Daan chajle'nto' dii li zoo gana' zoa Chioza'.

<sup>31</sup> Na' che' Jesúsza' legake':

—¿Añaach chajle'le? <sup>32</sup> Ba zoa illin lla, wa ba bllinkz llana', illeshlesle na' gala ikaa twej twejle, na' yik-waanle toz'. Per aga tozan' yigaana', la' zoalenkz xa'na' nad'. <sup>33</sup> Ba wnia' le' yog' diiki kwenche soale mbalaz daa nakle nad' txen. Yell-lioni biya dii yen ile'ile, per li gondiplall', la' ba ben' gan daa chñabia' yell-lioni.

### Be'lwill Jesúsza' Chioza' che beŋ'ka' nakgake'ne' txen

**17** Na' ka wde wna Jesúsza' diika', na' bljs jalawe'na' bwie' yabalə, na' golle':

—Xa, ba bllin gor illagloa' daa llia bia' wtil'. Wloo nad' balaan, nad' nak' xiino', kwenche lekzka' nad' kwaa li' balaan. <sup>2</sup> La' ba beno' lo na' inabia' lao yog'loj beŋ', kwenche gon' ka gat' yel' mban zejli kanj che beŋ'ka' wlejo' gonlilall'gake' nad'. <sup>3</sup> Na' daa gat' yel' mban zejli kanj che beŋ', zejin nombia'gake' li', nako' dowalj Chios, na' lekzka' nombia'gake' nad', beŋ' bsejoo yell-lioni.

<sup>4</sup> Nad' ba wlo'a li' balaan lao beŋ' yell-lioki, na' ba biyoll ben' daa bllio' bia' gon'. <sup>5</sup> Na' naa, xa, yiyongacho' nad' balaanna' kat' yiyed' kwito'na' ka balaanna' daa wdapzk' kana' wzoalen' li' ka zi' xe sil yell-lioni.

<sup>6</sup> Ba beŋo' nad' beŋ'ki wlejo' yell-lioni kwenche gonlilall'gake' nad', na' ba bzajniid' legake' ka nako'. Lall' non' nakgake', na' beno' ka benlilall'gake' nad' na' chzenaggake' xtilloona'. <sup>7</sup> Na' naa ba ne'zgakile' yog' dill'ka' bi'a nakan dii wno'. <sup>8</sup> La' ba be'len' legake' dill' daa nllio' bia' we'lengakee na' ba bzenaggake'n. Na' ba gokbe'gakile' dii li wzaa gana' zo' na' ba wyajle'gake' lin' bsejoo nad'.

<sup>9</sup> Chñabid' li' gakleno' legake'. Aga chñab' gakleno' yog' beŋ' yell-lioki, san chñab' gakleno' beŋ'ka' wlejo' kwenche gonlilall'gake' nad', la' lall' non' nakgake'. <sup>10</sup> Na' yog' beŋ'ka' nak lall' na' lekzka' nakgake' lall' no'. Na' legake' ba wloogake' nad' balaan.

<sup>11</sup> Na' naa ba chiza' yell-lioni. Na' legake' yigaangake' ni. Xa, li' nako' dowlj beŋ' wen beŋ' shao'. Wdapgach beŋ'ka' ba beŋo' nonlilall'gake' nad' kon yeŋ' wak cho'na' kwenche gagkake' toz, ka nakcho cho' nakcho toz. <sup>12</sup> Shlak wzoalen' legake' yell-lioni ba wdap bwia' legake' kon yeŋ' wak cho'na'. Na' ni toe' bi wlliyi', letechokzə beena' ba nakan kwiaeye, kwenche gak ka na Cho'a Xtilloona'.

<sup>13</sup> Na' naa ba zizaa gana' zo'. Na' nia' li' diiki shlak ni zoa' yell-lioni kwenche beŋ'ki gapgake' yeŋ' xaba ka daa nap'. <sup>14</sup> Nad' ba bzajniid' legake' cho'a xtilloona', na' beŋ'ka' bi nombia' li' chakzi' chakzbangakile' legake' daa bi nakgake' legake' txen, ka chon' nad' bi chon' txen beŋ'ka' bi nombia' li'. <sup>15</sup> Aga chŋabid' li' yikoo beŋ'ki nonlilall' li' lo yell-lioni, san chŋab' wkweej-gachgako'ne' kwenche ki chitj seni dii mala' daa chda yell-lioni legake'. <sup>16</sup> Bi nongake' txen beŋ'ka' bi nombia' li', ka chon' nad' bi chon' beŋ'ka' txen. <sup>17</sup> Bengach kwenche beŋ'ki nonlilall' nad' gakchgake' ka chazlalloo daa chzenaggake' dill' li' cho'na', la' cho'a xtilloona' nakan dii li'. <sup>18</sup> Ka beno' bseŋoo nad' kwenche bidsoa' yell-lioni, ka'kzan chseŋaa legake' kwenche shajgake' ladj beŋ' yell-lioki. <sup>19</sup> Chzanlallaa kwin' gon' ka no' ni chegake', kwenche lekzka' gongake' ka no' daa ba chzenaggake' dill' li' cho'na'.

<sup>20</sup> Aga chŋabid' li' gakleno' to legake', san lekzka' chŋab' gakleno' beŋ'ka' gonlilall' nad' kat' wzenaggake' cho'a xtillaana' daa we' beŋ'ki. <sup>21</sup> Xa, chŋabid' li' gonshgo' ka gak yog'gake' toz, ka nakcho cho' nakcho toz. Lekzka' chŋab' gagkake' cho' toz kwenche beŋ'ka' bi nonlilall' li' shajle'gake' lin' bseŋoo nad'. <sup>22</sup> Ba wlo'a legake' balaan' ka daa wloo nad', kwenche gagkake' toz ka nakcho cho' nakcho toz. <sup>23</sup> Nad' nakgakee toz ka nakcho cho' nakcho toz. Bengach ka gagkake' toz ka chiyal', kwenche beŋ'ka' bi nonlilall' li' gakbe'gakile' lin' bseŋoo nad', na' gakbe'gakile' chakilo' beŋ'ka' nonlilall' nad' ka chakilo' nad'.

<sup>24</sup> Xa, li' ba beŋo' nad' legake', na' cheenid' soalen-gake' nad' gana' soa' kwenche ile'gakile' balaan' cha'na' daa beŋo' nad' ka zi' xe silte yell-lioni daa chakilo' nad'. <sup>25</sup> Xa, li' nako' beŋ' li' beŋ' shao'. La'kzi beŋ'ka' bi nonlilall' nad' bi nombia'gake' li', nad' nombi'a li' na' beŋ'ki nonlilall' nad' nezgakile' lin' bseŋoo nad'. <sup>26</sup> Na' ba bzajniid' legake' non nako', na' zizikli wzajni'chgakidee kwenche kon ka chakilo' nad' ka'kzə gagkake' beŋ', na' nad' soalenkzakee.

### Bex'gake' Jesúza'

(Mt. 26:47-56; Mr. 14:43-50; Lc. 22:47-53)

**18** Na' ka biyoll wna Jesúza' ka', wza'lene' beŋ'ka' nakgake'ne' txen wyajgake' shŋaa yao Cedronna', na' wyoolene' legake' to yell-lio ga lle' lla' yag olivo. <sup>2</sup> Na' juda', beena' bene' Jesúza' lo na' beŋ' malka', lekzka' nombi'e latja', la' Jesúza' zan shii wyajlene' legake' na'. <sup>3</sup> Na' bllinlen juda' beŋ' zan soldad na' zi xonj beŋ'ka' chap yoodo'na', beŋ'ka' bsel' bxoza' chŋabia' len fariseoka'. Zejgake' nox'gake' no kandil, no yi' yech,

na' dii wŋiagakile'. <sup>4</sup> Na' Jesúza' ba nezkzile' yog' daa zi' gak che', na'ch bcheje' jatile' legake', na' chi'e:

—¿Non chiyiljle?

<sup>5</sup> Na' che'gake'ne':

—Jesús, beŋ' Nazaretan', chiyiljnto'.

Na'ch che' Jesúza' legake':

—Nadaan'.

Na' lengake' juda', beena' bene' le' lall' na'gake'. <sup>6</sup> Na' ka goll Jesúza': "Nadaan", to biza'zgake' jayetgake' wza'che'lə. <sup>7</sup> Na'ch wizŋabi Jesúza' legake':

—¿Noran chiyiljle?

Na' che'gake'ne':

—Jesús, beŋ' Nazaretan'.

<sup>8</sup> Na'ch che' Jesúza' legake' sto shii:

—Ba wniakz' le' nadaan. Na' shi nadaan chiyiljle, li we' latj yiyaj beŋ'ki.

<sup>9</sup> Golle' legake' ka' kwenche billinin daa wne': "Xa, ba wdap' beŋ'ka' beŋo' nad' na' ni toe' bi wlliyi'." <sup>10</sup> Na' Simón Pédrone' no'e to spad, na'ch wleje'n bchogue' tŋaa nag to beŋ' le Malco, de shŋina'. Na' Málcona' nake' xmos bxoza' choo bxoza' xenna'. <sup>11</sup> Na'ch che' Jesúza' Pédrone':

—Bigoo spad cho'na' loo lillinna'. La' chonan byen gak cha' daa ba nllia Xa'na' bia' gak.

### Jwa'gake' Jesúza' lao Anáza'

(Mt 26:57-58; Mr. 14:53-54; Lc 22:54)

<sup>12</sup> Na'ch soldadka' len xane'ka', na' beŋ'ka' chap yoodo' che beŋ' Israelka', bex'gake' Jesúza' na' bchej-gake'ne'. <sup>13</sup> Na' zigaate jwa'gake'ne' lao Anáza' xtobiŋ che Caifáza', na' Caifáza' nake' bxoza' choo bxoza' xen lo yiza'. <sup>14</sup> Na' Caifáza', len' beena' golle' beŋ'ka' chŋabia' beŋ' Israelka' wenchlan witgake' toz Jesúza' aga ka daa kwiaiyi' yog' beŋ' wllal' che'ka'.

### Bi bcheb Pédrone' shi nombi'e Jesúza'

(Mt 26:69-70; Mr. 14:66-68; Lc 22:55-57)

<sup>15</sup> Na' Simón Pédrone' len sto beŋ' nake' Jesúza' txen janogake'ne'. Na' beena' zejlen Pédrone' txen nombia' bxoza' choo bxoza' xenna'ne', daan gok wyoolene' Jesúza' lesh' chyoo che bxoza' choo bxoza' xenna'. <sup>16</sup> Na' Pédrone' wzie' cho'a leeja'. Na'ch beena' nombia' bxoza' choo bxoza' xenna', bicheje' jashaljlene' bi' nool wewaa chap cho'a leeja' kwenche be'b' latj wyoo Pédrone'. <sup>17</sup> Na'ch bi' nool wewaa chap cho'a leeja' che'b' Pédrone':

—¿Aaga lenon' nako' beeni txen?

Na' che' Pédrone'b':

—Bi len' nakee txen.

<sup>18</sup> Na' moska' len beŋ'ka' chap yoodo'na' wlekgake' yi'na' kwenche wbillgake' daa ba chak zag. Na' jselen Pédrone' legake' cho'a yi'na' kwenche billa'ile'.

### Wŋabyolli Anáza' Jesúza'

(Mt 26:59-66; Mr. 14:55-64; Lc 22:66-71)

<sup>19</sup> Na' beena' nak bxoza' choo bxoza' xen wŋabyolli'e Jesúza' no beŋ'ka' nakgake'ne' txen na' beran chli' chsedile'. <sup>20</sup> Na' che' Jesúza'ne':



—Ladj lkwe' beñaan ba bi'a dill'. Ba bli' bsejid' beñ' lesh' chyoodo'na' na' gachlā chdop chillag beñ' wllalka' choe'lwilgake' Chioza'. Na' bibi dill' bi'a do ngash'zə.  
<sup>21</sup> ¿Beraçhe chñabzilo' nad'? Wñabi beñ'ka' ba bli' bsejid' kwençhe inagake' li' beran ba goshgakee. Ła' ñezgakile' bin ba bli' bsejid' legake'.

<sup>22</sup> Na' ka wde wna Jesúza' ka', to beñ'ka' chap yoodo'na' wdape' xagueena', chi'ene':

—¿Biçhe chilliizo' bçoz choo bçoz xenni dill'?

<sup>23</sup> Na' che' Jesúza'ne':

—Shi bi dii mal ba wnia', wnashki beran ba wnia'. Na' shi shlikzan ba wnia', ¿beraçhe chitzo' nad'?

<sup>24</sup> Na'ch de nchejzi Jesúza' bde Anáza'ne' lao Caifáza', beena' nak bçoz choo bçoz xen.

### Sto shii bi bçheb Pédróna' shi nombi'e Jesúza'

(Mt. 26:71-75; Mr. 14:66-72; Lc. 22:58-62)

<sup>25</sup> Na' shlak ze Pédróna' chshee cho'a yi'na', beñ'ka' lle' na' che'gake'ne':

—¿Aga lenon' nako' beeni txen?

Na' bi bçhebe', san chi'e:

—Bi nakee txen.

<sup>26</sup> Na' to xmos bçoz choo bçoz xenna', beena' nak bish' ljjwell beena' bçhog Pédróna' nague'na', chi'ene':  
 —¿Aga lenon' ble'lenid' Jesúza' gana' lle' yag olívoka'?

<sup>27</sup> Na' stokzə bi bçheb Pédróna', na' lii wchellte shikwteza'.

### Bdegake' Jesúza' lao Pilátóna'

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Na' cheeni'lesdo' bichejgake' lill Caifáza' na' biçhe'gake' Jesúza' gana' chon Pilátóna' ye'l' josçhisa'. Na' beñ' Israelka' aga wyoolengake' Jesúza' gana' chon Pilátóna' ye'l' josçhisa', la' aga wak gaogake' daa chsini'agake' çhe Paskwa' shi ba wyoogake' loo yooná'.

<sup>29</sup> Na'ch bchej Pilátóna' chi'e legake':

—¿Bi xyan chaole çhe beeni?

<sup>30</sup> Na' che'gake'ne':

—She'l' bibi dii mal chone' aga widwa'nto'ne' lawo' ni, she'l'ka'.

<sup>31</sup> Na'ch che' Pilátóna' legake':

—Li yichi'e na' li gon ye'l' josçhis çhe' kon ka na ley çhelena'.

Na' beñ'ka' chñabia' beñ' Israelka' che'gake'ne':

—Aga bi lsens çento' de witnto' beñ'.

<sup>32</sup> Na' daa gok ka', billinin ka wna Jesúza' gak kat'ka' guete'. <sup>33</sup> Na'ch biyoo Pilátóna' gana' chone' ye'l' josçhisa', na' goxe' Jesúza' chi'ene':

—¿Alin' nako' beñ' wñabia' çhe beñ' Israelki?

<sup>34</sup> Na' che' Jesúza'ne':

—¿Adii chza'z lalloon no' ka'? ¿Awa beñ' yoblan ba be'lene' li' xtillaana'?

<sup>35</sup> Na'ch che' Pilátóna'ne':

—¿Achakilo' beñ' Israel nad'? Beñ' wllal çho'kikzan na' bçozka' chñabia' le', ba bengake' li' lo na'. ¿Beran beno'?

<sup>36</sup> Na'ch che' Jesúza'ne':

—Aga nak ye'l' wñabia' çha'na' ka çhe beñ' yell-lioki. She'l' nakan ka', beñ'ka' nak nad' txen wllongake' nad' kwençhe bi gox' beñ' wllal çha'ki nad', she'l'ka'. Per aga nak ye'l' wñabia' çha'na' de yell-lioz.

<sup>37</sup> Na'ch che' Pilátóna'ne':

—¿Ana' beñ' wñabia'kzan nako', shka'?

Na' che' Jesúza'ne':

—Awe, kan' nakan. Ni çheyi daan golj' na' bid' yell-li-  
oni, kwençhe wi'a dill' daa nak dii li. Na' yog'lo' beñ'ka'  
chzenaggake' dill' lina', chzenaggake' çha'.

<sup>38</sup> Na'ch che' Pilátóna'ne':

—¿Beran nak dill' li?

### Bçhoglogake' guet Jesúza'

(Mt. 27:15-31; Mr. 15:6-20; Lc. 23:13-25)

Na' ka wde goll Pilátóna'ne' ka', na'ch bizcheje' kwençhe jashaljlene' beñ' wñabia' çhe beñ' Israelka', na' chi'e legake':

—Ni to dii mal bi chillelid' chon beeni. <sup>39</sup> Na' kon ka yoolole chak yog' yiz chsan' to beñ' de lillyana' kat' çal' lñi Paskwi, çabi cheenile yisan' beñ' wñabia' çhe-  
leni, le' nakle beñ' Israel?

<sup>40</sup> Na'ch yog'gake' besyaagake' zillj, che'gake'ne':

—¿Aga beenan' yisano'! ¡Barrabázan' bisan!

Na' Barrabáza' nake' to beñ' wban.

**19** Na' ka' gok ben Pilátóna' mandad bet wdingake' Jesúza'. <sup>2</sup> Na' soldadka' bengake' to bçooñ de xis yesh' na' bllingake'n yichje'na' ka corona na' bwakw-  
gake'ne' to lech' de morad. <sup>3</sup> Na'ch wbig'gake' lawe'na' chtitjgakile'ne', chongake' ka beñ' chgoo le' balaan, che'gake':

—¿Toshiizi sechgayi çhe beeni chñabia' beñ' Israelka'!  
Na' wdapgake' xagueena'.

<sup>4</sup> Na'ch bizchej Pilátóna', chi'e beñ' Israelka':

—Li wwia, ni kwejee kwençhe inezile ni to dii mal bi chillelid' bene'.

<sup>5</sup> Na' bchej Jesúza' mbinte bçooñ de xis yeshaa yich-  
je'na' na' nakwtie' lech' morada'. Na'ch che' Pilátóna'  
legake':

—Ni ze beeni chaole xya çheyin.

<sup>6</sup> Na' bçozka' chñabia' na' beñ'ka' chap yoodo'na' ka ble'gakile'ne', na'ch wzologake' chosyaagake' zillj, che'gake':

—¿Bdee lee yag cruza'! ¡Bdee lee yag cruza'!

Na' che' Pilátóna' legake':

—Li yichi'e, shka'. Na' li wdee, le'. Ła' nad', ni to dii mal bi chillelid' bene'.

<sup>7</sup> Na' beñ' wñabia' çhe beñ' Israelka' che'gake'ne':

—De to ley çento' daa na chiya'l' guete' daa nalze' nake' Xiin Chios.

<sup>8</sup> Na' ka gollgake' Pilátóna' ka', zizikchli bllebe'.

<sup>9</sup> Na'ch biyo'e sto shii gana' chone' ye'l' josçhisa' na' chi'e Jesúza':

—¿Gara beñ' li'?

Na' Jesúza' bikzə bi dill' billi'e.

<sup>10</sup> Na'ch che' Pilátóna'ne':

—¿Berache ki chilli'o xtilii? ¿Abi nezilo' nap' yei' wñabia' kwenche wdaa li' lee yag cruza' na' naptia' yei' wñabia' kwenche yisan' li'?

<sup>11</sup> Na'ch che' Jesúza'ne':

—Aga bi yei' wñabia' napo' bi gonilo' nad' shel' bi non Chioza'n li'. Daan, beena' bdie' nad' lawo' ni, dol' xench nape' aga ka li'.

<sup>12</sup> Na'ch ka beni Pilátona' wne' ka', biyiljallee naklæ ka gone' kwenche yisane' Jesúza', per beñ'ka' chñabia' beñ' Israelka' axt chosyaayigake', che'gake'ne':

—Shi yisano'ne' bi nako' txen César'a, la' nottez beena' ina nake' beñ' wñabia', César'an' chizoshi'e.

<sup>13</sup> Na' ka beni Pilátona' gollgake'ne' ka', bizcheje' nchi'e Jesúza'. Na'ch jchi'e gana' chone' yei' joschisa', gana' le Gábata de dill' hebreo, na' zejín latj ga ntao-gake' yaj. <sup>14</sup> Na' gok dga llana' chsini'agake' che lñi Paskwa'. Na' ka do gobill goll Pilátona' beñ' Israelka':

—Ni ze beñ' wñabia' cheleni.

<sup>15</sup> Na'ch legake' chosyaagake'. Zeyidgake', che'gake':

—¡Wdoyo beena'! ¡Bdee lee yag cruza'!

Na'ch che' Pilátona' legake':

—¿Acheenile wi'a lsens wda'gake' beñ' wñabia' che- leni lee yag cruza'?

Na' bñoxka' chñabia' che'gake'ne':

—Toz César'an' chñabi'e neto'. Koch no beñ' yoblæ zoa.

<sup>16</sup> Na'ch Pilátona' bene' Jesúza' lo na'gake' kwenche wda'gake'ne' lee yag cruza', na'ch bche'gake'ne'.

#### Bda'gake' Jesúza' lee yag cruza'

(Mt 27:32-44; Mr. 15:21-32; Lc 23:26-43)

<sup>17</sup> Na'ch bwa'gake' Jesúza' yag cruz che'na', na' bche'gake'ne' gana' le Gólgota de dill' hebreo, na' zejín Latj che lilit yichj beñ' wet. <sup>18</sup> Na' na' bda'gake' Jesúza' lee yag cruza', na' lekzka' bda'gake' zi twej beñ' shlaa wej. <sup>19</sup> Na' Pilátona' bzeje' to dii bda'gake' yichj yag cruz che Jesúza', na' nan ki: "Jesús, beñ' Nazaret, beñ' wñabia' che beñ' Israelka'." <sup>20</sup> Na' bzeje'n dill' hebreo, dill' latin na' dill' griego. Na' zan beñ' Israelka' blab-gake' daa da' yichj yag cruza', la' gana' bda'gake' Jesúza' lee yag cruza' chgaan gaozæ yell Jerusalén-na'. <sup>21</sup> Daan bñoxka' chñabia' beñ' Israelka' gollgake' Pilátona':

—Bi chiyal' inan "Beñ' wñabia' che beñ' Israelka'"; san inan "Beenin nalze' nake' beñ' wñabia' che beñ' Israelka'."

<sup>22</sup> Na' Pilátona' chi'e legake':

—Kon ka ba bzeja'n, ka'kzan igaanan.

<sup>23</sup> Na' biyoll bda' soldadka' Jesúza' lee yag cruza', na'ch beñ'gake' xe'na' na' bengake'n taplæ kwenche bikaa twej chegake'. Na' lekzka' beñ'gake' xe' dii toná' daa nak to shwiljizæ. <sup>24</sup> Na' che' ljewllgake':

—Bi wxoxjchón, san goncho to wyitj kwenche ila'shki nocho ikaan.

Na' ka' ben soldadka'. Na' daa bengake' ka', billinin ka na Cho'a Xtill' Chioza' gana' na: "Bi laagake' xa'na', na' bengake' to wyitj kwenche got'bia' nogake' wkaan."

<sup>25</sup> Na' kwit yag cruz che Jesúza' ze xñeena' len beñ' bile'na', na' len María, xool Cleófaza', na' María beñ' yell Magdálana'. <sup>26</sup> Na' ka ble'i Jesúza' xñeena', na' lekzka' ble'ile' gaozæ ze to beena' nake'ne' txen, beena' lee chakile', na'ch chi'e xñeena':

—Beenin yiyoni xiño' ñaa.

<sup>27</sup> Na'ch chi'e beena' nake'ne' txen:

—Beenin yiyoni xñoo ñaa.

Na' lo llana' biñi'e xña' Jesúza' wzoe' lille'na'.

#### Wit Jesúza'

(Mt. 27:45-56; Mr. 15:33-41; Lc. 23:44-49)

<sup>28</sup> Na' ka wde, ñezi Jesúza' ba gok yog' daa llia bia' gaka, na' kwenche yillinin ka na Cho'a Xtill' Chioza', wne':

—Chbilid'.

<sup>29</sup> Na' na' zoa to xwag nakan tolla' vino dii nak zichj zla'. Na'ch bleejgake'n to dii chzi' nisa' na' bzoagake'n to lo xis † kwenche bzoagake'n cho'ena'. <sup>30</sup> Na' wde weej Jesúza' daa nak zichj zla', na'ch wne':

—Ba gok yog' daa llia bia' gak ñaa.

Na' bñek' yichje'na', na' wite'.

#### To soldad wllibe' to ya dii nla' lawinna' kwit lee Jesúza'

<sup>31</sup> Na' beñ'ka' chñabia' beñ' Israelka' bi goongakile' yigaan kwerp che beñ'ka' lee yag cruzka' llana' chom-baangake'. Daan gollgake' Pilátona' gone' mandad lltishjgake' ñi'a beñ'ka' da' lee yag cruza' kwenche yob guetgake' na' yiletjgake' kwerp che'ka' lee yag cruzka'.

<sup>32</sup> Na'ch bselee soldad che'ka', na' jtishjgake' chop laate ñi'a beñ' necha' da' kwit Jesúza', na' lekzka' bengake' che beena' sto da' zi shlaa kwite'na'. <sup>33</sup> Na' ka jabig'gake' gana' da' Jesúza' ble'gakile' ba wite', na' bi wdishjgake' ñi'ena'.

<sup>34</sup> Na' to soldada' wllibe' to ya lo tosh' kwit li'ena' na' lii bchejten chen len nis. <sup>35</sup> Na' beena' choe' dill' cheyi diiki, len' ble'ile' ka gok, na' cho'e dill' kwenche lenle shajle'le. Na' le' nezile' dill' lin cho'e. <sup>36</sup> Gok diiki kwenche billinin ka na Cho'a Xtill' Chioza' gana' na: "Ni to lilitka' yo'e bi chishjgake'." <sup>37</sup> Na' gan yoblæ lee Cho'a Xtill' Chioza' chiznan: "Wwiagake' beena' wllibgake' yana'."

#### Bkwash'gake' Jesúza'

(Mt. 27:57-61; Mr. 15:42-47; Lc. 23:50-56)

<sup>38</sup> Na' ka wde gok diiki, José beñ' yell Arimatéana', wñabile' Pilátona' wi'e latj yikee kwerp che Jesúza'. Joséna' goke' txen Jesúza' do ngash'zæ daa bllibe' beñ'ka' chñabia' beñ' Israelka'. Na' Pilátona' bi'e latj, na'ch wyaj Joséna' bikee kwerp che Jesúza'. <sup>39</sup> Na' wyaj-lene' Nicodémona', beena' wyaj jawia Jesúza' wal-læ. Na' no'e ka do shichoa kil dii chla' zix daa nongake' de mirra na' nchixan daa le áloe. <sup>40</sup> Na'ch btobgake' kwerp che Jesúza' to lech' ton na' blla'gake'n daa chla' zix, kon ka chon beñ' Israelka' kat' chkwash'gake' to beñ' wet.

<sup>41</sup> Na' gaozæ gana' bda'gake' Jesúza' lee yag cruza' de

† To lo xis: literalmente en una rama de hisopo.

to latj ga nazgake' yag dii chbia dii zix, na' na' zoa to blej kob dii bin' koogake' ni tlish' beñ' wet. <sup>42</sup> Na' daa chakbyengakile' wsini'agake' che llana' chombaan-gake', lii wlootegake' kwerp che Jesúsza' loo bleja' zoa gaozə na'.

**Biban Jesúsza' ladj beñ' wetka'**  
(Mt. 28:1-10; Mr. 16:1-8; Lc. 24:1-12)

**20** Na' lla nech che xmanna', ni shtedo', wyaj María nool Magdálana' cho'a bana'. Na' ble'ile' bich nkwash' yaja' cho'a bana'. <sup>2</sup> Na'ch bizee ziyajdoe' gana' zoa Simón Pédróna' na' sto beena' nak Jesúsza' txen, beena' le gokile', jayelle' legake':

—Ba jalejgake' Xanchóna' loo bana' na' bi nezinto' galə jaloogake'ne'.

<sup>3</sup> Na'ch wza' Pédróna' len beena' sto zejgake' cho'a bana'. <sup>4</sup> Choptie' zejdogake', per beena' to bxonjche' aga ka Pédróna' na' zigaate le' blline' cho'a bana'. <sup>5</sup> Na' bchekee bwie' loo bana' na' ble'ile' lech'ka' chi' na', per bi wyo'e. <sup>6</sup> Na' ka bllin Simón Pédróna' na' wyo'e loo bana' na' lezkza' ble'ile' lech'ka' chi' na'. <sup>7</sup> Na' lecha' bdoe yichje'na' aga lenan chi' kwit lech'ka', san ndoban chi'n ka'lə. <sup>8</sup> Na'ch lezkza' wyoo beena' bllin dii nech cho'a bana', na' ka ble'ile' diika' na' wyajli'e dii li biban Jesúsza'. <sup>9</sup> La' kana' aga ba wyajni'yen'gakile' Cho'a Xtil' Chioza' gana' cho'en dill' yiban Jesúsza' ladj beñ' wetka'. <sup>10</sup> Na'ch beñ'ka' chop non Jesúsza' txen biyaj-gake' gana' zoagake'.

**Jali'lao Jesúsza' María, beñ' yell Magdálana'**  
(Mr. 16:9-11)

<sup>11</sup> Na' Maríana' bigaane' cho'a bana' chbelle'. Na' lo zej chbelle' bchekee kwenche bwie' loo bana'. <sup>12</sup> Na' ble'ile' chop anjl zoagake' do xtil, chi'gake' loo bana', toe' chi' yichjinna' na' stoe' chi' xni'alin gana' got' kw-erp che Jesúsza'. <sup>13</sup> Na'ch che'gake' Maríana':

—¿Berache chbellzo', noolə?

Na' golle' legake':

—Chbell' daa ba bidlejgake' kwerp che Xan'na', na' bi nezid' galə jaloogake'ne'.

<sup>14</sup> Shingt wne' ka', ka bllii jalawe'na' na' ble'ile' ze Jesúsza' kolleena', per bi biyombi'e shi Jesúsza'. <sup>15</sup> Na'ch che' Jesúsza'ne':

—¿Berache chbellzo', noolə? ¿Nodaa chiyiljo'?

Na' Maríana' chakile' beena' chap yag zixkan', na' chi'ene':

—Beñ'do', shi ba bibejo'ne', wnagach nad' galə jadixjo'ne' kwenche yichi'ane'.

<sup>16</sup> Na'ch che' Jesúsza'ne':

—¡María!

Na' biyechje' na' wnie'ne' dill' hebreo, chi'ene':

—¡Raboni! —na' zejín: beñ' chli' chsedi beñ'.

<sup>17</sup> Na' che' Jesúsza'ne':

—Bi goxoo nad', la' bin' yiyep' kwit Xa'na'. Lete biyaj, jane beñ'ka' nak nad' txen jayellgake' ba ziyaa kwit Xa'na', beena' lezkza' nak Xale. Lljazoalen' Chios cha'na', beena' lezkza' nak Chios chele.

<sup>18</sup> Na'ch biza' María, beñ' yell Magdálana', jayelle' beñ'ka' nak Jesúsza' txen nan ba ble'ile' Xancho Jesúsza'. Na' golle' legake' diika' goll Jesúsza' le'.

**Jali'lao Jesúsza' beñ'ka' nakgake'ne' txen**  
(Mt 28:16-20; Mr. 16:14-18; Lc 24:36-49)

<sup>19</sup> Na' ka goj lo llana' bibane', lla nech che xmanna', ba ndop nllag beñ'ka' nak Jesúsza' txen na' nsejtegake' yooná' daa chllebgake' beñ'ka' chñabia' beñ' Israelka', ka gokbe'gakile' ba ze Jesúsza' ladje'ka', na' chi'e le-gake':

—Soashgale mbalaz.

<sup>20</sup> Na' ka biyoll golle' legake' ka', na'ch bliile' legake' chop laate neena' na' kwit li'ena'. Na' beñ'ka' nakgake'ne' txen le bibagakile' ble'gakile'ne'. <sup>21</sup> Na'ch wize' Jesúsza' legake':

—Soashgale mbalaz. Ka bsel' Xa'na' nad' kwenche zidsoa' yell-lioni, ka'kzan chselaa le' lje'le cho'a xtil-laana' yell-lioni.

<sup>22</sup> Na' ka wde golle' legake' ka', na'ch blobe' legake', na' chi'e:

—Li ikaa Espíritu Sántóna'. <sup>23</sup> Na' beñ'ka' yizi'xenle saaxya che'ka', wiyakxenán. Na' beñ'ka' bi yizi'xenle cheyin, bi yiyakxen chegake'.

**Tomáza' bi wyajli'e shi biban Jesúsza' ladj beñ' wetka'**

<sup>24</sup> Tomáza', beena' che'gake' Dídimo nake' txen beñ'ka' shllin, na' bi lene' ka jali'lao Jesúsza' legake'.

<sup>25</sup> Na' che'gake'ne':

—Ba ble'into' Xanchóna'.

Na' Tomáza' chi'e legake':

—Shi bi ile'id' neena' na' wde xben'ni gana' wde klab-ka', na' wde na'ni kwit li'ena', aga wyajli'a.

<sup>26</sup> Na' ka wde xon' lla, dii yoblə bidop beñ'ka' non-gake' Jesúsza' txen loo yooná' na' len Tomáza'. Na' la'kzi nsejtegake' yooná', wyoo Jesúsza' jsie' ladje'ka'. Na' chi'e legake':

—Soashgale mbalaz.

<sup>27</sup> Na'ch chi'e Tomáza':

—Bwia na'ni, na' bñe'n xbeno'na'; na' bñe' noona' kwit li'ani. Bi gakchoplalloo, san wyajle'.

<sup>28</sup> Na'ch che' Tomáza'ne':

—¡Lin' nako' Xan' na' naktio' Chios cha'!

<sup>29</sup> Na' che' Jesúsza'ne':

—Galj ble'ilo' nad' na'ch chajli'o. Chakomba beñ'ka' chajle'gake' la'kzi bin' ile'gakile' nad'.

**Bzej Juanna' libri kwenche shajle' beñ' Jesúsza' nake' Xi-  
in Chios**

<sup>30</sup> Zan yej' wak daa ben Jesúsza' lao beñ'ka' nakgake'ne' txen bi nyojgakan lee libri. <sup>31</sup> Per diiki nyoj-gakan kwenche shajle'le Jesúsza' nake' Xiin Chioza' na' len' Crístóna', beena' wleje' inabi'e, na' daa gonli-lall'lene' gat' yej' mban chele dii bi te cheyin.

Jali'lao Jesúza' beṅ'ka' nakgake'ne' txen

21 Ka wde, Jesúza' jali'lawe' sto shii beṅ'ka' nakgake'ne' txen cho'a Nisdo' che Galileana' daa lezkzka' le Nisdo' che Tiberias. Na' ki gok: <sup>2</sup> Simón Pédróna' len Tomáza', beena' nsi'gake' Dídimo, na' Natanaela', beṅ' yell Canána' daa lliá gana' mbani Galileana', na' chopte xiiṅ Zebedewa' na' zi chop beṅ'ka' nongake' Jesúza' txen lle'gake' Galileana'. <sup>3</sup> Na' Simón Pédróna' chi'e legake':

—Sha'ch' lljxen' beḷa'.

Na' legake' gollgake'ne':

—Lezkzka' wza'lennto' li'.

Na'ch wyoogake' to loo barkw zejgake' wxen beḷa', na' ni tlish' kono wxengake' do yel. <sup>4</sup> Na' cheeni'lesdo' bllin Jesúza' cho'a nisdo'na', na' beṅ'ka' nakgake'ne' txen aga chakbe'gakile' shi len'. <sup>5</sup> Na'ch Jesúza' wṅie' le-gake', chi'e:

—Le' beṅ' bish'dawaa, zabiṅ' senle beḷa' gaocho?

Na' che'gake'ne':

—Aga no de.

<sup>6</sup> Na'ch che' Jesúza' legake':

—Li wzaḷ' yixj chelena' shḷaa de shḷi che barkwa' na' idol'gakb.

Na' bengake' ka golle', na' ka nan yigoyogake' yixja' loo nisa' aga chizogakile'n daa nyichachgan belka'.

<sup>7</sup> Na' beena' le chaki Jesúza'ne', golle' Pédróna':

—ixan'chonan'!

Na' kon ka beni Pédróna' golle'ne' ka', lii biyakwte xe'na', na' bxitee loo nisa'. <sup>8</sup> Na' beṅ'ka' sto biyajlengake' barkwa' cho'a nisdo'na'lə, zingoyon yixja' daa zinyichachga belka', la' aga nakchan zit', ka sto guiyoa metrzan. <sup>9</sup> Na' ka bichejgake' loo barkwa', ble'gakile' ba chi' yi'na' xṅa na' xoa to beḷ lawinna', na' dete yetxtil. <sup>10</sup> Na' che' Jesúza' legake':

—Li yiyox'to belka' zi' wxenle.

<sup>11</sup> Na'ch wyoo Simón Pédróna' loo barkwa' kwenche jaselle' yixj beḷa' na' bigoyoe'n ax't cho'a nisdo'na'. Na' la'kzi tolla'cha nak yixja' daa ziyoon to guiyoa shiiṅiyon beḷ yeḷka', bi bcheza'n. <sup>12</sup> Na'ch che' Jesúza' legake':

—Li da gaole xsila'.

Na' ni to beṅ'ka' nakgake'ne' txen bi biyaxjgakile' ye'gake'ne': “¿Nora li'?” La' gokbe'gakile' Xancho Jesúza'kzan'. <sup>13</sup> Na'ch wbig' Jesúza' na' beṅee yetxtila' len beḷa' na' bi'e che chegake'.

<sup>14</sup> Na' dga gok de wyon shii jali'lao Jesúza' beṅ'ka' nakgake'ne' txen ka wde bibane' ladj beṅ' wetka'.

Bshaljlen Jesúza' Simón Pédróna'

<sup>15</sup> Na' ka bidaogake' xsila', na'ch che' Jesúza' Simón Pédróna':

—Simón, xiiṅ Jonás, zachakchilo' nad' aga ka to chaki beṅ'ki nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonḷilall'gake' nad', beṅ'ka' nak ka xil'do' cha'.

<sup>16</sup> Na' de wchop shii wizṅabile'ne', chi'ene':

—Simón, xiiṅ Jonás, zachakilo' nad'?

Na' Pédróna' chi'ene':

—Xan', nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonḷilall'gake' nad', beṅ'ka' nak ka xil' cha'.

<sup>17</sup> Na' de wyon shii wizṅabile'ne', chi'ene':

—Simón, xiiṅ Jonás, zana' chakilo' nad'?

Na' gokyeshii Pédróna' daa ba gok shoṅ shii chṅab Jesúza' shi chakile'ne', na' chi'ene':

—Xan', ne'z nje'ilo' yog'loḷte, na' nezkzilo' chakid' li'.

Na'ch che' Jesúza'ne':

—Na'len wdap bwia beṅ'ka' chonḷilall'gake' nad', beṅ'ka' nak ka xil'do' cha'. <sup>18</sup> Dii li' nia' li', ka goko' beṅ' wew', gokw xalaano' to kwinzo' na' wyajo' kon ga wnan cho'. Per kat' ba goxoo, wli nooka' na' yiwakw beṅ' yoblə xalaano'na', na' wchi'e li' ga bi cheenilo' shajjo'.

<sup>19</sup> Na' daa goll Jesúza'ne' ka', bzajniile' legake' ka guet Pédróna', na' daa guete' ka' sho' Chioza' balaan. Na' ka wde golle' Pédróna' ka', chi'ene':

—Btiplaloo benḷilall' nad' toshiizi.

Beena' le chaki Jesúza'ne'

<sup>20</sup> Na' biyeçhj Pédróna' na' ble'ile' beena' sto, beena' le chaki Jesúza'ne', noe' legake'. Len' wchi'e kwit Jesúza' kana' zeelo wdaogake' xshe'na' kana' wṅabile'ne', chi'ene': “Xan', znorakznton' gon li' lo na' beṅ' malka'?”

<sup>21</sup> Na' ka ble'i Pédróna'ne', na'ch chi'e Jesúza':

—Xan', zshera beeni'?

<sup>22</sup> Na' che' Jesúza'ne':

—Shi cheenid', ni mbankz beeni kat' yiyed'. Bi sio' beena' wṅeyi. Lin' btiplaloo benḷilall' nad' toshiizi.

<sup>23</sup> Na' daa golle' ka', wze dill' ladj beṅ'ka' chonḷilall' Jesúza' nan aga wet beena'. Per bi goll Jesúza' Pédróna' bi guet beena', san chi'ene': “Shi cheenid', ni mbankze' kat' yiyed'. Bi sio' beena' wṅeyi.”

<sup>24</sup> Na' beena' nake' Jesúza' txen, beena' le chakile', cho'e dill' kon ka gokə na' bzeje'n lee libri. Na' ne'zinto' dillaa cho'e nakan dii li'.

<sup>25</sup> Dii zanch dii ben Jesúza' na' bi nyojan. Sheḷ' nyoj yog' diika' bene', chakid' bi gaki yell-lioni ikwa' librka' sheḷ'ka'.

# Los Hechos

## Bcheb Jesúza' wselee Espíritu Sántona'

1 Teófilo, lee libr necha' bzej', na' bzej' yog' dii wen-ka' ben Jesúza' na' diika' bli' bsedile' dezd ka wzoloe' 2 axt ka bllin lla biyep'e yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. 3 Na' ka wde wite' na' bibane' ladj beñ' wetka', jali'lawe' legake' na' dii zan dii bene' kwenche ñezgak-ile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

4 Na' shlak wzoalen Jesúza' postlka', golle' legake':  
—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. 5 Dii li Juanna' bchoe' beñ' nisa', per le', aga chillach yidsoa Espíritu Sántona' loo yichjlall'do'lena'.

## Biyep Jesúza' yabana'

6 Na' beñ'ka' ndop nllag kwit Jesúza', wñabgakile'ne':  
—Xan', ¿awibejo' cho' beñ' Israe lo ñi'a na' beñ' zit'ka' ñaa kwenche ñabi'o neto'?

7 Na' Jesúza' golle' legake':  
—Bi chidol'le ñezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n. 8 Na' ka yidsoa Espíritu Sántona' loo yichjlall'do'lena' na' gone' le' yel' wak, na' we'le xtil-laana' yell Jerusalénna', na' doxen gani mbani Judeani na' lezkza' gana' mbani Samáriana', na' doxen zbii zkaañ yell-lioni.

9 Na' ka biyoll golle' ka', wzolo biyep'e yabana' chwiate beñ'ka', na' wze to bej bkwashaan le' na' bich ble'gakile'ne'. 10 Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. 11 Na' gollgake':

—Le' beñ' Galilea, ¿beraçe chwiazle yabana'? Kwin Jesúza', beena' ble'ile bichej ladjleni na' biyep'e yabana', kakzan ile'ilene' yiyede'.

## Wlejgake' Matíaza' bizoe' lo laz Juda'

12 Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'. 13 Na' ka billingake' Jerusalénna', biyepgake' yoona' lla shk-wiana' cha'lə gana' zoagake'. Na' beñ'kin bllin: Pé-drona', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiñ Alfe-wa', Simón, beena' che'gake' Zelote, na' Judas beñ' bish' Jacóbona'. 14 Yog' beñ'ki chdopgake' yog' lla kon

beñ'ka' nak beñ' bish' Jesúza' kwenche choe'lwillgake' Chioza', na' len Maríana' xña Jesúza' na' zi' bañ' noolka'.

15 Na' llaka' wzoagake' na', Pédróna' wzie' ladj beñ'ka' chonlilall'gake' Jesucristona', nakgake' ka do to guioa galjə, na' golle' legake':

16 —Le' beñ' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e beñ'ka' beñ'gake' Jesúza'. 17 Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. 18 Na' mecha' daa bexee che dii mala' daa bene', lennan' biziile' to yell-lío gana' bxope' de gozyichjlə na' goshj li'ena' na' bchej yog' xjloe'na'.

19 Na' ka wñezi beñ' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lío Chen. 20 La' lee libr che Sálmoka' nan: Yidesh yiloashga lill xlatje'na', na' ni sto kochno soan.

Na' lezkza' nan:

Beñ' yoblə yiyakshga lo nee daa nan gok lo nee gone'.

21 'Na' chonan byen kwejcho to beñ'ki bengake' cho' txen toshiizi kana' wzoalen Xancho Jesúza' cho', 22 beñ'ki nakgake' cho' txen dezd ka bchoa Juanna' Jesúza' nisa' axt ka biyep'e yabana', kwenche gone' cho' txen we'cho dill' nakan gok biban Jesúza' ladj beñ' wetka'.

23 Na'ch wlejgake' chope': toe' le Matías, na' sto beñ' yoo shoñə leyín, José, Barsabás, na'ch Justo. 24 Na' be'lwillgake' Chioza', che'gake':

—Chios, beñ' nak Xannto', li' nombi'o yichjlall'do' yog' beñ'. Bliyi neto' no beñ'ki chop ba wlejo' 25 kwenche gake' neto' txen naknto' postl, la' Juda' ba bñite' daa ndolee yel' wen dii mal che'na' na' ziyaje' latja' gana' chidojee.

26 Na'ch bengake' to wyitj kwenche wñezgakile' noran ba wlej Chioza', na' bidoñ' Matíaza', na' wlene' postlka' shnej.

## Ka bid Espíritu Sántona'

2 Na' ka bllin lla goñ' lñi Pentecostéza', yog' beñ'ka' chonlilall'gake' Jesúza' tozga ndop nllaggake'. 2 Na' tokonganzi bengakile' to sshag ka ga za' to be' wal, za'n yabalə na' wñiñ doxen loo yoona' gana' lle'gake'. 3 Na'ch ble'gakile' dii nak ka beñ' y' chal'ñiñan, na' yog'ze' zen yichje'ka'. 4 Na' Espíritu Santo che

† Beñ' bish' Jacóbona': beñ'ka' nsed nagake' chiyal' inan xiñ Jacóbona'.

Chioza' wyo'e loo yichjall'do' to toe', na' wzologake' wnegake' wde wdeli dill', kon ka goklall' Espíritu Sántona' ñe to toe'.

<sup>5</sup> Na' lo llana' beñ' zan beñ' Israelka' lle' Jerusalénna' choe'la'ogake' Chioza', no beñ' zaak wde wdeli yell dii lle' yell-lioni. <sup>6</sup> Na' ka bengakile' sshaga' daa chak, na' bdop bllaggake' gana' chak ka'. Na' gokllej gokgangakile' ka biyombia'gake' xtilleeka' daa chne beñ'ka' lle' na'. <sup>7</sup> Na' le chibangakile', na' che' ljwelle':

—¿Aga beñ' Galilea yog' beñ'ki choe' dill'ki? <sup>8</sup> ¿Nakra chak chakzgake' dill'ka' chne to tocho, lla? <sup>9</sup> La' ni zoa beñ' Partia, beñ' Media, beñ' Elam, beñ' Mesopotamia, beñ' Judea, beñ' Capadocia, beñ' Ponto, beñ' Asia, <sup>10</sup> beñ' Frigia na' Panfilia, beñ' Egipto na' zi bale' beñ' África, beñ' zaak gaozə yell Cirénena', na' lekzka' len beñ' za' Rómana'te. Balcho nakcho beñ' Israel, na' zi balcho choncho beñ' Israelki txen. <sup>11</sup> Na' lekzka' zoa beñ' Creta na' beñ' Arabia. Na' yog'techno chenchicho chne beñ'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

<sup>12</sup> Na' yog' beñ'ka' bdop bllag na', bibangakile' na' gokllej gokgangakile'. Na' che' ljwellgake':

—¿Bi zejín dga, lla?

<sup>13</sup> Na' bale' wnelegakile' legake', nagake':

—Zolli beñ'kin.

#### Daa goll Pédrona' beñ'ka' bdop bllag

<sup>14</sup> Na'ch Pédrona' wzechaile' len postlka' zi shnej, na' wnie' zillj chi'e beñ'ka' ndop nllag na':

—Le' beñ' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga ñia' le'. <sup>15</sup> Beñ'ki nak' txen aga zollgakilen' ka chza'lall'zle, la' shzilgaz naa. <sup>16</sup> Dga chak ki naa, chill-inin daa wna dii Joela', beena' bzej daa goll Chioza'ne' kani'yi, na' wne':

<sup>17</sup> Kat' ba zoa illin lla te che yell-lioni, nad' Chios wi'a Espíritu cha'na' soe' loo yichjall'do' beñ'ka' lle' zbii zkaan yell-lioni.

Na' gon' kwenche xiñleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib', na' beñ' golka' ñegakile' yel.

<sup>18</sup> Na' ka'kzə wi'a Espíritu cha'na' yog' beñ'ka' choe'la'ogake' nad' llana' gak ka', ka beñ' byo ka noolə, na' we'gake' dill'ka' wxoə' cho'a lolleeka'.

<sup>19</sup> Na' xan yabana' wli'a dii gonan ka yibani beñ', na' ka'kzə lo yell-lioni wli'gakidee chen, na' yi', na' llen.

<sup>20</sup> Wbilla' bich wzeeni'n, na' bewaa yiyakan xna ka chen ka zi' illin lla choo lla xen che Xanchona'.

<sup>21</sup> Na' nottez beñ' ñabile' Xancho Chioza' gaklene'ne', na' yisle'ne' kwenche bi kwiajee.

<sup>22</sup> Na' le' nakle beñ' Israel, li wzenag dga ñia' le'. Nezkzile Chioza' wleje' Jesús, beñ' Nazareta', daa bi'ene' yel' wñabia'na' kwenche bidylene' ladjleni dii zan yel' wak choo yel' wak xen na' bichlə dii benan ka bibani beñ'. <sup>23</sup> Na' beeni goke' lall' na'le kon ka bllia

Chioza' bia' gak che', na' bəx'lene' bénlene' lo na' beñ' malka' kwenche betgake'ne' lee yag cruza'. <sup>24</sup> Per Chioza' bisbane'ne' ladj beñ' wetka', na' bi bi'e latj guete' toshiizi, daa bi gok ñabia' yel' wita' le'. <sup>25</sup> Dii Davina' bi'e dill' che Jesús'a kani'yi, ka wne':

Chle'id' Xan'na' toshiizi.

Na' daa zoe' kwitii shlaa de shlini kono gak bi goni nad'.

<sup>26</sup> Daan le chibayi lall'dawaani na' cho'a dill' ka mbalaz zoa'.

Na' beli chen cha'ni nonan lez yibanan,

<sup>27</sup> la' aga wsanlalloo nad' toshiizi ladj beñ' wetka', ni bi wi'o latj gooll' iteb beli chen cha'ni daa nak' lall' no'.

<sup>28</sup> Ba bliilo' nad' nakan nak neza' sho'a kwenche gat'ch yel' mban cha', na' yiba yizakid' daa soalen' li' toshiizi.

<sup>29</sup> Le' beñ' bish', nezkzicho dii xozxto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'. <sup>30</sup> Na' dii Davina' bi'e dill' diika' goll Chioza' le', na' wnezile' kwin Chioza' bchebe' wzoe' to xiñ dia' che' ñabi'e. <sup>31</sup> Chioza' bliile' dii Davina' diika' zi' gak che Crístona', na' bi'e dill' yibane' ladj beñ' wetka' ka wne' aga wigaane' ladj beñ' wetka' na' ni bi gooll' iteb beli chen che'na'. <sup>32</sup> Na' ka' gok, Chioza' bisbane' Jesús'a ladj beñ' wetka', na' yog'nto' ble'into'ne' na' choe'nto' dill' bibane'. <sup>33</sup> Na' ka biyoll bigoyoe'ne' yabana' na' wlekwe'ne' kwite' de shlina', bene' lo nee bselee Espíritu Sántona' ladjnto'ni ka bchebe'. Na' Espíritu Sántona' ba bene' yog' dga ba ben ble'ile naa. <sup>34</sup> Bi gakile dii Davinan' biyep'e yabana', la' kwine', wne':

Xancho Chioza' golle' Xan'na':

“Wche' kwit' de shli ni

<sup>35</sup> shlak wzoa' xni'ona' beñ'ka' chakzbani li'.”

<sup>36</sup> Na' nia' le', yog'cho cho' beñ' Israel chiyal' ñezicho, Jesús'a, beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' ñabi'e cho'.

<sup>37</sup> Na' beñ'ka' lle' na' ka bengakile' goll Pédrona' le-gake' ka', le nyesh'chga gokgakile', na' wñabgakile' Pédrona' na' postlka' sto, che'gake':

—Le' beñ' bish', ¿beran chiyal' gonnto' shka'?

<sup>38</sup> Na'ch Pédrona' chi'e legake':

—To tole, li yiyaj yileni na' li choa nisa' shi ba chonli-lall'le Jesucristona', na' yiyakxen xtol'leka' na' yidsoa Espíritu Sántona' loo yichjall'do'lena'. <sup>39</sup> Chioza' ba bchebe' gone' le Espíritu che'na', na' len xiñleka', na' nottez beñ' zit'. La' nchebe' wi'ene' yog' beñ' gaxe' kwenche gonlilall'gake'ne'.

<sup>40</sup> Na' dii zanch dill' be'len Pédrona' legake', got'yoile' legake', chi'e:

—Li yisla kwinle lao yel' zi'na' daa ile'i beñ' wen dii malka' bi chajle' che Chioza'.

<sup>41</sup> Na' beñ'ka' wyajle' daa goll Pédrona' wchoagake' nisa'; na' lo llana' shona mil beñ'ka' wlengake' beñ'ka' nonlilall' Jesús'a.

### Ka ben ben'ka' ben'ilall' Jesucristona' dii nech

<sup>42</sup> Na' yog'gake' wze'gake' wneyi bengake' diika' bli' b'sedi postlka' legake', na' xochi wzoagake'. Na' bdop bllaggake' be'lwillgake' Chioza' na' weej wdaogake' tx-en. <sup>43</sup> Na' yog'ze' bibani daa ble'gakile' yel' wak zanka' ben postlka'. <sup>44</sup> Na' yog' ben'ka' chon'ilall'gake' Jesúsza' gokgake' toz, na' choe' l'jwelle' bi ka dii chyallji to toe'. <sup>45</sup> Na' biyit' bidegake' no yell-l'io, no yoo chegake' wa bichlā dii napgake' na' choe' l'jwelle'gake' ka to dii chyallji to toe'. <sup>46</sup> Na' yog' lla bdopgake' lesh' chyoodo'na' choe'lwillgake' Chioza', na' lekzka' bibagakile' weej wdaogake' txen lill l'jwelle'gake'. <sup>47</sup> Na' wzoatezi wzoagake' be'la'ogake' Chioza' na' yog'zə ben' gokbe'gakile' ka mba chongake'. Na' yog' lla, Xancho Chioza' bene' ka wyanch ben'ka' ben'ilall' Jesucristona'.

### Biyaki to ben' bi chak sa'

**3** To lla do ka chida shonə shlle'na', ka gora' chdop chllag ben' Israelka' choe'lwillgake' Chioza', Pédrona' len Juanna' wyajgake' yoodo'na'. <sup>2</sup> Na' cho'a puert che zeena' daa nechj yoodo'na', puert daa nsi'gake' Puert Xochi, chi' to ben' nxinj ni'ena' ka goljtie'. Na' yog' lla chjlekgake'ne' na' kwenche chnabe' karidá lao ben'ka' chdop chllag yoodo'na'. <sup>3</sup> Na' ka bllin Pédrona' na' Juanna' gana' chi'e, na' wnable' legake' izangakile' lat' mech we'gake'ne'. <sup>4</sup> Na'ch Pédrona' len Juanna' bwiagake'ne', na' Pédrona' golle'ne':  
—Bwiakachi neto'.

<sup>5</sup> Na' beena' bwie' legake', gokile' mechan' we'gake'ne'. <sup>6</sup> Na' Pédrona' chi'ene':  
—Bibi mech nap' gon' li', lete dii nap' gon' li'. Kon yel' wak che Jesucristo, ben' Nazareta', nia' li' bizolla' na' bi-goo nez.

<sup>7</sup> Na'ch Pédrona' wdo'oe' nee de shljina' na' bisol-léene', na' llii biyakteyi ni'ena'. <sup>8</sup> Na'ch ka ben' bxit'zə bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. <sup>9</sup> Na' yog' ben'ka' lle' na' ble'gakile'ne' chde' choe'lawee Chioza', <sup>10</sup> na' billej bibangakile' daa nombia'gake'ne' chbi'e chnabe' karidá cho'a puert daa nsi'gake' Puert Xochi.

### Bzajinii Pédrona' ben'ka' ndop nllag lesh' chyoodo'na'

<sup>11</sup> Na' beena' biyaki ni'ena' aga bsane' Pédrona' len Juanna', kon noe' legake'. Na' yog' ben'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor Che dii Salomón gana' zelengake' beena' biyaki. <sup>12</sup> Na' ka ble'i Pédrona' ben'ka' chdop chllag na', golle' legake':

—Le' ben' Israel, ¿bera'che chibanzile daa biyaki beeni? ¿Na' bera'che chwiazle neto'? ¿Achakile kon yel' wak chento'nan' biyaki beeni? ¿Awa chakile daa zoan-to' chonnto' ka chiyoolallii Chiozan' biyakile'? Aga daan. <sup>13</sup> Chios, beena' be'la'o dii Abrahama', dii Isaaca', dii Jacoba', na' nochlā dii xozto'choka', len' wlo'e Xiine' Jesúsza' balaan xenna', beena' benle lo na' ben'ka' bet-

gake'ne'. Na' ka goklall' Pilátona' yisane'ne', bi be'le latj. <sup>14</sup> Lwaa dii nan inable yisane' Jesúsza', beena' nak li-izelozi ben' li ben' shao', ben' wen xyana'lə wnable bisane'. <sup>15</sup> Kan' benle betle Jesúsza', beena' chon' yel' mban daa nak dowalj. Per Chioza' bisbane'ne' ladj ben' wetka', na' neto' choe'nto' dill' daa nezinto' bibane'. <sup>16</sup> Daa chon'ilall'nto' Jesúsza', ba biyaki beeni chwiale na' nombia'le. Dii li, daa non'ilall'nto' Jesúsza' chwiatele ba biyakchaile'.

<sup>17</sup> 'Le' ben' bish', nezid', ka le' na' ka ben'ka' chnabia' le', bi gokbe'ile bin benle ka betle Jesúsza'. <sup>18</sup> Na' Chioza' bi'e latj gok ka' kwenche billinin ka wna dii ben'ka' wdixjee xtilleena' kani'yi, daa wngake' Cristona' biya dii wchi' wsak' ben' le'. <sup>19</sup> Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz. <sup>20</sup> Na' yiselee Cristona', beena' wleje' kwenche inabi'e, kon ka wdixjee dii ben'ka' kani'yi. <sup>21</sup> Chonan byen yigaanə' yabana' axt ka illin lla yiyonshao' Chioza' yog'lo'lte dii de, kon ka goll Chioza' dii ben'ka' wleje' wdixje'gake' cho'a xtilleena' kani'yi. <sup>22</sup> La' dii Moiséza' golle' dii xozto'choka' dill'ki: "Xancho Chioza' kweje' sto ben' ka nad' ladjleni, ben' chixje'ile' le' bi dill' we'lene'ne'. Na' li wzenag yog' daa ine'. <sup>23</sup> Na' beena' bi wzenag che', Chioza' kwej yichje'ne' na' bich gak gone' txen ben'ka' nak yell che Chioza'."

<sup>24</sup> 'Na' yog'lo' dii ben'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa. <sup>25</sup> Len', naki chele daa ba bcheb Chioza' lao dii ben'ka' wdixjee daa golle' legake' kani'yi. Na' lekzka' naki chele dii wenna' daa bcheb Chioza' gone' che dii xozto'cho Abrahama', ka golle'ne': "Ni che xiin dia cho'na' gon' dii wen che yog'lo' ben' lle' zbii zkaan yell-lioni." <sup>26</sup> Na' ka bsel' Chioza' Xiine' Jesúsza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

### Pédrona' len Juanna' gokgake' lo na' ben'ka' chnabia' ben' Israelka'

**4** Na' ni choe'lente Pédrona' len Juanna' ben'ka' dill' ka bllin bxozka' len beena' ngoo lo nee ben'ka' chap yoodo'na' na' len zi bal' saduceoka'. <sup>2</sup> Le chllaa-gake' daa chli' chsedi Pédrona' len Juanna' ben'ka' lle' na' nakan gok biban Jesúsza' ladj ben' wetka'. <sup>3</sup> Na'ch bex'gake' legake', na' daa ba wlle', jloogake' legake' lillyana', axt betiyoch bibejgake' legake'. <sup>4</sup> Per ben' zan ben'ka' bzenaggake' dillaa be' Pédrona' len Juanna' ben'ilall'gake' Jesúsza'. Na' ka', wyanch ben'ka' ben'ilall'gake'ne', na' gokgake' ka do gayaa mil to ben' byoka'zə.

<sup>5</sup> Na' betiyo bidop billag ben'ka' chnabia' ben' Israelka' yell Jerusalenna', len ben' golka' chnabia', na' ben'ka' chli' chsedi leya'. <sup>6</sup> Na' lekzka' len Anáza', beena' nak bxoz choo bxoz xen, na' Caifáza', Juanna', Alejándrona', na' nokchlā ben'ka' nak dialla che bxoz choo bxoz xenna'. <sup>7</sup> Na'ch bzegake' Pédrona' len Juanna' gchole'ka', na' wñabgakile' legake':

—¿No Isens cheyi na' no bsel' le' chonle diiki?

<sup>8</sup> Na' Espíritu Santo che Chioza' bzajniile' Pédrona' kwenche golle' legake' ki:

—Le' beñ' wñabia', na' le' beñ' gol chñabia'le yell Israeli, <sup>9</sup> chñabile neto' ka nak dii wenna' gok che beeni, na' cheenile ñezile nakan gok biyakile'. <sup>10</sup> Cheeninto' yog'lole'le ñezile na' yog'lole' beñ' Israelka' ñezgakile', beeni chwiale ze laoleni biyakile' kon ye! wak che Jesu-cristo, beñ' Nazareta', beena' betle lee yag cruza', per Chioza' bisbane'ne' ladj beñ' wetka'. <sup>11</sup> Che Jesúzan' choe'n dill' daa nan "yaja' daa bi wyoolall'le le' nakle wen yoo, leyeñ'lannan' yaja' daa ba nchejcha yooná'." <sup>12</sup> Bichga zoa sto beñ' yoblə gak yisle' cho' kwenche bi kwiayi'cho. La' kochno zoa doxen yell-lioni beñ' ba wlej Chioza' kwenche yisle' cho'.

<sup>13</sup> Le bibani beñ' wñabia'ka' daa chwiagake' bi blleb Pédrona' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúza' txenan chongake' ka'. <sup>14</sup> Na' daa ze beena' biyaki ñi'ena' kwrite'ka', bibi gok ye'gake' legake'. <sup>15</sup> Na'ch bibejgake' legake' shlak be'len ljwellgake' dill' nak koogake' xñezin. <sup>16</sup> Che' ljwelle':

—¿Nakra goncho che beñ'ki? La' yog'zə beñ' zoa Jerusalénni ñezgakile' ba bengake' to ye! wak xen, na' aga wak ñacho bi nakan ka'. <sup>17</sup> Na' kwenche bich ides dill'ka' choe'gake', chiya! kooshebchogake' kwenche kochno we'lengake' dill' che Jesúza'.

<sup>18</sup> Na'ch goxgake' Pédrona' len Juanna' dii yoblə, na' gollgake' legake' bich wli' wsedgakile' beñ' ni bi we'lengake' legake' xtill' Jesúza'. <sup>19</sup> Na' Pédrona' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. <sup>20</sup> Bi gak wsannto' we'nto' dill' daa ben ble'into' che Jesúza'.

<sup>21</sup> Na'ch beñ' wñabia'ka' biya dii gollgake' legake' kwenche nan illebgake', na'ch bisanchoklagake' legake', la' bibi billet-lall'gake' gongake' daa yog'zə beñ' choe'la'ogake' Chioza' ni che daa gok. <sup>22</sup> Na' beena' biyaki ñi'ena' kon ye! wak che Jesúza' ba wdeile' choa yiz.

### Wñabgakile' Chioza' gaklene' legake' we'gake' xtilleena'

<sup>23</sup> Na' ka bisangake' Pédrona' len Juanna', biyajgake' gana' zoa beñ'ka' nonlengake' txen na' gollgake' legake' yog' daa goll bəozka' chñabia' na' beñ' golka' chñabia'. <sup>24</sup> Na' ka bengakile' daa gollgake' legake', na'ch gokgake' toz be'llwillgake' Chioza', che'gake':

—Chios, li' nako' beñ' zeelo chñabia'. Li' beno' yabana', yell-lioni, na' nisdona', na' yog'te dii de lo yell-lioni. <sup>25</sup> Na' Espíritu Santo cho'na' bəoxe' dill'ki cho'a loll' dii Davina' kana' wne':

¿Beraçhe chllaa chlokz beñ' yell-lioki?

¿Beraçhe toshiizi chgoo beñ'ki xñezin gongake' daa bi nxe bi nzak'?

<sup>26</sup> Beñ'ka' chñabia' lo yell-lioni gokgake' toz gokzbangakile' na' biñiatezgake' Xancho Chioza' len Crístona', beena' wleje' kwenche ñabi'e.

<sup>27</sup> Dii li yell Jerusalénni Heródeza' na' Poncio Pilá-tona', len beñ' zit'ka' na' beñ' Israelka', bdop bllaggake' gokgake' toz goklall'gake' wlliyi'gake' Jesúza', beena' nak liizelozi beñ' li beñ' shao', beena' wlejo' kwenche ñabi'e. <sup>28</sup> Na' daa bengake' ka', gok ka bllio' bia'. <sup>29</sup> Na' ñaa Chios, bwia ka ngoosheb beñ' wñabia'ka' neto', na' goklen neto' naknto' wen llin cho', kwenche we'chnto' cho'a xtilloona' na' bi gall illebnto'. <sup>30</sup> Bli' ye! wak cho'na' kwenche yiyaki beñ' bi shao' na' kwenche gonnto' bichlə dii yibani beñ' kon ye! wak che Xiino' Jesúza', beena' nak liizelozi beñ' li beñ' shao'.

<sup>31</sup> Na' ka biyoll be'llwillgake' Chioza', wxo' wñib latja' gana' ndop nllaggake', na' wñabia'chga Espíritu Sántona' legake' na' bi bllebgake' we'gake' cho'a xtill' Chioza'.

### Daa de che to toe' benin che yoguee

<sup>32</sup> Na' yog' beñ'ka' ba chonlilall' Jesúza', toz ka gok yichjlall'do'eka'. Na' yog' daa de che to toe', benin che yoguee. Ni toe' bi wna: "Çha' dga." <sup>33</sup> Na' postlka', kon ye! wak xen che Chioza', be'chgake' dill' che Xancho Jesúza' daa bibane' ladj beñ' wetka', na' Chioza' dii xen goklene' yog'lole'. <sup>34</sup> Na' ni toe' bibi byallji, la' beena' de yell-lio che' wa lille' na' chiyiteen, na' mecha' daa choxee cheyin <sup>35</sup> cho'en postlka' kwenche choe'gake' kon ka'k' wej chyalji to toe'. <sup>36</sup> Na' wzoa to beñ' Chipre lie' José. Nake' dia che dii Levína', na' postlka' bsi'gake'ne' Bernabé, na' zevin witip lall' beñ'. <sup>37</sup> Na' Joséni biyitee to yell-lio dii nape', na' mecha' bi'en postlka'.

### Ananíaza' na' Safirana' wxiye'gake'

**5** Na' wzoa to beñ' wlie' Ananías, na' xoolena' wlie' Safira, na' biyit'gake' shkwe' yell-lio che'ka'. <sup>2</sup> Na' Ananíaza' len xoolena' gokgake' toz bkwaangake' lat' mecha' na' bentezgake' ka be' doxenan postlka'. <sup>3</sup> Na'ch Pédrona' golle'ne':

—Ananías, ¿beraçhe be'zo' latj wñabia' Satanáza' yichjlall'do'na' na' chakilo' siyoo Espíritu Sántona' daa bgaanleno' lat' mecha' daa wdixjgake' che yell-lio cho'na'? <sup>4</sup> Cho' yell-liona' kana' zi' yiyitooon, na' cho' mecha' daa be'xoo cheyin ka biyitooon. ¿Beraçhe wloolə yichjlall'do'na' siyoo? Aga beñ' yell-lionin chziyoo, san Chiozan' cheenilo' siyoo.

<sup>5</sup> Na'ch ka beni Ananíaza' daa goll Pédrona', to ka billeeze' wite'. Na' le blleb yog' beñ'ka' wñezi ka gok che'. <sup>6</sup> Na' bllin to chop bi' wew' gana' chto' Ananíaza', na' bitobgakbee to lech' na' jakwash'gakbee.

<sup>7</sup> Na' gok ka do shon gor ka bllin xoolena', aga ñezile' bin ba gok che beñ' che'na'. <sup>8</sup> Na' wñabi Pédrona'ne', chi'ene':

—Wnashki nad', ¿aka to nakz beñ' cho'na'n biyit'le yell-lio chelena'?

Na' Safirana' chi'ene':

—Awe, ka't'kzan biyit'nto'n.

<sup>9</sup> Na'ch che' Pédrona'ne':



—¿Berache benzle toz dill' kon beṅ' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii beṅ' cho'na', na' ṅaa lljak-wash'gakb' li'.

<sup>10</sup> Na' lii billeete Safírana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii beṅ' che'na'. <sup>11</sup> Na' le blleb beṅ'ka' nonlilall' Jesucristóna' len yog' beṅ'ka' wnezi ka gok che dii Ananiáza' na' dii Safírana'.

#### Postlka' bengake' dii zan yeṅ' wak

<sup>12</sup> Na' postlka' bengake' dii zan yeṅ' wak na' bichlā dii chonan ka yibani beṅ' ladj beṅ'ka' lle' Jerusalénna'. Na' yog' beṅ'ka' chonlilall' Jesúza' chdop chllaggake' loo koridor che yoodo'na' daa le Koridor che dii Salomón. <sup>13</sup> Na' nochlā beṅ'ka' aga biyaxjgakile' gongake' legake' txen, la'kzi le ble'shiigakile' legake'. <sup>14</sup> Na' beṅ' zan, ka noolā ka beṅ' byo, benlilall'gake' Xancho Jesúza'. <sup>15</sup> Na' chyixjgake' tnezka' beṅ'ka' bi shao', nxoagake' legake' no lo yagla' na' no lo daa, kwenche kat' te Pédróna' la'ch' b'xen che'na' ten gana' degake' na' yiyakgakile'. <sup>16</sup> Na' lekzka' zan beṅ' yellka' lliá gaozā Jerusalénna' chajgake' lao postlka' chjwa'gake' beṅ' che'i yillwe' na' beṅ' yoo dii xiw'ka'. Na' yog'lolz'gake' chiyaki.

#### Wloogake' postlka' lillyana'

<sup>17</sup> Na'ch b'xoz choo b'xoz xenna' na' saduceoka', beṅ'ka' nakgake'ne' txen, gokxee gokzbangakile' postlka'. <sup>18</sup> Na'ch bex'gake' postlka' na' wloogake' legake' lillyana'. <sup>19</sup> Na' wa'la' bllin to anjl che Xancho Chioza' bsalje' lillyana' na' bibeje' legake', na' golle':

<sup>20</sup> —Li yiyaj yoodo'na', na' li wzajni beṅ'ka' chdop chllag na' doxen ka nak yeṅ' mban zejli kanj daa we' Chioza' legake'.

<sup>21</sup> Na'ch ka wyeeni', biyajgake' yoodo'na' ka goll anjla' legake', na' bli' bsdgakile' beṅ'ka'.

Na'ch b'xoz choo b'xoz xenna' na' beṅ'ka' nakgake'ne' txen bitopgake' yog'loṅ beṅ'ka' chṅabia' yell Israela', na' bsel'gake' beṅ' kwenche nan lljxi'gake' postlka' de lillyana'. <sup>22</sup> Na' ka bllin beṅ'ka' chap yoodo'na' cho'a lillyana', kochno postlka' de na'. <sup>23</sup> Na'ch jayellgake' beṅ'ka' chṅabia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to beṅ' bi yoo lo'in-na'.

<sup>24</sup> Na' beena' ngoo lo nee beṅ'ka' chap yoodo'na', len b'xozka' chṅabia', ka bengakile' che'gake' ka', na' gokgakile' gate yiyoll yido dga. <sup>25</sup> Na' ni choe'tegake' dill', bllin to beṅ' chi'e legake':

—Beṅ'ka' wloole lillyana' lle'tgake' yoodo'na' chli' chsdgakile' beṅ'ka' lle' na'.

<sup>26</sup> Na'ch wyaj beṅ'ka' chap yoodo'na' kon beena' chṅabia' legake' jaxi'gake' postlka' xochi. Bibi bengakile' legake' daa bllebgake' shi beṅ'ka' chzenag che'gake' wlligake' legake' yaj. <sup>27</sup> Na' ka billinlengake' postlka' lao beṅ'ka' chṅabia' yell Israela', na' b'xoz choo b'xoz xenna' chi'e legake':

<sup>28</sup> —¿Abi chajle'kzlen nanto' le' bich wli' wsedzile beṅ' xtill' Jesúza'? Na' li wwia ka ba benle, ba bli' bsdile yog' beṅ' Jerusalénki cho'a xtilleena', na' cheenile wto-bile neto' daa betgake'ne'.

<sup>29</sup> Na'ch Pédróna' len postlka' sto che'gake':

—Chonchan byen wzenagnto' che Chioza' aga ka che beṅ' yell-lioni. <sup>30</sup> Le' betle Jesúza' na' bda'lene' lee yag cruza'. Na' Chios, beena' be'la'o dii xozxto'choka', le' bisbane'ne' ladj beṅ' wetka'. <sup>31</sup> Na' Chioza' ba mbeke'ne' kwite' de shlína' gana' ba chi'e chṅabi'e, na' nzoe'ne' kwenche yisle' beṅ' lao dii mala', la' cheenile' yog' beṅ' Israelki yiyaj yileni dii malka' chongake' kwenche yizi'xen Chioza' chegake'. <sup>32</sup> Na' neto' choe'nto' dill' daa ble'into' gok che Jesúza', na' daa betj Espíritu Sántóna', beena' ba bzoa Chioza' loo yichjlall'do' yog' beṅ' chzenague' che', lekzka' chli'n nakan ka nannto'.

<sup>33</sup> Na' ka beni beṅ' wṅabia'ka' daa goll postlka', le bllaagake' na' goklall'gake' witgake' legake'. <sup>34</sup> Na' ladj beṅ'ka' chṅabia' len to fariseo, beṅ' le Gamaliel, beṅ' chli' chsedi leya', na' yog'z beṅ' chle'shi'gakile'ne'. Na' wzollee, golle' legake' kwejgake' postlka' xtit chyoolā, <sup>35</sup> na' golle' beṅ' wṅabia'ka':

—Le', beṅ' Israel, li wsak' shi bin gonile beṅ'ki. <sup>36</sup> Li lljadini kani batz bchej to beṅ' le Teudas, na' wne' nake' to beṅ' zakii, na' ka do tap guioa beṅ' bengake'ne' txen. Na' ka betgake'ne', yog' beṅ'ka' gokgake'ne' txen biyeslesgake', bich bi bengake'. <sup>37</sup> Na' ka wde gok ka', wizak dii yoblā kana' chlabgake' baṅ beṅ' lle' to to yell, na' bizchej Judas beṅ' Galileana', na' ka'kzā beṅ' zan bengake'ne' txen. Na' lekzka' betgake'ne' na' biyesles beṅ'ka' gokgake'ne' txen. <sup>38</sup> Na' ṅaa, nia' le' bibi gonile beṅ'ki, la' ka nak dga chli' chsdgakile', shi nakan dii chyiljall'zgake' winitlokzan. <sup>39</sup> Na' shi nakan che Chios, aga wak yisol yinítlen. Chiyal' wwiayen'le kwenche bi gaktiṅ-lenle Chioza'.

<sup>40</sup> Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblā bllongake' kochno wli' wsdgakile' xtill' Jesúza'. Na' biyolla' bisangake' legake'. <sup>41</sup> Na'ch bichej postlka' gana' ndop nllag beṅ'ka' chṅabia', na' le chibagakile' daa be' Chioza' latj b'chi' bsak' beṅ'ka' legake' daa choe'gake' xtill' Jesúza'. <sup>42</sup> Na' yog' lla postlka' bli' bsdgakile' xtill' Jesucristóna' yoodo'na' na' lill beṅ'.

#### Wlejgake' gall beṅ' gak lall' nagake' mandadka'

**6** Na' ka zej chanch beṅ'ka' chonlilall' Jesúza', beṅ'ka' chne dill' griegona' wzolo che'gake' aga chaklebi ikaa noolā wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' yeṅ' wawa' yog' lla. <sup>2</sup> Na'ch postlka' shllin bti'agake' yog' beṅ'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao beṅ'. <sup>3</sup> Na' le' beṅ' bish', li kwej gall beṅ' ladjleni, beṅ' chon wen, beṅ' chajni, na' chṅabia' Espíritu Sántóna' legake'. Na' gak lall' na'gake' chisgake' yeṅ' wawa'. <sup>4</sup> Na' neto' we'li-

lall'chnto' we'lwillnto' Chioza' na' wli' wsedchinto' ben' cho'a xtilleena'.

<sup>5</sup> Na' yog'z ben'ka' biyoolall'gake' ka goll postlka', na' wlejgake' beena' le Esteban, nake' ben' nonlilall'chgue' Chioza' na' chñabia' Espíritu Sántona' le'. Na' lezkza' wlejgake' Felípena', Prócorona', Nicanora', Timónna', Parménaza', na' Nicoláza', ben' Antioquíana', beena' bene' txen ben' Israelka'. <sup>6</sup> Na' jwa'gake' legake' gana' lle' postlka', na' postlka' bxoā neeka' yichje'ka' na' wñabgakile' Chioza' gaklene' legake'.

<sup>7</sup> Na' ben' zanch beni cho'a xtil' Chioza' na' wyanchga ben'ka' benlilall'gake' Jesúza' Jerusalénna', na' zan bxoāzka' bzenaggake' na' benlilall'gake' Jesúza'.

### Bex'gake' Estébanna'

<sup>8</sup> Na' Estébanna', wzoalenchga yel' wak che Chioza' le', na' dii xen goklene'ne' kwenche bli'e yel' wakka' na' bichlā dii chonan ka yibani ben'. <sup>9</sup> Na'ch lle' shkwēn ben' Israelka' ba biyell bila' lo na' ben'ka' wxi' legake', na' non cheləgake' chdop chllaggake' gana' choe'lwill-gake' Chioza'. Na' gokgake' toz ba| ben' Cirene, ben' Alejandría, ben' Cilicia, na'ch ben' zaak do Ásiana', gokdil-lengake' Estébanna'. <sup>10</sup> Na' aga gokgake' yel' sin' che Estébanna', daa chñie' kon ka che' Espíritu che Chioza'ne'. <sup>11</sup> Na' wdixjgake' ba| ben' kwenche wxiye'gake', che'gake': "Ba beninto' Estébanna' chñie' zban che dii Moiséza' na' che Chioza'." <sup>12</sup> Na' daa goll-gake' ka', bta bñegake' ben' zan, len ben' golka' chñabia' na' ben'ka' chli' chsedi leya' kwenche bex'gake' Estébanna' na' jwa'gake'ne' lao ben'ka' chñabia' ben' Israelka'. <sup>13</sup> Na' wdiljchgake' ben'ka' wxiye', kwenche gollgake':

—Bi chsankzə beeni inie' che yoodo' che Chios chechona', na' che ley che'na'. <sup>14</sup> Na' ba bizeninto' chizne' Jesús, ben' Nazareta', yichñje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

<sup>15</sup> Na' yog' ben'ka' chi' chongake' yel' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

### Estébanna' bi'e dill' lao ben' wñabia'ka'

**7** Na'ch bxoāz choo bxoāz xenna' wñabile' Estébanna', chi'ene':

—¿Alekzi ben'ki ka chono'n?

<sup>2</sup> Na' Estébanna' chi'e legake':

—Le' ben' bish' na' le' nakle ka xanto', li wzenag dga inia' le': Chios chechona', beena' liizelozi nak ben' choo ben' xen, bli'lawe' dii xozxto'cho Abrahamā' kana' zoe' yell-liona' mbani Mesopotámiana', kana' zi' shaje' yell Haránna'. <sup>3</sup> Na' Chioza' goll'ne': "Bkwaan yell cho'ni na' dialla cho'ka', na' wyaj yell-lío gana' wliid' li'."

<sup>4</sup> Na'ch dii Abrahamā' bcheje' gana' mbani ben' caldeo-ka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa. <sup>5</sup> Na' Chioza' bi bene' lo na' dii Abrahamā' ni lat' yell-lioni de ni, san bchebe' wi'ene'n na' kat' guete' yigaanan lo na' xiñ dia

che'na', la'kzi aga non' bi' che dii Abrahamā' ba zoa ka goll'ne' ka'. <sup>6</sup> Na' lezkza' Chioza' chi'ene' xiñ dia che'ka' soagake' yell zit' na' inabia' ben'ka' legake' wgongake' legake' linna', na' wsak'zi'gake' legake' tap guiyoa yiz. <sup>7</sup> Na' lezkza' Chioza' goll'ne': "Gon' yel' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'." <sup>8</sup> Na' ka bcheb Chioza' gone' dii wen che dii Abrahamā', goll'ne' chiya| sho'e seña' daa le circuncisión, le' na' xiñ dia che'na'. Daan, dii Abrahamā' wlo'e dii xiñe' Isaaca' seña' ka gok xon' lla goljb', na' ka'kzə ben dii Isaaca' kon dii xiñe' Jacoba', na' ka'kz ben dii Jacoba' kon dii xiñe'ka' shllin, ben'ka' gok dii xozxto'cho, cho' ben' Israel.

<sup>9</sup> Na' ben'ka' nak xiñ dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', <sup>10</sup> na'ch bisle'ne' lao yog'lo| dii ben ble'ile'. Na' bi'ene' yel' sin' kwenche faraónna', beena' chñabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

<sup>11</sup> Na' wzolo wche' wbinna', na' gokchga yel' zi' yel' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xozxto'choka'.

<sup>12</sup> Na' ka wñezi dii Jacoba' de trígona' Egíptona', na' bselee bi' che'ka', ben'ka' gok dii xozxto'cho, jxi'gake'n.

<sup>13</sup> Na' ka wyajgake' de wchopi, dii Joséna' goll' legake' nan len' nake' ben' bish'gake', na'ch bembia' faraónna' dialla che dii Joséna'. <sup>14</sup> Na'ch Joséna' biselee legake' kwenche jaxi'gake' xe', Jacoba', na' yog' xiñ che'ka'. Na' yog'gake' nakgake' ka do guiyon shin'. <sup>15</sup> Kan' gok jsoa dii Jacoba' Egíptona' gana' wite', na' lezkza' na' wit xiñe'ka', ben'ka' gok dii xozxto'cho. <sup>16</sup> Na' jakwash'gake' legake' loo bana' daa bizi' dii Abrahamā' yell Siquema' che xiñ beena' le Hamor.

<sup>17</sup> Na' ka ba zoa gao gon Chioza' daa bchebe' gone' che dii Abrahamā', ba wyanchga xiñ dia che dii Isra-raela', ben'ka' lle' Egíptona', ben' zan wal ba nakgake'.

<sup>18</sup> Na'ch bllin lla wzolo wñabia' sto ben' yoblə yell Egíptona', ben' bi bembie dii Joséna'. <sup>19</sup> Na' ben' wñabia'na' wxiye' ben' wllall chechoka' na' biya dii bchi' bsakee dii xozxto'choka', na' bene' byen lljchoongake' bdo'do' che'ka' kwenche guetgakb'. <sup>20</sup> Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'. <sup>21</sup> Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiñ faraónna' billele'le'b' na' bi-keeb' na' bisgole'b' ka xiñe'. <sup>22</sup> Ka' gok bsemi dii Moiséza' yog'lo| yel' sin' che ben' Egíptoka' na' bi'e dill' zakii na' leyi bene' dii zakii.

<sup>23</sup> Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wllall che'. <sup>24</sup> Na' ka ble'ile' to ben' Egípto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. <sup>25</sup> Na' goki dii Moiséza' ben' wllall che'ka' gakbe'gakile' nan Chioza' wchine' le' kwenche yisle' le-gake' lo na' ben' Egíptoka', per bi gokbe'gakile'. <sup>26</sup> Na' betiyo ble'ile' chop ben' wllall che', ben' Israel, chdil-

gake'. Na' gokile' yizoe' legake' wen, na' chi'e legake': "¿Berache chdil-lenə lwjwell-le?, aga ne' beŋ' bishee til-lene'." <sup>27</sup> Na'ch beena' chit chyine' beŋ' wlall che'na' bliguae dii Moiséza' na' chi'ene': "¿No bzoa li' inabi'o neto' na' koo xnezi chento'ni? <sup>28</sup> ¿Alezkza' cheenilo' wito' nad' ka beto' beŋ' Egíptona' daa neji? <sup>29</sup> Na' daa goll beeni ka', dii Moiséza' bxonje' na' jsoe' gana' mbaní Madiánna'. Na' la'kzi nake' beŋ' zit' ladj beŋ'ka', na' bgaane' na'z na' wzoa chop xiine'.

<sup>30</sup> Ba gok choa yiz zoe' na', ka bli'lao to anjl' le' to lo yag yesh' dii chal'niŋ, zoan gana' bibi chashj chleb gaoz Yaa Sinaína'. <sup>31</sup> Na' le bibani dii Moiséza' daa ble'ile' daa, na' wbiguae kwenche bwiayenee kwasloj. Na'ch benile' shii Xancho Chioza', chi'ene': <sup>32</sup> "Nadaan nak' Chios, beena' be'la'o dii xozxto'ka', Abrahamá', Isaaca' na' Jacoba'." Na'ch dii Moiséza' le bllebe' axt chxiztite', na' aga biyaxjchile' wwie'. <sup>33</sup> Na'ch Xancho Chioza' golle' dii Moiséza': "Bllechj xelo'na', la' nad' zoa' latji gani zio', na' aga ka nla'z no se ni. <sup>34</sup> Nad' ba ble'id' yel' zi'na' chle'i beŋ' Israelka' yell Egíptona', beŋ'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chido'loo yiselaa Egíptona'."

<sup>35</sup> Na' Chioza' bseleene' kwenche yisle' beŋ' wlall che'ka' lo na' beŋ' Egíptoka', na' inabia'tie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa gol'niŋ. <sup>36</sup> Na' dii Moiséza' bene' zan yel' wak diika' ben ka bibani beŋ' Egíptoka' kana' bibeje' dii xozxto'choka' lalle'ka'. Na' bene' yel' wak loo nisdo'na' le Nisdo' Xna, na' lekzka' latja' gana' bibi chashj chleb gana' wda-gake' choa yiz. <sup>37</sup> Na' golle' dii xozxto'choka': "Xancho Chioza' kweje' sto beŋ' ka nad' ladjleni, beŋ' chixje'ile' le' dillaa daa we'lene'ne'." <sup>38</sup> Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.

<sup>39</sup> Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. <sup>40</sup> Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." <sup>41</sup> Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'.

<sup>42</sup> Na'ch Chioza' wlej yichje' legake' na' bi'e latj be'la'ogake' beljka' lliá xan yabana'. Bengake' ka na lee libra' daa bzej dii beŋ'ka' wdixjee daa goll Chioza' le-gake' kani'yi, gana' nan:

Le', beŋ' Israel,

¿Achakile nadaan be'la'ole kana' betle bayix'ka' lo choa yiza' wzoale latja' gana' bibi chashj chleb?

<sup>43</sup> Aga nadaan be'la'ole. Molocan' be'la'ole, benle to yoo de lech' gana' be'la'olen ka chios chele, na' be'la'ole belj che chios chele Refánna',

diika' benjilall'le.

Na' ni cheyi diikin kwej' le' lall-leni, na' wselaa le' zit' walch aga ka yell Babilóniana'.

<sup>44</sup> Na' shlak wzoa dii xozxto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'ne'. Na' bengake'ne' kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'.

<sup>45</sup> Dii xozxto'choka' bigaanlengake' yoodo' de lechaa, na' bia'gake'ne' ka wyajlengake' dii Josuéna' jtij-lengake' yellka' ben Chioza' lall' na'gake', na' bgaanan lallchoni axt ka bllin lla wñabia' dii Davina'. <sup>46</sup> Na' Chioza', beena' be'la'o dii xozxto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'. <sup>47</sup> Per Salomónna'lə, beena' nak xiine', bene'n <sup>48</sup> la'kzi Chioza', beena' nak liizelozí beŋ' choo beŋ' xen, bi zoe' to loo yoo dii chon beŋ' yell-lioni. La' ka wna dii beena' wdixjee daa goll Chioza'ne' kani'yi:

<sup>49</sup> Yabana' nakan gana' chi'a chñabi'a, na' lo yell-liona' nzoa' ni'ani.

¿Nakran chakile gonle yoona' gana' soa'?, na Xanchona'.

¿Achakile chyallj ga yizi'lallaa?

<sup>50</sup> ¿Abi chwiale nadaan ben' yog'loj dii de?

<sup>51</sup> Na'ch Estébanna' chi'e beŋ'ka' lle' na':

—Le beŋ' yichjlall'do' wal nakle. Bi chzenagle che Chioza' na' chonle ka beŋ' bi nombia' Chioza'. Nakle beŋ' widenag ka gok dii xozxto'choka'. Bikzə chzenagle che Espíritu Sántona'. <sup>52</sup> Dii xozxto'choka' bchi' bsak'gake' yog' dii beŋ'ka' wdixjee daa goll Chioza' le-gake' kani'yi. Betgake' beŋ'ka' be' dill' nan Chioza' wselee beena' zeelo nak beŋ' li beŋ' shao'. Na' ka bide' na' bénlene' lo na' beŋ'ka' betgake'ne'. <sup>53</sup> La'kzi nombia'le ley daa be' anjlka' dii Moiséza', bi chzenagkzlen.

### Betgake' Estébanna'

<sup>54</sup> Ka beni beŋ'ka' daa goll Estébanna' legake', le bllaagake' axt chaoyaxaxj leye'ka'. <sup>55</sup> Na' Estébanna', chñabia'chga Espíritu Sántona' le', na' blis lawe'na' yabana' ble'ile' yel' chey cheeni che Chioza', na' ble'teile' ze Jesúsza' kwit de shli che Chioza'. <sup>56</sup> Na'ch golle' le-gake':

—jLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shljina'.

<sup>57</sup> Na' beŋ'ka' lle' na' bsej nague'ka' kwenche bi bengakile' xtilleena', na' de chosyaadiazgake' bex'gake'ne'. <sup>58</sup> Na' wlejgake'ne' yell Jerusalénna' jalliagake'ne' yaja'. Na' beŋ'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. <sup>59</sup> Na' ka chllia-gake'ne' yaja', be'lwille' Jesúsza', chi'ene':

—Jesús, li' nako' Xan', bizi' bikaagach nad'.

<sup>60</sup> Na' biyoll wne' ka', na' bchek' xibe'na' na' wñie' zillj, wne':

—Xan', wxi'xen che beŋ'ki dga chongakile' nad'.

Na' biyoll wne' ka' wite'.

Sáulona' b̄chi' bsakee beṅ'ka' choe'la'o Jesúza'

8 Na' Sáulona' goke' toz beṅ'ka' betgake' Estéban-na'.

Na' lo llana'tez wzolo b̄chi' bsak'gake' yog' beṅ'ka' nonlilall' Jesúza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. <sup>2</sup> Na' to chop beṅ' nonlilall' Jesúza' jakwash'gake' dii Estébanna' na' le wchellgakile'ne'. <sup>3</sup> Na' Sáulona' b̄chi' bsakee beṅ'ka' nonlilall' Jesúza', chaje' lill che chegake' chtoyoe' ka nool ka beṅ' byo kwenche chgwee legake' lillyana'.

Be'gake' dill' wen dill' kob che Crístona' gana' mbani Samáriana'

<sup>4</sup> Na' beṅ'ka' bllesh Jerusalénna' be'gake' dill' wen dill' kob che Crístona' gattezə wyajgake'. <sup>5</sup> Na' beena' le Felipe, wyaje' to yell xen che Samáriana' na' be'lene' beṅ'ka' dill' che Crístona'. <sup>6</sup> Na' bdop bllag beṅ', na' yog'lolgake' bzenagyeṅ'gake' dill' daa be' Felípena', daa ble'gakile' yel' wakka' chone'. <sup>7</sup> Na' beṅ' zan bichej dii xiwaa, na' ka bichejgakan chosyaadiagakan. Na' lekzka' biyone' zan beṅ' net ni'a nee, na' beṅ' bi chak sa' wen. <sup>8</sup> Na' daa gok ka', le biba bizaki beṅ'ka' lle' yel-la'.

<sup>9</sup> Na' lekzka' yella' wzoa to beṅ' willa' lie' Simón, na' kon yel' willa'na' chone' chziyee beṅ' doxen gana' mbani Samáriana', na' ben kwine' beṅ' choo beṅ' xen. <sup>10</sup> Yog' beṅ' lle' na' chzenaggake' xtilleena', ka bi' xk-wid' ka beṅ' gol, na' nagake':

—Beenin nsi'gake' Yel' Wak Choo Yel' Wak Xen che Chios.

<sup>11</sup> Na' le wyajle'gake' che', la' zan yiz ba gok chziyee legake' kon yel' willa'na' daa chone'. <sup>12</sup> Na' ka bzajni Felípena' legake' dill' wen dill' kob che yel' wṅabia' che Chioza' na' che Jesucrístona', na' beṅ' zan wyajle'gake' xtilleena' na' wchoagake' nisa', ka noolə ka beṅ' byo. <sup>13</sup> Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

<sup>14</sup> Na' ka wṅezi postlka' lle' Jerusalénna' ba chajle' beṅ' Samáriaka' cho'a xtill' Chioza', na' bsel'gake' Pédróna' len Juanna' Samáriana'. <sup>15</sup> Na' ka bllingake', be'llwillgake' Chioza' wṅabgakile'ne' soa loo yichjlall'do' beṅ' Samáriaka' Espíritu Sántona'. <sup>16</sup> La' biṅ' soa' Espíritu Sántona' loo yichjlall'do'eka'. Tochga ba wchoagake' nisa' daa chajle'gake' che Xancho Jesúza'. <sup>17</sup> Na'ch Pédróna' len Juanna' b̄xoá neeka' yichj beṅ'ka', na' jsoa Espíritu Sántona' loo yichjlall'do'eka'.

<sup>18</sup> Na' ka gokbe'i Simónna' jsoa Espíritu Sántona' loo yichjlall'do' beṅ'ka' biyoll b̄xoá na' postlka' yichje'ka', na' bshabile' legake' mech, <sup>19</sup> chi'e:

—Li gon nad' yel' waki kwenche nottez beṅ' ka wxoá na'ki yichje'ka' soa Espíritu Sántona' loo yichjlall'do'eka'.

<sup>20</sup> Na'ch Pédróna' golle'ne':

—Kwiayi'lenshgo' xmecho'na', daa chakilo' wak si'lono'n daa chon Chioza' ka'z. <sup>21</sup> Bikz ga gak gono' ka nak dga chonnto', la' bi nak yichjlall'do'na' ka cheeni Chioza'. <sup>22</sup> Biyaj bileni dii mala' chono', na' be'llwill Chioza' shi yizi'xene' cheyi daa ba goklalloo gono'.

<sup>23</sup> La' nakbia'cha bin nxe bin nzak' nak loo yichjlall'do'na', na' lennan' ntakw nchejan li'.

<sup>24</sup> Na'ch che' Simónna' legake':

—Li we'llwillgach Chioza' ni cha' kwenche bi gak daa ba wnale gak cha'.

<sup>25</sup> Na' ka biyoll be' Pédróna' na' Juanna' cho'a xtill' Chioza', na' biza'gake' ziyajgake' Jerusalénna'. Na' ka zingoo'gake' nez, be'gake' dill' wen dill' kob che Jesucrístona' zan yellka' gana' mbani Samáriana'.

Felípena' na' beṅ' Etiopíana'

<sup>26</sup> Na'ch to anjl che Xancho Chioza' wṅie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zezan yell Gázalə, neza' daa chde latja' gana' bibi chashj chleb.

<sup>27</sup> Na' wza' Felípena' zeje', na' tneza' billague' to beṅ' Etiopía wyaje' Jerusalénna' je'lawee Chioza'. Na' nake' to eunuco, † beṅ' zakii, na' nak lall' nee mech che noola wṅabia' che Etiopíana' beena' le Candace. <sup>28</sup> Na' ba zingwee nez ziyaje' lalle'nalə, na' ziyo'e loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi. <sup>29</sup> Na'ch Espíritu che Chioza' chi'e Felípena':

—Jabig' kwit karreta'.

<sup>30</sup> Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

<sup>31</sup> Na'ch beṅ' Etiopíana' chi'e:

—¿Nakra gon' shajniida'n?, la' bi zoa no wzajni nad'. Na' golle' Felípena':

—Wyepgach na' wche' kwitii.

<sup>32</sup> Na' Cho'a Xtill' Chioza' gana' chlabe' nan:

Betgake'ne' ka chite' to xil'do';

na' ka to xil'do', ba bi chosyaa kat' chshibe'b, ka'kz le', ni shcho'a dill' bi wṅie'.

<sup>33</sup> Na' bsi'gake'ne' yel' zto', na' aga no goklen le' gone' yel' joschis che'.

Na' kono xiiṅ dia che wzoa,

la' bsol b̄nitgake' yel' mban che'na'.

<sup>34</sup> Na'ch beṅ' Etiopíana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che beṅ' yoblan?

<sup>35</sup> Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúza'. <sup>36</sup> Na' ka bllingake' to ga lliia nis, na' che' beṅ' Etiopíana' Felípena':

—Ni lliia nis, ¿ade daa wsej wllonan choa' nisa'?

<sup>37</sup> Na' che' Felípena'ne':

—Shi chajli'o do yichj do lalloo, wak wchoa' li' nisa'.

Na' che' beṅ' Etiopíana':

† Eunuco: zezin beṅ' wlejgake' xshitin wa beṅ' bibi nsee ka chaltie'. Bwia glosáriona'.

—Chajli'a Jesucristona' nake' Xiiñ Chioza'.

<sup>38</sup> Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'. <sup>39</sup> Na' ka bichej-gake' loo nisa', Espíritu che Xancho Chioza' biçhi'e Felípena' gan yoblə, na' aga ble'chi beñ' Etiopíana' le', per chiba chizakile' ziyaje'. <sup>40</sup> Na' Felípena' billine' yella' le Azoto, na' bidie' to to yell chyise' dill' wen dill' kob che Jesúza' axt billintie' Cesareana'.

### Bisha' Chioza' yichjall'do' Sáulona'

(Hch. 22:6-16; 26:12-18)

**9** Na' Sáulona' kon chde' chwall chshebe' beñ'ka' nonjilall' Xancho Jesucristona'. Chiyiljallee nak gone' kwenche wite' legake'. Daan wyaje' Jerusalénna' jawie' bχoz choo bχoz xenna' <sup>2</sup> na' wñabile'ne' wzeje' twej yish che to to gana' chdop chllag beñ' wllall' che'ka' choe'lwillgake' Chioza' yell Damáscona', na' we'n lsens yiyilje' beñ'ka' ba wyoo lo nez li nez shao' che Jesucristona' na' goxee legake' kwenche yichi'e legake' pres Jerusalénna', ka noolə ka beñ' byo. <sup>3</sup> Ka ni ngwee nez, na' ba zoa illine' yell Damáscona', tokonganzi wyeçhj to beeni' xen wal le' dii za' yabalə. <sup>4</sup> Na' Sáulona' jç-haze' lo yona' na' benile' to shii beñ', chi'ene':

—Saulo, Saulo, ¿biçhe chçhi' chsak'zo' nad'?

<sup>5</sup> Na'ch Sáulona' chi'e:

—¿Nora li', beñ'?

Na'ch billii beenan', chi'e:

—Nadaan Jesúza', beena' chçhi' chsakoo. Na' daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b.

<sup>6</sup> Na'ch Sáulona' axt chxiztite' daa chllebe', na' gollene':

—Xan', ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiya' gono'.

<sup>7</sup> Na' beñ'ka' zejlengake' Sáulona' txen legatega wze-gake' bibangakile' na' bllebgake', daa bengakile' chak xñe, per ni to kono ble'gakile'. <sup>8</sup> Na'ch biyas Sáulona' lo yona'. Na' ka bixa' jalawe'na' aga ble'chile'. Na' beñ'ka' zejlene' txen beç'gake' neena' kwenche bche'gake'ne' yell Damáscona'. <sup>9</sup> Na' shon' lla bi gok ile'ile', ni bi weej wdawe'.

<sup>10</sup> Na' Damáscona' zoa to beñ' chonjilallee Jesúza' na' lie' Ananías, na' ben Xancho Jesúza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

<sup>11</sup> Na' Xanchona' chi'ene':

—Wyaj, na' wyoo neza' daa le Shlich'a, na' lill Júdaza' inabo' to beñ' Tarso, beñ' le Saulo. Ba choe'lwille' nad', <sup>12</sup> na' ba ble'do'ile' li' choo gana' zoe' na' chxo'a noona'ne' kwenche yile'ile'.

<sup>13</sup> Ka beni Ananíaza' chi'ene' ka', na' gollene':

—Xan', ze xtill' beena' chsak'zi'e beñ'ka' nonjilall' li' Jerusalénna'. <sup>14</sup> Na' naa ba blee ni noxee yish daa bzej

bχozka' chñabia' daa cho'en lsens goxee yog'lo'into', neto' choe'lwillnto' li', na' yichi'e neto' pres Jerusalénna'.

<sup>15</sup> Na' Xancho Jesúza' gollene':

—Wyaj, la' ba wlej' Sáulona' kwenche wi'e xtillaana' lao beñ'ka' bi nak beñ' Israel, na' lao beñ' wñabia' che'ka', na' lekzka' laole le' nakle beñ' Israel. <sup>16</sup> Nad' wliidee ka chiya' si' sakee ni çha'.

<sup>17</sup> Na'ch Ananíaza' wyaje' gana' zoa Sáulona' na' wyo'e loo yoon'a, na' bχoa neena'ne'. Na' chi'ene':

—Saulo, beñ' bish', Xancho Jesúza', beena' wñie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjall'do'na'.

<sup>18</sup> Na' ka bχoa neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. <sup>19</sup> Na' ka wdawe', biyakshao'lallee, na' bi-gaanlene' beñ'ka' nonjilall' Jesúza' yell Damáscona' zan lla.

### Be' Sáulona' xtill' Chioza' yell Damáscona'

<sup>20</sup> Na' lii wzolote Sáulona' cho'e xtill' Crístona' to to gana' chdop chllag beñ' Israelka' choe'lwillgake' Chioza' yell Damáscona', na' chi'e beñ'ka' Jesúza' nake' Xiiñ Chioza'. <sup>21</sup> Na' yog' beñ'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chçhi' chsakee beñ'ka' nonjilall' Jesúza' Jerusalénna'? Na' ¿aaga ni cheyinnan' bide' ni kwenche yichi'e yog'lo'lgake' pres ljasane' legake' lao bχozka' chñabia'?

<sup>22</sup> Na' btipch lall' Sáulona' kwenche zizikchli bi'e dill' nan Jesúzan' nake' beena' bcheb Chioza' wselee kwenche inabi'e, na' bich gok ina beñ' Israelka' lle' yell Damáscona' bi nakan ka'.

### Bila Sáulona' lo na' beñ' Israelka'

<sup>23</sup> Ka ba gok zan lla choe' Sáulona' xtill' Jesúza' yell Damáscona', na' beñ' Israelka' lle' na' bshag ljwellgake' nan witgake'ne'. <sup>24</sup> Na' gokbe'i Sáulona' ba chinogake'ne'. Ka wal' ka tella wdapgake' cho'a puert che zeena' daa neçhj yella' kwenche gox'gake'ne' ka yicheje' na' witgake'ne'. <sup>25</sup> Na'ch beñ'ka' nonlene' txen, wal-lə wloogake'ne' to loo llom na' bi'letjgake'ne' lee zeena' neçhj yella' kwenche bile'.

### Billin Sáulona' Jerusalénna'

<sup>26</sup> Ka billin Sáulona' Jerusalénna', gokile' lene' beñ'ka' nonjilall' Jesúza', per yog'lo'le' bllebgake'ne', bi wya-jle'gake' shi dii li' ba chonjilallee Jesúza'. <sup>27</sup> Na' Bernabé-na' bçhi'e Sáulona' gana' lle' postlka'. Na' gollé' legake' nan Sáulona' ble'ile' Xancho Jesúza' tneza' ka zeje' yell Damáscona', na' Jesúza' be'lene'ne' dill'. Na' lekzka' gollé' legake' bi bllebe' bi'e xtill' Jesúza' yell Damáscona'. <sup>28</sup> Na' ka' gok bigaan'e' Jerusalénna' goke' txen beñ'ka' nonjilall' Jesúza', na' wal inlebgake' bi'e xtill' Xancho Jesúza'. <sup>29</sup> Na' be'lene' dill' beñ' Israelka' chñe dill' griegona' kwenche shajle'gake' che Jesúza', per le-gake' goklall'ligake' witgake'ne'. <sup>30</sup> Na' ka wñezi beñ'ka'

nonlilall' Jesúza' ba chinogake' Sáluna' kwenche wit-gake'ne', bche'gake'ne' Cesareana'lə. Na' ka bllingake' na', na' bise'l'gake'ne' Társona'lə gana' nak lalle'.

<sup>31</sup> Na'ch beŋ'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xhez Chioza' na' kwenche wyanchgake'.

### Biyaki beena' le Eneas

<sup>32</sup> Do kana', chda Pédrona' chjawie' beŋ'ka' nonlilall' Jesúza' to to yell, na' lekzka' jawie' beŋ'ka' lle' yell Lídana'. <sup>33</sup> Na' yell Lídana' jti'e to beŋ' le' Eneas. Ba gok xon' yiz die' bi chak chase' daa net ŋi'a neena'. <sup>34</sup> Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. <sup>35</sup> Na' yog' beŋ'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

### Biban Dorcaza' ladj beŋ' wetka'

<sup>36</sup> Na' lekzka' yell Jópena' wzoa to noolə benlilallee Jesúza', na' wlie' Tabita, † na' dill' griegona' che'gake'ne' Dorcas. Na' nooli, shlak wbane' toshiizi bzani ŋi'a neena' goklene' beŋ', na' biyesh'lallile' beŋ'ka' bibi de cheyin. <sup>37</sup> Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliá shkwiana' cha'lə. <sup>38</sup> Na' Jópena' llian gaozə yell Lídana', na' beŋ'ka' wnezgakile' zoa Pédrona' yell Lídana', na'ch bse'l'gake' chop beŋ' jellgake'ne':

—Sho'gach Jópena' ŋaate.

<sup>39</sup> Na'ch Pédrona' wzee zejlene' beŋ'ka' Jópena'. Na' ka blline', na' jwa'gake'ne' loo yoona' gana' de beŋ' weta', na' yog' nool wizebka' wyeçhjgake' Pédrona' chbell-gake', na' bli'gakile'ne' xe'ka' daa ben dii Dorcaza' shlak wbane'. <sup>40</sup> Na' Pédrona' bibeje' yog'lole' chyoolə, na' bçhek' xibe'na' be'lwille' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii bixá'te jalao Dorcaza' chwie' Pédrona'. Na'ch biyase' bibi'e. <sup>41</sup> Na' Pédrona' bexee neena' na' bisol-léene'. Na'ch biŋie' nool wizebka' na' nochlə beŋ'ka' nonlilall' Jesúza' kwenche bizoe'ne' shi'a shbane' lawe'ka'. <sup>42</sup> Na' wze dill' doxen yell Jópena' ka gok che Dorcaza', na' beŋ' zan benlilall'gake' Xancho Jesúza'.

<sup>43</sup> Na' Pédrona' bigaane' Jópena' zan lla lill Simónna, beena' chkoll yidxa bayix'ka'.

### Pédrona' na' Cornéliona'

**10** Na' yell Cesareana' wzoa to beŋ' wlie' Cornelio, na' nak lall' nee zan soldadka', na' beŋ'ka' nak lall' nee wlegake' Beŋ' Italia. <sup>2</sup> Na' Cornéliona' len beŋ'ka' nakgake' toz loo yoo lille'na' choe'la'ogake' Chioza' na' chall chllibgake'ne'. Na' zoatezi zoe'

choe'lwille' Chioza' na' cho'e mech xen kwenche chak-lene' beŋ' Israelka', beŋ'ka' chyalj chçhinin. <sup>3</sup> To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—jCornelio!

<sup>4</sup> Na' Cornéliona' chwiayenee anjla' do chllibze', na' golle'ne':

—¿Beran cheenilo' beŋ'do'?

Na' anjla' chi'ene':

—Chioza' chibaile' daa zoatezi zo' choe'lwillo'ne' na' daa chakleno' beŋ' yesh'ka'. <sup>5</sup> Na' ŋaa bse'l' beŋ' shaj-gake' yell Jópena' kwenche lljxi'gake' beena' le Simón Pedro. <sup>6</sup> Zoe' lill to beŋ' le Simón, beena' chkoll yid, na' lille'na' zoan gaoz cho'a nisdona'. Na' Simón Pédrona' iŋe' li' daa chiyal' gono'.

<sup>7</sup> Na' ka biza' anjla' bshaljlen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee xzezi bittez. <sup>8</sup> Na' golle' legake' yog' daa goll anjla', na'ch bselee legake' Jópena'.

<sup>9</sup> Na' betiyo do ka gobill ba zoa illin beŋ'ka' bse'l' Cornéliona' yell Jópena'. Na' ka lo gora', Pédrona' wyepe' koll' yoona' gana' zoe' kwenche we'lwille' Chioza'. <sup>10</sup> Na' wdone', na' goklallee gawe' shel'ka'. Na' shlak chongake' daa gawe', ble'do'ile' <sup>11</sup> byalj yabana', na' to dii nak ka to lech' xen dii nchej tap yichjten chet-jan lo yona'. <sup>12</sup> Na' loo lechaa lle' biya bayix', no ba lliá tap ŋi'a na'in, na' no ba chxobi leeb lo yona' na' no ba zoa xilin. <sup>13</sup> Na'ch benile' shii to beŋ', chi'ene':

—Wzolla' Pedro. Bet baka', na' wdao.

<sup>14</sup> Na'ch Pédrona' golle'ne':

—Bi gaw' baka', Xan'; ni shlin biŋ' gaw' baki bi nak ba xilall'.

<sup>15</sup> Na' sto shii benile' shii beena', chi'ene':

—Daa ba wna Chioza' wak gawo', bich iŋazo' bi nakan xilall'.

<sup>16</sup> Shon shii golle' ka', na'ch biyep lechaa yabana'.

<sup>17</sup> Na' chibani Pédrona' chakile' bera zejin daa ble'do'ile', ka bllin beŋ'ka' bse'l' Cornéliona' cho'a yoona' gana' zoe', daa ba wŋabgake' gan zoa lill beena' le' Simón, beena' chkoll' yid xa bayix'ka'. <sup>18</sup> Na' ka bllingake', na' wŋegake' zillj wŋabgake' shi nan' zoa to beŋ' le Simón Pedro. <sup>19</sup> Na' Pédrona' zie' wŋeyi cheyi daa ble'do'ile', kat' wne Espíritu Sántona', chi'ene':

—Bwiakachi, na' lle' shon beŋ' chiyiljgake' li'. <sup>20</sup> Bizolla' na' biyetj, na' wyajlengake'. Bi gakçhopilo', la' nadaan bse'laa legake'.

<sup>21</sup> Na'ch biyetj Pédrona' gana' lle' beŋ'ka' bse'l' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

<sup>22</sup> Na'ch che' beŋ'ka' Pédrona':

—To beŋ' wŋabia' che soldadka' lie' Cornelio bselee neto'. Nike' to beŋ' zej shli lao Chioza' na' ngooshosh yichje'ne', na' yog' beŋ' Israelka' nezgakile' zoe' chone' wen. Na' to anjl che Chioza' golle'ne' iŋie' li' kwenche shajo' lille'na' wzajniilo'ne' na' wzenague' dill'ka' we'lono'ne'.

† Tabita: dillii nakan dill' arameo.

<sup>23</sup> Na'ch Pédróna' wlo'e legake' loo yoolə gana' zoe', na' bigaangake' shyel. Na' betiyo wyajlen Pédróna' legake' na' len to chop ben' Jope, ben' nonlilall' Jesúza'.

<sup>24</sup> Na' llana' sto bllingake' Cesareana'. Na' Cornéliona' ba btope' yog'loj dilla che'na' na' ben'ka' nllaguile', na' ba lle'gake' lille'na' chbezgake' illin Pédróna'. <sup>25</sup> Na' ka bllin Pédróna' lill Cornéliona', lii bchejte Cornéliona' bçhek' xibe'na' lawe'na' choe'laweene'. <sup>26</sup> Na' Pédróna' bisolléene', chi'ene':

—Bizolla', bi wçhekz' xibo' lawii, la' lekzka' ben'zə nad'.

<sup>27</sup> Na'ch shlak chshaljgake' wyoogake' loo yoona', na' ble'i Pédróna' ben' zan ba lle'. <sup>28</sup> Na'ch golle' legake':

—Le' nezile ka na ley çhento'na', neto' ben' Israel bi chiyal' gonnto' txe' le' bi nakle ben' Israel, na' ni bi chiyal' sho'nto' loo yoo lill-le. Per Chioza' ba bzajniile' nad' bi chiyal' gaked' zban nottez ben'. <sup>29</sup> Daan ka bla' ben'ki chnegake' nad', lii za'tia' bi bçhia' dill'. Na' naa cheenid' inezid' biçhe bse'loo ben'ki bidxi'gake' nad'.

<sup>30</sup> Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'. <sup>31</sup> Na' wne' nad': "Cornelio, Chioza' ba bzenague' daa choe'lwill'ne', na' lekzka' chle'ile' ka chakleno' ben' yesh'ka'. <sup>32</sup> Na' bsel' ben' shajgake' yell Jópéna' lljxi'gake' Simón Pédróna' kwençhe yide' we'lene' li' dill'. Zoe' lill to ben' le Simón, ben' chkoll yid, na' lill beeni zoon gaoz cho'a nido'na'." <sup>33</sup> Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagn-to' yog' cho'a dillaa daa cheenile' ino' neto'.

#### Be' Pédróna' dill' lill Cornéliona'

<sup>34</sup> Na'ch wzolo Pédróna' bi'e dill', chi'e:

—Chakbe'id' naa, dii li Chioza' aga nakzi ben' chakile', <sup>35</sup> san chle'shiile' yog' ben' lle' gattez yell kon shi chall chllibgake'ne' na' chongake' daa nak shli. <sup>36</sup> Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucristona', beena' nak Xan yog'lojcho. <sup>37</sup> Nezkzile kwasloj diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis. <sup>38</sup> Nezile Chioza' bi'e Jesús, ben' Nazareta', yel' wak na' Espiritu Sántona', na' wda Jesúza' bene' dii wenka' na' biyone' yog' ben'ka' ntakw nçhej dii xiwaa, daa wzolen Chioza' le'. <sup>39</sup> Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. <sup>40</sup> Per Chioza' bisbane'ne' ladj ben' wetka' biyong llana', na' bidli'lawe' neto'. <sup>41</sup> Aga yog' ben' bli'lao Jesúza' ka bibane' ladj ben' wetka', san bli'lawe' toz neto', neto' naknto' ben' ba wlej Chioza' kwençhe we'nto' xtilleena'. Na' neto' weej wdaolento'ne' ka wde bibane' ladj ben' wetka'. <sup>42</sup> Na' Jesúza' bselee neto' çhixje'into' ben' nan Chioza' nzoe'ne' kwençhe gone' yel' josphis che yog'loj ben', ka ben' mban na' ka ben' ba wit. <sup>43</sup> Na' lekzka' kani'yi yog' dii

ben'ka' wdixjee daa goll Chioza' legake' be'gake' xtil' Jesúza', wngake' Chioza' yizi'xene' saaxya çhe notteza ben' gonlilallee Jesúza'.

#### Wyo Espiritu Sántona' loo yichjall'do' ben'ka' bi nak ben' Israel

<sup>44</sup> Na' ni chshaljte Pédróna', kat' Espiritu Sántona' wyo'e loo yichjall'do' yog' ben'ka' chzenaggake' xtilleena'. <sup>45</sup> Na' ben' Israelka' nonlilall' Jesúza', ben'ka' bllinlen Pédróna' lill Cornéliona', bibangakile' daa wyo Espiritu Sántona' loo yichjall'do' ben'ka' bi nak ben' Israel. <sup>46</sup> Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. <sup>47</sup> Na' Pédróna' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espiritu Sántona' loo yichjall'do'eka' ka ba yo'e cho'.

<sup>48</sup> Na' ben Pédróna' mandad wchoagake' nisa' daa chonlilall'gake' Xancho Jesucristona'. Na' biyolla' wñabgakile' Pédróna' kwençhe bigaanlene' legake' chop shon lla.

#### Pédróna' golle' ben' Jerusalénka' ka gok

**11** Na' postlka' na' nochlə ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtil' Chioza'. <sup>2</sup> Na' ka billin Pédróna' Jerusalénna' gokdi-len xonj ben' le', ben'ka' che' chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel. <sup>3</sup> Na' gollgake'ne':

—¿Biçhe wyoozo' loo yoo lill ben'ka' bi nak ben' Israel na' weej wdaolenzgako'ne'?

<sup>4</sup> Na'ch Pédróna' golle' legake' yog' ka gok, chi'e:

<sup>5</sup> —Kana' ni zoa yell Jópéna', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. <sup>6</sup> Na' ka bwiayenaa diika' llia loo lechaa, na' ble'id' lle' bayix' ba zoa tap ni'a na'b, na' no ba zña, no ba chxobi le'in lo yona', na' ba zoa xilin. <sup>7</sup> Na' benid' shii to ben' ne' nad': "Wzolla' Pedro, bet baka' na' wdao." <sup>8</sup> Na' goshee: "Bi, Xan', ni tshii bin' gaw' baki bi nak ba xilall'." <sup>9</sup> Na' sto shii benid' shii beena' ne' nad': "Daa ba wna Chioza' wak gawo' bich inazo' bi nakan xilall'." <sup>10</sup> Gokte shon shii wne ka', na'tech biyep lech' xenna' yabana'. <sup>11</sup> Na' shintg ble'do'id' diika' kat' bidse shonə ben' cho'a yoona' gana' zoa', zaake' yell Cesareana' ziddiljgake' nad'. <sup>12</sup> Na' Espiritu che Chioza' wne' nad' bi gonçhoplallaa sha'len' legake'. Na' lenkz ben' bish'choki xop wza'lengake' nad', na' yog'tento' wyoonto' lill Cornéliona'. <sup>13</sup> Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': "Bsel' to chop ben' yell Jópéna' kwençhe lljxi'gake' beena' le Simón Pedro. <sup>14</sup> Na' le' inə' li' nakan gono' kwençhe yilaleno' ben'ka' lle' loo yoo lillo'na' bi kwiayi'le." <sup>15</sup> Na' ka wzoloa' choe'lengakee dill', betj Espiritu Sántona' wyo'e loo yichjall'do'eka', ka bidsoe' loo yichjall'do'choki. <sup>16</sup> Na'ch jadinid' daa wna Xancho Jesúza' kana' wne': "Dii li Juanna' bchoe' ben' nis, san

le', dii zak'chi gak chele, daa yidsoa Espíritu Sántona' loo yichjilall'do'lena'." <sup>17</sup> La' Chioza' bene' ka zoa Espíritu Sántona' loo yichjilall'do'eka' ka zoe' loo yichjilall'do'cho-ki, cho' chonjilall'cho Xancho Jesucristona'. Na' znora nak' nad' wllon' gon Chioza' daa cheenile' gone'?

<sup>18</sup> Na'ch ka biyoll bzenag beñ' Jerusalénka' nonjilall' Jesúza' dillaa be' Pédrona', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len beñ'ka' bi nak beñ' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kanj.

### Beñ'ka' nonjilall' Jesúza' Antioquíana'

<sup>19</sup> Na' beñ' Israelka' nonjilall' Jesúza', beñ'ka' bsheshlesgake' ka wde wit dii Estébanna', baļe' wyaj zit' axt Feniciána', na' zi baļe' bllin Chíprena' na' zibaļe' bllin yell Antioquíana'. Na' gana' bllin to toe' be'lengake' to beñ' wlall che'ka'z xtilł' Jesúza'. <sup>20</sup> Per baļ beñ'ka' nak beñ' Chipre na' beñ' Cirene, ka bllingake' yell Antioquíana', wzologake' be'lengake' beñ' bi nak beñ' Israel dill' wen dill' kob che Xancho Jesúza'. <sup>21</sup> Na' yel' wak che Xanchona' wzoalenan legake', na' beñ' zan wlej yichjgake' diika' nxenilall'gake' na' benjilall'gake' Xancho Jesúza'.

<sup>22</sup> Na' beñ'ka' nonjilall' Jesúza' Jerusalénna', ka wnezgake' ba nonjilall' beñ' Antioquíaka' Jesúza', na' bseļ'gake' Bernabéna' jawie' legake'. <sup>23</sup> Na' ka blline' Antioquíana', ble'ile' ba goklengcha Chioza' legake' na' le bibaile'. Na' btipche' lall' beñ'ka' kwenche soaचेच-gake' gonjilall'gake' Xancho Jesúza' do yichj do lall'gake'. <sup>24</sup> Na' beñ' zanch benjilall'gake' Xancho Jesúza', la' Bernabéna' nake' to beñ' wen, na' chñabia' Espíritu Sántona' le', na' le benjilalle Chioza'.

<sup>25</sup> Na' ka wde, wza' Bernabéna' zeje' Társona' kwenche lljadilje' Sáulona', na' ka bililele'ne' na' bchi'ene' Antioquíana'. <sup>26</sup> Na' wzoalengake' beñ'ka' nonjilall' Jesúza' Antioquíana' twiz, na' bli' bsdgake' beñ' zan. Na' Antioquíana' dii nechdo' bsi'gake' beñ'ka' nonjilall' Jesucristona' "Cristianos".

<sup>27</sup> Na' do kana'kzə, baļ beñ'ka' chyixjee daa che' Chioza' legake' wza'gake' Jerusalénna' bllingake' Antioquíana'. <sup>28</sup> Na' wzolla' toe', beena' le Ágabo, na' bi'e dill' ka ba bzajnii Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chñabia' beena' le Claudio gana' mbani Rómána'. <sup>29</sup> Na' beñ' Antioquíaka' nonjilall' Jesúza' be'gake' dill' we'gake' kon ka'k' wej gak we' to toe' kwenche galkengake' beñ'ka' nonjilall' Jesúza' gana' mbani Judeana', gana' chi' wbinna'. <sup>30</sup> Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao beñ'ka' ngoo lall' na' beñ'ka' nonjilall' Jesúza' Judeana'.

### Betgake' Jacóbona' na' wloogake' Pédrona' lillyana'

**12** Na' do kana'kzə beñ' wñabia' Heródeza' bexee baļ beñ'ka' nonjilall' Jesúza' kwenche wchi' wsakee legake'. <sup>2</sup> Na' bchogloe' gueti Jacóbona' yesya, beena' nak beñ' bish' Juanna'. <sup>3</sup> Na' ka gokbe'ile' bibayi

beñ'ka' chñabia' beñ' Israelka' daa bene' ka', na'ch lekzka' bexee Pédrona' lo lñi Paskwa' kana' chaogake' yetxtila' daa bi nchix lewadúrana'. <sup>4</sup> Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdap-gake'ne'. Na' gokile' yiyoll lñi Paskwa' kweje'ne' lao beñ' yellka' na' wchogloe' che' guete'. <sup>5</sup> Shlak nej Pédrona' lillyana', beñ'ka' nonjilall' Jesúza' toshiizi be'llwill-gake' Chioza' ni che'.

### Chioza' bibeje' Pédrona' lillyana'

<sup>6</sup> Na' lle'na' ka wxezə kwej Heródeza'ne' kwenche wchogloe' che' guete', Pédrona' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'. <sup>7</sup> Na' tokonganzi bllin to anjl che Xancho Chioza' gana' de Pédrona' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. <sup>8</sup> Na'ch che' anjla'ne':

—Bikaacha li'ona' na' bilej xelo'na'.

Na' ben Pédrona' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

<sup>9</sup> Na'ch zjano Pédrona' anjla', ni bi ñezile' shi ka chakkzan, kon gokile' chle'do'zilen'. <sup>10</sup> Na' bidegake' gana' lle' soldadka' shkwen, na' bidetegake' gana' lle' beñ'ka' zi shkwen, na' ka bllingake' gana' zoa puert de yana' daa liizelote, to kwizn byaljan na' bichejgake'. Na' ka ba biyoogake' neza', bikwaan anjla' toz Pédrona'. <sup>11</sup> Kana'ch gokbe'i Pédrona', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non beñ' Israelki lez gak cha'.

<sup>12</sup> Na' ka gokbe'ile' ba bicheje' lillyana', na' ziyaje' lill Maríana' xña' Juanna', beena' nsi'gake' Marcos. Na' lill Maríana' ndop nllag beñ' zan choe'llwillgake' Chioza'.

<sup>13</sup> Ka blline', na' wñie' cho'a leeja', na' bchej to bi' noola le Rode, jawiab' no beena' chñe. <sup>14</sup> Na' ka biyombia'b' shii Pédrona' chibachgaib', na' daa le chibaib' bikz bsalj'b'. Zigaate jayellb' beñ'ka' lle' loo yoona' ba ze Pédrona' cho'a leeja'. <sup>15</sup> Na'ch che'gake'b':

—Chakzilo'n.

Na' le'b' wzeyidb' che'b' len'. Na' legake' che'gake'b':

—Anjl che'na'ljan.

<sup>16</sup> Na' Pédrona' ni zie' chñie' cho'a leeja'. Na' ka bsalj-gake' ble'gakile'ne', bibanchgagakile'. <sup>17</sup> Na'ch Pédrona' bene' to señ kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' beñ' bish'choka' ka ba ben Xanchona' cha'.

Na'ch bizee ziyaje' gan yoblə.

<sup>18</sup> Na' ka wyeeni', wche' to yel' wban xen ladj soldadka' daa bi gokbe'gakile' nak gok bichej Pédrona'.

<sup>19</sup> Na'ch Heródeza' bta bñie' beñ'ka' biyiljgake'ne', na' bi billegakile'ne'. Na'ch wñabile' soldadka' chap lillyana' nak gok bicheje', na' bikz bi dill' be'gake'. Na'ch



bene' mandad betgake' soldadka'. Na' ka wde bene' ka', wzee Judeana' jsoe' Cesareana'.

### Ka wit Heródeza'

<sup>20</sup> Heródeza' chllée beŋ' Tíroka' na' beŋ' Sidónka'. Na' beŋ'ki gokgake' toz bshaljengake' Blástona', to wen llin zakii che Heródeza', na' bengakile'ne' wen kwenche goklene' legake', la' byalljgakile' si'gake' dii yeej gogake' gana' chñabia' Heródeza'. Na' Blástona' bshaljlene' Heródeza' kwenche wxi'xene' che beŋ' Tíroka' na' beŋ' Sidónka' na' yizoalene' legake' wen sto shii. <sup>21</sup> Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' beŋ'. Na'ch jshie' gana' chchogloe' che beŋ', na' bi'e dill' lao beŋ'ka' ndop nllag na'. <sup>22</sup> Na' shlak cho'e dill', na' besyaa beŋ'ka' che'gake':

—To chioza'n chñe, aga kontele beŋaan.

<sup>23</sup> Na' anjl che Xancho Chioza' lii be'tie' Heródeza' to yillwe' wal benan ka chyin chllall' be' bzog'ka' loo li'ena' na' wite', daa bi'e latj wloo beŋ'ka' le' balaan daa chidol' toz beena' nak dowalj Chios.

<sup>24</sup> Na' dill' wen che Chioza' zej chlliljchan doxen.

<sup>25</sup> Na' Bernabéna' len Sáulona' ka wde bengake' daa chiya' gongake' Jerusalénna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

### Bernabéna' na' Sáulona' je'gake' cho'a xtill' Chioza' yell zit'ka'

**13** Na' ladj beŋ'ka' nonlilall' Jesúsza' yell Antioquíana' lengake' beŋ' chyixjee daa che' Chioza' na' beŋ' chli' chsedi cho'a xtill' Chioza'. Na' legake' beŋ'ki: Bernabéna', Simónna', beena' che'gake' beŋ' gasj, Lúciona' beŋ' Cirénena', Sáulona' na' Manaénna', beena' bgol-len Heródeza' beena' wñabia' gana' mbani Galileana'. <sup>2</sup> Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

<sup>3</sup> Na' ka wyeelo be'llwillgake' Chioza' na' biyoll wzoagake' wbasaa, na' bxoaa neeka' yichj beŋ'ka' chop, na'ch bsel'gake' legake' gana' lljengake' xshin Chioza'.

### Páblona' na' Bernabéna' be'gake' cho'a xtill' Chioza' gana' le Chipre

<sup>4</sup> Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lío Chíprena' daa lliia lo nisdo'na'. <sup>5</sup> Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill' Chioza' to to gana' chdop chllag beŋ' Israelka' choe'llwillgake' Chioza'. Na' nche'gake' sto beŋ' le Juan kwenche gaklene' legake'. <sup>6</sup> Na' wdegake' to to yellka' lliia Chíprena'. Na' ka bllingake' yell Páfoza', na' ja-di'gake' to beŋ' Israel, beena' le Barjesús. Nake' to beŋ' willa', na' chziyee beŋ' chi'e nake' to beŋ' chyixjee daa

che' Chioza' le'. <sup>7</sup> Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to beŋ' chajni, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. <sup>8</sup> Na' beŋ' willa'na', nsi'gake'ne' Elimas (na' zej in beŋ' willa'), goklallee gone' ka bi shajle' beŋ' wñabia'na' che cho'a xtill' Chioza'. <sup>9</sup> Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiayenee Elímaza', <sup>10</sup> na' golle'ne':

—jLi' ben' wxiye', beŋ' wen dii mal, xiin dii xiwaan nako' na' chakzbanilo' yog' daa nak dii wen! ¿Biçe chshok chlewzo' daa nak dii li che Xancho Chioza'? <sup>11</sup> Na' naa Chioza' wselee yel' zi' cho', gone' ka icho'lo' na' shloll wen bich ile'ilo' beeni' che wbillla'.

Na' kate golle'ne' ka' lii wcho'tie', na' chgan chtobzile' chñabe' no yiyox' neena' daa bich chle'ile'. <sup>12</sup> Na' ka ble'i beŋ' wñabia'na' daa gok, na' wyajli'e, na' le bibanile' ka nak cho'a xtill' Xancho Jesúsza' daa chli' chsedgakile'ne'.

### Páblona' na' Bernabéna' wyajgake' yell Antioquíana' daa lliia gana' mbani Pisídiana'

<sup>13</sup> Na'ch Páblona' na' beŋ'ka' chdalene' wyoogake' barkwa' yell Páfoza' na' wyajgake' yell Pérgena' daa lliia gana' mbani Panfíliana', na' Juan Márcona' bixonje' ziyaje' Jerusalénna'. <sup>14</sup> Na' Páblona' len beŋ'ka' chdalene' na', biza'gake' yell Pérgena' na' wyajgake' yell Antioquíana' daa lliia gana' mbani Pisídiana'. Na' ka bllin lla sabda', llana' chombaen beŋ' Israelka', wyajgake' gana' chdop chllaggake' choe'llwillgake' Chioza', na' jche'lengake' beŋ'ka'. <sup>15</sup> Na' ka biyoll blabgake' lat' ley che Chioza' na' zi lat' daa bzej dii beŋ'ka' wdixjee daa goll Chioza' legake', na'ch beŋ'ka' chgoo xñezi cheyi di-ika' chongake' gana' chdop chllaggake' bsel'gake' to beŋ' gana' chi' Páblona' len Bernabéna' na' golle' le-gake':

—Le' beŋ' bish', shi bi dill' de we'lenle beŋ'ki kwenche wtipch lall'gake', wak we'len naa.

<sup>16</sup> Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', beŋ' Israel, na' le' bi nakle beŋ' Israel choe'la'ole Chioza', li wzenag dga inia': <sup>17</sup> Chios, beena' nonlilall'cho cho' beŋ' Israel, wleje' dii xozxto'choka' na' bene' ka wyangake' shlak wzoagake' Egíptona'. Na' bllin lla bibeje' legake' kon yel' wak che'na'. <sup>18</sup> Na' wdape' yel' chxenlall' che yel' widenag che'ka' lo choa yiza' wzoagake' latja' gana' bibi chashj chleb. <sup>19</sup> Na' bllia-ayee yellka' gall kwen lle' gana' mbani Canaánna' kwenche bi'e dii xozxto'choka' yell-lío che'ka'. <sup>20</sup> Kan' gok lawi tap guiyoa yoo gashj yiz. Na'tech, bzoo' Chioza' beŋ'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'. <sup>21</sup> Na'ch wñabgake' soa to beŋ' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'. <sup>22</sup> Na' ka bikwas Chioza' yel' wñabia' che dii Saúla', bizoe' dii Davina' inabi'e na' bi'e dill' che', wne': "Davina,

xiin Isaiña', nake' to beñ' chon ka chazlallaa, na' ñezid' gone' yog' daa cheenid' gone'." <sup>23</sup> Na' lo dia che dii Davina' golj Jesucristona', beena' wlej Chioza' kwenche yisle' cho' beñ' Israel lawi dii mala' kon ka' bchebe' gone'. <sup>24</sup> Na' ka zi' solo Jesúsza' wli' wsedile' beñ', dii Juanna' golle' yog' beñ' Israelka' chiya' yiyaj yilengakile' xtoleeka' na' choagake' nisa'. <sup>25</sup> Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': "Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmoše' kwenche wleçhj' xele'na'."

<sup>26</sup> Le' beñ' bish', le' nakle xiin dia che dii Abrahama', na' le' choe'la'ole Chioza' la'kzi bi nakle beñ' Israel, Chioza' ba bselee cho'a xtilleena' laochoni daa cho'en dill' yisle' beñ' kwenche bi kwiayi'gake'. <sup>27</sup> Beñ' Jerusalénka' na' beñ' wñabia' che'ka' bi gokbe'gakile' bsele' Chioza' Jesúsza'. Ni bi wyajni'gakile' diika' bzej dii beñ'ka' wdixjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'llwillgake'ne'. Na' daa wñagake' chiya' guet Jesúsza', billinin daa bzej dii beñ'ka' be' dill' daa goll Chioza' legake'. <sup>28</sup> La'kzi bibi dii mal billegakile' ben Jesúsza' dii gonan ka wçhoglogake' witgake'ne', wñab-gakile' Pilátona' gone' mandad witgake'ne'. <sup>29</sup> Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biljetgake'ne' lee yag cruza' na' jak-wash'gake'ne'. <sup>30</sup> Na' Chioza' bilise'ne' ladj beñ' wetka'. <sup>31</sup> Na' ka wde bibane', zan lla bli'lawe' beñ'ka' wno wnal'gake'ne' dezd ka wzee Galileana' zeje' Jerusalén-na'. Na' legaken' choe'lengakee beñ' wlall chechoka' xtilleena' naa.

<sup>32</sup> Na' chyixje'into' le' dill' wen dill' kob che Jesúsza' daa bcheb Chioza' lao dii xoxcto'choka'. <sup>33</sup> Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúsza' ladj beñ' wetka'. Gok ka nyoj Salmo de wchopina', gana' nan: "Lin' nako' Xiin', na' naa, daa solo inabi'o na' inzezi beñ' nadaan nak' Xo'." <sup>34</sup> Chioza' ba bi'e dill' yilise'ne' ladj beñ' wetka' na' bichga guete', na' wne': "Dii li' gaken' le' dii xen wal ka bcheb' lao dii Davina'." <sup>35</sup> Na' lezkza' sto Salmo nan: "Bi wi'o latj gooll' iteb beli chen cha'ni, daa nak' lall' no'." <sup>36</sup> Na' ñezicho dii Davina' goklene' dii xoxcto'cho-ka' kon ka bllia Chioza' bi'a gone', na' ka bllin lla wite' jakwash'gake'ne' gana' bkwash'gake' dii xoxcto'e'ka', na' gooll' bteb beli chen che'na'. <sup>37</sup> Per kwerp che Jesúsza', beena' bisban Chioza' ladj beñ' wetka', bi wllia-ayi'n. <sup>38</sup> Le' beñ' bish', chyixje'into' le' Chioza' chizi'xene' xto' nottez beñ' chonjilallee Jesúsza'. <sup>39</sup> Nottez beñ' gonjilalleene' yiyake' beñ' li beñ' shao' lao Chioza'. Aga no yiyak beñ' li beñ' shao' lao Chioza' daa chone' daa na ley che dii Moisésza'. <sup>40</sup> Na' li wsak' kwenche ki gak chele ka bzej dii beñ'ka' be' dill' daa goll Chioza' legake' kani'yi, gana' nan:

<sup>41</sup> Li wwia, le' beñ' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

<sup>42</sup> Na' ka bichejlen Páblona' beñ'ka' nakgake'ne' txen gana' chdop chllag beñ' Israelka', na'ch beñ'ka' bi nak beñ' Israel wñabgakile'ne' we'lene' legake' cho'a xtill' Chioza' lla sabda' sto. <sup>43</sup> Na' ka billeshgake', zan beñ' Israelka', na' zan beñ'ka' chongake' legake' txen choe'la'ogake' Chioza', janogake' Páblona' len Bernabéna'. Na' Páblona' len Bernabéna' gollgake' legake' chiya' soaçheçhgake' gonjilall'gake' Chioza' daa le chakile' legake'.

<sup>44</sup> Na' ka bizoa xmana' sto, llana' chombaan beñ' Israelka', zi lat'z ki biya beñ'ka' lle' yella' bdop kwenche wzenaggake' cho'a xtill' Chioza'. <sup>45</sup> Na' ka ble'i beñ' Israelka' beñ' zan ndop nllag, na' gokxe'gakile' Páblona' na' wñegake' zban che dillaa cho'e, na' biya dii wñagake' che'. <sup>46</sup> Na'ch Páblona' len Bernabéna' aga blleb-gake', na' gollgake' beñ' Israelka'.

—Benan byen zigaate le' wzajniinto' cho'a xtill' Chioza'. Per daa bi cheenile wzenaglen, chli'le bi chido'le gon Chioza' ye' mban chele zejli kani, na' solochoklanto' naa wzajniinto'n beñ'ka' bi nak beñ' Israel. <sup>47</sup> La' dgan non Xancho Chioza' mandad gonnto', na' ne':

Ba bzoa' li' kwenche gono' ka sho' beeni' cha'na' loo yichjlall'do' beñ'ka' bi nak beñ' Israel.

Na' yoo beñ'ka' lle' doxen yell-lioni ka gongake' kwenche yilagake' na' bi kwiayi'gake'.

<sup>48</sup> Na' beñ'ka' bi nak beñ' Israel, ka bengakile' daa wna Páblona' len Bernabéna', le bibagakile' na' wñagake' le mba nak cho'a xtill' Chioza'. Na' yog' beñ'ka' ba wlej Chioza' kwenche gat' ye' mban chegake' zejli kani beñ'jilall'gake' Jesúsza'. <sup>49</sup> Ka' gok bliilj cho'a xtill' Xancho Jesúsza' doxen na'. <sup>50</sup> Na' beñ' Israelka', beñ'ka' bi wyajle'gake' che Jesúsza', wlooyel'gake' ba' noolə wnia'ka', beñ'ka' choe'la'o Chioza', na' beñ' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'. <sup>51</sup> Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' beñ'ka' lle' na' wzenaggake' che Chioza'. Na' wyajgake' yell Icóniona'. <sup>52</sup> Na' beñ'ka' nonjilall' Jesúsza' wzoachgagake' mbalaz, na' Espíritu Sántona' wñabi'e loo yichjlall'do'eka'.

#### Bllin Páblona' len Bernabéna' Icóniona'

**14** Na' ka bllin Páblona' len Bernabéna' Icóniona', wyajgake' gana' chdop chllag beñ' Israelka' choe'llwillgake' Chioza'. Na' Chioza' goklene' legake' ka be'gake' cho'a xtilleena' kwenche beñ' zan beñ'jilall'gake' Jesúsza', ka beñ' Israel na' ka beñ' bi nak beñ' Israel. <sup>2</sup> Na' beñ' Israelka', beñ'ka' bi goni shajle' che Jesúsza', wlooyel'gake' ba' beñ'ka' bi nak beñ' Israel kwenche gokzbangakile' beñ'ka' nonjilall' Jesúsza'.

<sup>3</sup> Daan bigaan Páblona' len Bernabéna' Icóniona' ssha, na' be'gake' xtill' Xancho Jesúsza' na' bi blleb-gake', la' nxenilall'gake' zolen Xancho Chioza' legake'. Na' Xan-chona' goklene' legake' bli'gake' ye' wak che'na' kwenche gokbe'i beñ' nan choe'gake' dill' li. <sup>4</sup> Na' beñ' Icónioka' gokgake' choplə, ba'le' wda'gake' beñ' Israelka' na' zi ba'le' wda'gake' Páblona' len Bernabéna'.

<sup>5</sup> Na'ch beŋ' Israelka' bengake' txen beŋ'ka' bi nak beŋ' Israel na' gokgake' toz len beŋ' wŋabia'ka', gok-lall'gake' yiya dii gongakile' Páblona' len Bernabéna' na' wlligake' legake' yaj. <sup>6</sup> Na' ka wŋezi Páblona' len Bernabéna' ka ba chwia beŋ'ka' gongakile' legake', lii biza'tegake', wyajgake' yell Lístrana' na' yell Dérbena', yellka' lliá gana' mbani Licaóniana'. <sup>7</sup> Na' lekzka' be'gake' dill' wen dill' kob che Jesúza' na'.

#### Blligake' Páblona' yaj yell Lístrana'

<sup>8</sup> Na' Lístrana' jadi'gake' to beŋ' nxinj ŋi'ena' ka goltjie'. Na' bi chak see daa bi chzoa chech ŋi'ena'.

<sup>9</sup> Na' chi'e chzenague' dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. <sup>10</sup> Na'ch golle'ne' zillj: —Wzolla'.

Na' lii wzolla'tie' na' gok wzee. <sup>11</sup> Ka ble'i beŋ' Lístraka' daa ben Páblona', wzolo chosyaagake' chnegake' xtilleeka' daa nak dill' Licaonia che'gake':

—¡Ba betj chios chechoka' gani zoacho na' chle'gaki-chone' ka benech!

<sup>12</sup> Na' wŋagake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa.

<sup>13</sup> Na' bxož che yoodo' che Júpitera', daa zoa katez choogake' yella', jwee goonka' na' nwalee legakb bga de yej, na' le', na' beŋ'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'. <sup>14</sup> Na' ka gokbe'i Bernabéna' len Páblona' bin gon beŋ'ka', na' wzologake' bchez' xe'ka', la' chak-gakile' dii mal nleban chon beŋ'ka'. Na' jsedogake' lad-je'ka', na' wnegake' zillj, che'gake':

<sup>15</sup> —Le' beŋ'do', žberače chonzle ka? Lekzka' beŋ' yell-lioz neto', ka le', na' ba bidnto' kwenche wzajniinto' le' chiya! kwejyichjle diiki bibi zak' na' gonlilall'le Chios, beŋ' yaa beŋ' banna', beena' ben yabana', yell-lioni, na' nisdona', na' yog' dii de xan yabana', lo yell-lioni, na' loo nisdona'. <sup>16</sup> Kani'yi Chioza' bwialoze' che benecha' bengake' kon daa nazan chegake'. <sup>17</sup> Na' la'kzi bwialoze' ka bengake', bliile' legake' ye! wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaŋcho na' chat' dii cheej chaocho kwenche soacho mbalaz.

<sup>18</sup> Na' la'kzi Páblona' len Bernabéna' gollgake' ka', kaŋi goongakile' bi witgake' goonka' daa nan we'la'ogake' legake'.

<sup>19</sup> Na' bllin ba! beŋ' Israelka' zaak Antioquíana' na' Icóniona', na' wlooyel'gake' beŋ' Lístraka' kwenche blligake' Páblona' yaja'. Na' daa gokgakile' ba witen', na'ch bxobgake'ne' jadixjgake'ne' cho'a yella'te. <sup>20</sup> Na' beŋ'ka' nonlilall' Jesúza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

<sup>21</sup> Na' lekzka' wdixjeegake' dill' wen dill' kob che Jesúza' yell Dérbena', na' beŋ' zan benlilall'gake' Jesúza'. Na'tech, biza'gake' bidegake' yell Lístrana', Icóniona' na'ch Antioquíana'. <sup>22</sup> Na' to to yellka' gana' bidegake' btipgake' lall' beŋ'ka' ba chajle' che Jesúza'

kwenche soačhechgake' gonlilall'chgake'ne'. Na' goll-gake' chiya! yizo yizakicho bittez dii yen ile'icho kwenche gak lljazoalencho Chioza' gana' chŋabi'e.

<sup>23</sup> Na' to to yellka' wlejgake' to chop beŋ' koo lall' na'gake' beŋ'ka' ba nonlilall'gake' Jesúza'. Na' wzoa-gake' wbas' be'llwillgake' Chioza', na'ch bengake' le-gake' lall' na' Xancho Jesúza', beena' nonlilall'gake'.

#### Páblona' len Bernabéna' biyajgake' yell Antioquíana' daa lliá gana' mbani Síriana'

<sup>24</sup> Na' wde Páblona' len Bernabéna' gana' mbani Pisídiana' na' bllingake' gana' mbani Panfílina'. <sup>25</sup> Na' be'gake' cho'a xtill' Chioza' yell Pérgena'. Na'ch biza'gake' ziyajgake' yell Atáliana'. <sup>26</sup> Na' yell Atáliana' biyoogake' to loo barkw na' billingake' yell Antioquíana' gana' lle' beŋ'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. <sup>27</sup> Na' ka billingake' yell Antioquíana', btopgake' beŋ'ka' nonlilall' Jesúza', na' goll-gake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che beŋ'ka' bi nak beŋ' Israel kwenche benlilall'gake' Jesúza'. <sup>28</sup> Na' Páblona' len Bernabéna' bigaangake' ssha yell Antioquíana' len beŋ'ka' nonlilall' Jesúza'.

#### Bidopgake' Jerusalénna' na' be'gake' dill'

**15** Shlak zoa Páblona' len Bernabéna' yell Antioquíana', bllin ba! beŋ' za' Judeana' na' wzologake' bli' bsdgakile' beŋ'ka' nonlilall' Jesúza' nan chiya! gongake' ka na ley che dii Moiséza' na' sho'gake' seŋ daa le circuncisión kwenche Chioza' wi'e ye! mban chegake' zejli kaŋi. <sup>2</sup> Na' Páblona' len Bernabéna' gokdi'lengake' beŋ' Judeaka'. Na' daa gok ka', beŋ' Antioquíaka' bengake' toz dill' wsel'gake' Páblona' len Bernabéna' na' sto chop beŋ' yell Jerusalénna' kwenche llje'lengake' postlka' dill' len beŋ'ka' ngoo lall' na'gake' beŋ'ka' nonlilall' Jesúza' Jerusalénna', cheyi daa chli' chsedi beŋ' Judeaka' bllin Antioquíana'.

<sup>3</sup> Na' wloogake' nez kon ka goll beŋ'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' goll-gake' beŋ'ka' nonlilall' Jesúza' ka ba wyanchga beŋ'ka' bi nak beŋ' Israel ba yoogake' lo xnez Chioza'. Na' ka beni beŋ'ki dga, le bibagakile'.

<sup>4</sup> Ka bllin beŋ'ki Jerusalénna', beŋ'ka' nonlilall' Jesúza' len beŋ'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. <sup>5</sup> Na' ba! fariseoka' nonlilall' Jesúza' wzolla'gake' na' wŋagake':

—Beŋ'ka' bi nak beŋ' Israel chonan byen sho'gake' seŋ daa le circuncisión ka solo gonlilall'gake' Jesúza', na' chiya! gongake' ka na ley che dii Moiséza'.

<sup>6</sup> Na' bdop bllag postlka' len beŋ'ka' ngoo lall' na'gake' beŋ'ka' nonlilall' Jesúza' kwenche wwiagake' naklā ka sho' xnezi dga. <sup>7</sup> Ba gok ssha chdi! cho'a xtilleeka' ka wzolla' Pédróna' na' golle' legake':

—Le', beṅ' bishaa, ba nezkzile kana' wlej Chioza' nad' ladjleni kwenche lji'a dill' wen dill' kob che Jesúza' lao beṅ'ka' bi nak beṅ' Israel kwenche gonlilall'gake'ne'.<sup>8</sup> Chioza', beena' nombi'e yichjlall'do' yog' beṅ', bli'e nan chlebe' beṅ'ka' bi nak beṅ' Israel daa bselee Espíritu Sántona' zoe' loo yichjlall'do'eka' kon ka bene' checho.<sup>9</sup> Toz ka ba ben Chioza' checho na' che beṅ'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'.<sup>10</sup> Na' zberaṅche bi chajle'le daa ba ben Chioza'?, na' zbiṅche cheenile gon beṅ'ka' bi nak beṅ' Israel diiki? La' ni cho' ni dii xozxto'choka' bin' sa-kicho gonchon.<sup>11</sup> Lete chajle'cho daa chaki Xancho Jesúza' chon' ba bisle' cho', na' ka'kz legake'.

<sup>12</sup> Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yel' wakka' ladj beṅ'ka' bi nak beṅ' Israel.<sup>13</sup> Na' ka biyoll be' Páblona' len Bernabéna' dill', na'ch wne Jacóbona', golle':

—Le' beṅ' bish', cheenid' wzenagle dga inia' le':

<sup>14</sup> Simón Pédróni ba bi'e dill' ka wzolo Chioza' wleje' beṅ' ladj beṅ'ka' bi nak beṅ' Israel kwenche gakgake' lall' nee.<sup>15</sup> Na' dga gok ka' chidił-lebin daa bzej dii beṅ'ka' wdixjee daa goll Chioza' legake' kani'yi, gana' nan:

<sup>16</sup> Ka te dga, yiyed' na' wzoa' to xiin dia che dii Davina' inabi'e. La'kzi yel' wṅabia' che'na' nakan ka to yoo dii ba biy-inj, wllin lla yichisa'n.

<sup>17</sup> Gon' dga kwenche yog' beṅ'ka' bin' gonlilall'gake' nad' yiyiljgake' nad', lente yog' loł beṅ'ka' bi nak beṅ' Israel, beṅ'ka' ba nak lall' na'.

<sup>18</sup> Kan' wna Xancho Chioza', beena' bzajniile' beṅ'ka' diiki kani'teyi.

<sup>19</sup> Na'chan nia' le', bi chiyal' ye'cho beṅ'ka' bi nak beṅ' Israel, beṅ'ka' ba nonlilall'gake' Chioza', gongake' dii bi chonan byen.<sup>20</sup> Kon wzejcho to yish ye'chogake' bich gaogake' yel' wawa' daa chllia beṅ' lao lwaa Isak' chios che'ka', na' bi gaogake' bel' che bayix'ka' bi wlalj xchema', na' ni bi gaogake' xchen bayix'ka'. Na' lekzka' bi inelenzgake' xiin xool beṅ'.<sup>21</sup> La' kani'teyi zoakzə beṅ' to to yell chzajni'gakile' beṅ' ley che dii Moiséza', na' lennan' ni chlabgake' naa gana' chdop chllaggake' choe'llwillgake' Chioza' yog' lla sabd.

**Yisha' daa bsel'gake' lao beṅ'ka' bi nak beṅ' Israel**

<sup>22</sup> Na'ch postlka', na' yog' beṅ'ka' nonlilall' Jesúza' len beṅ'ka' ngoo lall' na' legake' bengake' toz dill' wlej-gake' to chop beṅ' ladje'ka' kwenche shajlengake' Páblona' len Bernabéna' Antioquíana'. Na' wlejjake' Judas, beena' lekzka' lie' Barsabás, na' Sílaza', nakgake' beṅ' mbejlawin ladj beṅ'ka' nonlilall' Jesúza'.<sup>23</sup> Na' bsel'lengake' beṅ'ki to yish dii bzejgake', na' ki choe'n dill':

“Le' beṅ' bish' na' le' beṅ' zannto', le' bi nakle beṅ' Israel na' zoale yell Antioquíana', na' doxen gana' mbani Síriana' na' Cilíciana', neto' postl na' beṅ'ki ngoo lall'

na' beṅ'ka' nonlilall' Jesúza' Jerusalénni, na' yog' beṅ' bish'choki lle' ni, chwapnto' le' chiox.<sup>24</sup> Ba wnezinto' ba bchej to chop beṅ' ladjnto'ni bidgake' to bia'lall'zgake' gana' zoale, na' benllejjakile' le' daa wngake' chiyal' sho'le seṅ daa le circuncisión, na' chiyal' gonle doxen ka na leya'.<sup>25</sup> Daan, ba bennto' toz dill' wlejnto' beṅ'ki chop ladjnto'ni zidwiagake' le'. Na' chsel'lennto' legake' Pábloni na' Bernabéni, beṅ' bish'choki le chakicho,<sup>26</sup> beṅ'ki chzoa dii nxoll yel' mban che'ka' daa chon-gake' xshin Xancho Jesucristona'.<sup>27</sup> Na' chsel'nto' beṅ'ki le Judas na' Silas, na' legake' wzajni'gakile' le' dga chzejnto' le'.<sup>28</sup> Na' wyazlall'nto' ka bzajni Espíritu Sántona' neto' bi wzoanto' le' gonle dii bi yizoile. Diik-izə chakinto' chonan byen bi gonle:<sup>29</sup> Bi gaole yel' wawa' daa chllia beṅ' lao lwaa Isak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool beṅ'. Shi wzenagle diiki nannto' le', wenzkan chonle. Ka'tz nak dill'ki chzejnto' le'.”

<sup>30</sup> Na'ch ka bllin beṅ'ka' bsel'gake' Antioquíana', na' btopgake' yog' beṅ'ka' nonlilall' Jesúza', na' be'gake' legake' yisha' daa nox'gake'.<sup>31</sup> Na' ka blabgake'n le biba-gakile' ka dillaa choe'n.<sup>32</sup> Na' ka nak Júdaza' na' Sílaza', daa lekzka' nakgake' beṅ' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'.<sup>33</sup> Na' biyoll wzoalengake' legake' shloll wen, na'ch beṅ'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit beṅ'ka' bsel' legake'.<sup>34</sup> Na' Sílaza' wyazlallee igaane' na'z.<sup>35</sup> Páblona' na' Bernabéna' bigaangake' Antioquíana'. Na' len zan beṅ' yoblə bli' bsdch-gakile' beṅ' cho'a xtill' Xancho Jesúza'.

**Sto shii wyaj Páblona' yellka' gana' ba ji'e cho'a xtill' Chioza'**

<sup>36</sup> Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che beṅ'ka' ba wyajle'.

<sup>37</sup> Na' Bernabéna' goklallee wche'gake' Juan, beena' lekzka' nsi'gake' Marcos.<sup>38</sup> Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfílana', na' bich jenlene' legake' xshin Chioza'.<sup>39</sup> Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'.<sup>40</sup> Na' Páblona' wzee bchi'e Sílaza'. Na' beṅ'ka' lle' Antioquíana', beṅ'ka' nonlilall' Jesúza', wṅabgakile' Xancho Chioza' gaklene' legake' gattezə shajgake'.<sup>41</sup> Na' Páblona' len Sílaza' wdegake' gana' mbani Síriana' na' Cilíciana' kwenche goklengake' beṅ'ka' nonlilall' Jesúza' wzoatip wzoashoshchgake'.

**Timotewa' bene' txen Páblona' len Sílaza'**

**16** Na'ch Páblona' len Sílaza' bllingake' yell Dérbe-na', na'tech wyajgake' yell Lístrana'. Na' na' zoa

to bi' xkwid' nonlilall'b' Jesúsza' leb' Timoteo. Nakh' xiin to noolə Israel, na' nooli nonlilallee Jesúsza', per xabaa nake' beŋ' griego. <sup>2</sup> Na' beŋ' Listraka' len beŋ' Icónioka' nonlilall' Jesúsza' be'gake' dill' le wen nsa' cheb'. <sup>3</sup> Na' Páblona' wñabile'b' shajlem' legake', na' wlo'eb' seŋ daa le circuncisión kwenche bi gakzbani beŋ' Israelka' leb', la' nezgakile' xabaa bi nake' beŋ' Israel. <sup>4</sup> Na' yog' yellka' gana' wdegake' be'lengake' beŋ'ka' nonlilall' Jesúsza' dill' che diika' chiya' gongake', diika' be' postl-ka' dill' kon beŋ'ka' ngoo lall' na'gake' beŋ'ka' nonlilall' Jesúsza' yell Jerusalénna'. <sup>5</sup> Na'ch beŋ'ka' nonlilall' Jesúsza' yellka' benlilall'chgake'ne' do yichj do lall'gake', na' lla kon lla wyanchgake'.

#### Ble'do'i Páblona' to beŋ' Macedonia chñabile'ne' shaje' lalle'na'

<sup>6</sup> Páblona' len Sílaža' na' Timotewa' to wdezgake' gana' mbani Frígiana' len Galáciana', daa bi be' Es-píritu Sántona' latj lje'gake' cho'a xtill' Chioza' gana' mbani Ásiana'. <sup>7</sup> Na' ka bllingake' gaoz yell-lío gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. <sup>8</sup> Na'ch wdegake' yell-lío che Mísiana' bllintegake' yell Tróaza' daa llii cho'a nisdona'. <sup>9</sup> Na' lo yela' Chioza' bene' ka ble'do'i Páblona' to beŋ' byo, beŋ' Macedonia, zie' chat'yoile'ne', chi'ene': "Dagach Macedóniani kwenche gakleno' neto'." <sup>10</sup> Na' ka biyoll ble'do'i Páblona', llii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' lje'lennto' beŋ'ka' lle' na' dill' wen dill' kob che Jesúsza'.

#### Páblona' na' Sílaža' wyajgake' Filípoza'

<sup>11</sup> Na' yell Tróaza' wyoonto' barkwa' na' wyajnto' shljicha gana' llii to yell-lío lo nisdona' daa le Samotracia. Na' betiyo bllinnto' to yell dii le Neápolis. <sup>12</sup> Na' wza'nto' Neápoliza' wyajnto' yell Filípoza'. Nakan to yell ga lle' beŋ' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shoŋ lla. <sup>13</sup> Na' shlak zoanto' na', lla sabda' bchejnto' yella' na' wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdoj bllag. <sup>14</sup> Na' ladj noolka' len to beŋ' le Lidia. Nake' beŋ' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. <sup>15</sup> Na' ka wde wchoe' nisa' do bxoŋe', na' wne' neto':

—Shi chakile dii lli ba nonlilallaa Xancho Jesúsza', lli sho' na' yigaaŋle lillaa.

Na' bene' byen jagaannto' lille'na'.

<sup>16</sup> Na' to shii ka zejnto' gana' choe'lwillgake' Chioza', na' billagnto' to bi' nool wew' yooj dii xiwaa, na' dii xiwaa chonan kwenche chñeyaab'. Na' nakh' to bi' ndoo lla yel chom' xshin beŋ', na' dii xen chon xama' gan daa chñeyaab'. <sup>17</sup> Na'ch bi'ni wnob' Páblona' shlak ze-jlennnto'ne', chosyaab' zillj, nab':

—Beŋ'kin chongake' xshin Chioza', beena' nak beŋ' choo beŋ' xen, na' chzajni'gakile' beŋ' nez lli che Chioza' gana' sho'cho kwenche bi kwiayi'cho.

<sup>18</sup> Na'ch kon ka' wñab' yog' lla, na' gokzedi Páblona', na'ch biyechje', golle' dii xiwaa yooj':

—Kon yel' wñabia' che Jesucristona' nia' li' bichej.

Na' lli bichejte dii xiwaa.

<sup>19</sup> Na' ka gokbe'i xam'ka' bich bi mech gongake' gan, na'ch bex'gake' Páblona' len Sílaža' na' jwa'gake' le-gake' lao joschiska'. <sup>20</sup> Na' ka bllinlengake' legake' lao joschiska', na' che'gake':

—Beŋ' Israelki chta chñegake' beŋ', lallchoni. <sup>21</sup> Na' chli' chsedgakile' beŋ' dii bi chiya' goncho ni bi chiya' wlebcho, cho' nakcho beŋ' Roma.

<sup>22</sup> Na' beŋ' zan bdi'a na' wñegake' zban che Páblona' len Sílaža'. Na'ch joschiska' bchogbia'gake' wdingake' xe'ka' na' bet wdingake' legake'. <sup>23</sup> Na' ka wde bet wd- inchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. <sup>24</sup> Na' daa gollgake' beeni ka', wlo'e legake' bill' xyoote na' bñie yen ñieka' to lee kwag' dii nyidjgake'.

<sup>25</sup> Na' do ka chel Páblona' len Sílaža' choe'lwillgake' Chioza' na' cho'gake' choe'la'ogake'ne', na' beŋ'ka' sto de lillyana' chzenaggake' ka chongake'. <sup>26</sup> Na' tokon-ganzi wde to bedxo' xen wal na' bñiban doxen lillyana'. Na' lli byaljten, na' gdenka' diika' nchejgake' beŋ'ka' de lillyana' tolazzin biyellgakan. <sup>27</sup> Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' beŋ'ka' de lillyana' ba billeshgake'. <sup>28</sup> Na' Páblona' besyee, golle'ne':

—jBibi goni kwino'! Nikz lle' yog'nto'.

<sup>29</sup> Na'ch beena' chap lillyana' wñabe' to yi' na' wyoo-doe' jawie' gana' yoo Páblona' len Sílaža', na' lli bchek'te xibe'na' lawe'ka' do chxizze' daa le bllibe'.

<sup>30</sup> Na' lli bibejtie' legake' lillyana', na' chi'e:

—¿Le', beŋ'do', beran chiya' gon' kwenche bi kwiayaa?

<sup>31</sup> Na' gollgake'ne':

—Benlilalloo Xancho Jesucristona', li' na' do xiin xoolo', kwenche yisle' le' na' bi kwiayi'le.

<sup>32</sup> Na' be'lengake' le' na' beŋ'ka' zoa lille'na' cho'a xtill' Xancho Jesúsza'. <sup>33</sup> Na'ch beena' chap lillyana' wdibe' we'na' lliagake', la'kzi nakan wal chel. Na' lekzka' yog'lo'tie' lli wchoategake' nisa'. <sup>34</sup> Na' bichi'e Páblona' len Sílaža' lille'na' na' bweej bwawe' legake'. Na' le chibayi beeni do xiin xooole' daa ba nonlilall'gake' Chioza'.

<sup>35</sup> Na' ka wyeeni', joschiska' bsel'gake' beŋ' jellgake' beena' chap lillyana' yisane' legake' kwenche yiyaj-gake'. <sup>36</sup> Na' beena' chap lillyana' golle' Páblona':

—Ba bsel' joschiska' beŋ'ki, na' nagake' ba de lsens yisan' le'. Na' wak yiyajle' naa, kochno bi goni le'.

<sup>37</sup> Na' Páblona' golle' legake':

—Neto' ndento' kwent yell Rómána', na' ni bi biy-iljni'agake' bin bennto' ba bet wdingake' neto' lao lkwe' beŋ' na' wdixjzgage' neto' lillyani. ¿Ana' naa cheenz-

gakile' yisangake' neto' do ngash'zə? Yidch kwingake' yibejgake' neto'.

<sup>38</sup> Na' jayellgake' joschiska' daa goll Páblona' legake', na' joschiska' le bllebgake' ka wnezgakile' Páblona' len Síłaza' ndegake' kwent ka beŋ' Roma. <sup>39</sup> Na'ch wyaj joschiska' jaye'xengake' Páblona' len Síłaza' na' bibejgake' legake' lillyana', na' got'yogakile' legake' bich yi-gaangake' yella'. <sup>40</sup> Na' ka bichej Páblona' len Síłaza' lillyana', na' biyajgake' lill Lídiana' jawiagake' beŋ'ka' ba nonlilall' Jesúza' na' btipchgake' lall'gake', na'tech biza'gake'.

#### Bta bŋe beŋ' malka' beŋ' Tesalónicaka'

**17** Na' ka biza' Páblona' len Síłaza', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yoonā' gana' chdop chllag beŋ' Israelka' choe'lwillgake' Chioza'. <sup>2</sup> Na' lo shon xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza', <sup>3</sup> bzajniile' legake' Crístona', beena' wlej Chioza' iŋabi'e, benan byen biya dii wxak'zi'e na' wite', na' bibane' ladj beŋ' wetka'. Na' chi'e legake':

—Jesúza', beena' choe'len' le' xtilleena' ŋaa, len' Crístona', beena' wlej Chioza' iŋabi'e.

<sup>4</sup> Na' bał beŋ' Israelka' wyajle'gake' na' bengake' txen Páblona' len Síłaza', na' lekzka' zan beŋ' griegoka', beŋ'ka' ba choe'la'ogake' Chioza', wyajle'gake' che Jesúza', na' lekzka' zan noolka' zakii. <sup>5</sup> Na' beŋ' Israelka' bi wyajle', gokxe'gakile' Páblona' len Síłaza', na' btop-gake' beŋ' wdallagka' nak beŋ' mal, na' wlekgake' to dii zed yella'. Na'ch wyajgake' lill beena' le Jasón jadilj-gake' Páblona' len Síłaza' kwenche gongake' legake' lo na' beŋ' yellka'. <sup>6</sup> Na' daa bi zoa Páblona' len Síłaza' na', na'ch wdozogake' Jasónna' na' zi to chop beŋ'ka' nonlilall' Jesúza' na' jwa'gake' legake' lao joschiska'. Na' wnegage' zillj che'gake':

—Beŋ'ka' chda chbekgake' dii zed doxen yell-lioni ba bla'gake' yell chechoni. <sup>7</sup> Na' Jasónni ba blebze' legake' lille'na'. Na' ba nakgake' toz bich chzenaggake' daa nli- lia Césara' bia' goncho, la' nagake' zoa sto beŋ' wŋabia' le Jesús.

<sup>8</sup> Na' beŋ' yellka' len joschis che'ka' bllaagake' na' gokllesh'gakile'. <sup>9</sup> Na' wxenlall' joschiska' bllia Jasónna' mech len beŋ'ka' nakgake'ne' txen, na'ch bisangake' legake'.

#### Páblona' len Síłaza' wyajgake' Bereana'

<sup>10</sup> Na' kon ka gol, beŋ'ka' nonlilall' Jesúza' bisa'do-gake' Páblona' len Síłaza' kwenche yiyajgake' yell Bereana'. Na' ka bllingake' yella', lli wyajtegake' gana' chdop chllag beŋ' Israelka' choe'lwillgake' Chioza'.

<sup>11</sup> Na' beŋ' Bereaka' nakchgake' beŋ' wench aga ka beŋ' Tesalónicaka', na' bibagakile' bzenaggake' daa bzajniil Páblona' len Síłaza' legake'. Na' yog' lla biyilj-gake' lee Cho'a Xtill' Chioza' shi nakan ka daa chli' chsedgakile' legake'. <sup>12</sup> Na' zan beŋ' Israelka' zoa na' benlilall'gake' Jesúza' na' ka'kzə zan beŋ' griegoka', ka

beŋ' byoka' na' ka noolka' zakii. <sup>13</sup> Na'ch beŋ' Israelka' lle' Tesalónicana', beŋ'ka' bi benlilall' Jesúza', ka wnezgakile' Páblona' choe'lene' beŋ' Bereaka' xtill' Chioza', na'ch wyajgake' jata janegake' beŋ' yellka'. <sup>14</sup> Na' beŋ'ka' nonlilall' Jesúza' lli bsel'tegake' Páblona' cho'a nisdo'na'lə, na' Síłaza' len Timotewa' bigaangake' Bereana'zə. <sup>15</sup> Na' beŋ'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Síłaza' len Timotewa' wtalall'gake' shajgake' gana' zoe'.

#### Páblona' zoe' yell Aténaza'

<sup>16</sup> Na' shlak chbez Páblona' Síłaza' len Timotewa' yell Aténaza', le bllaa yichje' daa ble'ile' to ni to na' nzoa beŋ' Aténaska' diika' choe'la'ogake'. <sup>17</sup> Ni cheyi daan bzajniile' beŋ' Israelka' gana' chdop chllaggake' choe'lwillgake' Chioza', na' len zi xonj beŋ' griego. Na' lekzka' yog' lla wyaje' gana' chak yaana' gana' lle' lla' beŋ' na' be'lene' legake' dill'. <sup>18</sup> Na' bał epicúreoka', beŋ'ka' chsedgake' daa bli' bsemi beena' wle Epicúreo, len bał estóicoka', wzologake' wdił xtilleeka' len Páblona'. Na' bałe' che':

—¿Beran naz beeni chshaljchgue'?

Na' zi bałe' nagake':

—¿Aaga beenin zidye'lene' cho' dillaa daa nan chiyal' we'la'ocho sto chios yoblə?

Wnagake' ka' daa chyixje' Páblona' legake' dill' wen dill' kob che Jesúza', chi'e legake' bibane' ladj beŋ' wetka'. <sup>19</sup> Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' iŋezinto' bi dii koban chli' chsedilo'.

<sup>20</sup> La' ndantekzi nak dill'ki choo, na' cheeninto' iŋezinto' bi zejlin.

<sup>21</sup> La' yog' beŋ' Aténaska' na' lekzka' beŋ' zit'ka' zoa na', bichkzə bilə chongake', to chinozgake' bi dill' kob wzenaggake' na' to xtillii daazə choe'gake' yog' lla.

<sup>22</sup> Na'ch Páblona' wzie' ladje'ka' gana' nzi' Areópago, na' golle' legake':

—Le' beŋ' Atenas, chakbe'id' le chibaile choe'la'ole di-ika' noni chios chele. <sup>23</sup> La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: "Che Chios, beena' kono nombia'." Na' beena' chgoole balaan la'kzi bi nombia'lene', dill' che'nan' zidye'len' le' ŋaa.

<sup>24</sup> 'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ŋi'a na' beŋ'. <sup>25</sup> Na' aga bi chyallji Chioza' dii iŋa-cho gak gon beŋ' yell-liona' che'. La' len' nonē' yeł' mban che yog'lołcho, na' nonē' bishbe checho, na' yog' bi dii de checho.

<sup>26</sup> Len' bxe bsile' to beŋ' yell-lio, na' yog'lołcho cho' nakcho xiiŋ dia che beena' bxe bsile', na' le'kze' ba nli- lie' bia' bał yiz soacho yell-lioni na' gana' soa to tocho. <sup>27</sup> Na' bzoe' cho' yell-lioni kwenche yiyiljcho nakan gon-cho gombia'chone'. Na' dii li gal' gllin zelen Chioza' to tocho, <sup>28</sup> la' len' chone' ka mbancho na' ka chzo chda-cho. Kan' bzej bał beŋ' sin' cheleka', beŋ'ka' wnagake':

“Nakcho xiiṅ Chioza’.”<sup>29</sup> Na’ daa nakcho xiiṅ Chioza’, bi chiya! gakicho nake’ to beṅ’ de or, de plat, de yaj, de yag, ka chaljalall’ beṅ’ka’ chongake’ diiki.<sup>30</sup> Kana’teyi Chioza’ bwialoze’ ben beṅ’ka’ daa nazan chegake’ ye! bi chajni che’ka’, per naanlla chone’ byen yog’lo! beṅ’ lle’ doxen yell-lioni yiyaj yilengakile’.<sup>31</sup> La’ Chioza’ ba bliie’ bia’ to lla gone’ ye! joschis che to to beṅ’ lle’ yell-lioni, na’ gone’ che to toe’ kon ka chidolee. Na’ ba bliile’ cho’ beena’ wleje’ gon ye! joschisa’ daa biljise’ne’ ladj beṅ’ wetka’.

<sup>32</sup> Na’ ka bengakile’ wna Páblona’ Chioza’ chisbane’ beṅ’ ladj beṅ’ wetka’, ba!e’ bxillgake’, na’ zi ba!e’ goll-gake’ne’:

—Sto llagalə wzenagnto’ cho’ cheyi dga choo dill’.

<sup>33</sup> Na’ biza’ Páblona’ gana’ lle’ beṅ’ka’.<sup>34</sup> Na’ ba! beṅ’ bengake’ne’ t xen na’ benlilall’gake’ Jesúza’. Na’ ladje’ka’ len to beṅ’ lie’ Dionisio, beena’ len beṅ’ka’ zakii chdop latja’ nzi’ Areópago, na’ lekzka’ sto noolə lie’ Dámaris, na’ sto chop beṅ’ yoblə.

### Biyaj Páblona’ yell Coríntona’

**18** Ka wde biza’ Páblona’ yell Aténaza’, na’ biyaje’ yell Coríntona’.<sup>2</sup> Na’ ka billine’ Coríntona’ billague’ to beṅ’ Israel lie’ Aquila. Na’ beeni nake’ beṅ’ yell Ponto na’ nool che’na’ lie’ Priscila. Zi’ bllinzgake’ Coríntona’ biza’gake’ gana’ mbani Itáliana’, la’ Claudiona’, beṅ’ wṅabiana’, bisheshe’ yog’ beṅ’ Israelka’ Rómána’ gana’ zoe’. Na’ Páblona’ jawie’ legake’,<sup>3</sup> na’ daa nlangake’ toz ka llin, bigaanlene’ legake’, na’ wdia-gake’ yid xa bayix’ka’ daa chchingake’ lwaa yoo.<sup>4</sup> Na’ yog’ lla sabd, Páblona’ chaje’ gana’ chdop chllag beṅ’ Israelka’ choe’lwillgake’ Chioza’, na’ chzajniile’ beṅ’ka’ lle’ na’ xtill’ Jesúza’, ka beṅ’ Israel na’ ka beṅ’ bi nak beṅ’ Israel.

<sup>5</sup> Na’ Sílaza’ len Timotewa’ biza’gake’ Macedóniana’ na’ bllingake’ gana’ zoa Páblona’. Na’ daa bllingake’, bich bi llin yoblə ben Páblona’, san toz xshin Chioza’ bene’ na’ bzajniile’ beṅ’ Israelka’ nan Jesúza’ nake’ Crístona’, beena’ wlej Chioza’ inabi’e.<sup>6</sup> Per wzololəgake’ chakdi-lengake’ne’ na’ wnegake’ zban che’, na’ wllib xalaane’na’ lawe’ka’ kwenche’ bli’e nan chbejyichje’ legake’, na’ golle’:

—Le’zkan wlliyi’ kwinle. Aga bi dol’ gap’ nad’. Na’ naa lljali’ lljasedid’ beṅ’ka’ bi nak beṅ’ Israel.

<sup>7</sup> Na’ch bizee kwite’ka’ na’ biyaje’ lill to beṅ’ le Justo, beena’ choe’la’o Chioza’, na’ zoa lille’na’ gao gana’ chdop chllag beṅ’ Israelka’ choe’lwillgake’ Chioza’.

<sup>8</sup> Na’ to beṅ’ le Crispo ngoo lall’ nee chgwee xnezi cheyi diika’ chon beṅ’ Israelka’ gana’ chdop chllag-gake’, na’ do xiiṅ xooole’ wyajle’gake’ che Xancho Jesúza’. Na’ beṅ’ zanch beṅ’ Coríntoka’, ka bengakile’ xtill’ Chioza’ daa be’len Páblona’ legake’, wyajle’gake’ na’ wchoagake’ nisa’.<sup>9</sup> Na’ch to lle’ bli’lao Xancho Jesúza’ Páblona’, na’ golle’ne’:

—Bi illebo’. Be’ch xtillaana’ lao beṅ’ki na’ bi so’ llizə.<sup>10</sup> Nad’ zoalen’ li’, na’ bi wi’a latj no bi goni li’, la’ beṅ’ zan zi’ gombia’gake’ nad’ yelli.

<sup>11</sup> Na’ bigaan Páblona’ Coríntona’ twiz yoo gashj bli’ bsdile’ beṅ’ cho’a xtill’ Chioza’.

<sup>12</sup> Na’ kana’ chṅabia’ beena’ le Galión gana’ mbani Acáyana’, beṅ’ Israelka’ gokgake’ toz beṅ’gake’ Páblona’ na’ bche’gake’ne’ gana’ chon Galiónna’ ye! joschisa’.<sup>13</sup> Na’ che’gake’ Galiónna’:

—Beeni chde’ chgooyee beṅ’ kwenche we’la’ogake’ Chioza’ nlla’lə aga ka na’ ley che Rómána’ daa chṅabia’ cho’.

<sup>14</sup> Ka nan iṅe Páblona’, lii wṅete Galiónna’ beṅ’ Israelka’, chi’e:

—Ka nak dga chaole xya, shi bi dol’ nap beeni wa shi bi xya wal bene’, wak gon’ ye! joschis chelena’.<sup>15</sup> San shi chaole xya che dill’ daa cho’e, na’ daa chzetje’ le beṅ’, na’ che ley chelena’, bi nakan ka dii gon’ ye! joschis cheyin. Le’zə, li’ wwia naklə gonlen.

<sup>16</sup> Na’ bibeje’ legake’ gana’ chone’ ye! joschisa’.

<sup>17</sup> Na’ch yog’ beṅ’ griegoka’ beṅ’gake’ Sósteneza’, beena’ chdoo xnezin cheyi diika’ chon beṅ’ Israelka’ gana’ chdop chllaggake’ choe’lwillgake’ Chioza’, bet-sodgake’ne’. Na’ chwiazə Galiónna’ bikzə bi golle’ legake’.

### Páblona’ biyaje’ yell Antioquíana’

<sup>18</sup> Ka wde gok ka’, Páblona’ bigaanche’ sshach Coríntona’. Na’ch bilje dill’ beṅ’ka’ nonlilall’ Jesúza’ na’ bizee kwenche shaje’ gana’ mbani Síriana’. Na’ Priscilana’ len Aquilana’ zejlengake’ne’. Na’ ka zi’ sho’gake’ loo barkwa’ yiza’gake’ yell Cencreana’, Páblona’ bshib yichje’na’ kon ka nchebe’ gone’ lao Chioza’.<sup>19</sup> Ka bllingake’ yell Éfesona’, Páblona’ bikwaanze’ Priscilana’ len Aquilana’, na’ wzee wyaje’ gana’ chdop chllag beṅ’ Israelka’ choe’lwillgake’ Chioza’ na’ be’lene’ beṅ’ka’ dill’.<sup>20</sup> Na’ beṅ’ka’ ndop nllag na’, wṅabgakile’ Páblona’ yigaanlenche’ legake’, na’ Páblona’ bi goonile’.<sup>21</sup> Na’ch chi’e legake’:

—Chonan byen yiyaa Jerusalénna’ kat’ gal’ lṅina’ daa za’, na’ widchzk’ yidwia’ le’ shi Chioza’ wi’e latj.

Na’ch bizee Éfesona’ biyo’e to loo barkw.<sup>22</sup> Na’ ka betje’ barkwa’ Cesareana’, wyaje’ Jerusalénna’ jawape’ chiox beṅ’ka’ nonlilall’ Jesúza’. Na’ bizee biyaje’ Antioquíana’.<sup>23</sup> Na’ bigaan’ shloll, na’tech wzee wyaje’ sto shii to to yell gana’ mbani Galáciana’ na’ Frígiana’ jatipche’ lall’ beṅ’ka’ nonlilall’ Jesúza’.

### Apóloza’ bi’e xtill’ Chioza’ Éfesona’

<sup>24</sup> Na’ do kana’ bllin to beṅ’ Israel Éfesona’ lie’ Apolos, beṅ’ golj yell Alejandríana’. Na’ chak cho’e dill’ lao lkwe’ beṅ’, na’ le nsede’ Cho’a Xtill’ Chioza’.<sup>25</sup> Apóloza’ nsede’ che Xancho Jesúza’, na’ do yichj do lallee cho’e dill’ che’ kon ga zeelo nezile’, per zeelo nezile’ daa bli’ bse di Juanna’ che daa chchoa beṅ’ nisa’.<sup>26</sup> Na’ Apóloza’ bi bllebe’ bi’e dill’ che Jesúza’ gana’ chdop chllag beṅ’ Israelka’ choe’lwillgake’ Chioza’. Na’ ka beni Priscilana’ len Aquilana’ ka chli’ chsedi Apóloza’, na’ch bi’che’gake’ne’ kwenche bzajni’chgakile’ne’ kwaslo! ka nak xnez Chioza’.<sup>27</sup> Ka goki Apóloza’ shaje’ gana’

mbani Acáyana', beŋ'ka' nonjilall' Jesúza' btipgake' lallee na' bzejgake' to yish dii bexee che beŋ'ka' nonjilall' Jesúza' na', kwenche wlebgake'ne'. Na' ka blline', le goklene' beŋ'ka' ba biyesh'lallii Chioza' kwenche nonjilall'gake' Jesúza'. <sup>28</sup> Na' bli' bsdile' beŋ' nan klelan chajni beŋ' Israelka' che Jesúza'. Na' bibi gok yee beŋ' Israelka' daa bliile' legake' to to gana' nyoj Cho'a Xtill' Chioza' daa na Jesúza' nake' Crístona', beena' wsel' Chioza' inabi'e.

### Ka wzoa Páblona' Éfesona'

**19** Na' shlak wzoa Apóloza' Coríntona', Páblona' wdie' to to yellka' lliá ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e baḷ beŋ' ba nonjilall' Jesúza'. <sup>2</sup> Na' wñabile' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonjilall'le Jesúza'?

Na' beŋ'ka' gollgake'ne':

—Ni bi ñezinto' shi zoa Espíritu Sántona' beena' no' ka'.

<sup>3</sup> Na'ch Páblona' wizñabile' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

<sup>4</sup> Na'ch goll Páblona' legake':

—Dii Juanna' bzajniile' beŋ' chiyaḷ' choagake' nisa' daa wli'n ba biyaj bilengakile' na' lekzka' golle' legake' chiyaḷ' gonjilall'gake' beena' zi' yid, na' len' Jesúza', beena' wlej Chioza' inabi'e.

<sup>5</sup> Na' ka bengakile' daa goll Páblona' legake', na' wchoagake' nisa' daa chonjilall'gake' Xancho Jesúza'.

<sup>6</sup> Na' ka bxoá na' Páblona' yichje'ka', Espíritu Sántona' wyo'e loo yichjlall'do'eka' na' wñegake' wde wdeli dill' na' lekzka' wdixje'gake' dill' daa goll Chioza' legake'.

<sup>7</sup> Na' beŋ'ki gok cheyin ka' nakgake' ka do shllin.

<sup>8</sup> Na' wzoa Páblona' Éfesona' shon beo' bli' bsdile' beŋ' Israelka' gana' chdop chllaggake' choe'lwilgake' Chioza' na' bi bllebe'. Na' be'lenche' beŋ'ka' dill' kwenche wyajni'gakile' ka chñabia' Chioza' loo yichjlall'do' beŋ'ka' nonjilall'gake'ne'. <sup>9</sup> Na' baḷ beŋ'ka' nak beŋ' lall'do' wal aga goongakile' shajle'gake', na' biya dii wngake' lao lkwe' beŋ' che nez li nez shao' che Jesucristona'. Na'ch biza' Páblona' kwite'ka', na' biçhi'e beŋ'ka' ba nonjilall' Jesúza', wyajlene' legake' lill to beŋ' le Tirano dii nak ka yoo skwel gana' chdi'a beŋ', na' bli' bsdchile' legake' yog' lla. <sup>10</sup> Gokte chop yiz bli' bsdile' legake', na' yog'loḷ beŋ'ka' lle' doxen Ásiana' bengakile' xtill' Xancho Jesúza', ka beŋ' Israel ka beŋ' griego. <sup>11</sup> Na' Chioza' bchine' Páblona' kwenche bene' yeḷ' wak xen dii benan ka bibanchgayi beŋ'. <sup>12</sup> Na' axt no bachyichj, no lech' chjatigake'ne' na' chiyox'gake'n ga de beŋ' bi shao' na' chiyakgakile', na' lekzka' chichej dii xiwaa yoo beŋ'.

<sup>13</sup> Na' baḷ beŋ' Israelka' chdagake' to to yell chibejgake' dii xiw'ka' yoo beŋ', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yeḷ' wak che Jesúza', beena' choe' Páblona' xtilleena', nannto' le', li yichej.

<sup>14</sup> Ka' ben gall xiñ to beŋ' Israel le Esceva, beena' nak to wñabia' che bxoza'. <sup>15</sup> Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi ñezid' no le'.

<sup>16</sup> Na'ch beena' yoo dii xiwaa bxitee bñize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'.

<sup>17</sup> Na' yog' beŋ'ka' zoa Éfesona', ka beŋ' Israel ka beŋ' bi nak beŋ' Israel, wñezgakile' ka gok che beŋ'ka', na' le bllebgake' na' wloochgake' Xancho Jesúza' balañ.

<sup>18</sup> Na' zan beŋ'ka' ba nonjilall'gake' Jesúza' jaxoad-ol'gake' lao lkwe' beŋ' ka nak dii malka' ba bengake'.

<sup>19</sup> Na' zan beŋ'ka' bñan yeḷ' willa'na' jwa'gake' libr che'ka' daa bsdgake' na' bzejgake'n lao yog' beŋ'ka'. Na' bengake' kwent ka'k' zak' librka' bzejgake', na' bllin nan ka do shiyona mil mech plat. <sup>20</sup> Ka' gok blliljch xtill' Xancho Jesúza' na' beŋ' zanch benjilall'gake'ne' daa gokbe'gakile' xtill' Chioza' nsa'n yeḷ' wak xen.

<sup>21</sup> Na' ka wde gok yog' diiki, Páblona' bchoglallee shaje' lljawie' beŋ'ka' lle' yellka' lliá Macedóniana' na' Acáyana', na'tech yiyaje' Jerusalénna'. Na' lekzka' golle': "Ka yiyoll yiyaa Jerusalénna' chiyaḷ' shaa Rómana'." <sup>22</sup> Na'ch bselee Timotewa' na' Erástoná' Macedóniana', beŋ'ki chop chaklengake'ne', na' le' bi-gaane' Ásiana' zi' shloll wen.

### Bta bñe Demétriona' beŋ' Éfesoka'

<sup>23</sup> Na' got' to dii zed wal Éfesona' daa chli' chsedi Páblona' che nez li nez shao' che Jesucristona'. <sup>24</sup> Na' beena' wlek dii zeda' lie' Demetrio, na' noni xshine' chone' de plat lwaa Isak' yoodo' che xnax Dianana', beena' noni chios chegake'. Na' dii xen chone' gan cheyin len beŋ'ka' chonlengake'ne' llinna'. <sup>25</sup> Na' btope' beŋ'ka' chonlene' llinna' na' yog' beŋ'ka' nñangake' llin ka daa, golle' legake':

—Ñezile llin dga nñancho dii xen chkwañan checho.

<sup>26</sup> Na' ba chen chle'ile ka chon beena' le Pablo, chde' chzajniile' beŋ' wllal' chechoki na' doxen gani mbani Ásiani, chi'e aga bi zakii lwaa Isak' dii chon beŋ' kwenche we'la'ozgake'n. Na' beŋ' zan ba chzenaggake' che'. <sup>27</sup> Na' nxoll bich too diiki choncho, na' lekzka' nxoll bich seyi che yoodo' gana' zoa xnax Diana chechona', beena' nak beŋ' choo beŋ' xen. Na' beeni choe'la'o yog'zə beŋ' lle' gani mbani Ásiani na' beŋ' lle' doxen yell-lioni, gongakile'ne' ka to beŋ' bibi zakii.

<sup>28</sup> Ka goll Demétriona' legake' ka', le bllaagake' na' besyaagake', nagake':

—jBeŋ' choo beŋ' xen nak xnax Diana chechona', cho' beŋ' Éfeso!

<sup>29</sup> Na' yog'loḷe' gokgake' toz, wlekgake' dii lchix wal yella', na' bex'gake' chop beŋ' Macedonia, toe' le Gayo, na' stoe' le Aristarco, beŋ'ka' zejlen Páblona'. Na' wdoyogake' legake' bllinlentegake' legake' gana' chidopgake' choe'gake' dill'. <sup>30</sup> Na' Páblona' gokile' sho'e ladj beŋ'ka' ndop nllag na' kwenche nan we'lene' le-



gake' dill', per beṅ'ka' nonlilall' Jesúza' aga be'gake' latj sho'e. <sup>31</sup> Na' lekzka' ladj joschis che beṅ' Ásiaka' len beṅ' nllagui Páblona', na' bseḷ'gake' rson, che'gake'ne':  
—Ben goklen, bi shoo gana' lle' beṅ'ka'.

<sup>32</sup> Na' beṅ'ka' ndop nllag na' chosyaagake', wde wdeli dii na to toe'. Na' zan beṅ'ka' len ladje'ka' ni bi nezgakile' biḷe lle'zgake' na'. <sup>33</sup> Na' baḷ beṅ' Israelka' bllig'gake' Alejándrona' lao beṅ'ka' kwenche wi'e dill' lawe'ka'. Na'ch Alejándrona' blis neena' kwenche soa-gake' llizə na' wzenaggake' daa yee legake'. <sup>34</sup> Na' ka ble'gakile'ne' na' gokbe'gakile' nan beṅ' Israelan, na'ch bizologake' chosyaagake', nagake':

—|Ben' choo beṅ' xen nak xnax Diana chechona', cho' beṅ' Éfeso!

Ka do chop gor besyaagake' che'gake' ka'.

<sup>35</sup> Na'ch beena' nak sikriban che yella' bzoe' legake' llizə. Na'ch golle' legake':

—Le' beṅ' wllal, yog' beṅ' yell-lío nezgakile' cho' beṅ' Éfeso chidoḷ'cho gap wwiacho yoodo' che xnax Diana chechona', beena' nak beṅ' choo beṅ' xen. Na' nezgakile' lwaa lsakeena' za'n yabalə, <sup>36</sup> na' ni to kono gak ina aga kan' nakan. Na' li soa llizə kwenche bi gonle to dii bi chiyal' gonle. <sup>37</sup> Ka nak beṅ'ki ba bidwa'le ni, bi ina-cho ba wlangake' bi de loo yoodo' chechona', ni bi ina-cho ba wnegake' zban che xnax Diana chechona'.

<sup>38</sup> Na' shi Demétrioni na' beṅ'ka' chonlengake'ne' llinna' de dii chak chegake' kon nottezə beṅ', daan chi' beṅ'ka' chchoglogake' che beṅ' na' wak shajgake' lawe'ka' kwenche gongake' yel' joschis che'ka'. <sup>39</sup> Na' shi bichlə dii cheenile gak, chiyal' yitopcho yog'loḷ beṅ' yell na' we'chon dill'. <sup>40</sup> La' ka nak dga gok naa, nxoll ina beṅ' to cho'zan chta chnecho beṅ' yell, na' zbera inacho shi ba chṅabgakile' cho' che dga ba gok naa?

<sup>41</sup> Ka wde golle' legake' ka', na' bisheshe' legake'.

#### Biyaj Páblona' Macedóniana' na' Gréciana'

**20** Na' ka bibe'lli daa ben beṅ' Éfesoka', na'ch gox Páblona' beṅ'ka' nonlilall' Jesúza' na' be'lene' legake' to chop dill' dii gaklenan legake' na' wdeḷe' to to-gake', na' biḷee legake' dill'. Na' bizee zjade' gana' mbani Macedóniana'. <sup>2</sup> Na' bidie' to to yellka' llia Macedóniana' na' be'lene' beṅ'ka' nonlilall' Jesúza' zan dill' dii btipan lall'gake'. Na' biyolla' billine' Gréciana', <sup>3</sup> na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino beṅ' Israelka' le'. Na' bchogllalee bigwee nez kon ni'aze ziyaje' Macedóniana'lə. <sup>4</sup> Na' beṅ' zan zejlen-gake' Páblona' Ásiana'. Ladje'ka' len Sópatera' xiiṅ Pírrona', beṅ' Bereana'; na' Aristárcona' len Segúndona', beṅ' Tesalónicaka'; na' Gáyona', beṅ' Dərbena'; Timote-wa', na'ch Tíquicono' len Trófimona', beṅ' Ásiaka'. <sup>5</sup> Na' yog' beṅ'ki wllialogake' laonto'na', na' wlezkake' neto' yell Tróaza'. <sup>6</sup> Na' ka wde Inj Paskwa' kat' chaogake' yetxtila' daa bi nchix lewadúrana', na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez beṅ'ka' neto'. Na' wzoanto' na' gall lla.

#### Billin Páblona' yell Tróaza'

<sup>7</sup> Na' ka bllin lla dmiwa', lla nech che xmanna', bdop bllagnto' weej wdaonto' txen len beṅ'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch wyeelo be'lene' legake' dill'. <sup>8</sup> Na' ndop nllagnto' to loo yoo dii llia shkwa cha'lə, na' nakan bido yi'zi. <sup>9</sup> Na' to bi' wew' lliab' cho'a ventanna', na' leb' Eutico. Na' daa bshaljlen Páblona' beṅ'ka' ssha, beḷ'kza bishgala' leb' na' bxopb' cho'a ventan che yoo de shon kwiana' gana' lliab', na' ka biljsgake'b' ba witb'. <sup>10</sup> Na'ch biyetj Páblona', na' ka blline' gana' jadixjgake'b' bchekee wdeḷe'b'. Na' golle' beṅ'ka':

—Bi illeble; mbankzba'n.

<sup>11</sup> Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee. <sup>12</sup> Na' ka billesh beṅ'ka', chibagakile' biḷe'gake' bi' wewaa shi'a shbam'.

#### Biza' Páblona' Tróaza'

<sup>13</sup> Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. <sup>14</sup> Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. <sup>15</sup> Na'ch biza'nto' Mitilénena', na' betiyo bidento' gaozə yell-lío Quíona' daa llia lo nisdona'. Na' gok lillj billinnto' yell-lío Sámoza' daa llia lo nisdona', na' llana' sto wyajchnto' yell Milétona'. <sup>16</sup> Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' Inj Pentecostéza'.

#### Billag Páblona' beṅ'ka' ngoo lo na'gake' beṅ'ka' nonlilall' Jesúza' Éfesona'

<sup>17</sup> Na' ka zoanto' Milétona', Páblona' bseḷee rson na' goxe' beṅ'ka' ngoo lo na'gake' beṅ'ka' nonlilall' Jesúza' Éfesona'. <sup>18</sup> Na' ka bllingake', goll Páblona' legake':

—Le' nezele nak bsa' cha' dezd nechte ka wzoalen' le' Ásiani. <sup>19</sup> Ba wzoa' ba ben' xshin Chioza' do yichj do lal-laa, na' zan shii gokyeshid' na' wchell', na' biya dii ben ble'id' daa bchi' bsak' beṅ' Israelka' nad'. <sup>20</sup> Na' aga ni che ka' bsan' bich wnia' le' daa chiyal' inezile, san bli' bsdchzkid' le' gana' chdop chllagle na' ka'kzə lill to tole. <sup>21</sup> Ka beṅ' Israel ka beṅ' bi nak beṅ' Israel, be'lengakee dill' nan chiyal' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. <sup>22</sup> Na' naa, Espíritu che Chioza' chone' byen yiyaa Jerusalénna', na' bi nezele' bi gak cha' na'. <sup>23</sup> Zeelo dii nezele, Espíritu Sántona' ne' nad' to to yell gana' tia' gataa lillya na' biya dii gak cha'. <sup>24</sup> Na' aga bi chakid' cheyi diika' gak cha', la' aga llialo yel' mban cha'ni, san llialote yiyoll gon' yog'loḷ daa ben Xancho Jesúza' lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

<sup>25</sup> Na' ba bzajniid' le' ka chon Chioza' chṅabi'e loo yichjlall'do' beṅ' chonlilalleene', na' naa ni stole le' bich

ile'ile nad' yell-lioni. <sup>26</sup> Daan nia' le' n̄aa, aga bi do! nap' shi nole kwiayj'. <sup>27</sup> La' ba bzajniid' le' yog' daa cheeni Chioza'. Bibi bkwashaa dii in̄acho bi wnia' le'. <sup>28</sup> Na' li wsak', li gap wwia beñ'ka' nakle txen, la' Espíritu Sántona' wleje' le' kwen̄che gap wwiale beñ'ka' non̄lilall' Xancho Jesúsza', beñ'ka' biya'o bizi'lene' x̄chene'na' daa blalje' lee yag cruza'. <sup>29</sup> La' n̄ezid' kat' bich soalen' le' na' yid beñ' gonllejgakile' le' kwen̄che kwey yich̄je daa non̄lilall'le Jesúsza'. Gongake' ka ba z̄nia, ba chjatao xil'do' che beñ'. <sup>30</sup> Na' ladjlena' ichej beñ' wli' wsedile' le' daa bi nak sh̄li kwen̄che gonlene' txen. <sup>31</sup> Na' li wsak' kwen̄che kono siye' le'. Na' li lljadini ka ben' lo shon̄ yiza' wzoalen' le', la' ka tella ka wal got'yoid' to tole kwen̄che wzenagle che Chioza', na' axt wchell' ni chele.

<sup>32</sup> Na' n̄aa, chon' le' lo na' Chioza' len cho'a x̄tilleena' daa na le chakile' cho'. La' l̄ennan' napan ye! wak kwen̄che gaklenan le' soācheh̄le gonlilall'lene'. Na' ka' lljazoalenene' txen len yog' beñ' nakgake' lall' nee.

<sup>33</sup> N̄ezkzile bibin' selallaa chele, ni xmechle, ni xalaanle, ni bichl̄e dii naple. <sup>34</sup> Na' n̄ezkzile n̄i'a na'ni benlen' llin kwen̄che bllelid' bi dii byalljenid' beñ'ki chonlengake' nad' xshin Chioza'. <sup>35</sup> Ben' llinna' kwen̄che bliid' le' ka chiyal' gakencho beñ' kat' bi chyalljgakile'. La' chiyal' lljadinicho x̄till' Xancho Jesúsza' kana' wne': "Mbalazch soacho shi we'cho beñ' bi we'chone', aga ka daa ikaa-cho bi dii gone' cho'."

<sup>36</sup> Na' ka biyoll be'len Páblona' legake' dill', na'ch b̄chek' xibe'ka' be'llwillgake' Chioza'. <sup>37</sup> Na' yog'gake' wchell, na' wde!gake' Páblona' na' bnopgake'ne'. <sup>38</sup> Na' le nyesh' wzoagake' daa goll Páblona' legake' bich ile'i lljwellgake'. Na' jasangake'ne' gana' biyo'e barkwa'.

### Biyaj Páblona' Jerusaléna'

**21** Na' ka bilaanto' beñ' Éfesoka', na'ch biyoonto' loo barkwa' ziyajnto' sh̄ljicha yell-lío Coza' daa llia lo nido'na', na' betiyo billinnto' yell-lío Ródaza' daa llia lo nido'na', na' biza'nto' billinnto' yell Pátarana'. <sup>2</sup> Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. <sup>3</sup> Na' ka zejnto' loo barkwa' ble'into' yell-lío Chíprena' daa llia lo nido'na' na' to wdeznto' sh̄laana'l̄e zejnto' yell Tírona' daa llia gana' mbani Síriana'. Na' ka billin barkwa' Tírona', bi!etjgake' yoa'na' noa'n na' biyetjnto'. <sup>4</sup> Na' jadiljnto' beñ'ka' non̄lilall' Jesúsza' na' bigaan̄lennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusaléna'. <sup>5</sup> Na' ka gok to xman biza'nto'. Na' yog' beñ'ka' ba non̄lilall' Jesúsza' yell Tírona', do xiin̄ xoolgake', wza'lengake' neto' cho'a yel-la'. Na' ka bllinnto' cho'a nido'na', b̄chek' xibnto' be'llwillnto' Chioza'. <sup>6</sup> Na'ch bil̄aa lljwellnto' dill', na' biyoonto' loo barkwa', na' beñ'ka' biyajgake' lill che che-gake'.

<sup>7</sup> Na' biza'nto' Tírona' billinnto' yell Tolemáidana', na' bwapnto' chiox beñ'ka' non̄lilall' Jesúsza' na', na' bi-gaan̄lennto' legake' shlla. <sup>8</sup> Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen beñ'ka' gall chaklengake' postlka',

na' bigaan̄nto' lille'na'. <sup>9</sup> Na' zoa tap bi' nool wew' che', na' chyixje'gakb' daa che' Chioza' legakb'. <sup>10</sup> Na' ka ba gok shon̄ tap lla zoanto' lille'na', na' bla' to beñ' Judea lie' Ágabo, beñ' chyixjee daa che' Chioza' le'. <sup>11</sup> Bidwie' neto' na' w̄nabe' xpach̄lee Páblona' na' b̄ichej n̄i'a na' kwine', na' chi'e:

—Ba bzajni Espíritu Sántona' nad' ne' beñ' wlalka' lle' Jerusaléna' w̄chejgake' n̄i'a na' x̄an bach̄leeni ka ba n̄chej' n̄i'a na'ni, na' gongake'ne' lo na' beñ'ka' bi nak beñ' Israel.

<sup>12</sup> Na' ka beninto' wna Ágabona' ka', neto' len beñ' Cesareaka' got'yointo' Páblona' bi yiyaje' Jerusaléna'. <sup>13</sup> Na' Páblona' wne' neto':

—Bi kwell-le cha', bi gonle ka gakyeshid'. Zoakz' wti! diika', aga toz daa w̄chejgake' nad', san wakte witgake' nad' daa non̄lilallaa Xancho Jesucristona'.

<sup>14</sup> Na' ka gokbe'into' bi chzenag Páblona' daa che'nto'ne' bi yiyaje' Jerusaléna', na'ch wnanto':

—Gakshga ka cheeni Xancho Jesúsza'.

<sup>15</sup> Na' ka wde, bisini'a ch̄ento' kwen̄che biza'nto' ziya-jnto' Jerusaléna'. <sup>16</sup> Na' ba! beñ' Cesareaka' non̄lilall' Jesúsza' wza'lengake' neto'. Na' b̄che'gake' neto' lill to beñ' le Mnasón, gana' yigaañnto'. Beeni nake' beñ' Chipre na' ssha ba gok non̄lilallee Jesúsza'.

### Páblona' jawie' Jacóbona' Jerusaléna'

<sup>17</sup> Na' ka billinnto' Jerusaléna', le chibayi beñ'ka' naknto' txen non̄lilall'nto' Jesúsza'. <sup>18</sup> Na' betiyo wza'len Páblona' neto' jawianto' Jacóbona'. Na' ka bllinnto', ba lle' yog' beñ'ka' ngoo lo na'gake' beñ'ka' non̄lilall' Jesúsza' Jerusaléna'. <sup>19</sup> Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj beñ'ka' bi nak beñ' Israel. <sup>20</sup> Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', beñ' bish', n̄ezkzilo' beñ' zan wal inleeb beñ' Israelka' ba non̄lilall'gake' Jesúsza', na' yoguee nagake' chonan byen goncho daa na leya'. <sup>21</sup> Na' ba bengakile' rson ka chono', na' nagake' chzajniilo' yog' beñ' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sen̄ daa le circuncisión, na' bich gongake' daa yoolocho choncho. <sup>22</sup> ¿Nakra gonchon, lla? La' lii idop illagte beñ' kat' in̄ezgakile' ba biyedo'. <sup>23</sup> Waklja gono'n ki: Ladjnto'ni zoa tap beñ' n̄chebe' to dii n̄chebe' lao Chioza', na' chonan byen wdelazgake' daa n̄chebgake'. <sup>24</sup> Chiyal' w̄chi'o legake' yoodo'na' kwen̄che txen yixi yiyechle. Na' li' chixjo' daa chiyal' chixjgake' kwen̄che gak wshib yich̄je'ka' ka nllia leya' bia'. Na' shi gono' ka', yog' beñ' in̄ezgakile' bi nakan ka nagake' cho', na' gakbe'gakile' lekzka' chzenago' daa na leya'. <sup>25</sup> Na' ka nak beñ'ka' bi nak beñ' Israel na' ba non̄lilall'gake' Jesúsza', ba bzejnto' le-gake' bi kwe' yich̄jgake' diika' zejlencho cho' beñ' Israel. Na' gollnto'gake' daa chiyal' gongake': bi gaogake' ye! wao daa ba bllia beñ' lao lwa' Isak' daa choe'la'ogake', na' bi gaogake' x̄chen bayixaa, ni xpel' bana' bi wlalj x̄chema', na' bi in̄elenzgage' xiin̄ xool beñ'.

### Bex'gake' Páblona' yoodo'na'

<sup>26</sup> Na' betiyo ka bixi biyech Páblona' len beŋ'ka' zi tap, na' wyajgake' yoodo'na' kwençhe wzenile' b̄xozka' bi llan sheelo daa ba n̄heb̄gake' kwençhe ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

<sup>27</sup> Na' ba zoa iza gall lla chongake' daa chiya! gongake' kwençhe yixi yiyechgake', na' ba! beŋ' Israelka', beŋ'ka' zaak Ásiana', ble'gakile' Páblona' loo yoodo'na'. Na'ch bta b̄negake' beŋ'ka' lle' na', kwençhe bex'gake' Páblona'. <sup>28</sup> Na' w̄negake' zilljə che'gake':

—Le', beŋ' Israel, li' gaklen neto'. Beeni chde' doxen chli' chsedile' beŋ' kwençhe gakzbangakile' cho' beŋ' Israel, len ley çhechona' na' yoodo' çhechoni. Na' ŋaa sto dii zban wal ba bizone', ba wlo'e to çhop beŋ' griego yoodo' çhechoni, la' bi de lsens sho' beŋ'ki lill xlatj Chios çhechona'.

<sup>29</sup> Wnagake' ka' daa ba ble'gakile' Trófimona', to beŋ' yell Éfeso, chdalene' Páblona' txen Jerusalénna', na' gokgakile' lekzka' b̄che' Páblona'ne' yoodo'na'.

<sup>30</sup> Yog'z beŋ' lle' yella' bllesh bcheengake' zejdogake'. Na'ch bigoyogake' Páblona' axt de x̄neze' bibejgake'ne' yoodo'na', na' lii bsejtegake' puertka'. <sup>31</sup> Na' ba llagdia'gake' Páblona' cheengakile' wittekgake'ne' ka bllin dillaa lao beŋ' w̄nabia' çhe soldadka' nan chak dane nllib doxen yell Jerusalénna'. <sup>32</sup> Na' lii btoptie' soldadka' na' beŋ'ka' ngoo lall' na' legake' na' wyajdogake' gana' lle' beŋ'ka'. Na' beŋ'ka' chit Páblona' ka ble'gakile' beŋ' w̄nabia'na' len soldad çhe'ka', na'ch bsangake' bich bet wdingake'ne'. <sup>33</sup> Na'ch jabig' beŋ' w̄nabia'na', na' bexee Páblona' na' bene' mandad b̄chejgake'ne' çhop gden. Na'ch w̄nabile' beŋ'ka' no beena' na' bin bene'. <sup>34</sup> Na' beŋ'ka' kon chosyaagake' na' chiya dii na to toe', na' bi wyajni beŋ' w̄nabia'na' daa zi'te chongake' sshag. Na'ch bene' mandad biçhe' soldadka' Páblona' gana' zoagake'. <sup>35</sup> Na' ka bllingake' cho'a shkwiaka' lle' cho'a lill soldadka' benan byen b̄len soldadka' Páblona' daa zej beŋ' Israelka' cheengakile' w̄nizgake'ne'. <sup>36</sup> Na' beŋ' zan nogake'ne' chosyaagake', che'gake':

—iLi wittegue'!

### Páblona' cho'e dill' lao beŋ' Israelka'

<sup>37</sup> Na' ka ba zoa lljloogake' Páblona' gana' zoa lill soldadka', na'ch golle' beŋ' w̄nabia'na':

—¿Awak we'len' li' to çhop cho'a dill'?

Na' beŋ' w̄nabia'na' golle'ne':

—¿Achako' dill' griegona? <sup>38</sup> ¿Aaga lin' beŋ' Egíptona' beena' wzoshyi' beŋ' w̄nabia'ka' kani batzə, na' b̄chi'e tapa mil beŋ' wen xyaka' latja' gana' bibi chashj chleb?

<sup>39</sup> Na'ch goll Páblona'ne':

—Aga le' nad'. Nad' nak' to beŋ' Israel, beŋ' yell Tarso dii nak to yell xen gana' mbani Cilíciana'. Ben goklen be' latj we'len' beŋ'ki dill'.

<sup>40</sup> Na' beŋ' w̄nabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwençhe soagake'

llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

**22** —Le' beŋ' bish', na' le' beŋ' gol, li' wzenag dill' çha'ni wi'a.

<sup>2</sup> Na' beŋ'ka', ka bengakile' ch̄ne Páblona' dill' hebrewa' na' wle'gake' llizə. Na' Páblona' chi'e legake':

<sup>3</sup> —Nad' nak' beŋ' Israel na' golj' yell Társona' gana' mbani Cilíciana', per bgol' Jerusalénni, na' bli' b̄sedi maestro Gamaliela' nad' kwaslo! ka na ley çhe dii xozx-to'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' ŋaanlla. <sup>4</sup> Na' b̄chi' bsakaa beŋ'ka' ba wyoo lo nez li' nez shao' çhe Jesucristona' na' goklallaa guetgake'. Na' bexaa ka nool ka beŋ' byo, na' wlo'a legake' lillyana'. <sup>5</sup> Beena' nak b̄xoz choo b̄xoz xen na' yog' beŋ' golka' ch̄nabia' beŋ' Israelka' ñezgakile' ka ben'. Na' legake' beŋgake' nad' yish daa bexaa ka wzaa zyaa yell Damáscona', gokid' lljexaa yog'lo! beŋ'ka' nogake' xtill' Jesucristona' na' yiçhe'gakee Jerusalénni kwençhe sak'zi'gake'.

### Be' Páblona' dill' ka gok benlilallee Jesúza'

(Hch. 9:1-19; 26:12-18)

<sup>6</sup> Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa.

<sup>7</sup> Na' to wzoatishz' lo yona'. Na'ch benid' shii to beŋ' wne' nad': "Saulo, Saulo, ¿beraçhe ch̄chi' chsak'zo' nad'?" <sup>8</sup> Na' w̄nabidee, chepee: "¿No li', beŋ'?" Na' wne': "Nadaan Jesús, beŋ' Nazareta', beena' ch̄chi' chsakoo." <sup>9</sup> Na' beŋ'ka' zyaalen' txen ble'gakile' yi'na' daa wyalj na' bllebgake', per aga bengakile' daa wna beena' nad'. <sup>10</sup> Na'ch goshee: "¿Beran chiya! gon', Xan'?" Na' wne' nad': "Biyas na' wyaj Damáscona', na' na' inagake' li' yog' daa chiya! gono'." <sup>11</sup> Na' beeni' wala' b̄cho!an nad', na' beŋ'ka' zyaalen' txen biyox'gake' na'na' na' b̄che'gake' nad' Damáscona'.

<sup>12</sup> Na' Damáscona' zoa to beŋ' le Ananías, na' zoe' chone' yog' daa na leya', na' yog' beŋ' Israelka' zoa Damáscona' nagake' çhe' nake' to beŋ' chon dii wen.

<sup>13</sup> Na' Ananíaza' bide' bidwie' nad', na' ka blee, wne' nad': "Saulo, beŋ' bish', ŋaa yile'ilo' sto shii." Na' kate wne' ka', lii bile'teid', na'ch gok ble'idee. <sup>14</sup> Na'ch wne' nad': "Chioza', beena' be'la'o dii xozxto'choka', ba wleje' li' kwençhe gombi'o daa cheenile' gono', na' kwençhe ble'ilo' beena' nak liizelozzi beŋ' wen, na' benteilo' kwine'n ba bshaljlene' li'. <sup>15</sup> Na' li' wi'o xtillena' doxen yell-lioni, na' we'leno' beŋ' dill' yog'lo! diika' ba ben ble'ilo'. <sup>16</sup> Na' ŋaa, bibi wsej wllonan çhoatego' nisa' na' w̄nabi Xancho Jesúza' yisol yin̄ite' saaxya çho'ka'."

<sup>17</sup> Na' ka biyed' Jerusalénni, wyaa yoodo'na' je'llwill' Chioza', na' Chioza' bene' ka ble'do'id'. <sup>18</sup> Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtillaana' daa we'lengako'ne'." <sup>19</sup> Na'ch chepee: "Xan', legake' ñezgakile' ka wya' to to gana' chdop chllagnto' choe'llwillnto' Chioza' jexaa beŋ'ka' nonlilall' li', na' bet wdingakee na' biçhe'gakee ni, bsejgakee lillyana'. <sup>20</sup> Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa beŋ'ka' bet le'." <sup>21</sup> Na' Jesúza',

beena' nak ʁan', wne' nad': "Wloo nez, wyaj yell zit'ka' na' je'len beṅ'ka' bi nak beṅ' Israel xtilaana'."

### Páblona' goke' lo na' beṅ' wṅabia' ɕhe soldadka'

<sup>22</sup> Zeelo diika'z bzenaggake' ɕhe Páblona', na'ch wzo-lo chosyaagake' che'gake':

—ɕBisol biṅitague' yell-lioni! ɕAga chiya! soach ka le'!

<sup>23</sup> Na' bikzə bsangake' chosyaagake' daa le chlaa-gake'. Axt no xe'ka' chza!gake' ka'lə na' no bishte yona' chashgake'n chza!gake'n cha'lə. <sup>24</sup> Na' beṅ' wṅabia' ɕhe soldadka' bene' mandad wloogake' Páblona' gana' zoa lill soldadka' na' wit ɕhingake'ne' kwenɕhe wi'e dill' bin bene' daa zi'te chlaa beṅ'ka' le'. <sup>25</sup> Na' ka ba nɕhej-gake'ne' kwenɕhe wit ɕhingake'ne', Páblona' golle' ʁan soldadka':

—ɕAde lsens wit ɕhinle to beṅ' nde kwent Rómana' la'kzi biṅ' yiyiljyoll-le bin bene'?

<sup>26</sup> Na' ka goll Páblona' ʁan soldadka' ka', na'ch jelle' beṅ' wṅabia' ɕhe'ka':

—Wsak'shkilo', nde beeni kwent yell Rómana', na.

<sup>27</sup> Na' beṅ' wṅabia' ɕhe soldadka' wyaje' kwit Páblona' na' wṅabile'ne', chi'ene':

—ɕAlin ndio' kwent yell Rómana'?

Na' Páblona' chi'ene':

—Awe.

<sup>28</sup> Na'ch beṅ' wṅabia' ɕhe soldadka' chi'e Páblona':

—Nad' mech xen wxakidaan kwenɕhe ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

<sup>29</sup> Na' daa goll Páblona' ka', beṅ'ka' nan wit ɕhin-gake'ne' lii bikwastegake' kwite'na'. Na' axt beena' chṅabia' soldadka', ka gokbe'ile' Páblona' ndie' kwent yell Rómana', le bllibe' daa bene' mandad bɕhej-gake'ne' gdenka'.

### Bzegake' Páblona' lao beṅ'ka' chṅabia' beṅ' Israelka'

<sup>30</sup> Na' betiyo, beṅ' wṅabia' ɕhe soldadka' btope' bɕoz-ka' chṅabia' na' yog'lo! beṅ'ka' chṅabia' beṅ' Israelka'. Na' bselle' gdenka' daa nchej ni'a na' Páblona', na' wle-je'ne' bzie'ne' lao beṅ'ka' daa cheenile' iṅezile' biɕhe chao beṅ' Israelka' xya ɕhe'.

**23** Na'ch Páblona' bwie' beṅ'ka' chṅabia' beṅ' Is-raelka' na' golle' legake':

—Le' beṅ' bish', ṅezi yichjlall'dawaani axt ṅaa chon' daa chazlall' Chioza'.

<sup>2</sup> Na'ch Ananíaza', beena' nak bɕoz choo bɕoz xen, golle' beṅ'ka' ze kwit Páblona' kwall'gake' cho'ena'.

<sup>3</sup> Na' Páblona' golle'ne':

—ɕChioza' wit ɕhine' li', wxiye'! Li' chi'oni kwenɕhe yiya yiyiljo' nad' kon ka na leya', per chyishjo' daa na leya' daa beno' mandad wlall'gake' cho'ani.

<sup>4</sup> Na'ch beṅ'ka' lle' na', che'gake' Páblona':

—ɕNaktekara chiyaxjilo' chilliizo' dill' beena' nak bɕoz choo bɕen ɕhe Chioza'?

<sup>5</sup> Na'ch Páblona' golle' legake':

—Le' beṅ' bish', bi ṅezid' shi len' bɕoz choo bɕoz xen-na'. She!ka' ṅezid', aga goshee ka', la' Cho'a Xtill' Chioza' nan: "Bi iṅio' zban to beṅ' wṅabia' ɕhe yell cho'na'."

<sup>6</sup> Na' Páblona' gokbe'ile' beṅ'ka' chṅabia' nakgake' ɕhop kwenlə. Ba!e' nak t xen saduceoka' na' ba!e' nak t xen fariseoka'. Na'ch wṅie' zillj chi'e:

—Le' beṅ' bish', nad' nak' fariseo na' naktia' xiṅ fariseo. Na' chaole xya ɕha' daa non' lez yiban beṅ' wetka'.

<sup>7</sup> Ka goll Páblona' ka' na' gok to wishesh wal ladj fariseoka' len saduceoka'. Na' gokgake' ɕhoplə. <sup>8</sup> La' saduceoka' nagake' aga wibanch beṅ' wetka', na' lekz-ka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban beṅ' wetka'. <sup>9</sup> Na' yog'gake' besyaagake' choe'gake' wde wdeli dill'. Na'ch wzolla' ba! beṅ'ka' chli' chsedí leya' nakgake' t xen fariseoka', na' che'gake':

—Ni to dii mal biṅ' gon beeni. Shera shi to beṅ' bi gak ile'icho wa to anjlan' ba wṅie' le'. Bi chiya! soshi'cho Chioza'.

<sup>10</sup> Na' daa zi'telə gokdi!-len ljjwell beṅ'ka', bxolli beṅ' wṅabia' ɕhe soldadka' wxoxj wtingake' Páblona'. Na'ch wṅie' soldadka' yibejgake' Páblona' ladje'ka' na' ll-jaloogake'ne' dii yoblə gana' zoa lille'ka'.

<sup>11</sup> Na' llana' sto ka go! bli'lao ʁancho Jesúsza' Páblona' na' golle'ne':

—Bendiplaloo Pablo, ka ba be'kzo' xtilaana' Jerusaléni, ka'kzan chonan byen lljeno' Rómana'.

### Chgoogake' xṅezin witgake' Páblona'

<sup>12</sup> Na' betiyo ba! beṅ' Israelka' gokgake' toz kwenɕhe witgake' Páblona', na' wloo cho'agake' bibi yeej gao-gake' axt ki guet Páblona', na' gollgake' Chioza' wsak'zi'e beena' yeej gao shlak biṅ' witgake'ne'.

<sup>13</sup> Wdeli ɕhoa beṅ'ka' wloo cho'agake' witgake' Páblona'. <sup>14</sup> Na'ch wyajgake' lao bɕozka' chṅabia' na' lao beṅ' gol ɕhe'ka' chṅabia' beṅ' Israelka' na' jellgake':

—Ba bɕhebnto' wsak'zi' Chioza' neto' shi yeej gaozn-to' na' biṅ' witnto' Páblona'. <sup>15</sup> Na' le' nakle beṅ' wṅabia' ɕhento', li gak toz na' li iṅabi beṅ' wṅabia' ɕhe soldadka' kweje'ne' wxə na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenɕhe witnto'ne' ka zi' ilee ni.

<sup>16</sup> Na' bi' ɕhe beṅ' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. <sup>17</sup> Na' Páblona' wṅie' to beṅ' nak ʁan to guiyoa soldadka', golle'ne':

—Jwa'gach bi'ni lao beṅ' wṅabia' ɕhe soldadka', la' de to dii ye'b' le'.

<sup>18</sup> Na' ʁan soldadka' jweeb' lao beṅ' wṅabia' ɕhe yog' soldadka', na' golle'ne':

—Páblona', beena' nej lillyana', wṅabile' nad' yidwa' bi'ni lawo'ni, la' de to dii iṅab' li' na.

<sup>19</sup> Na' beṅ' wṅabia' ɕhe yog' soldadka' beṅee na' bi'na', na' bɕhi'eb' ga kono lle'. Na'ch wṅabile'b':

—ɕBeran cheenilo' iṅo' nad'?

<sup>20</sup> Na' bi' xkwidaa gollb' le':

—Ben' Israelka' ba gokgake' toz kwenche inabgakile' li' kwejo' Páblona' wx̄e na' wsēloone' lao ben'ka' chñabia' legake', na' wda'tezgakile'n yiyiljyollgake' be-rakzan bene'. <sup>21</sup> Na' bi shajli'o chegake', la' wdeli choa ben'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' bin' guete'. Na' ba chbezgake' gono' ka cheengak-ile'.

<sup>22</sup> Na'ch ben' wñabia' che soldadka' chi'eb':

—Ni to kono yoo ka nak dga ba wno' nad'.

Na'ch biza'b'.

### Bsel'gake' Páblona' lao ben' wñabia'na' le Félix

<sup>23</sup> Na'ch ben' wñabia' che soldadka' wñie' chop xan soldad che'ka' na' bene' mandad wenzagakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyogake' shajgake' ni'azgake', na' giyon-shigake' kwiagake' kabay na' zi chop guiyogake' gox'gake' lanza. <sup>24</sup> Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix'a, beena' chñabia'. <sup>25</sup> Na'ch bgoxee legake' to yish dii na ki:

<sup>26</sup> “Si'xengacho' ben' wñabia' Félix, nad' Claudio Lisias chzej' li', na' chwap' li' chiox. <sup>27</sup> Ka nak beeni chsēlaa lawo'na', ben' Israelka' bex'gake'ne' na' ba zoa wit-gake'ne' she'l' ki nad' jasla'ne' len soldad cha'ka', la' wñezid' ndie' kwent yell Rómána'. <sup>28</sup> Na' daa goklallid' inezid' berache chaogake' xya che', jwaane' lao ben'ka' chñabia' ben' Israelka'. <sup>29</sup> Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. <sup>30</sup> Na' ka wñezid' ben' Israelka' ba ngoogake' xnezin witgake'ne', bchogllalla wsēlaane' lawo'na'. Na' ba gosh' ben'ka' chao xya che' yidgake' lawo'na' na' inagake' li' bin chaklen chegake' Pábloni. Ka'tz dii nia' li'.”

<sup>31</sup> Na'ch soldadka' lle' na' bche'gake' Páblona' zejlen-gake'ne', bllinlentegake'ne' yella' le Antípatris kon ka goll ben' wñabia' che'ka' legake'. <sup>32</sup> Na' betiyo, soldadka' zej ni'azgake' bibiigake' ziyajgake' Jerusalénna'. Na' ben'ka' lliia kabayka' zejlenchegake' Páblona'. <sup>33</sup> Na' ka bllingake' Cesareana', be'gake' ben' wñabia'na' yisha' nox'gake' na' bengake' Páblona' lo nee. <sup>34</sup> Na' ka wde blab ben' wñabia'na' yisha', na'ch wñabile' Páblona' ga beñaan. Na' ka wñezile' Páblona' nake' ben' yell Tarso, daa lliia gana' mbani Cilíciana', <sup>35</sup> na'ch golle'ne':

—Na' wzenagshkid' bin ino' kat' yid ben'ka' chao xya cho'.

Na'ch bene' mandad lljasejgake'ne' yooná' ben dii Heródeza', gana' chzoa ben' wñabia'ka'.

### Be' Páblona' dill' lao Félix'a

**24** Gok gay' lla zoa Páblona' Cesareana' ka bllin b̄xoz choo b̄xoz xenna', beena' le Ananías, na' nchi'e bal ben' golka' chñabia' na' kon to ben' wide dill', ben' le Tértulo. Na' bllingake' lao beena' chñabia' kwenche gaogake' xya che Páblona'. <sup>2</sup> Na'ch bdegake'

Páblona' lao ben' wñabia'na' le Félix na' wzolo Tértulo'na' chawe' xya che', chi'e:

—Choxkeno' li', ben' wñabia', zoanto' mbalaz na' chak wen chento' lallnto'ni daa chak koo xnezi yog'lōte kon ye'l' sin' cho'na'. <sup>3</sup> Na' daan, gattez zoanto' toshiizi nanto' li' choxkeno' dii zan las, li' ben' wñabia'. <sup>4</sup> Na' kwenche bich wshayinto' li', chñabinto' li' gono' goklen wzenago' to chop ka nak dga inanto' li'. <sup>5</sup> Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta chñie' ben' kwenche neto' ben' Israel gaknto' chopl̄a, na' ngoo lo nee xonj ben' chonlilall' to ben' Nazaret. <sup>6</sup> Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'. <sup>7</sup> Na' wyaz ben' wñabia' che soldadka', beena' le Lisias, na' bigoyoe'ne' lo na'nto'na'. <sup>8</sup> Na' wne' neto' chiya'l' yidnto' lawo'ni kwenche gaonto' xya che'. Na' kwino' naa, wak inabilo' Pábloni kwenche inezilo' biche chaonto' xya che'.

<sup>9</sup> Na' ben' Israelka' lle'lengake' na', bischopgake' dil-laa che'gake': “Ka nakannan'.” <sup>10</sup> Na'ch ben' wñabia'na' bene' señ lao Páblona' kwenche wi'e dill', na'ch wzolo Páblona' chi'e:

—Ñezid' ba gok zan yiz chono' ye'l' joschis che ben'ki lle' gani mbanilo'. Daan chibaid' wi'a dill' daa chak cha' lawo'ni. <sup>11</sup> Zi' gok shllin lla billin' Jerusalénna' jaye'lawaá Chioza', na' shi cheenilo' gakiyilo'n, wak inabo' kwenche xenlalloo ka nakannan'. <sup>12</sup> Na' kono ble'i nad' chakdi'l-len' ben' wa chbekw' wdi'l wishesh ladj ben', ni loo yoodo'na' ni gan yobl̄a ga chdop chllagnto' choe'lwillnto' Chioza' ni gachli yella'. <sup>13</sup> Na' ka nak diiki na ben'ki cha', ni ton bi gongake' gan inagake' ka nakannan'. <sup>14</sup> L̄ete to dii wcheb' lawo'ni choe'lawaá Chioza', beena' be'la'o dii xozxto'nto'ka', kon ka nak nez li' nez shao' che Jesucristona' daa yo'a, daa na ben'ki bi zejan shli. Per chajli'a yog' daa na ley che Chioza' na' diika' bzej dii ben'ka' wdixjee daa golle' legake'. <sup>15</sup> Na' ka ben'ki chao xya cha' na' ka nad', toz ka nonnto' lez yisban Chioza' ben' wetka', ka ben' wen ka ben' mal. <sup>16</sup> Daan chon' byen yixi yiyech yichjlall'dawaani, la' cheenid' bibi do'l' gap' lao Chioza' ni lao ben' yell-lioni.

<sup>17</sup> Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenan ben' wlall cha'ka' na' lekzka' wi'a bi dii wi'a yoodo'na'. <sup>18</sup> Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag' na' ni to wdi'l wishesh bi mbek'.

<sup>19</sup> Legaken' chiya'l' yidgake' ni gaogake' xya cha' shi bin ble'gakile' chon'. <sup>20</sup> Wa ben'ki zoa ni, inashkigake' shi bi dii mal billelgakile' cha' kana' jwa'gake' nad' lao ben' wñabia' chento'ka'. <sup>21</sup> ¿Awa shi daa besyaa goshgakee: “Chaozle xya cha' daa chajli'a wllin lla yiban ben' wetka'?”

<sup>22</sup> Na' ka biyoll beni Félix'a wna Páblona' ka', na' bsane' bich bene' ye'l' joschis che'na', la' ba wñezile' nakan nak diika' chajle' ben'ka' yoo lo nez li' nez shao' che Jesucristona'. Na' golle' ben'ka':

—Kat' yid Lísiaza', beena' chṇabia' soldadka', kana' inzezyen'id' nakran nak dga chak chele.

<sup>23</sup> Na'ch Félixá' golle' xan soldadka' wseje' Páblona', per bi wllone' sho' beṇ'ka' nombia' le' na' llje'gake'ne' bi dii chyalljile'.

<sup>24</sup> Na' ka wde ḥop shoṇ lla, bizllinlen Félixá' xoole'na' le Drusila, to nool Israel. Na'ch ben Félixá' mandad bllin Páblona' lawe'ka' kwenḥe wzenaggake' dillaa daa cho'e daa ne' chiyaḷ' gonḷilall'cho Jesucrístona'.

<sup>25</sup> Na'ch be' Páblona' dill' chi'e chiyaḷ' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félixá' xtilleena', le bllebe'. Na'ch golle' Páblona':

—Ba gokz to ka't', na' kat' gat' latj ḥa'na' inṇia' li' dii yoblə.

<sup>26</sup> Félixá' lekzka' goklallee we' Páblona' le' meḥ kwenḥe yisane'ne'. Daan zekizezi wṇie'ne' kwenḥe be'lene'ne' dill'. <sup>27</sup> Ka'z wde ḥop yiz, na' ka bichej Félixá' bich wṇabi'e na' wyoo to beṇ' yoblə lie' Porcio Festo. Na' kwenḥe ile'shii beṇ' Israelka' Félixá', bi bisane' Páblona'.

#### Páblona' bi'e dill' lao Féstona'

**25** Na'ch ka bllin Féstona' Cesareana' kwenḥe inṇabi'e, na' wzoe' shoṇ lla. Na'tech wzee wyaje' Jerusalénna'. <sup>2</sup> Na' bḥozka' chṇabia' na' nochlə beṇ'ka' chṇabia' beṇ' Israelka' ka wṇezgakile' ba blline' Jerusalénna', na'ch jtaogake' xya che Páblona' lawe'na'. <sup>3</sup> Na' wṇabgakile'ne' gone' to goklen yiselee Páblona' Jerusalénna' kwenḥe gak yeḷ' josḥis che'na'. Goll-gake'ne' ka' daa goklall'gake' witgake'ne' tneza'. <sup>4</sup> Per goll Féstona' legake':

—Cesareana'zka' yigaaṇ Páblona', na' aga chlloch yiyaa na'lə.

<sup>5</sup> Na' golle' legake':

—Beṇ'ka' chṇabia' le' chiyaḷ' sa'lengake' nad' Cesareana' kwenḥe gaole xya shi bi dii malan bene'.

<sup>6</sup> Na' ka do zi ga shi lla wzoa Féstona' Jerusalénna', na' bizee ziyaje' Cesareana'. Na' betiyo wchi'e gana' gone' yeḷ' josḥisa' na' bene' mandad jxi'gake' Páblona'. <sup>7</sup> Na' ka wyoo Páblona' gana' chi' Féstona' lii wbig'te beṇ' Israelka' zaak Jerusalénna' chaogake' xya che', che'gake' dii zan dii mal ba bene', per na' ni to daa wdaogake' xya che' bi bengake' gan ye'gake' ka nakannan'. <sup>8</sup> Na'ch Páblona' bzoa rson che', chi'e le-gake':

—Nad' ni tlish' dii maḷ biṇ' gon', ni biṇ' ḥishij' ley ḥento'na' neto' beṇ' Israel, ni biṇ' wnit' balaan che yoodo' ḥento'na', ni bigan' inṇia' zban che Césará' beena' chṇabia'.

<sup>9</sup> Na' daa goklall' Féstona' ile'shii beṇ' Israelka' le', na' chi'e Páblona':

—¿Acheenilo' yiyajo' Jerusalénna' kwenḥe gon' yeḷ' josḥis ḥo'na' na'lə?

<sup>10</sup> Na' Páblona' chi'ene':

—Ba zia' lawo'ni, na' beṇ' wṇabia' Césará' ba zoe' li' ni kwenḥe gono' yeḷ' josḥis, na' nin chiyaḷ' gak yeḷ' josḥis ḥa'na'. Nezkzilo' aga bi ben' che beṇ' wlall

ḥa'ki. <sup>11</sup> Shi ba ben' dii chon ka chidoḷaa guet', wakkza guet'. Per shi bibi ben' che beṇ'ki chao xya ḥa', kono gak gon nad' lo na'gake'. Na' chṇab' wdio' nad' lao beṇ' wṇabia' Césará' kwenḥe kwine' gone' yeḷ' josḥis ḥa'na'.

<sup>12</sup> Na'ch Féstona', ka wde be'lene' dill' beṇ'ka' chaklen le' chone' yeḷ' josḥisa', na'ch chi'e Páblona':

—Ba wṇabo' tio' lao beṇ' wṇabia' Césará' kwenḥe gone' yeḷ' josḥis ḥo'na', na' wseḷaa li' lawe'na'.

#### Páblona' bi'e dill' lao beṇ' wṇabia' Agrípana'

<sup>13</sup> Na' gok ḥop shoṇ lla na'ch bllin beṇ' wṇabia' Agrípana' len Berenícena' yell Cesareana' jawapgake' Féstona' chiox. <sup>14</sup> Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to beṇ' bi ben Félixá' yeḷ' josḥis che'na'.

<sup>15</sup> Ka wya' Jerusalénna', beṇ' wṇabia' che bḥozka' na' beṇ' golka' chṇabia' beṇ' Israelka' wdaogake' xya che' lawa'na', goklall'gake' wḥogbi'a guete'. <sup>16</sup> Na' gosh'gakee ka choncho cho' beṇ' Roma, aga lii wḥogbia'tezcho guet to beṇ' shi bi sie' wzoa rson che' lao beṇ'ka' chao xya che'. <sup>17</sup> Daan, ka bid beṇ'ka' bidtao xya che', bi bshe'ida'n, san betiyo lii bentia' wṇeyi jxi'gake'ne' kwenḥe gon' yeḷ' josḥis che'na'. <sup>18</sup> Na' beṇ'ka' bidtao xya che', ni tlish' diika' wza'lallaa bene' bi wnagake'. <sup>19</sup> Daa zeelo nagake' che', nlla'lə ḥajji'e che Chioza' na' chde' cho'e dill' che to beṇ' wle Jesús, beena' ba wit, na' le' ne' mbankze'. <sup>20</sup> Na' daa bi nezid' nak gon' yeḷ' josḥis che beṇ'ki, wṇabid' le' shi cheenile' yiza'lene' nad' Jerusalénna' kwenḥe gak yeḷ' josḥis che'na' na'. <sup>21</sup> Per Páblona' wṇabe' tie' lao César Augústona' kwenḥe gone' yeḷ' josḥis che'na', na' ben' mandad sheje' axt kat'ch gak wseḷaane' Rómána'.

<sup>22</sup> Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wḥete wzenago'n, shka'.

<sup>23</sup> Na' betiyo bllin Agrípana' lega beṇ' zakii, len Berenícena' na' len baḷ beṇ'ka' chṇabia'gake' soldadka', na' beṇ'ka' mbejlawin yella'. Na'ch Féstona' bselee beṇ' jxi'gake' Páblona'. <sup>24</sup> Na' wṇe Féstona', chi'e:

—Li' beṇ' wṇabia' Agrípana', na' yog'le le' lle'le ni, ka nak beeni ze ni, yog' beṇ' Israelka', ka beṇ' lle' Jerusalénna' na' ka beṇ' lle' Cesareani, chaogake' xya che', na' chongake' byen ḥogbi'a guete'. <sup>25</sup> Na' nad' chakbe'id' aga bi dii mal ba ben beeni kwenḥe ḥogbi'a guete'. Na' kwine' ba wṇabe' tie' lao César Augústona' kwenḥe gone' yeḷ' josḥis che'na', na' ba bḥeb' wdiane' na'lə.

<sup>26</sup> Per bi chillelid' bin ben Pábloni kwenḥe wzej' Césará' yepée bin bene'. Daan ba nzia'ne' laoleni na' lawo'niyeṇ'kzə li', beṇ' wṇabia' Agrípana', kwenḥe inṇabyolichone' bin bene', na' ka' wllia' lee yisha'. <sup>27</sup> La' ḥakid' bi nakan wen wseḷaa to beṇ' lawe'na' kwenḥe wḥogloe' che' na' bi nzej' bin bene'.

## Páblona' bzo'e rson çe' lao Agrípana'

26 Na' Agrípana' golle' Páblona':  
—Bzoashki rson ço'na' ñaa.

Na'ch Páblona' blis neena' na' wzoloe' bi'e dillaa, chi'e:

<sup>2</sup>—Li' beñ' wñabia' Agrípa, mbalaz wal chakid' daa gak wzoa rson cha'ni lawo'ni çe' yog' diika' chao beñ' Israelka' xya cha'. <sup>3</sup>La' ñezkzilo' ka yoolo neto' beñ' Israel chonnto', na' lekzka' çe' dił chix chento'ka'. Daan chñab' gapgacho' yel' chxenlall' na' wzenaggacho' ka nak dga inia' li' ñaa.

<sup>4</sup>Yog'loł beñ' Israelka' ñezgakile' ka bsa' cha' lad-je'ka', ka yell cha'na' gana' bgol' na' ka Jerusaléna'.

<sup>5</sup>Na' lekzka' ñezgakile' toshiizi nak' toz fariseoka', beñ'ka' chzenagchgake' çe' ley çe' dii Moiséza' aga ka nochlæ beñ' yoblæ. Na' wak yizi' cho'agake'n shi gueengakile'. <sup>6</sup>Na' ñaa chaogake' xya cha' daa non' lez wllin lla gon Chioza' ka bçhebe' lao dii xoxto'nto'ka'. <sup>7</sup>Na' neto' naknto' shliñ kwente dia çe' dii Israela', nonnto' lez gon Chioza' daa bçhebe' gak, na' daan choe'la'onto' Chioza' ka tella ka wał. Na' daa non' lez gak daa bçheb Chioza', daan chao beñ' Israelki xya cha', li' beñ' wñabia'. <sup>8</sup>¿Berache bi chajle'le wak yisban Chioza' beñ' wetka'?

## Páblona' bi'e dill' ka bsak'zi'e beñ'ka' nonlilall' Jesúza'

<sup>9</sup>Lekzka' nad' gokid' chiyał' wsak'zi'a beñ'ka' nonlilall' Jesús, beñ' Nazareta'. <sup>10</sup>Na' ka' beñ' Jerusaléna'. Na' bçozka' chñabia' beñgake' lsens wlo'a lillyana' beñ'ka' nonlilall' Jesúza', na' ka betgake' legake' lekzka' len' chakid' kan' chiyał' gak. <sup>11</sup>Zan shii wya' gana' chdop chllagnto' choe'łwillnto' Chioza' na' biya dii benid' legake' kwençe inegake' zban çe' Jesucristona'. Na' le bllaachga' legake', axt yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall'do'ena'  
(Hch. 9:1-19; 22:6-16)

<sup>12</sup>Na' lekzka' nan ljenid' beñ'ka' nonlilall' Jesúza' yell Damáscona', na' bçozka' chñabia' bsel'gake' nad' na' beñgake' lsens lljasak'zi'gakee. <sup>13</sup>Na' ki gok cha', li' beñ' wñabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbilla', na' wyeçhjan nad' len beñ'ka' zyaalen'. <sup>14</sup>Yog'tento' wzoatishnto' lo yona', na'ch nad' benid' shii to beñ' wñie' nad' dill' hebreo, ne': "Saulo, Saulo, ¿berache chçhi' chsak'zo' nad'? Daa chono' ka', zi' çe' kwinzon' chono' na' chak ço' ka chak çe' goona' chilibb xisa' daa chbibe'b kwençe sa'b." <sup>15</sup>Na'ch wnia', chepee: "¿Nora li', beñ'?" Na' wne': "Nadaan Jesúza', beena' chçhi' chsakoo. <sup>16</sup>Na' ñaa biyas. Ba bli'law' li' kwençe gono' ka cheenid' na' kwençe wi'o dill' çe' dga chen chle'ilo' ñaa na' cheyi diika' zi' wliid' li'. <sup>17</sup>Na' wselaa li' gana' lle' beñ'ka' bi nak beñ' Israel, na' gaklen' li' kwençe ni legake' na' ni beñ' Israelka' bi witgake' li'. <sup>18</sup>Na' wselaa li' kwençe lljali' lljasedilo' legake' kwençe sho' beeni' cha'na' loo yichjlall'do'eka' na' bich

tagake' lo yel çoła'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' beñ'ka' nak lall' nee."

<sup>19</sup>'Kan' gok cha', li' beñ' wñabia' Agrípa, na'chan bzenag' daa wna Jesúza' ka bli'lawe' nad'. <sup>20</sup>Na' zigaate beñ' Damáscoka' bli' bsedid' cho'a xtill' Jesucristona', na'tech beñ' Jerusalénka', na' beñ' lle' doxen yell-lío Judeana', na' lekzka' beñ'ka' bi nak beñ' Israel. Gosh'gake' chiyał' yiyaj yileni çe' xtoleeka' na' wzenag-gake' çe' Chioza', na' gongake' ka gakbe'i beñ' nan ba biyaj bilengakile'. <sup>21</sup>Na' ni cheyi diikin, bex' beñ' wllal cha'ka' nad' yoodo'na' na' nan witgake' nad'. <sup>22</sup>Per Chioza' chaklene' nad' kwençe choe'ch' xtillena' lao beñ' axt ñaanlla, ka lao beñ' zakii na' ka lao beñ' bi zakii. Na' kon ka wnakz dii Moiséza' gak na' ka wnakz dii beñ'ka' wdixjee daa goll Chioza' legake' kani'yi, kon kakzan nia', aga bichlæ dii yoblan nia'. <sup>23</sup>La' legake' wñagake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' beñ' necha' yibane' ladj beñ' wetka', na' chixje'ile' beñ' Israelka' na' beñ'ka' bi nak beñ' Israel nakan chiyał' gongake' kwençe sho' beeni' çe'na' loo yichjlall'do'eka'.

## Páblona' goklallee gonlilall' Agrípana' Jesúza'

<sup>24</sup>Na' shlak Páblona' chzoa rson çe'na', besyaa Féstona', chi'ene':

—jChaktonto'n, Pablo! Daa zi'telæ chsedo' ba chontontin li'.

<sup>25</sup>Na' Páblona' chi'ene':

—Aga chaktonta'n, beñ'do', san dill' jin cho'a, na' nakan dii shajle'cho. <sup>26</sup>Na' beñ' wñabia' Agrípani ñezile' çe' yog' diiki nia' le', daan chiyaxjid' cho'a dill' lawe'ni. Aga inacho bi ñezile' diika' gok, la' ga lle' lla' beñaan gokan. <sup>27</sup>Na' li', beñ' wñabia' Agrípa, ¿achajli'o cho'a xtill' Chioza' daa bzej dii beñ'ka' wdixjee daa golle' legake' kani'yi? Nad' ñezid' chajli'o.

<sup>28</sup>Na'ch Agrípana' chi'e Páblona':

—¿Achakilo' xtitz wshaljleno' nad' cho'a xtill' Jesúza' na' gonlilallaane'?

<sup>29</sup>Na'ch Páblona' chi'ene':

—La' xtitzæ wa la' ssha wshaljlen' li', Chioza' wi'e latj aga tozo' li' shajli'o san yog' beñ'ki lle' ni chengakile' dillii cho'a shajle'gake' ka ba wyajli'a nad', per aga nia' wçhejgake' legake' gden ka nçhejgake' nad'.

<sup>30</sup>Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' beñ'ka' wche'lengake'. <sup>31</sup>Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwençe chogbi'a guete' ni bi chiyał' gatee lillyana'.

<sup>32</sup>Na'ch Agrípana' golle' Féstona':

—Wak yislacho beeni sheł'ka' ki ba wñabe' tie' lao beñ' wñabia' César'a kwençe gone' yel' joschis çe'na'.

## Bsel'gake' Páblona' yell Rómana'

27 Na'ch ka b̄choglall'gake' wsel'gake' neto' Itáliana' loo barkwla, bengake' Páblona' kon sto chop pres yoblə lo na' beena' le Julio, nake' xan to guiyoa soldadka' beŋ'ka' nzi' soldad che beena' ch̄nabia' Rómana'. 2 Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to beŋ' le Aristarco neto'. Nake' beŋ' Tesalónica, daa lliá gana' mbani Macedóniana'. 3 Na' betiyo bllinnto' yell Sidónna', na' Júlióna' le wen benile' Páblona' na' bi'e latj jawie' beŋ'ka' nombi'e yella' kwenche be'gake'ne' bi dii byalljile'. 4 Na' ka biza'nto' Sidónna' na' wdeteznto' yichjla yell-lío Chíprena' daa lliá lo nisdona' kwenche bkweejan neto' daa le ze be'na'. 5 Na' wdetento' lo nisdona' daa de tcho'a yell-lío gana' mbani Cilíciana' na' Panfílina', na' bllinnto' cho'a yell Mírana', daa lliá gana' mbani Líciana'.

6 Na' yell Mírana' xan soldadka' bllelile' to barkw dii za' Alejandríana' na' zejan Itáliana', na' bidie' neto' lo'inna'. 7 Na' zan lliá wyajlennto' barkwa' sho'lall'zə, na' kaŋi bllinnto' cho'a yell Gnídona'. Na' daa ze be'na' klelə, na' wyeçhnto' yell-lío Crétana' daa lliá lo nisdona', wdeteznto' cho'a yell Salmónna'. 8 Na' kaŋi gok zejnto' tcho'a nisdona' axt ni bllintento' gana' le Buenos Puertos, gaozə yell Laseana'.

9 Zan llate ba wllainto' na' ba chonan dii nxoll shajchnto' lo nisdona' daa ba zoa yilen dii zaga'. Na' goll Páblona' legake':

10 —Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

11 Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. 12 Na' daa bi nak latja' wen yigaannto' na'z shlak chi' dii zaga', zangake' b̄choglall'gake' shajchnto' kwenche illinnto' yell Fenícena' gana' yigaannto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

## Wze to be' wal lo nisdona'

13 Na'ch wzolo ze to be'les dii za' lli'lə, na' beŋ'ka' chsa' barkwa' gokgakile' wakkzə shajgake'. Na'ch wde-gake' tcho'azi yell-lío che Crétana' daa lliá lo nisdona'.

14 Ka gok shlol, wzolo to be' wal dii za' cha'lə. 15 Na'ch wzolon chlligaan barkwa' na' bikzə bi gok gonnto', na' bsanlall'choklento'n nllig' be'na' len. 16 Na' ka wdento' gaozə to yell-liodo' le Claudia daa lliá lo nisdona', na' bich zetek be'na'. Na'ch barkwdo'na' ngoyo barkw xenna' biłepnto'n loo barkw xenna', per kaŋi gokan. 17 Na' ka biyoll biłepnto'n, na'ch b̄chejgake' barkw xenna' rietka' kwenche goklenan daa. Na' daa bllebgake' lljshia barkwa' lo yoxa' latja' le Sirte, na' bitobgake' lech'ka' daa chonan ka chza' barkwa' na' be'gake' latj bllig' be'na' barkwa' kwenche shajan kon ga wlliga'n len.

18 Na' betiyo, daa zizikli wzech be'na', na' wzologake'

bsheshgake' yoa'na' nsa' barkwa' na' bza'lgake'n loo nisdona' kwenche bichtek gok barkwa' zii. 19 Na' ka gok shon lliá, axt len xshinlaz barkwa' bza'nto' loo nisdona'. 20 Na' zan lliá bi bli'lao wbillā ni beljka', na' daa zechga be'na', bich bennto' lez yilanto'.

21 Na' ka ba gok zan lliá biŋ' gaonto', na'ch Páblona' wzie' ladj beŋ'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi b̄nitcho ni bi zoacho dii nxoll, shel'ka'. 22 Na' ŋaa bikzə gonchoplall'zle, la' ni tole bi guet. Toz barkwi kwiayi'. 23 La' daa nllē'yi Chios cha'na' beena' chonlilallaa bselee to anjl bli'lawe' nad'. 24 Na' anjla' wne' nad': "Bi illebo' Pablo. Chonan byen illino' lao beŋ' w̄nabia' Césara', na' ni cho' li' yiyesh'lallii Chioza' yog' beŋ'ka' zejlēno' txen loo barkwi na' bi guetgake'." 25 Na' ŋaa, li wtiplall'le, la' n̄xenilallaa Chioza' na' ŋezyenid' kon ka wna anjla' nad' kayen'nan gak. 26 Per chonan byen wwiacho naklə goncho kwenche yichoonan cho' to lo yell-liodo' dii lliá lo nisdona'.

27 Na' ba gok shda' wbill ka bllinnto' gana' de Nisdo' Adriáticonā, na' ni chllig' be'na' barkwa' to ki to ka'lə lo nisdona'. Na' ka bllin chel, beŋ'ka' chsa' barkwa' gokbe'gakile' ba chllinnto' gana' de yo billa'. 28 Na'ch b̄letjgake' to ya kwenche bchixgake' ka'k' zitj nisa', na' ka bchixgake'n zitjan shin'toyichoa metr. Na'ch ka wza'n zilāt' na'ch bizchixgake'n dii yoblə na' zitjan galli-choa metr. 29 Na' daa bllebgake' lljsho' barkwa' lee yajka', b̄letjgake' tap ya xen dii lliá xoziiin kwenche kwe' barkwa' tozga, shel' wxegakile' lli sheeni'te. 30 Na' beŋ'ka' chsa' barkwa' gokgakile' yixonjgake'. Na'ch wzologake' ch̄letjgake' barkwdo'na' daa yoo loo barkw xenna', chontezgake' ka ch̄letj sto ya xen che barkwa'.

31 Na'ch Páblona' golle' xan soldadka' na' soldad che'ka':

—Shi beŋ'ki bich yigaangake' loo barkwi, aga wilalat'le shi ŋaa.

32 Na'ch soldadka' b̄choggake' rietka' daa nchej barkwdo'na' na' bxopan loo nisa'.

33 Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble. 34 Na' nia' chonan byen gaolat'le kwenche yiyakshao'lall'le, la' ni tole bi kwiayi'.

35 Na' ka biyoll wna Páblona' ka', na' bexee to yetxtil na' bi'e Chioza' ye' choxken lao beŋ'ka' lene' na' bxoxje'n na' wzoloe' chawe'. 36 Na' ka ble'gakile' chawe', na'ch yoguee bendiplall'gake' wdaogake'. 37 Yog'lo' neto' yoonto' loo barkwa' naknto' chop guiyoa guiyonshin'to. 38 Na' ka beljgakile', na'ch bza'lgake' trígona' daa nsa' barkwa' loo nisa' kwenche bich goktek barkwa' zii.

## Wche' barkwa' yel

39 Na' ka wyeeni', beŋ'ka' chsa' barkwa' aga biyombia'gake' yell-liona', per ble'gakile' to ladj l̄chi ga choo xoz' nisa' gana' gokgakile' wak sho' barkw che'ka'. Na' b̄choglall'gake' lljlekwgake'n lo yoxa'. 40 Na' b̄choggake' riet che ya xenka' daa chzagaan barkwa'



na' wchoonlall'gake'n loo nisa'. Na'ch bisellgake' yaga' daa chaklenen chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabigaan cho'a nisa'. <sup>41</sup> Na' jshia xin' barkwa' to ga zoayaa yoxa' loo nisdona' na' gogaan, na' aga gokch yichejan. Na'ch bli che nisdona' wzolon bxoax btinan xan barkwa'. <sup>42</sup> Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. <sup>43</sup> Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaae be'ka' chak xoa yela' wxit'gake' loo nisa' kwenche yillingake' lo yo billa', <sup>44</sup> na' be'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka bennton', na' yog'lointo' bllinnto' shi'a shao' lo yo billa'.

### Páblona' wzoe' Máltana'

**28** Na' ka biyoll billin yog'nto' shi'a shao' lo yo billa', na' wnezinto' yell-liona' len Malta. <sup>2</sup> Na' be'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. <sup>3</sup> Na'ch Páblona' btope' xonj xis bill, na' ka bzaleen lo yi'na' bichej to be'ladjinna' na' wdi'nyaaab neena'. <sup>4</sup> Na' ka ble'i be' Máltaka' na' be'la' na' Páblona', na'ch che' ljwelle':

—Be' wen xyalja beeni. La'kzi bile' lo nisdona', Chioza' aga wi'e latj ibane'.

<sup>5</sup> Na'ch Páblona' wllib neena' kwenche bxop be'la' lo yi'na', na' aga bi gokile'. <sup>6</sup> Na' yoggake' chbezgake' sa' neena' yina', wa tokonganzi yilli'e na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

<sup>7</sup> Na' gaozə gana' bllinnto' de yell-lío che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. <sup>8</sup> Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoax neena' yichje'na' na' biyakile'. <sup>9</sup> Na' ka wnezi be' Máltaka' daa ben Páblona', na'ch wyaj yog' be'ka' bi shao' lawe'na' na' biyagkakile'. <sup>10</sup> Na' be'ka' le benshiigake' neto', na' ka biza'nto', dii zan dii bengake' neto', diika' iyalljinto'.

### Ka bllin Páblona' Rómána'

<sup>11</sup> Shon beo' wzoanto' Máltana'. Na' ka biza'nto' biyoo'nto' to loo barkw dii bchej Alejandrína' daa lekzka' bigaanan Máltana' shlak wde dii zaga'. Na' xin' barkwa' da' chop lwaa lsak' chios che be' griegoka', be'ka' le Cástor na' Pólux. <sup>12</sup> Na' ka bllinnto' yell Siracúsana', na' wzoanto' shonə lla. <sup>13</sup> Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. <sup>14</sup> Na' Puteólina' billagnto' ba' be'ka' nak neto' txen chonljall'nto' Jesúza', na' wñabigake' neto' yigaañlen-

nto' legake' to xman. Na' ka wde xmanna', na'ch biza'nto' zejnto' Rómána'. <sup>15</sup> Na' be' Rómaka' nonljall' Jesúza', ka wnezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaan Be'. Na' ka ble'i Páblona' legake', bi'e ye' choxken Chioza' na' biyondiplatee. <sup>16</sup> Na' ka bllinnto' Rómána', xan soldadka' bene' preska' lall' na' beena' chnabia' soldadka' zoa na', san Páblona', bi'e latj wzoe' chele', na' toz soldada' wdape'ne'.

### Páblona' bi'e xtill' Jesúza' Rómána'

<sup>17</sup> Na' ka gok shon lla zoa Páblona' na', na'ch goxe' be' Israelka' zakii, be'ka' lle' Rómána'. Na' ka bdopgake' na' golle' legake':

—Le' be' bish', shlak wzoa' Jerusalénna' be' wllal chechoka' lle' na' be'gake' nad' na' bengake' nad' lo na' be' Rómaki la'kzi aga bi ben' chegake' na' bin' chishj' diika' wna dii xozxto'choka' chiya' goncho.

<sup>18</sup> Na' biyoll wñabyollgakile' nad' bin be', be' wñabia'ka' goklall'gake' wsangake' nad', la' aga bi ben' kwenche wchogbia'gake' guet'. <sup>19</sup> Per be' wllal chechoka' lle' Jerusalénna' aga be'gake' latj yisangake' nad'. Na' benan byen wñab' tia' lao be' wñabia' Césara' kwenche gone' ye' joschis cha'na'. Per aga gaw' xya daa ben be' wllal chechoka' cha'. <sup>20</sup> Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' be' Israelan, nchejgake' nad' gdenki.

<sup>21</sup> Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to be' wllal chechoka' bin' ila' biz goninagake' cho'. <sup>22</sup> Na' cheeninto' wzenagnto' bi dillaan wi'o, la' nezinto' doxenz chnegake' zban che be'ka' nakgake' txen dii koba' chliile.

<sup>23</sup> Na'ch bzoagake' to lla kwenche idopgake'. Na' ka bllin lla'na' bliagake' bia', be' zan bdop gana' zoa Páblona'. Na' be'lene' legake' dill' do lla, bzajniile' legake' che ye' wñabia' che Chioza'. Na' bene' to dii byen kwenche shajle' be'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii be'ka' wdixjee daa goll Chioza' legake'.

<sup>24</sup> Na' ba'le' wyajle'gake' diika' goll Páblona' legake', na' zi ba'le' bi wyajle'. <sup>25</sup> Na' daa bi gok toz xtilleeka', na' wzolo chillshgake'. Ka gokbe'i Páblona' ba chillshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

<sup>26</sup> Wyaj na' jellsha be' Israelka':

La'kzi wzenagle bi shajni'kzile  
Na' la'kzi chle'teile bi gakbe'kzile bin zejin.

<sup>27</sup> Bikzə bi rson chazle, daa naklikzle lall'do' wal, na' chonle ka kwell lchol, ni bi cheenile wzenagle, ni bi cheenile ile'ile, na' ni bi cheenile shajniile kwenche yiyaj yilenile na' gon' ka yiyakshao' yichjlall'do'lena'.

<sup>28</sup> Chiya! inezile Chioza' ba ngwee xnezi yisle' beŋ'ka' bi nak beŋ' Israel kwenche bi kwiayi'gake', na' lelgake' wlebgake' cho'a xtilleena'.

<sup>29</sup> Ka biyoll goll Páblona' legake' ka', na'ch ziyajgake' chakdi-len ljwellgake'.

<sup>30</sup> Chop yizyen' bigaan Páblona' yona' gana' wdixje', na' blebe' nottezə beŋ' jawia le'. <sup>31</sup> Na' aga no bsej blon bzajni Páblona' beŋ'ka' nakan nak ye! wñabia' che Chioza' na' bli' bsdile' beŋ' cho'a xtill' Xancho Jesucristona'.

# Romanos

<sup>1</sup> Nad' Pablo, nak' wen llin che Cristo Jesús'a. Chioza' gox wṇabe' nad' gak' postl che', na' bene' lall' na' wi'a dill' wen dill' kob che'na' <sup>2</sup> cheyi daa bchebe' gone', na' dii beṇ'ka' wdixjee daa golle' legake' kani'yi bzejgake'n lee Cho'a Xtilleena'. <sup>3</sup> Na' cho'en dill' che Xiine' Jesucristona', beena' nak Xancho, daa goke' benech, na' goke' xiin dia che dii rey Davina'. Na' Espiritu Sántona' bli'e nan nake' Xiin Chioza', beena' nak beṇ' ye! wak choo ye! wak xen daa bibane' ladj beṇ' wetka'. <sup>5</sup> Na' daa nonlilall'nto' Jesucristona', Chioza' ba goklene' neto', na' nzo'e neto' naknto' postl che Jesucristona', na' bene' lall' na'nto' llijixje'nto' xtilleena' kwenche doxen yell-lioni soa beṇ' gonlilall'gake'ne' na' wzenaggake' che', na' sho'e balaan. <sup>6</sup> Na' lenle ba gox wṇab Chioza' kwenche gake lall' na' Jesucristona'.

<sup>7</sup> Chzej' yog'loj-le, le' lle'le yell Rómána', le' ba gox wṇab Chioza' nakle lall' nee na' chakile' le'. Xacho Chioza' na' Xancho Jesucristona' gaklenshgagake' le' na' wzoagake' le' mbalaz.

<sup>8</sup> Zigaate nia' le', ni cheyi daa ben Jesucristonan' chak wi'a Chioza' ye! choxken che yog'lojtele, la' doxen choe' beṇ' dill' ba nonlilall'le Jesucristona'. <sup>9</sup> Chios, beena' chon' xshine'na' do yichj do lallaa daa chyixji'a dill' wen dill' kob che Xiine'na', nez nle'ile' tljizi chṇabidee gaklene' le' kat' choe'lwillee. <sup>10</sup> Na' toshiizi chṇabidee wi'e latj yidwia' le', na' shi cheenile' yid', lekze' kwee xnezin. <sup>11</sup> Le chzelallaa yidwia' le' na' we'len' le' dill' daa gaklanan le' soachechchle gonlilall'chle Jesucristona'. <sup>12</sup> La' cheenid' wtipch lall' ljjwellcho daa nonlilall'chone'.

<sup>13</sup> Le' beṇ' bish' na' le' beṇ' zan', cheenid' inezile zan shii ba goklallaa yidwia' le' per axt ṇaa bikzan' gakan. Cheenid' yidwia' le' kwenche gakchachle gonlilall'le Jesucristona' na' soach beṇ' gonlilall'gake'ne' ladjlena', ka ba gok che beṇ'ka' bi nak beṇ' Israel yellka' gana' ba wyaa. <sup>14</sup> Neزيد' chonan byen we'len' yog' beṇ' xtill' Crístona', ka beṇ' griego na' ka beṇ' bi nak beṇ' griego, ka beṇ' sin' na' ka beṇ' bi nteyi. <sup>15</sup> Daan, cheenid' lekzka' chixje'id' le' dill' wen dill' kob che'na', le' zoale Rómána'.

<sup>16</sup> Bi chiyii chido'id' wi'a dill' wen dill' kob che Jesucristona', la' nsa'n ye! wak che Chioza' kwenche yislan nottez beṇ' gonlilalleene', zigaate beṇ' Israelka', na' lekzka' beṇ'ka' bi nak beṇ' Israel. <sup>17</sup> Na' dill' wen dill' kob che'na' chliin cho' nakan goncho yiyakcho beṇ' li beṇ' shao' lao Chioza'. Na' chzajniin cho' chiya! gonlilall'chone' na' bich bi de sto dii gaklanan cho'. Kon ka na Cho'a Xtilleena': "Beena' nak beṇ' li beṇ' shao' daa nonlilallee nad', beenan' ibane'."

<sup>18</sup> Ye! zak'zi che Chioza' za'n yabana' ni che beṇ'ka' bi chzenag che' na' chongake' chiya dii mal, diika' chsej chllongakan gombia'gake' daa nak dii li. <sup>19</sup> Daa cheeni Chioza' inezgakile' che', ba nezkzgakile'n, la' Chioza'kzan ba bliile'n legake'. <sup>20</sup> La'kzi bi chle'icho Chioza', chle'icho diika' bene' na' chakbe'icho ka nake'. Daa bxe bsile' yell-lioni nakbia'cha nake' Chios na' ye! wak che'na' biga te cheyin. Na' bibi de dii wda'i beṇ' inagake' bi nezkzakile' shi zoe'. <sup>21</sup> La' la'kzi nezkzakile' zoa Chioza', bi choe'la'ogake'ne' ni bi choe'gake'ne' ye! choxken. San yoolə yichjgake' diika' bi zakii na' ncho! nnti yichjlall'do'eka' daa bi ntegakile'. <sup>22</sup> La'kzi nazgake' nakgake' beṇ' sin', daa chongake' chli'n nakgake' beṇ' bi nteyi. <sup>23</sup> Lwaa dii nan koogake' Chioza' balaan, beena' biga te cheyin, lwaa Isak' benecha'lə, beṇ'ka' chde cheyin, wloogake' balaan, na' axt no lwaa Isak' ba ze xan yabana', na' lwaa Isak' ba zoa tap ṇi'a na'yin, na' lwaa Isak' ba chxob le'in.

<sup>24</sup> Na' daa chongake' ka', Chioza' ba wchoonlallee legake' kwenche gonchgage' dii zbanka' cheeni beli chen che'ka', na' benlen ljjwellgake' diika' nak zban. <sup>25</sup> Lwaa dii nan shajle'gake' daa nak dii li che Chioza', wya-zlall'chgage' daa nak de wxiye'. Be'la'ogake' diika' bxe bsil Chioza' na' wloogake'n balaan lwaa dii nan koogake' le' balaan daa bxe bsile' legakan na' chidolee we'la'ochone' toshiizi. Kan' nakan.

<sup>26</sup> Daan, Chioza' ba wchoonlallee legake' kwenche gonchgage' dii zbanka' cheeni beli chen che'ka', na' axt noolka' chiyat'len ljjwell noolgake' na' chongake' daa bi noe' Chioza' latj gongake'. <sup>27</sup> Na' ka'kzə beṇ' byoka', lwaa dii nan soalengake' noolə, chibalgakile' chiyat'len ljjwell beṇ' byogake', na' chonlen ljjwellgake' daa nak dii zban. Na' chzak'zi'len beli chen che'ka' ye! zak'zi'na' daa chido!gake' daa chongake' dii malka'.

<sup>28</sup> Na' daa bi goklall'gake' wzenaggake' che Chioza', wlej yichje' legake' kwenche gontegagake' dii mala' kon ka nan loo yichjlall'do'eka' daa nxinj. <sup>29</sup> Shgal' dii bi yejni'alallii chongake', choe'gake' cho'a xbayi beli chen che'ka', chzelall'gake' gat' kwe'gakile', chibagakile' gongake' dii malka'. Nakgake' beṇ' xe' beṇ' xga', beṇ' wen xya, beṇ' wishagdila, beṇ' wxiye', beṇ' chibayi gonmal che beṇ', beṇ' wchitj dill', <sup>30</sup> beṇ' chiyilj chzan xtill' beṇ', beṇ' chakzbani Chioza', beṇ' bibi nalli, beṇ' cha'sibə na' beṇ' chshalj chshon. Chiyiljall'gake' bi dii mal gongake', bi chzenaggake' che xaxṇa'gake', <sup>31</sup> bi ntegakile', bi chongake' daa chchebgake', bi chakgake' beṇ', ni bi chiyesh'gakile' beṇ'. <sup>32</sup> La'kzi nezkzakile' ba bchoglo Chioza' chiya! guet beṇ'ka' chon ka',

zizikchli chongake'n, na' axt chiba chizak'gakile' kat' chon beṅ' yoblan.

2 Na' li' ṅaa, nottezə nako', kat' chḡoglo' che beṅ' nape' dol' lao Chioza', lekzka' che kwinon' chṅio', la' lenkzo' chono' diika' chongake', na' bibi de wda'ilo'n iṅo' bibi xtoḡoo de. 2 Na' ṅezicho Chioza' chone' kon ka chiyaḷ' gone' kat' chḡogloe' sak'zi' beṅ'ka' chon dii malka' nak ka'. 3 Na' li' no' che beṅ'ka' chon dii malka' napgake' dol', bi gakzilo' wilo' lo yel' zak'zi' che Chioza', la' ka'kzan chono'. 4 Ḳachakzilo' bi wsak'zi' Chioza' li' ni che daa chono'? ḲAbi chakbe'ilo' ni che yel' beṅ' wen che'nan' chiyesh'lallile' cho' na' chape' yel' chxenlall' checho, daa cheenile' yiyaj yilenicho che dii malka' choncho? 5 Per daa nako' yichjlall'do' chech na' bi cheenilo' yiyaj yilenilo', kwintezo' chkwa' chti'azo' yel' zak'zi'ka' illaglo' kat' illin lla wḡoglo Chioza' che beṅ' kon ka chiyaḷ' gone'. 6 La' Chioza' gone' ka gax che to to beṅ' kon ka chidoḷee. 7 Beṅ'ka' zoatezi zoagake' chongake' daa nak wen kwenche sho'gake' balaṅ, wi'e yel' mban chegake' zejli kaṅi na' biga lliia ile'gakile' yel' wita'. 8 Na' beṅ' yaalall'ka', beṅ'ka' chzoagake' ka'lə daa nak dii li' na' nogake' diika' bi yejni'alallii, wsak'zi'e legake' daa le chlllee legake'. 9 Yel' zak'zi' wal yen ile'i yog' beṅ'ka' chon dii mala', zigaate beṅ' Israelka' na'tech beṅ'ka' bi nak beṅ' Israel. 10 Per beṅ'ka' chon dii wenna', sho'gake' balaṅ na' soagake' mbalaz, zigaate beṅ' Israelka' na'tech beṅ'ka' bi nak beṅ' Israel.

11 La' Chioza', tlap chone' yel' josḡhis, aga nakzi beṅ' chakile'. 12 Yog' beṅ'ka' bi nombia' ley daa bzej dii Moiséza' kwiayi'gake' shi bengake' dii mala', la'kzi bi ṅezgakile' daa nan. Na' yog' beṅ'ka' ben dii mala' na' ṅeztegakile' daa na leya', ḡoglo chegake' kon ka na leya' gax chegake'. 13 La' kono yiyak beṅ' li' beṅ' shao' lao Chioza' daa nombia'ze' leya', san beena' chon kon ka nan, len' yiyake' beṅ' li' beṅ' shao' lawe'na'. 14 Ka nak beṅ'ka' bi nak beṅ' Israel na' bi ṅezgakile' bin na ley che dii Moiséza', shi tobialozgake' chongake' ka na leya', nakbia' yoo to ley loo yichjlall'do'eka'. 15 Na' daa chongake' ka', chli'n yoo loo yichjlall'do'eka' daa cheeni leya' gongake'. Na'ch yichjlall'do'eka'kzə chonan ka chakbe'gakile' shi dii wen wa shi dii malan bengake'.

16 Kan' gax llana' gon Chioza' lo na' Jesucristona' wḡogloe' che diika' yoo loo yichjlall'do' beṅ' yell-lioni, kon ka na dill' wen dill' kob che'na' daa cho'a dill'.

17 Na' li' nako' beṅ' Israel, chakilo' nako' beṅ' wen lao Chioza' daa ṅezilo' daa na ley che dii Moiséza' na' chep cha'lalloo daa nombi'o Chioza'. 18 Chakilo' ṅezilo' daa cheeni Chioza' gono' daa chli' chsedi leya' li' gono' daa nakch wen. 19 Chakilo' wak koo beṅ' lo nez li' che Chioza' na' gaktio' ka beeni' lao beṅ'ka' chda lo yel' ḡoḷa'. 20 Na' chakilo' wak wzajniilo' beṅ' bi nteyi na' wakte wli' wsedilo' beṅ'ka' bin' shajni'yenii daa nombi'o leya' daa nsa' do ka nak yel' chajni na' daa nak dii li'. 21 Na' shi li' chli' chsedilo' beṅ' yoblə, Ḳberaḡhe bi chli' chsedi kwino'? Na' shi chsedilo' beṅ' bi kwane', Ḳberaḡhe li'lə chbanzo'? 22 Na' li' chsedilo' beṅ' bi chiyaḷ' soalene' nool bi nak nool che', wa beṅ' byo beṅ' bi nak beṅ' che', Ḳberaḡhe li'lə chonzo' ka'? Na' li' chwiilo' lwa

Isak' diika' choe'la'o beṅ', Ḳberaḡhe chzi' chbanzo' bi de loo lill xlatjinka'? 23 Chshalj chshono' daa nombi'o leya', per chṅit chdio' Chioza' daa bi chono' ka nan. 24 Dii liyen'nan na Cho'a Xtill' Chioza': "Beṅ'ka' bi nak beṅ' Israel chṅegake' zban che Chioza' ni chele daa chonle mal."

25 Dii li' seṅ daa le circuncisión daa yoo kwerp ḡo'na' zak'kzin shi chzenago' daa na leya', per shi bi chzenago'n bibi zjanayi daa yoo seṅna'. 26 Na' shi beena' bi yoo seṅna' chone' ka na leya', lao Chioza' nake' ka beṅ' yoo seṅ. 27 Na' beena' chon ka na leya' la'kzi bi yo'e seṅna', yili'e lawo' napo' dol' daa bi chono' ka na leya' la'kzi nombi'on na' yootio' seṅna'. 28 Bi gaxzilo' nako' dowalj beṅ' Israel daa chono' yog' diika' yoolocho choncho cho' beṅ' Israel, ni daa yoo kwerp ḡo'na' seṅna'. 29 San dowalj beṅ' Israel nak beena' non'ilall' Chioza' do yichj do lallee, na' daa ba bikob Espiritu che'na' yichjlall'do'ena' nakan ka seṅna' daa chli'n nake' lall' na' Chioza'. Na' che beenin we' Chioza' xtillee chone' wen, aga beṅ' yell-lionin.

3 Na' Ḳbera yel' goklen che beṅ' Israelka' de? Na' Ḳbera banez si'gake' daa yoogake' seṅ daa le circuncisión? 2 Dii xen wal banez chegake' de. La' zigaate, legaken' be' Chioza' Cho'a Xtilleena'. 3 ḲAnti chakile ni cheyi daa bi chajle' baḷ beṅ' Israelka' che', ba wlej yichje' legake'? 4 ḲBi nakan ka! Chioza' toshiizi chone' ka ba bḡhebe' gone' la'kzi yog' beṅ' yell-lioki nakgake' beṅ' wxiye'. Cho'a Xtilleena' nan:

Daa ṅhogbi'o gax che beṅ' saaxyana' nakbia'chan zegan shli, na' gaxbe'gakile' chono' yel' josḡhis kon ka chiyaḷ' gakan.

5 Na' shi dii mala' choncho chli'n Chioza' nake' beṅ' li' beṅ' shao', Ḳbera iṅacho, lla? ḲAṅacho Chioza' bi nake' beṅ' wen daa chsak'zi'e beṅ'ka' chon mal? (Nia' ka' daa chaki beṅ' yell-lioki ka'.) 6 Per Ḳbi nakan ka! La', sheḷ'ka' Chioza' bi nake' beṅ' li' beṅ' shao', aga wak gone' yel' josḡhis che beṅ' yell-lioni.

7 Na' zoa beṅ' nagake', shi yel' wxiye' chechona' chli'n yel' li' che Chioza' na' chisgolan balaṅ che'na', Ḳbiḡhe naze' nakcho beṅ' saaxya, shka'? 8 Na' daa chakgakile' ka', wnaljagake': "Goncho dii mala' kwenche sho'che' balaṅ." Zoa beṅ' nagake' kan' chli' chsedinto', per bi nakan ka'. Na' beṅ'ka' naz ka' chidoḷ'gake' yel' zak'zi' che Chioza'.

9 ḲNakra lla? ḲAnakchnto' neto' beṅ' Israel beṅ' wench aga ka beṅ' yoblə, lla? ḲBi nakan ka! La' ba wniakz' yog'cho, ka neto' beṅ' Israel na' ka'kzə beṅ'ka' bi nak beṅ' Israel, toz ka napcho dol' lao Chioza' daa ba bencho dii mala'. 10 La' Cho'a Xtill' Chioza' nan:

Kono beṅ' li' beṅ' shao' zoa, ni tlišee.

11 Ni to beṅ' bi chajniile' daa nak dii li, ni kono zoa beṅ' chiyilj Chioza'.

12 Yog'z beṅ' ba wlaagake' lo nez lina', na' yog'z gake' nxinj yichjlall'do'eka'.

Ni togagake' bi chon dii wen.

Ni tliš' beṅ' chon wen bi zoa.

<sup>13</sup> Ka zban chla' to loo ba che ben' wet dii nyalj, kan' nak dill' zbanka' chchej cho'a lolleeka'.

Kon cho'a lolleeka' chziye'gake'.

Na' ka yierb che be' nak dill'ka' choe'gake'.

<sup>14</sup> Lillinza chyishigake' bia' blag' che ben' na' choe'gake' dill' zi'bia'.

<sup>15</sup> Bi nallgakile' chittezgake' ben'.

<sup>16</sup> Gatteza zejgake' chliayi' chliidegake' na' ch-googake' yel' zi' yel' yesh'.

<sup>17</sup> Bi nombia'gake' bi daa ne' soalengake' ben' mbal-az.

<sup>18</sup> Bi chall chllebgake' gon Chioza' xya chegake'.

<sup>19</sup> Na' nezicho ben'ka' nagake' chongake' daa na ley che Chioza' chiyal' gongake' doxen ka nan. Na' daa kono gok gonan, ba bchoglo Chioza' che yog'lolcho, cho' ben' yell-lion, ka neto' ben' Israel na' ka ben' bi nak ben' Israel, napcho dol', na' ni to kono gak ina: "Bibi dol' nap'." <sup>20</sup> Daan, ni to ben' bi gak ine' nake' ben' li ben' shao' lao Chioza' daa chone' ka na leya'. La' leya' chonan ka chakbe'icho nakcho ben' saaxya.

<sup>21</sup> Na' naa Chioza' ba bliile' cho' nakan goncho kwenche yiyakcho ben' li ben' shao' lawe'na', na' aga daa goncho ka na leyan'. La' ka leya', na' ka diika' bzej dii ben'ka' wdixjee daa goll Chioza' legake', toz ka choe'gakan dill' cheyin. <sup>22</sup> Chioza' ne' yog'lol ben' gonlilallee Jesucristona' yiyake' ben' li ben' shao' lawe'na', notteza nake'. <sup>23</sup> La' yog'lolza ben' bxinj blengake' na' ni to kono nak dowalj ben' wen ka nak Chioza'. <sup>24</sup> Per daa nak Chioza' ben' wen, chiyone' ben' ben' li ben' shao' daa wdixj Cristo Jesúza' saaxya che'ka', na' bibi zak'gakile'n. <sup>25</sup> Chioza' bselee Crístona' blalj xchene'na' na' wite' ni che saaxyaka' bencho. Na' ni che xchene'na', notteza ben' gonlilalleene', Chioza' yizi'xene' saaxya che'na'. Na' ka' chli'e nan nake' ben' chon daa nak shli. La' daa nape' yel' chxenlall', bene' ka'z saaxyaka' ben' ben' kana' bin' wselee Crístona'.

<sup>26</sup> Na' naa, daa bselee Jesucristona' chli'e nake' ben' chon daa nak shli daa ne' notteza ben' gonlilallee Jesúza' nake' ben' li ben' shao' lawe'na'.

<sup>27</sup> Kono gak wshalj wshon ine' nake' ben' li ben' shao' lao Chioza' ni che ba bene' ka na leya'. La' aga no chon doxen ka nan, san Chioza' ne' notteza ben' gonlilallee Crístona' nake' ben' li ben' shao' lawe'na'. <sup>28</sup> Na' ba nezicho chiyakcho ben' li ben' shao' lao Chioza' daa chonlilall'cho Jesucristona' na' aga daa choncho daa na leyan'.

<sup>29</sup> Achakile Chioza' nake' Chios che to ben' Israel-ka'za? Bi nakan ka! Lekzka' nake' Chios che ben'ka' bi nak ben' Israel. <sup>30</sup> La' toz Chiozan' zoa, beena' chiyone' ben' li ben' shao' ben'ka' chonlilall' Crístona'. Na' toz ka chone' che notteza ben' chonlilalleene', ka ben' Israel, ben'ka' yoo sen daa le circuncisión, na' ka ben' bi nak ben' Israel. <sup>31</sup> Achakile daa chonlilall'cho Jesúza' chzoacho leya' ka'lə? Bi nakan ka! La' nezicho nakan to dii zakii.

<sup>4</sup> Bera ka inacho che dii xozxto'cho Abraham'a?

Nak gok biyake' ben' li ben' shao' lao Chioza'.  
<sup>2</sup> Shel'ka' biyak dii Abraham'a ben' li ben' shao' lao

Chioza' ni cheyi diika' bene', zaklja bshalj bshone' lao ben' yell-lioni, per aga lao Chioza'. <sup>3</sup> La' Cho'a Xtill' Chioza' nan: "Dii Abraham'a wyajli'e che Chioza', na' Chioza' wne' nake' ben' li ben' shao' lawe'na'." <sup>4</sup> Kat' to wen llin chkaa laxje', bi nakan to dii chzani ben' cho'ene', san nakan dii chiyal'kz wi'ene'. <sup>5</sup> Per shi to ben' shajli'e che Chios, beena' chiyon ben' saaxyana' ben' li ben' shao', Chioza' ile'ile'ne' ben' li ben' shao' daa gonlilalleene', la'kzi bibi bene' kwenche idolee yel' goklen che Chioza'. <sup>6</sup> Dii Davina' bi'e dill' che yel' mbal-az che beena' na Chioza' nake' ben' li ben' shao' la'kzi bibi bene' kwenche bdojile'n. <sup>7</sup> Ki wna dii Davina':

Chakomba beena' ba biyakxen xtoleena', na' ba biyol binit saaxya che'na'.

<sup>8</sup> Chakomba beena' bi yizi' Xancho Chioza'ne' kwent.

<sup>9</sup> Achakile to ben'ka' yoozgake' sen daa le circuncisión wak soagake' mbalaz? Bi nakan ka', san lekzka' ben'ka' bi yoo sen'na' wak soagake' mbalaz. La' ba wni-akz' Chioza' wne' dii Abraham'a goke' ben' li ben' shao' lawe'na' daa wyajli'e che'. <sup>10</sup> Na' batran wna Chioza' ka'? Aba wyoo dii Abraham'a sen'na' kana' wna Chioza' nake' ben' li ben' shao'? Awa bin' sho'en? Chioza' wne' ka' kana' bin' sho'en. <sup>11</sup> Na'techlə wloo kwine' sen daa le circuncisión na' sen'na' bli'n ba nake' ben' li ben' shao' lao Chioza' daa benlilalleene'. Daan, dii Abraham'a nake' xozxto' yog' ben' nak ben' li ben' shao' lao Chioza' daa nonlilall'gake'ne', la'kzi bi yoozgake' sen'na'. <sup>12</sup> Na' dii Abraham'a lekzka' nake' xozxto' neto' yoonto' sen daa le circuncisión. Per aga daa yoonto' sen'na'zan, san daa nonlilall'nto' Chioza', beena' ba nonlilall' dii Abraham'a kana' zi' sho'e sen'na'.

<sup>13</sup> Chioza' bchebe' gaki che dii Abraham'a len xiin dia che'ka' doxen yell-lioni. Na' bchebe' wi'en legake' aga daa bengake' doxen ka na ley che dii Moisézan', san daa benlilall' dii Abraham'a Chiozan', wna Chioza' nake' ben' li ben' shao' lawe'na'. <sup>14</sup> La' shel' to ben'ka' chonz ka na leyan' gaki chegake' daa bcheb Chioza' wi'e dii Abraham'a, bibi zjanayin gonlilall'cho Chioza' na' aga bi zakii daa bchebe' gone', shel'ka'. <sup>15</sup> Leya' nsa'n yel' zak'zi' che ben'ka' bi chon ka nan. Per shi bibi ley de, aga bi de dii in'an napgake' dol'.

<sup>16</sup> Ka nak daa bcheb Chioza' gone' che dii Abraham'a, nakan to goklen daa chone' che nottez ben' nonlilalleene' kwenche yog'za xiin dia che'ka' ikaagake' daa we' Chioza' legake'. Bi nakan che to ben'ka' chonz ka na leya', san lekzka' nakan che notteza ben' chonlilall' Chioza' ka benlilall' dii Abraham'a le'. La' dii Abraham'a nake' xozxto' yog'cho cho' nonlilall'chone'. <sup>17</sup> Ka na Cho'a Xtill' Chioza': "Ba nzoa' li' kwenche gako' xaxna' ben' zan inlleb." Na' Chioza', beena' benlilall' dii Abraham'a, nape' yel' wak yisbane' ben' wetka' na' wxe wsile' diika' bin' gak.

<sup>18</sup> Kana' bich non dii Abraham'a lez soa xiine', wyajli'e daa goll Chioza'ne' na' bene' lez gak ka golle'ne'. Ka' gok biyake' xozxto' ben' zan inlleb, kon ka goll Chioza'ne', chi'e: "Kan' shesh shan xiin dia cho'ka'."

<sup>19</sup> Biga gokchoplallee che Chioza', la'kzi chakbe'ile' ba nake' ben' golə par soa xiine', la' ba zoa gakile' to

guiyoa yizan. Na' ni bi gokçhoplallee la'kzi gok dii Sárana' nool will. <sup>20</sup> Bi gokçhoplallee, san zizikli benlilallee gak daa bçheb Chioza' gone' na' be'laweene'. <sup>21</sup> La' wñezile' kwasloj Chioza' nape' yel' wak kwençe gone' yog' diika' chçhebe'. <sup>22</sup> Daan ble'i Chioza'ne' beñ' li beñ' shao' daa wyajli'e çhe'.

<sup>23</sup> Na' daa nan "Chioza' ble'ile'ne' beñ' li beñ' shao'", aga çhe tozen' nan ka', <sup>24</sup> san lekzka' cho'en dill' çhecho cho' nonlilall'cho Chioza', beena' bisbane' Xancho Jesucristona' ladj beñ' wetka', la' lenchon chle'i Chioza' beñ' li beñ' shao' daa nonlilall'chone'. <sup>25</sup> Bzani Chioza' Xancho Jesucristona' wite' ni çhe saaxya çhechoka' na' bisbane'ne' ladj beñ' wetka' kwençe biyakcho beñ' li beñ' shao' lawe'na'.

**5** Chioza' ba biyone' cho' beñ' li beñ' shao' daa ba nonlilall'chone', na' ba bizoalenchone' wen daa wit Xancho Jesucristona' ni çhecho. <sup>2</sup> Na' daa ba nonlilall'cho Crístona', Chioza' toshiizi chonile' cho' wen na' chibaicho daa noncho lez lljazoalenchone'. <sup>3</sup> Na' aga to dgazan yibaicho, san lekzka' yibaicho yel' zak'zi'ka' chle'icho yell-lioni, daa ñezicho chongakan ka soaçheçcho gonlilall'chone'. <sup>4</sup> Na' shi zoaçheçcho chonlilall'chone' shlak chillaglocho yel' zak'zi'ka', na' chli'n nakchacho lao Chioza'. Na' shi nakchacho lao Chioza' na' noncho lez lljazoalenchone'. <sup>5</sup> Na' ka nak daa noncho lez, bi te bi la ki gakan, la' Chioza' ba bliile' cho' yel' chaki çhe'na' daa ba nzoe' Espíritu Santo çhe'na' loo yichjlall'do'choni.

<sup>6</sup> Kana' ni nakcho beñ' wen dii mal na' aga bi gok goncho kwençe bi kwiayi'cho, kana'yen' bid Crístona' wite' ni çhecho cho' nakcho beñ' saaxya. <sup>7</sup> Aga ga zoa to beñ' lii izanteyi kwine' guete' ni çhe to beñ' nak beñ' li beñ' shao'. Kayaadia shi yiyaxji to beñ' izani kwine' guete' lwaa to beñ' wen. <sup>8</sup> San Chioza' bli'e ka chakile' cho' daa bzani'e Crístona' wite' ni çhecho kana' ni nakcho beñ' saaxya. <sup>9</sup> Daa blalj xçhen Crístona' wite' ni çhecho, ba biyon Chioza' cho' beñ' li beñ' shao' lawe'na'. Na' daa wite' ni çhecho, zalechlin ki yisle' cho' lao yel' zak'zi'na' kat' illin lla wçhoglo Chioza' çhe yog'loj beñ'? <sup>10</sup> Shi kana' chakzbanicho Chioza', bselee Xiñe'na' wite' ni çhecho kwençe bizoalenchone' wen, zalechlin ñaa ba bisbane'ne' ladj beñ' wetka' ki yisle' cho' daa ba zoalenchone' wen? <sup>11</sup> Na' aga diika'z chibaicho, san lekzka' daa nombia'cho Chioza', la' ni çhe Xancho Jesucristonan' bizoalencho Chioza' wen.

<sup>12</sup> Ni çhe yel' widenag çhe toz beñaan golj wxe saaxya' yell-lioni, na' ni çhe saaxya' wyoo yel' wita'. Ka' gok wzolo chet yog' beñ', la' yog'zə beñ' chongake' dii mala'. <sup>13</sup> Kana' zi' we' Chioza' dii Moiséza' ley çhe'na', ba chonkzə beñ' yell-lioni dii mala'. Per shi bibi ley de, aga bi de dii gawan xya çhegake'. <sup>14</sup> La'kzi aga bi ley got' dii gawan xya çhegake', yel' wita' wñabia'n lao yog'loj beñ'ka' ben dii mala' wzololenzan dii Adánna' blinten kana' wban dii Moiséza', la'kzi bi wdishj-gake' cho'a xtill' Chioza' ka ben dii Adánna'. Ni çhe dii Adánna' wyoo yel' wita' yell-lioni, san Jesucristona', beena' wloo Chioza' xñezin wselee kani'teyi, bxie' yel' mban zejli kañi.

<sup>15</sup> Per ka nak dii mala' ben dii Adánna', bi gak wsaklebichon ka dii wenna' ben Chioza' çhecho, dii xen wal nlla'n. Daa bñinj bñen dii Adánna' yog'zə beñ' chet, san daa bsej' Chioza' Jesucristona' kwençe wite' ni çhecho, bene' to dii wen inleeb çhe yog' beñ' gonlilalleene'.

<sup>16</sup> Bi gak wsaklebicho daa ben dii Adánna' kon yel' goklen daa ben Chioza' çhecho. La' wchogbia' çhe yog'loj beñ' guetgake' ni çhe toz dii mala' daa ben dii Adánna'; san yel' goklen çhe Chioza' daa chone' çhecho chiyone' cho' beñ' li beñ' shao' lawe'na', la'kzi nakcho beñ' saaxya nleeb. <sup>17</sup> Shi yel' wita' wñabia'n daa bñinj bñen dii Adánna', zalechlin ki inabia' beñ'ka' ba biyon Chioza' beñ' li beñ' shao' daa nake' beñ' wen inleeb, ni çhe Jesucristona', beena' be' to yel' mban kob çhegake'?

<sup>18</sup> Dii mala' ben dii Adánna' benan ka bçhoglo Chioza' çhe yog' beñ' guetgake', na' ka'kzə dii wenna' daa ben Jesucristona' benan ka yog' beñ'ka' gonlilall'gake'ne' yiyakgake' beñ' li beñ' shao' na' gat' yel' mban çhegake' daa bi te çheyin. <sup>19</sup> Daa gok dii Adánna' widenag, wchoglo çhe yog' beñ' nakgake' beñ' saaxya, per daa gok Crístona' beñ' wizoa dill', beñ' zan yiyak beñ' li beñ' shao'.

<sup>20</sup> Chioza' bi'e ley çhe'na' kwençe wyanch xtoj beñ' yell-lioni daa bi bzenaggake' çheyin. Per la'kzi wyanch xtoleeka', Chioza' bli'che' yel' chiyesh'lallii çhe'na'. <sup>21</sup> Na' daa chet yog' beñ', chli'n saaxya' napan yel' wak wsi wçhogan cho'. Per lekzka' yel' chiyesh'lallii çhe Chioza' chli'n napan yel' wak yiyonan cho' beñ' li beñ' shao' na' gonan yel' mban çhecho zejli kañi ni çhe Jesucristona', beena' nak Xancho.

**6** zBeran inacho ñaa, lla? zAgonchcho saaxya' kwençe wli'ch Chioza' yel' chiyesh'lallii çhe'na'? <sup>2</sup> Aga kan' goncho! La' cho' ba nakcho ka beñ' ba wit lao saaxya' daa bich chñabi'an cho'. Daan, bich chiya' gonchon txen. <sup>3</sup> zAbi ñezile ka wchoacho nisa' daa nakcho Cristo Jesús'a txen, lekzka' zejin witlenchonen'? <sup>4</sup> Daa wchoacho nisa' zejin witlenchone' na' bgash'lenchone' kwençe gat' to yel' mban kob çhecho ka gok çhe Crístona' kana' bisban Xacho Chioza' le' kon yel' wak xen çhe'na'.

<sup>5</sup> Na' daa ba witlenchone', ka'kzan yibancho ka bibane' ladj beñ' wetka'. <sup>6</sup> Ñezicho yel' mbanna' nsa'cho kana', wliayi'n ka wit Crístona' lee yag cruza' kwençe bich we'cho cho'a xbayi beli chenna' na' bich inabia' dii mala' cho'. <sup>7</sup> La' kat' to beñ' ba wite', bich chñabia' dii mala' le'. <sup>8</sup> Na' shi ba witlencho Crístona', ba nxenall'cho lekzka' ibanlenchone'. <sup>9</sup> Ñezicho biban Crístona' ladj beñ' wetka' na' bich guete' dii yoblə, la' bich so saki yel' wita' le'. <sup>10</sup> Na' ka wit Crístona', shlin shlaxizan bsol bnite' yel' wak çhe saaxya'. Na' daa mbane' ñaa, zoe' chone' ka cheeni Chioza'. <sup>11</sup> Na' ka'kzə le', chiya' gake'ile ba nakle ka beñ' ba wit lao saaxya' daa bich chñabia'n le', per mbanle lao Chioza' na' zoale chonle ka cheenile' daa nakle Xancho Cristo Jesús'a txen.

<sup>12</sup> Daan bi chiya' we'le latj inabia' dii mala' le' kwençe we'zle cho'a xbayi beli chen çhelena' daa ile'i

yel' wita'. <sup>13</sup> Bi chiya! gon kwerp çelena' lall' na' saaxyana' kwençe gonle dii mala', san chiya! gon kwinle do ka nakle lall' na' Chioza' kwençe gonle ka cheenile'. La' wak inacho Chioza' ba bisbane' le' ladj beñ' wetka' daa ba beñe' le' to yel' mban kob. <sup>14</sup> Bich chiya! inabia' dii mala' le', la' bich zoale xñi'a leya', san daa biyesh'lallii Chioza' le', ba zoalenle yel' goklen çe'na'.

<sup>15</sup> ¿Nakrazə, Ila? Naa ba biyesh'lallii Chioza' cho', na' bich zoacho xñi'a leya', ¿agonchcho dii mala'? ¿Bi chiya! goncho ka! <sup>16</sup> Nezkzile shi ba ben kwincho lo na' beñ' kwençe goncho bittez daa ne', choe'cho latj chñabi'e chon'. Ka'kzan, shi chzenagcho çe dii mala', na' inabia'n cho' na' wlliyai'n cho'. Na' shi we'cho latj inabia' Chioza' cho', wiyone' cho' beñ' li beñ' shao'. <sup>17</sup> Per choxken Chioza', la'kzi kana' wñabia' dii mala' le' na' benle ka nan, naa do yichj do lall'le ba chzoale xtilleena' daa bli' bsedgakile' le'. <sup>18</sup> Naa ba biyell bila'le lao dii mala', na' ba biyakle lall' na' Chioza' kwençe gonle ka cheenile'. <sup>19</sup> Ba bi'a dill' çe daa chak çecho cho' beñeç kwençe shajniile dga nia' le'. Kana' ben kwinle lall' na' saaxyana' len dii zbanka' cheeni beli chen çelena' kwençe benle dii malka'. Na' naa, li gon kwinle lall' na' Chioza' kwençe soale gonle ka cheenile'.

<sup>20</sup> Shlak be'le latj wñabia' dii mala' le', aga bzenagle çe Chioza' na' bi benle ka cheenile'. <sup>21</sup> Na' aga bi banez wxi'le çe dii mala' benle na' naa chiyii chido'le-nile'n, la' yel' witchokzan nsa'n. <sup>22</sup> San naa ba bisell bila' Chioza' le' lo ni'a na' dii mala' na' ba chonle ka cheenile', de banez çeyin daa zejch chonle daa nak wen, na' gat' yel' mban çeche zejli kañi. <sup>23</sup> Laxj beena' chon saaxyana' nakan yel' wit, san daa chzani Chioza' wi'e beena' gonjilallee Xancho Cristo Jesús'a nakan to yel' mban zejli kañi.

**7** Le' beñ' bish' na' le' beñ' zan', nombia'le leya' na' nezele leya' chñabi'an beñ' shlak mbane'. <sup>2</sup> Na' ka nak leya', cho'en dill' nan noola' nshagna' chiya! soalene' beñ' çe'na' shlak mbane', per shi guet beñ' çe'na', wak yikee beñ' yoblə. <sup>3</sup> Shi llsjoalene' beñ' yoblə shlak ni mban beñ' çe'na', nakan xya. Per shi ba wit beñ' çe'na', leya' nan wak yikee beñ' yoblə, na' bi nakan xya.

<sup>4</sup> Na' ka'kzan çeche le', nakcho txen nonjilall'cho Crístona', le' beñ' bish'dawaa na' le' beñ' zandawaa. Daa nonjilall'le Crístona', beena' wit ni çeche, zejín lekzka' ba nakle ka beñ' ba wit lao leya' na' bich chñabi'an le'. Na' naa ba biyakle lall' na' beñ' yoblə, beena' wite' na' bibane' ladj beñ' wetka', kwençe goncho ka cheeni Chioza'. <sup>5</sup> Kana' wzoacho be'cho cho'a xbayi beli chenna', leya' wloochan ltip beli chen çechecho' na' benchcho dii mala', na' saaxyana' daa bencho bsa'n yel' wit. <sup>6</sup> Per naa, ba nakcho ka beñ' ba wit lao leya' daa btakw bçhejan cho', na' ba biyell bila'cho kwençe goncho ka cheeni Chioza' daa ba bikob Espíritu Sántona' yichjall'do'choni, na' bich chñabia' leya' cho'.

<sup>7</sup> Bi chiya! inacho leya' nakan dii mal. La' lennan' bza-jniin nad' nan malan' chon'. Aga nezeid' shi nakan mal

selallaa bi de çe beñ' shel'ka' ki leya' nan: "Bi selaloo bi de çe beñ'." <sup>8</sup> Per dii mala' yoo loo yichjall'dawaani bçhinan dga bllia Chioza' bia' kwençe wloochan ltip beli chen çha'ni na' chiya dii wzelallaa. La' shel' bibi leya' got', bibi de daa inan nakcho beñ' wixinj wilen, shel'ka'. <sup>9</sup> Kana' biñ' nezeid' daa na leya', gokid' le wen nsa' çha', per ka wnezeid' daa nllia leya' bia', zizikli benz' dii mala' daa wlliyai' nad'. <sup>10</sup> Daa bllia Chioza' bia' goncho kwençe gaklenen cho' gat' yel' mban çeche, bçhoglolan çha' nan chiya! guet'. <sup>11</sup> La' dii mala' yoo loo yichjall'dawaani bçhinan leya' na' wxiye'n nad' kwençe blliyai'n nad'.

<sup>12</sup> Leya' dii licha nakan çe Chioza', na' yog' daa nllian bia' nakan dii wna Chioza', nakan dii li dii shao' na' dii wen. <sup>13</sup> Leya' nakan wen na' aga lennan' benan ka kwiayaa. San dii mala' yoo loo yichjall'dawa'nin bçhinan leya' daa nak dii wen kwençe blliyai'n nad'. Na' daa nakan ka', ni çe leya' bli'lao saaxyana' nakan dii mal inleeb.

<sup>14</sup> Nezeicho leya' nakan çe Chioza', san nad', lega beñ' de beli chen chon', na' chñabia' dii mala' nad' daa chon' ka nan. <sup>15</sup> Bi çajniid' ka chon', la' bi chon' dii wenna' daa cheenid' gon', san dii mala' daa chakzbanid', lelan chonz'. <sup>16</sup> Na' kat' chon' daa bi cheenid' gon', chakbe'id' leya' nakan wen. <sup>17</sup> Na' aga inacho nadaan chon' ka', san dii mala' daa daa yoo loo yichjall'dawaanin chlligaan nad' kwençe chon' dii mala'. <sup>18</sup> Nad' nezeid' aga bi dii wen cheeni beli chenni gonan. Na' la'kzi le lliallalaa gon' dii wenna', bi chak gona'n. <sup>19</sup> Bi chizoid' gon' dii wenna' daa cheenid' gon', san dii mala' daa bi cheenid' gon', lelan chonz'. <sup>20</sup> Na' daa chon' daa bi cheenid' gon', zejín aga nadaan chona'n, san dii mala' daa chñabia' loo yichjall'dawaanin chonan daa.

<sup>21</sup> Chakbe'yenid' la'kzi cheenid' gon' daa nak wen, dii malalə chon'. <sup>22</sup> La'kzi chibayi loo yichjall'dawaani ley çe Chioza', <sup>23</sup> chakbe'id' de daa chsej chllonan gon' daa nezeid' nak wen, la' dii mala' daa chñabia' nad' chtakw chçhejan nad' kwençe gon' daa bi nak wen.

<sup>24</sup> ¿Le nyesh' chak çha! ¿Notgui yisell yila' nad' lao beli chenni dga ba nchogbia' kwiayi'? <sup>25</sup> Cho'a Chioza' yel' choxken daa wit Xancho Jesucristona' na' bisle' nad' lo na' dii mala'. Na' kin çajniida'n: chibaid' gon' ka na ley çe Chioza', per beli chen çha'ni chlligaan nad' kwençe gon' dii mala'.

**8** Na' naa, bich bi yel' zak'zi' çe Chioza' yen ile'i beñ'ka' nak Cristo Jesús'a txen, beñ'ka' bich chongake' ka na beli chen çe'ka', san ba chongake' ka cheeni Espíritu çe Chioza'. <sup>2</sup> La' daa nonjilall'cho Cristo Jesús'a, Espíritu çe Chioza' ba beñe' yel' mban kob çeche, na' daa chñabia' Espírituna' cho', bich chñabia' saaxyana' cho' daa nsa' yel' wita'. <sup>3</sup> Ley daa bzej dii Moiséza' bi gok yislan cho' lao saaxyana' daa choncho ka na beli chenna'. Daan Chioza' bselee Xi-ine'na' goke' beñ' de beli chen ka cho' per bi goke' beñ' saaxya, na' wdixje' saaxya çechecho' ka wite' kwençe bich inabia'n cho'. <sup>4</sup> Chioza' bselee Crístona' ni çeche kwençe so sakicho goncho wen lawe'na' ka na ley

che'na'. Na' bich soacho goncho ka cheeni beli chenna' san soacho goncho ka cheeni Espíritu che Chioza'.

<sup>5</sup> Ben'ka' ni chzenag che dii mala' yoo loo yichjall'do'eka', toz len zegake' wneyi chongake'; san ben'ka' chzenag che Espíritu che Chioza', zegake' wneyi gongake' daa cheenile'. <sup>6</sup> Ben'ka' yoo yichjgake' gongake' dii mala', kwiayi'gake'; san ben'ka' yoo yichj-gake' gongake' ka na Espíritu che Chioza', gat' yel' mban chegake' zejli kani na' soagake' mbalaz. <sup>7</sup> Ben'ka' chibayi chon dii mala', chakzbangakile' Chioza', la' bi chzenaggake' ka na ley che'na', ni bi chak gongake' ka nan. <sup>8</sup> Ben'ka' ni chibayi chon dii mala', Chioza' bi chazlallee ka chongake'.

<sup>9</sup> Per le', bich chzenagle che dii mala' san chzenagle che Espíritu che Chioza', shi ba zoe' loo yichjall'do'lana'. Na' shi no bi zoa Espíritu che Crístona' loo yichjall'do'ena', bi nake' lall' na' Crístona'. <sup>10</sup> La'kzi ba nakan guet kwerp chelena' daa nakle ben' saaxya, per shi nakle Crístona' toz, Espíritu che'na' zoe' loo yichjall'do'lana' na' dekzə yel' mban kob chele daa ba biyakle ben' li ben' shao' lao Chioza'. <sup>11</sup> Na' shi Espíritu che Chioza', beena' bisbane' Jesúsza' ladj ben' wetka', zoe' loo yichjall'do'lana', Chioza' lezkza' goñe' to yel' mban kob che kwerp chelena' daa guet, daa zoa Espíritu che'na' loo yichjall'do'lana'.

<sup>12</sup> Daan, le' ben' bish' na' le' ben' zan', chonan byen goncho ka cheeni Chioza' na' bi goncho kon daa nazan che beli chenni. <sup>13</sup> La' shi we'chcho cho'a xbayi beli chenni, na' guetcho; san shi we'cho latj gaklen Espíritu che Chioza' cho' kwenche kwej yichjcho dii mala' daa nan goncho, na' gat' yel' mban checho zejli kani.

<sup>14</sup> Yog' ben'ka' chzenaggake' che Espíritu che Chioza' na' chongake' ka cheenile', legaken' nakgake' xiñ Chios. <sup>15</sup> Cho' ba zoa Espíritu che Chioza' loo yichjall'do'choni, bich chak checho ka chak che beena' zoa ben' chñabi'ene' na' chall chllebe'ne', san daa zoa Espíritu che'na' loo yichjall'do'chonan', zejñ ba wkaa Chioza' cho' ka xiñe'. Na' daa zoalen Espírituna' chon', chak che'chone': "Xadawaa." <sup>16</sup> Na' Espíritu che'na' lezkza' chzajniile' cho' kwenche chñezicho nakcho xiñ Chios. <sup>17</sup> Na' daa nakcho xiñ Chioza', lezkza' wllin lla ikaalencho Crístona' daa goñe', la' shi goncho banez yel' zak'zi'ka' ka diika' ben ble'i Crístona', na' gakchone' txen sho'lenchone' balaan.

<sup>18</sup> Na' ka nak yel' zak'zi'ka' chen chle'icho yell-lioni, aga wllinlebin ka balaan xenna' sho'lenchone'. <sup>19</sup> Na' yog' diika' bxe bsil Chioza' chbezgakan yob illin lla wli'lao ba nakcho xiñ Chioza'. <sup>20</sup> La' yog' diika' bxe bsil Chioza' bich nakshao'gakan ka gokgakan dii nech. Na' aga legakannan' goklall'gakan gakgakan ka', la' Chiozan' blie' bia' gakgakan ka', per lezkza' bene' kwenche chbezgakan yiyakshao'gakan. <sup>21</sup> La' wllin lla kat' yog' diika' bxe bsile' bich gakgakan dii kwiayi', san yiyakgakan mbalaz inlebb ka gak checho, cho' nakcho xiñe'. <sup>22</sup> Na' nezicho axt naanlla yog' diika' bxe bsile' chak chegakin ka chak che to nool chllagloe' sane' bi'do' che'na'. <sup>23</sup> Na' aga toz diika' ben Chiozan' chak chegakin ka', ka'kzan chak checho, cho' ba yoocho Es-

píritu che'na', beena' chon ka noncho lez gonch Chioza' dii wen checho, chbellyesh'cho shlak chbezcho yiyone' kwerp chechoni to dii kob na' wli'lao ba none' cho' xiñe'. <sup>24</sup> Kon ka bisla Chioza' cho' lo ni'a na' dii mala', noncho lez yikobe' kwerp chechoki. Aga daa ba den noncho lez, la' daa ba gok bich nakan dii goncho lez. <sup>25</sup> Per shi ni noncho lez ile'icho daa zi' gak, chiya' gapcho yel' chxenlall' shlak ni chbezcho gakan.

<sup>26</sup> Na' lezkza' Espíritu che Chioza' chaklene' cho' choncho daa bi chak goncho. La' aga nezicho nakan chiya'yen' we'llwillcho Chioza', per kwin Espíritu che'na' chbellyeshee chñabe' checho lawe'na'. Na' la'kzi aga bi dill' chchine', <sup>27</sup> Chioza', beena' nombi'e yichjall'do' yog'cho, nezile' bin chñab Espíritu che'na' checho. La' daa chaklall' Chiozan' chñabe' checho, cho' nakcho lall' nee.

<sup>28</sup> Na' nezicho Chioza' chchine' yog' diika' chen chle'icho kwenche gaklengakan cho', cho' ba chakichone', cho' ba wleje' kwenche gakcho lall' nee kon ka goklallee. <sup>29</sup> Kana' biñ soatecho, Chioza' ble'shiile' cho' na' wleje' cho' kwenche yiyone' cho' ben' wen ka nak Xiñe' Jesucrístona', kwenche Jesucrístona' gake' ben' llialo ladjchoni, cho' nakcho ben' bishee na' ben' zane'. <sup>30</sup> Chioza' wleje' cho' kani'teyi, na' lezkza' gox wñabe' cho' kwenche gokcho lall' nee, na' biyone' cho' ben' li ben' shao' lawe'na'. Na' cho' ba biyone' ben' li ben' shao', ba nakan sho'cho to balaan xen.

<sup>31</sup> ¿Bera dech inacho cheyi dga ba ben Chioza' checho, lla? La' shi Chioza' zoalene' cho', ¿nora gak bi goni cho'? <sup>32</sup> Shi Chioza' axt ni Xiñe'na' bi biyeshile' san bzanile'ne' wite' ni checho, ¿alechlin ki gone' cho' yog'lo' diika' bchebe'? <sup>33</sup> Aga no gak gao xya checho lao Chioza', la' len' ba wleje' cho' na' biyone' cho' ben' li ben' shao'. <sup>34</sup> Na' aga no gak wñoglo checho guetcho. La' Cristo Jesúsza' wite' ni checho, na' bibantie' ladj ben' wetka'. Na' chi'e kwit de shli che Chioza', chñabe' gaklene' cho'. <sup>35</sup> Aga bi de dii gonan ka bich gaki Crístona' cho'. Ni yel' zi' daa chen chle'icho, ni dii lalljka' chak checho, ni daa chsak'zi' ben' cho', ni daa chbi' chdoncho, ni daa bi de xalaancho, ni daa zoacho dii nxoll, wa shi wit ben' cho'. <sup>36</sup> Chak ka na Cho'a Xtill' Chioza' daa na:

Daa chzoanto' xtilloona' toshiizi de dii nxoll chento' witgake' neto'.

Chongakile' neto' ka xil'do'ka', baka' nzoagake' witgake'.

<sup>37</sup> Per Crístona', beena' chakile' cho', chaklene' cho' kwenche goncho gan lao yog'lo'lte diika' chen chle'icho. <sup>38</sup> Na' daan nezid' aga bi de dii gonan ka bich gaki Chioza' cho': ni yel' wita', ni yel' mbanna', ni anjka', ni dii xiw'ka', ni daa chak naa, ni daa zi' gakə, <sup>39</sup> ni dii chak gana' zeelo nak sib wal, ni dii chak gana' zeelo nak zitj wal, ni bittez dii yoblə dii bxe bsil Chioza' bi gak gonan ka bich gakile' cho', la' ba bli'e le chakile' cho' daa wit Xancho Cristo Jesúsza' ni checho.

**9** Daa nonlilallaa Crístona' cho'a dill' li, na' bi chziyaa. Na' lezkza' Espíritu Sántona' chzajniile' nad' kwenche nezi yichjall'dawaani dga nia' nakan dii



li. <sup>2</sup> Le nyesh' zoa' na' toshiizi le chjeli lall'dawaani, <sup>3</sup> na' axt shel' wx'e'id' bich gaklen Crístona' nad' na' kwiayaa kwenche shicholə gaklenan ben' Israelka' ben'ka' nak ben' wlall cha' na' ben' bishaa. <sup>4</sup> Chioza' wleje' dii xoxz-to'nto'ka' kwenche noni xiine' neto'. Na' got' to balaan chegake' daa wzoalene' legake'. Bchebe' gakgake' yell che', na' bi'e legake' ley che'na'. Na' bzajniile' legake' ka chiya' we'la'ogake'ne', na' dii zan dii bchebe' gone' chegake'. <sup>5</sup> Neto' ben' Israel naknto' dia che dii Abrahamama', dii Isaaca' na' dii Jacoba', na' Crístona' lekzka' golje' lo dia chento'na' ka bide' yell-lioni. Na' chiya' we'la'ochone' zejli kañi, la' len' nake' Chios na' chñabi'e lao yog'lo'lte dii de. Kan' nakan.

<sup>6</sup> Na' bi inacho Chioza' bi bene' ka bchebe' gone' chento', san daa gok, aga yog' ben'ka' golj lo dia che dii Israela' naggake' dowalj ben' Israel. <sup>7</sup> Aga yog' ben' goljgake' lo dia che dii Abrahamama' naggake' dowalj xiin dia che'. Chioza' gollene': "Xiino' Isaaki gakb' xaxna' yog'lo' xiin dia cho'ka' zi' zaak." <sup>8</sup> Dga chzajniin cho' nan aga ni che naggake' xiin dia che dii Abrahamama' naggake' xiin Chios, san ben'ka' chajle' gone' ka bchebe' gone', legaken' noni xiine'. <sup>9</sup> Ki nak daa bcheb Chioza' gone' che dii Abrahamama', chi'e: "Zi twiz ka naa zaa dii yoblə, na' Sárana' sane' to xiino' bi' byo."

<sup>10</sup> Na' aga dgazan. Lekzka' Rebécana' wxane' chop bi'do' che dii xoxzto'nto' Isaaca'. <sup>11</sup> Na' kana' zi' galj bi' kweshka', na' ni bin' gongakb' dii wen ni dii mal, Chioza' bshaljlene' Rebécana', gollene': "Bi'na' galjə nech wlexj yichjb' lao bi'na' galjə koll'baa." Gollene' ka' kwenche chakbe'icho Chioza' chbeje' beena' gak xiine' kon ka ba bliie' bia' gak, na' chaxe' ben'ka' cheenile' gak xiine', ni bi chone' kwent shi bi ba bengake'. <sup>13</sup> Nakan kon ka na Cho'a Xtill' Chioza' daa na: "Gokid' Jacoba', na' bwiyid' Esaúna'."

<sup>14</sup> ¿Bera ka inacho, naa? ¿Awak inacho Chioza' bi chone' wen? ¿Bi nakan ka! <sup>15</sup> La' Chioza' gollene' dii Moiséza': "Beena' cheenid' yiyesh'lallid' na' yiyesh'lal- lidee, na' beena' cheenid' gaklen' na' gaklenee."

<sup>16</sup> Daan, nezicho aga daa le cheeni ben' gake' xiin Chiozan' kwej Chioza'ne', ni aga ni che bi dii chone'n, san Chioza' chbeje'ne' daa chiyesh'lallile'ne'. <sup>17</sup> La' Cho'a Xtill' Chioza' cho'en dill' ka gollene' faraónna', beena' wñabia' Egíptona': "Bzoa' li' chñabi'o kwenche gon' ka ile'i ben' ye' wak cha'na' na' kwenche gakbe'i yog' ben' lle' doxen yell-lioni nad' nak' Chios." <sup>18</sup> Na' kan' nakan, Chioza' chiyesh'lallile' ben'ka' cheenile' yiyesh'lallile', na' lekzka' chone' chech yichjlall'do' ben'ka' cheenile' gakgake' ben' widenag.

<sup>19</sup> Na' wnaljo': "Shi choncho kon ka ba nllia Chioza' bia' goncho, bi gak ine' napcho dol' lawe'na', la' aga wakə wsej wlloncho gak ka cheenile'." <sup>20</sup> Na' shi ka' chakilo', ¿nora nako' wsheshlenzo' Chioza'? Aga wak ine' to yes' yo yeen beena' benan: "¿Biçe benzo' nad' ki?" <sup>21</sup> La' beena' chon yes' xwagka' wakə gone' benja' kon nak cheenile', na' wakte gone'n to yes' dii gon llin ga lliallote, na' sto dii wchine' che bittez.

<sup>22</sup> Na' ka'kzə ba ben Chioza'. Ni che dii mala' chon ben' yell-lioni goklallee wliile' legake' ye' chllaa che'na'

na' gone' ka wli'lao ye' wak che'na', per wzoile' wdape' ye' chxenlall' che ben'ka' chidol' ye' zak'zi'na', ben'ka' ba nakan kwiayi'. <sup>23</sup> Na' lekzka', ba bli'e ka liizelozi ben' wen inleeb nake' daa ba biyesh'lallile' cho' na' bizi'xene' checho, na' biyone' cho' ben' li ben' shao' kwenche idol'cho balaan ka yillincho lawe'na'. <sup>24</sup> Na' ba gox wñab Chioza' cho', aga balz neto' naknto' ben' Israe- lan', san len bal-le bi nakle ben' Israel. <sup>25</sup> Chak ka wna Chioza' daa bzej dii Oseaza', daa na:

Ben'ka' bi nak yell cha', yepgakee: "Nakle yell cha'." Na' ben'ka' bi gokid', yepgakee: "Chakid' le'."

<sup>26</sup> Na' latja' gana' gollene' legake' bi naggake' yell che', wsi' ben' legake' xiin Chios yaa Chios ban.

<sup>27</sup> Ki wna dii Isaíaza' che ben' Israelka': "La'kzi shesh shan ben' Israelka' axt gakgake' ben' zan ka yox daa chi' cho'a nisdona', balchokzgaken' yilagake' kwenche bi kwiayi'gake'. <sup>28</sup> La' Xancho Chioza' lobe' wchogbi'e ka gak che yog' ben' lle' yell-lioni." <sup>29</sup> Ka bzej dii Isaíaza', kana' wne':

Shel' Xancho Chioza', beena' nak liizelozi ben' ye' wak choo ye' wak xen, bi bkwaane' sto chop dia chechoka', ba biyol binitcho ka gok che ben' yell Sodómaka' na' ben' yell Gomórraka', shel'ka'.

<sup>30</sup> ¿Nakra inacho, naa lla? Ben'ka' bi nak ben' Israel bi wzegake' wneyi kwenche yiyakgake' ben' wen lao Chioza', per daa ben'li'gake'ne', ba biyakgake' ben' li ben' shao' lawe'na'. <sup>31</sup> San ben' Israelka', la'kzi gok- lall'gake' yiyakgake' ben' wen lao Chioza' daa zejlen- gake' ley che'na', bi wxakgakile'n. <sup>32</sup> Na' ¿biçe bi biyak- gake' ben' li ben' shao' lawe'na'? Daa bi ben'li- lall'gake'nen'. Kon gokgakile' ina Chioza' naggake' ben' li ben' shao' daa chongake' daa na leya'. Na'ch gok chegake' ka chak che ben' chjachew' yaj, <sup>33</sup> yaja' daa chzetj Cho'a Xtill' Chioza', daa na:

Wselaa to ben' yell Siónna',

na' saklebile' ka to yaj daa chjachew' ben', na' ka to yaj dii lljsho'gake' na' ibixgake'.

Na' beena' wxenilalleene', biga yiyajile' daa nxi- nalleene'.

**10** Na' le' ben' bish' na' le' ben' zan', daa lliallalaa na' daa chñab' kat' choe'lwil' Chioza' chñabidee yisle' ben' wlall cha'ka', ben'ka' nak ben' Israel, kwenche bi kwiayi'gake'. <sup>2</sup> Nez nle'id' chegake' zechga- gake' wneyi gongake' ka cheeni Chioza', toz daa bi nez- gakile' nakyen'an cheenile' gongake'. <sup>3</sup> Daa bi cha- jni'gakile' toz Chiozan' chiyone' ben' ben' li ben' shao', chaklall'gake' yiyon kwingake' ben' wen, na' bi cheen- gakile' gon'li'gake' Crístona' kwenche yiyakgake' ben' li ben' shao' lawe'na'. <sup>4</sup> La' daa bid Crístona', bene' daa bi gok gon leya', na' yog' ben'ka' gon'li'gake'ne' yiyakgake' ben' li ben' shao' lao Chioza'. Na' bich gon- cho lez daa goncho ka na leyan' yiyakcho ben' wen lawe'na'.

<sup>5</sup> Dii Moiséza' bzeje' ka chiya' gon ben'ka' zoa xñi'a leya' kwenche yiyakgake' ben' wen lao Chioza', na' nan: "Nottezə ben' chon doxen ka na leya' si'e banez ye' mban che'na'." <sup>6</sup> Na' che ben'ka' nak ben' li ben' shao' lao Chioza' daa non'li'gake'ne', wne': "Bi sa'lall'zle,

inále: ¿Nora gak shaj yabana?“, (kwenche gone' ka yetj Cristona' yell-lioni). <sup>7</sup> “Ni bi inále: ¿Nora gak yetj gana' lle' beñ' wetka?“, (kwenche lljajeje' Cristona' ladje'ka'). <sup>8</sup> Ki chizna daa bzej dii Moiséza': “Dillaa daa ba wna Chioza' zoalenan le' na' ba yoon cho'a loll'lena' na' loo yichjall'do'lena“, na' l'ennan' daa choe'lennto' le', nanto' chiyal' gonlilall'le Cristona'. <sup>9</sup> Shi wi'o dill' Jesús'a' nake' Xancho na' shajli'o do yichj do lalloo nan Chioza' bisbane'ne' ladj beñ' wetka', na' yisla Chioza' li' kwenche bi kwiayoo. <sup>10</sup> La' daa shajle'cho do yichj do lall'chon, yiyakcho beñ' li' beñ' shao' lao Chioza', na' lekzka' daa choe'cho dill' nan Cristona' nake' Xancho, yisle' cho' kwenche bi kwiayi'cho.

<sup>11</sup> Cho'a Xtill' Chioza' nan: “Nottez beñ' gonlilalleene', biga yiyajile' daa benlilalleene'.” <sup>12</sup> Laa nakcho beñ' Israel, laa bi nakcho beñ' Israel, Cristona' nake' Xancho, na' chaklene' yog'cho cho' chñabcho yel' goklen lawe'na'. <sup>13</sup> La' nottezə beñ' inabe' gaklen Xancho Cristona' le', na' yisle'ne' kwenche bi kwiayee. <sup>14</sup> Per ¿nakra gon beñ' inabgake' gaklene' legake' shi biñ' gonlilall'gake'ne'? Na' ¿nakra gongake' gonlilall'gake'ne' shi biñ' yengakile' xtilleena'? Na' ¿nakra gak yengakile' xtilleena' shi kono zoa chixje'ile'n legake'? <sup>15</sup> Na' ¿nakra gak soa beñ' chixjee xtilleena' shi kono wsel' legake'? Ka na Cho'a Xtill' Chioza': “Mbalaz inlleb kat' ila' beñ'ka' zidtxje'gake' dill' wen dill' kob che Chioza'.”

<sup>16</sup> Per aga yog' beñ' Israelka' chzenaggake' dill' wen dill' kob che Chioza'. Chak ka bzej dii Isafaza', gana' na: “Xan', kono chajle' dillaa daa chyixje'nto'.” <sup>17</sup> Daan, kwenche gonlilall' beñ' Cristona' chiyal' yengakile' xtilleena'.

<sup>18</sup> Na' nia': ¿Abin' yengakile' cho'a xtilleena', lla? ¿Yog'ze' ba bengakile'n! La' cho'a xtill' Chioza' nan: Cho'a xtilleeka' chllinan doxen yell-lioni axt gana' zeelo chiyoll chidon.

<sup>19</sup> Na' chiznia', ¿anti neto' beñ' Israelan bi wyajniinto'n, lla? Zajniinto'n. La' dii Moiséza' wdixji'e daa goll Chioza'ne' che beñ' Israelka' kana' wne':

Nad' Chios gon' wen che beñ'ka' bi nakgake' yell cha' kwenche gaklall'le gon' chele ka chon' chegake'.

Na' gon' kwenche illaale daa chon' wen che beñ' zit'ka' beñ'ka' bi napgake' yel' chajni.

<sup>20</sup> Na'tech dii Isafaza' biyaxjile' wne':

Beñ'ka' bi wze wñeyi gombia'gake' nad', beñ' ka bembia'gake' nad'.

Na' beñ' kwenche beñ'ka' bi wyoo yichjgake' nad' bembia'gake' nad'.

<sup>21</sup> Na' dii Isafaza' lekzka' wdixji'e daa goll Chioza'ne' che beñ' Israelka' kana' wne': “Toshiizi goklallaa gaklen beñ' widenagka', beñ'ka' bi chzoa xtilaana'.”

**11** Na' nia' ¿aba wlej yichj Chioza' yell che'na' toshiizin, lla? ¿Bi nakan ka! La' lekzka' nad' nak' beñ' Israel. Golj' lo dia che dii Abraham'a' na' nak' xiñ dia che dii Benjamín'a'. <sup>2</sup> Kani'teyi wlej Chioza' neto' beñ' Israel kwenche naknto' yell che', na' aga ba wlej yichje' neto'. ¿Abi chjtinile ka na Cho'a Xtill' Chioza' che Elíaza'? nan ka be'lwille' Chioza' wdawe' xya che beñ' Israelka', chi'e: <sup>3</sup> “Xan', beñ' wlall cha'ka' ba betgake'

beñ'ka' wdixjee daa gollo' legake' na' ba bliayi'gake' gana' chzeynto' bayix'ka' chonnto' li'. Stochga nad' chgaana', na' lekzka' cheengakile' witgake' nad'.”

<sup>4</sup> Na'ch Chioza' golle'ne': “Ni nzoa' galla mil beñ' Israel, beñ' chzenag cha' na' biñ' wchek' xibe'ka' lao Baala'.”

<sup>5</sup> Na' ka'kzan chak ñaanlla, zi xonjchga neto' beñ' Israel chzenagnto' che'. Na' yel' beñ' wen che'na' wleje' neto' gaknto' lall' nee daa nake' beñ' chiyesh'lallii. <sup>6</sup> Na' shi yel' beñ' wen che'nan' wleje' neto', zejin aga wleje' neto' ni che shi bi dii wennan chonnto'. La' shel' wleje' neto' ni che dii wenna' chonnto', bi nakan to goklen daa bene' chento', shel'ka'.

<sup>7</sup> Beñ' Israelka' goklall'gake' yiyakgake' beñ' wen lao Chioza' tobia'lall'zgake', na' bi gokan, san beñ'ka' ba wlej Chiozan' bdoj' bllongakile'n. Na' beñ'ka' sto, zizikchli gokchgake' beñ' widenag. <sup>8</sup> Gok ka na Cho'a Xtill' Chioza' daa na: “Chioza' bchoj' bñitile' legake' kwenche bi shajni'gakile'. Na' axt ñaanlla nakgake' ka to beñ' bi chen chle'i.” <sup>9</sup> Ki wna dii Davina':

“Yiyakshga lñi che'ka' ka to yalj dii wzapan legake', na' ka to dii chgoo chchew'gake', na' sak'zi'gake'.

<sup>10</sup> Gakshgake' ka beñ' lchoj';

na' toshiizi gak chegake' ka to beñ' noa' to dii zii wal'.”

<sup>11</sup> Na'ch nia': ¿Aada bi bzenag beñ' Israelka' che Chiozan' wchoonlallee legake' toshiizi, lla? ¿Bi nakan ka! San daa bi bzoagake' xtilleena', na'chan bisle' beñ'ka' bi naklə beñ' Israel kwenche beñ' Israelka' lekzka' gaklall'gake' yisle' legake'. <sup>12</sup> Shi yel' widenag che beñ' Israelkan' benan ka gok wen che beñ'ka' bi nak beñ' Israel, ¿alechlə ki gakch wen chegake' kat' beñ' Israelka' yiyonlilall'gake'ne'?

<sup>13</sup> De to dii cheenid' we'len' le' dill', le' bi nakle beñ' Israel. Chioza' ba wleje' nad' na' bselee nad' laolena'. Na' do yichj do lallaa chon' dga bene' lall' na' gon',

<sup>14</sup> kwenche shi bal beñ' wlall cha'ka' gaklall'gake' gak chegake' ka ba chwiagake' chak chele, na' yilagake' bi kwiayi'gake'.

<sup>15</sup> La' shi daa bzoa Chioza' beñ' Israelka' ka'lə, bene' ka beñ'ka' bi nak beñ' Israel bizoalengake'ne' wen, le mbalaz kat' illin lla yilebe' beñ' Israelka' sto shii. La' gak chegake' ka to beñ' biban ladj beñ' wetka'. <sup>16</sup> Na' shi lee kwana' chbejcho daa chonicho yetxtil necha' daa choe'cho Chioza', zejin doxente kwana' nakan che'. Na' shi lo yaga' nakan che Chioza', lekzka' xozziinka' nakgakan che'.

<sup>17</sup> Beñ' Israelka' zaklebgakile' yag olivo wenna' daa bchogue' bal xozziinka', na' le' bi nakle beñ' Israel zakleBILE' yag olivo yixaa daa bidee lee yag wenna'. Na' yag wenna' noxaan xozii yag olivo yixaa diika' bidee le'inna' na' cho'en yel' mban chegakan. <sup>18</sup> Per bi gakile nakchle beñ' wench aga ka beñ' Israelka', beñ'ka' zaklebi xoz' yaga' diika' bchogue'. Bi shep sha'lall'le, la' aga xoz' yagan' cho'en yel' mban cheyin san loinnan' choe'n yel' mban che xozziinka'.

<sup>19</sup> Na' wnaljale: “Bchogue' xozziinka' kwenche bidee neto' le'inna'.” <sup>20</sup> Lekzile kan' nakan, la' daa bi benlilall'gake' Chiozan', bzoe' legake' ka'lə, na' biyakle lall' nee daa nonlilall'lene'. Daan, bi shep sha'lall'le, san li' gall illeb Chioza'. <sup>21</sup> La' shi Chioza' bi biyeshile' xoz' ya-

ga' diika' nak dowalj, lekzka' gone' chele shi naa. <sup>22</sup> Li gakbe'i ka beṅ' wen beṅ' shao' nak Chioza' na' lekzka' nake' beṅ' chsak'zi'. La' bsak'zi'e beṅ'ka' bi beṅ'li-lall'gake'ne', na' ba chone' wen chele. Na' gonche' wen chele shi gonle ka dii le gonlilall'lene', san shi bich gonlilall'lene' lekzka' wzoe' le' ka'lə. <sup>23</sup> Na' shi beṅ' Israelka' gonlilall'gake'ne', na' yidee legake' sto shii lee yaga', la' Chioza' wak gone'n. <sup>24</sup> Na' le' bi nakle beṅ' Israel, wak incho nakle ka xoz' yag olivo yixaa diika' bidee lee yag olivo wenna', la'kzi bi nakan dowalj xozin. ¿Alechlin diika' nak dowalj xoziin ki yideen sto shii? Beṅ' Israelka' nakgake' ka xoziin daa nak dowalj, na' aga bi lallj nakan yileb Chioza' legake' dii yoblə.

<sup>25</sup> Le' beṅ' bish' na' le' beṅ' zan', de to dii biṅ' inezile daa bzajni Chioza' nad', na' cheenid' inezilen kwenche bi gakte beṅ' cha'sib na' gakte zak'chle ka neto' beṅ' Israel. La' aga toshiizin gake beṅ' Israelka' beṅ' wide-nag, san kat'ka' ba bza' beṅ'ka' bi nak beṅ' Israel gonlilall'gake' Crístonan', bich gake beṅ' Israelka' widenag. <sup>26</sup> Na' ka illin lla gake ka', na'ch yog' beṅ' Israelka' yiyagake' lall' na' Chioza'. Na' gake ka na Cho'a Xtilleena' daa na:

Yell Jerusalénna' ichej to beṅ'  
yisell yilee beṅ'ka' nak xiṅ' dia che dii Jacoba' lao dii mala'.

<sup>27</sup> Na' dgan chcheb' gon' chegake',  
yizi'xen' saaxya che'ka'.

<sup>28</sup> Na' daa bi bzenag beṅ' Israelka' dill' wen dill' kob che Crístonan', bllaa Chioza' legake'. Na' daa gok ka' got' latj beṅ'li-lall'lene', le' bi nakle beṅ' Israel. Per Chioza' ni chakile' neto' beṅ' Israel daa wleje' dii xoxto'nto'ka' kwenche gake' beṅ' yell che'. <sup>29</sup> Na' daa chon Chioza', aga wikwase'n na' bi chiyajile' daa chax chnabe' cho'. <sup>30</sup> Kana', le' bi nakle beṅ' Israel, bi bzenagle che Chioza'. Per naa, daa gok beṅ' wlall' cha'ka' beṅ' widenag lao Chioza', ba biyesh'lallile' le'. <sup>31</sup> Na' daa bi chzenaggake' che Chioza' naa, chak ka' kwenche wliyi Chioza' legake' nan lekzka' chiyesh'lallile' legake' ka chiyesh'lallile' le'. <sup>32</sup> La' Chioza' bi'e latj yog'!o! beṅ' gogake' beṅ' widenag kwenche yog'!o!gake' yiyesh'lallile'.

<sup>33</sup> Dii xen inlleb nak ye! sin' na' ye! chajni che Chioza'! Ni to kono chajni daa nllie' bia' gake wa daa nllie' bia' gone'! <sup>34</sup> La' "ni to kono nezi daa chza'lall' Xancho Chioza', na' ni to kono gake wzajniile'ne' nakan chiyal' gone'. <sup>35</sup> Biga zoa beṅ' ba bi'e Chioza' dii naki che' kwenche gone' lez yigoo Chioza' wzon che'." <sup>36</sup> La' len' bxe bsile' yog'!o!te dii de na' bllie' bia' chongakan ka chaklallee, na' yog'!o! dii de nakan che'. Le' chidolee koochone' balaan zejli kan! Kan' nakan.

**12** Na' le' beṅ' bish' na' le' beṅ' zan', daa ba biyesh'lallii Chioza' cho', chat'yoid' le', li we' Chioza' do ka nakle naa mbanle kwenche gake dowalj beṅ' wen ka chazlallee, la' kan' chiyal' we'la'ochone'. <sup>2</sup> Na' bi gonle txe diika' de lo yell-lioni, san li we' latj yikob Chioza' yichjall'do'lana' kwenche yilla' ye! mban chelena'. Na' ka' gake'ile daa cheenile' gonle. Na' daa cheenile' goncho nakan dowalj dii wen, daa chazlallee.

<sup>3</sup> Daa nzoa Chioza' nad' gon' xshine'na', nia' le': Ni tole bi gake ba nakle to beṅ' zakii. San li gake'bi nak nakle lao Chioza' kon ka zej chaklene' le' chonli-lall'lene'. <sup>4</sup> Ka nak che kwerp chechoni, dii zan dii nsa'n na' aga toz ka dii chongakan. <sup>5</sup> Ka'kzan cho', la'kzi nak zanchi, tozan nakcho daa nonlilall'cho Crístonan', na' ndil nllagcho ka ndil nllag diika' nsa' to kwerp.

<sup>6</sup> Chioza' ba beṅ' cho' wde wdeli daa gake goncho kon ka chazlallee gon to tocho. Daan, beena' naki che' chixje'ile' beṅ' daa che' Chioza'ne', chiyal' wxeni-lalleene' gake' le' gone'n. <sup>7</sup> Na' beena' naki che' gake' beṅ', chiyal' gone'n do yichj do lallee. Na' beena' naki che' wli' wsedile' beṅ' yoblə, chiyal' wli' wsedile' legake'. <sup>8</sup> Na' beena' naki che' wtipe' lall' beṅ', chiyal' wtipe' lall'gake'. Na' beena' naki che' izanile' bi wi'e beṅ', chiyal' wi'en do yichj do lallee. Na' beena' naki che' gake' kwee xnezi dii chak che beṅ', chiyal' gone'n xochi ga zeelo gake'. Na' beena' naki che' yiyeshile' beṅ', chiyal' yibaile' gake' beṅ'.

<sup>9</sup> Li gake ljwell-le do yichj do lall'le. Li gakebani dii mala' na' li soa gonle dii wenna'. <sup>10</sup> Li gake ljwell-le ka bish' golje, na' ganga goni ljwell-le ka beṅ' zak'chi ka le'.

<sup>11</sup> Bi wshe'lall'le gonle daa cheeni Xanchoan', san li gon ka dii le gonle daa chazlallee axt ga zeelo soile.

<sup>12</sup> Li yiba yizaki daa nonle lez ljazoolenle Chioza', li gap ye! chxenlall' kat' zaak ye! zak'zi'ka', na' li we'llwill Chioza' toshiizi.

<sup>13</sup> Le' nakle lall' na' Chioza', li gake ljwell-le shi bi dii chyaljile. Na' li we' beṅ' ga yigaangake' loo yoo lill-le.

<sup>14</sup> Chiyal' inabile Chioza' gake wen che beṅ'ka' chsak'zi' le'. Li inab gake wen chegake' na' bi chishjle bia' blag' chegake'.

<sup>15</sup> Li yiba yizakleni beṅ'ka' chiba chizaki na' li kwell-len beṅ'ka' chbell.

<sup>16</sup> Li soalen ljwell-le wen. Bi gake beṅ' cha'sib, san li gon txe beṅ' yesh'do'ka'. Na' bi gon kwile ka to beṅ' sin'.

<sup>17</sup> Shi ga zoa beṅ' chone' mal chele, bi yizi'le wzonna'. Chiyal' sho' yichjle gonle wen lao yog' beṅ'. <sup>18</sup> Chiyal' gonle axt ga zeelo gake kwenche soalenle yog' beṅ' mbalaz. <sup>19</sup> Le' beṅ' bish' na' le' beṅ' zan', bi chiyal' yizi'le wzon che beṅ' shi bi chone' chele, san li gonan lo na' Chioza' kwenche le' wsak'zi'ene'. La' Cho'a Xtilleena' nan: "Xancho Chioza' ne': Nad' yizia' wzon che beṅ'ka' chon dii mala'. Na' nad' wsak'zi'gakee." <sup>20</sup> Na' lekzka' nan: "Shi chbi! chdon beena' chakzbani li', be' dii yeej gawe'. Na' daa gono' ka', yiyi yido'ile'." <sup>21</sup> Bi we'le latj inabia' dii mala' le', san li gon wen kwenche gonle gan dii mala'.

**13** Yog'cho chiyal' wzenagcho che beṅ'ka' chnabia', la' aga bi ye! wñabia' de dii bi nak che Chioza'. Na' Chioza' nzo' beṅ'ka' kwenche inabia'gake'. <sup>2</sup> Na' beena' chizoshi' beṅ'ka' chnabia', daa nllia Chioza' bia' gonchon chizoshi'e. Na' beṅ'ka' chon ka', choglo chegake' sak'zi'gake'. <sup>3</sup> Beṅ'ka' chnabia', aga zoagake' kwenche wwall wshebgake' beṅ'ka' chon wanan, san beṅ'ka' chon malan chiyal' gall illebgake' legake'. Shi

chall chllebo' beṅ'ka' chṅabia', ben wen, na' iṅegake' wen cho'. <sup>4</sup> La' Chioza' nzoe' beṅ'ka' chṅabia' kwenche soacho mbalaz. Per shi bi chono' wen, na'chan sho' shebo', la' aga zoaxenzə beṅ'ka' chṅabia'n, san Chiozan' nzoe' legake' kwenche wsak'zi'gake' ka chiyaḷ' beena' bi chon wen. <sup>5</sup> Daan, chonan byen wzenagcho che beṅ'ka' chṅabia', aga kwenchezə bi wsak'zi'gake' chon', san daa ṅezicho chiyaḷ' goncho wenan. <sup>6</sup> Na' lekzka' chiyaḷ' we'cho daa chidoḷ'cho chixjcho, la' Chioza' nzoe' legake' kwenche chṅabia'gake', na' lennan' noni xshingake'.

<sup>7</sup> Na' chiyaḷ' yiyixjcho che yog' beṅ' shi bi chbag'cho chegake'. Shi chaḷ'cho daa chchixj beṅ'ka' chṅabia' cho', chiyaḷ' chixjchon. Na' beena' chiyaḷ' idap balaan, chiyaḷ' gapchone' balaan. Na' beena' chidoḷ' sho'e balaan, chiyaḷ' koochone' balaan. <sup>8</sup> Bi chiyaḷ' ibag'cho che beṅ', san daa chiyaḷ' goncho gaki ljwellcho, la' beena' ba chaki bish' ljwelle'na' ba chone' doxen ka na ley che Chioza'. <sup>9</sup> Na' ki na ley che'na': "Bi taleno' nool bi nak xoolo'. Bi gono' xya. Bi kwano'. Bi selaloo bi de che beṅ'." Yog'kzə diikin ba choncho lente yog' diika' sto nli- lia leya' bia' shi ba choncho dga na: "Chiyaḷ' gaki bish' ljwello'na' ka chaki kwino'." <sup>10</sup> Shi ba chakicho bish' ljwellchona', bibi dii mal gonichone'. Daan, ba choncho doxen ka nli- lia leya' bia' shi ba chaki ljwellcho.

<sup>11</sup> Li gakte' na nak llaki zoacho ṅaa. Ba goḷ' goncho ka dii le na' bich gonzcho ka beṅ' ches, la' gaoch ba zoa yisla Chioza' cho' lao dii mala' aga ka kana' zi' wya- jle'cho cho'a xtilleena'. <sup>12</sup> Ba zoa gao te che yell-lioni gani chṅabia' dii mala' daa zaklebi yel choḷa', na' ba zoa gao ile'icho beeni' che Chioza'. Daan, chiyaḷ' kwej yichjcho dii mala' na' soacho goncho dii wenna' lega beṅ' yoo beeni' che Chioza'. <sup>13</sup> Chiyaḷ' wsa' checho wen, ka beṅ' chda tella. Bi chiyaḷ' goncho txen ga cheej chao beṅ' na' chzoll chnitgake', ni bi chiyaḷ' talencho xiṅ xool beṅ' wa xiṅ xyo beṅ', ni bi chiyaḷ' goncho bichlə daa nak zban. Na' bi chiyaḷ' gakte'lencho beṅ', ni bi chiyaḷ' gakte' beṅ' xe'. <sup>14</sup> San chiyaḷ' gon kwincho lall' na' Xancho Jesucristona' na' koo yichjcho wsa' checho ka chazlallee na' bich secho wṅeyi we'cho cho'a xbayi beli chenni.

**14** Li gap yel' chxenlall' che beena' biṅ' gakte', na' bi gakte'lenlene' ni che diika' bi nak dii llialo.

<sup>2</sup> La' baḷ' beṅ' chakgake' nakkzan wen gaogake' bittezə yel' wao, na' zi baḷe' chakgake' chiyaḷ' gaogake' shgal' yix' kwan. <sup>3</sup> Beena' cheej chao bittezə, bi chiyaḷ' gonile' nakzi beena' bi cheej chao yog'loḷ. Na' beena' bi cheej chao yog'loḷ, bi chiyaḷ' gake' beena' cheej chao bittezə bi chone' wen. La' Chioza' ba noni xiṅe' choptegake'. <sup>4</sup> ZNora nako' li' wwia wyizo' nak chon wen llin che beṅ' yoblə? Toz xane'nan' ṅezile' shi chone' wen wa bi chone' wen. Na' wzakkzile' gone' ka chiyaḷ', la' Xan- chona' nape' yel' wak kwenche gone' ka soachech xi- iṅe'ka' gongake' ka cheenile'.

<sup>5</sup> Na' nit' beṅ' chakgake' zoa lla nakchan lla choo lla xench aga ka lla yoblə. Na' lekzka' zoa beṅ' chakgake' toz ka nak yog'te llaka'. To to beṅ' chiyaḷ' soe' do yichj do lallee gone' ka chakile' nakan wen. <sup>6</sup> Na' beena' cha-

ki zoa lla nakan lla choo lla xench aga ka lla yoblə, chbeje'n kwenche kwee Xancho Crístona' balaan. Na' beena' chaki toz ka nak yog'te llaka', lekzka' Xancho Crístonan' chgwee balaan daa chakile' ka'. Na' beena' chao bittezə, chgwee Xanchona' balaan, la' cho'e Chioza' yel' choxken kat' chawe'n. Na' beena' bi chao yog'loḷ, lekzka' chgwee Xancho Crístona' balaan, la' lekzka' cho'e Chioza' yel' choxken kat' chawe'.

<sup>7</sup> Ni tocho bi chiyaḷ' secho wṅeyi che kwinzcho. Shi mbancho wa shi guetcho chiyaḷ' secho wṅeyi daa cheeni Crístona'. <sup>8</sup> Shi mbancho na' goncho ka sho' Xancho Jesucristona' balaan, na' shi guetcho na' guetcho ka sho'e balaan. La', laa mbancho wa ba witcho, lall' na' Xanchona'kzan nakcho. <sup>9</sup> Crístona' wite' na' bibane' ladj beṅ' wetka' kwenche gake' Xan yog'loḷ beṅ', ka beṅ' mban na' ka beṅ' ba wit.

<sup>10</sup> Bi chiyaḷ' yiya yiyiljcho bish' ljwellchona', ni bi chiyaḷ' gonichone' nakzi. La' yog'loḷcho ljazecho lao Chioza' kwenche wchogloe' che to tocho. <sup>11</sup> Cho'a Xtil' Chioza' nan:

Xancho Chioza' ne', dii li zoakz' nad', na' dii li yog' beṅ' wchek' xibe'ka' lawa'ni,

na' yoguee we'gake' dill' nan nad' nak' Chios.

<sup>12</sup> Na'chan to tocho yidecho kwent lao Chioza' che di- ika' bencho.

<sup>13</sup> Daan, bich chiyaḷ' yiya yiyiljcho. San wsak'cho bi goncho bittezə dii gonan ka ixop bish' ljwellchona' gone' dii mala' wa gakte'plallee. <sup>14</sup> Daa bzajni Xancho Jesúsza' nad', ṅezid' aga bi yel' wao de dii chxinj chle- nan cho', lete shi to beṅ' chakile' de yel' wao dii chxinj chlenan yichjall'do'ena', bi nakan wen gawe'n shi ṅaa.

<sup>15</sup> Na' shi daa cheej chawo' chonan ka chakte'plall' bish' ljwello'na', aga chakilo'nen' shi ni cheej chaozo'n. Bi chiyaḷ' yeej gawo' daa gonan ka kwaiyi' beena' wit Crístona' ni che'. <sup>16</sup> La'kzi chonle bittezə dii chakile nakan wen, bi chiyaḷ' gonchlen shi chonan ka iṅa beṅ' yoblə aga wenan chonle. <sup>17</sup> La' shi ba chṅabia' Chioza' cho', diika' cheej chaocho bi nakan dii llialo, san dii lli- alo yiyakcho beṅ' li beṅ' shao' na' soalen ljwellcho mbal- az, na' soacho yiba yizakicho daa zoalen Espíritu Sán- tona' cho'. <sup>18</sup> Na' shi zoacho choncho diiki chazlall' Crís- tona', na' yibayi Chioza' ka choncho na' lekzka' beṅ' yell-lioni iṅagake' choncho wen.

<sup>19</sup> Daan, chiyaḷ' goncho to dii byen soalen ljwellcho mbalaz na' gakte'chcho ganga. <sup>20</sup> Bi yeej gaocho to dii gonan ka yinit dii wenna' ba ben Chioza' checho. Dii li, yog' diika' cheej chaocho nakgakan wen, san bi nakan wen yeej gaocho to dii chonan ka gakte'plall' beṅ' yoblə. <sup>21</sup> Wentelan bi gaocho belaa ni bi yeejcho vi- nona', ni bi gonzcho bittezə dii gonan ka gakte'plall' bish' ljwellchoka'. <sup>22</sup> Chiyaḷ' iṅezilo' daa yeej gawo' do yichj do lalloo bi nakan mal lao Chioza'. Chakomba beena' bibi chza'lallee cheyi daa ṅezile' nak wen. <sup>23</sup> Beena' chonchoplall' kat' yeej gawe' to yel' wao, chape' dol' daa bi chawe'n do yichj do lallee. Na' yog' daa bi goncho do yichj do lall'cho, nakan xya.

**15** Na' cho' ba soachechcho chonlilall'cho Chioza', chiyaḷ' gapcho yel' chxenlall' che beṅ'ka' biṅ'

gakcha, na' bi chiya! gonzcho daa cheenzicho goncho. <sup>2</sup>To tocho chiya! goncho dii gakenan bish' l'jwellchoka' kwenche gakchagake'. <sup>3</sup>La' Crístona' aga bene' daa wyazlall' to kwizne', san gok che' ka na Cho'a Xtill' Chioza', daa na: "Daa wchell wne beñ' cho' bzoazi'yaa-gakan nad'." <sup>4</sup>Na' yog' diika' na Cho'a Xtill' Chioza' bzej-gake'n kwenche wzajniin cho' na' wtipan lall'cho kwenche gapcho yel' chxenlall' lao diika' chen chle'icho na' goncho lez dii wenna' ba bcheb Chioza' checho. <sup>5</sup>Chioza', beena' choñ cho' yel' chxenlall' na' chtipe' lall'cho, gaklenshgue' le' soalen l'jwell-le wen kon ka bli'yi Cristo Jesús'a cho', <sup>6</sup>kwenche yog'le gakle toz we'la'ole Chioza', beena' nak Xa Xancho Jesucristona'.

<sup>7</sup>Daan, li wleb l'jwell-le, ka ben Crístona' blebe' le' bénlene' txen, kwenche koole Chioza' balaan. <sup>8</sup>Na' nia' le', Crístona' bide' kwenche gaklene' neto' beñ' Israel, kon ka bcheb Chioza' lao dii xozxto'nto'ka' kwenche inezinto' chone' kon ka chchebe'. <sup>9</sup>Na' lekzka' bide' kwenche beñ'ka' bi nak beñ' Israel we'la'ogake'ne' daa chiyesh'lallile' legake'. Chak ka na Cho'a Xtill' Chioza' daa na:

Daan, we'lawa li' ladj beñ'ka' bi nak beñ' Israel, na' go! inia' we'lawa li'.

<sup>10</sup>Na' gan yoblə chiznan:

Le' bi nakle beñ' Israel, li yibaleni neto' naknto' yell che'.

<sup>11</sup>Na' lekzka' gan yoblə chiznan:

Yog'le le' bi nakle beñ' Israel, li we'la'o Xancho Chioza'.

Le' lle'le' yog'te yell, li go! inie'.

<sup>12</sup>Na' lekzka' dii Isafaza' bzeje' daa na:

Ka to yag dii chigaa, ka' yiyak xiñ dia che dii Isafána', daa galj to beñ' inabi'e beñ'ka' bi nak beñ' Israel, na' gongake' lez gaklene' legake'.

<sup>13</sup>Chios, beena' noncho lez gone' wen checho, gonshgue' ka yibaile na' soale mbalaz daa nonlilall'lene, kwenche zizikli gonchlene' lez daa zoalen yel' wak che Espíritu Santo che'na' le'.

<sup>14</sup>Le' beñ' bish'dawaa na' le' beñ' zandawaa, nezyenid' le beñ' wen nakle na' le ba chajniile, na' ba chak wzajni l'jwell-le. <sup>15</sup>Na' lee yishi ba biyaxjid' bzej' le' che ba! diika' bi chiya! guetlall'le, la' chaklen Chioza' nad' kwenche <sup>16</sup>chon' xshin Jesucristona' ladj beñ'ka' bi nak beñ' Israel. Na' llinni chon' nakan ka xshin bxož, beena' chjwa' lao Chioza' diika' bibi nda' nchen. La' daa choe'len' legake' dill' wen dill' kob che'na' kwenche gonlilall'gake' Crístona', na' yixis yiyib Espíritu Sántona' yichjlall'do'eka', na' gaggake' lall' na' Chioza', wak inacho nakgake' ka to dii bibi nda' nchen daa chzanid' wi'ane'.

<sup>17</sup>Daa chaklen Cristo Jesús'a nad', chibaid' cho'a dill' chon' xshin Chioza' daa bene' lall' na'. <sup>18</sup>Aga wiyaxjid' wi'a dill' che bichlə dii ba ben', san cho'a dill' ka ba bchin Crístona' nad' kwenche zan beñ'ka' bi nak beñ' Israel chzenaggake' che'. Bchine' diika' wnia' na' diika' ben' <sup>19</sup>kon yel' wak che Espíritu che'na' kwenche gok diika' ben ble'i beñ' na' wyajle'gake'. Wzolož' Jerusalén-na' na' wya' axt doxen gana' mbani Ilíricona' be'len'

yog' beñ' dill' wen dill' kob che Crístona'. <sup>20</sup>Na' ben' byen jtixji'a dill' wen dill' kob che'na' gana' konon' inezin, kwenche bi jachish' jalan' xshin beñ' yoblə.

<sup>21</sup>San kon ka na Cho'a Xtill' Chioza', gana' nan:

Beñ'ka' biñ' gombia'gake' xtilleena', gombia'gake'n, na' beñ'ka' biñ' yengakile' xtilleena', shajni'gakile'n.

<sup>22</sup>Na' ni che llin dga chon' biñ' gak yid' gana' zoale, la'kzi zan shii ba goklallaa yidwia' le'. <sup>23</sup>Per naa ba biyoll ben' xshin Chioza' doxen gani chda', na' chakid' wak yidwia' le', la' kana'te chaklallaa yid'. <sup>24</sup>Cheenid' tia' gana' zoale kat' sha' Espáñana', la' cheenid' ile'id' le', la'ch' shloll, kwenche soacho mbalaz. Na' chbez' gaklenle' nad' kwenche gak kooch' nez. <sup>25</sup>Per naa, yiyaa Jerusalénna' l'jasan' dii chyalji beñ' bish'choka' lle' na'.

<sup>26</sup>La' beñ'ka' choe'la'ogake' Crístona' Macedóniana' na' Acáyani do yichj do lall'gake' ba btogpake' mech dii wsel'gake' che beñ' yesh'do'ka' len ladj beñ'ka' nonlilall' Crístona' Jerusalénna'. <sup>27</sup>Do yichj do lall'gake' chaklall'gake' gaklengake' legake', na' dii li nakan to dii chiya! gongake', la' lengake' ba naki chegake' dii wenka' ba bcheb Chioza' che neto' beñ' Israel, na' chiya! yigoogake' wzon che beñ' Israelka' we'gake' daa chyalj-gakile'.

<sup>28</sup>Na' ka yiyoll l'jasan' mech dga bengake' lo na', na' kwaa nez sha' Espáñana' na' tia' yidwia' le'.

<sup>29</sup>Na' nezid' kat' yidwia' le', dii xen inleeb gaken Crístona' cho'.

<sup>30</sup>Le' beñ' bish' na' le' beñ' zan', daa nonlilall'cho Xancho Jesucristona' na' daa chon Espíritu Sántona' ka chaki l'jwellcho, chat'yoid' le' gakle nad' txen inabgachile Chioza' gaklene' nad' lawi diika' chdi! chllag'.

<sup>31</sup>Li inabi Chioza' yisle' nad' lo na' beñ'ka' bi chonlilall'gake' Crístona', beñ'ka' lle' gana' mbani Judeana', na' lekzka' li inabile' sho'lall' bish' l'jwellchoka' lle' Jerusalénna' dga l'jasan' chegake', <sup>32</sup>kwenche zoa' mbalaz yidwia' le', shi Chioza' gone' latj, na' yiyakshao'lallaa daa soacho txen. <sup>33</sup>Na' Chioza', beena' chon ka zoacho mbalaz, soalenshgue' yog'le. Ka' gakan.

**16** Cheenid' gombia'le beñ' zanchona' le Febe, beena' zoa chaklene' bish' l'jwellchoka' nonlilall' Jesucristona' yell Cencreana'. <sup>2</sup>Daa nonlilallee Xancho Jesucristona', wlebgachlene' do yichj do lall'le kat' yide' gana' zoale, la' kan' chiya! goncho, cho' nakcho lall' na' Chioza'. Na' gakenlene' shi bi dii chyaljile', la' len' ba goklene' zan bish' l'jwellchoka' na' lentia' ba goklene'.

<sup>3</sup>Li wwapgach chiox Priscilana' len beñ' che', Aquilana', beñ'ka' chonlengake' nad' xshin Cristo Jesús'a. <sup>4</sup>Legake' bzoa dii nxoll yel' mban che'ka' kwenche goklengake' nad'. Na' aga to nad'zan nia' choxkengake' bengake' ka', san len yog' beñ'ka' bi nak beñ' Israel, beñ'ka' ba nonlilall' Crístona' to to yell gana' jtixji'a xtilleena'. <sup>5</sup>Na' lekzka' li wwapgach chiox beñ'ka' chdop chllag choe'la'ogake' Crístona' lille'ka'. Na' wwapgachle chiox Epenétona', beena' le chakid', beena' gok beñ' nech beñ' l'jalllee Crístona' gana' mbani Ásiana'. <sup>6</sup>Li wwapgach Maríana' chiox, la' le ba bila! bi-zodile' kwenche goklene' le'. <sup>7</sup>Li wwapgach chiox beñ' wlall' cha'ka' Andróniconna' na' Júniaza', beñ'ka'

wyoolen' t xen lillyana'. Nechgake' benlilall'gake' Crístona' ka nad', na' mbejlaogake' ladj beŋ'ka' chjixjee xtilleena'.

<sup>8</sup> Li wwapgach chiox Ámpliaza'. Le chakidee daa nake' Xancho Jesucrístona' t xen. <sup>9</sup> Li wwapgach chiox Urbánona', beena' chonlene' neto' xshin Cristo Jesúsza', na' Estáquiza', beena' le chakid'. <sup>10</sup> Li wwapgach chiox Apéleza', beena' ba bli'e chakile' Crístona' do yichj do lallee. Na' li wwapgach chiox Aristóbulona' na' beŋ'ka' nake' t xen loo yoo lille'na'. <sup>11</sup> Li wwapgach chiox Herodiónna', beena' nak beŋ' wlall cha'. Na' lekzka' li wwapgach chiox Narcísóna' na' beŋ'ka' nake' t xen loo yoo lille'na', beŋ'ka' nonlilall' Xancho Jesucrístona'. <sup>12</sup> Li wwapgach chiox Trifénana' na' Trifósana', noolka' chon xshin Xancho Jesucrístona'. Na' li wwapgach chiox Pérsidana', beena' le chakicho, la' le ba bilalile' bene' xshin Xanchona'. <sup>13</sup> Li wwapgach chiox Rúfona' beena' le zoacheche' chonlilallee Xancho Jesucrístona', na' lekzka' xneena', beena' chonile' nad' ka xiine'. <sup>14</sup> Li wwapgach chiox Asíncritona', Flegóntena', Hérmeza', Patróbaza', Hérmeza' na' beŋ' bish'choka' na' beŋ' zanchoka' zalen legake'. <sup>15</sup> Li wwapgach chiox Filólogona' na' Júliana', na' Nerewa' len beŋ' zane'na', na' Olímpaza' na' yog' beŋ'ka' zalen legake', beŋ'ka' nak lall' na' Chioza'.

<sup>16</sup> Li wwapgach chiox ljjwell-le lega beŋ' chaki ljjwellin daa nakle Chioza' t xen. Yog' beŋ'ka' nonlilall' Crístona' yellka' gana' ba wya' chwapgake' le' chiox.

<sup>17</sup> Le' beŋ' bish' na' le' beŋ' zan', li wsak' bi wzenagle che beŋ'ka' chon ka chak beŋ' choplə, na' gongake' ka gakklejile che dill' lina' ba nsedle. Bi gonle legake' t xen.

<sup>18</sup> Beŋ'ka' chon ka' aga chongake' ka cheeni Xancho Je-

sucrístona', san chongake' daa nazan chegake'. Na' chole'la'o chole' dill'gake' na' chole'gake' dill' goll-lall' kwenche chonlel chongangakile' beŋ'ka' chajle'daz.

<sup>19</sup> Yog'te beŋ' ba nezgakile' nakle beŋ' wizo dill', na' le chiba chizakid' ka chonle. Na' cheenid' gake beŋ' sin' kwenche gonchle diika' nak wen na' bibi dii mal gonle.

<sup>20</sup> Na' Chioza', beena' chon ka soacho mbalaz, lii wllli-ayi'tie' ye! wak che Satanáza' na' gone' ka wlej wshoshjlen. Xancho Jesucrístona' gaklenshgue' le'.

<sup>21</sup> Timotewi, beeni chonlene' nad' xshin Chioza', chwape' le' chiox na' lekzka' Lúcioni, Jasónni na' Sosí-pateri, beŋ'ki nak beŋ' wlall cha'.

<sup>22</sup> Nad', Tercio, chzej' dga na Pábloni, na' lekzka' chwape' le' chiox daa nakcho Xancho Jesucrístona' t xen.

<sup>23</sup> Na' Gáyoni chwape' le' chiox, beeni non'e lille'ni zoanto', na' lekzka' lille'ni no'en kwenche chdop chllag beŋ'ki chole'la'ogake' Crístona'. Na' Erástoni, beeni ngoo lo nee mech che yelli, chwape' le' chiox, na' lekzka' bish' ljjwellchoni le Cuarto.

<sup>24</sup> Xancho Jesucrístona' gaklenshgue' yog'lo!tele. Kan' gakan.

<sup>25</sup> Chiyal' we'la'ocho Chioza', beena' wak gone' ka soacheche' gonlilall'lene' daa wyajle'le dill' wen dill' kob che'na' daa chyixji'a, daa chzajniin cho' che Jesucrístona'. Nakan daa kono wnezi kani'teyi, <sup>26</sup> per naa, Chios, beena' zoa zejli kani, chaklallee inezichon, na' ba bene' ka chajniicho diika' bzej dii beŋ'ka' wdixjee daa golle' legake' kani'yi kwenche yog' beŋ' lle' doxen yell-lioni shajle'gake'n na' wzenaggake' cheyin.

<sup>27</sup> Toz Chioza' zeelo nake' beŋ' sin'. Na' chiyal' koochone' balaan zejli kani daa bselee Jesucrístona'. Kan' nakan.

# 1 Corintios

1 Nad' Pablo nak' beŋ' gox wŋab Cristo Jesúza' kwençhe gak' postl' che' kon ka chaklall' Chioza'. Nad', len beŋ' bish'cho Sóstenezi, chwapnto' le' chiox. 2 Chzej' le', le' chdop chllagle choe'la'ole Chioza' yell Coríntona', na' nakle lall' nee daa ba nonlilall'le Jesucristona'. Chioza' gox wŋabe' le' kwençhe gake lall' nee len yog' beŋ'ka' choe'la'ogake' Xancho Jesucristona' gattezə, la' Xancho Jesucristona' lekzka' nake' Xangake'. 3 Xacho Chioza' len Xancho Jesucristona' gaklenshgagake' le' na' wzoagake' le' mbalaz. 4 Toshiizi cho'a Chioza' yeŋ' choxken ka wen ba bene' chele daa nonlilall'le Cristo Jesúza'. 5 La' daa ba naklene' txen, Chioza' chaklene' le' kwençhe chak gonle yog' diika' cheenile', ka choe'le xtilleena' na' leyi chajniilen. 6 Na' ka', ba nakbia'cha dii li ba wyajle'le xtil' Crístona' daa be'lennto' le'. 7 Na' daa ba non Chioza' le' daa chak gon to tole, ba chak chonle yog' daa cheenile gonle shlak chbezle yiyed Xancho Jesucristona'. 8 Na' gaklene' le' soaçheçhle gonlilall'lene' axt llana' yiyede', kwençhe bibi xtoŋ'le gat' lawe'na'. 9 Chios, beena' gox wŋab le' kwençhe nakle txen Xiŋe' Jesucristona', beena' nak Xancho, toshiizi chone' ka chçhebe'. 10 Le' beŋ' bish' na' le' beŋ' zan', chat'yoid' le' kon yeŋ' wŋabia' che Xancho Jesucristona', li gak toz lao yog'loŋte na' bi gonzə che chele, san toz ka li se wŋeyi na' li gon toz dill' lao bittezə dii gonle. 11 Nia' ka', le' beŋ' bish'dawaa na' le' beŋ' zandawaa, la' beŋ'ka' lle' lill Cloéna' ba wŋagake' nad' ka chakdiŋ-len ljjwell-le. 12 Nia' ka', daa baŋ-le nale: "Nad' chon' txen Páblona'", na' baŋ-le nale: "Nad' chon' txen Apóloza'." Na' baŋ-le nale: "Nad' chon' txen Céfaza'." † Na' zi baŋ-le nale: "Nad' nak' txen Crístona'." 13 ¿Achakile' Crístona' nake' çhop shoŋ kwenlə? ¿Awa chakile nadaan wit' lee yag cruza' ni chele'? ¿Anti lia'na' bzetjgake' ka wchoale nisa'? Nezkzile bi nakan ka'. 14 Choçken Chioza' ni tole bi bchoa' nisa', lete Crispona' na' Gáyona', 15 kwençhe kono iŋazə daa chone' nad' txenan wchoe' nis. 16 Lekzka' bchoanis' beŋ'ka' lle' loo yoo lill Estéfanaza', na' bi chjadinid' shi nochlə beŋ' yoblə bchoanis'. 17 La' aga bseŋ' Crístona' nad' wchoa' beŋ' nis, san kwençhe çixje'id' legake' dill' wen dill' kob che'nan'. Na' ka chyixji'an, bi chpaa dill'ka' cho'a kwençhe ki gaki beŋ' dill'ka' cho'a nakchan dii zak'chi aga ka daa wit Crístona' lee yag cruza'.

18 Kat' no cho'e dill' che daa wit Crístona' lee yag cruza', beŋ'ka' kwiayi' chakgakile' bizan chon chnan. San cho' yisla Chioza' kwençhe bi kwiayi'cho, neziçho

nakan dill' zakii dii nsa' yeŋ' wak che'na'. 19 La' Cho'a Xtil' Chioza' nan:

Yiŋitloa' yeŋ' sin' che beŋ' sin'ka'.

Na' gonllejid' beŋ'ka' chaki le chajni.

20 ¿Bitgui gak gon beŋ' sin'ka' na' beŋ'ka' le nsed ley che Chioza', na' beŋ'ka' choe' dill' dii chaki beŋ' nakan dill' sin'? La' Chioza' ba bli'e bibi zakii yeŋ' sin' che beŋ' yell-lioni. 21 Lo yeŋ' sin' che'na', ba bene' kwençhe aga yeŋ' sin' che beŋ' yell-lioki gaklenan legake' gom-bia'gake' le'. La' wyazlallee yisle' beŋ' kwençhe bi kwiayi'gake' daa shajle'gake' xtil' Crístona' daa chyixje'i beŋ' legake', la'kzi chaki beŋ' bizan chon chnan.

22 Ka nak beŋ' Israelka', legake' chŋabgake' ile'gakile' yeŋ' wak kwençhe shajle'gake', na' beŋ' griegoka' chiyiljgake' daa chakgakile' nak yeŋ' sin'. 23 San neto' chyixje'into' beŋ' daa wit Crístona' lee yag cruza', na' beŋ' Israelka' chakzbangakile' daa nanto' ka', na' beŋ'ka' bi nak beŋ' Israel chakgakile' biz dill' daa choe'nto'. 24 San cho' ba gox wŋab Chioza' kwençhe nakcho lall' nee, ka neto' naknto' beŋ' Israel na' ka le' nakle beŋ' griego, neziçho Chioza' bli'e yeŋ' wak na' yeŋ' sin' che'na' daa bseŋee Crístona' wite' ni checho. 25 Na' dga ben Chioza' daa chaki beŋ' yell-lioni bizan chon chnan, leyeŋ'lan-nan' nakchan to yeŋ' sin' xench aga ka bittezə yeŋ' sin' che beŋ' yell-lioni. Na' daa chaki beŋ' yell-lioni chli'n bi nap Chioza' yeŋ' wak, leyeŋ'lannan' napchan yeŋ' wak aga ka bittezə yeŋ' wak dii nap beŋ' yell-lioni. 26 Le' beŋ' bish', li se wŋeyi ka nak daa gox wŋab Chioza' le' kwençhe nakle lall' nee la'kzi aga zanle nape yeŋ' sin'na' de yell-lioni, ni aga zanle nakle beŋ' zakii, ni aga zanle goljle lo dia che beŋ' zakii. 27 La' Chioza' ba wleje' beŋ' bi nake' beŋ' sin' yell-lioni kwençhe wsi'e beŋ' sin'ka' yeŋ' zto', na' wleje' beŋ' bibi zakii yell-lioni kwençhe wsi'e beŋ'ka' zakii yeŋ' zto'. 28 Chioza' ba wleje' beŋ' bibi zakii, na' beŋ' choni beŋ' legake' nakzi, na' beŋ'ka' kono nakgake' yell-lioni, kwençhe chli'e bibi zakii yeŋ' zakii daa de yell-lioni. 29 Na' ka', kono gak gon kwinin beŋ' choo beŋ' xen lawe'na'. 30 La' kwinkzen' ba bene' ka gokcho Jesucristona' txen. Na' daa ba nakcho Crístona' txen, Chioza' ba non'e cho' yeŋ' sin' che'na', na' ba biyone' cho' beŋ' li beŋ' shao' lawe'na', na' ba bixis biyibe' yichjlall'do'chona' na' ba bisell bilée cho' lo ni'a na' dii mala'. 31 Na' kon ka na Cho'a Xtil' Chioza': "Shi no cheeni wshalj wshon, chiyal' wshalj wshone' che yog' diika' ba ben Xanchona' che'."

2 Na' le' beŋ' bish' na' le' beŋ' zan', ka bidtixje'id' le' xtil' Chioza', aga bpaa dill'ka' be'len' le', ni bi bçhin' dill' sin' che beŋ' yell-lioni. 2 Kana' wzoa ladjle-na', beŋ' to dii byen be'len' le' toz xtil' Jesucristona' na'

† Céfas: kan' le Pédrona' de dill' arameo, daa gok xtil' Jesúza'.

ka nak daa wite' lee yag cruza', na' bich bi dill' yoblə be'len' le'. <sup>3</sup> Na' ka wzoalen' le', blleb' daa gokid' shi bi gak' wi'a xtill' Jesucristona' ka chiya!'. <sup>4</sup> Na' ka bshaljen' le' na' ka wdxje'id' le' xtill' Crístona', aga bi'a dill' dii chaki beñ' nakan dill' sin' kwenche kooyelaa le' shajle'le. San daa bi'a xtilleena' kon yel' wak che Espíritu che Chiozan' wyajle'le. <sup>5</sup> La' aga goklallaa shajle'le ni che yel' sin' che beñ' yell-lioni, san daa yenile' dill'ka' nsa' yel' wak che Chiozan'.

<sup>6</sup> Dii li de to yel' sin' daa choe'lennto' beñ'ka' ba nakcha nonlilall'gake' Crístona'. Per bi nakan yel' sin' che yell-lioni, ni bi nakan yel' sin' che beñ'ka' chñabia'gake' lo yell-lioni, la' wllin lla te che beñ'ka'. <sup>7</sup> San chzajniinto' le' yel' sin' che Chioza' daa ngash' kani'teyi, daa wlo'e xnezin kana' zi' wxē wsile' yell-lioni. La' kana'te wlo'e xnezin yid Crístona' chixje' xtol'choka' kwenche soacho mbalaz. <sup>8</sup> Ni tlish' beñ' wñabia'ka' zoa yell-lioni bi wyajni'gakile' yel' sin' che Chioza', la' shel'ka' wyajni'gakile'n, bi betgake' Xancho Crístona' lee yag cruza', beena' liizelozu' nak beñ' choo beñ' xen. <sup>9</sup> Per ka na cho'a xtill' Chioza':

Daa konoñ' ile'i na' konoñ' yeni, ni konoñ' sa'lall' shi gakan,  
lennan' wloo Chioza' xnezin gone' che beñ'ka' chak-gakile'ne'.

<sup>10</sup> Na' Chioza' ba bene' kwenche Espíritu che'na' ba bzajniile' cho' cheyi diika'. Na' Espíritu che'na' ñez ñe'ile' yog'lo, na' chajniile' kwaslo' yog' daa nak che Chioza'.

<sup>11</sup> La' cho' beñ' yell-lío shinchozə ñezicho dii yoo loo yichjall'do' kwincho, na' bi ñezicho bi yoo loo yichjall'do' beñ' yoblə. Ka'kzan, toz Espíritu che Chioza' ñez ñe'ile' daa ngoo Chioza' xnezin. <sup>12</sup> Na' cho' aga yel' sin' daa de yell-lionin chchincho, san Chioza' ba beñe' cho' Espíritu che'na' kwenche chajniicho ka nak dii wenna' daa ba noñe' cho'. <sup>13</sup> Na' neto', kat' choe'nto' xtill' Crístona', aga chchinnto' yel' sin'na' de yell-lioniza', san chzajniinto' diika' chzajni Espíritu che Chioza' neto', na' chchinnto' dill' daa chzajniile' neto'.

<sup>14</sup> Na' beena' bi yoo Espíritu che Chioza' loo yichjall'do'ena', bi chajli'e dill' daa chzajni Espíritu che Chioza', daa chakile' bizan chon chnan. Na' bi chajniile'n daa chyaljin'gaklen Espírituna'ne' kwenche shajniile'n. <sup>15</sup> San beena' yoo Espíritu che Chioza' loo yichjall'do'ena' chajniile' che bittezə daa cheeni Chioza' ñezile', na' kono gak bi ñna che'. <sup>16</sup> Cho'a Xtill' Chioza' nan: "Ni to kono ñezi daa cheeni Xancho Chioza' gone', na' ni to kono gak wzajniile'ne' nakan chiya! gone'." San cho' ba yoo Espíritu che Chioza' loo yichjall'do'choni, ba chajniicho daa cheeni Crístona' gone'.

**3** Le' beñ' bish' na' le' beñ' zan', bi gok we'len' le' ka dill'ka' choe'len' beñ'ka' ba nakcha lo xnez Chioza', daa ni chonle ka nazan chele, na' ni nakle ka bi'do' daa biñ' shajni'yen'ile che Crístona'. <sup>2</sup> Na' ka chon beñ' kon bdo' cheenna' cho'eb' nillaa daa biñ' gak gaob' yel' wawa', kan' ben' chele, bi be'len' le' dill' dii nak lallj, la' biñ' gak shajniilen. Na' ni ñaa biñ' shajni'kzilen. <sup>3</sup> Nia'

ka', daa ni chonle daa nazan chele. Daa chakxe'i ljuwell-le, na' chakdi'l-len ljuwell-le, chli'n ni chonle ka nazan chele na' chonle ka beñ' bi nombia' Chioza'. <sup>4</sup> Daa na ba'l-le: "Nad' nak' txen Páblona'", na' zi ba'l-le nale: "Nad' nak' txen Apóloza'", zabi chakbe'ile ka beñ' bi nombia' Chiozan' chonle?

<sup>5</sup> ¿No nak Apóloza'? Na' ¿no nak' nad'? Zeelochoz naknto' wen llin che Xancho Crístona', na' le' bene' ka beñilall'lene' ka be'lennto' le' xtilleena'. To to neto' bennto' kon ka wlo'e xnezin gonnto'. <sup>6</sup> Nad' nak' ka beena' goz daa wdis' xtill' Crístona' ladjlena', na' Apóloza' nake' ka beena' wdil, daa bli' bsdchile' le'. Per Chioza' bene' ka wyajle'le daa bli' bsdinto' le'. <sup>7</sup> Na' aga no nak beena' chaz ni beena' chuil, la' toz Chiozan' chone' ka chgol daa ba byaz. <sup>8</sup> Toz ka zak' beena' chaz na' beena' chuil. Na' Chioza' gone' kwenche to toe' si'e banez kon ka nak llinna' daa bene'. <sup>9</sup> Neto' naknto' txen chonnto' xshin Chioza' ladjlena', na' naknto' ka beñ' goz gooñ che', na' le' nakle ka yell-lío che' gana' chonnto' llinna'. Na' lezkza' nakle ka to yoo che' dii chonnto'.

<sup>10</sup> Chioza' ba goklene' nad' chon' xshine'na' ladjlena', na' daa beñ' ladjlena' nakan ka beñ' wlek to len yoo, na' beñ' yoblə chlise' zeeka'. Na' to to wen llin chiya! wsakee shi chone' llinna' ka chiya! gakan. <sup>11</sup> Na' kono gak wxē sto len yoblin, la' Jesucristonan' zaklebile' len yoonaa' ba chi'. <sup>12</sup> Na' lo len yooni, zoa beñ' wxēile'n or wa plat, wa yaj dii zakii, na' zoa beñ' wxēile'n yagla', wa yeje, wa yix. <sup>13</sup> Na' llinna' daa gon to toe' wli'lawin shi nakan dii zakii. La' kat' illin lla gon Chioza' yel' joschis che beñ' yell-lioni, yi' che'na' wzeyan daa bi zakii, na' gakbia' nak nak llinna' ben to toe'. <sup>14</sup> Na' shi no ben to dii bi shey, na' si'e banez che xshine'na'. <sup>15</sup> Per shi daa bene' sheyan, na' bibi banez si'e cheyin. Na' kayaadia yile' bi kwiayee lo yi'na'.

<sup>16</sup> ¿Abi chakbe'ile nan le' chdop chllagle choe'la'ole Crístona' nakle ka lill xlatj Chioza', na' Espíritu che'na' zoe' ladjlena'? <sup>17</sup> Na' shi no wlliayi' lill xlatje'na', Chioza' wlliaayee beena' gon ka', na' len' nakle ka lill xlatj Chioza' daa nakle lall' nee.

<sup>18</sup> Bi siye' kwinle. Shi nole chakile nakle beñ' sin' daa naple yel' sin' che yell-lioni, chiya! yiyakle ka to beñ' bibi chajni' lao beñ' yell-lioni kwenche Chioza' gone' le' dowalj yel' sin'na'. <sup>19</sup> La' yel' sin' che beñ' yell-lioni aga bi zakaan lao Chioza'. Cho'a Xtill' Chioza' nan: "Chioza' chone' kwenche beñ' sin'ka' chakchixgakile' lo yel' sin' che'ka'." <sup>20</sup> Na' lezkza' nan: "Xancho Chioza' nombi'e yog'lo' daa chza'lall' beñ' yell-lioni, na' ñezile' nakan dii bibi zakii." <sup>21</sup> Daan, ni tole bi chiya! gake beñ' cha'sib daa shi non nakle txen, la' yog' beñ' na' yog' dii de nakan chele kwenche si'le banez cheyin: <sup>22</sup> laa nad' Pablo, laa Apóloza', laa Céfaza', laa yell-lioni, laa yel' mbanna', laa yel' wita', laa daa chak ñaa, laa daa zi' gak. Yog'nto' len yog' diika' nakgakan chele kwenche si'le banez cheyin. <sup>23</sup> Na' le' nakle lall' na' Crístona', na' Crístona' nake' lall' na' Chioza'.

**4** Chiya! gake'ile neto' naknto' wen llin che Crístona', na' nak lo na'nto' chzajniinto' beñ' daa kono



wņezi daa wloo Chioza' xņezin. <sup>2</sup> Na' chonan byen gonnto' kon ka ba none' lall' na'nto' gonnto'. <sup>3</sup> Na' aga bitek wņeyi zia' shi le' wa ļaa xonj beņ' chi'e nad' kwent wņeyi shi chak gon' xshin Chioza' ka chiyaļ'. Ni nad' bi-ga chbi'a kwent wņeyi che kwın' shi chon' ka chiyaļ'. <sup>4</sup> Na' ļa'kzi bibi de dii chao chdian nad', aga ni che ka' bibi dol' cha' de. Toz Xancho Crıstona' neż nļe'ile' shi chon' ka chiyaļ' gon'. <sup>5</sup> Na' daan, bi chiyaļ' sele kwent wņeyi beņ', san ļi kwez axt kat'ka' yila' Xancho Crıstona' na' wli'e lawi daa ngash' ņaa na' daa yoo ļoo yichjall'do' yog' beņ'. Kana'chan gon Chioza' ka sho'cho balaan shi bencho ka cheenile'.

<sup>6</sup> Le' beņ' bish' na' le' beņ' zan', choe'len' le' dill'ki kwenche gak wen chele, na' cho'a dill' che kwın' len xtill' Apóloza' kwenche ineżile ka chonnto' na' wsedle bi tele lawi daa na Cho'a Xtill' Chioza'. Na'ch bi gake beņ' cha'sib na' soazle che baļ beņ' na' gonzile zi baļe' nakzi. <sup>7</sup> ĶAchakile nakchle beņ' zak'chi aga ka beņ' yoblə? Ķa' Chioza' beņe' diika' ba naple. Na' daa beņ Chioza'gakan, ķberaķe chshalj chshonze cheyin ka inacho tobialozlen bililelen?

<sup>8</sup> Le' chakile bich bi chyalljile. Chakile ba nakle ka beņ' wni'a daa non Chioza' diika' gak gon tole. Chakile ba chņabia'lenle Crıstona' na' bich chyalljile neto'. Ķe mba shel' dii ļi ba chņabia'le, kwenche len neto' inabia'lennto' le', shel'ka'. <sup>9</sup> Chakid' Chioza' ba none' kwenche neto' postl naknto' ka beņ' ļiizelozı bibi zakii, na' ka beņ' nchogbia' guet. Na' yog'te beņ' yell-lioki na' len anjlka' chibangakile' chwiagake' ka chak ķhento'. <sup>10</sup> Beņ' zan chakgakile' naknto' beņ' bi nteyi daa chonnto' xshin Crıstona', san le', chon kwınle ka beņ' Ķe chajni daa nonļilall'le Crıstona'. Neto' chakbe'into' bibi chak gonnto', san le' chakile chak gonle bitteża. Chle'shii beņ' le', san neto', chle'zbani beņ' neto'. <sup>11</sup> Axt ņaanlla zoa kat' chbiļ chdonnto', chyallj xalaannto', chsak'zi' beņ' neto', na' aga bi lill xļatjnto' de. <sup>12</sup> Na' chisto yichj chisto lall'nto' chonnto' llin kon ņi'a na'nto'ki kwenche gat' dii yeej gaonto'. Zoa beņ' chyishjgake' bia' blag' ķhento', na' neto' chņablnto' gaklen Chioza' ļegake'. Chķi chsak'gake' neto' na' chzo chzakinto' daa chongakile' neto'. <sup>13</sup> Chiya dii nagake' ķhento', na' neto' choe'lento' ļegake' dill' xochi. Na' chongakile' neto' ka beņ' zeelo bibi zakii, ka to dii ba wchoon beņ'. Axt ņaanlla ni chongakile' neto' ka'.

<sup>14</sup> Aga chzej' dga kwenche wsi'a le' yeļ' zto', san kwenche wzajniid' le', daa chakid' le' ka xiin'. <sup>15</sup> Na' ļa'kzi zoa shi mil beņ' wzajniile' le' che Crıstona', toz beena' nak ka xalen zoa. Ķa' nadaan nak' ka xale daa wlo'a le' lo xņez Cristo Jesúza' ka be'len' le' dill' wen dill' kob che'na'. <sup>16</sup> Daan chat'yoid' le', ļi gon ka chon'.

<sup>17</sup> Na' daan, ba bseļaa Timotewa' gana' zoale. Chakidee ka dowalj xiin' na' chone' xshin Crıstona' ka chiyaļ' gone'. Ķe' yisee lall'le ka nsa' cha' lo xņez Crıstona', na' ka chzajniid' beņ'ka' chdop chllag choe'la'ogake' Crıstona' doxen gana' chda'. <sup>18</sup> Baļ-le ba chep cha'lall'le daa chakile' bich yidwia' le'. <sup>19</sup> Per shi Xanchona' wi'e latj, yob yidwia' le' na' ile'id' shi beņ'ka' chep cha'lall' dii ļi chak gongake' ka nagake' wa shi

chshaljzgaken'. <sup>20</sup> Aga de dill'zan inacho ba chņabia' Chioza' cho', san daa gapcho yeļ' wak che'nan' na'chan gak goncho ka cheenile'. <sup>21</sup> ĶNakra cheenile gon' kat' yidwia' le'? ĶAcheenile gonid' le' zņia?, anti ķwe'len' le' dill' xochi daa Ķe chakid' le'?

**5** Ba benid' dill' nagake' nan len to beņ' ladjlena' zoalene' xņa'zi'ena' ka xoole'. Daa chon beena' nakan to dii zban inleeb; ni beņ'ka' bi nombia' Chioza' bi chongake' ka'. <sup>2</sup> Na' ļa'kzi chak ka' ladjlena', ni chep cha'lall'zle daa chakile ba chonle ka cheeni Chioza'. Chiyaļ'la' gakyeshilen na' yibejle beena' chon ka'. <sup>3</sup> Ķa'kzi ņaa bi zoa' gana' zoale, Ķe chi' yichj' ka nsa' chele. Na' kon ļi gaktezi na'kzan zoalen' le', na' ļi gon ka ba bķhogloa' gak che beena' ben ka'. <sup>4</sup> Na' kat' ndi'a nllagle choe'la'ole Xancho Jesúza', ļi gaktezi na'kzan zoa' ladjlena', na' daa zoalen yeļ' wak che Xancho Jesúza' le', <sup>5</sup> ļi yibej beena' na' ļi gone' lall' na' Satanáza' kwenche shi yiyakbe'ile' na' yiyaj yilenile' na' yile' lo yeļ' zi'na' daa za' llana' wķhoglo Xanchona' che beņ'.

<sup>6</sup> Bi nakan wen chep cha'lall'le. Ba neżkzile dillaa de nan: "Lat'z lewadúrana' chisgolan doxen kwa che yetxti-la'." <sup>7</sup> Dii mal daa ben beena' ladjlena' nakan ka lewadúrana'. Na' ka neto' beņ' Israel bi choe'nto' latj yigaan ni lat' lewadúrana' ļoo yoo lillnto' kat' chal' Ķni Paskwa', ka'kzə le' chiyaļ' kwejle beena' chon zban ladjlena' kwenche gakle ka kwa kob daa bi nķix lewadúrana', kon ka ba nakkzle. Ķa' Crıstona', beena' zaklebi xil'do'na' chitgake' Paskwa', ba wite' ni ķhecho. <sup>8</sup> Na' ka chon beņ'ka' chon Ķni Paskwa' chbejgake' yog'loļ' daa nķix lewadúrana', ka'kzə cho' chiyaļ' soa kwezcho bich goncho saaxyana' na' bi dii mal daa bencho kani'yi, san soacho do yichj do lall'cho shajlencho daa nak dii ļi.

<sup>9</sup> Ba bzejkz' le' to shii wnia' le' bi gonlenle txen beņ'ka' chdalen ļjwellin. <sup>10</sup> Daa wnia' bi chiyaļ' gonle txen beņ'ka' chdalen ļjwellgake', wa chzelall'gake' gat' kwe'gakile' dii de yell-lioni, wa chbangake', wa choe'la'ogake' no yaj yag, aga che beņ'ka' bi nombia' Chiozan' nia' ka', ļa' shel' bi gak lencho ladjle'ka' chiyaļ' ichejtekezcho lo yell-lioni, shel'ka'. <sup>11</sup> San daa wnia' ka' zejin bi gak lencho notteża beņ' ne' nake' cho' txen nonļilall'cho Crıstona' na' chdalene' xiin' xool beņ', wa chzelallile' gat' kwe'ile' dii de yell-lioni, wa choe'la'owe' no yaj yag, wa chbell chņie' che beņ', wa nake' weezo, wa nake' beņ' wban. Yog' beņ'ka' chon ka', ni bi yeej gaolenle ļegake'. <sup>12</sup> Bi nak lall' na'cho kwe'cho kwent wņeyi beņ'ka' bi nonļilall' Crıstona'. San beņ'ka' nakcho txen nonļilall'cho Crıstona', ļegaken' chiyaļ' kwe'cho kwent wņeyi. <sup>13</sup> Chioza' yizi'e kwent beņ'ka' bi nonļilall' Crıstona'. Na' le', ļi yibej beena' chon dii mala' ladjlena'.

**6** Kat' tole de to dii zed chele kon sto beena' nakle txen nonļilall'le Crıstona', bi chiyaļ' shajle lao beņ'ka' bi nonļilall' Crıstona' kwenche gongake' yeļ' josķhis ķhelena', san ļi shaj lao beņ'ka' nak lall' na' Chioza' kwenche gongake' yeļ' josķhis ķhelena'. <sup>2</sup> ĶAbi neżile wllin lla le' nakle lall' na' Chioza' gonle yeļ' josķhis che beņ' yell-lioki? Na' shi len' gonle yeļ' josķhis che'ka', ķekzka' wak gonle yeļ' josķhis che bizə diido'ka'

chak naa. <sup>3</sup> ¿Abi ñezile axt anjlka' goncho yel' josçhis çe'ka'? Na' shi goncho yel' josçhis çe anjlka', ¿abi gak goncho yel' josçhis çe diiki chak naa zoacho yell-lioni? <sup>4</sup> Na' shi le' chakdi-len ljjwell-le ni çe biz diika' chak çehe, ¿beraçe chajzle lao josçhiska' beñ'ka' bi nonlilall'gake' Crístona', beñ'ka' bibi zakii ladjlena'? <sup>5</sup> Nia' le' ka' kwençe yido'latile. ¿Aniga tlish'le bi nteyi kwençe gak gonle yel' josçhis çe beñ'ka' nonlilall'lenle Crístona'? <sup>6</sup> Latjin dii gonlen ladjle na'z, ba zejzle zjtaole xya çe ljjwell-le lao josçhiska' bi nonlilall' Crístona'.

<sup>7</sup> Na' daa chao xya çe ljjwell-le chli'n bi nsa' çehe wen. ¿Biçe ki chonxenlall'le yog' dii choni beñ' le', wa ki chonle ka'z kat' no chzi' chban bi de çehe? <sup>8</sup> Per le'lə, lwaa dii gonle ka', dii zan dii choni ljjwell-le na' chizi' chibantezle çe ljjwell-le.

<sup>9</sup> ¿Abi ñezile beñ'ka' bi chon wen aga willingake' gana' zoa Chioza' chñabi'e? Bi siye'z kwintle, la' ka nak beñ'ka' chdalen ljjwellin, beñ'ka' choe'la'o yaj yagka', beñ'ka' bi chon banez xoolin wa noolka' bi chon banez beñ' çeheyn, beñ' xejka', <sup>10</sup> beñ' wbanka', beñ'ka' chze-lallii gat' kwe'gakile' daa de yell-lioni, beñ' weezoka', beñ'ka' chbell chne çe beñ', wa beñ'ka' chyiylall' nakla si' kwangake' bi de çe beñ', ni to beñ'ka' chon diiki bi yillingake' gana' zoa Chioza' chñabi'e. <sup>11</sup> Na' ba-l-le gokle ka beñ' malki kana'. Per naa Chioza' ba bixis biyibe' le', ba none' le' yell çe', na' ba biyone' le' beñ' li beñ' shao' lawe'na' daa ba nonlilall'le Xancho Jesucristona' na' daa chon Espíritu çe'na' llin lo yel' mban çhelena'.

<sup>12</sup> Dill' de, nan: "De latj goncho bitteza." Lkizan, per aga yog' daa goncho nakan wen. Na' la'kzi de latj goncho bitteza, bi chiyal' we'cho latj inabia'n cho'. <sup>13</sup> Nezi-cho yel' wawa' nakan çe leechoni, na' leechoni none'n kwençe shoon yel' wawa'. Per Chioza' gone' ka te çe çhopte diiki. Na' kwerp çechedoni aga none'n kwençe nottez gat'lencho, san kwençe goncho daa cheeni Xancho Crístona', na' Xanchona' nak lall' nee kwerp çechedoni. <sup>14</sup> Na' ka bisban Chioza' Xancho Jesucristona' ladj beñ' wetka' kon yel' wak çe'na', ka'kzan yisbane' cho' ladj beñ' wetka'.

<sup>15</sup> Ñezile yog'cho nonlilall'cho Crístona' chzaklebi cho tkwen wej kwerp çe'na'. Na' biga chiyal' wçhincho kwerp çechedoni nak ka tkwen wej kwerp çe Crístona' kwençe gat'lencho noolə wdana'. <sup>16</sup> ¿Abi ñezile nottez beñ' gat'lene' to noolə wda, chake'ne' toz? La' Cho'a Xtill' Chioza' nan: "Beñ'ka' çhopte gagake' toz kwerp." <sup>17</sup> Per beena' chon kwine' lall' na' Xancho Crístona', chake'ne' toz daa yoo Espíritu çe'na' loo yichjall'do'ena'.

<sup>18</sup> Bi wçhinle kwerp çhelena' gat'lenzle nottez beñ', li ikwas lao dii mala' nak ka'. La' lënnan' chxinj chlenchan kwerp çechedoni aga ka bichlə dii mal yoblə. Beena' gon to dii mal yoblə, aga bi nonan çe kwerp çe'na', san daa chon beena' chçhin kwerp çe'na' chat'lene' nottez, chxinj chlenan do ka nake'. <sup>19</sup> ¿Abi ñezile kwerp çechedoni nakan lill xlatj Espíritu Sántona', beena' bzoa Chioza' loo yichjall'do'choni? Na' bi gak goncho daa nakan çechedoni; <sup>20</sup> la' Crístona' ba biya'o bizi'e cho' daa blalj xçhene'na' na' wite' ni çechedoni kwençe nakcho

lall' na' Chioza'. Daaan yog' daa gonlen kwerp çechedoni chiyal' gonchon ka sho' Chioza' balaan.

<sup>7</sup> Ka nak diika' wñabile nad' ka bzeile nad', nad' nia' nakan wen shi bi ikaa çe beñ' byona'. <sup>2</sup> Per daa zoale dii nxoll gat'lenle nottez ka chon beñ' yell-lioni, daan to to beñ' byo chiyal' soa nool çe', na' lekzka' to to noolə chiyal' soa beñ' çe'. <sup>3</sup> Na' beñ'ka' nshagna', ka beñ' byo ka nool, bi chiyal' willoni ljjwellgake' kwerp çe'ka'. <sup>4</sup> La' noola' aga nak kwerp çe'na' çe toze', san nakan len çe beñ' çe'na'. Na' ka'kzə beñ' çe'na' bi nak kwerp çe'na' çe toze', san nakan len çe xoolə'na'. <sup>5</sup> Na' daan bi willoni ljjwell-le kwerp çeheleka', per shi çhopte ba be'le dill' bi gat'len ljjwell-le to tiemp kwençe we'llwill-le Chioza', aga bi nonan. Na' tena' chiyal' yiyell ljjwell-le dii yoblə kwençe bi soale dii nxoll gon dii xiwaa le' gan na' we'le cho'a xbayi beli chenna' talente beñ' yoblə.

<sup>6</sup> Nia' le' ka' kwençe ñezile wak wshagna' beñ' byona' na' noola', per bi chonan byen shi bi cheengakile'. <sup>7</sup> Nad' chakid' nakan wen shel'ka' yog' beñ' byo soe' toze' ka zoa' nad', per wde wdeli nak daa non Chioza' gon to tocho.

<sup>8</sup> Na' le' biñ' wshagna'le, na' lekzka' le' ba wit beñ' çeheleka', nia' le' naklan wen soa tozle, ka zoa' nad'.

<sup>9</sup> Per shi bi yizoilen, wenchoklə ikaa çehele kwençe bi sho' shel'lall'le selall'le nool wa beñ' byo daa chonan lallj inabia' kwintle.

<sup>10</sup> Na' le' nshagna'le, nia' le' kon ka non Xancho Crístona' mandad gonle, aga nakan dii nia' nad': Noola' bi chiyal' yilee beñ' çe'na'. <sup>11</sup> Na' shi noola' yilee beñ' çe'na', bi chiyal' yikee beñ' yoblə, san wenlan yiyoe'xene' beñ' çe'na' na' yikeene' dii yoblə. Na' ka'kzə beñ' byona' bi chiyal' yilee xoolə'na'.

<sup>12</sup> Ka le' nshagna'le na' bi nonlilall'le Crístona' çhopte, nia' le' dga, per bi nakan daa nllia Xanchona' bia' gonle: shi to beñ' byo nshagna'lene' to noolə bi nonlilall' Crístona', na' noola' none' lez gaç'she'lene'ne', bi chiyal' yilaa beñ' çe'na' le'. <sup>13</sup> Na' shi to noolə nshagna'lene' to beñ' byo bi nonlilall' Crístona', na' beñ' çe'na' none' lez gaç'she'lene'ne', bi chiyal' yilaa xoolə'na' le'. <sup>14</sup> Beñ' byona', beena' bi nonlilalle Crístona' shi nshagnee to noolə beñ' ba nonlilalleene', Chioza' chle'shiile'ne' ni çe nool çe'na'. Na' noola', beena' bi nonlilalle Crístona', shi nshagnee to beñ' byo beñ' ba nonlilalleene', Chioza' chle'shiilene' ni çe beñ' çe'na'. Shel' bi nakan ka', bi chle'shii Chioza' xi-ine'ka', shel'ka'. San daa nonlilall' togake' Crístona', Chioza' chle'shiile' xiine'ka'. <sup>15</sup> Per shi xoolə'na' wa beñ' çho'na', beena' bi nonlilalle Crístona', bich cheenile' soalene' li', be' latj yiyaje'. Bi chonan byen soayaadialenzo'ne', la' Chioza' ba gox wñabe' cho' kwençe soacho mbalaz. <sup>16</sup> Na' li' nonlilalloo Crístona', bi ñezilo' shi wak gono' kwençe beñ' çho'na' wa xoolə'na' gonlilalle Crístona' na' yile' bi kwiayi'e.

<sup>17</sup> To tocho, ka beñ' nshagna' ka beñ' zoa toze', chiyal' soacho kon ka non Xanchona' çechedoni ka gox wñab Chioza' cho'. Ka'kzə chon' byen gon yog' kwen beñ'ka' chdop chllag choe'la'ogake' Crístona'. <sup>18</sup> Shi nole yoolə

señ daa le circuncisión ka gox wñab Chioza' le', bi gonle ka yinit seña'. Na' shi bi yoole seña' ka gox wñab Chioza' le', bi koo kwinele seña'.<sup>19</sup> Aga bi nonan shi yoocho seña' wa shi bi yoochon, san daa lliallote goncho ka nllia' Chioza' bia'.<sup>20</sup> To tocho chiya! soacho kon ka nakcho ka gox wñab Chioza' cho'.<sup>21</sup> Shi ba nzi' beñ' li' kwenche gono' xshine'na' ka gox wñab Chioza' li', bibi gakilo'. Per shi sho'ilo' xñezin yisane' li', ben to dii byen.<sup>22</sup> La' beena' ndoo chon xshin beñ' ka gox wñab Chioza'ne', Crístona' ba bisell biłeene' lao dii mala'. Na' beena' chon xshinkze' ka gox wñab Chioza' le', ba nak Crístona' Xane' daa ba biya'o bizi'ene' lao dii mala'.<sup>23</sup> Daa wit Crístona' biya'o bizi'e cho' lo ñi'a na' dii mala'. Daan chiya! wzenagchcho che' aga ka che nottez beñ'.<sup>24</sup> Na' le' beñ' bish' na' le' beñ' zan', kon ka zoacho ka gox wñab Chioza' cho', ka'kzan soa kwezcho lawe'na'.

<sup>25</sup> Na' ka le' ni zoale tozle, bi nllia Xancho Crístona' bia' nak gonle, per nad' inia' ka chakid' chiya! gonle. Na' daa ba biyesh'lallii Xanchona' nad', zak'kzi xtil-laana' wzenaglen.<sup>26</sup> Nad' chakid' nakan wen soale kon ka zoale ñaa, la' llaki zoacho nakgakan dii lallj.<sup>27</sup> Shi zoa nool chele bi yilaalene'. Na' shi kono nool chele zoa, bi gonle byen ikaa chele.<sup>28</sup> Shi wshagna'le, bi nakan mal; na' shi to nool wew' wshagna'b' lekzka' aga bi mal nakan. Per dii zan dii zed chen chle'i beñ'ka' nshagna', na' chaklallaa bi gak chele ka'.

<sup>29</sup> Na' le' beñ' bish' na' le' beñ' zan', cheenid' inia' le' dga: Zi' lat'chga latj checho de. Daan, le' nshagna'le, bi we'le latj wsej wllon nool chelena' gonle ka cheeni Chioza'.<sup>30</sup> Na' shi nole zoale nyesh' bi we'le latj wsej wllonan gonle ka cheeni Chioza'. Na' shi nole zoale mbalaz, bi we'le latj wsej wllonan gonle ka cheeni Chioza'. Na' shi nole cha'o chzi'le bittezə, bi we'le latj wsej wllonan gonle ka cheeni Chioza'.<sup>31</sup> Na' shi nole chzi'le banez dii de yell-lioni, bi we'le latj wsej wllonan gonle ka cheeni Chioza'; la' yell-lioni dga nombia'cho nakan dii te cheyin.

<sup>32</sup> Nad' chaklallaa bibi sele wñeyi cheyin, shel'ka'. La' beñ' byona' bi nshagna' chzeche' wñeyi daa nak che Xanchona' kwenche gone' ka yiyoollallee.<sup>33</sup> San beena' nshagna' chzeche' wñeyi cheyi daa de yell-lioni na' nak gone' kwenche yiyoollallii nool che'na' daa chone',<sup>34</sup> na' choplə nak diika' chzie' wñeyi cheyin. Na' nool tona' na' ka'kzə nool wewaa zechgake' wñeyi che daa nak che Xanchona', na' do ka nakgake' chon kwingake' lall' nee kwenche gongake' daa cheenile'. San noola' nshagna' chzeche' wñeyi cheyi daa de yell-lioni na' nak gone' kwenche yiyoollallii beñ' che'na' daa chone'.

<sup>35</sup> Nia' le' ka' aga daa cheenid' wsej wllon' bi gonle, san daa cheenid' gaklen' le' gonle ka chiya!i, kwenche bibi wllonan gon kwinele lall' na' Xancho Crístona' do ka nakle na' gonle ka cheenile'.

<sup>36</sup> Shi to bi' wew' ba nakan ikaab' to nool wew' bi' ba nzag'b', na' chakib' wenan ikaab' leb' daa ba golb', wshagna'chb', aga bi mal chom'.<sup>37</sup> Per shi zoa bi' wew' chakib' bi chonan byen ikaab' noolə na' wzoib' beli chen chebaa kwenche bi wxinj wlem', wenan gom' bi

wshagna'b'.<sup>38</sup> Na' bi'na' wshagna' wenkzan chom', per bi'na' bi wshagna'b' chontechb' wen.

<sup>39</sup> Na' noola' nshagna', chonan byen soalene' toz beñ' che'na', shlak mbane'; per shi guet beñ' che'na', wak yikee beñ' yoblə, kon shi nake' beñ' nonlilall' Xancho Crístona'.<sup>40</sup> Per nad' chakid' wzoache' mbalazch shi bich yikaa che'. Na' dga ba wnia', chakid' Espiritu che Chioza' yoo loo yichjlall'dawa'nin na ka'.

**8** Na' ka nak che yel' wawa' daa chllia beñ' lao lwaa Isak' chios che'ka', yog'cho ñezicho cheyi dga. Per nxoll gakcho beñ' cha'sib daa chakicho le ñezicho. San shi napcho yel' chakina', wzecho wñeyi gaklen ljwell-cho gakchachcho.<sup>2</sup> Na' beena' chaki le ñezile', chiya! gakbe'ile' bi ñezile' ka chiya!.<sup>3</sup> Per beena' le chakile' Chioza', Chioza' nombi'ene'.

<sup>4</sup> Na' ka nak yel' wawa' daa chllia beñ' lao lwaa Isak' chios che'ka', ñezicho lwaa Isak' chios che'ka' bibi zak'gakan, san toz Chiozan' zoa.<sup>5</sup> Dii li de dii zan daa na beñ' nakgakan chios chegake'. Per la'kzi nagake' zoa chios chegake' na' xangake' yabana' wa lo yell-lioni,<sup>6</sup> cho' ñezicho toz Chiozan' zoa, beena' nak Xacho. Len' bxe bsil yog'lo!te dii de, na' zoacho kwenche we'la'ochone'. Na' lekzka' zoa toz beena' nak Xancho, na' len' Jesucristona', beena' bxe bsile' yog'lo!te dii de, na' ni chen' mbancho.

<sup>7</sup> Per aga yog' beñ' ñezgakile' dga. Ba! beñ' wyoologake' be'la'ogake' lwaa Isak' chios che'ka', na' kat' cheej chaogake' yel' wawa' daa ba bllia beñ' lawinka' chakgakile' txenan chonlengake'n. Na' daa bin' gakbe'gakile' bibi zakii diika', chakgakile' malan' chongake' kat' cheej chaogake' yel' wawa'.<sup>8</sup> Per aga ni che daa cheej chaochon ile'shi'chi Chioza' cho' wa gonile' cho' nakzi; la' aga bi chon daa gaochi wa daa bi gaochi.<sup>9</sup> Per cho', la'kzi chakbe'icho aga bi zakii lwaa Isak' chios che'ka' na' ñezicho aga bi nonan shi yeej gaochi diika' bliiagake' lawinka', chiya! wsak'cho kwenche ki wchixcho beena' bin' gakcha lo xñez Chioza' gone' daa chakile' nakan mal.<sup>10</sup> La' shi ñezile aga bi zakii lwaa Isak' chios che'ka' na' cheej chaole gana' choe'la'ogake' legakan, na' ile'i to bish' ljwell-le le', beñ' bin' gakcha lo xñez Chioza', na' nxoll wchogllallee yeej gawe'n, la'kzi chakile' nakan mal.<sup>11</sup> Na' daa chonle daa ñezile bi nakan mal, nxoll wlaale lo xñez Chioza' bish' ljwell-lena' beena' bin' gakcha, beena' lekzka' wit Crístona' ni che'.<sup>12</sup> Na' daa chonle ka gon bish' ljwell-lena' to dii na yichjlall'do'ena' bi chiya! gone', lao Crístona'kzan chxinj chlenle.<sup>13</sup> Daan shi daa cheej chaw' gonan ka wxinj wlen bish' ljwell-laa, naklan wen bichga gaw' be-laa, kwenche bi gon' ka wxinj wlene'.

**9** De Isens gon' daa chakid' nakan wen. Nad' nak' postl che Xancho Jesucristona'. Nad' ble'idee, na' le' ba nonlilall'lene' daa bzajniid' le' xtillena'.<sup>2</sup> Na' la'kzi zoa beñ' bi chajle'gake' nak' postl che Jesucristona', le' ñezile nak' postl che'. Na' daa ba nonlilall'lene' chli'n kan' nakan.

<sup>3</sup> Na' ki chilli'a xtill' beñ'ka' na bi nak' dowalj postl:  
<sup>4</sup> Ñezile wak inabnto' gon beñ' dii yeej gaonto' shel'ka'.  
<sup>5</sup> Na' lekzka' wak ikaanto' to noolə nonlilallee Crístona'

na' wche'nto'ne' gana' gonnto' xshin Chioza', ka chon postlka' sto, na' ben'ka' nak ben' bish' Xancho Crístona', na' lekzka' Céfaža'.<sup>16</sup> ¿Achakile zeelo Bernabéna' len nad' chiyał' gonnto' llinna' kon ni'a na'nto'ki kwenče yeej gaonto'?<sup>7</sup> Aga ga zoa soldad chyixj gaxt che kwine'. Na' biga zoa ben' gaze' yag uvana' na' bi yeeje' daa chbian. Ni biga zoa ben' gape' no shib wa no xil' na' bi yeeje' xill'bka' kat' chsie'n.<sup>8</sup> Bi gakile nad'zan nia' ka', la' lekzka' na' leya' bzej dii Moiséza'.<sup>9</sup> La' leya' nan: "Bi willino' yixja' cho'a goonka' kat' chlej chshoshjgakb trígona'." Na' aga toz che goonkan' ze Chioza' wneyi.<sup>10</sup> San daa zie' wneyi chechon wne' ka'. La' leya' byošan kwenče gaklenan cho'. Ka beena' chwaan goonna', na' ka beena' chonshao' trígona', nongake' lez lengake' ikaagake' daa chizi' chilapgake'.<sup>11</sup> Na' shi neto' naknto' ka ben' goz daa ba bzajniinto' le' cho'a xtill' Chioza', zachakile zi'telan gonnto' inabin-to' le' shi bi chyalljinto'?<sup>12</sup> Shi ben'ka' sto chli' chsedi le' choe'le daa chyallj chchingakile', zalechla neto'?

Per chonnto' banez bibi chnabinto' le' kwenče bibi gombeg wzenagle dill' wen dill' kob che Crístona'.<sup>13</sup> Nezkzile ben'ka' chon llin loo lill xlatj Chioza' cheej chaogake' daa chjwa' ben'ka' lao Chioza'. Na' bxožka' chit bayix'ka' lao Chioza' de Isens gaogake' xpel' bayix'ka' chitgake'.<sup>14</sup> Na' ka'kza Xancho Crístona' bllie' bia' che ben'ka' chyixjee dill' wen dill' kob che'na', lekzan ibangakile'.<sup>15</sup> Per nad' ni tshii biñ' inabid' le' gonle dii chyalljid', ni bi chzej' dga kwenče gonlen. Wenchlan guet' aga ka daa ina ben' cha' chon' xshin Crístona' daa naxjid'. La' chibaid' inia' bibi chchixj' chon' xshine'na'.

<sup>16</sup> Na' nad' bi gak wshalj wshon' daa chyixji'a dill' wen dill' kob che Crístona', la' chonan byen gon' daa none' lall' na'. ¡Na' nyesh'laz gak cha' shi bi wi'a dill' wen dill' kob che'na'!<sup>17</sup> Na' shel'ka' chyixji'an daa goljan loo yichjlall'dawaani, na' chidoł' sia' laxj', shel'ka'. Per aga chyixji'an daa goljan loo yichjlall'dawaanin, san zeelo chon' daa ben Crístona' lall' na' gon'.<sup>18</sup> Na' dgan baneza' chizi'a: daa le chibaid' chyixji'a dill' wen dill' kob che Crístona' na' bibi inabid' ben' wzenague'n, la' bi cheenid' ibanid' dill' wen dill' kob che'na', la'kzi wak gon ka', shel'ka'.

<sup>19</sup> La'kzi kono ben' chnabi'e nad', chon kwin' ka ben' ndoo lla yel lao yog'loł' ben' daa choe'lengakee xtill' Crístona', kwenče shanch ben'ka' gonjlilall'gake'ne'.<sup>20</sup> Kat' zoa' ladj ben' Israelka', ben'ka' nak ben' wlall cha', na' chsa' cha' ka nsa' chegake' kwenče gonjlilall'gake' Crístona'. Na' chon' daa na leya' bzej dii Moiséza' daa nogake' la'kzi neqid' bich chnabi'an nad'.<sup>21</sup> Na' kat' zoa' ladj ben'ka' bi nombia' ley daa bzej dii Moiséza', na' chsa' cha' ka nsa' chegake' kwenče gonjlilall'gake' Crístona'. Per bi inacho chzoa' ka'lə daa nllia Chioza' bia', la' chzenag' che leya' daa bzoa Crístona' loo yichjlall'dawaani.<sup>22</sup> Na' kat' zoa' ladj ben'ka' chaki dii zan dii bi de Isens gongake', na' chsa' cha' ka nsa' chegake' kwenče wzajni'chgakidee che Crístona'. Ba bsa' cha' ka nsa' che yog'loł'gake' kwenče gon' gan

yisla' balgake' na' bi kwiayi'gake'.<sup>23</sup> Chon' yog' diiki kwenče wzenag ben' dill' wen dill' kob che Crístona' na' yizi'lengakee banez cheyin.

<sup>24</sup> Nezkzile ka nak che ben'ka' chxonj, zangake' chxonjgake', per tochokzen' gone' gan na' ikee daa chidolee. Na' ka chon beena' chxonj kwenče gone' gan, kan' chiyał' gonle, li gon ka dii le gonle ka cheeni Chioza' kwenče gone' daa si'le banez.<sup>25</sup> Ben' wyitjka' chsed, chbej yichjgake' daa chzoazi'yaa kwerp che'ka'. Na' chongake' ka' kwenče idol' illongakile' daa yibagakile' xtit shloll na' te cheyin. San cho' choncho to dii byen kwenče idol' illonicho to dii biga llia te cheyin.<sup>26</sup> Daan, nad' bi chon' ka beena' kon chxonj ni bi nezile' gan illine', ni bi chon' ka beena' chdił' na' bi chzakile' kwalle' beena' chdił-lene'.<sup>27</sup> San chnabi'a kwin' kwenče chon' daa chiyał' gon' kwenče ki, ka yiyoll wli' wsedid' ben' nakan chiyał' gone', nad'lə bi sho'lall'zi Chioza' ka nsa' cha'.

**10** Le' ben' bish' na' le' ben' zan', bi cheenid' gal-lall'le daa gok che dii xozxto'choka', yog'gake' wloogake' nez xan beja' daa bze Chioza' na' yog'gake' bidegake' lo neza' bsalje' loo nisdona'.<sup>2</sup> Na' yog'gake' nakgake' ka ben' wchoa nis daa gokgake' dii Moiséza' txe biyajlengake'ne' xan beja' na' daa bidelengake'ne' lo neza' daa byalj loo nisdona'.<sup>3</sup> Na' yog'lołe' wdaogake' toz yel' wao daa be' Chioza' legake'.<sup>4</sup> Na' yog'loł-gake' weejgake' toz nis daa bi'e legake', nisa' daa gol lee yaja', yaja' daa zaklebi Crístona', beena' wzoalene' legake'.<sup>5</sup> La'kzi yog'lołgake' wxi'gake' banez diika', zangake' bi biyoolallii Chioza' ka bengake', na' witgake' gana' bibi chashj chleb.

<sup>6</sup> Na' yog' diika' gok chegake' chzajniin cho' bi chiyał' selall'cho goncho dii mala' ka bengake'.<sup>7</sup> Bi chiyał' we'la'ole diika' non ben' lwaa Isak' chios che'ka' ka ben balgake', la' Cho'a Xtill' Chioza' nan: "Wche'gake' weej wdaogake' na' biyolla' bengake' kon daa nazan che beli chen che'ka'."<sup>8</sup> Na' bi chiyał' gat'lencho nottez ben', ka ben balgake', na' daa bengake' ka', shllaz wit shonicho milgake'.<sup>9</sup> Na' bi chiyał' wzoacho Chioza' gone' daa nazan checho, ka ben balgake', na' daa bengake' ka' wdinyaa belka' legake' na' witgake'.<sup>10</sup> Ni bibi gon inazle che Chioza' ka ben balgake' na' ni cheyin bselee anjl che'na' beena' bete' legake'.

<sup>11</sup> Na' yog' diiki gok chegake' nakan to dii chzajni cho' bi goncho ka bengake', na' lliagakan lee Cho'a Xtill' Chioza' kwenče chsi'nin cho' mbancho llaki zee-lo.<sup>12</sup> Daan, nottezcho shi chakicho zoaghechcho nonjlilall'cho Crístona', chiyał' wsak'cho kwenče bi ibixcho goncho dii mala'.<sup>13</sup> Yog' dii malka' chdił' chllagle nakgakan ka diika' chdił' chllag nottez ben'. Na' wak wxenilall'le Chioza' gaklene' le', la' len' bi wi'e latj idil' il-lagle daa bi so sakile, san kat' idil' illaglen, lekzen' gaklene' le' kwenče so sakile yichejle lawinna'.

<sup>14</sup> Daan, le' ben' bish'dawaa na' le' ben' zandawaa, bi we'la'ole diika' non ben' lwaa Isak' chios che'ka'.<sup>15</sup> Chshaljlen' le' ba nteile, na' kwinkzle gakbe'ile shi dga chzajniid' le' nakan shji.<sup>16</sup> Kat' chisa'lall'cho daa wit Crístona' ni checho, na' cheejcho lat' wej vinona'

na' choe'cho Chioza' yel' choxken, zejin nakcho Crístona' txen daa blalj xchene'na' ni checho. Na' kat' chx-oxjcho yetxtila' na' chaochon, zejin nakchone' txen daa bzani kwerp che'na' wite' ni checho. <sup>17</sup> Na' la'kzi nakcho ben' zan, toz yetxtilan' chaocho, na' zejin nakcho ka toz kwerp.

<sup>18</sup> Na' li wwia ka chon ben' Israelka'. Yog' ben'ka' chaogake' xpel' bayix'ka' chitgake' lao Chioza' nakgake' toz choe'la'ogake'ne'. <sup>19</sup> Na' bi gakile nia' lwaasak' daa non ben' chios che'ka' nakgakan dii zakii, ni bi gakile' bel' che bayix'ka' chitgake' lawinka' zak'chgakan ka bittezə bel'. <sup>20</sup> San ki zejin daa nia' ka': kat' ben'ka' bi nonlilall'gake' Chioza' chitgake' bayix'ka' chlliagake'n lao lwaasak' chios che'ka', dii xiw'ka'lan choe'gake'n, na' aga Chiozan'. Na' bi cheenid' we'la'olenle legake' dii xiw'ka'. <sup>21</sup> Bi gak yeej gaochoda cheej chaocho kat' chisa'lall'cho daa wit Xancho Crístona', na' lekzka' yeej gaotezcho daa cheej chao ben'ka' choe'la'o dii xiw'ka'. <sup>22</sup> Bi chiyal' wshaacho Chioza', la' aga wzo wzakichone'.

<sup>23</sup> Dez dill', nagake': "Wak goncho bittez dii cheenicho." Dii likzan, per aga yog' daa gak goncho nakan wen. La'kzi de latj goncho bittezə, aga yog' daa goncho gaklanan bish' ljwellchoka' gakchachgake' lao Chioza'. <sup>24</sup> Ni tocho bi chiyal' goncho ka gak wen che tozcho, san chiyal' gaklenen ben' yoblə kwenche gak wen che'.

<sup>25</sup> Bittezə bel' dii chit'gake' lao yaana' wakə si'len. Na' bi inable shi nakan dii bliagake' lao lwaasak' chios che'ka' kwenche bi gakchoplall'le cheyin. <sup>26</sup> La' doxen yell-lioni na' yog'te daa de lawinna' nakan che Xancho Chioza'.

<sup>27</sup> Shi to ben' bi nonlilallee Crístona' chaxe' le' ljttaole lille'na', na' cheenile' shajle, li yeej li gao daa gone', na' bi inabile' shi nakan dii bliie' lao lwaasak' chios che'na' kwenche bi gakchoplall'le cheyin. <sup>28</sup> San shi no ina le': "Beli nakan dii wllia lao lwaasak' chios cha'ka'", na' bi gaolen ni che beena' wna le' ka'. La' beena' wna ka' wakte gakile' malan chonle shi gaolen. <sup>29</sup> Bi gakile nia' malan gonle gaolen, san nia' ka' ni che beena' gakile' malan chonle shi gaolen.

La'kzi nezid' aga bi nonan gaw' bittezə, bi cheenid' gon' ka sa'lall' ben' yoblə nan malan' chon'. <sup>30</sup> Na' shi cho'a Chioza' yel' choxken cheyi daa gaw', zberache inaz ben' malan chon' daa chaw' to dii ba bi'a Chioza' yel' choxken cheyin? <sup>31</sup> Na' bittezə dii chonle, shi cheej chaole wa shi bichlə dii yoblə chonle, chiyal' gonlen ka sho' Chioza' balaan. <sup>32</sup> Bi gonle ka ixop ben' yoblə gone' to dii mal, laa nake' ben' Israel, laa bi nake' ben' Israel, laa nake' ben' nakcho txen nonlilall'cho Chioza'. <sup>33</sup> Li gon ka nad', la' chon' to dii byen toshiizi chon' ka yiyoollalii yog' ben'. Aga chon' kwenche to nad'zə gak wen cha', san chon' ka gak wen che ben' yoblə kwenche yilagake' bi kwiayi'gake'.

**11** Li wsa' to chele ka nsa' cha', la' nad' nsa' cha' ka bsa' che Crístona'.

<sup>2</sup> Le wen chonle daa toshiizi chjadinile nad' na' ni zellenle diika' bli' bsedid' le'. <sup>3</sup> Per cheenid' shajniile dga:

Chioza' chnabi'e Crístona', na' Crístona' chnabi'e yog'lol ben' byo, na' ben' byoka' chnabi'a'gake' nool che'ka'.

<sup>4</sup> Na' nottezə ben' byo shi nkwash' yichje'na' shlak choe'lwille' Chioza' wa shlak chyixji'e daa che' Chioza'ne', bi chgwee Crístona' balaan. <sup>5</sup> San shi nottez nool bi kwash' yichje'na' shlak choe'lwille' Chioza' wa shlak chyixji'e daa che' Chioza'ne', na' chnite' balaan che ben' che'na'. Na' shi ka' chone', na' nake' ka to noolə ben' nshib axt lo yej. <sup>6</sup> Na' shi to noolə bi kwash' yichje'na', wenlan wshibteguen' axt lo yej. Na' shi chido'ile' wshiben', chiyal' kwashen. <sup>7</sup> Na' ben' byona' bi chiyal' kwash' yichje'na' daa nake' lwaasak' Chioza' na' chli'e balaan che'na'. Na' noola' chli'e balaan che ben' che'na'. <sup>8</sup> La' aga kwit lee noolan' wlej Chioza' ben' byona', san noolan' wleje'ne' kwit lee ben' byona'. <sup>9</sup> Na' ni bi bxie' ben' byona' kwenche gaklene' noola', san bxie' noola' kwenche gaklene' ben' byona'. <sup>10</sup> Ni cheyi daan, na' ni che anjika' len ladjchoka', chiyal' kwash' yichje'ka' kwenche nakbia' chapgake' balaan ben' che'ka'. <sup>11</sup> Per cho' nakcho Xancho Crístona' txen, nezicho noolka' chyaljgakile' cho' ben' byo, na' cho' ben' byo chyaljicho noolka'. <sup>12</sup> La' ka nak daa bchej noola' kwit lee ben' byona', lekzka' ben' byona', noolan' chzane' le'; per Chiozan' bxe bsile' yog'lol.

<sup>13</sup> Na' le'zə, li wwiakachi shi nakan wen we'llill noolka' Chioza' gal' yichjzgabe'. <sup>14</sup> Kon ka yoolocho choncho, chakbe'icho nakan yel' zto' we'z ben' byona' latj igol yish' yichje'na'. <sup>15</sup> San nakan wen we' noola' latj igol yish' yichje'na' na' nakan to balaan che'. La' Chioza' none'n kwenche kwasha'n yichje'na'. <sup>16</sup> Na' shi nole bi chazlall'le dga ba wnia', chiyal' inezile ka neto' na' ka yog' kwen ben'ka' chdop chllag choe'la'ogake' Chioza', toz ka yoolonto' chonnto'.

<sup>17</sup> Na' ka nak dga inia' le', bi gak inia' le' wen chonle. La' kat' chdop chllagle choe'la'ole Chioza' lwaayin dii nan gaklanan le', chzoazi'yaalan le'. <sup>18</sup> Zigaate cheenid' inia' le' daa ba benid' nagake' chele nan kat' chdop chllagle choe'la'ole Chioza' nonzə che chel-le. Na' chajli'a dii liljakz ka chonlen. <sup>19</sup> Na' chakljayile chiyal' gakle chop shon kwenlə kwenche wli'lawin nolen chazlalli Chioza' ka chonle. <sup>20</sup> Na' kat' chdop chllagle na' cheej chaolen ljwell-le txen kwenche chisa'lall'le daa wit Xancho Jesucristona', bi chonlen ka bliie' bia'. <sup>21</sup> La' kat' yeej gaole, bi chbez ljwell-le kwenche yeej gaole txen, san to tole lii cheej chaotele yel' wao cheleka'. Na' bal-le bibi de gaole na' zi bal-le axt chzollile. <sup>22</sup> zAbi zoa lill-le ga yeej gaole? zBerache chonzile nakzi ben'ka' nakcho txen choe'la'ocho Chioza' na' chsi'zle yel' zto' ben'ka' bibi de yeej gaogake'? zBitgui iniale, lla? zAchakile inia' le' le' wen chonle? Bi inia' le' ka', la' aga wenan chonle.

(Mt. 26:26-29; Mr. 14:22-25; Lc. 22:14-20)

<sup>23</sup> Dga ba bli' bsedid' le' nakan daa bli' bsemi Xancho Jesucristona' nad'. Lle'na' ben Júda'ne' lo na' ben' mal-ka', Xancho Jesús'a' bexee yetxtila', <sup>24</sup> na' biyoll bi'e Chioza' yel' choxken, na'ch bxoxje'n na' chi'e: "Dgan kwerp cha'ni daa chzanid' ni chele. Li gox' lat' wejan gaolen. Li gon dga kwenche ljjadinile nad'." <sup>25</sup> Na' lekz-

ka' biyoll wdaogake' xshe'na', bexee kopa' daa yoll vinona', na' chi'e: "Dga yollə loo kopi zejın xchen'na' daa laljä daa gon ka gakli dii koba' bçheb Chioza' gone'. Li gon dga, na' to to ka yeejlen li ljadini nad'." <sup>26</sup> Na' to to ka gaole yetxtila' na' yeejle vinona' axt llana' yiyed Xancho Crístona' zejın chyixje'ile beñ' ka nak daa wite' ni checho.

<sup>27</sup> Nottezə beñ' gawe' yetxtila' wa yeeje' vinona' daa chonan ka ljadinicho Xanchona', na' bi chape' balaan ka nak daa chone', toz ka nak xtoleena' ka che beñ'ka' betgake' Xanchona' na' blaljgake' xchene'na'. <sup>28</sup> Daan, to tocho chiyal' yiya yiyilj kwincho kat' zi' gaocho yetxtila' na' kat' zi' yeejcho vinona'. <sup>29</sup> La' Chioza' wsak'zi'e nottez beñ' kontele yeej gawe'n na' bi gone'n ka kwee Xancho Crístona' balaan daa bzani kwerp che'na' ni checho. <sup>30</sup> Daan, zanle bi shao'le wa zoazi'yaale, na' bal beñ'ka' nakle txen da witgake'. <sup>31</sup> Per shi yiya yiyilj kwincho, Xancho Chioza' bi wsak'zi'e cho'. <sup>32</sup> Na' shi chsak'zi'e cho', chone'n kwenche yigooshilall'cho na' bi wlliyai'lene' cho' beñ'ka' bi nonlilall'gake'ne'.

<sup>33</sup> Na' le' beñ' bish' na' le' beñ' zan', kat' chdop chllagle kwenche yeej gaole, li kwez ljwell-le. <sup>34</sup> Na' shi nole chbil' chdonle, chiyal' yeej gaole loo yoo lill-le kwenche bi gonle ka gonan byen tele yel' zak'zi' daa bi chonle wen kat' chdop chllagle. Dech diika' cheenid' wzajniid' le', na' kwaa xnezin kat' yidwia' le'.

**12** Le' beñ' bish' na' le' beñ' zan', cheenid' inezile che diika' non Espiritu che Chioza' gak gon to tocho.

<sup>2</sup> Nezkzile kana' bin' gonlilall'le Xancho Jesús'a', ben-tezle txen beñ'ka' choe'la'o lwaa lsak' chioska' diika' ni bi chak ine. <sup>3</sup> Daan, cheenid' inezile ni to beñ' bi ine': "Aga bi zakii Jesús'a'" shi zoalen Espiritu che Chioza' le'. Na' lekzka' ni to beñ' bi gak ine': "Jesús'a' nake' Xancho" shi bi zoalen Espiritu Santo che Chioza' le'.

<sup>4</sup> Wde wdeli daa chon Espiritu che Chioza' to tocho, per lekzen' chone' yog'tegakan. <sup>5</sup> Wde wdeli nak xshin Xancho Crístona' goncho, per toze' len' nak Xancho. <sup>6</sup> Na' wde wdeli nak daa none' lall' na'cho gon to tocho, per toz Chiozan' chaklene' cho' kwenche chak chonchon. <sup>7</sup> Chioza' chli'e zoalen Espiritu che'na' cho' daa none' to tocho diika' chak choncho kwenche chaklennan yog'cho. <sup>8</sup> Na' ba bene' kwenche Espiritu che'na' chaklene' balcho choe'lencho beñ' dill' kon yel' sin' che'na', na' zi balcho, chone' ka chajniicho daa nak che Chios na' chak chzajniichon beñ' yoblə. <sup>9</sup> Na' zi balcho, chon Espiritu che'na' ka chajle'chacho gone' daa inabichone'; na' zi balcho, chone' ka gak yiyoncho beñ'.

<sup>10</sup> Na' zi balcho, chçhine' kwenche choncho yel' wak; zi balcho, chone' ka chak chyixje'cho daa na Chioza' cho'; zi balcho, chone' ka chakbe'icho shi dillaa choe' beñ' dii li nakan che Chioza' wa shi nakan che dii xiwaa. Zi balcho, chone' ka chak chnecho wde wdeli dill' dii bi nsedcho; na' zi balcho, chone' ka chak chizajniicho bin wna beena' chne dillaa. <sup>11</sup> Na' toz Espiritu che Chioza' chgwee xnezin goncho yog' diika', na' le' chgone' daa gon to tocho.

<sup>12</sup> Na' ka kwerp chechona' nakan toz la'kzi zan diika' ndil nllagan, ka'kzə cho' nonlilall'cho Crístona' nakchone' toz la'kzi nakcho beñ' zan. <sup>13</sup> Na' yog'lojcho cho', ka beñ' Israel, ka beñ' griego, ka beñ' ndoo lla yel chone' xshin beñ', na' ka beñ' chon xshinkze', Espiritu che Chioza' ba bene' kwenche nakcho ka toz kwerp. Na' toz len' yo'e loo yichjall'do' to tocho.

<sup>14</sup> Na' ka nak kwerp chechona', zan diika' ndil nllagan. <sup>15</sup> Na' shi ni'achona' inan: "Daa bi nak' neena', bi ndil nllag' kwerpa'." La'kzi shi inan ka', ndil nllagkzan kwerpa'. <sup>16</sup> Na' shi nagchona' inan: "Daa bi nak' jalawe'na', bi ndil nllag' kwerpa'." La'kzi shi inan ka', ndil nllagkzan kwerpa'. <sup>17</sup> Na' shel'ka' doxen kwerp chechona' nakan jalaocho, çnakra goncho kwenche yenicho? Na' shi doxen kwerp chechona' nakan nagcho, çnakra goncho kwenche ila'icho? <sup>18</sup> Na' Chioza' bzo'e to to diika' ndil nllag kwerp chechona' kon gana' chakile' nakan wen soa to ton. <sup>19</sup> La' shel' toz ka nak yog'te daa ndil nllagan, bi nakan to kwerp shel'ka'. <sup>20</sup> Na' la'kzi zan diika' ndil nllaggakan kwerp chechona', tozkz kwerpan nakan.

<sup>21</sup> Na' jalaochoka' bi gak ye'gakan na'choka': "Bi chyaljgid' le'." Ni bi gak ye' yichjchona' ni'achoka': "Bi chyaljgid' le'." <sup>22</sup> Na' diika' ndil nllag kwerp chechona' daa chakicho bi nakan wal, leləgakannan' lliialote.

<sup>23</sup> Na' diika' ndil nllag kwerp chechona' daa chakicho bitek bi zaka'n, leləgakannan' chapshiicho. Na' diika' bi cheenicho ile'i beñ' chkwashi'chon xachona'. <sup>24</sup> Na' diika' ndil nllag kwerp chechona' na' bi chonan ka yiyii yido'icho ile'i beñ' legakan, bi chonan byen kw-wash'chon. Na' ka' ben Chioza' kwerp chechona' kwenche nkwash'cho diika' chonan ka yiyii yido'icho ile'i beñ' legakan. <sup>25</sup> Na' yog' diika' ndil nllag kwerpa' chaklen ljwellin daa nakgakan toz. <sup>26</sup> Daan shi gayi kwerp chechona' chey chla, doxen kwerpa' bi shao'. Na' shi gayi kwerp chechona' chonichon wen, doxenan chibayi.

<sup>27</sup> Na' le' nakle ka kwerp che Crístona' daa naklene' toz, na' to tole nakle ka tkwen wej kwerp che'na'. <sup>28</sup> Na' ladjchona', cho' chdop chllagcho choe'la'ocho Crístona', Chioza' lliialote bzo'e neto' naknto' postl, na'ch bzo'e beñ' chyixji'e daa chi'ene', na' de wyonji bzo'e beñ' wli' wsedile' beñ' cho'a xtilleena'. Na'ch bzo'e beñ' wli'e yel' wak che'na', na' beñ' yiyone' beñ', na' beñ' gaklen bish' ljwellchoka', na' beñ' chgoo xnezin che xshine'na', na' beñ' chne wde wdeli dill' dii bi nsede'.

<sup>29</sup> Nezicho aga yog'cho nakcho postl. Aga yog'cho chak chixje'cho daa na Chioza' cho'. Aga yog'cho chak wli' wsedicho cho'a xtilleena'. Na' aga yog'cho chak goncho yel' wak. <sup>30</sup> Aga yog'cho chak yiyoncho beñ'. Aga yog'cho chak inecho wde wdeli dill' dii bi nsedcho. Na' aga yog'cho chak yizajniicho bi zeji dill'ka'. <sup>31</sup> Na' le', li selall' gaklen Espiritu che Chioza' le' kwenche gak gonle diika' zak'chi.

Na' naa wsedid' le' to dii lliialaotech.

**13** Shi nad' chak' wde wdeli dill' dii chne beñ' yell-li-oni na' axt len xtill' anjlka' chak', per bi chakid' beñ', aga bi zjanayin chak' diika', na' nak' ka to dii nak

de ya dii chon dane wa ka platiy dii chon sshag. <sup>2</sup> Na' la'kzi shi chak chixji'a daa na Chioza' nad', na' nezid' yog'loj daa nak che Chioza' axt daa kochnon' inezi, na' la'kzi shi le chajli'a che Chioza' axt chon' ka illa' xishna' yaaka', shi bi chakid' ben', aga bi zjanayin chak gon' di-ika'. <sup>3</sup> Na' la'kzi shi wi'a ben' yesh'do'ka' yog' dii de cha', wa izanid' kwerp cha'ni kwenche wzeygake'n, shi bi chakid' ben', aga bi gaklenan nad' lao Chioza'.

<sup>4</sup> Shi chakicho ben', gapcho yel' chxenlall' chegake', gonicho legake' wen, bi gaxe'icho legake', bi wshalj wshoncho lawe'ka', bi gakocho ben' cha'siba, <sup>5</sup> bi goni-chogake' zban, bi chijl'cho daa nak to banez chezcho, bi gakocho zgaal' zyl, ni bi koolall'cho. <sup>6</sup> Ni bi yibaicho kat' no chon mal, san yibaicho kat' no chon wen. <sup>7</sup> Shi chakicho ben', bi goncho dii choo dii xen bittez dii chonile' cho', na' bi sa'lall'cho mal che', san toshiizi goncho lez gone' wen, na' so sakicho bittez.

<sup>8</sup> Yel' chakina' aga wiyoll widon. San ka nak daa chyixjee ben' daa che' Chioza'ne', na' daa ine ben' wde wdeli dill' dii bi nsede', wllin lla bich iyalljan, na' ni bich bi iyalljicho inezicho. <sup>9</sup> La' lat'chga daa nezicho naa, na' lat'chga daa na Chioza' cho' kwenche chyixje'ichon ben', <sup>10</sup> per kat' illin lla Chioza' gone' ka gombia'chone' kwasloj, na' te cheyi diika' chzajniin cho' lat' wej naa.

<sup>11</sup> Kana' nak' bi'do', bshalj' lega bi'do', ben' pensar ka bi'do', na' wyajniid' lega bi'do'. Per ka bgol' bich bsa' cha' ka che bi'do'. <sup>12</sup> Ka'kzan chak checho kon daa nak che Chioza' naa. Nakcho ka to ben' chwia to lo wan dii bi nla'yen'. Per wllin lla kat' ile'yen'ichone' ka chle'i cho'alaio ljwellcho. Bin' gombia'yen'cho Chioza' naa, per wllin lla kat' gombia'chone' kwasloj ka nombi'e cho'. <sup>13</sup> Na' naa diiki shonə nakgakan dii lliarote goncho: gonjilall'cho Chioza', gonchone' lez, na' gapcho yel' chakina'. Na' daa lliarote lawi diiki shon, lennan' yel' chakina'.

**14** Li gon byen gakile' bish' ljwell-leka' na' lekzka' li selall' gon Espiritu che Chioza' le' to dii gak gonle, na' daa lliaroch selall'le gone' ka gak chixje'le daa ina Chioza' le'. <sup>2</sup> La' beena' chne dill' daa kono chajni, Chiozan' chshaljlene', aga ben' yell-lionin. La' Espiritu che Chiozan' chone' ka cho'e dill' daa kono chajni. <sup>3</sup> San beena' chyixjee daa che' Chioza' le', chone' ka gakchach ben' lao Chioza', na' chtipe' lall'gake' na' chiyonxenlallee legake'. <sup>4</sup> Beena' chne dill' daa kono chajni, to le'zen' chaklenan, san beena' chyixjee daa che' Chioza'ne' chaklene' yog' ben'ka' chdop chllag choe'la'ogake' Crístona' kwenche gakchagake' lo xneze'na'.

<sup>5</sup> Nad' cheenid' shel'ka' yog'loj-le gak inele dill'ka' daa kono chajni, per wibachid' shel'ka' gak chixje'le daa ina Chioza' le'. La' dii zak'chi daa chyixjee ben' daa na Chioza' aga ka daa inie' dill' daa kono chajni, lete shi yizajniile' ben'ka' bin zeji dill'ka' chnie' kwenche gakchachgake' lao Chioza'. <sup>6</sup> Na' le' ben' bish' na' le' ben' zan', shi nad' yidwia' le' na' inia' dill' daa kono chajni, bi gaklenan le'. Lete waklenan le' shi wzajniid' le' to dii ba bli' bseidi Chioza' nad', wa to dii chiyal' inezile

che', wa chixje'id' le' bi ine' nad', wa wli' wsedid' le' cho'a xtilleena'.

<sup>7</sup> Kachaka' bllaja' wa no dii lli kwerd cheyin, kono shajni bin chkwelgake' shi bi chllaa shiinka'. <sup>8</sup> Na' kat' chak to wdil, shi beena' chkwel clarinna' bi kwelle'n kwasloj, aga no idop illag kwenche shajgake' lo wdila'. <sup>9</sup> Na' ka'kzan chak chele, shi inele dill' daa bi chajni ben', nakra gone' shajniile' bin nale. Na' bibi zakii dill'ka' chnele shi naa. <sup>10</sup> Nezicho zan kwen xtil' ben' de yell-lioni na' to togakan chajni ben'ka' chnegake'n. <sup>11</sup> Na' shi bi chajniid' dillaa we'len to ben' nad', nak' ka ben' zit' par le', na' lekzka' le' nake' ka ben' zit' par nad'. <sup>12</sup> Na' daa ba chzelall'le gon Espiritu che Chioza' daa gak gonle, li gon ka dii le inable daa gaklenan bish' ljwell-leka' chdop chllag choe'la'ogake' Crístona' kwenche gakchachgake' lawe'na'.

<sup>13</sup> Daan, beena' chne dill' daa kono chajni, chiyal' ina-bile' Chioza' gaklene'ne' kwenche gak yizajniile' ben' bin zeji dillaa chnie'. <sup>14</sup> La' shi chshaljlen' Chioza' dill' daa bi chajniid', yichjall'dawaani nezin chshaljlen' Chioza', per bi chajniid' bin chepee. <sup>15</sup> Beran chiyal' gon', lla? Chiyal' we'llwill' Chioza' kon dill' daa na Espiritu che'na', na' lekzka' we'llwillee kon dill' daa chajniid'. Na' lekzka' chiyal' gol' kon dill' daa na Espiritu che'na', na' gol' kon dill' daa chajniid'. <sup>16</sup> La' shi we'la'ole Chioza' kon dill' daa kono chajni, la'kzi nakan che Espiritu che Chioza', ben'ka' yengakile' dill'ka' chnele aga gongake' le' txen we'le yel' choxken Chioza' la' bi chajni'gakile' bin nale. <sup>17</sup> La'kzi choe'le Chioza' yel' choxken do yichj do lall'le, bi chaklenan ben' yoblə daa bi chajni'gakile' bin nale. <sup>18</sup> Cho'a Chioza' yel' choxken daa chnech' dill' daa kono chajni aga ka yog'tele. <sup>19</sup> Per kat' ndop nllagcho choe'la'ocho Chioza' txen, wenchlan inia' gay'zə dill' daa chajniicho kwenche wzajniid' ben' yoblə, aga ka daa inia' ga shi mil dill' daa kono chajni.

<sup>20</sup> Na' le' ben' bish' na' le' ben' zan', bi gonze pensar ka bi'do' bin' shajni, san li gon pensar ka ben' golə, ben' ba chajni. Per ka nak che dii mala', li gak ka to bi'do' bin' sho' yichjin dii mala'. <sup>21</sup> Cho'a Xtil' Chioza' nan: "Wchin' ben' zit', ben' chne dill' yoblə, kwenche wzajniid' ben' Israelki, per ni ka' bi wzenaggake' cha', na Xancho Chioza'." <sup>22</sup> Daan, kat' chnecho dill' daa kono chajni chonan kwenche ben'ka' bi chonji-lall'gake' Chioza' gakbe'gakile' zoalene' cho' per bibi chzajniin cho' ba nonjilall'chone'. San daa chixje'cho daa na Chioza' cho', chaklenan cho' ba nonjilall'chone' per bi chaklenan ben'ka' bi chonjilall'gake'ne'. <sup>23</sup> Na' kat'ka' ndop nllagle choe'la'ole Crístona', shi yog'zle choe'le dill' daa kono chajni, na' sho' ben' bi chajniile' bin chonle wa ben' bin' gonjilall' Crístona', wak gakile' bi nza'n chelenan'. <sup>24</sup> San shi yog'le chyixje'le daa na Chioza' le', na' sho' to ben' bin' gonjilall' Crístona' wa to ben' bi chajni bin chonle, na' yiyakbe'ile' nake' ben' saaxya na' yiyaj yilenile' dii malka' chone' ka yenile' dill'ka' chyixje'le. <sup>25</sup> Na'ch gonan ka wli'lawi daa yoo loo yichjall'do'ena', na' wchek' xibe' we'lawe Chioza', na' gakbe'ile' dii jicha Chioza' zoalene' le'.

<sup>26</sup> Na' le' beṅ' bish' na' le' beṅ' zan', kat' chdop chllagle de latj kwenḅe baḷ-le goḷ-le dii koon Chioza' bal-aan, na' zi baḷ-le wli' wsedile, zi baḷ-le ḅixje'le daa na Chioza' le', na' zi' baḷ-le iṅele dill' daa kono chajonii, na' zi baḷ-le yizajniile dillaa kono chajonii. Yog' diiki chiyal' wḅhinlen kwenḅe gaklenan soaḅeḅhle lo xṅez Chioza'. <sup>27</sup> Na' kat' iṅele dill' daa kono chajonii, ḅhopzle wa shonḅle iṅelen, na' yizoayile iṅele, na' chiyal' soa to beṅ' yizajniile' bin wnale. <sup>28</sup> Na' shi kono zoa beṅ' chak yizajniile' bin iṅale, bi chiyal' iṅelen gana' ndop nllagle choe'la'ole Crístona', san wak iṅelenlen Chioza' de loo yichjilall'do'lena'zə. <sup>29</sup> Na' lekzka' ḅhop shonḅlen ḅixje'le daa na Chioza' le', na' yizoayile iṅele. Na' beṅ'ka' chzenag, chiyal' wzenagyeṅ'gake' shi dii li nakan daa na Chioza'. <sup>30</sup> Shi shlak to beṅ' chyixji'e dillaa daa che' Chioza'ne', na' iṅe Chioza' sto beṅ' chi'e ladjlena', chiyal' kwez beena' chṅe kwenḅe ḅixjee beena' sto daa che' Chioza'ne'. <sup>31</sup> To tole yizoayile ḅixje'le daa na Chioza' kwenḅe yog'le shajni'chile diika' na Chioza' na wtipch lall'le. <sup>32</sup> Na' beena' chyixjee daa che' Chioza'ne' chiyal' iṅabia' kwine' kwenḅe wi'e latj iṅe beṅ' yoblə, shi ṅaa. <sup>33</sup> La' Chioza' cheenile' gonle xochi yog' daa chonle kat' choe'la'olene' na' bi gonle kon daa nazan ḅhele.

Ka yoolo beṅ'ka' choe'la'o Crístona' yog'te gana' chdop chllaggake', <sup>34</sup> noolka' chiyal' soagake' llizə gana' chdop chllagle, la' bi de lsens iṅegake'. San chiyal' wḅhek' yichj wḅhek' laogake' lao beṅ'ka' chṅabia' legake', kon ka na ley daa bzej dii Moiséza'. <sup>35</sup> Na' shi de daa cheengakile' iṅezgakile', chiyal' iṅab-gakile' beṅ' ḅhe'ka' loo yoo lillgake', la' bi nakan wen iṅegake' kat' ndop nllagle.

<sup>36</sup> Bi gakile zigaate ladjlenan' golj wxe cho'a xtil' Chioza', ni bi gakile le'chgan ba bleblen. <sup>37</sup> Shi nole chakile nakle beṅ' chyixjee daa na Chioza', wa chakile Espíritu ḅhe Chioza' chzajniile' le', chiyal' gakbe'ile dga chzej' le' nakan dii chon Xancho Crístona' mandad. <sup>38</sup> Na' shi no bi chzenag ḅheyi dga chzej' le', lekzka' kono wzenag ḅhe'.

<sup>39</sup> Na' le' beṅ' bish'dawaa na' le' beṅ' zandawaa, li se-lall' gak ḅixjeele daa na Chioza' le', na' bi wllonle iṅe beṅ' dill' daa kono chajonii. <sup>40</sup> Per bittezə dii gonle, li gonan kon ka chiyali na' xochi li gonan.

**15** Na' le' beṅ' bish' na' le' beṅ' zan', cheenid' yisaa lall'le dill' wen dill' koba' wdixje'id' le' daa ba bleble na' zoaḅeḅhle chajle'le ḅheyin. <sup>2</sup> La' lannan' yislan le' kwenḅe bi kwiayi'le shi toshiizi soaḅeḅhle shajle'le daa ba wdixje'id' le'. Na' shi bi soaḅeḅhle toshiizi aga bi zjanayin daa nale ba wyajle'le ḅheyin.

<sup>3</sup> Bli' bsedid' le' dga bzajni Chioza' nad' daa nakan dii lliyalote: nan Crístona' wite' ni ḅhecho daa nakcho beṅ' saaxya, kon ka na Cho'a Xtill' Chioza'. <sup>4</sup> Na' bkwash'gake'ne' na' biyoṅ lla bibane' ladj beṅ' wetka', kon ka na Cho'a Xtill' Chioza'. <sup>5</sup> Na' bli'lawe' Céfaza', † na'tech bli'lawe' postlka' sto. <sup>6</sup> Na'tech bli'lawe' wdeli gay' guioa beṅ' bish'choka' na' beṅ' zanchoka' nonli-lall'gake'ne'. Na' zan beṅ'ka' ni mban lla ṅaanlla, na'

† Céfaz: kan' le Pédrona' de dill' arameo, daa gok xtill' Jesúsua'.

baḷgake' ba wit. <sup>7</sup> Na'tech bli'lawe' Jacóbona', na' wde-na' bli'lawe' yog' postlka'.

<sup>8</sup> Na' zeeloteyi bli'lawe' nad', la'kzi nak' beṅ' bibi zakii. <sup>9</sup> Nad' nak' liizelozu beṅ' bibi zakii ladj beṅ'ka' wlej Crístona' gongake' xshine'na', na' bi chidoḷaa iṅa beṅ' nad' "postl", daa bsak'zi'a beṅ'ka' chonli-lall'gake'ne'. <sup>10</sup> Per daa nak Chioza' beṅ' chiyesh'lallii, wleje' nad' wi'a xtil' Crístona'. Na' daa biyeshlallile' nad' bi gokdadzan, la' ba bench' xshine'na' aga ka yog' postlka' sto. Per aga tobia'lozan' beṅ'na', san len' ba goklene' nad' kwenḅe beṅ'na'. <sup>11</sup> Na' la'kzi nad' wa postlka' sto choe'lennto' beṅ' xtilleena', toz ka dill' choe'nto', na' lannan' ba wyajle'le.

<sup>12</sup> Na' daa chyixje'nto' biban Crístona' ladj beṅ' wetka', ḅberaḅhe nazə baḷ-le bi yiban beṅ' wetka'? <sup>13</sup> La' shel' bi yiban beṅ' wetka', lekzka' aga biban Crístona' shel'ka'. <sup>14</sup> Na' shel' Crístona' bi bibane' ladj beṅ' wetka', aga bi zakii daa chyixje'nto' cho'a xtilleena', ni aga bi zakii daa nonli-lall'lene', shel'ka'. <sup>15</sup> Na' shel' bi yiban beṅ' wetka', aga dill' li ḅhe Chiozan' be'lennto' le' daa wnanto' Chioza' bisbane' Crístona' ladj beṅ' wetka', shel'ka'. <sup>16</sup> La' shel' bi yiban beṅ' wetka', aga biban Crístona', shel'ka'. <sup>17</sup> Na' shel' Crístona' bi bibane' ladj beṅ' wetka', aga bi zjanayin nonli-lall'lene', na' ni napkzle dol' ḅhe saaxya ḅheleka', shel'ka'. <sup>18</sup> Na' shel' nakan ka', beṅ'ka' beṅ'li-lall'gake' Crístona' na' ba witgake', wliayi'chokzgaken', shel'ka'. <sup>19</sup> Na' shel' to lo yell-lionizan noncho lez gaklen Crístona' cho', nyesh'lazch nakan ḅhecho aga ka ḅhe yog' beṅ' yoblə, shel'ka'.

<sup>20</sup> Per dii li Crístona' bibane' ladj beṅ' wetka', na' daa bibane' neche' ladj beṅ' wetka' zaklebile' dii necha' chizi' chilap beṅ'. <sup>21</sup> Daa bxinj bḷen toz beṅ', wyoo yel' wita' yell-lioni, na' lekzka' toz beṅ' bxie' daa yiban beṅ' wetka'. <sup>22</sup> Ka chet yog' beṅ' ni ḅhe daa bxinj bḷen dii Adánna', ka'kzan yiban beena' nak Crístona' txen.

<sup>23</sup> Per to to beṅ' yibane' ladj beṅ' wetka' kat' illin llana' nllia Chioza' bia' yibangake'. Zigaate Crístona' bibane' ladj beṅ' wetka', na' kat' yiyed Crístona', lekzka' yiban yog' beṅ'ka' nak lall' nee. <sup>24</sup> Na' te ḅhe yell-lioni kat'ka' wliayi' Crístona' yog'loḷ yel' wak na' yel' wṅabia' yoblə, na' yiyo'e yel' wṅabia' ḅhe'na' Xacho Chioza'. <sup>25</sup> La' Crístonan' chiyal' iṅabi'e axt ki yiyoll yido wzoe' xṅi'ena' yog' beṅ'ka' chakzi' chakzbani le' na' yog' dii xiw'ka'.

<sup>26</sup> Na' yiyollin, wliayee yel' wita'. <sup>27</sup> Cho'a xtil' Chioza' nan Chioza' bzoe' xṅi'a Crístona' yog'loḷte dii de. Na' daa nan yog'loḷte zoa xṅi'a Crístona', aga len Chiozan' zoe' xṅi'ena', la' len' bzoe' xṅi'a Crístona' yog'loḷte dii de. <sup>28</sup> Na' kat'ka' yog'loḷte dii de ba zoan xṅi'a Crístona', na'ch kwin Crístona', beena' nak Xiiṅ Chioza', wzexj yichje' lao Chioza', beena' bzoe' yog'te dii de xṅi'ena'. Na'ch gakbia' nan Chioza' nake' liizelozu beṅ' zakii lao yog'loḷte dii de.

<sup>29</sup> Na' chiznia' sto, ḅbera zezin daa chchoa baḷ beṅ' nisa' lwa' beṅ' wetka'? Shi chakgakile' bi yiban beṅ' wetka', ḅberaḅhe chchoazgake' nisa' lwaagake'?

<sup>30</sup> Na' shel'ka' bi yiban beṅ' wetka' ḅberaḅhe zoaznto' dii nxoll gak dii gak ḅhento' do lla do yel'? <sup>31</sup> Dii li, le' beṅ' bish' na' le' beṅ' zan', yog' lla zoa' dii nxoll guet'.



Na' lekzka' dii l'icha le chiba chizakid' chele daa ba nonlilall'le Xancho Jesucristona'. <sup>32</sup> Yell Éfesona' wdiilen' beñ'ka' nak ka ba znia nllleb, ¿beratgui gon' gan wdiil-lengakee shel'ka' bi yiban beñ' wetka'? Gonchokljacho ka dilaa de daa na: "Yeej gaotezcho la' wetcho wxe willj."

<sup>33</sup> Bi we'le latj no siye' le'. La' dill' de, nan: "Shi goncho txen beñ' malka' na' solo goncho ka chongake'." <sup>34</sup> Li yiyeeñi kwasloj na' bich gonle dii mala', la' bal-le ni bi nombia'le Chioza'. Nia' le' ka' kwenche yido'latile.

<sup>35</sup> Wnalja bal-le: "¿Nakra gak yiban beñ' wetka'? Na' ¿Nakra yiyak kwerp che'ka'?" <sup>36</sup> Shi ka' nale, nakle ka beñ' bi nteyi. Kat' chazcho biñna', bi chila' yagdo'na' shi bi chbiayi' biñna'. <sup>37</sup> Kat' chazcho, aga yagdo'nan' chazcho, san biñ cheyinnan' chazcho, na' chila' yagdo'na'. Na' kan' chak che bittezä dii chazcho, shi no trigo wa bichlä. <sup>38</sup> Na' Chioza' chgwee xnez xlatjin chakan ka cheenile', na' to to biñ chak xyaguinna' kon ka chiya'gak che to ton. <sup>39</sup> Aga toz ka nak kwerpka'. Nlla'lä nak kwerp che benecha' len che bayix'ka'. Na' nlla'lä nak che baka' chzo xan yabana' na' che belka' lle' loo nisa'.

<sup>40</sup> Lekzka' nak cheyi diika' lle' xan yabana' na' diika' chle'icho lo yell-lioni. Nlla'lä yel' xochi cheyi diika' chle'icho xan yabana' len yel' xochi cheyi diiki chle'icho lo yell-lioni. <sup>41</sup> Nlla'lä yel' chey cheeni' che wbillä' len che beo'do'na' na' len che beljka'. Na' ladj beljdo'ka' nlla'lä nak yel' chey cheeni' che to togakan. <sup>42</sup> Na' ka'kzan gak che beñ'ka' yiban ladj beñ' wetka'. Kwerpa' daa chgash' loo bana' nakan dii gooll' iteb, san kwerp daa yiyas kat' yibancho ladj beñ' wetka' bi nakan dii gooll' iteb. <sup>43</sup> Kwerpa' daa chgash' loo bana' nakan dii bichbi zakii, san daa yiyas ladj beñ' wetka' gakan to dii zakii nllleb. Kwerpa' daa chgash' loo bana' nak ban'zan, san daa yiyas ladj beñ' wetka' gakchechan. <sup>44</sup> Kwerpa' daa chgash' loo bana' nakan de beli chenzä dii chon llin yell-lioni, san kwerp daa yiyas ladj beñ' wetka' gakan to dii kob daa gon Chioza'. Na' daa nezicho kwerp chechoni nakan de beli chenzä, lekzka' chiya' inezicho wat' to kwerp kob checho daa gon Chioza'.

<sup>45</sup> Cho'a Xtill' Chioza' nan: "Adánna', beena' gok beñ' nech, goke' to beñ' yaa beñ' ban." Na' lekzka' Crístona' goke' beñ' yell-lío, per le' chone' yel' mban zejli kanj. <sup>46</sup> Zigaate chbanlencho kwerp de beli chenni, na'techlan ibanlencho dii koba' daa gon Chioza'. <sup>47</sup> Beñ' necha' ben Chioza' de bishte yo, goke' beñ' yell-lío. Na' beñ' wchopina', beena' nak Xancho, len' wzee yabana'.

<sup>48</sup> Kwerp chechona' nakan ka kwerp che beñ' necha' bxe bsil Chioza' de bishte yona'. Na' ka nak kwerp che Crístona', beena' zoa yabana' naa, ka'kzan yiyak kwerp chechona' kwenche lljazoacho yabana'. <sup>49</sup> Naa nakcho ka beena' ben Chioza' de bishte yo, na' wllin lla yiyakcho ka Crístona', beena' zoa yabana'.

<sup>50</sup> Na' le' beñ' bish' na' le' beñ' zan', cheenid' inia' le': Aga wak yillinlencho kwerp de beli chenni gana' zoa Chioza' chñabi'e. Na' kwerpi dga gooll' iteb bi gak gonan txen kwerp daa bi gooll' iteb. <sup>51</sup> Ni inia' le' to dii kono wnezi: aga yog'cho guetcho, per yog'cho yiyakcho nlla'lä. <sup>52</sup> Tokonganzi, to ka chshod' chxa'z jalao-

choki, kat' kwell trompet che Chioza', yiyakcho nlla'lä. La' ka kwell trompeta', beñ' wetka' yibangake' kon to kwerp dii bi gooll' iteb. Na' cho' ni mbancho, lekzka' yilla' kwerp chechoki. <sup>53</sup> La' kwerp chechoni dga gooll' iteb, yiyakan to dii bi gooll' iteb. Na' beli chen chechoni dga ile'i yel' wita', yiyakan to dii bichga guet. <sup>54</sup> Kat'ka' kwerp chechoni dga gooll' iteb ba biyakan to dii bi gooll' iteb, na' beli chen chechoni dga ile'i yel' wita' ba biyakan to dii bichga guet, na' gak ka na Cho'a Xtill' Chioza' daa na: "Xanchona' ba bene' gan bsol bñite' yel' wita' toshiizi." <sup>55</sup> Na' lekzka' nan: "Yel' wit, li' chsi chchogo' yel' mban che beñ', ¿gan yel' wak cho'na' naa?" <sup>56</sup> Daa bi choncho diika' bllia Chioza' bia' goncho chli'n nakcho beñ' saaxya, na' daa nakcho beñ' saaxya, yel' wita' napan yel' wak kwenche wsol wñitan cho'. <sup>57</sup> Per choxken Chioza' bselee Xancho Jesucristona' ni checho kwenche bi saki yel' wita' si' ikaan cho' zejli kanj.

<sup>58</sup> Daan, le' beñ' bish'dawaa na' le' beñ' zandawaa, li soachech lo xnez Chioza' toshiizi. Na' zizikli li gon xshin Xancho Jesucristona', la' nezckzile xshine'na' aga nakan to llin dii chondadzle.

**16** Na' ka nak mech daa wtope daa we'le beñ'ka' nak lall' na' Chioza', li gon ka ben' mandad gon beñ'ka' chdop chllag choe'la'ogake' Crístona' to to yell daa lla gana' mbani Galácia'na'. <sup>2</sup> Yog' lla nech che xmanka', to tole chiya' kwejle lat' wej daa benle gan lo xmanna' na' kooshao'len kwenche bibi wtope kat' yid'. <sup>3</sup> Na' kat' yid' gana' zoale, wselaa beñ'ka' kwejle lljwa'gake' Jerusalénna' mecha' daa btope, na' wgox'gakee yish daa wzej' kwenche beñ' Jerusalénka' wlebgake' legake'. <sup>4</sup> Na' shi chonan byen shaa, na' sha'len' legake'.

<sup>5</sup> Chonan byen tia' gana' mbani Macedóniana', na' ka tia', yidwia' le'. <sup>6</sup> Na' waklja yigaanlen' le' shloll wa soalen' le' axt ka yiyollch te dii zaga'. Na' kat' yigwaa nez yiyaa gan yoblä wak gaklenle nad' gonle daa iyallj ichinid'. <sup>7</sup> Aga shlollzan cheenid' yidwia' le', san non lez yigaanlen' le' ssha, shi Xancho Chioza' wi'e latj. <sup>8</sup> Na' naa cheenid' yigaana' yell Éfesoni axt ka gal' lni Pentecostéza', <sup>9</sup> la' beñ' zan lle' ni, beñ' cheeni wzenag xtill' Jesucristona', la'kzi beñ' zan chllaagake' daa choe'len' beñ' xtilleena'.

<sup>10</sup> Na' shi ba za' Timotewa' gana' zoale, li gonile wen, la' lekzka' lene' chone' xshin Xancho Jesucristona' ka chon' nad'. <sup>11</sup> Na' ni tole bi gonilene' nakzi, san li gaklene' yigwee neza' mbalaz kwenche yidwie' nad', la' chbeztia'ne' kon beñ' bish'choka' sto.

<sup>12</sup> Na' ka nak beñ' bish'cho Apólozi, le got'yoidee yidlene' beñ' bish'choki yidwiagake' le', per bi goonile' yide' naa, per widkze' kat' gat' latj che'na'.

<sup>13</sup> Li se kwas na' li soachech gonlilall'chle Crístona'. Li gakcha lo xneze'na' na' bi illeble. <sup>14</sup> Na' bittezä dii gonle, li gonan lega beñ' chaki lljwellin.

<sup>15</sup> Na' le' beñ' bish' na' le' beñ' zan', nezile beñ'ka' lle' lill Estéfánazi gokgake' beñ' nech beñ' benlilall'gake' Crístona' gana' mbani Acáyana', na' zoatekzgake' chli' chsedgakile' beñ'ka' nak lall' na' Chioza'. <sup>16</sup> Chat'yoid'

le', li wzenaggach che beṅ'ka' chon ka legake', na' li wzenag che yog' beṅ'ka' chaklen chongake' xshin Chioza'. <sup>17</sup> Le chibaid' daa ba bid Estéfanazi len Fortunátoni na' Acaíconi gani zoa', la' daa zoalengake' nad' ni, bich chakyeshid' daa biṅ' gak yidwia' le'. <sup>18</sup> Ba biyongake' nad' to yel' chxenlall' ka daa chongake' le'. Ka beṅ'ki na' ka beṅ'ka' chon ka legake', chidol'gake' gaple legake' balaan.

<sup>19</sup> Beṅ'ki chdop chllag choe'la'ogake' Crístona' to to yell gani mbani Ásiani chwappake' le' chiox. Na' Aquílani len Priscílani, len beṅ'ka' chdop chllag lille'ka' chwappake' le' chiox do yichj do lall'gake' daa nakle

Xancho Crístona' txen. <sup>20</sup> Na' yog' beṅ' bish'choka' lle' ni chwappake' le' chiox. Na' li wwap ljwell-le chiox lega beṅ' chaki ljwellin daa nakle lall' na' Chioza'.

<sup>21</sup> Nad', Pablo, kwin' chzej' † gani chwap' le' chiox.

<sup>22</sup> Nottezə beṅ' bi chakile' Xancho Jesucrístona', wsak'zi'shga Chioza'ne'. ¡Bidagach Xan'!

<sup>23</sup> Xancho Jesucrístona' soalenshgue' le' na' gaklenshgue' le'. <sup>24</sup> Le chakid' yog'le daa nakcho Jesucrístona' txen.

---

† Kwin' chzej': Páblona' bchine' beṅ' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

## 2 Corintios

**1** Nad' Pablo nak' postl che Jesucristona' kon ka chaklall' Chioza', na' len beṅ' bish'cho Timotewi chwapnto' le' chiox, le' chdop chllagle choe'la'ole Chioza' yell Coríntona'. Na' lekzka' chwapnto' chiox yog'loḷ bish' l'jwellchoka' lle' gana' mbani Acáyana', beṅ'ka' nak lall' na' Chioza'. <sup>2</sup> Na' chṅabinto' Xacho Chioza' len Xancho Jesucristona' gaklenshgagake' le' na' wzoagake' le' mbalaz.

<sup>3</sup> Chiyaḷ' we'la'ocho Chioza', Xa Xancho Jesucristona', la' len' Xachona', beena' chiyesh'lallile' cho' na' chiyonxenlallee cho' lao bitteza' dii chak checho. <sup>4</sup> Chiyonxenlallee cho' lao yog'loḷ diika' chzak'zi'cho kwenche ka chone' checho, ka'kzan goncho yiyonxenlall'cho beṅ' yoblə kat' chzak'zi'gake'. <sup>5</sup> Daa lennto' chzak'zi'nto' ka wxak'zi' Crístona', Chioza' chtipche' lall'nto' daa nonnto' Crístona' txen. <sup>6</sup> Na' shi neto' chzak'zi'nto', chak chento' ka' kwenche gondiplall'chle na' yilale bi kwiayi'le. Na' shi Chioza' chtipe' lall'nto', chone' ka' kwenche lekzka' le' gondiplall'le na' so sakile' ka yel' zak'zi'ki chen chle'into'. <sup>7</sup> Nonyen'nto' lez bi gakchoplall'le lao diika' chen chle'ile, la' nezinto' daa lenle chtil-le yel' zak'zi'ka', lekzka' lenle wtip Chioza' lall'le.

<sup>8</sup> Le' beṅ' bish' na' le' beṅ' zan', cheeninto' inezile' ka'k'tek dii lalljka' btiḷnto' gana' mbani Ásiana'. Gokan to dii lallj wal dii bich nan so sakinto', na' bich bennto' lez yel' mbanna'. <sup>9</sup> Goktekzinto' ni bllin lla guetnto' naa. Gok chento' ka' kwenche gokbe'into' bi gak wxenilall' kwinnto', san chiyaḷ' wxenilall'nto' Chioza', beena' chisban beṅ' wetka'. <sup>10</sup> Na' Chioza' bisle' neto' na' wislachkze' neto' lao dii nxollka' nsa' yel' wit. Na' nxenilall'nto'ne' toshiizi wislachkze' neto' <sup>11</sup> shi gakenle inabilene' gaklene' neto'. Na' shi beṅ' zan inabe' chento', lekzka' beṅ' zan we'gake' Chioza' yel' choxken kat' ba goklene' neto'.

<sup>12</sup> De to dii chakyiblennto': daa nezyen'into' do yichj do lallnto' nsa' chento' wen ladj beṅ' yell-lioni, ka chazlall' Chioza', na' chonnto' to dii byen chonchnto' wen ladjlena'. Na' aga yel' sin' che beṅ' yell-lionin chaklenen neto' chonnto' ka', san Chiozan' chaklene' neto'. <sup>13</sup> Diiki chzejnto' le' nakan dii shajniile ka wlablen. La'kzi naa biṅ' shajni'yen'ile bi che nsa' chento' ka', chbez' illin lla shajniilen kwasloḷ, kwenche kat'ka' yila' Xancho Jesús'a, yibaile' daa nonle neto' txen, ka chibainto' nonto' le' txen.

<sup>15</sup> Daa nxenlallaa wyajniile dga na' wleble nad', goklallaa tegaxj' yidwia' le', la' gokid' le yiba yizakile yidwia' le' chop shii. <sup>16</sup> Gokid' tia' wwia' le' ka shaa Macedóniana', na' yidia' wwia' le' sto shii ka zizaa. Na' zak gokenle nad' kwenche yigwaa nez yiyaa Judeana', shel'

gokan. <sup>17</sup> Bi gakile aga do yichj do lallaan wnia' yidwia' le'. ¿Anti chakile chon' ka chon notteza' beṅ' yell-lioki chongake' to "wak" to "bi gakə"? <sup>18</sup> Chioza' nez nle'ile' biga chonnto' to "wak" to "bi gakə" laolena'. <sup>19</sup> Nad' Pablo, len Timotewi na' Silvánoni be'nto' ladjlena' cho'a xtill' Cristo Jesús'a, beena' nak Xiṅ Chioza'. Na' Jesucristona' ba bli'e toshiizi chon Chioza' kon ka ba wne' gone'. <sup>20</sup> Na' ni che Crístona' chak yog'loḷ dii chcheb Chioza', na' nacho "kan' nakan" kwenche chgoocho Chioza' balaan. <sup>21</sup> Na' Chioza'kzan chone' kwenche soatip soashoshcho gonḷilall'cho Crístona', ka chone' chento' na' ka chone' chele. Na' wleje' cho' kwenche nakcho lall' nee, <sup>22</sup> na' Espíritu Santo che'na' nake' ka to sey daa ba ngweene' loo yichjall'do'chona' kwenche chakliyicho ba nakcho xiṅe', na' kwenche nezicho wllin lla gone' yog' dii wenna' daa ba bchebe' gone'.

<sup>23</sup> Chioza' nezile' biṅ' yid' Coríntona' yidwia' le' daa chap' yel' chxenlall' chele, na' bi cheenid' wsheshlen' le'. <sup>24</sup> Aga cheeninto' gonnto' byen kon daa inaznton' gonle daa nakle Crístona' txen, la' ba zoachegchkze nonḷilall'lene'. San cheenlinto' gakennto' le' kwenche gapchle yel' chiba chizakina'.

**2** Daan, bchoglallaa bi bidwia' le' kwenche bi yidzoaz' le' nyesh' sto shii. <sup>2</sup> ¿Nora gon ka yiba yizakid' shi ba bidyenyesh'zid' le'? <sup>3</sup> Na' bzejchoklə le' daa bi goklallid' yid' na' gonyeshile nad', la' cheenlid' gonle ka yiba yizakid'. Na' nxenlallaa lenle yiba yizaklenile nad'. <sup>4</sup> Bzej' le' daa wzechga' wneyi nllab na' gokyesh'chgaid' ax̄t wchellchga'. Na' aga bzeja'n kwenche gonyeshid' le' san kwenche inezile le chakid' len'.

<sup>5</sup> Na' beena' benyeshile' nad', aga toz nadaan benile' ka', san lenkzlen benyeshile' lat'. Nia' "lat'", kwenche bi inia' zi'tegala ben beena' checho. <sup>6</sup> Yel' zak'zi'na' daa ba benle che' ba gokkza' to ka't'. <sup>7</sup> Na' naa chiyaḷ' yizi'xenle che' na' gakenlene' kwenche ki gakshejlallee lo yel' chakyeshii che'na'. <sup>8</sup> Daan, chat'yoid' le', li wli' ni chakkzilene'. <sup>9</sup> Ba bzejjk' le' kana' che ka nak dga kwenche wli'shkilaole shi leile gonle yog'te diika' nia' le'. <sup>10</sup> Na' beena' yizi'xenle che', lekzka' nad' wizi'xenkz' che'. Na' shi de dii yiyakxen che', Crístona' nezile' wizi'xenkz' che' beena' ni chele, <sup>11</sup> kwenche bi we'cho cho'a xbayi Satanáza'. La' nezckicho ka nak yel' wxiye' cheyinna'.

<sup>12</sup> Ka billin' yell Troaza' kwenche wi'a dill' wen dill' kob che Crístona', got'chga latj cha' kwenche gon' llin che Xanchona', shel'ka'. <sup>13</sup> Per daa bi billag' beṅ' bish'cho Títona', na'ch gokshejlall'chga'. Daan, bilaa beṅ'ka' dill' na' biyaa Macedóniana'.

<sup>14</sup> Choxken Chioza' chone' kwenche toshiizi chonnto' gan lao diika' chlis chta dii xiwaa daa naknto' Crístona' toz. Na' ngoonto' nez choe'nto' xtilleena' kwenche doxen zbii zkaan yell-lioni illiljan, ka chllilj shii xla' to dii chla' zix sia, na' gombia' ben' le'. <sup>15</sup> Ka bibayi Chioza' shii xla' llen yala' daa chla' zix sia, ka'kzan chibaile' daa nzoa Crístona' neto' choe'nto' xtilleena' ladj ben'ka' yila na' ladj ben'ka' kwiayi'. <sup>16</sup> Ben'ka' kwiayi', bi chibagakile' dillii choe'nto' daa chla'gakile'n zyel' wit. Na' ben'ka' yila, chibagakile'n daa chla'gakile'n zix sia daa nsa'n yel' mban chegake'. ¿Notgui gak gone' dga? <sup>17</sup> Ben' zan lialalalee yibeje' cho'a xtil' Chioza' mech. San neto' aga kan' chonnto'. Nez nle'i Chioza' do yichj do lall'nto' choe'nto' xtilleena' lega ben' bselee, daa naknto' Crístona' toz.

**3** Ka choe'lennto' le' dill'ki, zachakile ba wizzolonto' chshalj chshon che kwinnton'? ¿Awa chakile chiya' gonnto' ka chon bal' ben', gonnto' yish, wa inabinto'n le', gana' cho'en dill' nan chonnto' wen? <sup>2</sup> Le'kzan nakle ka yish daa cho'en dill' chonnto' wen, la' daa nonlilal'le Crístona' chakbe'i yog' ben' choe'nto' dill' li. Na' toshiizi yoole loo yichjlall'do'nto'ki. <sup>3</sup> Na' daa ile'i ben' ba bikob Crístona' yichjlall'do'lena' daa be'lennto' le' cho'a xtilleena', nakle ka to yish dii bzej kwín Crístona' nan chonnto' wen. Na' bi nakan to dii nyoj lee yish wa dii nyoj lee yaj taa, san daa ba bsel' Crístona' Espíritu che Chios yaa Chios banna' loo yichjlall'do'lena' zejín bzeje'n lee lall'do'lena'.

<sup>4</sup> Daa chaklen Crístona' neto', chiyaxjid' nia' chonnto' xshine'na' ka chazlall' Chioza'. <sup>5</sup> Aga daa le napnto' yel' sin'nan' chonnto' diiki, san Chiozan' chaklene' neto' chonnto'n. <sup>6</sup> Chioza' ba bli' bsdile' neto' kwenche gak we'nto' dill' che dii koba' daa ba bchebe' gone' checho. Na' dga bi nakan ka ley che dii Moiséza' daa chlliyai'n ben', san dga nakan che Espíritu che Chioza', na' len' cho'e yel' mban che ben'.

<sup>7</sup> Ka nak leya' be' Chioza' dii Moiséza', daa byoj lee yaj taana', nghogbia'n gat' yel' wit checho, gokan to dii zakii nleeb na' bsa'n yel' chey cheeni' xen axt ni bi gok wwia ben' Israelka' cho'alao dii Moiséza' daa le chey cheeni'n la'kzi gokan dii yinit. Na' shi leya' daa nghogbi'a gat' yel' wit checho gokan to dii zakii nleeb, <sup>8</sup> zalechlə nak yel' zakii che dii koba' daa bxe Espírituna'? <sup>9</sup> Shi leya' daa nghogbi'a guetcho gokan to dii zakii nleeb, na' daa chon Chioza' checho chizi'xene' xto'cho-ka', naktechan dii zakii nleebch. <sup>10</sup> Ka nak yel' zakii che leya', bi bllinan ka nak yel' zak' xen inleeb cheyi dga ba bxie' sto. <sup>11</sup> Na' shi leya' daa ben llin shlollz gokan to dii zakii, dii zak'techi nak dga gon llin toshiizi.

<sup>12</sup> Daa ba de dga nonnto' lez na'chan choe'nto' dill' kon ka nakan. <sup>13</sup> Na' bi chonnto' ka ben dii Moiséza' kana' bkwash' cho'alawe'na' kon to lech' kwenche ben' Israelka' bi ile'gakile' ka chinit yel' chey cheeni'na' cho'alawe'na'. <sup>14</sup> Na' yel' chajni' che'ka' bi benkzan llin, la' axt naanlla kat' chlabgake' leya' bi chajni'kzgakile'n na' nakan ka to dii ngash'. San ben'ka' gonlilal'gake' Crístona', legaken' shajni'gakile'n, la' len' wsalje' yichjlalldoe'ka'. <sup>15</sup> Axt naa, kat' chlabgake' daa bzej dii

Moiséza', de to dii chsej chllonan shajni'gakile'n. <sup>16</sup> Per kat' to ben' yiyaj yilenile' na' gonlilalalee Xancho Crístona', na' yikwas daa chsej chllonan shajniile'n. <sup>17</sup> La' Xanchona', lekzen' Espírituna', na' beena' zoalen Espíritu che Xanchona'ne', bich bi ntakw nchejan le'.

<sup>18</sup> Daan, yog'locho cho' bich bi de wsej wllonan gombia'chone', na' ba nakcho ka to wan gana' chli'lao balaan che Xanchona'. Na' Espíritu che'na' zejch chiyonshawe' cho' kwenche yiyakcho ka Xanchona'.

**4** Daa ba biyesh'lallii Chioza' neto', ba bzoe' neto' chonnto' xshine'na', na' bi chidinjinto'. <sup>2</sup> Neto', ni to dii nak yel' zto' bi chonnto', ka diika' chon ben' do ngash'zə. Na' bi chziye'nto', ni bi chshok chlewnto' cho'a xtil' Chioza', san choe'nto' dill' li che'na' kon ka nakan. Na' yog' ben' wzenague'n, gakbe'i loo yichjlall'do'ena' ka nakan, na' lekzka' Chioza' nezile' ka chonnto'. <sup>3</sup> Per ben'ka' kwiayi', bi chajni'gakile' dill' wen che Crístona' choe'nto', daa ngashaan lawe'ka'. <sup>4</sup> La' dii xiwaa daa chnabia' yell-lioni, ba bcho' bñitin yichjlall'do'eka' kwenche bi sho'n beeni' che dill' wen dill' kob che Crístona', beena' bli' ka nakye'n Chioza'. <sup>5</sup> Aga xtil'nton' choe'nto', san choe'nto' dill' che Jesucrístona', nanto' len' nake' Xancho. Na' daa chakinto' Crístona', chonnto' bittez dii gak gonnto' kwenche gakennto' le'. <sup>6</sup> La' Chioza', beena' wna: "Wzeeni' beeni'na' loo yichjlall'do'nto'na' kwenche gombia'nto' Jesucrístona', na' kan' gakbe'into' ka nak yel' zakii che Chioza'.

<sup>7</sup> Na' beeni' che dill' wen che Crístona' nakan to dii zakii inleeb. Na' ba nzoa Chioza'n loo lall'do'nto'ni, neto' naknto' ben' bibi zakii, kwenche ka we'nto' xtilleena', gakbe'i ben' yel' wak xenna' nsa'n nakan che Chios, aga nakan chento'. <sup>8</sup> La'kzi chiya dii chak chento', bi nakgakan dii bi yichej yilalennto'. La'kzi de dii nzen neto' wneyi, bi chakshejlall'nto'. <sup>9</sup> La'kzi chino ben' neto', aga chchoonlall' Chioza' neto'. La'kzi chchix chlo'lgake' neto', biñ' wlliyi'gake' neto'. <sup>10</sup> Gattezə chajnto', chsak'zi'gake' neto' na' cheengakile' witgake' neto' ka betgake' Jesúsza'. Chak chento' ka' kwenche nakbia' Jesúsza' zoe' chaklene' neto'. <sup>11</sup> La' shlak mbannto', toshiizi zelennto' yel' wit daa naknto' Jesúsza' txen. Chak chento' ka' kwenche nakbia' zoa Jesucrístona' chaklene' neto' lao diika' chllaglo beli chen chento'ni dga guet. <sup>12</sup> Daa choe'nto' cho'a xtil' Crístona' zelennto' yel' wit, kwenche le' gat' yel' mban chele.

<sup>13</sup> Cho'a Xtil' Chioza' nan: "Daa ben'jlallaa Chioza', na'chan bi'a dill'." Na' kakzan neto', daa chonlilall'nto'ne'n, na'chan choe'nto' cho'a xtilleena'. <sup>14</sup> Na' nezicho Chioza', beena' bisbane' Xancho Jesúsza' ladj ben' wetka', lekzen' yisbane' cho' ka bisbane' le'. Na' ka neto' ka le', yichi'cho' gana' zoe'. <sup>15</sup> Yel' zi' dga chllaglonto' naa, chllaglonto'n kwenche gak wen chele. Na' ka zej chanch ben' gombia' dill' wen che Crístona', lekzka' ben' zanch wi'e Chioza' yel' choxken daa nake' ben' wen, na' sho'e balaan xen.

<sup>16</sup> Daan bi chidinjinto'. La'kzi beli chen chento'ni zej chde cheyin, yichjlall'do'nto'ni chikob Chioza'n lla kon lla. <sup>17</sup> Diiki chtil'nto' naa, nakan dii te toldezə, na' bibi

chaktekinto'. La' nezinto' daa chak chento' ki, Chioza' gone' to dii wen inleeb chento' dii bi te cheyin. <sup>18</sup> Aga zento' wneyi che diiki chle'icho yell-lioni, san diika' bi nla'n zento' wneyi. La' yog'te diiki chle'icho yell-lioni, de toldezə che ka diika', na' diika' bi chle'icho naa, nakan dii bi te cheyin.

**5** Kwerp chechoni nakan ka to yoo dii te cheyin. Na' nezicho shi ba wlliyi'n, Chioza' yiyone' sto dii kob dii bi te cheyin yabana'. Na' aga nakan dii beni ni'a na' ben'. <sup>2</sup> Chibanchgaicho naa zoacho yell-lioni, na' ba cheenchgaicho yobzə lljazoalencho Chioza' yabana' gana' gone' sto kwerp kob checho. <sup>3</sup> Ka chak che beena' chishaa xe'na' daa ba biyi na' chiyakwe' to dii kob, kakzan gak checho daa yishaa Chioza' kwerp chechoni dga kwiayi'. <sup>4</sup> Shlak ni zoacho lo kwerpi, chibani-cho na' chakyeshicho. Aga inacho chibachgaicho guetchon, san daa cheenicho yobzə ile'icho kwerp kob chechona' daa bi te cheyin na' ibanlenchon zejli kanii. <sup>5</sup> Na' kwin Chioza' ba none' checho ile'icho dga, na' ba bselee Espiritu che'na' zoe' loo yichjall'do'chona' kwenche chakliyicho gone' yog' daa ba bchebe'.

<sup>6</sup> Na' daa nezicho dga, toshiizi nxenilall'cho Chioza'. Na' nezicho kwerpi mbanlencho, bi yillinlenchon gana' zoa Chioza'. <sup>7</sup> Chajle'cho dga, la'kzi bin' ile'ichon. <sup>8</sup> Na' cheenicho yobzə yiza'cho yell-lioni na' yigaan kwerp chechoni, la' nxenilall'cho kat' yiza'cho ni, na' lljazoalencho Xanchona'. <sup>9</sup> Na' daan, choncho to dii byen choncho ka chazlall' Chioza' naa mbancho wa la'kzi ba witcho. <sup>10</sup> La' chonan byen yog'lo'cho lljazecho lao Crístona' gana' wchogloe' checho, kwenche to tocho ikaa-cho daa chido'cho kon ka bencho shlak wbancho, shi bencho wen wa bencho mal.

<sup>11</sup> Na' daa nezinto' yog'cho techo lao Xanchona', na'chan chonnto' to dii byen choe'lennto' ben' xtilleena' kwenche gonllilall'gake'ne'. Chioza' nezile' do yichj do lall'nto' chonnto' xshine'na', na' non' lez nezki yichjall'do'leka' ka chonnto'. <sup>12</sup> Aga cheeninto' chibzə kwinn'to' laolenan', san nia' le' ka' kwenche yibaile ka chonnto' na' gak yillile xtil' ben'ka' chonz ka le chontegalə na' nagake' legaken' zeelo chongake' dii wenna' per bi chongake'n do yichj do lall'gake'. <sup>13</sup> Shi bal-le chakile chaktontnto'n, Chioza' nezile' xshine'nan' chonnto'. Na' shi chakile aga chaktontnto'n, banez chekzle llinna' chonnto'. <sup>14</sup> Daa nezinto' le chaki Crístona' cho', na'chan chonnto' to dii byen choe'nto' xtilleena'. Na' chajle'nto' daa wite' ni checho, zejlin yog'cho witcho. <sup>15</sup> Wite' ni che yog'lo'cho kwenche bich goncho kon daa nazan checho, san goncho ka chazlall' beena' wit na' bibane' ni checho. <sup>16</sup> Ni cheyi daan, bich chonnto' nottez ben' nakzi, shi zakee wa bibi zakee. La' kana' gokinto' bibi zakii Crístona', na' naa ba nezinto' bi nakan ka'. <sup>17</sup> Beena' ba nake' Crístona' txen, ba bikob Chioza' yel' mban che'na'. Ba wchoonlallee yel' mban gol che'na', na' ba zoe' to lo yel' mban kob.

<sup>18</sup> Yog'lo'te diiki nakan che Chioza', beena' ba ben ka bizoalenchone' wen daa bselee Crístona' wite' ni checho. Na' bene' lall' nanto' we'lennto' ben' dill' nak gongake' yizoalengake' Chioza' wen. <sup>19</sup> Kwin Chioza'

bene' ka cho' ben' yell-lío chizoalenchone' wen daa bselee Crístona' wite' kwenche binittloe' saaxya chechoka'. Na' ba bene' lall' na'nto' we'lennto' ben' cho'a xtilleena' kwenche inezgakile' nak gongake' yizoalengake'ne' wen. <sup>20</sup> Daa bzoa Crístona' neto' choe'lennto' le' xtilleena', li gaktezi kwinkz Chiozan' chat'yoile' le' daa nanto' le': "Li yizoalen Chioza' wen." <sup>21</sup> Crístona' ni to dii mal bi bene'. Per ni checho chon', Chioza' benile'ne' ka ben' saaxya, kwenche daa gonllilall'cho Crístona' yiyakcho ben' li ben' shao' lawe'na'.

**6** Neto' chonnto' xshin Chioza', chat'yointo' le' gonle ka chiyoolallee daa ba bene' to dii wen chele. <sup>2</sup> La' Cho'a Xtil' Chioza' nan:

Ka byalljilo' wzenag' cho', nad' bzenag'.

Ka byalljilo' yisla' li' na' goklen' li'.

Na' nia' le', naan' ba bllin lla bllin gor gaklen Chioza' le'. Naan' nakan llana' yisle' le'.

<sup>3</sup> Na' neto' bi chonnto' bittez dii gon ka inə ben' zban che xshin Chioza' dga chonnto'. <sup>4</sup> San toshiizi chonnto' to dii byen chonnto' xshin Chioza' ka chiya'li. Daan, chonnto' banez laa lo yel' zi', laa chiyallj chchininto', laa de dii lallj, <sup>5</sup> laa chit chyingake' neto', laa chiyixigake' neto' lillya, laa lliadia' ben' neto', laa chonnto' llin dii nak zii zshab, laa tento' bishgal zi' bishgal ya', laa chbil chdonnto'. <sup>6</sup> Na' lekzka' chli'nto' chonnto' xshin Chioza' ka chiya'li daa zoanto' do yichj do lall'nto', daa ba nezinto' daa nak dii li, daa napnto' yel' chxenlall' che ben' na' chonnto' wen chegake', daa zoalen Espiritu Sántona' neto', daa chakinto' ben' do lall'nto', <sup>7</sup> daa choe'nto' cho'a xtil' Chioza' daa nak dii li, na' daa zoalen yel' wak che Chioza' neto'. Na' dii li dii shao'ka' chonnto' nakgakan ka dii chniayinto' kwenche chdil-lennto' dii mala'. <sup>8</sup> Zoa ben' chle'shi'gakile' neto', na' zoate ben' chle'zbangakile' neto'. Zoa ben' chnegake' wen chento', na' zoate ben' chnit chdegake' neto'. Zoa ben' chongakile' neto' ka to ben' wxiye', la'kzi dill' lin choe'nto'. <sup>9</sup> Zoa ben' chongake' ka bi nombia' neto', la'kzi nombia'kzgake' neto'. La'kzi chti'nto' yel' wita', ni mbankznto'. Na' la'kzi chit chyingake' neto', bin' gongake' gan guetnto'. <sup>10</sup> La'kzi de dii zan dii cheenin gonyeshiin neto', toshiizi zoanto' mbalaz. La'kzi naknto' ben' yesh', ben' zan chonnto' ka ben' wni'a daa choe'lennto' legake' cho'a xtil' Chioza'. La'kzi bibi napnto' ni, nezinto' dii xench nak chento'na' de.

<sup>11</sup> Le' ben' bish' na' le' ben' zan', le' lle'le yell Coríntona', ba be'lento' le' dill' kon ka nakan na' ba bli'nto' chakinto' le' do yichj do lall'nto'. <sup>12</sup> Neto' chli'nto' chakinto' le' do yichj do lall'nto', per le', bi chli'le shi chakile neto'. <sup>13</sup> Chat'yoid' le', le' nakle ka xiiñ cha', gonle ka chon neto' na' li gaki neto' do yichj do lall'le.

<sup>14</sup> Bi gonle txen ben'ka' bi nonllilall' Crístona'. La' aga widiji daa nak dii li dii shao' kon dii mala', na' aga wdiji beeni'na' kon daa nak yel' cho'. <sup>15</sup> La' ba nezki'le bi chidiji Crístona' dii xiwaa. Na' lekzka' beena' ba chonllilallee Crístona' bi chidijile' beena' bi chonllilalleene'.

<sup>16</sup> Na' bi gak soa daa nak lwaa Isak', diika' choe'la'o ben', loo yoodo' che Chioza'. La' cho' nakcho ka yoodo'

che Chios yaa Chios banna'. Ka wna Chioza' che ben' Israelka':

Soa' ladje'ka', na' nad' gak Chios chegake' na' legake' gakegake' yell cha'.

<sup>17</sup> Na' daan goll Chioza' legake':

Li yichej ladj ben'ka', bi gonle legake' txen.

Bi gox'le daa ba wnia' bi nxi nyech.

Na' ka' wleb' le',

<sup>18</sup> na' gak' Xale,

na' le' gake xiin cha'.

Kan' na Xancho Chioza', beena' zeelo nap yel' wak choo yel' wak xen.

**7** Kan' nak daa ba bcheb Chioza' checho, le' ben' bish'dawaa na' le' ben' zandawaa. Daan, chiya' goncho to dii byen gakegake' ben' nxi nyech lawe'na' kwenche bibi dii mal ta' ichen kwerp chechoni na' yichjall'do'choni. Na' daa chall chlebecho Chioza' goncho ka dii le gake dowalj ka cheenile'.

<sup>2</sup> Li gaki neto' do lall'le. La' ni to kono bin' goninto', na' ni to kono' wsak'zi'nto', na' ni to kono' siye'nto'.

<sup>3</sup> Aga chsheshlen' len' nia' le' ka'. Ba wnia'kz' ka chakchgaid' le' axt ni guetid'. <sup>4</sup> Nxenlallaa chonle wen, na' cho'a dill' chele ka wen ba chonle. Ladj dii zi' dii ya'ka' ni chtiylallaa na' le chiba chizakid'.

<sup>5</sup> Kon ka bla'nto' gani mbani Macedoniani, bibi yel' wixi'lall' chento' got'. Doxenzə chdil' chllagnto' dii zed, chakdil'-len ben' neto', na' za' dii chwall chsheban neto'. <sup>6</sup> Per Chioza', beena' chiyonxenlall' ben'ka' zoa nyesh', biyonxenlallee neto' ka bla' Títona'. <sup>7</sup> Aga to daa bla'ze'n, san daa choe'yenee xtill'le ba chonle wen. Na' be'lene' neto' dill' ka zelall'le ile'ile neto' na' ka chakyeshile daa zele wneyi cha'. Na' daa benid' dga zizikli chibaid'.

<sup>8</sup> La'kzi yisha' bse'laa benyeshiin le', bibi chaktekid'. La'kzi gokyeshid' ka bwia' benyeshiin le' shloll, <sup>9</sup> naa chibaid', aga daa gokyeshile, san daa goklenan le' biyay bilenile ka cheeni Chioza'. Na' aga bi gok chele ni che daa bzej' le'. <sup>10</sup> Chioza' chone' ka gakyeshicho kwenche yiyaj yilenicho na' gat' yel' mban checho zejji kani, na' bich chakyeshicho daa gok checho ka'. Per yel' chakyeshii daa nsa' dii mala' choncho chlliyai'n cho'. <sup>11</sup> Yel' chakyeshiina' daa be' Chioza' latj got' ladjle-na' benan ka gokbalile' daa ben beena', na' wda'le nad'. Benan ka bilaale na' wyoosheble, na'tech wzelall'le yidwiach' le', na' bsak'zi'le beena' wdap do'laa. Na' yog' diiki chli'n bi nonle txen dii mala' bene'. <sup>12</sup> Na' ka bzej' le', aga bzej' ni che beena' ben dii mala', ni aga ni che beena' benile' zi'bia', san bena'n kwenche Chioza' gaklene' le' gakebe'ile dii jikzan zele wneyi chento'. <sup>13</sup> Diiki chaklenan neto' chiyakshao'lall'nto'.

Na' zizikchli bibainto' ka ble'into zoa Títona' mbalaz daa btiple lallee. <sup>14</sup> Ba be'len' Títona' dill' chele, goshee le chibaid' ka chonle, na' bi chido'id' daa goshee ka'. Na' ka dill' daa be'lennto' le' nakan dii li, lekzka' gokbe'i Títona' xtill'lana' daa bi'a lawe'na' nakan kon ka goshee. <sup>15</sup> Na' zizikchli chakile' le' kat' chjadinile' ka bleblene' na' bzenagle che' lega ben' chiya' gall illeble.

<sup>16</sup> Chiba chizakid' daa ba nxenlallaa dii jikzə chzenagle.

**8** Na' naa, le' ben' bish' na' le' ben' zan', cheeninto' inanto' le' ka mba ba ben Chioza' goklene' ben'ka' chdop chllag choe'la'ogake' Crístona' gani mbani Macedoniani. <sup>2</sup> La'kzi biya dii ba gok chegake', mbalaz inlebz zoagake'. Na' la'kzi chak yel' zi' yel' yesh' chegake', do yichj do lall'gake' bzangakile' bi de chegake' kwenche gakegake' ben' yoblə. <sup>3</sup> Nad' nezyen'id' do yichj do lall'gake' be'gake' mecha' bzangakile', na' ben-gake' axt ga zeelo gokgake'. <sup>4</sup> Na' legake' got'yochgagakile' neto' kwenche we'nto' latj lengake' gakegake' bish' ljwellchoka' nak lall' na' Chioza'. <sup>5</sup> Bentechlake' aga ka to daa nonnto' lez gongake'. Zigaate ben kwingake' lall' na' Xancho Crístona' kwenche gongake' ka cheenile', na'tech bzenaggake' chento' daa nezgakile' nan kan' cheeni Chioza' gongake'. <sup>6</sup> Ni cheyinnan' ba got'yointo' Títona' kwenche yisyolle' wtope' daa chzanile we'le ben'ka' chyallj chchini. <sup>7</sup> Na' ka mbejlaole chonle yog' dii nak wen: daa non'ilall'chgae Crístona', daa chak we'le dill' mbalaz, daa le chajniile, daa cheenchgaile gonle dii wenna', na' daa le chakile' neto', lekzka' li gon byen kwejlaole gakenle ben' we'le daa chzanile.

<sup>8</sup> Aga chontek' byen gonle ka nia', san daa cheenzid' inezile ka chibachgayi ben' bish'choka' gakegake' ben', na' kan' cheenid' gonle, kwenche wli'le shi lekzilen chaki ljwell-le do yichj do lall'le. <sup>9</sup> Ba nezkzile dii wenna' ben Xancho Jesucristona'. La'kzi nake' ben' choo ben' xen, ben kwine' ka ben' bibi zakii kwenche gak wen chele.

<sup>10</sup> Daa godwizi wzolole btople mech kwenche gakenle ben'. Na' aga no got'yoi le' btopen, san benlen do yichj do lall'le. Na' naa inia' ka nak daa gonle: <sup>11</sup> li yisyoll daa wzolole chonle dii nech do yichj do lall'le. Ka bibaile kana' wzolole, ka'kzə li yibayi yisyoll-len. Li we' ka to daa gak we'le. <sup>12</sup> La' shi izanilen do yichj do lall'le, na' ixin' lao Chioza', la'kzi lat'zan. Chioza' bi chnabe' dii bi napcho.

<sup>13</sup> Aga ni che nia' le' gakenle ben' na' le'lə yigaan yesh'le, san gat' dii iyalljile ganga. <sup>14</sup> Naa le' naple daa chyalljgakile'. Na' shi wxə willj ba napgake' bi dii iyalljile, na' yiyaklengake' le'. Na' bibi iyalljile ganga. <sup>15</sup> Na' gak ka na Cho'a Xtill' Chioza': "Beena' bitop dii zan, aga bi bichoonan, na' beena' bitop lat'zan, aga bi byalljile."

<sup>16</sup> Cho'ken Chioza' bzie' Títona' wneyi ka wneyi daa zia' chele. <sup>17</sup> Na' le bibaile' bchebe' yidwie' le', daa lekzka' chaklallee ile'ile' le'.

<sup>18</sup> Na' chsel'lennto'ne' sto ben' bish'cho, ben' le wen zeyi che' lao yog'lo' ben'ka' non'ilall' Crístona' to to gana' chdop chllaggake', daa le cho'e dill' wen dill' kob che Crístona'. <sup>19</sup> Na' aga daazə, san lekzka' ben'ka' chdop chllag choe'la'ogake' Crístona' ni, wlelgake'ne' sa'lene' neto' ljasannto' mecha' bdop. Na' chonnto' dga kwenche sho'ch Chioza' balaan na' kwenche wli'n nan cheeninto' gakennto' ben'. <sup>20</sup> Bi cheeninto' bi gon inaz ben' chento' ni che mech xenni ngoo lo nanto'.

<sup>21</sup> Na' chonnto' to dii byen gonnto'n ka chiya'li, aga toz lao Xancho Chioza' san lenkz lao ben'.

<sup>22</sup> Ləkzka' chsel'lennto' legake' sto ben' bish'cho, beena' zan shii ba ble'into' chone' wen, na' naa cheenchlile' gaklene' daa nxenlallee gonle ka cheeni Chioza'. <sup>23</sup> Na' ka nak Títona', nake' nad' txen chone' xshin Chioza' ladjlena'. Na' ben' bish'choka' zi chóp wlej ben'ka' chdop chllag choe'la'ogake' Crístona' ni, chongake' ka choo Crístona' balaan. <sup>24</sup> Kwenche inēzi ben'ka' nonlilall' Crístona' gan yoblə, li wliyi ben'ki chselaa nan dii li ba chakile ben', na' li wli' chonle wen kon ka choe'nto' xtill'le.

**9** Bich chonan byen wzej' le' inia' chiya' gakenle ben' bish'choka' nak lall' na' Chioza'. <sup>2</sup> La' ba nejid' ka cheenile gakenle ben', na' ba bi'a xtill'le lao ben' Macedóniaki, chepgakee godwizteyi le' lle'le Acáyana' cheenile gakenle. Na' ka wnezi ben' Macedóniaki ka cheenile gonle, zangake' ba chaklall'gake' gaklengake'. <sup>3</sup> La'kzi nakan ka', chselaa ben' bish'choki kwenche inēzgakile' nan choe'nto' dill' li daa che'nto'gake' nan chonle wen. Nia' le' ka' kwenche gonchle ka dii le wtoplen. <sup>4</sup> La' shi za'len no ben' Macedonia nad' ka yidwia' le', na' ile'gakile' bi chonle ka dillaa choe'nto' chele, na' gakan yel' zto' chento' daa nxenlall'nto' chonle wen. Na' le' si'techlale yel' zto'. <sup>5</sup> Ni cheyinnan' chakid' chonan byen wselaa ben' bish'choki yidwiagake' le' zi-gaate, kwenche gaklengake' le' yiyoll wtople daa ba bcheble. Na' kat' yid', ba xoashawan lega dii chzanile, na' aga inacho do ki do lall'len choe'len.

<sup>6</sup> Li lljadini cheyi dga: Beena' gaz lat'zə, lat'chokzə yizi' yilape'; na' beena' gaz dii xen, lekzka' dii xen yizi' yilape'. <sup>7</sup> To tole we'le ka to daa chzanile. Bi gonlen do ki do lall'le, la' aga no chon byen we'len. La' Chioza' chakchgaile' beena' chibayi we'n do yichj do lallee. <sup>8</sup> Chioza' wak gone' ka gakchga wen chele kwenche toshiizi gat'ch yog'lo' dii chyalj chchinile na' gakteyin gakenle yog'lo' ben' bibi de che'. <sup>9</sup> Cho'a Xtill' Chioza' nan:

Cho'e ben' yesh'do'ka' daa chyalj chchingakile', na' dii wenna' daa chone' biga lli te cheyin.

<sup>10</sup> Chioza', beena' choñ bi dii chaz chbekcho na' dii cheej chaocho, lekze'n gone' bittezə dii chyaljile, na' gone' ka shesh shanch bi de chele kwenche gonchle dii wenna'. <sup>11</sup> Na' ka', gapchle dii xench kwenche gak we'chle dii xench gakenle ben'. Na' kat' lljasannto' mecha' daa ba btople lao ben'ka' chyaljin, na' we'gake' Chioza' yel' choxken. <sup>12</sup> Ka nak mecha' daa we'le ben'ka' nak lall' na' Chioza', aga to gakenzan legaken', san lekzka' gonan ka we'chgagake' Chioza' yel' choxken. <sup>13</sup> Na' ka ikaagake'n, we'la'ogake' Chioza' daa chonle ka na dill' wen dill' kob che Crístona' daa ba chajle'le. Na' lekzka' we'la'ogake' Chioza' daa btople mech xen be'len legake' na' nochlə ben' yoblə. <sup>14</sup> Na' daa chwiagake' chaklenchga Chioza' le', na' inabgakile'ne' gakenche' le'. <sup>15</sup> Choxken Chioza', daa ba bene' to dii wen inleeb checho. Bichkzə bi dill' chillle we'cho ka to ba bene' checho.

**10** Nad' Pablo, chat'yoid' le', na' choe'len' le' dill' goll-lall' ka be' Crístona' dill' daa nape' yel' chxenlall', la'kzi nagake' cha' bi chiyaxjid' wsheshlen' le'

kat' zoa' ladjlena', na' galjə zoa' zit' chiyaxjid' chnia' le' zi'bia' lee yishka' chzej'. <sup>2</sup> Na' chat'yoid' le', li gongach wen kwenche kat' yidwia' le' bi lenle wsheshlen' ka wsheshlen' ben'ka' naz chon' lega ben' yell-lío. <sup>3</sup> La'kzi naknto' ben' de beli chen, bi chdilnto' ka chdil' ben' yell-lioki. <sup>4</sup> Neto', kat' chdil-lennto' dii mala' bi chchinnto' yesya ka daa chchin ben' yell-lioki, san daa chchinnto' nsa'n yel' wak che Chioza' kwenche chlliyai'nto' yel' wak che dii xiwaa. <sup>5</sup> Na' chlliyai'nto' daa yoo loo yichjlall'do' ben' daa chsej chllonan gombia'gake' Chioza'. Na' chonnto' kwenche wzexj yichjgake' wzenaggake' che Crístona'. <sup>6</sup> Na' kat' ba nakbia' chzenagle kwas'ol, na' wwiando' nak gonnto' che beena' bi chzenagkz.

<sup>7</sup> Li wwia ka chonnto'. Na' shi chakile nonle Crístona' txen, chidal' gake'ile lekzka' neto' naknto'ne' txen. <sup>8</sup> Aga chido'id' chshalj chshon' daa nia' kwín Crístona' bene' lall' na'nto' we'nto' xtillleena' kwenche gakennto' le' gake wal, aga kwenche wlliyai'nto' len'. <sup>9</sup> Bi cheenid' gatzile chzej' yishki kwenche wsheb' le'. <sup>10</sup> Zoa ben' ne' yishka' chzej' le' le zña chnen, per kat' zoalen' le' ni bi nak' ka ben' illeble, na' ni dill' bi chak wi'a. <sup>11</sup> Na' ben'ka' naz ka', chiya' inēzgakile' kon ka chzejnto' naa zoanto' zit', ka'kzə gonnto' kat' soanto' ladjlena'.

<sup>12</sup> Bi cheeninto' gakebinto' ben'ka' chyibz kwingake'. Daa chakgake' le' wen chongake' na' daa chsaklebi ljwelle' nochgake' chonch, chli'gake' bi ntegakile'.

<sup>13</sup> Neto', aga wshalj wshonnto' che to dii bin' gonnto'. San cheyi daa ben Chioza' lall' na'nto' gonnto'n choe'nto' dill', na' le' bselee neto' lall-lena'. <sup>14</sup> Neto' bidye'lennto' le' dill' wen dill' kob che Crístona' dii nech, na' bi chixoa' chento' inanto': "ki bennto'". <sup>15</sup> Bi chshalj chshonlenznto' xshin ben' yoblə, san nonnto' lez gonlilall'chle Crístona' kwenche gonchnto' xshin Chioza' daa nak lall' na'nto' gonnto' gana' zoale. <sup>16</sup> Ləkzka' nonnto' lez we'nto' dill' wen dill' kob che Crístona' kon ga bin' illin xtillleena', kwenche bi wshalj wshonlenznto' xshin ben' yoblə.

<sup>17</sup> Beena' chshalj chshon kat' bin chone', che Chiozan' chiya' wshalj wshone'. <sup>18</sup> Beena' chshalj chshon che kwine', bibi zakee, san beena' ina Chioza' le' wen chone', beenan' zak'.

**11** La'kzi chakile biz dill' diika' cho'a, li wzenagan. <sup>2</sup> Dga chaktek cha' chele za'n che Chioza'. Nad' ba non' le' lo na' Crístona', ka chak che to ben' zoa to nool wew' che', bi' napshii kwim', na' chone'b' lo na' beena' gak ben' cheb'. Na' kan' cheenid' gake lao Crístona', ka to nool wew', bi' napshii kwinin. <sup>3</sup> Per chxollid' gak chele ka gok che dii Évana' kana' wxiye' be'la' le' daa bzenague' cheb. Na' chakid' shi ka' gonzle wzenagle bi dill' wxiye' dii gonllejin le', na' bich gonlilall'le Crístona' do yichj do lall'le. <sup>4</sup> Shi chla' ben' choe'lene' le' dill' nlla'lə aga ka daa ba bsedinto' le' che Jesús'a, wa chsedtegakile' le' nlla'lə che Espíritu che Chioza', beena' zoa loo yichjlall'do'chona', wa che dill' wen dill' kob che Crístona' daa wyajle'le dii nech, na' chajle'tezle chegake'. <sup>5</sup> La'kzi chakile chajni'chi ben'ka' nale nakgake' postl' chele aga ka nad', nad' nejid' bi nakan

ka'. <sup>6</sup> Leljaile bi chakyeṇaa wi'a dill', per chajni'chid' aga ka legake'. Na' dgan ba bliinto' le' toshiizi lao yog'loṭe dii chonnto'.

<sup>7</sup> ḶAchakile malan ben' bentez' ka beṇ' bibi zakii na' aga bi laxj' wṇabid' le' kana' be'len' le' dill' wen dill' kob che Chioza'? Goktui gake beṇ' zakii lawe'na'.

<sup>8</sup> Bex'shaz' mecha' daa beṇ' beṇ'ka' chdop chllag choe'la'ogake' Crístona' yell yoblə kwenche bibi byalljid' shlak bli' bsedid' le'. <sup>9</sup> Na' kana' wzoa' ladjləna' na' byallj bchinid', ni tole bi benid' zed. Beṇ' bish'choka' lle' yell Macedóniana' bidwa'gake' daa byalljid'. Na' ka' bibi zed benid' le', na' biga gonkzid' le' zed. <sup>10</sup> Dill' li che Crístonan' cho'a, na' nia' ni to beṇ' lle' gana' mbani Acáyana' bi wsej wllone' wshalj wshon' ka to dga chon'.

<sup>11</sup> ḶAṇezile biḡhe nia' ka'? ḶAchakile bi chakid' len'? Chioza' ṇezile' le chakid' le'.

<sup>12</sup> Per gonchz' ka chon' kwenche bi wi'a latj che beṇ'ka' cheeni wshalj wshongake' inazgake' chongake' ka chonnto'. <sup>13</sup> Beṇ'ki bi nakgake' dowalj postl, na' chdagake' chziye'gake', nazgake' nakgake' postl che Crístona'. <sup>14</sup> Na' daa chongake' ka' bi nakan ka dii yibanicho, la' ṇezicho dii xiwaa chonz kwinin ka anjl che Chios. <sup>15</sup> Daan, bi nakan ka dii yibanicho beṇ'ka' chon xshininna' nagake' chsedgakile' beṇ' nakan gongake' yiyakgake' beṇ' wen lao Chioza'. Na' daa chongake' ka', len wllayi'n legake'.

<sup>16</sup> Sto shii nia' le', bi gakile bizə dillaan choe'len' le'. Wa shi ka' chakile, li gakhazi ka', per li we' latj wi'a dill' kwenche wshalj wshonlataa. <sup>17</sup> Na' daa chshalj chshon' che kwin', chon' ka beṇ' bi nteyi, la' aga kan' cheeni Xanchona'. <sup>18</sup> Daa le chshalj chshon beṇ' zan shi no nakgake', lekzka' nad' wshalj wshon' non nak'. <sup>19</sup> Le' nale nakle beṇ' sin' na' chibazile chleble beṇ'ka' bizə chon chna lat' wej. <sup>20</sup> Chonzle banez shi bi chgongake' le' gonle, shi chzi' chkaagake' bi de chele, shi kon daa nazan chegake' chongakile' le', wa shi chgap' chball'gake' xag'ləna'. <sup>21</sup> ḶAchakile bi chiyaxjid' gon' ka chon beṇ'kin? ṇezganz bi gaklebid' legake' gon' ka'.

Ḷete shi legake' chiyaxjgakile' chshalj chshongake', lekzka' nad' wiyaxjid' wshalj wshon', ka chon to beṇ' bi nteyi. <sup>22</sup> Shi nagake' nakgake' beṇ' hebreo, lekzka' beṇ' hebreo nad'. Shi nagake' nakgake' beṇ' Israel, lekzka' beṇ' Israel nad'. Shi nagake' nakgake' xiiṇ dia che dii Abrahama', lekzka' xiiṇ dia che' nad'. <sup>23</sup> Shi nagake' chongake' xshin Crístona', nad' nia' chontechla'n ka legake'. (Daa nia' ka' chon' ka beṇ' bi nteyi.) Nad' choe'Ḷ-lall'ch' chon' xshin Crístona' aga ka legake'. Ḷech ba wyaa lillya ka legake', ba bet wdinch beṇ' nad' aga ka legake', na' dii zan shii ba bila' lo yel' wita'. <sup>24</sup> Gay' shii ba bet wdini beṇ' Israelka' nad' yid sota' twaljichoa wej, <sup>25</sup> shon' shii bet wdingakile' nad' yaga', na' zi shlin bliiagake' nad' yaja'. Lekzka' shonə shii ka yo'a loo barkwa' wche'lenan nad' yel, na' zi shlla shyel bgaana' lo nido'na'. <sup>26</sup> Shlak chda' ngwaa nez dii zan dii ba ben ble'id'. Ba wzoa' dii nxoll wa' no yao nad', no che beṇ' wban, no che beṇ' wllal cha'ka', no che beṇ' bi nak beṇ' Israel. Ba wzoa' dii nxoll ka wdia' yell xenka', na' ka wdia' lyix', na' ka wdia' lo nido'na'. Na' lekzka' ba

wzoa' dii nxoll che beṇ' wxiye'ka' nazgake' ba chajle'gake' che Crístona'. <sup>27</sup> Ba benchga' llinna' axt ba chjxakchgaid', zan shii ba wlej' bishgal, ba wbiḶ wdonchga' na' ben banez bi weej wdaw', ba blilagloa' no dii zag na' byallj xalaana'.

<sup>28</sup> Na' ka chllagloa' yog'loḶ diiki, ka'kzan chllagloa' daa zia' wṇeyi lla kon lla che yog' beṇ'ka' nonḶilall' Crístona' to to yell. <sup>29</sup> La' kat' to beṇ' bich chone' ka dii le, kon chakid' nad'kzan chak cha' ka'; wa shi ga zoa beṇ' biz che' chone' na' chchixe' beṇ' yoblə lo xṇez Chioza', na' chllaa yichj'. <sup>30</sup> Shi de dii chonzan ka wshalj wshon', we'tochl' dill' cheyi daa chli'n bibi gak gon' tobia'loz'.

<sup>31</sup> Chios, beena' nak Xa Xancho Jesúsza', beena' chgoocho balaan toshiizi, ṇezile' cho'a dill' li. <sup>32</sup> Na' ka wzoa' yell Damáscona', beena' nzoa rey Arétaza' ngoo lall' nee yella' bzoe' beṇ' wdapgabe' cho'a yella' kwenche nan gox'gake' nad'. <sup>33</sup> Na' beṇ'ka' zoa gana' bllin', bi-googake' nad' to loo llom, biḶetjgabe' nad' to cho'a ventan dii zoa lee zee daa nechj yella', na' bi bex'gake' nad'.

**12** Chonkzan byen wshalj wshon' la'kzi bibi gon' gan. Na' we'toch' dill' cheyi daa ble'do'id' na' cheyi daa bli'yi Xanchona' nad' daa konon' yen ile'kzi. <sup>2</sup> Nombi'a to beṇ' † nake' Crístona' t xen. Ba gok shda' yiz Crístona' bchi'ene' yabana' axt gana' lliate Chioza'. Bi ṇezid' shi wyaje' do beli chen che'na', wa shi to bishbe che'na'zan wyaj. Toz Chioza' ṇezile' <sup>3</sup> shi wyaje' do beli chen che'na' wa shi to bishbe che'na'zan wyaj, per ṇezid' <sup>4</sup> bche Chioza'ne' yabana' gana' nak mbalaz inlleb. Na' benile' dill' dii konon' yenkzi, dii bi de lsens no wshaljan. <sup>5</sup> Che beena' gok cheyin kan' wshalj wshon', san ka nak nad', aga bi de wshalj wshon' lete wak wshalj wshon' cheyi diika' chli'n bibi gak gon' tobia'loz'. <sup>6</sup> SheḶ' cheenid' wshalj wshon', aga inacho chon' ka beṇ' bi nteyin, la' dill' lin cho'a. Per bi gon' ka', kwenche kono ile'i nad' beṇ' le zakii daa ba ble'id' diika'. La' diika' chon' na' dill'ka' cho'a, lekzgakannan' wli'gakan nakan nak'.

<sup>7</sup> Kwenche bi gak' beṇ' choo beṇ' xen lao yel' mba yel' shao' inllebka' ba bli'yi Crístona' nad', bi'e latj bla' to dii chzak'zi' nad', to dii bsel' Satanáza' daa chzoazi'yaan nad', na' chak' ka beṇ' chad' chbibe' yesh'. <sup>8</sup> Dga chak cha', shon' lin ba wṇabid' Xanchona' yikwase'n. <sup>9</sup> Na' wne' nad': "Chaklə cho' zoalenkz' li' na' gaklen' li'. Daazan chyalljilo'. La' yel' wak cha'na' chli'ch lawin kat' de daa chli'n bibi gak gono' tobia'lozo'." Daan, chibachid' wi'a dill' cheyi diika' chli'n bibi gak gon' tobia'loz', kwenche yel' wak che Crístona' soalenchan nad'. <sup>10</sup> Na' daa chakid' Crístona', chibaid' kat' za' daa chli'n bibi chak gon' tobia'loz', kat' choni beṇ' nad' zban, kat' chyallj chchinid', kat' chsak'zi' beṇ' nad', na' kat' de to dii lallj cha'. La' kat' za' daa chli'n bibi chak gon' tobia'loz', kana'lan chakbe'id' zoalench yel' wak che Crístona' nad'.

<sup>11</sup> Ba ben' ka beṇ' bi nteyi daa chshalj chshon' che kwin' ni chele, la' le'lan nan we'le dill' nan chon' wen.

† Nombi'a to beṇ': daa nan ki, Páblona' cho'e dill' che kwine', la' kwinkzen' bche' Crístona' yabana'.



La'kzi bibi zaka, aga chonch beŋ'ka' nale nak postl çehele ka nad', beŋ'ka' nale chajni'chgayi. <sup>12</sup> Daa wzoatezi wzoa' beŋ' daa yoo lo na' gon' lao yog' diika' btiŋ' na' daa beŋ' yeŋ' wakka' ladjlena', chli'n nak' dowalj postl. <sup>13</sup> Bi gakile' benid' le' nakzi aga ka beŋ'ka' nonŋilall' Crístona' yell yoblə daa bi benid' le' zed bibi wkaa çehele. Bi nakan ka'. Na' ŋi si'xen čha' shi bi beŋ' wen beŋ' ka'.

<sup>14</sup> Ba chon' wŋeyi yidwia' le' de wyon shii, na' lekzka' bi cheenid' gonid' le' zed. La' aga chzelallaa bi de çehele, san len' chzelallaa yidwia'. Ka chak çe beŋ' nape' bi'do', aga legakban' wweej wwaogakb' legake', san xaxŋa'b'kan' segake' wŋeyi wweej wwaogake' legakb'. Kan' chak čha' çehele. <sup>15</sup> Do yičj do lallaa izanid' bi de čha', axt yeŋ' mban čha'ni izanid', kwenče gak wak çehele. La'kzi nad' axt ga zeelo gakid' le', widezile zizikchli gonile nad' kazli.

<sup>16</sup> Nezkzile aga bi zed benid' le', per baŋ-le chakile' biyiljal'zan' kwenče wxiyaa le'. <sup>17</sup> Wa ŋi inashki shi no beŋ'ka' ba bseŋaa ba wxi' wkaagake' bi de çehele.

<sup>18</sup> Gosh' Títona' yidwie' le', na' bseŋ'lenee sto beŋ' nakcho txen. ŋi inashkilja shi bi wxi' wkaa Títona' çehele. Nezkzile bi nakan ka'. La' toz ka nsa' čhento' na' toz ka cheeninto' gaklennto' le'.

<sup>19</sup> Shi chakile' choe'nto' dill'ki kwenče bibi sa'lall'le čhento', aga kan' nakan. Choe'nto' dill' lao Chioza' daa naknto' Crístona' txen. Le' beŋ' bish'dawaa na' le' beŋ' zandawaa, yog'loŋ diiki chonnto' nakan dii gaklen le' kwenče gakchale lo xnez Chioza'. <sup>20</sup> Chxollid' kat' yidwia' le' bi chonle ka cheenid' gonle. Na' le', aga wya-zlall'le ka gon' çehele ka yid' gana' zoale shi ŋaa. Chxollid' shi ka yid' ba chdiŋ chsheshlenz ljwell-le, ba chakxe'zi ljwell-le, ba chllaaz ljwell-le, ba chonz çe çehezle, bizə ba chon chnaz çe ljwell-le, ba chčhitjzle dill' çe ljwell-le, ba chep cha'lall'zle, na' bichkzə nkaani'a xnezi daa chonle. <sup>21</sup> Lekzka' chxollid' shi kat' yidwia' le' sto shii, si'a yeŋ' zto' lao Chios čha'na' ni çehele, na' kwell' ni çehele. La' zantele chonle dii mala', na' biŋ' yiyaj yilenile diika' ba benlenle beli chen çehele-na' kon ka nazan çehele.

**13** Dga gak shon shii yidwia' le'. Naach yidyeŋ' ka na cho'a xtill' Chioza': Shi zoa beŋ' chawe' xya

če to beŋ', na' bibi gak gone' shi bi zoa čhop shon beŋ' inagake' kan' nakan. <sup>2</sup> Kana' bidwia' le' de wchop shiyi, gosh' beŋ'ka' chongake' dii mala' bich wwialoz' čhegake'. Na' ŋaa zoa' zit', ba nia' le' ka' sto shii, bich si'xen' kat' yid' dii yoblə. <sup>3</sup> Gon' ka' ni čheyi daa cheenile ile'ile shi lekzidaan cho'a dill' kon ka cheeni Crístona'. La' Crístona' bi nake' ka beŋ' bibi gak gon ladjlena', san nape' yeŋ' wak kwenče yigwee shŋi lall'le. <sup>4</sup> Dii ŋikzə Crístona' bŋexj yičje' wdee lee yag cruza' ka beŋ' bi nap yeŋ' wak, per ŋaa zoalene' yeŋ' wak çe Chioza'. Na' lekzka' neto' lennto' Crístona' naknto' ka beŋ' bi nap yeŋ' wak, per daa naknto'ne' txen lekzka' zoalento' yeŋ' wak çe Chioza' kwenče gonnto' xshine'na' ladjlena'.

<sup>5</sup> ŋi yiya yiyilj kwinle shi dii ŋi ba nonŋilall'le Jesucristona'. Na' ŋi gakbe'yeŋii shi zoalenke' le', wa shi bi nonŋilall'kzlene'. <sup>6</sup> Na' nonto' lez gakbe'ile zoalenke' neto'. <sup>7</sup> Chŋabinto' Chioza' gaklene' le' bibi dii mal gonle. Aga chŋabinto'ne' dga kwenčeze wli' wzez chento' le wen bennto' xshine'na' ladjlena', san cheeninto' le dii wenna' daa chiyal' gonle la'kzi ina beŋ' bi chak gonnto' xshin Chioza'. <sup>8</sup> Bi gak bi inanto' čheyi daa nak dii ŋi, san zeelo chaklennto' kwenče wli'chlawin. <sup>9</sup> Chibainto' shi le' nakchale na' bi chonan byen wčhinnto' yeŋ' wŋabia'na' nak lall' na'nto', la'kzi zoa beŋ' chle'ile' neto' ka beŋ' bi nap yeŋ' wŋabia'. Na' inabchinto' Chioza' gaklene' le' gake doxen ka cheenile'. <sup>10</sup> Chzej' le' ŋaa kwenče kat' yid' bi inetek' le' zŋia. La' Xanchona' non' nad' yeŋ' wŋabia' kwenče gaklen' le' gakchale lo xnez Chioza', aga beŋ'en kwenče wliiyaa le'.

<sup>11</sup> Dga zeelo nia' le', le' beŋ' bish' na' le' beŋ' zan', lialallaa soale mbalaz na' weŋ'-lall'le gake doxen ka cheeni Chioza'. ŋi wtip lall'le, ŋi gak toz na' soalen ljwell-le mbalaz. Na' Chioza', beena' chakile' cho' na' chzoe' cho' mbalaz, soalene' le'. <sup>12</sup> Na' ŋi wwap ljwell-le chiox lega beŋ' chaki ljwellin daa nakle lall' na' Chioza'. <sup>13</sup> Na' yog'loŋ beŋ'ki ba bixi biyech lao Chioza' chwapgabe' le' chiox.

<sup>14</sup> Xancho Jesucristona' gaklenshgue' le', na' yeŋ' chaki çe Chioza' soalenan le', na' Espíritu Santo çe'na' gone' ka gakbe'ile zoalene' le'. Kan' gakan.

# Gálatas

1 Nad' Pablo, nak' postl che Jesucristona', na' aga no beṅ' yell-lío wleje' nad' na' bselee nad' wi'a xtilleena', san kwin Jesucristona' na' Xacho Chioza', beena' bisbane'ne' ladj beṅ' wetka', bsele'gake' nad'.  
 2 Nad' na' yog' bish' l'jwellchoki chwapnto' le' chiox, ka le nonlilall'le Crístona' to to yellka' lle' gana' mbani Galáciana'.  
 3 Chṅabid' Xacho Chioza' na' Xancho Jesucristona' gaklenshgagake' le' na' wzoagake' le' mbalaz.  
 4 Jesucristona' bzani kwine' wite' ni checho daa nakcho beṅ' saaxya, kwenche bisle' cho' lao dii mala' de yell-líoni, kon ka goklall' Xacho Chioza' gone',  
 5 beena' chidoḷ' sho' balaan zejli kaṅi. Kan' nakan.  
 6 Le chibanid' chele daa ba biḷaala'odozle Chioza', beena' gox wṅab le' na' bliile' le' yeḷ' chiyesh'lalli che'na' daa bselee Crístona' wite' ni checho, na' ba zjanozle to dii yoblə daa bi nak dill' wen dill' kob che'.  
 7 Aga inacho de sto dill' wen dill' kob yoblan, san zoaz baḷ beṅ' cheengakile' gonllej gongangakile' len', na' chsha'zgake' dill' wen dill' kob che Crístona'.  
 8 Shi ga za' beṅ' yishee dill' wen dill' kob che Crístona' daa ba wdixje'into' le', Chioza' wsak'zi'shgue' zejli kaṅi notteza beena' gon ka', laa neto' wa no anjl beṅ' za' yabana'.  
 9 Ba wṅiakzə' le' ka', na' ṅaa chiznia'n sto shii: shi no chsha' dill' wen dill' kob che Crístona' daa ba wdixje'into' le', Chioza' wsak'zi'shgue'ne' zejli kaṅi.  
 10 Aga cheenid' ile'shii beṅ' nad' daa nia' ka', san cheenid' gon' daa chazlall' Chioza'. Shi cheenid' gon' ka chazlall' beṅ', aga wen llin che Crístona'chan nak'.  
 11 Cheenid' inezile dga, le' beṅ' bish' na' le' beṅ' zan', dill' wen dill' kob che Crístona' daa wdixje'id' le' bi nakan dii wdiljlall' beṅ' yell-líoni.  
 12 Ni to beṅ' yell-lío bi bli' bsdile'n nad', san kwin Jesucristona' bli' bsdile'n nad'.  
 13 Ba benzkile' ka bsa' cha' kana' ni noa' ley chen-to'na', neto' beṅ' Israel. Na' bsak'zi'a beṅ'ka' nak lall' na' Chioza' daa nonlilall'gake' Crístona', goklallaa yisḷengakee.  
 14 Kana' ni noa' ley chento'na', wlejlaw' ladj beṅ'ka' nak l'jwell' daa ben' to dii byen wnoa' yog' diika' bkwaanlen dii xozxto'nto'ka' neto'.  
 15 Per Chioza', kana' zi' galjtia', ba ngwee xṅez xlatjin yiyesh'lallile' nad', na' wleje' nad' kwenche gon' xshine'na'. Na' ka blin llana' nllie' bia',  
 16 bene' ka bembia' Xiṅe'na' kwenche llji'a xtilleena' lao beṅ'ka' bi nak beṅ' Israel. Na' ka gox wṅab Chioza' nad', ni tlish' beṅ' yell-lío bi wṅabid' wzajniile' nad' daa chiyal' gon'.  
 17 Ni bi biyaa Jerusalénna' lljawia' beṅ'ka' wlej Crístona' nakgake' postl che' kana' zi' kweje' nad'. San lii wyaatia' gana' mbani Arábiana', na'tech biyaa Damáscona' sto shii.

18 Na' ka wde shon yiz, biyaa Jerusalénna' kwenche bembia' Pédrona', na' bigaanlenee shda' wbill.  
 19 Lekzka' ble'id' Jacóbona', beena' nak beṅ' bish' Xanchona', na' kochno postl yoblə ble'id'.  
 20 Chioza' ṅezile' dga chzej' le' bi nakan de wxiye'.

21 Na'tech wyaa gana' mbani Síriana' na'ch Cilíciana'.  
 22 Per beṅ'ka' nonlilall' Crístona' Judéana' biṅ' gom-bia'gake' nad'.  
 23 Zeelo ba bengakile' nagake': "Beena' bsak'zi'e cho' kana', ba chde' choe' dill' wen dill' kob che Crístona' daa goklallee yisol yṅite' kana'."  
 24 Na' be'la'ogake' Chioza' daa ba chyixji'a xtill' Crístona'.

2 Wde shda' yiz biyaa Jerusalénna' sto shii, na' wza'len Bernabéna' nad' na' lekzka' bchi'a Títona',  
 2 la' Chioza' bene' ka wṅezid' nan chiyal' sha'. Na' jashaljen' beṅ'ka' chṅabia' lao beṅ'ka' nonlilall' Crístona', na' to nad' to legake' bzajniid'gake' ka nak dill' wen dill' kob che Crístona' daa choe'len' beṅ'ka' bi nak beṅ' Israel. La' goklallaa inezgakile' bin chli' chsedid' kwenche bi inagake' daa ba ben' na' daa ni chon' nakan dii bibi zakii.  
 3 Na' ni Títona', beena' zyaalen', naktie' beṅ' griego, bi bengake' byen sho'e seṅ' daa le circuncisión,  
 4 la'kzi wzoa beṅ' aga do lall'gake' lengake' neto' nṅenilall'nto' Cristo Jesúsza' san bidwia bidyizgake' shi ni chonnto' ka na ley daa bzej dii Moiséza'.  
 La' goklall'gake' toshiizi idakw ichejnto' gonnto' doxen ka na leya'.  
 5 Na' neto', biga bennto' ka goklall'gake', daa cheeninto' inezile bich chonan byen gonle daa na leya', san chiyal' gonle daa na dill' wen dill' kob che Crístona' daa nak dii li.

6 Ka nak beṅ'ka' chṅabia' lao beṅ'ka' nonlilall' Crístona' yell Jerusalénna', la'kzi nakgake' beṅ' mbejlawin bitek zia' wṅeyi shi no nakgake', la' yog'cho toz ka zak'cho lao Chioza'. Bi wnagake' chonan byen yishaa diika' chli' chsedid' che Crístona'.  
 7 San gokbe'gakile' Chioza' ba bene' lall' na' wi'a dill' wen dill' kob che Crístona' lao beṅ'ka' bi nak beṅ' Israel, ka bene' che Pédrona' bene' lall' nee chixje'ile'n beṅ' Israelka'.  
 8 La' Chioza', beena' wleje' Pédrona' kwenche nake' postl che' na' chixje'ile' cho'a xtilleena' beṅ' Israelka', lekzen' wleje' nad' nak' postl che' kwenche chixje'id' cho'a xtilleena' beṅ'ka' bi nak beṅ' Israel.

9 Jacóbona', Pédrona', na'ch Juanna', beṅ'kin mbejlao-gake' lao beṅ'ka' nonlilall' Crístona', ka gokbe'gakile' chaklen Chioza' nad' kwenche chon' xshine'na', na' bli'gake'n chongake' nad' na' Bernabéna' t xen daa be'gake' na'nto'ka'.  
 La' gokgakile' wenan gonnto' xshin Chioza' lao beṅ'ka' bi nak beṅ' Israel shlak chli' chsedgakile' beṅ' Israelka'.  
 10 Toz dii wnagake' neto'

nan chiyal' yiyesh'lallinto' beñ' yesh'ka', na' leyen'kzan-nan' ba yookzə yichj' gon' do yichj' do lallaa.

<sup>11</sup> Na' ka bid Pédróna' Antioquíana', bsheshlenee, la' daa bene' bi nakan wen. <sup>12</sup> Dii nech weej wdaolene' beñ'ka' bi nak beñ' Israel, per ka bid beñ'ka' bsej' Jacóbona', bsane' bich weej wdaolene' legake' daa bllebe' beñ'ka' na chiyal' sho'cho señ' daa le circun-cisión na' goncho doxen ka na leya'. <sup>13</sup> Na' beñ' Israel-ka' lle' na', beñ'ka' ba nonjilall' Crístóna' goklebgakile' Pédróna' bich weej wdaolengake' beñ'ka' bi nak beñ' Israel. Na' axt lenzə Bernabéna' goklebile' legake'. <sup>14</sup> Na' ka gokbe'id' bi chongake' ka na dill' wen dill' kob che Crístóna', na' gosh' Pédróna' lao yog' beñ'ka' lle' na': "Len naktio' beñ' Israel, na' ba wlej yichj' ley chechona' na' ba wzolozó' chono' t xen beñ'ka' bi nak beñ' Israel. ¿Biche cheenzilo' gono' byen gon beñ'ki daa yoolocho choncho, cho' nakcho beñ' Israel?"

<sup>15</sup> Cho' nakcho beñ' Israel ka goljtecho chakicho bi nakcho beñ' saaxya ka beñ' yellka' sto, <sup>16</sup> per nezechó ni tlish' beñ' bi nake' beñ' li beñ' shao' lao Chioza' daa chone' yog' daa na ley che'na'. San beena' gonjilallee Jesucristonan' yiyake' beñ' li beñ' shao' lawe'na'. Na' lezkza' cho' ba benjilall'cho Jesucristóna' kwenche yiyakcho beñ' li beñ' shao' lao Chioza', na' aga daa goncho daa na leyan'. La' aga no yiyak beñ' li beñ' shao' lao Chioza' daa chone' daa na leya'.

<sup>17</sup> Daa cheenicho gakcho beñ' li beñ' shao' lao Chioza' daa wit Crístóna' ni checho, chakbe'icho lenkz-cho cho' beñ' Israelan nakcho beñ' saaxya. Na' daa chakbe'icho nakcho beñ' saaxya, ¿azejin Crístóna' none' cho' beñ' saaxya? ¿Bi nakan ka'? <sup>18</sup> Shi ba wlej yichj' leya', na' sto shii yiyonza'n lez yiyonan nad' beñ' wen, na' gap' doj' lao Chioza'. <sup>19</sup> Nad' nak' ka beñ' ba wit lao leya' daa bich chon' ka nan, kwenche gak soa' gon' ka cheeni Chioza'. <sup>20</sup> Nad' nak' ka beñ' witlen Crístóna' t xen kana' wite' lee yag cruza'. Daan, bich chon' daa nazan cha' san Crístóna' zoe' lo yel' mban cha'ni. Na' daa chonjilallaane', shlak mban' chon' daa cheeni Xiin Chioza', beena' gokile' nad' na' bzani kwine' wite' ni cha'. <sup>21</sup> Bi chzoa' ka'lə yel' chiyesh'lalli che Chioza' daa bselee Crístóna'. La' shel' leya' bizoyin biyanon cho' beñ' li beñ' shao', bi benan byen wit Crístóna' lee yag cruza', shel'ka'.

**3** Le' beñ' Galacia, beñ' bi chajni, ¿no wxiye'z le'? Kwasloj' bli' bsedinto' le' nanto' Crístóna' wxak'zi'e lee yag cruza' ni checho. <sup>2</sup> Toz dii cheenid' inabid' le': ¿Ani che daa chonle daa na leyan' bidsoa' Espíritu che Chioza' loo yichjilall'do'lena'? ¿Anti daa wyajle'le che xtill' Crístóna' daa bli' bsedid' len', lla? <sup>3</sup> ¿Ni lat' bi chajniile! Espíritu che Chioza' wyo'e loo yichjilall'do'lena' ka wzolo chonjilall'le Crístóna'. Na' naa chakile yiyakle beñ' li beñ' shao' daa chonle ka na leya'. <sup>4</sup> ¿Ana' bibi zjanayin yog' yel' zak'zi'ka' ba ben ble'ile daa benjilall'le Crístóna'? Non' lez bi gakan ka'z. <sup>5</sup> Chioza' bzoe' Espíritu che'na' loo yichjilall'do'lena' na' bliile' le' yel' wak che'na', aga ni che daa chonle ka na leyan', san daa wyajle'le xtill' Crístonan'.

<sup>6</sup> Ka ben dii Abrahama', wyajli'e che Chioza', na' daa wyajli'e, Chioza' wne' goke' beñ' li beñ' shao' lawe'na'. <sup>7</sup> Chiyal' inezile dga: beñ'ka' chajle' che Chioza', legak-en' nakgake' dowalj xiin dia che dii Abrahama'. <sup>8</sup> Cho'a Xtill' Chioza' nan blлие' bia' che beñ'ka' bi nak beñ' Israel lengake' yiyakgake' beñ' li beñ' shao' lawe'na' shi gonjilall'gake'ne'. Na' bi'e dill' wen dill' koba' kana' golle' dii Abrahama': "Ni cho' li' gak wen che yog' beñ' lle' zbii zkaan yell-lioni." <sup>9</sup> Na' Chioza' chonleeye' beñ'ka' chonjilall' le', ka bene' che dii Abrahama' daa benjilallee le'.

<sup>10</sup> Beñ'ka' non lez gakgake' beñ' wen daa chongake' daa na leya', ba mbiayi'gake'. La' Cho'a Xtill' Chioza' nan: "Ba nakten kwiayi' beena' bi saki gone' yog'lojte daa nllia leya' bia'." <sup>11</sup> Na' nakbia'cha aga no nak beñ' li beñ' shao' lao Chioza' daa chone' daa na leya'. Cho'a Xtill' Chioza' nan: "Beena' nak beñ' li beñ' shao' daa nonjilallee nad', beenan' ibane'." <sup>12</sup> Na' aga na leya' chiyal' gonjilall'cho Chioza', san nan: "Nottezə beñ' chon doxen ka na leya' si'e banez yel' mban che'na'."

<sup>13</sup> Crístóna' wxak'zi'e lee yag cruza' ka to beñ' mal ni checho kwenche bi kwiayi'cho daa bi choncho daa na leya'. La' Cho'a Xtill' Chioza' nan: "Ba mbiayi' beena' wwal'gake' to lo yag." <sup>14</sup> Gok ka' kwenche ka le' bi nakle beñ' Israel lenle gonjilall'lene', na' Chioza' gone' wen chele ka bchebe' gone' che dii Abrahama'. Na' shi gonjilall'cho Cristo Jesúsá', Espíritu che Chioza' soa-lene' cho', kon ka bchebe' gone' checho.

<sup>15</sup> Le' beñ' bish' na' le' beñ' zan', cheenid' wshaljlen' le' ka choncho cho' beñ' yell-lío: Kat' to beñ' gone' to yish dii zakii na' ba nakchan, aga no gak ina bibi zkaan ni bich gak wzanche' cho'a dill'ka' le'inna'. <sup>16</sup> Na' kan' nak daa bcheb Chioza' gone' che dii Abrahama' len xiin dia che'na'. Cho'a Xtill' Chioza' bi nan: "xiin dia che'ka'", san nan: "xiin dia che'na'". Bi choe'n dill' che beñ'ka' shesh shan lo dia che'na', san che toz Crístóna', beena' golj lo dia che'nan' cho'en dill'. <sup>17</sup> Dga nia' naa zejin Chioza' bi bzoe' ka'lə daa bchebe' gone' che dii Abrahama' ka bi'e dii Moiséza' ley che'na' wde tap guioa shichoa yiz. La'kzi Chioza' bi'e leya', bi wlej yichje' daa bchebe' gone' che dii Abrahama'. <sup>18</sup> Na' shi chonan byen goncho daa na leya' goktgui ikaacho daa bcheb Chioza' gone', bich nakan daa bchebe' gone' cho' ka'zə, shi naa. Per Chioza' bchebe' wi'en dii Abrahama' ka'zə.

<sup>19</sup> Shi ka' nakan, ¿berache be' Chioza' leya'? Bi'e leya' kwenche gakbe'i beñ' bi chongake' ka cheenile'. Na' blлие' bia' gonan llin shlak bin' yid Crístóna', beena' bcheb Chioza' galjə lo dia che dii Abrahama'. Chioza' bchine' anjlka' be'gake' ley che'na' dii Moiséza', na' bchine' dii Moiséza' bzajniile' beñ'ka' ka nan. <sup>20</sup> Na' Chioza' bi byalljile' beñ' yoblə wzajniile' dii Abrahama' daa bchebe' gone' che', san kwinkze' bzajniile'ne'.

<sup>21</sup> ¿Achakile Chioza' bititjile' xtilleena' daa bchebe' gone' che dii Abrahama' ka bi'e ley che'na'? Bi nakan ka'. La' shel' leya' gak gonan yel' mban checho, ba biyakcho beñ' li beñ' shao' daa choncho ka nan, shel'ka'. <sup>22</sup> Cho'a Xtill' Chioza' nan yog'loj' beñ' ndakw

nchejgake' lao saaxyana', na' ben'ka' gonjilall' Jesucristona' gaki chegake' daa ba bcheb Chioza'.

<sup>23</sup> Kana' zi' yid beena' gonjilall'cho, na' nta'kw nchej leya' neto' ben' Israel, axt ki Chioza' bliile' neto' Crístonan' yisle' ben'ka' gonjilall'gake'ne'. <sup>24</sup> Na' leya' goklenan' neto', gokan ka to ben' nak lall' nee chap chwie' xi in ben', axt ki bid Crístonan' benjilall'nto'ne' na' biyaknto' ben' li ben' shao' lao Chioza'. <sup>25</sup> Na' naa daa ba bla' beena' nonjilall'cho, bich chñabia' leya' neto'.

<sup>26</sup> Daa ba nonjilall'le Cristo Jesúsza', ba nakle xiin Chioza'. <sup>27</sup> Yog'lole, le' ba wchoale nisa' daa nonjilall'le Crístonan', ba billa'le na' ba nsa' chele ka nsa' che' daa naklene' toz. <sup>28</sup> Na' cho' nakcho Crístonan' txen, laa ben' Israel, laa ben' bi nak ben' Israel, laa ben' ndoo lla yel chone' xshin ben', laa ben' chon xshinkze', laa noolə, laa ben' byo, ba nakcho toz. <sup>29</sup> Na' shi nakcho lall' na' Crístonan', dii l'icha nakcho xiin dia che dii Abrahaman', na' lencho chido'cho daa bcheb Chioza' gone' che'.

**4** Kin cheenid' inia' le': bi'na' gak lall' na'b' daa de che xabaa, shlak ni nesh'b' toz ka zaklebib' wen llinka' nap xabaa, la'kzi leban' gaki cheb' yog'lo'le dii de che'. <sup>2</sup> Na' nzoa xabaa ben' chap chwiagake' le'b' na' chgoogake' xnezi yog'te dii gom' axt ki illinch llana' bllia xabaa bia' bich soab' xni'a ben'ka'. <sup>3</sup> Ka'kzan gok checho kana' bin' shajniicho, na' wnocho diika' na ben' yell-lioki chonan byen goncho. <sup>4</sup> Na' ka bllin lla, Chioza' bselee Xiine'na', wxan to nool le', na' wzo'e xni'a ley che dii Moiséza' <sup>5</sup> kwengche yisle' nottezə ben' zoa xni'a leya' na' yiyake' xiin Chioza'. <sup>6</sup> Na' daa ba nakcho xiine', bselee Espíritu che Xiine' Jesucristona' loo yichjall'do'choni, na' Espírituna' chone' kwengche che'cho Chioza': "Xadawaa." <sup>7</sup> Na' naa, bich nakle ka ben' ndoo lla yel chone' xshin ben', san ba nakle xiin Chioza'. Na' daa ba nakle xiine', ba nonle lez ikaale daa chido' ben'ka' nak xiine'.

<sup>8</sup> Kana' bin' gombia'le Chioza', na' wzoale xni'a diika' benjilall'le, diika' bi nak dowalj chios. <sup>9</sup> Per naa ba nombia'le Chioza', wa wench inacho ba nombia' Chioza' le', zberache sto shii wzoazle xtillii diika' na ben' yell-lioki chonan byen gonle, diika' bibi zakii? zAcheenile yizoale xni'a diika' sto shiin? <sup>10</sup> Na' lenzle chaple balaan llaka', beo'ka', na' kat' chibii lla yelka', na'ch yizka', diika' chakile nakgakan dii llialo. <sup>11</sup> Le chxollid' shi gaktadz xshin Chioza' daa ba ben' ladjlana'.

<sup>12</sup> Le' ben' bish'dawaa na' le' ben' zandawaa, chat'yoid' le' gonle ka chon', la' nad' ba ben' kwin' ka le' bi nole leya' na' bich zoa' xni'ayinna'. Aga chllaan nia' le' ka', la' bigan' bi gonile nad'. <sup>13</sup> Le'kzə nezile ni che to yillwe' dii be'x' nad' bgaan' lall'-lana', na' kan' gok be'len' le' dill' wen dill' kob che Crístonan' dii nech. <sup>14</sup> Na' bi benile nad' nakzi ni bi bzoale nad' ka'lə ni che yillwe'na' gok', la'kzi gokan to dii zed chele. San bleble nad' ka to anjl che Chioza' wa ka kwin Cristo Jesúsza'. <sup>15</sup> zGaran' yel' chiba chizaki chelena' nape kana' wzoalen' le'? Nezid' shel' wx'e'ile kwej jalaolena' gonlen nad' kana'. <sup>16</sup> Na' naa, zachllaale nad' daa ba wnia' le' dill' l'iki?

<sup>17</sup> Ben'ka' bidli' bidsedi le', aga do lall'gaken' bli' bsdgakile' le'. San daa cheenzgakile' yi'laale neton' na' gonle legake' txen. <sup>18</sup> Nakkzan wen toshiizi soa ben' wli' wsedile' le' kon shi gongake'n do yichj do lallgake', kwengche aga to kat' yidwiaz' le' wli' wsedid' le'. <sup>19</sup> Le' xi in dawaa, sto shii chak cha' ka chak che noola' chllagloe' sane' bi'do' che'na' daa chi' yichjlikz' gakle ka chazlall' Crístonan'. <sup>20</sup> Shel' wx'e'id' naate soalen' le' we'len' le' dill' goll-lall', la' bi chajniid' biche chonzle ka'.

<sup>21</sup> Ka le' cheenile gonle daa na leya', li inashki nad': zabin' yenile ka na leya'? <sup>22</sup> Cho'en dill' wzoa chop xiin dii Abrahaman': tob' gok xiin noola' wxi'gake' bene' llin che'ka', na' stob' gok xiin beena' gok nool che' dowalj, beena' biga gok wen llin che ben'. <sup>23</sup> Xiin nool wen llin che'ka' wzoab' daa wzoalen l'jwellgake'. San noola', beena' biga gok wen llin che ben', wzoa xiine' daa bcheb Chioza' wi'e to bi' chegake'. <sup>24</sup> Daa gok che noolka' chop, chzajniin cho' che chop daa be' Chioza' ben' Israelka'. Dii Agaran' zaklebile' leya' daa be' Chioza' lo yaa Sinaína'. Na' len' goke' xna' beena' wdoo lla yel bene' xshin ben'. <sup>25</sup> Na' zaklebile' yaa Sinaína' daa zoa Arábiana', na' nake' ka yell Jerusalénna' daa zoa naa. La' yog' ben'ka' chesh chalj yella' nakgake' ka ben' ndoo lla yel chone' xshin ben' daa zoagake' chongake' daa na leya'. <sup>26</sup> San cho' l'jzaocho Jerusalénna' daa zoa yabana' gana' zoa Chioza', bi nakcho ka ben' ndoo lla yel chone' xshin ben', la' bi zoacho xni'a leya'. <sup>27</sup> La' Cho'a Xtill' Chioza' nan:

Li' nool will, ben' kono xiinin zoa, biba bizaki.

Li' bin' tio' lo yel' zak'zi' che yel' san bi'do', besyaa yel' chiba chizaki cho'na'.

La' noola', beena' wchoonlall' ben' che'na'ne', soach xiine' aga ka beena' zoalen ben' che'na'.

<sup>28</sup> Na' le' ben' bish'dawaa na' le' ben' zandawaa, nakle ka dii Isaaca', beena' bcheb Chioza' wi'e dii Abrahaman'. <sup>29</sup> Na' ka gok kana', bi'na' golj daa wzoalen l'jwellgake', biya dii benib' bi'na' golj kon yel' wak che Espíritu che Chioza', kakzan chak naa. <sup>30</sup> Na' Cho'a Xtill' Chioza' nan: "Bilag noola' chon xshino'na' len xiine'na'. La' bi lem' ikaab' daa chido' xiin beena' biga gok wen llin che ben'." <sup>31</sup> Na' naa, le' ben' bish'dawaa na' le' ben' zandawaa, aga nakchcho ka xiin beena' wdoo lla yel bene' xshin ben', san nakcho ka xiin beena' biga gok wen llin che ben'.

**5** Crístonan' ba bisell bil'ee cho'. Na' chiyal' soaghech-le kwengche bich soale xni'a daa wtakw wchejan le' dii yoblə.

<sup>2</sup> Nad' Pablo chñabid' le' wzenagle dga nia' le'. Shi le' we'le latj koogake' le' sen' daa le circuncisión, bibi zjanayin nale nonjilall'le Crístonan', shi naa. <sup>3</sup> Sto shii nia' le', nottezə ben' wi'e latj koogake'ne' sen' daa le circuncisión chonan byen gone' yog'lo'le daa na leya'. <sup>4</sup> Le' chonle ka na leya' daa chakile yiyonan le' ben' li ben' shao', Crístonan' ba bil'ala'ole daa chakile ka', na' ba bzoale ka'lə yel' goklenna' ben Chioza' chele. <sup>5</sup> San neto', daa zoalen Espíritu che Chioza' neto', nonnto' lez yiyaknto' ben' li ben' shao' lawe'na' daa nonjilall'nto' Crístonan'. <sup>6</sup> Na' shi nonjilall'cho Cristo Jesúsza', aga bi

zakii lawe'na' sho'cho seŋ daa le circuncióŋ wa bi sho'chon. Daa zakii lawe'na' gonlilall'chone' na' gaki-cho beŋ'.

<sup>7</sup> Zejkzle wen lo nez lina' daa ba yoole, she'l'ka'. ¿No benlejj benganzi le' kwenche bich chzenagle dill' lina'? <sup>8</sup> Aga nak dga che Chios, beena' gox wŋab le'. <sup>9</sup> Dezə dill' nan "lat'zə le vadúrana' chisgolan doxen kwa che yetxtila". <sup>10</sup> Nxenilallaa Xanchona' gaklene' le' kwenche bi shajle'le che daa bi nak dill' li. Na' Chioza' wsak'zi'e nottezə beena' gonlejj gonganile' le'.

<sup>11</sup> Ka nak nad', le' beŋ' bish'dawaa na' le' beŋ' zandawaa, she'l' ni nia' chiyal' sho' beŋ' seŋ daa le circuncióŋ, aga wsak'zi' beŋ' Israelka' nad', she'l'ka'. La' she'l' ni chon' byen gongake'n, bi gakzbangakile' xtill' Crístona' daa nia' wite' lee yag cruza' ni checho kwenche gakcho beŋ' wen lao Chioza', she'l'ka'. <sup>12</sup> Ka nak beŋ'ka' chdzə chongake' byen sho' beŋ' seŋ daa le circuncióŋ, iwentelə she'l' wchogtega kwingake' doloŋte gana' chgwee seŋna'!

<sup>13</sup> Le' beŋ' bish'dawaa na' le' beŋ' zandawaa, Chioza' gox wŋabe' le' kwenche yiyell' yila'le lao dii mala'. Na' aga ni che biyell' bila'le na' gonzle kon daa nazə beli chen chelena'. San li gaken ljwell-le na' li gaki ljwell-le ganga. <sup>14</sup> La' doxen daa na leyan' choncho shi choncho daa bliia Chioza' bia' daa na: "Chiyal' gakilo' bish' ljwello'na' ka chaki kwino'." <sup>15</sup> Li wsak' bi til' wsheshle kwenche ki wzoazi'yaa ljwell-le na' wliayi' ljwell-le.

<sup>16</sup> Ki nia' le' ŋaa: li gon ka cheeni Espíritu che Chioza', na' bich gonle daa na beli chen chelena'. <sup>17</sup> La' daa chzelall' beli chenna' bi nllaguin Espíritu che Chioza', na' daa cheeni Espíritu che Chioza' bi nllaguin daa chzelall' beli chenna'. Na' ni to diiki bi nllagui ljwellin, na' daan bi choe'gakan latj gonle daa chaklall'le. <sup>18</sup> Per shi chzenagcho daa na Espíritu che Chioza', bich zoa-cho xŋi'a leya'.

<sup>19</sup> Nakbia'cha diikin chon beŋ'ka' chzenaggake' daa che' beli chen che'ka': chdalengake' xiŋ xool beŋ' wa xiŋ xyo beŋ', chongake' daa nak dii zban, chibagakile' gongake' yog' daa na beli chen che'ka', <sup>20</sup> choe'la'ogake' yaj yag, chlangake' ye'l' willa'na', chakzbangakile' beŋ', chakdil-lengake' beŋ', chakxe'gakile' beŋ', chllaa chlokgake', chibagakile' to jezgake' gak wen chegake', chibagakile' kwegkake' dil' chix' na' gonte cheləgake'. <sup>21</sup> Nakgake' beŋ' xe', nakgake' wen xya, nakgake' beŋ' weezo, chajgake' ga cha'l' lŋi na' chzoll chnitgakile' na' chjeej chjtaogake' ka ŋla' ka nte, na' chongake' bichlə dii bi yejni'a. Na' nia' le' sto shii, ka dillaa ba be'len' le', beŋ'ka' chon ka' aga wak yillingake' gana' chŋabia' Chioza'.

<sup>22</sup> San beŋ'ka' chzenaggake' daa na Espíritu che Chioza' chakgakile' bish' ljwellgake', chiba chizak'gakile', zoagake' mbalaz, napgake' ye'l' chxenall', chle'shi'gakile' beŋ', chongake' wen che beŋ', chongake' daa chchebgake', <sup>23</sup> nakgake' beŋ' gaxjlall', na' chŋabia' kwingake'. Na' beŋ'ka' chon diiki aga bi ley de dii ŋan bi chongake' wen. <sup>24</sup> Na' beŋ'ka' ba nak lall' na'

Cristo Jesúza' bich choe'gake' latj ŋabia' beli chenna' legake' daa nakgake' ka beŋ' ba wit lawi daa chzelall' beli chen che'ka'. <sup>25</sup> Shi ba yoo Espíritu che Chioza' loo yiçhlall'do'chona', chiyal' we'cho latj ŋabi'e cho'.

<sup>26</sup> Bi chiyal' gakcho beŋ' cha'sib, ni bi chiyal' wshagdilzə ljwellcho, ni bi gaxe'i ljwellcho.

**6** Le' beŋ' bish'dawaa na' le' beŋ' zandawaa, shi ŋezile to beena' nakle txen chone' dii mala', ka le' chzenagle che Espíritu che Chioza' chiyal' gakenlene' kwenche yigooshlilallee, na' bi gonilene' zi'bia'. Na' li se wŋeyi che kwinle kwenche ki lenle yixople lao dii mala'. <sup>2</sup> Li gaken ljwell-le bittezə dii chak chele, la' kan' cheeni Crístona' gonle.

<sup>3</sup> Shi zoa beŋ' chon kwine' beŋ' choo beŋ' xen, chziye'z kwinen'. <sup>4</sup> To tole chiyal' yiya yiyiljle nak nsa' chele. Na' shi ba chizoile chonle dii wenna', li yiba yiza-ki, na' bi ŋazle chonchle ka beŋ' yoblə. <sup>5</sup> La' to tocho chiyal' sho' yiçhcho goncho daa naki checho.

<sup>6</sup> Beŋ'ka' chzenag cho'a xtill' Chioza' chiyal' we'gake' bi de chegake' beena' chli' chsedi legake'.

<sup>7</sup> Bi gatzile wak siye'le Chioza'. Daa gaz kwekle lezannan' yizi' yilaple. <sup>8</sup> Beena' choe' cho'a xbayi beli chenna', kwiayee daa chzenague' cheyin. San beena' chon ka cheeni Espíritu che Chioza', yizi'e banez ye'l' mban zejli kaŋi daa chzenague' che'. <sup>9</sup> Bi chiyal' llixaki-cho goncho dii wenna', la' wllin lla yizi'chon banez kon shi bi yidinjicho. <sup>10</sup> Na' daan, kat' de xlatjin, chiyal' gonicho wen yog' beŋ', na' lliarote beŋ'ka' nakcho toz nonlilall'cho Crístona'.

<sup>11</sup> Kwin' chisyoll' chzej' yishi. † Li wwiakachi ka nak let' ye'l' cha'ki. <sup>12</sup> Beŋ'ka' chonzə byen sho'le seŋ daa le circuncióŋ, chongake'n kwenchzə kono bi ŋa chegake', na' kono wsak'zi' legake' daa choe'gake' xtill' Crístona', beena' wit lee yag cruza'. <sup>13</sup> La' ni beŋ'ka' yoo seŋna' bi chizogakile' gongake' doxen ka na leya'. San cheenz-gakile' sho'le seŋna' kwenche wshalj wshongake' ba bengake' gan yoolen. <sup>14</sup> Ka nak nad', biga cheenid' wshalj wshon' che kwin', san wshalj wshon' che daa ben Xancho Jesucrístona'. La' daa wite' lee yag cruza' bich bi wŋeyi zia' shi bi ŋa beŋ' cha', na' ka'kzə beŋ' yell-lioka' bich ndegake' nad' kwent. <sup>15</sup> Bibi zjanayin sho'cho seŋna' wa bi sho'chon, san daa ba bikob Chioza' yiçhlall'do'chonon', lennan' zakii.

<sup>16</sup> Yiyesh'lall'shgyai Chioza' yog'lo! beŋ'ka' chon ka ba wnia', na' gone' ka soagake' mbalaz, la' legaken' nakgake' dowalj beŋ' Israel, beŋ'ka' nak yell' che'.

<sup>17</sup> Na' ŋaa, bich cheenid' no kwekw nad' dii zed, la' kwerp cha'ni nsa'n yill' che yog' diika' ba wxak'zi'a daa chon xshin Xancho Jesúza'.

<sup>18</sup> Le' beŋ' bish'dawaa na' le' beŋ' zandawaa, Xancho Jesucrístona' soalenshgue' yog'lo!tele na' gaklenshgue' le'. Kan' gakan.

† Kwin' chisyoll' chzej' yishi: Páblona' bchine' beŋ' bzeje' dillaa bi'e, per kwine' bzeje' to chop cho'a dill' gana' chiyoll' yisha' kwenche gokbe'gakile' len' bseleen.

# Efesios

1 Nad' Pablo nak' postl che Jesucristona' kon ka chaklall' Chioza'. Chwap' le' chiox, le' lle'le yell Éfesona', na' nakle lall' na' Chioza' daa nakle Cristo Jesúsza' toz, beena' chonjilall'le. 2 Chñabid' Xacho Chioza' na' Xancho Jesucristona' gaklenshgagake' le' na' wzoagake' le' mbalaz.

3 Chiya! we'la'ochō beena' nak Chios che Xancho Jesucristona', beena' nak Xe'. La' ba benleeye' cho' na' ba naki checho yog' dii wenna' de yabana', daa nakcho Crístona' toz. 4 Chioza' wleje' cho' gakcho Crístona' toz kana' zi' xe silte yell-lioni kwenche gakcho ben' nxi nyech na' bibi xto!cho gat' lawe'na'. Daa le chakile' cho', 5 wlo'e xnezin kana' zi' xe silte yell-lioni gakcho xiine' kon ka wyazlallee gone' checho, daan bselee Jesucristona' ni checho. 6 Na' daan, toshiizi we'la'ochō Chioza' daa bene' to dii wen inlleb checho daa ba nakcho Xiine'na' toz, beena' le chakile'. 7 Ba nakchone' toz daa wdixje' xto!choka' kana' blalj xchene'na' ni checho kwenche Chioza' bizi'xene' saaxya chechoka' daa naklikze' ben' wen inlleb. 8 Na' dii xen wal chaklen Chioza' cho' daa none' cho' ye! sin'na' len ye! chajniina'. 9 Na' ba bliile' cho' daa goklallee gone' daa kono wnezi kani'yi, daa bliie' bia' gon Crístona'. 10 Na' bliie' bia' illin lla gak ka wyazlallee na'ch yiyone' toz yog'lo! dii bxe bsile', ka diika' lle' yabana' na' ka diika' lle' lo yell-lioni, kwenche Crístona' inabi'e lao yog'lo!an.

11 Chios, beena' chon yog'lo! daa chaklallee kon ka chgwee xnezin gak, wleje' cho' kana' zi' soatecho kwenche gaki checho dii wenna' wi'e ben'ka' nak Crístona' toz. 12 Na' goklallee zigaate neto' naknto' ben' Israel wxenilall'nto' Crístona' kwenche shajlawee daa nake' ben' choo ben' xen. 13 Na' lezkza' le', wyajle'le che Crístona' na' bénlene' txen ka benile dill' wen dill' kob che'na' daa nak dii licha daa choe' dill' yisle' cho' kwenche bi kwiayi'cho. Na' ka wyajle'le, Chioza' bli'e ba nakle lall' nee daa bzoe' Espíritu Sáto che'na' loo yichjlall'do'lēna' kon ka bchebe' gone'. Na' daa bene' ka', wak inacho wlo'e le' to sen daa chli'n nakle lall' nee. 14 Na' daa zoa Espíritu che'na' loo yichjlall'do'chona', nezichu gak lo na'cho yog' diika' nchebe' gone' cho' kat' illin lla yizi' yikee cho' nakcho lall' nee, kwenche koochone' balaan daa nake' ben' choo ben' xen.

15 Na' daan, ka wnezid' nonjilall'le Xancho Jesúsza' na' le chakile' yog' ben'ka' nak lall' na' Chioza', 16 bi chsanlallaa wi'a Chioza' ye! choxken ni chele na' chñab' gaklene' le' kat' choe'lwillee. 17 Choe'lwil' Chios che Xancho Jesucristona', beena' nak Xacho, beena' liizelozi chido!ee sho'e balaan xen, chñabidee gon Espíritu

che'na' le' ye! sin' che'na' na' wzajniile' le' kwenche gombia'chlene'. 18 Na' chñabidee wzoe' beeni' che'na' loo yichjlall'do'lēna' kwenche inezile bin nonle lez daa ba gox wñabe' le', na' ka mbalaz inlleb nak daa wi'e ben'ka' ba nak lall' nee, 19 na' kwenche gakbe'ile ka nak ye! wak choo ye! xen che'na' daa bi chiyoll chido daa chaklenan cho' nonjilall'chone'. Lennan' ye! wak choo ye! wak xen 20 daa bli'e kana' bisbane' Crístona' ladj ben' wetka' na' wlekwe'ne' sh!aa de sh!i che'na' yabana', 21 gana' nzoe'ne' chñabia'che' aga ka yog'lo! anj!ka' na' dii xiw'ka' nap ye! wak na' ye! wñabia'. Na' zeyi che' kochno zoa, ni kochno soa, ben' gakch ben' zak'chi ka le!. 22 Na' bzoe' xni'a Crístona' yog'lo!te dii de, na' nzoe'ne' chñabi'e lao yog'lo!cho cho' nakchone' toz, ka chon yichjchona' chñabi'an doxen kwerp chechona'. 23 La' cho' nakchone' toz, zaklebicho kwerp che'na'. Na' toshiizi zoalene' cho' na' chñabi'e cho', la' len' chñabi'e yog'lo!te dii de doxen yell-lioni na' yabana'.

2 Kana' bin' gonjilall'le Crístona', gokle ka ben' net lao Chioza' daa wzoale bxiñj blienle. 2 Na' wdale benle kon ka nazan chele, ka chon nottezə ben' yell-lío, ben' bi nombi'e Chioza'. Na' bzenagle cheyi daa chñabia' dii xiw'ka' ze lo llazə, daa chñabia' yichjlall'do' ben'ka' bi chzenag che Chioza'. 3 Ka'kzan ben yog'lo!cho kana', bencho kon daa nazan checho, be'cho cho'a xbayi beli chen chechoni na' yog'lo! diika' wza'lall' loo yichjlall'do'choni. Na' daa bencho ka', chido!cho ye! zak'zi' che Chioza' kon ka chido! gak che ben'ka' bi chzenag che'. 4 Per daa nak Chioza' ben' lall'do' xen inlleb na' le chakile' cho', 5 beñe' ye! mban checho zejli kani' ka benjilall'cho Crístona', beena' biban ladj ben' wetka', la'kzi gokcho ka ben' net daa choncho saaxya-ka'. Na' daa nak Chioza' ben' wen inlleben, bisle' cho' kwenche bi kwiayi'cho. 6 Na' daa nakcho Cristo Jesúsza' toz, ka bisban Chioza'ne' ladj ben' wetka', lenkzchon bisbane' daa beñe' cho' to ye! mban kob. Na' ba naktēn l!janabia'lenchone' yabana'. 7 Chioza' bene' ka' kwenche llaka' zi' za' wli'lawin nake' ben' wen inlleb daa bene' to ye! goklen xen checho daa bselee Crístona' ni checho. 8 La' ye! ben' wen che'nan' bisle' cho' kwenche bi kwiayi'cho daa ba nonjilall'cho Crístona'. Aga inacho daa nakcho ben' wēnan bisle' cho', san nakan to goklen daa bene' checho ka'zə. 9 Na' bi gak gakzcho cha'sib, la' aga daa choncho dii wēnan' bisle' cho'. 10 La' Chioza' bikobe' ye! mban chechona' ka bene' cho' lall' na' Crístona' kwenche soacho goncho dii wenna' ba wlo'e xnezin goncho.

11 Ka le' bi nakle ben' Israel, ben' Israelka' nsi'gake' le' Ben' bi yoo sen daa le circuncióñ, na' legake' nsi'

kwingake' Ben' yoo sen daa le circuncisión. Li Iljedini ka gokle kana'. <sup>12</sup> La' kana' bin' gombia'le Crístona', gokle ka ben' zit' laonto'na', neto' wlej Chioza' kwenche naknto' yell che', na' Chioza' aga bchebe' gaklene' le' ka bchebe' gaklene' neto' ben' Israel. Na' wzoale yell-lioni bi bembia'le Chioza' ni bi benle lez gak wen chele. <sup>13</sup> Kana', gokle ka ben' zit' laonto'na'. San naa, ba nakcho toz daa nonlilall'le Cristo Jesúsza', beena' blalj xchene'na' wite' ni checho. <sup>14</sup> Crístona' bene' ka bizoalen Ijwellcho wen. Kana', bi ble'shii Ijwellcho, san naa, ba biyone' cho' toz daa bsol bnite' daa benan ka bwiyi Ijwellcho. <sup>15</sup> Daa bzani kwin Crístona' wite' ni checho, bchogue' daa wna ley chento'na' chiya' gonnto'. Bene' ka' kwenche neto' ben' Israel na' le' bi nakle ben' wllal chento' biyakcho toz lawe'na'. Na' ba bizoe' cho' wen. <sup>16</sup> Na' daa wite' ni checho lee yag cruza', bizoe' cho' wen kon Chioza', ka le' na' ka neto', na' biyakcho toz na' bich chakzbani Ijwellcho.

<sup>17</sup> Crístona' bidtixji'e dill' wen dill' koba' daa na yog'cho wak soalencho Chioza' wen, ka le' nakle ben' zit' na' ka neto' naknto' ben' yell che'. <sup>18</sup> La' daa nonlilall'cho Crístona', ka le' na' ka neto', wak ibig'cho lao Xacho Chioza' daa ba be'ne' cho' Espiritu che'na'. <sup>19</sup> Na' le' bi nakle ben' Israel bich nakle ka ben' zit', san ba lenle ben'ka' nak yell che Chioza', na' Chioza' ba none' le' ka ben' loo yoo. <sup>20</sup> Le' nakle ka to yoo, na' neto' postl na' ben'ka' chyixjee daa che' Chioza' legake' naknto' ka len yooná, na' kwin Jesucristona' nake' ben' llialaote ka yaja' daa mbejlawi, yaja' daa ba nchejcha yooná. <sup>21</sup> Na' Jesucristona' chone' kwenche yog'cho cho' nakchone' txen gakcho toz na' gakcho ka to yoodo' gana' zoa Chioza'. <sup>22</sup> Na' lekzka' Jesucristona' chone' kwenche yog'cho, ka neto' na' ka le', gakcho ka to yoo gana' zoa Chioza' daa zoalen Espiritu che'na' cho'.

**3** Nad' Pablo dia' lillyani daa chyixje'id' le' xtill' Crístona', le' bi nakle ben' Israel. <sup>2</sup> Ba nezkzile' dii wen na' ben Chioza' daa bene' lall' na' wi'a xtilleena' laole'na'. <sup>3</sup> Ba bzajniile' nad' daa kono wnezi, kon ka ba bzej' le' to chop cho'a. <sup>4</sup> Na' kat' wlable yishi, gakbe'ile ba bzajniile' nad' daa kono wnezi che Crístona'. <sup>5</sup> Diaka' ba wde bi wnezgakile' dga ba bzajniile' Espiritu che'na' neto' postl che' len ben'ka' wdixjee daa goll Chioza' legake'. <sup>6</sup> Na' dga kono wnezi nan: yog'cho cho' chajle'cho dill' wen dill' kob che Cristo Jesúsza', ka le' bi nakle ben' Israel na' ka neto' ben' Israel, nakcho toz na' txen ikaa'cho dii wenna' bcheb Chioza' gone' checho.

<sup>7</sup> Yel' ben' wen che Chiozan' wleje' nad' na' bzoe' nad' gon xshine'na', na' chaklentie' nad' kon yel' wak che'na' kwenche choe'len' ben' dill' wen dill' kob che Crístona'. <sup>8</sup> Nad' chakid' shlas aga no nak' lao yog' ben' nak lall' na' Chioza'. Per la'kzi aga bi zakaa, Chioza' wleje' nad' kwenche we'len' ben'ka' bi nak ben' Israel dill' wen dill' kob che Crístona' daa le zak'chga na' bich bi de dii wsaklebichon. <sup>9</sup> Chioza', beena' bxe bsil yog'lojte dii de, kani'yi wlo'e xnezin gone' to dii gone', na' ni to kono golle' ka nak daa gone'. Na' naa ba bene'n lall' na' wzajniida'n ben' <sup>10</sup> kwenche ni checho, cho' nakcho toz nonlilall'cho Crístona', gakbe'i anjika' lle' yabana'

na' dii xiw'ka' doxen ka nak yel' sin' che Chioza'. <sup>11</sup> Na' daa bselee Xancho Cristo Jesúsza', ba bene' ka wlo'e xnezin gone' kana' zi' wxe wsiltie' yell-lioni. <sup>12</sup> Na' daa nonlilall'cho Crístona' na' nakchone' txen, de latj checho we'llwillcho Xacho Chioza' na' nezicho wzenague' checho. <sup>13</sup> Na' nia' le', li gon goklen bi yidinjile ni che dga chllagloa' daa be'len' le' xtill' Crístona', san li yibayi daa chzak'zi'a ni chele.

<sup>14</sup> Daan, chchek' xib' choe'llwill' Xacho Chioza', beena' nak Xa Xancho Jesucristona', <sup>15</sup> beena' ben kwenche yog'cho cho' nakcho xiine' nakcho toz, ka ben' lle' yell-lioni ka ben' lle' yabana'. <sup>16</sup> Na' daa nape' doxen yel' waka', chnabidee kwenche Espiritu che'na', beena' yoo loo yichjall'do'lena', gone' ka gakchachle <sup>17</sup> na' soachle gonlilall'le Crístona' kwenche toshiizi soalene' le', na' yel' chakina' wde loyin lo yel' mban chelena' kwenche soatezi soale gakilene' na' gaki Ijwell-le, <sup>18</sup> na' gakbe'ile, le' na' yog' ben'ka' nak lall' na' Crístona', ka chakchgaile' cho', na' biga yiyoll yido yel' chaki che'na'. <sup>19</sup> Cheenid' gombia'le yel' chaki che'na' daa nak liizelozi dii xen inleeb, daa kono illin shajniile' kwasloj, kwenche yiyoll yido gake doxen ka cheeni Chioza'.

<sup>20</sup> Chioza' chidojee sho'e balaan daa chak chone' dii xench aga ka daa chnabichone' wa daa chakicho gone' checho ni che yel' wak che'na' daa zoalen cho'. <sup>21</sup> Cho' nonlilall'cho Cristo Jesúsza' chiya' koocho Chioza' balaan toshiizi na' zejli kani ni cheyi daa bselee Crístona' ni checho. Kan' nakan.

**4** Nad' dia' lillyani daa chyixji'a xtill' Xancho Jesucristona'. Na' chat'yoid' le' soale gonle wen kon ka chiya' goncho cho' ba gox wñab Chioza'. <sup>2</sup> Li gak ben' gaxjall', li ile'shii ben', li gap yel' chxenlall' chele ganga na' li gaki Ijwell-le. <sup>3</sup> Espiritu Sántona' bene' ka yog'cho biyakcho toz, na' li gon byen soalen Ijwell-le wen kwenche toshiizi gakcho toz. <sup>4</sup> Yog'cho, cho' nonlilall'cho Crístona', zaklebicho to kwerp daa nakcho toz; na' toz Espiritu yoo loo yichjall'do'chona'; na' toz ka noncho lez gon Chioza' checho daa ba gox wñabe' cho'. <sup>5</sup> Tozə beena' nak Xancho, na' toze'n nonlilall'cho, na' toz ka zeji daa chchoacho nisa'. <sup>6</sup> Tozə Chioza' zoa, beena' nak Xa yog'lojcho. Na' len' chnabi'e lao yog'lojcho; na' chchine' yog'cho kwenche chak daa cheenile' gak, na' zoalene' yog'cho.

<sup>7</sup> Per to tocho non Crístona' dii gak goncho kon ka goklallee. <sup>8</sup> Daan, cho'a xtill' Chioza' nan: Ka biyep'e yabana', zinchi'e pres che'ka', na' bi'e dii wen che'na' ben' yell-lioki.

<sup>9</sup> Na' ka nak daa nan "biyep'e", zejin zigaate betje' bide' yell-lioni. <sup>10</sup> Na' beena' bid yell-lioni, lekzen' biyep'e yabana' gana' zoe' chnabi'e lao yog'lojte dii de. <sup>11</sup> Na' len' bzoe' ben' nak postl che', na' ben' chyixjee daa chi'ene', na' ben' chyixjee dill' wen dill' kob che'na', na' ben' chap chwie' ben'ka' ba nonlilall' le', na' ben' chli' chsedi cho'a xtilleena', <sup>12</sup> kwenche ben'ka' nak lall' nee gak gongake' xshine'na', na' yiyoll yido gakcha yog' ben'ka' nak Crístona' txen, <sup>13</sup> axt ki yog'cho gakcho toz gonlilall'cho Xiin Chioza' na' gombia'chchone'. Na' gakyen'cho ka chiya' gakcho, na' yiyoll yido gak-

cho dowalj beŋ' wen doxen ka nak Crístona'. <sup>14</sup> Na' bich gakzcho ka bi'do' na' shajle'tezcho bittezə daa chyiljall' beŋ', na' ni bi gak gon beŋ' wxiye'ka' gan siye'gake' cho' kwenche shajle'cho daa bi nak dii li. <sup>15</sup> San shajlencho dill' li che Chioza' na' gapcho yel' chaki che'na', na' ka' zej gakchcho beŋ' wen ka nak Crístona', beena' chñabi'e cho', ka chon yichjchoni chñabi'an kwerp chechoni. <sup>16</sup> Ka nak kwerp chechoni, tkwen tkwen wejan nox' ljwellin na' chaklen ljwellin bittezə llin gonan. Ka'kzan cho' nakcho Crístona' txen nakcho ka toz kwerp kwenche to tocho goncho daa noŋe' cho', na' yog'cho zejch chakchacho na' zejch chakchi ljwellcho.

<sup>17</sup> Nia' le' dga kon yel' wñabia' che Xancho Crístona': bich soale gonle ka chon beŋ'ka' bi chonljall'gake' Chioza', beŋ'ka' kon chyiljall'gake' daa bibi zakii, <sup>18</sup> na' nchoł nñiti yichjlall'do'eka' na' bi ntegakile', na' bi nap-gake' yel' mban daa noŋ Chioza' cho', ni bi nom-bia'gake' mbaa nak che Chioza', daa nakgake' beŋ' lall'do' wal. <sup>19</sup> Bichkzə bi yel' zto' nombia'gake', na' biga chjshyagakile' chongake' yog' diika' nak zban. <sup>20</sup> San le', ñezile aga kan' cheeni Crístona' goncho, <sup>21</sup> shi dii jikzə ba benile xtill' Jesús'a' na' ba nzedile soale gonle ka cheenile' kon ka nak dii li che'na'. <sup>22</sup> Na' chiyal' wsanle bich gonle dii malka' benle, na' kwey yichjle yel' mban gol cheleña', la' daa wxiye' beli chenna' len', bñinj bñenan le'. <sup>23</sup> Chiyal' yikob yichjlall'do'leka' na' bich bi dii mal sa'lall'le. <sup>24</sup> Na' chiyal' yikob yel' mban chele-na' kwenche yiyakle dowalj beŋ' li beŋ' shao' lega beŋ' nak xiñ Chios.

<sup>25</sup> Daan, bich chiyal' siye'le, san to tole chiyal' we'len ljwell-le dill' li, la' yog'cho ba nakcho toz, ka kwerp chechona' nakan toz, la'kzi zan diika' ndil' nllagan.

<sup>26</sup> Kat' illaale, bi wxinj wlenle ni bi koolall'zle, <sup>27</sup> kwenche bi we'le latj che dii xiwaa.

<sup>28</sup> Na' beena' chzi' chban, bich gone' ka', san wchine' ñi'a neena' gone' llin kwenche gape' dii wi'e beŋ'ka' bibi de cheyin.

<sup>29</sup> Na' bi chiyal' we'le dill' zban, san chiyal' we'le dill' wen dill' shao' dii gonan ka soatip soashoshch beŋ'ka' chzenag bin nale na' gaklenan legake'. <sup>30</sup> Na' bi gonle ka soayesh' Espíritu Santo che Chioza', beena' ba nzoe' loo yichjlall'do'chona' kwenche chakbe'icho ba nakcho lall' na' Chioza' shlak illin lla yikee cho', cho' ba biya'o bizi'e.

<sup>31</sup> Chiyal' kwey yichjle yog'loł dii malki: bich koolall'le, bich illaa ilokle, bi koole beŋ' beł ban, bibi gon ñale che beŋ' na' ni sto dii malka' bich gonle. <sup>32</sup> Li gak beŋ' wen beŋ' shao' na' beŋ' chiyesh'lalli bish' ljwellin. Chiyal' yizi'xen che ljwell-le, ka ben Chioza' bizi'xene' chele daa nonljall'le Crístona'.

**5** Daa ba nakle xiñ Chios na' chakile' le', li wsed gonle wen ka chone'. <sup>2</sup> Chiyal' soale gakile beŋ', ka chaki Crístona' cho'. Daa chakile' cho', bzani kwine' wite' ni checho, na' bibayi Chioza' daa bene' ka', ka bibaile' shii xla' bayix'do'ka' bzeygake' lawe'na' kana'.

<sup>3</sup> Bi chiyal' selall'le ñelen ljwell-le wa gonle bichlə dii zban, ni bi selall'le gat' kwe'ile dii xen wal. Ni to diiki bi chiyal' gak ladjlena' daa ba nakle lall' na' Chioza'. <sup>4</sup> Bi

we'le dill' zban, ni dill' dii bi zakii ni dill' dii bi yejni'alal-lii, la' aga dill' ka diikin chiyal' we'le, san chiyal' we'le Chioza' yel' choxken. <sup>5</sup> La' ba ñezkzile ni to beŋ' chñelen ljwellin, wa beŋ' chon bichlə dii zban, wa beŋ' chze-lall' gat' kwe'ile' dii xen, bi yilline' yabana' gana' chñabia' Crístona' len Chioza'. Beena' chzelallii gat' kwe'ile' dii xen, toz ka chone' ka beena' choe'la'o daa nak yaj yag. <sup>6</sup> Bi we'le latj no siye' le' we'lenze' le' dill' dii bi zakii, la' beŋ'ka' chon chiya dii malki, ile'gakile' yel' zak'zi' xen che Chioza' daa bi chzenaggake' che'. <sup>7</sup> Daan, bi chiyal' lenle beŋ'ka' chon ka'.

<sup>8</sup> Kanan', nchoł nñiti yichjlall'do'lena', san ñaa daa ba nakle Xancho Jesucrístona' txen, ba yoo beeni' che'na' loo yichjlall'do'lena', na' chiyal' soale gonle lega beŋ' ba yoo beeni' che'na'. <sup>9</sup> La' beeni' che'na' chaklenan cho' gakcho beŋ' wen, na' beŋ' li beŋ' shao', na' beŋ' choe' dill' li. <sup>10</sup> Li se wñeyi kwenche ñezile bi daa chazlalli Xanchona' gonle. <sup>11</sup> Bi gonle txen diika' chon beŋ'ka' nchoł nñiti yichjlall'do'eka', la' bibi zakii daa chongake', san li gon ka yiyakbe'gakile' bi chongake' wen. <sup>12</sup> La' axt chiyii chido'icho we'cho dill' cheyi diika' chongake' do ngash'zə. <sup>13</sup> Per yog'loł diika' choncho, chli'laogakin lo beeni' che Chioza' nak nakgakan. <sup>14</sup> La' beeni' che'na' chili'n lao yog'te diika' choncho. Daakzan ne':

Li yiban, le' nakle ka beŋ' ches;  
na' li yiyas ladj beŋ' wetka'.

Na' Crístona' kwee beeni' che'na' loo yichjlall'do'lena'.

<sup>15</sup> Na' li se wñeyi wsa' chele wen, na' bi gonle ka beŋ' bi nteyi, san li gakto ka beŋ' sin'. <sup>16</sup> Li gon ka dii le gonle dii wenna' kat' de xlatjin, la' llaki zoacho le ba chi'chga dii mala'. <sup>17</sup> Daan, bi chiyal' gonle ka beŋ' bi nteyi, san chiyal' shajniile daa cheeni Xancho Jesucrístona' goncho. <sup>18</sup> Bi soll ñitile, la' beena' chzoll chniti chone' chiya dii bi yejni'alallii. San li we' latj soa Espíritu Sántona' ñabi'e loo yichjlall'do'lena'. <sup>19</sup> Chiyal' we'len ljwell-le dill' che sálmoka', na' goł-le dii koon Xanchona' balaan na' bichlə dii ña Espíritu che Chioza' goł-le. Na' li goł ñe we'la'ole Xancho Crístona' do yichj do lall'le. <sup>20</sup> Na' daa nakcho Xancho Jesucrístona' txen, toshiizi chiyal' we'le Xacho Chioza' yel' choxken daa chaklene' cho' lao yog'lołte.

<sup>21</sup> Chiyal' wzexj yichjle wzenag che ljwell-le, daa chap-le Crístona' balaan.

<sup>22</sup> Na' ka le' noolə zoa beŋ' chele, chiyal' wzexj yichjle wzenagle chegake', ka chonle chzenagle che Xancho Crístona'. <sup>23</sup> La' beŋ' byonan' chñabi'e nool che'na', ka chon Crístona' chñabi'e cho' nonljall'chone', cho' ba bisle' kwenche bi kwiayi'cho. Chñabi'e cho', cho' zak-lebicho kwerp che'na', ka chon yichjchoni chñabi'an kwerp chechoni. <sup>24</sup> Na' ka cho' nonljall'cho Crístona' na' chzexj yichjcho lawe'na', ka'kzan chiyal' gon noolka' wzexj yichje'ka' lao yog'loł daa ña beŋ' che'ka'.

<sup>25</sup> Na' ka le' beŋ' byo zoa nool chele, li gaki nool cheleka', ka chon Crístona' chakile' cho' nonljall'chone' na' bzani kwine' wite' ni checho <sup>26</sup> kwenche biyakcho beŋ' nxi nyech lawe'na'. Bixis biyibe' yichjlall'do'chona' ka wyajle'cho xtilleena' <sup>27</sup> kwenche yibaile' cho' nakcho



lall' nee kat' yillincho lawe'na' na' bibi nda' nchen yichjilall'do'chona', san gakcho beŋ' nxi nyech, beŋ' bibi xtoŋiin de. <sup>28</sup> Na' ka'kzə le' beŋ' byo, le' zoa nool çehe, chiyaŋ' gapshiile nool çeheleka' ka chapshii kwine. Beena' chakile' nool çe'na', kwinkzen' chakile'. <sup>29</sup> Biga zoa beŋ' chwiile' kwerp çe'na', san chweej chwawe'n na' chapshi'en, ka chon Crístona' chapshi'e cho' nakchone' txen, <sup>30</sup> ǀa' to tocho nakcho ka tkwen wej kwerp çe'na'. <sup>31</sup> "Daan, wǀaa beŋ' byona' ǀaxŋeena' kat' ikaa çe', na' soalene' xoole'na' gакgake' toz." <sup>32</sup> Dill'ki ba wnia' chzajniin le' to dii zak'chgayi daa biŋ' iŋezile', ǀa' chzajniin cho' ka chon Crístona' daa chakile' cho' ba nakchone' toz. <sup>33</sup> Na' ka le' beŋ' byo, to tole chiyaŋ' gакile' nool çeheleka' ka chaki kwine. Na' le' noolə, chiyaŋ' gaple balaan beŋ' çeheleka'.

**6** Na' le' bi'do', ǀi wzenag çe ǀaxŋa'leka' ǀega bi' chzenag çe ǀancho Crístona', ǀa' kan' chiyaŋ' gonle. <sup>2</sup> Dga bliia Chioza' bia' goncho gakan dii nech daa nsa' to dii bchebe' gone' çecho shi goncho ka ne', na' nan: "ǀi gap balaan ǀaxŋa'leka', <sup>3</sup> kwençe gak wen çehele na' ibanle ssha lo yell-lioni."

<sup>4</sup> Na' le' zoa xiinle, bi gonle ka gakshejlall'b', san ǀi yis-golgakb' xochi na' ǀi wzajni'gakib' kwençe wzenag-gakb' çe ǀancho Crístona'.

<sup>5</sup> Na' le' ndoo ǀa yel-le chonle xshin beŋ', ǀi gon daa na beŋ'ka' nak ǀanle yell-lioni. ǀi gapgake' balaan, ǀi illeb-gake' na' ǀi gon xshine'ka' do yichj do lall'le. ǀi gaktezi çe Crístona'kzan chzenagle.

<sup>6</sup> Aga kat' chwiazə ǀanlena' yilaŋ' yizodile' kwençe ile'shi'gакile' le', san ǀi gonan do yichj do lall'le ǀega beŋ' nak wen ǀin çe Crístona', ǀa' kan' cheeni Chioza' goncho. <sup>7</sup> Chiyaŋ' gonle ǀlinna' do yichj do lall'le, na' ǀi gaktezi xshin Crístonan' chonle, aga çe beŋ' yell-lion.

<sup>8</sup> ǀa' nezkzile nottezə nakcho, ǀaa beŋ' ndoo ǀa yele' chone' xshin beŋ' wa beŋ' chon xshinkze', ǀanchona' gone' ka yizi'cho banez çe dii wenna' ba bencho.

<sup>9</sup> Na' le' nzi'le beŋ'ka' chon xshinlena', ǀekzka' ǀi goni-gake' wen. Bi wwall wsheble ǀegake', ǀa' nezkzile, ka le' na' ka ǀegake', yabana' zoa to beŋ' nak ǀanle, na' ǀe' aga nakzi beŋ' chakile'.

<sup>10</sup> Na' ǀekzka' nia' le' beŋ' bish'dawaa na' le' beŋ' zandawaa, ǀi gak wal kon yeŋ' wak choo yeŋ' wak xen çe ǀanchona'. <sup>11</sup> ǀi wchin yog' diika' noŋ Chioza' gакlenan

cho' kwençe gакchale na' so sakile gonle gan dii xi-waa kat' za'lenan yeŋ' wxiye' çeheyinna'. <sup>12</sup> ǀa' aga beŋ' de beli chenzan chdiŋ-lencho, san chdiŋ-lencho dii xiw'ka' bi chle'icho, diika' ze lo ǀlazə na' napgakan yeŋ' wak na' yeŋ' wŋabia', diika' chŋabia' lo yell-lioni gani dechga dii mala'. <sup>13</sup> Na' daan, ǀi goni çehe yog' daa noŋ Chioza' gакlenan le' kwençe so sakile dii mala' ǀla'na' wtiŋ-len, na' ka yiyoll wtiŋ-len ni zeçeçhkzle. <sup>14</sup> ǀi soaçheçh na' ǀi we' daa nak dill' ǀi, ǀa' ǀennan' gакlenan le' gonan ka bachleena' daa chcheŋ' leelena'. Na' ǀi soa ǀi gon daa nak dii ǀicha, ǀa' ǀennan' gакlenan le' gonan ka daa chbin soldadka' chkweejan ǀcho'eka'. <sup>15</sup> Na' ǀi se kwas we'lenle beŋ' xtill' Crístona' daa wzoan ǀegake' mbalaz, ka chon to soldad ze' kwase' nlej xe'le'na' kwençe shaje' lo wdila'. <sup>16</sup> Na' daa ǀlalote lawi diiki, ǀi soaçheçh gonǀilall'le Chioza' kwençe gакlenan le' na' wsol wŋitan yog'ǀoŋ de wxiye' çe dii xiwaa, na' gonan ǀin ka daa nox' soldada' chkweejan ǀe' kwençe bi chcheŋ' daa chzaŋ' beena' chdiŋ-lene'. <sup>17</sup> Na' ǀi wzoa yichjle daa bisla Chioza' le' lao dii mala', na' gonan ǀin ka lap' ya çe soldadka' daa chkweej yichje'ka'. Na' Cho'a Xtill' Chioza' gakan ka to yesya daa choŋ Espiritu Sántona' le' kwençe tiŋ-lenle dii mala'. <sup>18</sup> Toshiizi ǀi we'ǀwill Chioza', na' inabilene' kon ka chzajni Espiritu çe'na' le'. Na' toshiizi ǀi se wŋeyi, na' bi ǀǀxakile inabilene' çe yog' beŋ'ka' ba nak lall' nee. <sup>19</sup> Na' ǀekzka' ǀi inabi Chioza' kwençe wxoe' cho'a ǀollaani dill'ka' we'len' beŋ', na' bi illeb' wzajniid' beŋ' ka nak dill' wen dill' kob çe Crístona' daa kono wyajni kani'yi. <sup>20</sup> ǀa' Chioza' nselee nad' lo laze' kwençe we'len' beŋ' cho'a xtilleena', na' ni çeheyinnan' dia' lillyani. ǀi inabi Chioza' gакlene' nad' kwençe bi gall illeb' wi'a cho'a xtilleena'.

<sup>21</sup> Tíquiconi, beŋ' bish'choni ǀe chakid', nake' to beŋ' toshiizi chaklene' lo xshin Chioza', na' yidzajniile' le' yog'ǀoŋ ka chak çha' na' daa chon'. <sup>22</sup> Chseǀaane' yide' laolena' kwençe iŋezile ka chak çhento', na' kwençe wtipe' lall'le.

<sup>23</sup> Le' beŋ' bish' na' le' beŋ' zan', chŋabid' ǀacho Chioza' na' ǀancho Jesucrístona' gongake' ka soale mbalaz, na' gonǀilall'chle ǀegake', na' gaki ǀjwell-le.

<sup>24</sup> Chioza' gакlenshgue' yog'ǀoŋ-le, le' zoale chakchgaile' ǀancho Jesucrístona'. Kan' gakan.

# Filipenses

1 Nad' Pablo na'ch Timotewi naknto' wen llin çe Jesucristona', chwapnto' chiox yog'le, le' lle'le yell Filipoza', le' nakle lall' na' Chioza' daa nonjilall'le Cristo Jesúza'. Na' lekzka' chwapnto' chiox ben'ka' chgoo xñezi xshin Chioza' ladjlena' na' ben'ka' chaklen le-gake'. 2 Chios, beena' nak Xacho len Xancho Jesucristona' gaklenshgagake' le' na' wzoagake' le' mbalaz. 3 Ka ka chjadinid' le' cho'a Chios cha'na' ye' choxken. 4 Na' toshiizi choe'lwilllee kon ye' xaba kat' chñabidee gaklene' yog'le, 5 daa lenle chonle nad' txen, dezd ka wyajle'le axt naa, kwençe ides dill' wen dill' kob çe Jesucristona'. 6 Nezyen'id' Chios, beena' wzolo chone' to dii wen loo yichjall'do'lena', gone' kwençe yiyoll yi-do yiyakle ka chazlallee kat' illin lla yila' Jesucristona'. 7 Na' chiya'kz yibaid' ka chjadinid' le', la' toshiizi yoole loo yichjall'dawaani. Na' la'kzi dia' lillyani wa choe'len' ben' dill' wen dill' kob çe Jesucristona' kwençe gakbe'gakile' nakan dill' li na' shajle'gake' cheyin, ñezid' toshiizi chaklenle nad' lo llinna' daa ben Chioza' lall' na' gon' ye' ben' wen çe'na'. 8 Chioza' ñez ñle'ile' ka chakid' yog'le kon ka chaki Cristo Jesúza' le'. 9 Kat' choe'lwill' Chioza', chñabidee zizikli yisgolche' ye' chaki chelena', na' gonche' le' ye' sin'na' len ye' chajniina' 10 kwençe gakbe'ile daa nakch wen na' ka' soale do yichj do lall'le na' bibi dol' gapple kat' yiyed Cristona'. 11 Na' Jesucristona' gaklene' le' gonle lega ben' li ben' shao' kwençe sho' Chioza' balaan na' we'la'o ben' le'. 12 Le' ben' bish' na' le' ben' zan', cheenid' ñezile diiki ba gok cha' goklenlan kwençe bdesch dill' wen dill' kob çe Jesucristona', na' bi bizogakin wsej wllongakan. 13 La' naa yog'lo' soldadka' lle' ni na' nochlè ben' yoblè lle' do ni ñezgakile' dia' lillyani daa chonjilall'laa Cristona'. 14 Na' daa dia' lillyani, zan ben' bish'cho-ka' ba wloolall'gake' chongake' lall'chog choe'gake' xtill' Chioza' na' bi chillebgake'. 15 Dii li balgake' choe'gake' xtill' Cristona' daa chakke'zgakile' nad' na' daa cheenzgakile' chonggake' ka nad'. Per zoakz ben' chone'n do yichj do lallee. 16 Ben'kin chongake'n daa chakgakile' nad' na' daa ñezgakile' Chioza' ba nzoe' nad' kwençe wi'a dill' wen dill' kob çe Jesucristona'. 17 Na' ben'ka' zi shkwen choe'gake' xtill' Cristona' daa cheenzgakile' gonch-gake' ka nad', na' aga chongake'n do lall'gake'. Na' chakzgakile' daa chongake' ka' gakyeshid' daa nej' lillyani. 18 Per aga bi chon daa cha' shi do lall'gaken' chongake'n wa aga do lall'gaken'; kon daa choe'lgake' xtill' Cristona', daalan chibaid'. Na' zizikli yibachid' 19 daa ñezid' wichej' wen lao yog' diiki chak cha' daa chñable cha' lao Chioza' na' daa

chaklen Espiritu çe Jesucristona' nad'. 20 Na' toshiizi non' lez Chioza' gaklene' nad' kwençe bi sia' ye' zto', san naa na' toshiizi gon' kwençe sho' Cristona' balaan, laa ibanch' wa laa guet'. 21 La' shi ibanch', gonchkz' daa cheeni Cristona'; na' shi guet', de to banez cha'. 22 Shi dech ye' mban cha', gonchkz' xshin Cristona' kwençe ben' zanch gombia'gake'ne'. Na' bi ñezid' non nakch wen. 23 Chonan lall' ñia' non nakch wen: to cheenid' guet' kwençe lljazoalen' Cristona', na' naktechlan wen. 24 Per chonchan byen ibanch' ni çehe. 25 Chakid' nakchan wen ibanch' kwençe gakench' le' gachachle gonjilall'le Cristona' na' yiba yizakchile daa nonjilall'lene'. 26 Na' kat' ile'ile nad' ladjlena' sto shii, le yiba yizakile we'la'ole Cristo Jesúza'.

27 Naktez gak, li se wñeyi wsa'to çehe wen lega ben' chajle' çe dill' wen dill' kob çe Cristona' kwençe laa yidwia' le' wa laa yenzid' xtill'le, ñezid' ni zoaghechle nxenilall'le Cristona' na' nakle toz chonle ga zeelo chakle kwençe shajle' ben' dill' wen dill' kob çe'na', 28 na' bi gall illebzle ben'ka' chakzi' chakzbani le'. Na' daa gonle ka', wli'n kwiayi'chokzgaken', na' le' yilale, la' Chioza' bi wi'e latj kwiayi'le. 29 La' Chioza' goklene' le' kwençe benjilall'le Cristona', na' lekzka' chaklene' le' lo ye' zak'zi'ka' chen chle'ile daa nonjilall'lene'. 30 Ba chsak'zi'gake' le' ka ble'ile bsak'zi'gake' nad' daa chyixji'a xtill' Cristona', na' ñezkzile ka'kzè ni chak cha'.

2 Daa nakle Cristona' toz, ye' goklen çe'na' chtipan lall'le, na' ye' chaki çe'na' chonan ka soale mbalaz, na' Espiritu çe'na' zoalenkze' le', na' lall'do'lena' nakan lall'do' yesh'. 2 Daan, li gak toz, li gaki ljjwell-le ganga, na' toz ka dii sele wñeyi, na' toz ka dii selall'le, kwençe yiba yizakchid' ni çehe. 3 Bibi sele wñeyi çe tozle wa kwençe gon kwine ben' choo ben' xen, san li gonan kon ye' gaxjall', li goni ben' ka ben' zak'chi ka le'. 4 Ni tole bi chiya' chiljzle dii nak to banez çehe, san lekzka' li gon ka si' ben' yoblè banez.

5 Li se wñeyi gonle ka ben Cristona'.

6 La'kzi nake' Chios, bzani'le ye' wñabia' çe'na' na' balaan çe'na' daa naplene' Xe' Chioza',

7 na' bzo'e' ka'lè daa naki çe', na' ben kwine' ka to ben' bi zakii, na' golje' goke' to ben' de beli chen.

8 Na' ka ba nake' ben' yell-lio, blëxj yichje' bene' kon ka wna Chioza' axt bi'e latj betgake'ne' lee yag cruza'.

9 Daan, Chioza' wlo'ene' to balaan xen inlleb daa li-izelozi zak'chi, na' bzo'e'ne' nake' xan yog'lo'lte dii de,

<sup>10</sup> kwenche yog' beṅ' lle' yabana', na' lo yell-lioni, na' xan yell-lioni

kat' yengakile' le Jesús'a w'chek' xibe'ka' lawe'na'.

<sup>11</sup> Na' yog'loḷ beṅ' we'gake' dill' nan Jesucristona' nake' Xancho

na' daa gongake' ka' sho' Xacho Chioza' balaan.

<sup>12</sup> Daan, le' beṅ' bish'dawaa na' le' beṅ' zandawaa, kon ka ba benkzle toshiizi bzoale dill' kana' wzoalen' le', li we'l-lall'ch gachle beṅ' wizoale dill' naa bich zoa' ladjlana'. Li gall illeb Chioza', beena' bisla le', na' li gon ka dii le gonle daa cheenile'. <sup>13</sup> La' Chioza'kzan chone' kwenche chalj loo yichjlall'do'lana' gonle dii wenna' daa chaklallee gonle, na' lekzka' chaklene' le' kwenche chonlen.

<sup>14</sup> Na' yog'loḷ daa gonle, li gonan do yichj do lall'le, na' bi gakkleshile ni bi gakkuedzle, <sup>15</sup> kwenche beṅ' malka' lle' yell-lioni, beṅ'ka' nxinj yichjlall'do'eka', gakbe'gakile' bibi dii mal chonle, na' kono bi gach in'a chele. Na' gaktole beṅ' bibi dol' cheyin de, lega beṅ' nak dowalj xiṅ Chios. Na' gakte to beeni' lawe'ka', ka beljdo'ka' chey cheeni', <sup>16</sup> daa chzoachechle chzenagle che cho'a xtill' Chioza' daa nsa' yeḷ' mban. Na' shi ka' gonle, kat'ka' yila' Crístona' de dii gonan ka yibaid' daa bi bendadz' xshin Chioza' ladjlana'. <sup>17</sup> Daa chzani kwintle sak'zi'le kwenche gonle daa cheeni Chioza' naa nonlilall'le Crístona', zaklebin daa chzani beṅ' choe' Chioza' kwenche choe'laweene'. Na' daa chzanid' kwintle witgake' nad' daa chon' xshin Crístona', zaklebin ka daa chlajgake' lao daa chzani beṅ' choe' Chioza'. Na' la'kzi axt witgake' nad', chiba chizakid' na' cheenid' yiba yizaklenile nad'. <sup>18</sup> Li yiba yizakleni nad', na' li soa mbalaz ka zoa'.

<sup>19</sup> Non' lez Xancho Jesús'a wi'e latj yobzə wselaa Timotewa' gana' zoale, kwenche yibaid' ka yiyede' ine' chak wen chele. <sup>20</sup> Kochno zoa sto cha' ka le', la' tochgā len' zelene' nad' wneyi do yichj do lallee gach wen chele. <sup>21</sup> La' beṅ'ki sto zoalen nad', che kwintzgake' zegake' wneyi na' bi zegake' wneyi daa cheeni Jesucristona'. <sup>22</sup> Per ba nezkzile ka wen nsa' che Timotewa' na' ka ba goklene' nad' ba be'nto' dill' wen dill' kob che Crístona'. Ba goklene' nad' ka beṅ' chaklen xayin.

<sup>23</sup> Daan, kat' ba neqid' nakan gach cha', lii wsel'tia'ne' gana' zoale. <sup>24</sup> Na' nxenlallaa Xanchona' lekzka' yob yidwia' le' kwinkz'.

<sup>25</sup> Na' naa chakid' chonan byen yiselaa beṅ' bish'cho Epafrodítōni, beeni nonlene' nad' txen chdi-lennto' dii mala' daa chonnto' xshin Chioza', beeni bsel'le kwenche gaklene' nad' lao dii chyallj chchinid'.

<sup>26</sup> Cheenchgaile' ile'ile' le', na' le chakyeshile' daa wnezile we'ile'. <sup>27</sup> Na' dii licha zi lat'zə ki wite', per Chioza' biyesh'lallile'ne' biyakile'. Na' aga tozen' biyesh'lallile', san lenan' kwenche bi gakyesh'chid'.

<sup>28</sup> Daan chiselaaane' laolena' dopiyenzə kwenche yibaile' daa yile'ilene' sto shii, na' nad' bich gakyesh'tekid' chele. <sup>29</sup> Li yilebgache' kon yeḷ' chiba chizaki daa nake' cho' txen nonlilall'cho Xanchona'. Na' li gap balaan yog'loḷ beṅ'ka' chon ka chone'. <sup>30</sup> La' zi lat'zə ki wite' daa chone' xshin Crístona'. Bzoe' dii nxoll

yeḷ' mban che'na' goktgui bidyaklene' nad' bidyene' diika' bi gok gonle.

**3** Na' naa, le' beṅ' bish'dawaa na' le' beṅ' zandawaa, li yiba yizaki daa ba nonlilall'le Xanchona'. Nad' bi chak zedid' wzej' le' dii yoblə diika' ba wniakz' le' daa neqid' waklenan le'. <sup>2</sup> Li wsak' bi wzenagle che beṅ' malka', beṅ'ka' nazə chonan byen wchogtekez' kwerp chechona' sho'cho seṅ daa le circuncisión. <sup>3</sup> La' cho'yeṅ'lan nakcho dowalj beṅ'ka' yoo seṅ, cho' choe'la'ocho Chioza' daa yoo Espíritu che'na' loo yichjlall'do'chona' na' chiba chizakicho daa nakcho Cristo Jesús'a txen. Na' bi noncho lez daa goni kwerp chechoni gaklenan gachcho beṅ' wen lao Chioza'. <sup>4</sup> Nia' ka' la'kzi de dii zan dii gach wxenilallaa che kwint' daa gonan ka ile'shii Chioza' nad'. Shi no chakzi de dii gach wxenilallee che kwine' daa gonan ka ile'shii Chioza'ne', zalechlin nad'? <sup>5</sup> Ka gokid' xon' lla, wloogake' kwerp cha'ni seṅ daa le circuncisión. Nak' beṅ' Israel, na' golj' lo dia che dii Benjamína', na' nak' dowalj beṅ' hebreo ka xaxna'ka', na' bsedyena' ley chento'na' na' bzenag' cheyin, na' benlen' fariseoka' txen. <sup>6</sup> Daa le wzechga' wneyi ley che Chioza', axt gokid' chon' ka cheeni Chioza' daa bchi' bsakaa beṅ'ka' chonlilall'gake' Jesús'a'. Na' ben' kon ka na' leya', na' aga no gok in'a bi ben' ka nan. <sup>7</sup> Kana'n gokid' le zak'chgay' yog' diika', per naa, daa ba nonlilallaa Crístona', chakbe'id' bibi zak'gakan. <sup>8</sup> Na' dii li neqid' bibi de dii zak'chi ka daa ba nombia' Cristo Jesús'a', beena' nak Xan'. Na' daa le chakidee, bich nxenilallaa yog' diika' gokid' le zak'chga, san ba nongaka'n ka beb kwenche gombia'ch' Crístona' <sup>9</sup> na' gakee txen. Aga daa chon' daa na' leyan' nak' beṅ' li beṅ' shao' lao Chioza', san daa nonlilallaa Crístona', la' beṅ'ka' chonlilall'gake' Crístona', Chioza' chiyone' legake' beṅ' li beṅ' shao'. <sup>10</sup> Cheenid' gombia' Crístona' na' yeḷ' wak che'na' ka daa bli'e kana' bibane' ladj beṅ' wetka', na' cheenid' izanid' kwint' gach cha' ka gok che' daa wdie' yeḷ' zak'zi'ka' na' wite'. <sup>11</sup> Na' ka', non' lez idolaa yisban Chioza' nad' ladj beṅ' wetka'.

<sup>12</sup> Bi nia' ba nombi'ane' kwasloḷ wa ba chon' kwasloḷ ka chazlallee. Per ni chon' ka dii le kwenche gach gona'n, la' ni che lennan' gox wṅab Cristo Jesús'a' nad'.

<sup>13</sup> Le' beṅ' bish' na' le' beṅ' zan', bi nia' ba chon' kwasloḷ ka chazlallee. Per de to dii chon', bich zia' wneyi che diika' ba wde, san chon' to dii byen kwenche idolid' dii wenna' zi' za'. <sup>14</sup> Ni chon' ka dii le kwenche yillin' gana' ikaa daa gon Chioza' nad'. La' ni cheyinnan' gox wṅabe' nad' kwenche nak' Crístona' txen.

<sup>15</sup> Na' kan' chiyaḷ' secho wneyi yog'loḷcho, cho' ba nakchacho chonlilall'chone'. Na' shi bi zelen wneyi Chioza'kzə wzajniile'n le'. <sup>16</sup> Na' daa lialote chiyaḷ' soatezi soacho goncho kon ka ba bzajni Chioza' cho'.

<sup>17</sup> Le' beṅ' bish' na' le' beṅ' zan', li wsa'to chele ka nsa' cha', na' ka nsa' che beṅ'ka' chon kon ka ba bliinto' le' gonle. <sup>18</sup> Zan shii ba wnia' le', na' naa axt chakyeshid' nia' le' dga sto shii, zan beṅ' chongake' ka bibi zakii daa wit Crístona' lee yag cruza' daa bi nsa' chegake' wen. <sup>19</sup> Wllin lla kwiaiyi' beṅ'ki daa choe'la'ogake' toz daa chṅab beli chen che'ka', na' chep cha'lall'gake'

cheyi daa chongake' lwaayi dii nan yido'gakile'. Kon lillinzi daa de yell-lioni zegake' wneyi. <sup>20</sup> San cho', yabanan' nak lallcho. Na' nan' ziza' Xancho Jesucristona', beena' chbezcho yisle' cho' kwenche bi kwiayi'cho. <sup>21</sup> Len' yishee kwerp chechoki, diiki gooll' iteb, kwenche yiyakan ka kwerp che'na' daa le zakii. Na' gone'n kon yel' wak che'na' daa chnabia'lene' lao yog'loite dii de.

**4** Le' ben' bish'dawaa na' le' ben' zandawaa, le chakid' le', na' chzelall'chgaid' ile'id' le', na' chiba chizakid' daa nonlilall'le Crístona', na' ni chele le' de to dii yizi'a banez. Li soachech gonlilall'le Xanchona'.

<sup>2</sup> Chat'yoid' Evódiana' len Síntiquena' yizoagake' wen daa nakgake' Xanchona' txen. <sup>3</sup> Na' li' nako' nad' txen do yichj do lalloo choncho xshin Chioza', chat'yoid' li', gaklengacho' ben' zanchoki. La' le ba blaglogaken' goklengake' nad' be'nto' dill' wen dill' kob che Jesucristona', len Cleméntena' na' ben'ka' sto benlench nad' xshin Chioza'. Ba da' lie'ka' lee libr che Chioza' gana' da' le ben'ka' napgake' yel' mban zejli kañi.

<sup>4</sup> Li yiba yizaki toshiizi daa nakle Xancho Crístona' txen. Na' sto shii nia' le': jli yiba yizaki! <sup>5</sup> Li wsa' chele xochi kwenche yog' ben' gakbe'gakile' nakle ben' wen. Ba zoa gao yiyed Xanchona'.

<sup>6</sup> Bi kwekzə yichjle bittez dii chak chele, san li we'llwill Chioza' na' li gonan lall' nee, na' li wi'e yel' choxken.

<sup>7</sup> Na' gone' ka soale mbalaz axt kono shajniikzi bighe zoale ka'. Na' yel' zoa mbalaza' wsol wñitan dii zeda' de loo yichjlall'do'leka' daa nakle Cristo Jesúsza' txen.

<sup>8</sup> Na' le' ben' bish' na' le' ben' zan', daa zeelote naa, li se wneyi cheyi daa nak dii li, che yog'loite dii chidol' gapcho balaan, che yog'loj daa nak dii li dii shao', che yog'loj dii bibi dii mal nsa'n, che yog' dii wenka' chon ka yibaicho, na' che yog'loj dii zeyi cheyin nakan wen. Li se wneyi che yog'loj diiki nak wen, diiki chidol' we'cho xtillin.

<sup>9</sup> Li gon daa ba bli' bsedid' le' na' daa benile wnia', na' daa ble'ile chon'. Lennan' li gon, na' Chios, beena' chon ka soacho mbalaz, soalene' le'.

<sup>10</sup> Chiba chizakchgaid' lao Xancho Jesucristona' daa bachga chizele wneyi cha' dii yoblə. Bi nia' ba goj-lall'le nad', san bi got' xlatjinnan' gaklentole nad'. <sup>11</sup> Aga daa chyalj chchinida'n nia' ka', la' ba nzedid' gon' banez ka'k' dii de cha'. <sup>12</sup> Ba nezid' bi daa ne' soe' lo yel' yesh', na' lezkza' ba nezid' bi daa ne' soe' lo yel' wnia'. Ba nzedid' gon' banez bittez dii chak cha', shi nelj nlla'id' wa shi chbil' chdon', shi dechga daa chyalj chchinid' wa shi shlas bibi dekzə. <sup>13</sup> Chzoid' yog'loite dii chtil' daa chaklen Crístona' nad'. <sup>14</sup> Per le wen benle daa goklenle nad' lo dii lalljki chtil'.

<sup>15</sup> Na' nezkzile kana' bizaa Macedóniana' na' wzoloa' cho'a dill' wen dill' kob che Crístona', totgui le' lle'le Filipoza' benle daa byalljid' kwenche ji'a cho'a xtill' Chioza'. La' ni to ben'ka' ba nonlilall' Crístona' yellka' sto bi goklengake' nad'. <sup>16</sup> Na' kana' wzoa' yell Tesalónicana', zan shii bsel'le dii byalljid'. <sup>17</sup> Aga inacho chylj' bi gonle nad', san cheenlid' gat'ch yel' shao' chele yabana'. <sup>18</sup> Epafrodítoni ba bene' nad' daa bsel'lenlene', na' naa ba nap' yog'te daa chyaljid' axt ba chichoanlan. Na' chibayi Chioza' daa bsel'len, ka chibaile' diika' chzani ben' choe'gake'ne', diika' chla'ile' zix sia kat' chzeygake'n lawe'na'. <sup>19</sup> Chios cha'na', beena' nap' yog'loite dii wen dii shao'ka', gone' le' yog'loj daa chyaljile daa nakle Cristo Jesúsza' txen.

<sup>20</sup> Toshiizi chiyal' koocho Xacho Chioza' balaan. Kan' nakan.

<sup>21</sup> Li wwapsha chiox yog'loj ben'ka' nak lall' na' Chioza' daa nongake' Cristo Jesúsza' txen. Na' lezkza' ben' bish'choki zoalen nad' ni, chwapgake' le' chiox.

<sup>22</sup> Na' yog'loite ben'ka' nak lall' na' Chioza' ni chwapgake' le' chiox, na' ben'ka' chon xshin ben' wñabia' César'a', leyen'gake' chwapgake' le' chiox.

<sup>23</sup> Xancho Jesucristona' soalenshgue' le' na' gaklene' yog'loite. Kan' gakan.

# Colosenses

**1** Nad' Pablo nak' postl che Jesucristona' kon ka goklall' Chioza'. Na' len ben' bish'cho Timotewi <sup>2</sup> chwapnto' le' chiox, ka le nakle lall' na' Chioza', le' zoale yell Colósaza', na' nakle bish' ljiwellnto' daa nonlilall'le Crístona' do yichj do lall'le. Xacho Chioza' len Xancho Jesucristona' gaklenshgagake' le' na' wzoa-gake' le' mbalaz.

<sup>3</sup> Toshiizi ka chñabnto' chele, choe'nto' Chioza' yel' choxken, beena' nak Xa Xancho Jesucristona'. <sup>4</sup> La' ba beninto' dill' ba nonlilall'le Cristo Jesúsza' na' ba chakile yog'loj ben'ka' nak lall' na' Chioza'. <sup>5</sup> Ba nsa' chele ka' daa nonle lez lljazoale yabana' gana' zoa Chioza'. Na' wzolo benlen lez ka wzolo bzenagle dill' wen dill' kob che Crístona' daa nak dill' li che Chioza'. <sup>6</sup> Na' dill' wen dill' kobi daa ba bzenagle ba bliiljan doxen yell-lioni na' ba chon xshinin loo yichjlall'do' ben', kon ka benan loo yichjlall'do'lena' ka benilen na' wyajniile nan dii li Chioza' chakile' cho'. <sup>7</sup> Dgan blii Epáfrazza' le', beena' chonlene' neto' xshin Crístona' na' le chakinto'ne', na' zoatezi zoe' chone' xshin Crístona' ladjlena'. <sup>8</sup> Na' Epáfrazza' wne' neto' ka ba chaki ljiwell-le daa zoa Espíritu che Chioza' loo yichjlall'do'leka'.

<sup>9</sup> Na' daan, ka wñezinto' ka ba chonle, toshiizi chñabinto' Chioza' gaklenche' le'. Na' chñabinto'ne' gone' le' do ka nak yel' sin' che'na' na' yel' chajni che'na' kwenche shajniile kwasloj daa chaklallee gonle, <sup>10</sup> na' gak wsa' chele lega ben' nonlilall' Xanchona', na' toshiizi gonle daa chazlallee, na' gak gonle yog'loj daa nak wen, na' zejch gombia'chle Chioza', <sup>11</sup> na' gakchachle kon yel' wak che'na' daa zeelo nak yel' wak choo yel' wak xen kwenche ka' gaple yel' chxenlall' na' so sakile lao bittezə dii chak chele, na' yibaile <sup>12</sup> we'tezi we'le Xacho Chioza' yel' choxken. La' len' bene' kwenche lljazoalenle yog' ben'ka' nak lall' nee yabana' gana' chñabi'e, gana' de beeni' che'na'. <sup>13</sup> Chioza' bibeje' cho' lo yel chol'a' gana' chñabia' dii xiwaa na' ba bizoe' cho' lo na' Xiiñe'na', beena' le chakile', kwenche inabi'e cho'. <sup>14</sup> La' len' bisle' cho' lao yel' zak'zi'na' chidoj'cho daa blalj xchene'na' wite' ni checho kwenche biyakxen saaxya chechoka'.

<sup>15</sup> Crístona' bli'e ka nak Xe Chioza', beena' kono chle'i, na' Crístona' ba chñabia'kze' kana' zi' xe silte yog'loj dii de. <sup>16</sup> La' len' bxe bsile' yog'loj dii de: diika' de yabana' na' diika' de yell-lioni. Bene' dii chle'icho na' bentie' dii bi chle'icho, ka no anjlka' na' len anjlka' biyak dii xiw' diika' chñabia' lo yell-lioni. Bene' yog'loj dii de, na' bene'n kwenche sho'e balaan. <sup>17</sup> Ba zoakz Crístona' kana' zi' xe sil yog'loj dii de, na' le' chone' ka chongakan daa bliie' bia' gongakan. <sup>18</sup> Na' len' chñabi'e cho'

nakcho lall' nee, daa nakchone' txen. Len' bxie' yel' mban daa nak zejli kani daa nake' ben' nech ben' biban toshiizi ladj ben' wet'ka'. Daan, nake' liizelozi ben' choo ben' xen na' chñabi'e lao yog'loj dii de. <sup>19</sup> La' Chioza' wyazlallee gap Crístona' doxen yel' wñabia', yel' wak na' yog' ka diika' nape', <sup>20</sup> na' bene' ka yog'loj dii bxe bsile' yabana' len yell-lioni bizoalen-gakan le' wen daa wit Crístona', blalj xchene'na' lee yag cruza'.

<sup>21</sup> Na' le', kanan' njaala'ole Chioza' ni che dii malka' chonle na' gokzi' gokzbanilene'. <sup>22</sup> San naa, ba bene' kwenche bizoalenlene' wen daa bselee Crístona' wite' lee yag cruza' kwenche gakle ben' nxi nyech, ben' bibi nda' nchen na' ben' bibi xtoljin de lawe'na'. <sup>23</sup> Per chonan byen toshiizi soachechle gonlilall'le Crístona', beena' ba wyajle'le che', na' bi gakchoplall'le cheyi daa benle lez gaki chele ka bzenagle dill' wen dill' kob che'na'. Na' dga ba benile, ba choe'gake'n dill' doxen yell-lioni, na' nad' Pablo, chaklen' cho'an dill'.

<sup>24</sup> Na' naa chiba chizakid' daa chllagloa' yog' yel' zak'zi'ki ni chele. La' daa chak cha' ki, chen chle'id' ka yel' zak'zi'ka' ben ble'i Crístona' ni checho, cho' ba nonlilall'chone' na' zaklebicho ka kwerp che'na'. <sup>25</sup> Chioza' bzoe' nad' gak lo na' gaklen' le' ba chonlilall'lene' na' wliid' le' kwasloj cho'a xtilleena'. <sup>26</sup> Kani'teyi kono wñezi daa wlo'e xñezin gone', per naa ba bliile'n ben'ka' nak lall' nee. <sup>27</sup> Chioza' chaklallee ineziz ben'ka' nak lall' nee dga kono wñezi kana', na' nakan to dii zakii nllleb nan Crístona' zoalene' le' bi nakle ben' Israel, le' chonlilall'lene', na' nonle lez lljazoalenle Chioza' gana' de balaan xen che'na'.

<sup>28</sup> Neto' chyixje'into' ben' xtil' Crístona', na' chat'yoin-to' yog' ben' wzenaggake'n. Na' chchinnto' do ka nak yel' sin'na' daa ba ngwee neto' ka chli' chsedinto' le-gake' kwenche yog' ben'ka' gak Crístona' txen yiyak-gake' kwasloj ka cheeni Chioza'. <sup>29</sup> Daan, choe'l-lallaa chyixji'a cho'a xtilleena' kon ga zeelo chizoid', na' Crístona' chaklene' nad' kon yel' wak che'na'.

**2** Cheenid' inezile' dii xen dii chen chle'id' ni chele na' ni che ben' bish'choka' lle' Laodiceana', na' ni che yog'loj ben' bish'choka' bin' gombia' nad', <sup>2</sup> kwenche yog'le wtip' lall'le na' gakle toz gaki ljiwell-le, na' shajniile kwasloj daa wloo Chioza' xñezin daa kono wñezi kani'yi. Na' lennan' daa bidyen Crístona', <sup>3</sup> beena' blii cho' doxen ka nak yel' sin' na' yel' chajni che Chioza', diika' nak dii zakii nllleb. <sup>4</sup> Nia' le' ka' kwenche kono siye' le' we'lenze' le' dill' xochi na' gakile nakan dill' li. <sup>5</sup> La'kzi bi zoalen' le', chi' yichjkz' le' na'

chiba chizakid' daa neƶid' nsa' ƶhele wen na' zoaƶheƶhele chonjilall'le Crístona'.

<sup>6</sup> Na' daa ba nonle Jesucrístona' Xanle, chiyal' wsa' ƶhele lega beƶ' ba nake'ne' txen. <sup>7</sup> Ka zoaƶheƶhe to yag dii ba nde loinna' zitj, ka'kzan le', li soaƶheƶhe gonjilall'le Crístona', kon ka ba bli' bsedinto' le', na' toshiizi li we' Chioza' yel' choƶken.

<sup>8</sup> Li wsak', bi we'zle latj no siye' le' kon yel' sin' daa chaljlall' beƶ' yell-lioni daa bibi zakii. La' aga xtill' Crístonan' chli' chsedgakile' san ƶhe diika' chƶabia' lo yell-lionin.

<sup>9</sup> Crístona', beena' golje' goke' beƶ' de beli chen, nape' doxen yel' wƶabia', yel' wak na' yog' ka diika' nap Chioza'. <sup>10</sup> Na' le', daa nakle Crístona' txen, yel' wak ƶhe'na' ba chonan llin lo yel' mban ƶhelena', la' Crístona' napche' yel' wƶabia' na' yel' wak aga ka yog' anjilka' wa dii xiw'ka' chƶabia'. <sup>11</sup> Na' lekzka' daa naklene' txen wak iƶacho yoo to seƶ' loo yichjlall'do'lena' daa chli'n nakle lall' na' Chioza', per bi nakan ka seƶna' daa chgoo beƶ' kwerp ƶhe'ka' daa le circuncisión, san seƶna' chgoo Crístona' nakan daa chikobe' yichjlall'do'chona' kwenƶhe dii mala' daa chzelalii beli chenna' bich iƶabia'n cho'. <sup>12</sup> Ka wchoale nisa' wak iƶacho witlenle Crístona', na' bgash'lenlene' ka bgashee, na' lekzka' bibanle ka bibane' ladj beƶ' wetka' daa wya-jle'le Chioza' bisbane' Crístona' kon yel' wak ƶhe'na'.

<sup>13</sup> Na' le', gokle ka beƶ' net lao Chioza' ni ƶhe saaxya ƶheleka' daa biƶ' ƶhoonlall'le daa cheeni beli chen ƶhelena'. San ƶaa, Chioza' ba beƶe' to yel' mban kob ƶhele daa nakle Crístona' txen, na' bizi'xene' yog' saaxya ƶheleka'. <sup>14</sup> Chioza' bikwase' daa wdao xya ƶhecho, na' bsol bƶite'n kana' wda' Jesucrístona' lee yag cruza'. <sup>15</sup> Na' bikwase' yel' wak ƶhe dii xiw'ka', diika' chƶabia' beƶ' yell-lioki, kana' wit Crístona' lee yag cruza'. Na' daa bli'e bene' legakan gan, bsi'e legakan yel' zto' lao lkwe' beƶ'.

<sup>16</sup> Daan, bi wzenagle ƶhe beƶ'ka' nagake' bi gak yeej gaole bittez yel' wao, wa nagake' chonan byen gonle lƶnika', na' kooole balaƶ llna' chize beo' cheeƶa', na' gombaƶle lla sabdka'. <sup>17</sup> Yog'loj diiki nakan daa wza-jniin cho' lat' ƶhe daa zi' gon Chioza' na' benan llin kana' zi' wselee Crístona', na' ƶaa daa bide' bich chongakan llin. <sup>18</sup> Bi we'le latj no siye' le' kwenƶhe bi wƶitle daa ba nonle lez ikaale. Bi wzenagle ƶhe beƶ'ka' chonzə ka le chzexj yichjin lao Chioza', na' choe'la'ogake' anjilka', na' nazgake' chle'dogakile' na' chep cha'lall'lengake' daa chyiljlall'zgabe'. <sup>19</sup> Beƶ'ka' chon ka' bi nakgake' Crístona' txen, beena' zaklebi yichjchona' daa chƶabi'e cho' nonjilall'chone'. Na' cho' nakchone' txen, chakchacho ka cheeni Chioza', ka chak ƶhe tkwen wej kwerp ƶhechoni ndij nllagan beƶj bnia'ka' nox' ljwellin kwenƶhe ka' chgolgakan txen.

<sup>20</sup> Daa ba nakcho Crístona' txen daa wite' lee yag cruza', wak iƶacho ba netcho lao diika' chyiljlall' beƶ' yell-lioni na' bich chiyal' iƶabia'n cho'. Na' ƶberaƶhe ni chonzle txen diika' chyiljlall' beƶ' yell-lioni, <sup>21</sup> kachaka' daa nagake': "Bi wƶhino' dga, bi gawo' dga, na' bi goƶoo dga?" <sup>22</sup> Yog'loj diiki chwa' beƶ' yell-lioni

nakchozgakan dii chibill chido na' dii chde ƶheyin ka zej chƶinchogakan. <sup>23</sup> Dii li, diika' nagake' chontekzgakan ka dii le zakii, la' kat' chongake'n chontekzgake' ka beƶ' le chapshii daa nak ƶhe Chios, na' ka beƶ' le chzexj yichjin lao Chioza', na' ka beƶ' le chdezi' beli chen ƶheyin, per yog' diika' chongake' bi gak yikwasgakan daa chibayi beli chenna'.

**3** Daa ba nakle txen Crístona' na' nakle ka beƶ' bibanlene' txen ka bibane' ladj beƶ' wetka', chiyal' kwe' yichjle ƶheyi daa nak ƶhe yabana', gana' llna Crístona' shlaa de shli ƶhe Chioza'. <sup>2</sup> Li se wƶeyi daa nak ƶhe yabana', na' bich kooz yichjle daa nak ƶhe yell-lioni. <sup>3</sup> La' ba nakle ka beƶ' ba wit daa nakle Crístona' txen, na' yel' mban ƶhelena' ba nakan toz kon Crístona' lao Chioza'. <sup>4</sup> Na' ka yiyed Crístona', beena' noƶe' le' yel' mban daa nak zejli kani, lekzka' sho'lenlene' balaƶ xen daa chidolee.

<sup>5</sup> Daan, chiyal' kwej yichjle yog'loj dii mala' daa chiba chizaki beli chen ƶhelena': bi inelenzle xiƶ xool beƶ' wa xiƶ xyo beƶ', bi gonle bichlə dii zban, bich we'le cho'a xbayi beli chen ƶhelena', bich sa'lall'zle gonle dii mala', ni bi selall'le bi gat' kwe' ƶhele. La' beena' chzelall' gat' kwe'ile' dii xen, toz kan chonlene' beena' choe'la'o daa nak yaj yag. <sup>6</sup> Chioza' wsak'zi'e beƶ'ka' chon diika' daa bi chzenaggake' ƶhe'. <sup>7</sup> Na' le', lekzka' benle diika' kana' biƶ' wzenagle ƶhe Chioza'. <sup>8</sup> Per ƶaa, chiyal' kwej yichjle yog'loj diiki: yel' chllaa chlok, yel' wen dii mal, yel' chyilj chzan xtill' beƶ', na' yel' chbell chƶe ka nla' ka nte. <sup>9</sup> Bich siye' ljwell-le, la' ba wlej yichjle yel' mban gol ƶhelena' na' bich gonle dii malka' benle kana'. <sup>10</sup> Ba biyakle beƶ' kob, na' Chios, beena' bƶe bsil le', chone' ka gombia'chlene' na' gakchle dowalj ka cheenile'. <sup>11</sup> Aga bi zakii shi nakcho beƶ' Israel wa shi bi nakcho, shi yoocho seƶ daa le circuncisión wa shi bi yoochon, shi nakcho beƶ' nsed wa beƶ' bi nsed, shi nakcho beƶ' ndoo lla yel chone' xshin beƶ' wa nakcho beƶ' chon xshinkzin. Daa llnaloten, gakcho Crístona' txen, la' nottezə nakcho lekzen' zoalene' cho'.

<sup>12</sup> Chioza' le chakile' le' na' ba wleje' le' kwenƶhe gakle lall' nee. Na' daan, chiyal' yiyesh'lallile beƶ' na' gonile legake' wen, na' bi gakle beƶ' cha'sib, san gakle beƶ' gaxjlall', na' gaple yel' chxenlall'. <sup>13</sup> Chiyal' gonle banez ljwell-le, na' chiyal' si'xen ƶhe ljwell-le shi no bi chon ƶhele. Ka ben Crístona' wxi'xene' ƶhele, lekzka' le' chiyal' si'xenle ƶhe beƶ'. <sup>14</sup> Na' daa llnalote chiyal' gaki ljwell-le, la' shi chaki ljwell-le, lennan' gonan ka gonle yog' diiki. <sup>15</sup> Li we' latj iƶabia' yel' mbalaz ƶhe Crístona' loo yichjlall'do'lena', la' kwenƶhe soalen ljwell-le mbalazan ba gox wƶabe' le' gakle toz. Na' tlizi chiyal' we'lene' yel' choƶken.

<sup>16</sup> Li kooshao' do ka nak xtill' Crístona' loo yichjlall'do'lena'. Li wli' wsedi ljwell-le na' li wtip lall' ljwell-le, li wƶhin do ka nak yel' sin'na' daa ba beƶe' le'. Li goj no salmo, no himno, na' bichlə daa na Espíritu ƶhe Chioza' goj-le, na' li we' Chioza' yel' choƶken ka goj-le. <sup>17</sup> Na' yog'loj daa gonle wa daa iƶnale, chiyal' gonlen lega beƶ' nak Xancho Jesúza' txen na' we'le Xa-

cho Chioza' yel' choxken daa ba non ilall'le Jesucristona'.

<sup>18</sup> Le' noolə, li wzenag che beŋ' cheleŋa', la' kan' chiya' gonle daa ba nxenilall'le Xanchona'. <sup>19</sup> Na' le' beŋ' byo, li gaki xool-lena' na' bi gonile legake' zid' zŋia. <sup>20</sup> Na' le' bi'do', li wzenag yog'lo' daa na xaxna'le-ka', la' kan' chazlall' Xanchona'. <sup>21</sup> Na' le' chisgol chischoole, bi wsheshlenle xiŋleka' konte'le, kwenche bi gakyesh'gakib'. <sup>22</sup> Na' le' ndoo lla yel-le chonle xshin beŋ', li wzoa dill', li gon yog'lo' daa na beŋ'ka' nak xanle lo yell-lioni. Aga kat'ka' chwiazgake' gonle ka chilali kwenche ile'shi'gakile' le', san do yichj do lall'le li gonan daa ba chall chilleble Xancho Crístona'. <sup>23</sup> Yog'lo' daa gonle, li gonan do yichj do lall'le na' li gaktezi xshin Xancho Crístonan' chonle na' aga che beŋ' yell-lion. <sup>24</sup> La' nezkzile Xancho Crístona', beena' nak dowalj Xanle, gone' ka yizi'le banez che dii wenna' chonle. <sup>25</sup> San beena' chon mal, lekze' ikee laxji dii mala' chone', nottezə nake'.

**4** Le' nzi'le beŋ'ka' chon xshinlena', li gongakile' wen. Li ljadini lekzka' le' zoa to Xanle yabana'.

<sup>2</sup> Li we'l-lall' we'lwill-le Chioza', na' li se kwas we'lwill-lene' na' we'lene' yel' choxken. <sup>3</sup> Na' kat' we'lwill-lene', inabgachile'ne' gaklene' neto' kwenche wsaljche' xheznto' Ilje'chnto' xtil' Crístona' daa kono wnezi kana', la' ni cheyinnan' dia' lillyani. <sup>4</sup> Li inabi Chioza' gaklene' nad' kwenche gak wi'a dill' kwas'lo', ka chiya' wi'an.

<sup>5</sup> Li wsak' li gon wen ladj beŋ'ka' bi nombia' Crístona', la' naayen'nan de latj wli'le non nakle txen. <sup>6</sup> Dill'ka' choe'le chiya' gakan sia mbalaz toshiizi, na' lekzka' gakyillile xochi xtil' beŋ' kat' no bi inabi le'.

<sup>7</sup> Beŋ' bish'cho Tíquiconi, beeni le chakicho, we'lene' le' dill' ka nak yog'lo' diika' chak cha'. Len' do yichj do

lallee chonlene' nad' xshin Xancho Crístona'. <sup>8</sup> Daan, chse'laane' laolena' kwenche wi'e dill' nakan chak chen-to' na' wtipe' lall'le. <sup>9</sup> Na' lekzka' beŋ' wllall' chele Onésimoni ziza'lene'ne', beeni le chakinto' na' nake' dowalj bish' ljjwellcho. Legake' we'gake' dill' che yog'lo' daa chak cha' ni.

<sup>10</sup> Aristárconi, beeni nak' txen dento' lillyani, chwape' le' chiox; na' lekzka' Márcona', beŋ' bish' Bernabéna'. Ba wniakz' le' shi yidwia Márcona' le', li gonshaile' wen. <sup>11</sup> Ka'kzə Jesúszi, beeni che'gake' Justo, chwape' le' chiox. Ladj yog' beŋ' Israelka' non ilall' Crístona', beŋ'kichgan chaklengake' nad' chonnto' xshin Chioza', na' le ba btipgake' lallaa. <sup>12</sup> Beŋ' wllall' chele, Epáfrazi, lekzka' chwape' le' chiox. Nake' to beŋ' chon xshin Crístona', na' toshiizi choe'lwille' Chioza' ni chele kwenche gachale lo xneze'na', na' soacheche'le we'l-lall'le gonle ka cheeni Chioza'. <sup>13</sup> Ne'zid' ka wneyi nleb zie' chele na' che beŋ'ka' lle' yell Laodicéana' na' yell Hierápoliza'. <sup>14</sup> Lúcazi, beeni chon rmech, beeni le chakid', chwape' le' chiox, na' lekzka' Démazi.

<sup>15</sup> Li wwap chiox bish' ljjwellchoka' lle' yell Laodicéana', na' lekzka' Nínfana' na' beŋ'ka' chdop chllag lillena' choe'la'ogake' Crístona'. <sup>16</sup> Ka yiyoll wable yishi bzej', li wse'laan lao beŋ'ka' non ilall' Crístona' yell Laodicéana' kwenche lekzka' lengake' wlabgake'n, na' legake' gongake' le' yisha' daa bse'laa lawe'ka' kwenche wlablen. <sup>17</sup> Li ye' Arquípona' gone' to dii byen gone' kwas'lo' daa ba non Chioza' lall' nee gone'.

<sup>18</sup> Nad', Pablo, kwin' chzej' † gani chwap' le' chiox. Li ljadini lillyan dia'. Chioza' gaklenshgue' le'.

† Kwin' chzej': Páblona' bchine' beŋ' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bse'leen.

# 1 Tesalonicenses

**1** Nad' Pablo na' Silvánoni len Timotewi chwapnto' le' chiox, le' chdop chllagle choe'la'ole Jesucrístona' Tesalónicana', le' nakle lall' na' Xacho Chioza' len Xancho Jesucrístona'. Chñabinto' legake' gonshgagake' ka gak wen chele, na' wzoagake' le' mbalaz.

<sup>2</sup>Toshiizi choe'nto' Chioza' ye'l' choxken che yog'lo'le kat' choe'lwillnto'ne'. <sup>3</sup>Toshiizi ka choe'lwillnto' Chioza', beena' nak Xacho, chjadininto' ka choe'l-lall'le chonle dii wenna' daa nonlilall'lene' na' chakile'ne', na' daa zoaghechle nonle lez Xancho Jesucrístona'. <sup>4</sup>Na' le' beñ' bish' na' le' beñ' zan', le' nakle beñ' chaki Chioza', ñezinto' ba wleje' le'. <sup>5</sup>La' ka be'lennto' le' dill' wen dill' kob che Jesucrístona', aga de cho'a dill'zan be'lennto'n le', san kon ye'l' wak che Chioza' na' che Espíritu Santo che'nan' be'nto' dill' do yichj do lall'nto'. Na' ñezkzile ka wen bsa' chento' ladjlena' kwenche goklennto' le'.

<sup>6</sup>Na' le' bsedle chonle ka neto' na' ka ben Xancho Jesucrístona', la' Espíritu Sántonan' bene' ka bibaile bleble Cho'a xtill' Chioza' la'kzi dii zan ye'l' zak'zi'ka' ben ble'ile. <sup>7</sup>Na' daa bizo bizakile ye'l' zak'zi'ka', bliile beñ'ka' nonlilall' Crístona' yellka' mbani Macedóniana' na' Acáyana' ka chiya'l' gongake'. <sup>8</sup>Na' daa benle ka', Cho'a xtill' Chioza' ba wislesan aga to Macedóniana'zə, ni aga to Acáyana'zə, san doxente. Na' le'kzka' ba bengakile ka nonlilall'le Crístona', na' bi chonan byen we'nto' dill' chele. <sup>9</sup>La' kwingake' choe'gake' dill' ka wen benle bleble neto', na' bsanle bich be'la'ole lwa' Isak' diika' bi nak chios kwenche benlilall'le beena' nak dowlj Chios yaa Chios ban, <sup>10</sup>na' chbezle yiyetj Xiñe' Jesúsza' yabana', beena' bisbane' ladj beñ' wetka'. Na' Jesúsza' yisle' cho' lao ye'l' zak'zi'na' ziza' daa we' Chioza' beñ'ka' bi bzenag che'.

**2** Le' beñ' bish' na' le' beñ' zan', ñezkzile daa bidwianto' le' bi biddadznto'. <sup>2</sup>Na' le'kzka' ñezile le wxak'zi'nto' yell Filípoza' na' biya dii wnagake' neto', per Chioza' goklene' neto' na' bi bllebnto' wdxije'into' le' dill' wen dill' kob che Jesucrístona' la'kzi biya dii bti'nto'. <sup>3</sup>Na' ka wdxije'into'n le', do yichj do lall'nto' be'lennto' le' daa nak dill' li, na' kono wxiye'nto'. <sup>4</sup>La' Chioza' wleje' neto' na' bzo'e' neto' we'nto' dill' wen dill' kob che'na'. Na' aga chonnto'n kwenche chazlall' beñaan, san kwenche chazlall' Chiozan', beena' nombia' yichjlall'do'nto'ni. <sup>5</sup>Ñezkzile, na' Chioza' ñez ñe'ile', ni shlin bigañ' we'la'o we' dill'nto' le' daa chzelall'nto' bi de chele. <sup>6</sup>Bi cheeninto' no koo neto' balaan, ni le' ni beñ' yoblə. Daa naknto' postl che Crístona', zak' wñabinto' le' gonle daa chyallj chchininto' shel'ka', per bibi wnanto' le'. <sup>7</sup>San kana' wzoalennto' le' bennto' chele ka chon to noolə chap chwie' bi'do' che'ka' xochi.

<sup>8</sup>Na' daa le chakinto' le', aga to daa be'lenznto' le' dill' wen dill' kob che Crístonan' bibainto', san le'kzka' bennto' axt ga zeelo bizointo' goklennto' le'. La' le chakinto' le'. <sup>9</sup>Le' beñ' bish' na' le' beñ' zan', chjadinkzile ka bdezi' kwinnnto' shlak wzoalennto' le' kana' be'lennto' le' dill' wen dill' kob che Crístona'. Ka tella ka wa'l' bennto' llinna' kwenche ni tole bi beninto' zed.

<sup>10</sup>Chioza' ñez ñe'ile', na' le'kzka' le' nonlilall'le Crístona', ñezile do yichj do lall'nto' wzoanto' ladjlena', na' bennto' daa nak shli na' bsa' chento' wen kwenche kono biz gon iñe chento'. <sup>11</sup>Le'kzka' ñezile beninto' to tole ka choni to beñ' xiñe'ka' <sup>12</sup>daa btiptnto' lall'le, na' beñnto' le' ye'l' chxenlall', na' ba be'lennto' le' dill' ka chiya'l' wsa' chele, le' nonlilall'le Chioza', beena' gox le' kwenche iñabi'e le' na' lljazoalenlene' gana' ile'ile ka nak balaan xen che'na'.

<sup>13</sup>Na' le'kzka' toshiizi choe'nto' Chioza' ye'l' choxken daa bleble cho'a xtilleena' be'lennto' le', la' gokbe'ile' nakan cho'a xtill' Chioza' na' aga cho'a xtill' beñ' yellionizan. Na' dii li nakan cho'a xtill' Chioza' daa chisha'n yichjlall'do'chona', cho' chonlilall'chone'. <sup>14</sup>Na' le' beñ' bish' na' le' beñ' zan', kana' bsak'zi' beñ' wlall' cheleka' le', gok chele ka gok che beñ' Judeaka', beñ'ka' chdop chllag choe'la'ogake' Crístona', la' beñ' wlall' che'ka', beñ' Israelka', bsak'zi'gake' legake' daa nonlilall'gake' Crístona'. <sup>15</sup>Le'kzgaken' betgake' Xancho Jesúsza' na' betgake' dii beñ'ka' wdxijee daa goll Chioza' legake' kani'yi, na' le'kzka' blaggake' neto'. Bi chongake' ka chazlall' Chioza' na' chle'zbangakile' yog'lo' beñ', <sup>16</sup>la' chsej chllongake' chixje'into' beñ'ka' bi nak beñ' Israel cho'a xtill' Chioza' kwenche yilagake' na' bi kwiayi'gake'. Na' daa chongake' ka', chzanchgake' saaxya che'ka', na' daan, ba nakten ile'gakile' ye'l' zak'zi' wala' we' Chioza'.

<sup>17</sup>Le' beñ' bish' na' le' beñ' zan', kana' bi wzoalennto' le' shloll, la'kzi bi ble'into' le', toshiizi jadininto' le' na' le' goklall'nto' yidwianto' le'. <sup>18</sup>Dii li goklall'nto' yidwianto' le', na' nad'yen' zan shii goklallaa yidwia' le', per Satañaza' bsej bllonan yid'. <sup>19</sup>Daa chonlilall'le Xancho Jesúsza' na' zoale chonle wen daa be'lento' le' xtilleena', nonnto' lez gonle ka yibainto' lawe'na' kat' yiyede'. <sup>20</sup>Dii li, chibainto' ka chonle na' zoanto' mbalaz ni chele.

**3** Na' ka bich bi rson chele de, bi wzoanto' wen na' be'nto' dill' yigaannto' to neto'zə Aténaza' <sup>2</sup>na' bsel'nto' beñ' bish'cho Timotewa', beena' chonlene' neto' xshin Chioza' daa chyixje'nto' dill' wen dill' kob che Crístona'. Bsel'nto'ne' kwenche yidtype' lall'le na' gone' ka soaghechle gonlilall'le Crístona', <sup>3</sup>kwenche ni tole bi



gakllejile ni che yel' zak'zi'ka' chen chle'ile. La' nezczile kan' lliia bia' gak checho. <sup>4</sup> Na' kana' ni zoalennto' le', bsi'ninto' le' nan wle'icho yel' zak'zi'ka', na' nezile ba gok ka wnanto' le'. <sup>5</sup> Na' daa le gokshejlallaa ni chele, bsejaa Timotewa' kwenche inezid' shi ni nonlilall'kzle Jesucristona', la' gokid' dii xiwaa gonan ka goncho-plall'le na' gakdadz xshin Chioza' daa bennto' ladjlena'.

<sup>6</sup> Per naa ba bila' Timotewi gani zoanto' na' cho'e dill' ni nonlilall'kzle Jesucristona' na' chaki ljjwell-le. Lekzka' cho'e dill' toshiizi chjadinile neto' daa le chakile neto', na' le cheenile ile'ile neto'. Na' ka'kz neto', le cheeninto' ile'into' le'. <sup>7</sup> Daan, le' ben' bish' na' le' ben' zan', la'kzi chiya dii chen chle'into', axt bixenall'nto' ka wnezinto' ni zoachechle nonlilall'le Cristona'. <sup>8</sup> Daa ba nezinto' ni zoachechle chonlilall'le Xanchona', axt biyakshao'lall'nto'. <sup>9</sup> Na' bichkz bi dill' chillelinto' kwenche we'nto' Chioza' yel' choxken che yel' xabana' daa napnto' ni chele. <sup>10</sup> Ka tella ka wal chnabinto' Chioza' wi'e latj yidwianto' le' dii yoblə kwenche yiyoll yido wzajniinto' le' daa ni chyaljlile shajniile kwenche gonlilall'chlene'.

<sup>11</sup> Na' chnabid' Xacho Chioza' na' Xancho Jesúza' gake' lengake' neto' kwenche bibi wsej wllonan yidwianto' le'. <sup>12</sup> Na' Xanchona' gonshgue' ka zizikli gakchi ljjwell-le na' gakile yog'loj' ben', ka chakinto' le'. <sup>13</sup> Na' gonshgue' ka gachach yichjall'do'lana' kwenche gakle ben' nxi nyech na' bibi xtol'le gat' lao Chioza', beena' nak Xacho, kat'ka' Xancho Jesucristona' ziza'lene' ben'ka' nak lall' nee.

**4** Le' ben' bish' na' le' ben' zan', kon yel' wñabia' che Xancho Jesucristona', chat'yointo' le' soatezi soale gonchle ka chazlall' Chioza', kon ka bsdinto' le' gonle na' kon ka ba chonkzle.

<sup>2</sup> Ba nezczile diika' wnanto' le' gonle, na' nakgakan diika' bllia Xancho Jesúza' bia' goncho. <sup>3</sup> Chioza' cheenile' soale gonle daa chazlallee. Na' bi inelenzle xiin xool ben', <sup>4</sup> san to tole chiyal' gaple balaan xool-lena' lega ben' nak lall' na' Chioza', <sup>5</sup> na' bi' we'zle cho'a xbayi beli chen chelena', ka chon ben'ka' bin' gombia'gake' Chioza'. <sup>6</sup> Na' ni tole bi gonle'ile xool ljjwell-le la' ba bsi'nkzinto' le' Xanchona' wsak'zi'e yog' ben'ka' chon ka'. <sup>7</sup> Chioza' aga gox wñabe' cho' kwenche goncho dii zbanki, san gox wñabe' cho' kwenche gakcho ben' nxi nyech. <sup>8</sup> Daan, beena' bi chzenague' diiki chli' chsedinto' aga chento'n bi chzenague', san che Chiozan', beena' bene' le' Espíritu Santo' che'na'.

<sup>9</sup> Na' ka nak cheyi daa chaki ljjwellcho, bi chonan byen wzajni'chinto'n le', la' kwin Chioza' ba bsdile' le' gaki ljjwell-le. <sup>10</sup> Na' chakile yog'loj' ben'ka' nonlilall' Cristona', ben'ka' zoa doxente Macedóniana'. Na' chat'yointo' le' ben' bish' na' le' ben' zan', zizikchli gakchi ljjwell-le. <sup>11</sup> Li gon to dii byen soalen ljjwell-le wen, na' li se wneyi che loo yoo lill-lena', na' li gon llin kon ni'a na'leka' ka ba wnakznto' le' <sup>12</sup> kwenche ben'ka' bi nonlilall' Cristona' inagake' le' wen nsa' chele, na' lekzka' bibi zed ljenle lill ben'.

<sup>13</sup> Na' le' ben' bish' na' le' ben' zan', cheeninto' inezile nak gak che ben'ka' ba wit kwenche bi gakyeshile ka

chakyeshii ben'ka' bi nongake' lez lljazoalengake' Chioza'. <sup>14</sup> Daa chajle'cho wit Jesúza' na' bibane' ladj ben' wetka', lekzka' chajle'cho Chioza' yisbane' ben'ka' nonlilall'gake'ne' ka witgake'.

<sup>15</sup> Na' daan, nanto' le' kon ka wna Xancho Jesúza': Cho' ni mbancho kat' zizee, aga chon' yibialocho lao ben'ka' ba wit. <sup>16</sup> La' kwin Xancho Jesúza' zizee yabana', na' inie' zillj gone' mandad yiban ben' wetka', na' anjla' chñabia' inie' na' yenicho kwell trompet che Chioza', na' ben'ka' benlilall' Cristona' yibangake' nech.

<sup>17</sup> Na'tech, ka cho' ni mbancho, yigoyo Chioza' cho' yiyakchogake' txen ladj bejka' kwenche lljatilcho Xanchona', na' soalenchone' zejli kani. <sup>18</sup> Na' daan, li wtip lall' ljjwell-le kon dill'ki.

**5** Na' le' ben' bish' na' le' ben' zan', bi chyaljin wzejnto' le' inanto' bi lla bi goran' gak diiki. <sup>2</sup> La' ba nezczile kwasloj' llana' ziza' Xanchona' tokonganzi zizee, ka chon to wban kat' lljjane' wal' chel. <sup>3</sup> Kat'ka' ben' yell-liona' inie': "Asi naa zoachgacho mbalaz. Bikzbi chak checho", kana'lan tokonganzi kwiaiyi'gake' na' aga wilalat'gake'. Gak chegake' ka chak che noola' tokonganza' chzolo chaz bes che'na' kat' sane'. <sup>4</sup> San le' ben' bish' na' le' ben' zan', ba nezile diiki kwenche ki sha chel-lə chon llana' zizee tokonganza'. <sup>5</sup> Yog'le ba nombia'le Chioza' ba chdale lo beeni' che'na', na' bich chdale lo yel cho'la' daa chzaklebi dii mala'. <sup>6</sup> Daan, li se kwas na' li gaktō ben' nyeen nyeeniya' na' bi gonle ka chon ben'ka' bi nombia'gake' Chioza'. <sup>7</sup> Ben'ka' chda lo yel cho'la' bi nombia'gake' Chioza', nakgake' ka ben' ches wa ka ben' chzoll chniti na' bi chakbe'gakile' bin chak. <sup>8</sup> Per cho', lo beeni'nān' chdacho. Daan, chiyal' gakcho ben' nyeen nyeeniya', na' gonlilall'chcho Chioza', na' gakicho yog'loj' ben' na' goncho lez lljazoalenchō Chioza'. Shi goncho yog' diika', na' gakcho ka to soldad beena' nyaz diika' chkweejan le' lo wdila'. <sup>9</sup> La' aga gox wñab Chioza' cho' kwenche techo lo yel' zak'zi'na' zizan', san gox wñabe' cho' kwenche gat' yel' mban checho zejli kani daa wit Xancho Jesucristona'. <sup>10</sup> Wite' ni checho kwenche la'kzi shi ni mbancho wa shi ba witcho, lljazoalenchone'. <sup>11</sup> Na' daan, li wtip lall' ljjwell-le na' li gaklen ljjwell-le soachechchle wzenagle che Chioza' kon ka ba chonkzle.

<sup>12</sup> Le' ben' bish' na' le' ben' zan', chnabinto' le' gaple balaan ben'ka' chilaji chongake' xshin Xanchona' ladjlena', ben'ka' ngoo lall' na' le' na' chli' chsedgakile' le' nakan chiyal' gonle. <sup>13</sup> Li gapgake' balaan na' li gaki le-gake' ni che llinna' daa chongake'. Na' li soalen ljjwell-le mbalaz.

<sup>14</sup> Lekzka' chat'yointo' le' ben' bish' na' le' ben' zan', li we'lensha ben' liaka' dill' kwenche gongake' llin. Na' li wtipsha lall' ben'ka' chidinji, na' li gaklen ben'ka' bin' gakcha lo xnez Chioza', na' li gap yel' chxenlall' che yog'loj' ben'.

<sup>15</sup> Wsak'gale ni tole bi yizi'zle wzon che ben' shi bi gone' chele, san li gon ka dii le gonle dii wenna', aga to ladjle na'zə, san kon yog'loj'te ben'.

<sup>16</sup> Toshiizi li yibayi. <sup>17</sup> Li soatezi soa we'llwill-le Chioza'.  
<sup>18</sup> Li we' Chioza' ye'l' choxken lao bittezə dii chak, la'  
 kan' cheenile' goncho cho' non'ilall'cho Cristo Jesús'a'.

<sup>19</sup> Bi wsej wllonle daa cheeni Espíritu Sántona' gone'.  
<sup>20</sup> Bi gonzile nakzi xtill' beena' ina: "Ki ba wna Chioza'  
 nad'." <sup>21</sup> San li wsedyen'an shi dii li nakan daa goll  
 Chioza' le' na' li ikaa dii wenna'. <sup>22</sup> Bi gonle txen bittez  
 dii mal.

<sup>23</sup> Na' Chioza'kzə, beena' chzoe' cho' mbalaz, gone' ka  
 yiyoll yido gakte ka chazlallee. Na' gap wwie' do ka  
 nakle kwenche bibi dol' naple kat' ziza' Xancho Jesu-

crístona'. <sup>24</sup> Chioza', beena' gox wñabe' le', toshiizi  
 chone' daa ba wne' gone', na' len' gone' dga.

<sup>25</sup> Na' le' beñ' bish' na' le' beñ' zan', li inabshayi  
 Chioza' gaklene' neto'.

<sup>26</sup> Li wwapgach chiox yog'loñ beñ' bish'choka' na' beñ'  
 zanchoka' lega beñ' chaki ljwellin daa nakle lall' na'  
 Chioza'.

<sup>27</sup> Na' nia' le' kon ye'l' wñabia' che Xanchona' wlab-  
 shale dga lao yog'loñ beñ' bish'choka' na' beñ' zanchoka'.

<sup>28</sup> Xancho Jesucrístona' gaklensgue' le'.

## 2 Tesalonicenses

**1** Nad' Pablo, na' Silvónoni len Timotewi chwapnto' le' chiox, ka le' chdop chllagle choe'la'ole Xacho Chioza' na' Xancho Jesucristona' Tesalónica'na'. <sup>2</sup> Na' chñabinto' legake' gonshgagake' ka gak wen chele na' wzoagake' le' mbalaz.

<sup>3</sup> Dii l'icha toshiizi chiya! we'nto' Chioza' ye! choxken ni chele, le' beñ' bish' na' le' beñ' zan', daa zejch chonjilall'le Jesucristona' na' daa to tole zejch chakile beñ'. <sup>4</sup> Daan, choe'nto' xtill'le lao beñ'ka' nonlilall' Cristona' to to gana' chdop chllaggake' choe'la'ogake' Chioza' ka nak daa zoachechle toshiizi nonlilall'le Cristona' la'kzi chen chle'ile ye! zak'zi'ka'. <sup>5</sup> Na' yog'lo! dga chli'n ka wen ben Chioza' wleje' le' gake lall' nee, na' chli'n dii li nakle beñ' chido! l'jazoa gana' chñabi'e, la' ni cheyin-nan' chzak'zi'le.

<sup>6</sup> Na' Chioza', beena' chçhoglo che beñ' ka chiya!, wsak'zi'e beñ'ka' chsak'zi'gake' le'. <sup>7</sup> Na' le' chzak'zi'le naa, Chioza' gone' ka soale mbalaz, na' ka'kz gone' çhento' kat'ka' ziza' Xancho Jesúza' yabana' ladj be! yi'na' kon anjl che'ka', beñ'ka' nap ye! wak xen, <sup>8</sup> kwenche wsak'zi'e beñ'ka' bi bembia'gake' Chioza' ni bi bzenaggake' dill' wen dill' kob che Xancho Jesúza'. <sup>9</sup> Beñ'kin sakzi'gake' zejji kañi na' bi yillingake' gana' chñabia' Xanchona' kon ye! wak choo ye! wak xen che'na'. <sup>10</sup> Ka' gak chegake' kat' yila' Xancho Jesucristona' kwenche beñ'ka' nak lall' nee koogake'ne' balaan na' yibachgayi yog' beñ'ka' wyajle' che', na' lenle, daa wyajle'le xtilleena' be'lento' le'.

<sup>11</sup> Daan, toshiizi chñabnto' chele kwenche Chioza' ile'shiile' le' lega beñ' gox wñabe', na' gaklene' le' kon ye! wak che'na' kwenche yiyoll gonle yog' dii wenna' ba yoo yichjle na' bichlæ dii wenka' cheenile' gonle daa nonlilall'lene' <sup>12</sup> kwenche Xancho Jesúza' sho'e balaan ni che daa chonle, na' lekzka' kwee le' balaan. Na' Chios chechona' na' Xancho Jesucristona' gaklengake' le' gak ka'.

**2** Na' naa, le' beñ' bish' na' le' beñ' zan', ka nak daa ziza' Xancho Jesucristona' na' daa yidi'a yillagcho yiyakchone' t xen, chñabinto' le' <sup>2</sup> bi gakklejile ni bi illeble kat' yenile inagake' ba bila'læ Xanchona'. Axt inatelzgabe: "Ki ba wna Chioza'", wa inazgabe: "Ki wna Páblona'", wa, "Ki bene'n yish nan ba bila'læ Xanchona'." <sup>3</sup> Bi we'le latj no siye'zæ le' ka nak diiki. La' aga wiyedzie' shi beñ'ka' chwiyi Chioza' biñ' yizoshi'gake'ne', na' shi biñ' ichej beena' nak beñ' mal wal, † beena' ba nakten kwiayee. <sup>4</sup> Beenin gon kwine' lizelozi beñ' choo beñ' xen na' wsej wllone' we'la'o beñ'

Chioza' wa bittezæ dii nonlilall'gake'. Na' l'jchi'e loo yoo-do' che Chioza' gon kwine' ka Chios.

<sup>5</sup> ¿Abi chjadinile bshaljen' le' cheyi dga kana' zoalen' le'? <sup>6</sup> Naa ba nezele non ni nkwez beeni kwenche bi yobile' wli'lawe'. <sup>7</sup> Do ngash'zæ ba wzolokzæ chak dii mala' daa ba yoo xnezin gakæ. Stozæ chyallj ikwas beena' ni nzague'n kwenche wli'lawin. <sup>8</sup> Na'ch wli'lao beñ' mal wala', na' wit Xancho Jesúza'ne' kon bishbe che'na' na' wlliaeyene' ka ziza'lene' ye! chey cheeni' che'na'. <sup>9</sup> Ka nak beñ' mal wala', dii xiwaan gакlenan le' gone' biya ye! wak diika' gon ka yibani beñ' kwenche siyee legake'. <sup>10</sup> Na' wçhine' yog' de wxiye' kwenche siyee beñ'ka' ba nakan kwiayi' daa bi goklall'gake' wlebgake' daa nak dii li kwenche yilagake'. <sup>11</sup> Daan, Chioza'kzæ cho'e latj shajle'gake' che de wxiye'ka', <sup>12</sup> kwenche kwiayi' yog'lo!te beñ'ka' bi wyajle'gake' che daa nak dii li, san bibachgakile' daa nak dii mal.

<sup>13</sup> Na' neto' naa, toshiizi chiya! we'nto' Chioza' ye! choxken ni chele, le' beñ' bish' na' le' beñ' zan', beñ' chaki Chioza'. La' dii nechte Chioza' wleje' le' kwenche yilale bi kwiayi'le daa ba bixis biyib Espiritu Santo che'na' le' na' daa chajle'le dill' li che'na'. <sup>14</sup> Ni cheyi dgan, gox wñab Chioza' le' ka be'lennto' le' dill' wen dill' kob che'na', kwenche idol'le sho'lenle Xancho Jesucristona' balaan.

<sup>15</sup> Na' le' beñ' bish' na' le' beñ' zan', li soachech na' li kooshao' diika' bli' bsedinto' le' ka be'lennto' le' dill' na' ka bzejnto' le'. <sup>16</sup> Na' kwin Xancho Jesucristona' na' Xacho Chioza', beena' ba gokile' cho' na' lo ye! beñ' wen che'na' ba beñe' cho' ye! chxenlall' zejji kañi na' to dii wen dii shao' dii goncho lez, <sup>17</sup> wtipshgagake' lall'le na' wzoachechgabe' le' kwenche toshiizi gonle wen na' we'le dill' wen dill' shao'.

**3** Dii zeelo nanto' le', beñ' bish' na' le', beñ' zan', li inabshayi Xanchona' çhento' kwenche cho'a xtilleena' choe'lennto' beñ' illiljan tolbe'zæ na' wlebgake'n lega dii zakii, kon ka benle le', <sup>2</sup> na' kwenche yisle' neto' lo ni'a na' beñ' malka', beñ'ka' chon dii bi yejni'alallii. La' aga yog' beñ' chajle'gake' che Xanchona'. <sup>3</sup> Per nezicho Xanchona' chone' ka ne', na' gone' ka soachechhle na' gap wwie' le' lao dii mala'. <sup>4</sup> Na' nxenlall'nto' Xanchona' chaklene' le' chonle ka ba wnanto', na' toshiizi gonlen. <sup>5</sup> Na' Xanchona' gакlene' le' gакile' beñ', ka chon Chioza' chakile' cho', na' so sakile gaple ye! chxenlall' lao yog' daa yen ile'ile ka ben Cristona'.

<sup>6</sup> Le' beñ' bish' na' le' beñ' zan', kon ye! wñabia' che Xancho Jesucristona' nanto' le' bi gonle t xen nottezæ beñ' bish'choka' chdaliazæ, la' aga kan' bsedinto' le'.

† Beena' nak beñ' mal wal: xtila' nagake' el hombre de pecado wa el hombre malvado. Bwia 1 Jn. 2:18.

<sup>7</sup> Ƙa' nezkzile ka chonnto', na' kan' chiyal' gonle. Neto' biga wzoaznto' ka beŋ' lia ladjlena'. <sup>8</sup> Ni biga wdaoaznto' ye! wao che beŋ' na' bi wdixjnto'n, san ka tella ka wa! bila! bizodinto' bennto' llinna' kwenche ni tole bi beninto' zed. <sup>9</sup> Na' dii l!icha, zak'kzə wŋabnto' ye! goklen chelela', she!ka', per bennto' llin kwenche ble'ile, na' kan' gonle. <sup>10</sup> Kana' zoalennto' le' wnanto': "Beena' bi cheenile' gone' llin, lezkza' bi gawe'." <sup>11</sup> Na' ba beninto' ba!-le kon chdale to ni to na', ni bi chonle llin, na' chlalltezi chele ga bi chiyal'. <sup>12</sup> Na' beŋ'ki chon ka', chŋabinto' legake' kon ye! wŋabia' che Xancho Jesucristona' bich tazgake' ka'z, san gongake' llin kwenche yeej gaogake'.

<sup>13</sup> Na' le' naa beŋ' bish', na' le' beŋ' zan', bi lljxakile gonle dii wenna'. <sup>14</sup> Shi no bi chzoa dill' ka nanto' lee

yishi, li wwia no beena' na' bi gonlene' txen kwenche yido'ile'. <sup>15</sup> Bi nia' gakzbanilene', san wzajniile'ne' ka beŋ' bish'le.

<sup>16</sup> Na' kwin Xanchona', beena' chzoa cho' mbalaz, gone' ka soale mbalaz toshiizi bittezə dii chak chele. Xanchona' soalenshgue' yog!ol!tele.

<sup>17</sup> Nad' Pablo, kwin' chzej' † to chop cho'a lee yishi chwap' le' chiox, kan' chzej' lee yog' yishka' chselaa laolena' kwenche inezile nad'kzan chselaan. <sup>18</sup> Xancho Jesucristona' gaklenshgue' yog!ol!tele.

---

† Kwin' chzej': Páblona' bchine' beŋ' bzeje' dillaa bi'e, per kwine' bzeje' to chop cho'a dill' gana' chiyoll yisha' kwenche gokbe'gakile' len' bseleen.

# 1 Timoteo

**1** Nad' Pablo, nak' postl che Jesucristona' kwenche wi'a xtilleena', la' Chioza', beena' bisla cho' kwenche bi kwiayi'cho, len Cristo Jesúsza', beena' noncho lez gone' wen checho, bzoagake' nad'. <sup>2</sup> Chzej' li', Timoteo, nako' ka dowalj bi' cha' daa nakcho txen chonjilall'cho Jesucristona'. Xacho Chioza' len Xancho Cristo Jesúsza' gaklenshgagake' li', na' yiyesh'lall'gakile' li', na' gongake' ka so' mbalaz.

<sup>3</sup> Kana' ba zoa shaa Macedóniana', wñabid' li' yi-gaano' Éfesona' kwenche yoo ben'ka' chli' chsedi daa bi nak dii li' bi gongake' ka', <sup>4</sup> na' bi segake' wñeyi che dill' golka' wdiljall' ben' na' che diika' ben dii xoxz-toe'ka' daa bi chiyoll chido. La' dill'ka' chonan ka chakgued ben' na' bi chaklenan gombia'gake' daa cheeni Chioza' goncho daa nonjilall'chone'.

<sup>5</sup> Ye'gako'ne' ka' kwenche gaggake' yel' chaki ka daa chalj loo yichjall'do' beena' ba bixi biyech na' bibi de chao chdian le' daa ñezile' chone' ka chazall' Chioza' na' nonjilalleene' do lallee. <sup>6</sup> Balgake' lwaa segake' wñeyi cheyi diiki, ba lenzgake' choe'gake' dill' cheyi diika' bi zakii. <sup>7</sup> Cheenzgakile' gagkake' ben' wli' wsedid' ley che Chioza', per ni lekzgake' bi chajni'gakile' daa chli' chsedgakile' la'kzi nazgake' kayen'nan nakan.

<sup>8</sup> Ñezicho ley che Chioza' nakan wen, shi wchinchon ka chiyali. <sup>9</sup> La' ñezicho aga ben Chioza' leya' ni che ben'ka' chon wen, san ni che ben'ka' chyishj xtilleena' len ben'ka' bi chzenag, ben'ka' bi chall chllib Chioza', ben' saaxyaka', ben'ka' chiyit xaxña'yin, yog' ben'ka' nak wen xya, <sup>10</sup> ben'ka' chñelen xiin xool ben', ben'ka' nak ben' xej, ben'ka' chit' chde ben', ben'ka' chziye', ben'ka' axt choagake' Chioza' de taschiw kat' chziye'gake', na' nottez ben' bi chone' daa na cho'a xtill' Chioza' <sup>11</sup> kon ka chzajni dill' wen dill' kob che'na' daa nak dii zakii nllib. Na' Chioza', beena' chido' we'la'ocho, ba bene'n lall' na' wi'an dill'.

<sup>12</sup> Cho'a Xancho Cristo Jesúsza' yel' choxken chone' nad' wal, na' nxenlallee nad' wak gon xshine'na', na' bzoe' nad' gona'n. <sup>13</sup> La'kzi biya dii ben wña' che', na' bchi' bsakaa ben'ka' benjilall'gake'ne' na' bshagdij' le-gake', Chioza' biyesh'lallile' nad' daa bi wñezid' bin chon' kana' biñ' shajli'a che Jesúsza'. <sup>14</sup> Na' dii xen goklene' nad', bene' ka chonjilall'chee na' bene' nad' yel' chakina' daa nak' txen Cristo Jesúsza'.

<sup>15</sup> Dillii nakan dii wxenlall'cho, na' yog'lo' ben' chiyal' shajli'en: Cristo Jesúsza' bide' yell-lioni kwenche yisle' ben' saaxyaka', na' nad'yen' goklikz' ben' saaxya wal. <sup>16</sup> Per Chioza' biyesh'lallile' nad' kwenche wli' Jesucristona' do ka nak yel' chxenlall' xen che'na' na' ile'i ben'ka' zi' shajle' che' na' gaggake' yel' mban zejli kañi.

<sup>17</sup> Toshiizi shajla'oshga beena' chñabia' zejli kañi, beena' biga llia te che', beena' zoakz la'kzi bi chle'ichone', na' sho'shgue' balaan. Zeelo len' nake' Chios. Kan' gakhshgan.

<sup>18</sup> Timoteo, xiindawaa, nia' li' chiyal' gono' ka wdixje'i ben'ka' li' daa goll Chioza' legake' cho' dii nechte, kwenche daa wñagake' cho' gaklenan li' gono' ga zee-lo yizoilo' gono' xshin Chioza' daa nak lall' no'. <sup>19</sup> Toshiizi so' gonjilalloo Jesucristona' na' tlizi gono' wen kwenche bibi gao idian li' daa ñezilo' chono' ka chazlallee. La' bal' ben' dii shao'tekzə chongake' daa bi chiyal' gongake' na' bich chonjilall'gake'ne'. <sup>20</sup> Ka gok che Himenewa' len Alejándrona', na' wñabid' Chioza' gagkake' lall' na' Satanáza' kwenche wsedgake' bich bi gon inazgake' che Chioza'.

**2** Naa nia' li' daa lliate gonle: chiyal' we'lwill-le Chioza' na' inabile' daa chyalj chchinile na' daa chyalj chchini ben' yoblə, na' gat'yoile'ne' gaklene' yog'lo'lte ben', na' we'lene' yel' choxken ka nak daa chone' che yog'lo' ben' yell-lioni. <sup>2</sup> Chiyal' inabicho Chioza' gaklene' ben' wñabia'ka' na' yog'lo'lte ben' nak joschis, kwenche soacho mbalaz na' kono wsej wllon we'la'ocho Chioza' na' goncho daa cheenile'. <sup>3</sup> La' dgan nakan wen na' chazlalli Chiozan', beena' bisla cho' kwenche bi kwiayi'cho, <sup>4</sup> na' cheenile' yog'lo'lte ben' yell-lioki yilagake' na' gombia'gake' daa nak dii li'. <sup>5</sup> La' toz Chiozan' zoa, na' toz beena' chizoa ben' yell-lioni wen kon Chioza', len' Cristo Jesúsza', <sup>6</sup> beena' bzani kwine' wite' kwenche wdixje' xtol' yog'lo' ben' yell-lioni. Na' dga gokə, gokan llana' bllia Chioza' bia', na' bli'e cheenile' yisle' cho'. <sup>7</sup> Na' kwenche ñezi yog' ben' dga, bzoe' nad' nak' postl che' na' bene' lall' na' chyixji'a xtilleena'. Na' bene' lall' na' wli' wsedid' ben'ka' bi nak ben' Israel, kwenche shajle'gake' dill' li' che'na'. Na' dga cho'a dill' nakan dii li, na' bi chziyaa.

<sup>8</sup> Cheenid' yog'lo' ben' byoka' we'lwillgake' Chioza' gattezə zoagake', na' chiyal' gagkake' ben' lall'do' nxi nyech, ben' bi yoo daa nak yel' chllaa yel' chlok na' yel' wishagdij' kat' wjis neeka' lawe'na' we'lwillgake'ne'. <sup>9</sup> Na' ka nak noolka', chiyal' wsak'gake' gawk xagake', na' bi tezgake' lawin yiyiljall'gake' naklə yipaa yich-je'ka', ni bi wchingake' no or wa lech' zakii inllib. <sup>10</sup> San gonlagake' to dii byen seyi chegake' chongake' wen le-ga ben' choe'la'o Chios. <sup>11</sup> Chiyal' kwe' noolka' llizə wzenaggake' che ben'ka' chli' chsedi cho'a xtill' Chioza' na' wzoagake' xtillleeka'. <sup>12</sup> Bi cho'a latj wli' wsedzi noolka' ben' byoka', ni bi inabia'zgake' legake', san chiyal' kwe'gake' llizə wzenaggake'. <sup>13</sup> La' Chioza' bene' zi-gaate Adánna', na'techlə bene' Évana'. <sup>14</sup> Na' aga Adán-

nan' wxiye' dii xiwaa, san noolan' wxiye'n na' bxope' lao saaxyana'. <sup>15</sup> Na' noolka' chzoa xiiñin, bi tegake' lao yel' zi'na' shi toshiizi n̄xenilall'gake' Chioza', na' segake' w̄neyi gaggakile' beñ', na' soagake' gongake' ka cheeni Chioza' lega beñ' nyeen̄ nyeenyi.

**3** Dillii nakan dii wxenlall'cho: shi no cheeni koo lall' nee gap wwie' beñ'ka' non̄lilall' Crístona' na' wli' wsedile' legake', llin wen inleban lliallalee gone'. <sup>2</sup> To beñ' ngoo loo nee chli' chsedile' beñ', chiyal' gake' beñ' zoa do yichj do lallee, beñ' bibi cho'a xtillee de. Chiyal' soa toz xooole', na' gake' beñ' nsa' cheyin wen, na' gake' beñ' nyeen̄ nyeenyi, na' beñ' chidolee gap beñ' le' balaan̄. Na' chiyal' yiyeshile beñ' wi'e ga yigaan̄e', na' gake' te wli' wsedile' beñ'. <sup>3</sup> Bi chiyal' gake' beñ' weezo, ni bi gake' beñ' wishagdi, ni bi selall'chgaile' mech, san gake' beñ' wen, beñ' gaxjal'. <sup>4</sup> Chiyal' gake' kwee x̄nez x̄latji dii chak loo yoo lille', na' gone' byen wzenag xiñe'ka' che' na' soagakb' gongakb' daa nak wen. <sup>5</sup> La' shi to beñ' bi chak kwee x̄nez x̄latji dii chak loo yoo lille', çnakra gone' kwee x̄nezi che beñ'ka' n̄xenilall' Chioza'? <sup>6</sup> To beñ' shinza wzolo chon̄lilallee Crístona' bi chiyal' gake' lall' nee gap wwie' beñ'ka' non̄lilall' Crístona', kwenche ki gake' beñ' chep cha'lall' na' w̄hoglo Chioza' che' ka ba n̄hogloe' che dii xiwaa. <sup>7</sup> Lekzka' chiyal' seyi che' chone' wen lao beñ'ka' bi non̄lilall' Crístona' kwenche kono biz gon ina che' na' gonza dii xiwaa gan wchixan le'.

<sup>8</sup> Lekzka' beñ'ka' gap lo na'gake' gaklengake' wwiagake' bin chyalj ch̄hini beñ'ka' nakgake' txen nonlill'gake' Crístona', chiyal' gaggake' beñ' chido' gap beñ' legake' balaan̄, beñ' chda do lallee, na' bi sollgakile', ni bi gaggake' beñ' wzelall'. <sup>9</sup> Chiyal' soacheh-gake' shajle'gake' dii li daa ba bzajnii Chioza' cho' daa kono w̄nezi kana'. Na' chiyal' soagake' do yichj do lall'gake' na' bibi de gao idian yichjall'do'eka' daa ñezgake' chongake' ka cheeni Chioza'. <sup>10</sup> Na' lekzka' kat' kweje beñ'ki, chiyal' wwiayen'le nak nsa' chegake'. Na' shi bibi de dii chao xya chegake', wak gap lo na'gake' wwiagake' bin chyalj ch̄hini beñ'ka' nakgake' txen nonlill'gake' Crístona'. <sup>11</sup> Na' noolka' lekzka' chiyal' gaggake' beñ' chido' gap beñ' legake' balaan̄, na' bi gaggake' beñ' w̄chitj dill', san gaggake' beñ' nsa' cheyin wen, na' gaggake' beñ' gake' wxenlall'cho toshiizi gongake' wen. <sup>12</sup> To beñ' gap lo nee wwie' bin chyalj ch̄hini beñ'ka' nake' txen nonlill'gake' Crístona' chiyal' soa toz xooole', na' chiyal' gap wwie' xiñe'ka' kwenche gongakb' wen, na' kwe' x̄nez x̄latji dii chak loo yoo lille'. <sup>13</sup> Beñ'ka' chak chgoogake' x̄nezi che diika' chyalj ch̄hini beñ'ka' nakgake' txen nonlill'gake' Crístona' chido'gake' to balaan̄, na' soachgagake' mbalaz daa non̄lilall'gake' Cristo Jesús'a.

<sup>14</sup> La'kzi ba non' lez yobza yidwia' li', chzej' dga <sup>15</sup> kwenche shi bi chyobzid' yid', na' ba ñezilo' nakan chiyal' soa beñ'ka' nak xiñ Chioza', la' cho' chdop chllagcho choe'la'ochone' nakcho xiñ Chios yaa Chios banna'. Na' nak lo na'cho goncho ka gombia' beñ' dill' li' che'na'. <sup>16</sup> Dii li' dga chzajniin cho' che Crístona' daa kono w̄nezi nakan dii zakii nleeb, na' nan:

Bide' golje' ka cho' beñ' yell-lío,  
na' Espíritu che Chioza' bli'e nan nake' beñ' li' beñ'  
shao'.  
Na' ble'i anjlka' le',  
na' wda beñ' be'gake' cho'a xtilleena' lao beñ' yell-lío-  
ki,  
na' beñlilall'gake'ne'.

Na' biyep'e yabana' gana' yo'e to balaan̄ xen.  
**4** Espíritu che Chioza' cho'e dill' kwasloj, ne' kat' ba zoa te che yell-lioni, bal beñ'ka' ba non̄lilall'gake' Crístona' bich gon̄lilall'gake'ne', na' wzenaggake' che dii xiw'ka' na' diika' chli' chsedile' beñ' chegakin. <sup>2</sup> Na' wzenaggake' che beñ' wxiye'ka', beñ'ka' bichbi chao chdian legake' daa ba n̄lantekzgake' yel' wxiye'na'. <sup>3</sup> Na' chllongake' wshagna' beñ', na' chllontegake' yeej gaogake' bal yel' wao la'kzi Chioza' wlo'e yel' waoka' kwenche cho' non̄lilall'chone' na' nombia'cho dill' li' che'na' gaochon na' we'chone' yel' choxken. <sup>4</sup> La' yog'loj daa bxe bsil Chioza' nakan wen, na' bibi de dii inacho bi gaocho kon shi we'chone' yel' choxken kat' yeej gaochon. <sup>5</sup> La' daa chajle'cho cho'a xtill' Chioza' na' daa choe'lwilchone', chonleeye' yel' wao chechona'.

<sup>6</sup> Shi dga wli' wsedilo' bish' ljjwellchoka', na' gako' to wen llin wen che Jesucristona', na' tola' ba nono' cho'a xtill' Chioza' loo yichjall'do'na' len dii wenna' daa bse-do' na' zej chono'n. <sup>7</sup> Na' bi wzenago' biz dill' gol dii chsees' beñ', diika' wdiljall'gake' daa bi nak ka dii shajle'cho, san bsed gono' ka cheeni Chioza'. <sup>8</sup> Nezi cho kat' ch̄hitj ni'a na'choki chaklenan kwerp chechoni. Per daa choncho ka cheeni Chioza', dii xentechla chaklenan cho' naa zoacho yell-lioni na' lekzka' kat' illin lla lljazoalenchone'. <sup>9</sup> Dillii nakan dii wxenlall'cho, na' yog' beñ' chiyal' shajli'en. <sup>10</sup> Na' ni cheyinnan' chonnto' to dii byen chila'into' chonnto' xshin Chioza' daa ba nonnto' lez Chios yaa Chios banna', beena' cheeni yisle' yog'loj beñ', na' beñ'ka' chon̄lilall'yen' len' yisle'.

<sup>11</sup> Diikin chiyal' yoo beñ' gongake' na' wli' wsedilo' le-gake'. <sup>12</sup> Bi weezo' latj no ile'zi li' nakzi daa nako' bi' wew', san ben wen lao beñ'ka' non̄lilall' Crístona', ka de cho'a dill', na' yel' nsa' cheyin wen, na' yel' chaki beñ', na' yel' non̄lilallii Crístona', ni bibi dii mal sa'lal-loo, kwenche lengake' gongake' ka'. <sup>13</sup> Shlak yid', ben ka dii le blab Cho'a Xtill' Chioza' lao beñ'ka' chdop chllag, bli' bsdgake', na' btip lall'gake'. <sup>14</sup> Bi guetlalloo daa ben Chioza' lall' no' kana' beñ'ka' ngoo lall' na'gake' beñ'ka' non̄lilall' Crístona' b̄xo'a neeka' yichjo'na' bengake' li' lall' na' Chioza', na' bchej beena' wdixjee nan Chioza' ba wleje' li' gono' xshine'na'.

<sup>15</sup> Ben to dii byen ben diiki wloo Chioza' lo no' gono', na' benyenaan kwasloj kwenche gake'bi yog'loj beñ' ba zejch chono' wen. <sup>16</sup> Wze w̄neyi che kwino' na' cheyi daa chli' chsedilo' beñ', na' toshiizi wno'n. Na' shi gono' ka nan, na' yisla kwino' len beñ'ka' chzenaggake' daa chli' chsedilo'.

**5** Bi inezo' zibia' beñ' golka', san be'lengake' dill' xochi ka beñ' chshaljlen x̄ayin. Na' goni beñ' bishoo beñ' xkwid'ka'. <sup>2</sup> Na' goni x̄noo noolka' ba

ngolch ka li', na' goni beṅ' zano' nool xkwid'ka', na' bibi dii mal sa'laloo.

<sup>3</sup> Goklen nool wizebka', beṅ'ka' kono zoa çhegake'.

<sup>4</sup> Per shi zoa xiiṅ xsoagake', chonan byen iṅezgakib' chiyał' gap wwiagakb' le', la' len' bisgole' legakb'. La' kan' chazlall' Chioza' goncho. <sup>5</sup> Nool wizeba', beena' kono zoakz çheyin, beena' bgaṅ tlish' tyaj, chxeni-lallee Chioza' na' ka tella ka wał choe'lwille'ne' na' chat'yoile'ne' gaklene'ne'. <sup>6</sup> Per nool wizeba', beena' choe' cho'a xbayi beli chen çhe'na', nake' ka beṅ' net lao Chioza' la'kzi mbane'. <sup>7</sup> Bazjni'gakile' dga kwençhe bibi gon iṅaz beṅ' çhegake'. <sup>8</sup> La' beena' bibi wṅeyi ze çhe no dialla çhe' na' çhe beṅ'ka' nakyenee txen loo yoo lille'na', ba wlej yichje' daa nak çhe Chios, shi ka' chone', na' ba nxinjtechlæ yichjall'do'ena' aga ka beena' biṅ' shajle' çhe Chioza'.

<sup>9</sup> Lee yisha' gana' da' le nool wizebka' chiyał' ta' le beṅ'ka' ba wdeli guiyon yiz, beṅ'ka' ben banez kochno bikaagake'. <sup>10</sup> Chiyał' seyi çhegake' chongake' wen: daa gok bisgol xiine'ka', daa chiyesh'lall'gakile' beṅ' choe'gake' ga yigaṅgake', daa chongake' bittez dii gакlenan beṅ'ka' nonlilall' Chioza', axt chyibgake' ṅi'eka', na' daa chaklengake' beṅ'ka' chzak'zi', na' daa chongake' ka dii le chongake' yog' daa nak wen.

<sup>11</sup> Na' bi wdoo le nool wizebka' lee yisha' shi biṅ' gакgakile' guiyon yiz. La' zoa kat' we'gake' cho'a xbayi beli chen çhe'ka' na' yikaa çhegake' na' bich gongake' kwasloł xshin Crístona', <sup>12</sup> na' gapgake' dol' lao Chioza' daa bi sakgakile' gongake' ka ba bçhebgake'. <sup>13</sup> Na' leyi chiyakgake' noolæ lia na' chdagake' to to yoo. Na' aga toz daa, san lekzka' chçhitjgake' dill', na' chjalaalli çhegake' dii chak çhe beṅ' yoblæ, na' choe'gake' dill' dii bi chiyał' we'gake'. <sup>14</sup> Daan nool wizebka' ni zoa xlatjin, cheenid' yikaa çhegake' na' yizoa xiingake', na' koogake' xṅezi dii chak loo yoo lillgake', kwençhe bi wxa'gake' cho'alao beṅ'ka' bi chonlilall' Chioza'. <sup>15</sup> La' bał nool wizebka' ba bichejgake' lo xṅez Chioza' na' ba zjanogake' Satanáza'læ.

<sup>16</sup> Shi to beṅ' nonlilall' Chioza' zoa to dialla çhe' nool wizeb, chiyał' gакlene'ne' kwençhe bi gake' to dii zii dii zshab çhe beṅ'ka' nonlilall' Crístona', na' gак we'gake' daa chyallj chçhini nool wizebka' kono zoa çhegake'.

<sup>17</sup> Ka nak beṅ'ka' ngoo lall' na'gake' beṅ'ka' nonlilall' Crístona', na' chak chgoogake' xṅezin wen, chidol'gake' balaṅ xen. Na' beṅ'ka' noni xshingake' choe'gake' cho'a xtill' Chioza' na' chli' chsedgakile', balaṅ xentechlæ chidol'gake'. <sup>18</sup> La' Cho'a Xtill' Chioza' nan: "Ka nak goona' bana' chilali chlej chshoshjb trigo-na' kwençhe ichej xayinna', bi wllinle yixja' cho'aba' kwençhe gак koyob to çhop cho'a." Na' lekzka' nan: "Beena' chon llinna' chidołee ikaa laxje'."

<sup>19</sup> Shi no chao xya çhe to beṅ' ngoo lall' na' beṅ'ka' nonlilall' Crístona', bi wzenago'n shi bi zoa çhop shon beṅ' yizi' cho'agake'n. <sup>20</sup> Na' shi ga zoa beṅ'ka' bi chsankzgake' dii mala', chiyał' wsheshleno' legake' kat' ndop nllagle kwençhe yog'loł beṅ'ka' nakle txen illeb-gake' na' bi gongake' ka'. <sup>21</sup> Chat'yoid' li' lao Chioza', na' lao Jesucrístona' na' lao anjl çhe'ka', toshiizi gono'

diiki ba wnia'. Na' toz ka gonilo' yog'loł beṅ', aga balze' gакilo'. <sup>22</sup> Bi wxoazæ noona' yichj beena' cheeni gon xshin Chioza' shi bi ṅezilo' nak nsa' çhe', kwençhe ki gакo'ne' txen shi chone' dii mala'. Wdapshii kwino' kwençhe ki ta' icheno' dii mala'.

<sup>23</sup> Daa chak li'ona' na' daa zekizezi bi shawoo, bich yeejteko' toz nisa', san weej lat'do' wej vinona'.

<sup>24</sup> Bał dii malka' chon beṅ' chli'lawin ka zi' gaolæ beṅ' xya çhegake'. Na' zi balan, zi' chila' chinezi beṅaan.

<sup>25</sup> Na' ka'kzæ, dii wenna' daa chon beṅ' nla'xejgakan, na' la'kzi de dii wenna' daa ngash', wllin lla wli'lawin.

**6** Yog'loł beṅ'ka' ndoo lla yel chongake' xshin beṅ' na' ba chonlilall'gake' Crístona', chiyał' sho' yichj-gake' gapgake' xane'ka' balaṅ kwençhe bibi gon iṅaz beṅ' çhe Chioza' na' çheyi daa chli' chsedicho. <sup>2</sup> Na' shi xane'ka' nonlilall'gake' Crístona', la'kzi ba nakgake' beṅ' bish'gake' daa chonlilall'gake' Crístona', chiyał'kz gap-gake' legake' balaṅ, na' chiyał' gonçhægake' xshine'ka' do yichj do lall'gake' daa chakgakile' legake' na' ṅezgakile' beṅ'ka' si' banez xshine'ka' nakgake' beṅ' nonlilall' Crístona'. Dgan chiyał' wli' wsedilo' le-gake' na' ye'gako'ne' gongake'n.

<sup>3</sup> Shi no chli' chsedi dii nak nlla'læ na' bi chidiljin daa bli' bsemi Xancho Jesucrístona', na' bi chidiltejn daa chsedi cho' goncho ka cheeni Chioza', <sup>4</sup> beena' chon ka' nake' beṅ' chep cha'lall', beṅ' bibi ṅezi. Na' daa le chibaile' gакdił-lene' beṅ', chxie' daa nak yel' xe', yel' wishagdił, yel' chbell chṅe çhe beṅ', na' yel' chza'lall' mal çhe beṅ'. <sup>5</sup> Na' biga yiyoll yido gакdił-lene' beṅ' daa ba nxinj yichlall'do'ena', na' bi nombi'e daa nak dii li. Na' chakile' daa chonze' ka chli' chsedi çhe Chioza' gatile' mech xen. <sup>6</sup> Dii li, le mbalaz soacho shi goncho ka cheeni Chioza' na' goncho banez ka'k' to dii de çhecho. <sup>7</sup> La' to ka cha'zchon goljcho yell-lioni, na' to ka cha'zchon yiza'cho. <sup>8</sup> Shi de dii cheej chaocho na' de xalaancho, chiyał' goncho banez. <sup>9</sup> Na' beṅ'ka' cheeni gак beṅ' wni'a, chxopgake' lawi daa nak yel' wzelall' na' lliall'gake' biya dii bi yejni'alallii daa chxinj chle-nan legake', na' chtakw chçhejan legake' na' chbi-ayi'lengake'n. <sup>10</sup> Lo yel' wzelall' mecha' chalj chxe biya dii bi yejni'alallii. Bał beṅ', yel' wzelall' çhe'ka', ba bilaa-gake' lo xṅez Chioza' na' ba chile'gakile' zan yel' zi'.

<sup>11</sup> Per li' chono' xshin Chioza', biga gono' ka chon beṅ'ka', san ben daa nak dii lliča, ben ka cheeni Chioza', wzoatezi wzoa beṅlilallee, wdap yel' chaki, gok wal lao yog'loł dii idił illago', na' gok beṅ' gакjlall'.

<sup>12</sup> Btiplaloo na' ben to dii byen gono' daa cheeni Chioza', beena' nonlilaloo. Na' be'l-lall' beni çho' daa nak yel' mban zejli kanj. La' ni çheyinnan' gox wṅab Chioza' li' na' bi'o dill' lao beṅ' zan nan nonlilaloo Crístona'. <sup>13</sup> Na' naa, lao Chioza', beena' choe' yel' mban çhe yog'te dii de yell-lioni, na' lao Jesucrístona', beena' be' dill' kon ka nakan lao Poncio Pilátona', chon' byen <sup>14</sup> wzo' dill' dga nia' li', na' seyi çho' chono' wen na' bibi dii mal ta' icheno' axt ni ka yila' Xancho Jesucrístona'.

<sup>15</sup> La' wllin lla yiyede' ka bliia Chioza' bia', Chios, beena' chidoł' we'la'ocho, beena' zeelo chṅabia'. Zeelo len' nake' Xan yog'loł beṅ', na' chṅabi'e lao yog'loł beṅ'.

<sup>16</sup> Toze' len' biga lliā te che', na' zoe' lo beeni' xen wala' daa kono chzoi wwia. Ni tlish' benech biñ' ile'ile'ne' ni bi gak ile'gakile'ne'. Len' chidolee sho'e balaan zejli kañi na' biga lliā te ye! wñabia' che'na'. Kan' nakan.

<sup>17</sup> Beñ'ka' chle'i ye! wni'ana' yell-lioni, gollgake' bi gaggake' beñ' cha'sibə, ni bi gongake' lez ye! wni'a che'ka'. La' ye! wni'ana' bi nakan lez. San chiya! gongake' lez Chios yaa Chios banna'. Len' chone' zoayaa zoallin yog'lo! daa chyallj chchinicho kwenche si'chon banez. <sup>18</sup> Gollgake' gongake' wen, na' koo yichj-

gake' wzanchgake' dii wenka' chongake', na' segake' wneyi izangakile' we'gake' beñ' dii de chegake'. <sup>19</sup> Na' daa gongake' ka', na'chan saki gongake' lez daa zi' za', na' idol'gakile' ye! mban daa nak dowalj.

<sup>20</sup> Timoteo, wlooshosh yichjo' dga ba wnia' li'. Bi wzenago' dill'ka' bi yejni'alallii na' bibi zakaan, ni bi wzenago' xtill' beñ'ka' chonzə ka nap ye! sin'. <sup>21</sup> Ba! beñ' ba wyajle'gake' cho'a xtilleeka' na' ba bilaagake' lo xnez Chioza'.

Chioza' gaklenshgue' le' na' gone' ka gak wen chele.



## 2 Timoteo

**1** Nad' Pablo nak' postl che Jesucristona' kon ka chaklall' Chioza', kwenche wi'a dill' nan ba bchebe' wi'e yel' mban zejli kanj che notteza ben'ka' nak Cris-tona' txen. <sup>2</sup> Chzej' li', Timoteo, nako' ka dowalj bi' cha'. Xacho Chioza' na' Xancho Jesucristona' gaklenshgagake' li', na' yiyesh'lall'gakile' li', na' gongake' ka so' mbalaz.

<sup>3</sup> Tlizi choe'lwill' Chioza', beena' chonjilallaa do yichj do lallaa, ka ben dii ben' gol cha'ka'. Ka tella ka wal chnab' gaklene' li' na' cho'ane' yel' choxken ni cho'. <sup>4</sup> Chjadinid' ka wchello' kana' zeelo bshaljcho, na' cheenid' ile'id' li' kwenche yiba yizakid'. <sup>5</sup> Chjadinid' ka nonjilalloo Chioza' do yichj do lalloo, ka ben xna'golo' Loidana' na' xnoo, Eunícena'. Na' nezyenid' lekzka' li' nonjilalloone' do yichj do lalloo.

<sup>6</sup> Na' daan, chisa'lalloo chiya' we'l-lall'cho gono' xshin Chioza' kon ka nak yel' waka' daa bene' lall' no' kana' bxo'a' na'na' yichjo'na'. <sup>7</sup> La' Chioza' bene' cho' Espiritu che'na', na' Espiritu che'na' chaklene' cho' kwenche bi gall illebcho, na' chone' cho' yel' wak len yel' chaki, na' chaklene' cho' gakcho ben' nyeen nyeeni. <sup>8</sup> Daan, bi yiyi yido'ilo' wi'o cho'a xtill' Xanchona', ni bi yido'ilo' ni cha' daa dia' lillyani daa chon' xshin Chioza'. San chiya' gono' nad' txen illaglocho yel' zak'zi'ka' ni che cho'a xtill' Cris-tona', la' Chioza' chaklene' cho' len yel' wak che'na'. <sup>9</sup> Chioza' bisle' cho' na' gox wñabe' cho' kwenche gakcho lall' nee, aga yel' chon wen checho-nan', san kon ka goklallile' gone'n daa nake' ben' wen. Na' daa biyesh'lallile' cho' wlo'e xnezin wselee Jesucris-tona' kana' zi' wxe wsiltie' yell-lioni. <sup>10</sup> Na' naa, ba bli'lawi yel' chiyesh'lallii che'na' daa bid Jesucristona', beena' bisla cho', na' bliiayee yel' wak che yel' wita', na' dill' wen dill' kob che'na' chzajniin cho' nan de to yel' mban daa bi te cheyin.

<sup>11</sup> Chioza' bzoe' nad' nak' postl na' bene' lall' na' chy-ixji'a dill' wen dill' kobi na' chli' chsedida'n ben'. <sup>12</sup> Na' ni cheyinnan' chzak'zi'a lao dga chak cha' naa. Per bi chiyi chido'id', la' nezid' ka nak beena' ba nxenilallaa. Na' nezid' nape' yel' wak gapshi'e dill' li' che'na' daa bene' lall' na', kwenche toshiizi gakan dowalj axt kat' illin lla te che yell-lioni.

<sup>13</sup> Dill' lika' ba bli' bsedid' li', bli' bsedid' n ben' kon ka nakan. Na' daa ba nako' txen Cristo Jesús'a, soachecho' gonjilalloone' na' gakteilo' ben'. <sup>14</sup> Espiritu Sán-tona', beena' zoa loo yichjlall'do'chona', gaklene' li' kwenche toshiizi wli' wsdilo' ben' dill' lina' daa ba bse-did' li' na' bi wi'o latj shi ga za'zə ben' cheenile' yisheen.

<sup>15</sup> Nezkzilo' yog' ben' Ásiaka' wchoonlall'gake' nad', na' lentez Figélona' na'ch Hermógeneza'. <sup>16</sup> Chnabid'

Chioza' yiyesh'lallile' Onesíforona' len xiñ xoole'na', la' zan shii bidtipe' lallaa na' bi bido'ile' bidwie' nad' loo lillyani. <sup>17</sup> To ka bidze' Rómani, lii biyiljdotie' nad' axt ki bililele' nad'. <sup>18</sup> Chnabid' Xanchona' yiyesh'lallile'ne' kat' illin llana' wchogloe' che ben'. Nezkzilo' dii xen goklene' cho' Éfesona'.

**2** Na' li', naa, xiñdawaa, gok wal daa chaklen Cristo Jesús'a' li'. <sup>2</sup> Daa ba benilo' bli' bsedid' ben', bzajni-in ben'ka' nxenlalloo, ben'ka' nezteilo' wak wli' wsdgakile'n ben' yoblə kon ka nakan.

<sup>3</sup> Wzoachech bti' yel' zak'zi'ka' chllaglo' lega ben' chon xshin Cristo Jesús'a', ka chon' nad'. <sup>4</sup> Ni to ben' ze-je' lo wdila' aga dii yoblə zeze' wñeyi, san chiya' kwey yichje' yog'lo' te kwenche gone' daa yiyoolallii beena' wleje' le' gake' soldad. <sup>5</sup> Lekzka' beena' chxonj, bibi gone' gan shi bi chzoe' dill' gone' yog'lo' te daa lli'a bia' gone'. <sup>6</sup> Na' beena' cheeni yizi' yilape' chiya' wwa'gax-je' llin cheyin. <sup>7</sup> Wze wñeyi dga nia' li', na' Xanchona' wzajni'chile'n li' kwaslo'.

<sup>8</sup> Jadini Jesucristona', beena' biban ladj ben' wetka', beena' nak xiñ dia' che dii Davina', kon ka na dill' wen dill' kob che'na' daa chli' chsedid'. <sup>9</sup> Na' ni cheyinnan' chzak'zi'a, axt ba wdixjgake' nad' lillyani ka to ben' wen dii mal. Per aga len cho'a xtilleenan' nej lillyani, san zechlə chlliljan. <sup>10</sup> Daan chzo chzakid' yog' yel' zak'zi' dii chak cha', kwenche ben'ka' ba wlej Chioza' gaggake' lall' nee gonjilall'gake' Jesucristona' na' yilagake' kwenche bi kwiaiyi'gake', na' lljazoalengake'ne' zejli kanj.

<sup>11</sup> Dillii nakan dii wxenlall'cho:

Shi ba witlencho Cris-tona', lekzka' wbanlenchone'.

<sup>12</sup> Na' shi so sakicho lao bitteza yel' zi' yen ile'icho daa nakchone' txen, lekzka' inabia'lenchone'.

Shi cho' bi wchebcho nakchone' txen, ka'kzə le' inə' bi nake' cho' txen.

<sup>13</sup> La'kzi cho' bi choncho daa chchebcho, le' chone' ka ba bchebe',

la' toshiizi chone' kon ka chchebe' gone'.

<sup>14</sup> Bi guetlalloo yisoo dga lall' ben'ka' chli' chsedilo'. Na' kon yel' wñabia' che Chioza' daa ba bene' li' bsi'ngakile' bi chiya' gagguedlenzə ljwellgake' ni cheyi diika' bibi zakii. La' bi chaklanan ben', san chlliaiyi'lan ben'ka' chzenagan. <sup>15</sup> Ben to dii byen gono' ka chazlall' Chioza' kwenche bibi wsi'n li' yel' zto' lo xshine'na', na' bli' bsedid' li' che'na' kon ka nakan. <sup>16</sup> Bi wzenago' dill'ka' bi yejni'alallii na' bite bi zakkagan, la' ben'ka' choe' dill' ka diika' zizikli chongake' daa bi choollall' Chioza'. <sup>17</sup> La' daa chli' chsedgakile' nakan ka to yillwe' dii nak lech na' chlliaiyi'n ben'. Ka' ben Himenewa' len

Filétona', <sup>18</sup> bīlaala'ogake' dill' lī çhe Chioza' na' naz-gake' ba bisbanle' beñ' wetka'. Na' chonllejgakile' beñ'ka' ba nonlilall'gake' Crístona'. <sup>19</sup> San dill' lī çhe Chioza' nakan ka to len yoo dii zoaçheçh. Na' dill' lī çhe'na' nan ki: "Xanchona' nombi'e beñ'ka' nak lall' nee." Na' lekzka' nan: "Nottezə beena' na nake' Crístona' txen, chiyal' yikwase' lawi dii mala'."

<sup>20</sup> To loo yoo lill beñ' wni'a aga chçhine' shgal' dii nak de or wa de plat, san nçhixgakan de yag len de yo. Bañan naki gana' chçhine'n, na' bañan chonan llin gatzet. <sup>21</sup> Ka'kzan beena' chon daa chazlall' Chioza', saklebile' diika' nak de or wa de plat, na' zakee wçhin Chioza'ne' gone' dii zan dii wen.

<sup>22</sup> Bi gono' txen ni to dii malka' cheeni beli chenna' kat' zoan lo yel' wewaa. Na' ben to dii byen gako' beñ' lī beñ' shao', na' gonlilalloo Crístona', na' gakilo' beñ', na' soaleno' bish' līwello'ka' mbalaz, ka chon yog' beñ'ka' nxi nyech yīçhjlalldoe'ka', beñ'ka' choe'lwill-gake' Xanchona'. <sup>23</sup> Bi wzenago' dill'ka' biz chon chna, dill'ka' bibi zak', la' ba ñezkzilo' chçegakan wdil'. <sup>24</sup> To beñ' nłane' chone' xshin Xanchona' bi chiyal' wshagdile' beñ', san chiyal' gonile' yog'loł beñ' wen. Na' chonan byen gak wli' wsedile' beñ', na' chiyal' gape' yel' chxenlall'. <sup>25</sup> Na' chiyal' we'lene' dill' xochi beñ'ka' chzoshi' daa nak dill' lī daa chli' chsedile', na' gone' lez shicholə Chioza' gaklene' legake' kwençhe yiyaj yilengakile' na' gombia'gake' daa nak dii lī, <sup>26</sup> na' yiyeeñ yiyeeñigakile' na' yilagake' lo ñi'a na' dii xiwaa daa ntakw nçhejan legake' daa chongake' ka cheenin.

**3** Lekzka' chiyal' ñezilo' dga: kat' ba zoa te çhe yell-lioni, dii zan dii nxoll gat'. <sup>2</sup> La' beñ' zan çhe to kwinzgake' segake' wneyi, na' lillinzi selall'gake' gat' kwe'gakile' mech, na' gaggake' beñ' llalj na' beñ' chep cha'lall'. Biz gon ñagake' çhe Chioza', na' bi wzoagake' xtill' xaxñeeka', ni bi we'gake' yel' choçken beñ' gaklen legake', na' ni bi yoo yīçhjgake' gongake' ka cheeni Chioza'. <sup>3</sup> Na' bi yiyesh'lall'gakile' beñ', ni bi si'xen çhe bish' līwellgake', na' le çhilj sangake' dill' çhe beñ'. Na' bi sakgakile' ñabia' kwingake', na' le yibagakile' wçhi' wsak'gake' beñ', na' gakzbangakile' yog'lołte daa nak wen. <sup>4</sup> Gaggake' beñ' çhop cho'a dill', na' beñ' bibi nalli, na' gon kwingake' beñ' choo beñ' xen. Na' le yibachgakile' gongake' kon ka chzelall'gake' latjin dii nan gongake' ka cheeni Chioza'. <sup>5</sup> La'kzi gonzgake' ka beñ' le nçenilall' Chios, na' to kwinzgake' wli' wze çhegake' nan biñ' we'gake' latj wshaa Chioza' yīçhjlalldo'eka'.

Na' li' ñaa, bi chiyal' gono' ni to beñ'ki txen. <sup>6</sup> La' kan' nak beñ' wxiye'ka' chda to to yoo, na' chziye'gake' noolka' bi nteyi, beñ'ka' lall' lao saaxyana' na' chongake' biya dii mal. <sup>7</sup> Noolki tlizi chzenaggake' daa chli' chsedid nottezə beñ' legake' na' biga lliia chombia'gake' daa nak dii lī. <sup>8</sup> Ka ben beñ'ka' le Janes na'ch Jambres, wzoshiy'gake' dii Moiséza', kan' chon beñ'ki chsej chl-longake' çheyi daa nak dii lī daa nxinj nlen yīçhjlalldo'eka'. Na' bi nde beñ'ki kwent lao Chioza' la'kzi nazgake' nonlilall'gake'ne'. <sup>9</sup> Na' aga wgol daa chongake', la' yog' beñ' gakbe'i nakgake' beñ' bi

yejni'alallii, ka gok çhe beñ'ka' çhop, beñ'ka' wzoshiy' dii Moiséza'.

<sup>10</sup> Na' li' ñaa lla, ba ñezkzilo' ka nak daa chli' chsedid', ka nsa' çha', ka nak daa lliallalaa gon', ka nonlilalaa Chioza', na' ka nak yel' chxenlallaa na' yel' chakina' nap', na' ka chtip lallaa kwençhe chzo chzakid' yel' zak'zi'ki chtil'. <sup>11</sup> Na' ñezilo' ka nak yel' zak'zi'ka' diika' ba bllagloa', ka diika' btil' Antioquiana', na' Icóniona', na'ch Lístrana'. La'kzi dii zan dii ba bllagloa', Xanchona' ba bisle' nad' lao yog'lołten. <sup>12</sup> Dii lī, yog'loł beñ'ka' cheengakile' gongake' ka cheeni Chioza' daa nakgake' txen Cristo Jesúsza', wsak'zi' beñ' legake'. <sup>13</sup> Na' beñ' wen dii malka' len beñ' wxiye'ka', zizikli gongake' mal, na' gaklelagakile' siye'chgage' beñ' na' axt kwingake' ba chiyajle'gake' çhe yel' wxiye' çhe'ka'.

<sup>14</sup> Na' li' ñaa, wzoaçheçh lawi daa ba nsedo' na' ba wyajli'o. La' nombia'kzo' beñ'ka' bli' bsedid' lī. <sup>15</sup> Jadini kana' naktio' bi'do' nombi'o Cho'a Xtill' Chioza', na' len-nan' gonan lī' yel' sin'na' daa chsedid' lī' gonlilalloo Cristo Jesúsza' kwençhe yilo' na' bi kwiayoo. <sup>16</sup> Kwin Chioza' bzajniile' dii beñ'ka' bzej doxen Cho'a Xtillena', na' zakaan wli' wsedid' beñ', wsheshlenen beñ' bi chon wen, yigoon shli' lall' beñ' nakleji, na' wzajniin beñ' kwençhe gake' beñ' lī beñ' shao', <sup>17</sup> kwençhe beena' chon ka cheeni Chioza' zizikli gachache' na' gak gone' yog' diika' nak wen.

**4** Lao Chioza' na' lao Cristo Jesúsza', beena' yiyede' ñabi'e na' wçhogloe' çhe to to beñ', ka beñ' ni mban na' ka beñ' ba wit, chon dga lo no': <sup>2</sup> Be'len beñ' Cho'a Xtill' Chioza', na' toshiizi benan kat' de xlatjin gono'n, laa cheengakile' wzenaggake'n laa bi cheengakile'. Ben ka yiyakbe'i beñ' nan ba bxiñj blene', bsheshlen beena' bi zej shli, na' btip lall'gake' gongake' wen, na' wdap yel' chxenlall' çhegake' na' bli' bsedid' legake'. <sup>3</sup> La' wllin lla kat' beñ' yell-lioki bich gaklall'gake' wzenaggake' daa nak dii līcha. Na' daa cheengakile' gongake' kon ka nan yīçhjlalldo'eka', yiyiljgake' wde wdeli beñ'ka' chli' chsedid' daa chiyoolall'gake' wzenaggake'. <sup>4</sup> Na' yilaala'ogake' daa nak dii lī na' wzenaggake' bizə dill' gol. <sup>5</sup> Per lī, gokto lega beñ' nyeeñ nyeeñiyi lao yog'lołte dii chak, na' so sakilo' wtiłoo yel' zak'zi'ka'. Ben ka dii le be' dill' wen dill' kob çhe Crístona', na' ben xshin Chioza' daa ba nak lall' no'.

<sup>6</sup> La' ba zoa witgake' nad' daa chon' xshin Crístona', na' ba zoa gaoshosh lljazoalenee. <sup>7</sup> Ba ben' ga zeelo bizoid', na' ba biyoll beñ' daa ben Chioza' lo na' gon', na' toshiizi wzoaçheçh benlilallaane'. <sup>8</sup> Na' ñaa ba chbez' llana' ikaa daa chidołaa daa ba ben' dii wenna'. Na' Xanchona', beena' chçhoglo çhe beñ' kon ka nakan, gong'e'n nad', na' aga toz nad', san len yog' beñ'ka' do yīçh do lall'gake' nongake' lez llana' yiyede' sto shii.

<sup>9</sup> Ben to dii byen līi yidwiatezo' nad', <sup>10</sup> la' Démaza', daa ngoo yichje' daa de yell-lioni, ba wchoonlallee nad' na' ba ziyaje' Tesalónica'. Na' Crescéntena' zeje' zji'e cho'a xtill' Chioza' Galáciana', na' Títona' zeje' Dalmáciana'. <sup>11</sup> Tochga Lúcazi zoalene' nad'. Jadilj Márcona' na' dalene' ni kwençhe gaklene' nad' lo xshin Crístona'. <sup>12</sup> Ba bsełaa Tíquicon'a' Éfeson'a'. <sup>13</sup> Kat'ka' tio' Tróaza'

ikaasho' xachela' chdob' daa bkwaan' lill Cárpona'; na' lezkza' bex' librka', na' dii lliialote goxoo libr de yidka'.

<sup>14</sup> Alejandro, beṅ' wiḱekw yana', le michian bene' ḱha', na' Xanchona' wi'ene' daa chidoḷee. <sup>15</sup> Lezkza' li', wsako' ki gone' ḱho' ka', la' le chakzbanile' daa chli' chsedicho.

<sup>16</sup> Dii nech ka bdegake' nad' lao beṅ'ka' chṅabia' ni, ni to beṅ' bish'choka' bi goklengake' nad'; yog'zgake' wchooṅlall'gake' nad'. Chṅabid' Chioza' si'xene' ḱhe-gake'. <sup>17</sup> Per Xanchona' goklene' nad' gok' wal kwenḱhe bia' cho'a xtillena' lao beṅ'ka' biṅ' gonḷi-lall'gake'ne', na' bisle' nad' lao yeḷ' wita'. <sup>18</sup> Na' Xan-

chona' yisle' nad' lao yog'ḷoḷ dii mal, na' lljazoalenee yabana' gana' chṅabi'e. Leṅ' chidoḷee sho'e balaṅ zejḷi kaṅi. Kan' nakan.

<sup>19</sup> Bwapsha nad' chiox Príscana' len Aquílana', na' yog' beṅ' lle' loo yoo lill Onesíforona'. <sup>20</sup> Erástona' bi-gaṅe' Coríntona', na' bkwaṅa' Trófimona' Milétona' daa bi shawee. <sup>21</sup> Btalalloo yido' ka zi' yizolo' dii zaga'. Eubúloni, Pudénteni, Línoni, Cláudiani, na' yog'ḷoḷ beṅ'ki nakcho txen nonḷilall'cho Jesucrístona', chwap-gake' li' chiox.

<sup>22</sup> Xancho Jesucrístona' soalenshgue' li'. Na' gone' ka gak wen ḱhe yog'le.

# Tito

1 Nad' Pablo chzej' li', nak' wen llin çe Chioza' na' nak' postl çe Jesucristona', na' bselee nad' kwençe gaklen' beñ'ka' ba wlej Chioza' gonlilall'gake'ne' na' gombia'gake' daa nak dii li daa chzajni-in cho' goncho ka cheenile'. 2 Na' zoacho noncho lez to yel' mban zejli kañi. Kana' zi' wxe wsiltie' yell-lioni, Chios, beena' biga chziye', bchebe' gone'n cho'. 3 Na' naa ba bllin lla, Chioza', beena' chisla cho' kwençe bi kwiayi'cho, chzenile' yog' beñ' cho'a xtilleena' daa bene' lall' na' chyixji'a, kon ka wne' gon'. 4 Chzej' li', Tito, nako' ka dowalj xiin' daa nakcho toz chonlilall'cho Jesucristona'. Xacho Chioza' na' Jesucristona', beena' bisla cho' lao saaxya çechoka' kwençe bi kwiayi'cho, gaklenshgagake' li' na' gongake' ka so' mbalaz.

5 Bkwaana' li' Crétana' kwençe wzeelo' koo xnezi daa bi biyolicho, na'ch kwejo' beñ' koo lo na'gake' beñ'ka' nakgake' txen nonlilall'gake' Crístona' to to yell, kon ka ba wnia' li' gono'. 6 Beena' gak lall' nee beñ'ka' nonlilall' Crístona' chiya! wsa' çe' wen kwençe bibi de ina beñ' çe', na' gake' beñ' zoa toz xoolin, na' gonlilall' xiine'ka' Crístona', na' bi gaggakb' bi' mal ni bi' widenag kwençe bi wxa'gakb' cho'alao beñ'. 7 Daa ngoo lall' nee xshin Chioza', chiya! gake' dowalj beñ' wen, beñ' bibi de ina beñ' çe', na' bi gake' beñ' chep cha'lall', ni bi gake' beñ' lok, ni weezo, ni wishagdi, ni beñ' wzelall'. 8 San chiya! wi'e ga yigaan beñ', na' yibaile' gone' dii wen, na' gake' beñ' nyeen nyeenyi, na' beñ' nxi nyech, na' beñ' chñabia' kwiniin. 9 Chiya! gonlene' xtill' Chioza' daa nak dii li daa ba nsede', kwençe wtipe' lall' beñ' yoblə daa wli' wsedile' legake' daa nak dii li, na' gone' ka shajle' beñ'ka' na-gake' aga kan' nakan.

10 La' beñ' zan inleeb beñ' widenag zoa, beñ' bizə chon chna, na' beñ' chziye', na' zangake' nakgake' beñ' Israel, beñ'ka' na' yog'lo!te beñ' byoka' chonlilall'gake' Crístona' chiya! sho'gake' señ daa le circuncisión.

11 Beñ'kan' bi chiya! we'cho latj wli' wsedgakile' beñ', la' daa chzelall'gake' gongake' gan mechan' chdagake' to to yoo chli' chsedgakile' daa bi nak shli, na' chonllej-gakile' do bxoontegake'.

12 To beñ' Creta, beñ' chneyaa, wne' çe beñ' wllal çe'ka': "Beñ' Cretaki nakgake' beñ' wxiye', beñ' mal ga zeelo, beñ' cheej chao ka nla' ka nte, na' beñ' lia." 13 Na' dii likzə ka nakannan'. Daan, bsheshlengake' ka chiya! kwençe shajni'gakile' daa nak dii li daa ba wya-jle'gake', 14 na' bich wzenaggake' çe dill' golka' daa wdiljlall' beñ' Israelka', ni bi wzenaggake' daa nazə beñ'ka' chzoa ka'lə daa nak dii li.

15 Beñ'ka' ba nxi nyech yichjlall'do'eka' lao Chioza', ni daa cheej chaogake' ni daa chox'gake' bi chsej chllonan gak yichjlall'do'eka' dii nxi nyech. San beñ'ka' nxiñj yichjlall'do'eka' na' bi chajle'gake' çe Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' chxiñj chlen-gake'. 16 Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' beñ' mal ga wdelaawin, na' nakgake' beñ' bi chzoa dill', na' biga gakkzə gongake' daa nak dii wen.

2 Na' li' naa, bli' bseedi beñ' daa nak dii li. 2 Bzajni beñ' golka' gaggake' beñ' nsa' cheyin wen, beñ' chido! gap beñ' legake' balaan, beñ' nyeen nyeenyi, na' soa çehehgake' gonlilall'gake' Crístona', na' gaggakile' beñ', na' so saggakile' bittez dii yen ile'gakile'.

3 Lekzka' nool golka' chiya! gall illebgake' Chioza', na' bi gaggake' beñ' wıchtj dill', ni bi we'gake' latj gonzə yel' weezona' legake' gan, san chiya! gongake' wen kwençe ile'i beñ' ka chiya! gongake'. 4 Na' wli' wsedgakile' nool xkwid'ka' gaki beñ' çe'ka' na' gaki xi-ine'ka', 5 na' gaggake' beñ' nyeen nyeenyi, beñ' bi nda' nchen dii mal, na' gap wwia loo yoo lillgake', gaggake' beñ' chiyesh'lallii, na' wlexj yichjgake' lao beñ' çe'ka' kwençe kono ine zban çe xtill' Chioza' ni çehegake'.

6 Na' lekzka' goll bi' wew'ka' gaggakb' bi' nyeen nyeenyi. 7 Li'yen'an chiya! wli'o chono' wen lao yog'lo!te daa chono'. Na' wsa' cho' bash bal kat' wli' wsedilo' beñ' na' benan do yichj do lalloo, 8 na' wsako' wi'o dill' kwençe bibi de ina beñ' cheyin. Na' yido'i beñ'ka' chakzbani cho' daa bibi de gon inagake' çecheo.

9 Bzajni beñ'ka' yoo xanin wlexj yichjgake' lao xane'ka', na' gongake' ka yiyoolall'gake', na' bi yilliz-gake' legake' dill'. 10 Na' bibi si' kwangake' çe xane'ka', san soa do lall'gake' kwençe wli'gake' lao yog'lo! daa chongake' nan le wen nak cho'a xtill' Chioza', beena' bisla cho' kwençe bi kwiayi'cho.

11 Chioza' ba bliile' yog'lo! beñ' yel' goklen çe'na' kwençe yilagake' na' bi kwiayi'gake'. 12 Na' yel' goklenna' daa bene' çecheo chli' chsedin cho' kwej yichj-cho daa bi nak wen na' diika' chzelall' beli chenna', na' soacho yell-lioni nyeen nyeenyicho, goncho ka chiyoolall' Chioza', na' gall illebhchone', 13 shlak noncho lez illin lla choo lla xenna' yila' Jesucristona', beena' nak beñ' choo beñ' xen, na' nake' Chios çecheo na' bisle' cho. 14 Len' bzani yel' mban çe'na' ni çecheo kwençe bisell bilee cho' lao yog'lo! dii mala', na' bixis biyibe' cho' kwençe gakcho lall' nee na' selall'cho goncho daa nak wen.

<sup>15</sup> Dgan chiyal' wli' wsedilo' beṅ', na' wtipo' lall'gake' gongake' ka cheeni Chioza', na' wsheshleno' beṅ'ka' bi chon wen, na' benan lega beṅ' nzoa Chioza'. Na' kono chiyal' gonzi li' nakzi.

**3** Bisa'lall'gake' wlexj yichjgake' lao beṅ'ka' chṅabia', na' gakgake' beṅ' wizoa dill', na' segake' wṅeyi gongake' daa nak wen. <sup>2</sup> Bibi gon inazgake' che beṅ', san soalengake' beṅ' mbalaz na' gongakile' le-gake' wen, na' gakgake' beṅ' gaxjlall' lao yog'loḷ beṅ'.

<sup>3</sup> Lekzka' cho', kana' gokcho beṅ' bi nteyi na' beṅ' bi bzoa dill', na' gosh' wlall'cho lao dii mala', na' btakw bchej biya diika' bibayi beli chen chechona' cho', na' gokcho beṅ' xe'. Gokzbani beṅ' cho' na' gokzbani ljwellcho ganga. <sup>4</sup> Na' Chioza', beena' bisla cho' kwenche bi kwiayi'cho, bliile' cho' yel' beṅ' wen che'na' len yel' chaki che'na'. <sup>5</sup> Aga inacho daa bencho dii wenna' bisle' cho', san daa biyesh'lall'lile' cho'n. Na' bixis biyibe' yichjlall'do'chona' kwenche biyakcho beṅ' wen, na' Espíritu Santo che'na' bikobe' yel' mban chechona'. <sup>6</sup> Na' daa wit Jesucristona', beena' bisla cho', Chioza' bzoe' Espíritu Santo che'na' loo yichjlall'do'choki. <sup>7</sup> Na' daa biyesh'lall'lile' cho', biyone' cho' beṅ' li beṅ' shao' kwenche goncho lez ikaacho yel' mbanna' nak zejli kaṅi.

<sup>8</sup> Dillii nakan dii wṅenlall'cho. Na' cheenid' gono' to dii byen wli' wsedilo'n beṅ'ka' chajle' che Chioza'

kwenche segake' wṅeyi gongake' wen. Diikin nakgakan wen na' gaklenen yog' beṅ'. <sup>9</sup> Bi gakguedlenzo' beṅ' ni che cho'a dill'ka' chyiljall'gake', ni daa nazgake' ben dii xozxtoe'ka' daa bi chiyoll chido, ni bi gaklebil' beṅ'ka' chakguedz ni che leya' daa bzej dii Moiséza'. La' bi chaklengakan beṅ' na' bibi zak'gakan.

<sup>10</sup> Na' shi no chgoo beṅ'ka' dill' kwenche gakgake' choplə, chiyal' we'lono'ne' dill' bich gone' ka', na' shi ba gollo'ne' ka' to chop shii na' bi chzenagkze', bkwaschokle' ka'lə. <sup>11</sup> La' nezicho to kwinzen' chlliayi' kwine' daa nxinj yichjlall'do'ena' na' chontie' dii mala'.

<sup>12</sup> Kat' wseḷaa Artémaza' wa Tíquicono' gana' zo', ben to dii byen yidwio' nad' yell Nicópoliza', la' na' ba nṅhoglallaa lljsoa' shlak te beo'ka' chbe' dii zaga'.

<sup>13</sup> Goklengach ga zeelo gako' Zénaza', beena' nsed ley che Rómana', na'ch Apóloza'. Be'gake' daa chyallj chṅingakile' kwenche koochgake' nez na' bibi iyallj-gakile'. <sup>14</sup> Na' lekzka' beṅ'ka' nakcho toz chiyal' sho'lo-gake' gongake' daa nak wen na' gaklengake' beṅ' shi bi chyallj chṅingakile' kwenche ka' wgongake' llin daa ba nsedgake'.

<sup>15</sup> Yog'loḷ beṅ'ki zoalen nad' ni chwapgake' li' chiox. Bwapgach chiox yog'loḷ beṅ'ka' lle' na', beṅ'ka' chak-gakile' cho' daa nakcho txen chonjlall'cho Crístona'. Chioza' gaklenshgue' yog'loḷ-le. Ka' gakan.

# Filemón

**1** Nad' Pablo, dia' lillyani daa chyixji'a xtil' Cristo Jesúsá', chzej' li' Filemón. Na' len beŋ' bish'cho Timotewi chwapnto' li' chiox, daa le chakinto' li', na' daa nakcho txen choncho xshin Chioza'. <sup>2</sup> Na' lekzka' chwapnto' chiox beŋ' zanchó Ápiana', na' beŋ' bish'cho Arquípona', beena' nakcho txen chdi-lencho dii mala' daa choncho xshin Chioza', na' beŋ'ka' chdop chllag lillo'na' choe'la'ole Crístona'. <sup>3</sup> Xacho Chioza' na' Xancho Jesucrístona' gaklenshgagake' le' na' wzoagake' le' mbalaz.

<sup>4</sup> Toshiizi kat' choe'lwill' Chioza' chjadinid' li' na' cho'ane' ye'l' choxken ni cho', <sup>5</sup> la' ba nezid' ka nonlilalloo Xancho Jesucrístona' na' chakilo' yog' beŋ'ka' nak lall' na' Chioza'. <sup>6</sup> Chñabid' Chioza' gaklene' li' gono' ka dii le we'leno' beŋ' cho'a xtilleena' daa ba wyajli'o kwengche shajni'chilo' kwaslo' ka nak dii wenka' naki checho daa nakcho Crístona' txen. <sup>7</sup> Beŋ' bish', chiba chizakid' daa chakilo' bish' ljwello'ka', na' dii xen chtipan lallaa, la' nezid' chtipo' lall' beŋ'ka' nak lall' na' Chioza'.

<sup>8</sup> Na' daan, la'kzi nap' ye'l' wñabia'na' beŋ' Crístona', na' wak gon' byen inia' li' daa chiya'l' gono', she'l'ka', <sup>9</sup> chakid' wenlan gat'yoid' li' gono' daa cheenid' daa chaki ljwellcho. Nad' Pablo ba nak' beŋ' gol na' dia' lillyani daa chyixji'a xtil' Cristo Jesúsá', <sup>10</sup> chñabid' li' to goklen che Onésimoni, beeni nak ka xiñ' daa be'lenee xtil' Crístona' shlak dia' lillyani.

<sup>11</sup> Kana' wzoalene' li' bi bene' ka dii le gone' xshino'na', san naa wak gaklene' li' ka chaklene' nad'. <sup>12</sup> Na' chisełaane' lawo'na', la'kzi le chakyeshii lall'dawaani

yizee daa chakchgaidee. Na' li' naa, bilebshe', kon gakilo' nad'kzan' chilebo'. <sup>13</sup> Goklallaa wkwaana'ne' gaklene' nad' lo xlatjo' shlak dia' lillyani ni che dill' wen dill' kob che Crístona'. <sup>14</sup> Per bi goklallaa wkwaana'ne' shi bi wchebgaxjo', kwengche ye'l' goklen daa gono' cha' bi gonyaadiazo'n, san gono'n do yichj do lalloo. <sup>15</sup> Shi bizee lillo'na' shlo' kwengche naa gake' lall' no' toshiizi. <sup>16</sup> Na' bich gake' to beŋ' ndoo lla yel chone' xshin beŋ' san gake' beŋ' bishoo, beŋ' gakilo'. Nad' le chakidee, na' li' chiya'l' gakchilo'ne' aga ka bish' ljwellzo', san ka dowalj beŋ' bishoo daa nakle toz nonlilall'le Xancho Jesucrístona'.

<sup>17</sup> Na' shi nako' nad' txen lo xshin Crístona', bilebshe', kon gakilo' nad'kzan' chlebo'. <sup>18</sup> Na' shi bi bene' cho' wa shi bi chbaguee cho', na' wchixjo'n nad'. <sup>19</sup> Kwin nad', Pablo chzej' dga, na' nia' li': Nad' chixjaan. Na' bi nia' li' lekzka' chbagoo cha' daa ba napo' ye'l' mban zejli' kañi. <sup>20</sup> Beŋ' bish', chñabid' li' ye'l' goklenni daa chakicho Xancho Jesucrístona'. Ben ka soa' mbalaz daa nakcho toz nxenilall'cho Crístona'.

<sup>21</sup> Chzej' li' daa nezid' nako' beŋ' wizo' dill', na' nezid' axt dii xenchlə gono' aga ka daa chñabid' li'. <sup>22</sup> Na' lekzka' nia' li', beshao'sha gana' soa', la' daa choe'lwill'le Chioza' ni cha', non' lez yichej' ni na' wi'e latj yidwia' le'.

<sup>23</sup> Chwap Epáfrazi li' chiox, beeni nak' txen dento' lillyani ni che xtil' Cristo Jesúsá'. <sup>24</sup> Na' lekzka' Márconi, Aristárconi, Démazi, na'ch Lúcazi, beŋ'ki chaklen nad' lo xshin Chioza', chwapgake' li' chiox.

<sup>25</sup> Xancho Jesucrístona' soalenshgue' le' na' gaklene' le'.

# Hebreos

<sup>1</sup> Kani'yi zan shii Chioza' bchine' dii beŋ'ka' wdixjee daa golle' legake' na' aga toz ka bchine' to toe' kwenche be'lene' dii xoxto'choka' dill'. <sup>2</sup> Na' ŋaa ba zoa te che yell-lioni, Chioza' bselee Xiine'na' be'lene' cho' cho'a xtilleena', na' len' nzoe' gak lall' nee yog'te dii de, na' lekzen' bene' yabana' len yell-lioni, diika' bllia Chioza' bia' gak.

<sup>3</sup> Len' chli'e ka beŋ' choo beŋ' xen inleeb nak Chioza', na' chli'e ka nakyen' Xe' Chioza'. Na' len' chone' kwenche yabana' len yell-lioni na' yog'lo' diika' lle' lla' lawinka' chongakan kon ka bllie' bia' gongakan daa nape' ye' wak kwenche chak kon ka ne'. Na' len' bixis biyibe' yichjlall'do'chona' ka bikwase' saaxya chechoka', na' biyolla' biyep'e yabana' gana' chi'e shlaa de shli' che Xe' Chioza', beena' nak beŋ' choo beŋ' xen, na' chŋabia'lene'ne'.

<sup>4</sup> Na' daa bene' dga, bli'e nake' beŋ' zak'chi aga ka anjlka', na' lekzka' daa goll Chioza'ne' "Xiin'", nakbia' nake' beŋ' zak'chi aga ka legake'. <sup>5</sup> La' Chioza' biga golle' ni to anjlka' ka dga golle' Xiine'na':

Li' nako' Xiin',  
na' ŋaa daa solo inabi'o inezi beŋ' nadaan nak' Xo'.  
Na' ni to anjlka' bi golle':

Nad' gak' Xo',  
na' li' gako' Xiin'.

<sup>6</sup> Na' lekzka' ka bsele' Chioza' Xiine'na', beena' nak tlish' tyaj, lo yell-lioni, wne':

We'la'oshga yog'lo' anjl cha'ka' le'.

<sup>7</sup> Na' Cho'a Xtill' Chioza' cho'en dill' che anjlka', nan: Chone' anjl che'ka' beŋ'ka' chon xshine'na', ka be' na' ka be'yi'.

<sup>8</sup> San che Xiin' Chioza' nan:

Li' nako' Chios na' inabi'o zejli kaŋi.  
Na' ye' wŋabia' cho'na' nakan dii zej shli.

<sup>9</sup> Chibailo' ye' li' ye' shawaa na' chwiilo' daa nak mal.  
Daan Chioza', beena' nak Chios cho', ba bzoe' li' kwenche inabi'o,

na' ba bene' ka soacho' mbalaztech aga ka beŋ'ka' nako' txen.

<sup>10</sup> Na' lekzka' nan:

Lin' nako' Chios, na' lin' bxe bsilo' yell-lioni ka wzolon, na' li'kzan bxe bsilo' yabana'.

<sup>11</sup> Yog' diika' te chegakin, san li' zoakzo' zejli kaŋi.  
Na' yog' diika' yiyigakan ka chiya to xalaan beŋ'.

<sup>12</sup> Na' yikwasgako'n,  
na' yikobgako'n ka to beŋ' chikob xalaane'.  
San li', toz ka zo' zejli kaŋi;  
biga lla te cho'.

<sup>13</sup> Ni shlin biŋ' ye' Chioza' ni to anjl che'ka':

Wche' kwit' de shli ni, shlak wzoa' xŋi'ona' beŋ'ka' chakzbani li'.

<sup>14</sup> San yog' anjlka' nakgake' wen llin che Chioza', na' chselee legake' chaklengake' cho' nakcho beŋ' yisle' kwenche bi kwiayi'cho.

<sup>2</sup> Daan, chonan byen wzenagchcho do yichj do lall'cho dill' wen dill' koba' daa ba benicho kwenche bi laa cho lo xŋeze'na'. <sup>2</sup> La' diika' bllia Chioza' bia' goncho, diika' wdixjee anjlka', gokgakan to dii zakii, na' yog' beŋ'ka' wdishjgake' cho'a xtilleena' na' bi bzenaggake'n wxak'zi'gake' kon ka chiya' gak chegake'. <sup>3</sup> Alechlə ŋaa aga wilacho lao ye' zak'zi'na' shi gonicho nakzi daa nak to dii zakii nleeb daa ba ben Chioza' checho kwenche yisle' cho' na' bi kwiayi'cho? Zigaate Xancho Jesús'a' wdixji'e daa yisle' cho', na'tech beŋ'ka' bzenag che' bizchopgake' diillaa bi'e. <sup>4</sup> Na' lekzka' Chioza' bli'e nan nakan dii li' daa bene' ka ben beŋ'ka' dii zan ye' wak na' dii chon ka chibanicho, na' bselee Espiritu Santo che'na' beŋ'e' wde wdeli dii gak gon to tocho kon ka chaklall' Chioza'.

<sup>5</sup> Aga bllia Chioza' bia' inabia' anjlka' lo yell-lion koba' daa ba ngwee xnezin gone', dga cho'a dill' cheyin ŋaa. <sup>6</sup> San nakan ka wna to beŋ' bzej Cho'a Xtill' Chioza' kani'yi daa na:

¿Nora naknto', neto' beŋ' yell-lion, chi' yichjzo' neto', na' zezo' wŋeyi che neto' naknto' xiin' benech?

<sup>7</sup> Zi lat'zə ki beno' neto' ka anjl cho'ka', na' noŋo' neto' to balaan xen wal.

Na' bzo' neto' inabia'nto' lao yog'te diika' beno'.

<sup>8</sup> Na' beno' yog'lo'ten lall' na'nto'.

Na' daa bene' lall' na' beŋ' yell-lioni yog'lo' dii de, zejlin aga bi de dii bi gak lall' na'cho, la'kzi ŋaa biŋ' ile'icho gak yog'lo' dii de lall' na'cho. <sup>9</sup> Per nezicho Jesús'a' ba yo'e to balaan xen wal, la'kzi bi bllin sakee ka anjlka' shlak wde' lo yell-lioni goke' benech kwenche wxak'zi'e na' wite' ni checho. La' daa nak Chioza' beŋ' wenan, bzanile'ne' ble'ile' ye' wita' lo laz yog'lo' beŋ'.

<sup>10</sup> Dii li, Chioza', beena' bxe bsil yog'lo'te dii de na' nakgakan che', cheenile' beŋ' be beŋ' zil gaggake' xiine' kwenche yichi'e legake' gana' de balaan xen che'na'. Daan, benan byen bzanile' Jesús'a' wxak'zi'e na' wite' kwenche bisle' cho'. Na' ka', biyoll bido bene' yog'lo' daa nllia Chioza' bia' gone'. <sup>11</sup> Jesús'a', beena' ba bixis biyibe' cho', na' cho' ba bixi biyechcho, toz Xa-chon nak. Daan, bi chiyiyi Jesucristona' ine' nakcho bish' ljwelle'. <sup>12</sup> Na' chi'e Chioza':

Wi'a dill' cho' lao bish' ljwell'ka',

na' go' inia' li' ladj beŋ'ka' chdop chllag choe'la'ogake' li'.

<sup>13</sup> Na' wizne':

Nad' w̄xenilallaa Chioza'.

Na' sto shii chi'e:

Ni zoalen' beŋ'ki nak xiiŋ Chioza', beŋ'ki bene' lall' na'.

<sup>14</sup> Na' daa nak xiŋe'ka' beŋ' de beli chen, lekzka' Jesúza' golje' goke' beŋ' de beli chen kwenche wite' ni checho. Na' ka wite', bsol bnite' yel' w̄nabia' che dii xi-waa daa gok lall' na'yin wlliyi'n beŋ'. <sup>15</sup> Na' bisle' cho' beŋ' yell-lío, cho' nakcho ka beŋ' ndoo lao yel' wita' shlak mbancho daa chllebcho guetcho. <sup>16</sup> La' dii li, aga bid Jesúza' kwenche gaklene' anjkan', san kwenche gaklene' xiŋ dia che dii Abrahaman'. <sup>17</sup> Daan, benan byen goke' beŋ' de beli chen doxen ka nakcho, cho' bish' ljwelle', kwenche yiyesh'lallile' cho' na' soe' gone' ka ben Chioza' lo nee gone' daa nake' b̄xoz choo b̄xoz xen checho. Na' bzani kwine' wite' kwenche bizi'xen Chioza' saaxya chechoka'. <sup>18</sup> Na' daa bizo bizakile' b̄tilē' daa nan kooyelaan le' bi gone' ka cheeni Chioza', wak gaklene' cho' kat' za' daa cheenin kooyelaan cho' goncho daa bi chazlall' Chioza'.

**3** Na' ŋaa, le' beŋ' bish' na' le' beŋ' zan', le' ba nxi nyech yichjlall'do'lēna' na' ba gox w̄nab Chioza' le' kwenche nakle lall' nee, li se w̄neyi ka nak daa ben Cristo Jesúza', beena' choe'cho dill' nonjilall'chone'. Nake' beena' bsel' Chioza' na' naktie' b̄xoz choo b̄xoz xen checho. <sup>2</sup> Len' bene' yog'lo' daa goll Chioza'ne', kon ka ben dii Moiséza' ladj beŋ'ka' nak yell che Chioza'. <sup>3</sup> Na' chido'ch Jesúza' balaan xench aga ka dii Moiséza', ka chak che to beŋ' chone' to yoo chooche' balaan xench aga ka yoonā' daa bene'. <sup>4</sup> Yog'z yoo zoa beŋ' bene'n, per Chioza' nake' beena' ben yog'lo'lte dii de. <sup>5</sup> Dii Moiséza', beena' gok wen llin che Chioza', bene' yog'lo' diika' golle' gone' ladj beŋ'ka' nak yell che Chioza'. Na' diika' bene' chaklenen kwenche shajniicho diika' zi' we' Chioza' dill' cheyin. <sup>6</sup> Per Crístona', beena' nak Xiiŋ Chioza', lekzka' bene' yog'lo' diika' golle'ne', na' ngoo lall' nee beŋ'ka' nak lall' na' Chioza'. Na' chon', nakcho lall' na' Chioza' shi soačhechcho gonlilall'chone' na' yibaicho daa noncho lez lljazoalen-chone'.

<sup>7</sup> Daan, Espíritu Sántona' wne':

Shi chenile daa na Chioza' ŋaanlla,

<sup>8</sup> bi gakte beŋ' lall'do' wal ka gok dii xozxto'leka' na' bshaagake' Chioza' daa bi wyajle'gake' gone' ka b̄chebe'

kana' wdagake' gana' bibi chashj chleb.

<sup>9</sup> Na' wna Chioza': Kana' dii xozxto'leka' gokgake' beŋ' widenag daa bi wyajlegake' gon' daa b̄cheb' gon' chegake',

la'kzi čhoa yiz ble'gakile' diika' ben' chegake'.

<sup>10</sup> Daan, bllaa legake',

na' wnia': "Toshiizi chongake' kon ka nazan chegake', na' bi chzenaggake' čha'."

<sup>11</sup> Daan, lo yel' chllaa čha'na' b̄cheb', wnia':

Nezganž wi'a latj gaki chegake' yel' wixi'lall' čha'na'.

<sup>12</sup> Le' beŋ' bish' na' le' beŋ' zan', li wsak' kwenche ni tole bi x̄injz yichjlall'do'lēna' na' gonan ka bich shajle'le' na' yiłala'ole Chios yaa Chios banna'. <sup>13</sup> San li wtip lall'

ljwell-le yog' lla shlak ŋaa ni de latj wzenagle che Chioza', kwenche bi siye' dii mala' le' na' yiyonan le' lall'do' wal. <sup>14</sup> Nakkzcho Crístona' txen shi shnon mbancho soačhechcho w̄xenilall'chone' kon ka wzoacho kana' zi' b̄xenilall'chone'.

<sup>15</sup> Kon ka na Cho'a Xtill' Chioza':

Shi chenile daa na Chioza' ŋaanlla,

bi gakte lall'do' wal ka gok dii xozxto'leka' kana' wda-gake' gana' bibi chashj chleb, kana' biyečhj bibiitez-gake' Chioza'.

<sup>16</sup> ŹNora beŋ'ka' beni daa goll Chioza' na' biyečhj bibi-itezgake'ne', lla? Yog' beŋ'ka' bibej dii Moiséza' Egíptonan' ben ka'. <sup>17</sup> Na' Źnora beŋ'ka' bllaa Chioza' čhoa yiz, lla? Beŋ'ka' b̄xinj b̄lenan, beŋ'ka' wit gana' bibi chashj chleb. <sup>18</sup> Na' Źnora beŋ'ka' wna Chioza' chegake' bat ll-jazi'lall'gake' lo yell-liona' b̄chebe' wi'e legake', lla? Le-gaken' beŋ'ka' gok beŋ' widenag lawe'na'. <sup>19</sup> Na' Źezicho bi gok yillingake' gana' yizi'lall'gake' daa bi wyajle'gake' che'.

**4** Daan, shlak ni de latj idolicho yel' wixi'lallaa daa ba b̄cheb Chioza' gonē' cho', chiya' goncho byen kwenche idol' illonichon na' ni tocho bi igaanzcho ka'z. <sup>2</sup> La' cho' ba benicho dill' wen dill' kob che Chioza', ka daa beni dii xozxto'choka'. Per la'kzi bengakile'n, bi goklenan legake' daa bi wyajle'gake' cheyin. <sup>3</sup> San cho' ba wyajle'cho cheyin ba nakten gon Chioza' cho' yel' wixi'lallaa daa bllonile' beŋ'ka' kana' wne':

Daa bllaa legake' na' wnia':

nezganž wi'a latj gaki chegake' yel' wixi'lall' čha'na'. Per ka nak Chioza', wzoloe' chizi'lallee ka biyoll b̄xe bsile' yell-lioni. <sup>4</sup> La' Cho'a Xtilleena' cho'en dill' che lla gall llana', gana' nan:

Ka bllin lla gall llayina', ba biyoll ben Chioza' yog'lo' daa bene', na' bizi'lallee.

<sup>5</sup> Na' lekzka' cho'en dill' kana' wne':

Nezganž wi'a latj gaki chegake' yel' wixi'lall' čha'na'.

<sup>6</sup> Per ni de latj gat' to yel' wixi'lall' che zi ba' beŋ' cheeni, la' beŋ'ka' bengakile' dii nech dill' wen che Chioza' bi gok yillingake' gana' yizi'lall'gake' daa bi bzenaggake' che'. <sup>7</sup> Daan, bllia Chioza' bia' che sto lla, na' wde zan yiz w̄nie' dii Davina' kwenche wi'e dill' che llani ŋaa, na' wne':

Shi chenile daa na Chioza' ŋaanlla,

bi gakte lall'do' wal.

<sup>8</sup> She' dii Josuéna' bene' ka yizi'lall' dii xozxto'choka' ka b̄cheb Chioza' gone' chegake', aga bllia Chioza' bia' sto lla yoblə gat' yel' wixi'lall', she'ka'. <sup>9</sup> Daan, Źezicho ni de latj idol' beŋ'ka' nak lall' na' Chioza' yel' wixi'lall' čhe'na'. <sup>10</sup> La' beena' ba bdolj yel' wixi'lallaa daa b̄cheb Chioza', ba chizi'lallee ka bizi'lall' Chioza' kana' biyoll b̄xe bsile' yog'lo' dii de. <sup>11</sup> Na' cho' chiya' goncho byen idolicho yel' wixi'lallaa daa b̄cheb Chioza' kwenche ni tocho bi gakte beŋ' widenag ka gok beŋ'ka' kani'yi.

<sup>12</sup> Na' cho'a xtill' Chioza' nsa'n yel' mban na' yel' wak, na' nakan ka to dii ch̄chogch aga ka to spad dii n̄latit čhop laa. La' chazan ga zeelo loo yichjlall'do'chona'. Na' chli'n lao daa chza'lall'cho loo yichjlall'do'chona' shi nakan wen wa shi nakan mal. <sup>13</sup> Ni to diika' b̄xe bsil



Chioza' bi ngashaan lawe'na'. Yog'loite nez nle'i beena' yizi'e cho' kwent.

<sup>14</sup> Jesús, Xiin Chioza', beena' billin yabana', nake' b̄xoz choo b̄xoz xen checho, na' daan chiya' soachecho gonlilall'cho beena' choe'cho xtillinna'. <sup>15</sup> Na' b̄xoz choo b̄xoz xen chechona' chiyesh'lallile' cho' daa nakcho beñ' yell-lioz, la' lekzka' b̄tile' daa nan kooyelaan le' w̄xinj w̄lene' ka chak checho, per le', wzo wzakile' bi b̄xinj b̄lene'. <sup>16</sup> Daan, do lall'cho chiya' ibig'cho x̄ni'a Chioza', beena' ch̄nabia' na' nake' beñ' chiyesh'lallii, kwenche yizi'xene' checho na' gaklene' cho' kat' bittezə dii chak checho.

**5** Chioza' chbeje' yog' b̄xoz choo b̄xoz xenka' ladj beñ' Israelka', na' chzoe'ne' kwenche inabe' gaklene' beñ' wlall che'ka' na' lljwee lawe'na' yog' daa chzangakile', na' chite' bayix'ka' kwenche chizi'xen Chioza' saaxya che'ka'. <sup>2</sup> Na' beena' nak b̄xoz choo b̄xoz xen nape' yel' chxenlall' che beñ'ka' ch̄xinj ch̄len daa bi ntegakile', la' lekzka' zoe' dii nxoll w̄xinj w̄lene' daa nake' beñ' de beli chen. <sup>3</sup> Daan, chonan byen chite' bayix'ka' kwenche yizi'xen Chioza' saaxya che'na', na' ka'kz chone' che beñ' wlall che'ka'.

<sup>4</sup> Na' kono chzoa kwinin gake' b̄xoz choo b̄xoz xen tobia'loze', san Chiozan' chbeje' beena' gak b̄xoz choo b̄xoz xen che', ka bene' che dii Aarónna'. <sup>5</sup> Na' lekzka' Crístona', aga tobia'lozen' ben kwine' b̄xoz choo b̄xoz xen, san Chiozan' wlo'ene' balaan daa bzoe'ne' nake' b̄xoz choo b̄xoz xen. Na' kwine' golle'ne':

Li' nako' Xiin',  
na' naa daa solo inabi'o inezi beñ' nad' nak' Xo'.

<sup>6</sup> Na' lekzka' Cho'a Xtill' Chioza' nan:

Li' nako' b̄xoz zejli kanj,  
ka b̄xoz Melquisedeca'.

<sup>7</sup> Na' Crístona', shlak wbane' yell-lioni, wchelle' na' w̄nie' zilljə, w̄nabile' Chioza', beena' nap yel' wak kwenche yisle'ne' lao yel' wita', na' daa goke' beñ' wizoa dill', Chioza' bzenague' che'. <sup>8</sup> Na' la'kzi goke' Xiin Chios, diika' bllagloe' benan ka wyajniile' daa nak yel' wizoa dill'. <sup>9</sup> Na' ka', biyoll bido goke' ka chiya' gake' kwenche wi'e yel' mban daa bi te cheyin beñ'ka' chzoa xtilleena'. <sup>10</sup> Na' Chioza' bzoe'ne' goke' b̄xoz choo b̄xoz xen ka gok Melquisedeca'.

<sup>11</sup> Dii zanch de dii we'len' le' dill' che diiki ba wnia', per chonan lallj wzajniida'n le' daa bi chonle ka dii le.

<sup>12</sup> Naa ba gok ssha nombia'le cho'a xtill' Chioza', len' ba chiya' wli' wsedilen beñ' yoblə, shel'ka'. Per le'lə ni chyalljzile no wzajni'chi le' diika' bi chontek lallj shajniile che cho'a xtill' Chioza' daa ba bsedle. Ni chonzle ka bi'do' ni chall' na' bin' gak gaob' yel' wao. <sup>13</sup> Na' notteze beñ' bin' shajniile' bi daa nak wen na' bi daa nak mal nake' ka bi'do' ni chall'. <sup>14</sup> San beñ'ka' chzoachech chzenaggake' che Chioza', chakbe'gakile' daa nak wen na' daa nak mal. Legaken' nakgake' ka beñ' ba cheej chao yel' wao, aga ka bi'do'na' ni chall'.

**6** Daan, chiya' goncho ka dii le gakchachcho lo x̄nez Crístona', na' bi yiechj yibiilenzcho diika' ba nezczicho: ka daa chiyaj chilenicho dii malka' bencho daa nsa' yel' wit, daa gonlilall'cho Chioza', <sup>2</sup> daa chchoa

beñ' nis, daa ch̄xoā na'choka' yichj beñ' kat' ch̄nabcho gaklen Chioza'ne', daa yiban beñ' ladj beñ' wetka', na' daa w̄choglo Chioza' che beñ' ga idol' to toe' zejli kanj. <sup>3</sup> Chioza' gaklene' cho' kwenche goncho ka dii le gakchacho.

<sup>4</sup> Beñ'ka' ba yoo beeni' che Chioza' loo yichjlall'do'eka', na' ba bnix blligake' dii wenna' cho'e beñ'ka' nak lall' nee, na' zolen Espiritu Sántona' le-gake', <sup>5</sup> na' ba bnix blligake' dill' wen che Chioza' na' yel' wak che'na' daa yiyoll yido ile'icho kat' illin llana', <sup>6</sup> shi yilaala'ogake' lo x̄nez Chioza', bich inan yiyaj yilen-gakile' sto shii. La' lengake' ba chongake' ka ben beñ'ka' betgake' Xiin Chioza' lee yag cruza' na' chsi'gake'ne' yel' zto' ladj lkwe' beñ'. <sup>7</sup> Beñeča' zaklebile' to yell-lio dii chiyaalli kat' cheejan nis yeja' daa chxop zekizezi lawinna'. Shi nakan yell-lio wen, beena' chaz chañ yitope' daa yeej gawe' lawinna', na' Chioza' gone' ka gashj ilebchan dii wenka'. <sup>8</sup> San shi chashj ch̄lebzan no yag yesh' na' no yag ley, aga bi zakii yell-liona' na' chishj Chioza' bia' blag' cheyin na' wzey wtie'n.

<sup>9</sup> Na' le' beñ' bish'dawaa na' le' beñ' zandawaa, la'kzi ba wnia' ka, nezid' kwasloj gonle wen lega beñ' ba bis-la Chioza'. <sup>10</sup> Na' Chioza' nake' beñ' li beñ' shao', na' bi gal-lallee dii wenka' ba benle na' daa ba bli'le chakilene' daa goklenle beñ'ka' naklenle lall' nee, kon ka ni chonle naa. <sup>11</sup> Na' cheenid' to tole soale gonchle wen do yichj do lall'le shnon mbanle, kwenche gak chele ka ba nonle lez. <sup>12</sup> Bi gake beñ' lia, san li gonto ka ba chon beñ'ka' zoatezi zoagake' chonlilall'gake' Chioza' na' chzi'gake' banez daa b̄chebe' wi'e legake'.

<sup>13</sup> Ka b̄cheb Chioza' gone' wen che dii Abrahama', bzoa kwine' de taschiw gone' ka b̄chebe', la' koch no zoa beñ' zak'chi ka le' wzoe' de taschiw. <sup>14</sup> Na' golle': "Dii li gonleey' li' na' gon' ka shesh shan xiin dia cho'ka'." <sup>15</sup> Na' dii Abrahama' wdape' yel' chxenlall' wleze' axt ki bllin lla gok ka b̄cheb Chioza' gone' che'. <sup>16</sup> Kat'ka' beñ' yell-lioki ch̄chebgake' to dii gongake', chzoagake' to beñ' zak'chi ka legake' kwenche chakbal daa ch̄chebgake', na' len chonan ka shajle' beñ' che-gake'. <sup>17</sup> Na' ka'kzə Chioza', goklallee inezi beñ'ka' ikaa dii wenna' zi' gone' nan aga wde daa b̄chebe', san dii li, gonkze' ka wne'. Daan, bzoa kwine' de taschiw. <sup>18</sup> Na' ka nak daa b̄chebe' gone' len daa bzoa kwine' de taschiw zejlin aga wishee daa wne' gone', ni bi chiyee. Na' daa nezicho dga, chtipan lall'cho, cho' ba wbig'cho lawe'na' na' ba nxenilall'cho gone' ka ba b̄chebe'. <sup>19</sup> Ka chak che barkwa' ch̄chinan to dii chbekwan daa tozga, kan' chon daa ba noncho lez Crístona', chaklenan cho' chajle'chacho na' bi gak choplall'cho. Loo lill xlatj Chioza' wze lechaa daa bkwashaan latja' gana' wzoe' na' bi gok sho'gake', san cho' ba noncho lez sho'cho <sup>20</sup> gana' ba wyoo Jesúsza' na' ch̄nabe' checho, cho' zi' yillincho na'. Na' nake' b̄xoz choo b̄xoz xen checho zejli kanj ka b̄xoz Melquisedeca'.

**7** Melquisedeca' goke' beñ' w̄nabia' che yella' le Salem na' goke' b̄xoz che Chioza', beena' liizelozii nak beñ' choo beñ' xen. Na' ka ziza' dii Abrahama' lo wdila' gana' bene' gan beñ' w̄nabia'ka', jatil

Melquisedeca' le' na' wñabe' ka gak wen che'. <sup>2</sup> Na' dii Abrahama' bene' shi kwen yog' diika' bikee che ben' wñabia'ka' lo wdila' na' wleje' tkwenan † bi'en Melquisedeca'. Na' Melquisedec zejin Ben' wñabia' ben' chon daa nak shli'cha. Na' lekzka' nake' ben' wñabia' che yell Salema', na' zejin ben' wñabia', beena' chon ka soalen ljwellin mbalaz. <sup>3</sup> Kono ñezi no gok xaxñee ni no gok dii xoxto'e, ni kono ñezi bat golje' na' bat wite'. Daan nake' bñox zejli kañi ka nak Xiin Chioza'.

<sup>4</sup> Li wwia ka ben' zakii nleb gok Melquisedeca', la' kwin dii xoxto'cho Abrahama' bi'ene' tkwen che de shi kwen che yog' diika' bikee che ben'ka' bene' gan lo wdila'. <sup>5</sup> Ley che dii Moiséza' nan ben'ka' nak xiin dia che dii Levína', ben'ka' nak bñox, chiyal' ikaagake' tkwen che de shi kwen che yog' daa chon to to ben' wllal che'ka' gan, ben'ka' nak bish' ljwellgake', la'kzi lengake' nakgake' xiin dia che dii Abrahama'. <sup>6</sup> Per Melquisedeca', la'kzi bi goke' dia che dii Levína', dii Abrahama' bi'ene' tkwen de shi kwen che yog' diika' bikee che ben'ka' bene' gan lo wdila'. Na' Melquisedeca' wñabe' gak wen che dii Abrahama', beena' bñheb Chioza' shesh shan xiin dia che'na' na' gaki che' yell-liona' gana' wzoe'. <sup>7</sup> Na' ñezicho kwasloj beena' chñabe' ka gak wen che ben', nakche' ben' zak'chi aga ka beena' chñab gak wen che'. <sup>8</sup> Na' ka nak bñoxka' chkaa tkwen che de shi kwen che yog' diika' chat' chbe' che ben' wllal che'ka', nakgake' ben' chet. San che bñox Melquisedeca', Cho'a Xtill' Chioza' cho'en dill' mbane' toshiizi. <sup>9</sup> Na' bñoxka', ben'ka' chkaagake' tkwen che de shi kwen che yog' diika' chon ben' wllal che'ka' gan, nakgake' xiin dia che dii Levína', na' wak incho lenz-gaken' be'gake' Melquisedeca' daa be' dii Abrahama' le', <sup>10</sup> la' kana' jatil Melquisedeca' dii Abrahama', ba nakkzan galj dii Levína' na' gake' xiin dia che dii Abrahama'.

<sup>11</sup> Chioza' wleje' dii Aarónna', beena' nak xiin dia che dii Levína', gake' bñox kana' bi'e dii xoxto'choka' ley che'na'. Per bñoxka' wzoa lo dia che dii Aarónna' bi gok yiyongake' cho' ben' li ben' shao' lao Chioza'. Daan, benan byen soa sto bñox yoblə, beena' gak ka bñox Melquisedeca'. <sup>12</sup> Na' kwenche to ben' bi nak xiin dia che dii Levína' gake' bñox, lekzka' chonan byen yilla' leya'. <sup>13</sup> La' bñox chechona', beena' choe' Cho'a Xtill' Chioza' xtillee, aga golje' lo dia che dii Levína', san golje' lo dia che dii Judána', beena' konoñ bñox ichej lo dia che'na'. <sup>14</sup> Nezteicho kwasloj Xancho Jesúsza' golje' lo dia che dii Judána', na' Moiséza' bi bzetje' dia che Judána' ka bi'e dill' no xiin dia cheyin gak bñox.

<sup>15</sup> Wyajni'chicho dga ba wnia' shi ichej to bñox kob, beena' gak ka bñox Melquisedeca', <sup>16</sup> to ben' bi nake' bñox daa golje' lo dia che dii Levína' kon ka wna leya', san nake' bñox daa bibi de dii gak wlliyai'n ye'l mban che'na'. <sup>17</sup> La' ki wna Chioza' che':

Li' nako' bñox zejli kañi,  
ka bñox Melquisedeca'.

† Bene' shi kwen yog' diika'...na' wleje' tkwenan: Literalmente la décima parte.

<sup>18</sup> Na' daa golle' ka', zejin ba wde che leya' daa bi gok gaklanan ben'. <sup>19</sup> La' leya' bi gok yiyonan cho' ben' li ben' shao' lao Chioza', na' bich chiyal' goncho lez gaklanan cho'. San goncho lez beena' ba bzoa Chioza' yiyone' cho' ben' li ben' shao', na' ka' gak ibig'cho lawe'na'.

<sup>20</sup> Na' Chioza' bzoa kwine' de taschiw ka bñebe' gone' ka'. Ka wleje' ben'ka' nak xiin dia che dii Levína' gaggake' bñox bi bzoa kwine' de taschiw gaggake' bñox toshiizi. <sup>21</sup> Per ka nak Xancho Jesúsza', Chioza' bzoa kwine' de taschiw ka bñebe' wzoe'ne' gake' bñox, la' cho'a xtilleena' cho'en dill' chi'ene':

Nad' Chios ba bzoa' kwin' de taschiw na' aga wiyajid' cheyi dga nia':

“Li' nako' bñox zejli kañi,  
ka bñox Melquisedeca'.”

<sup>22</sup> Na' daa bzoa' Jesúsza' nake' bñox zejli kañi, nxen-lall'cho gon Chioza' checho sto dii wentech aga ka daa bñebe' gone' dii nech. <sup>23</sup> Ben' zan ba gok bñox choo bñox xen, la' daa chetgake' benan byen yizoa lwaagake'. <sup>24</sup> San ka nak Jesúsza', daa mbane' zejli kañi, nake' bñox choo bñox xen toshiizi. <sup>25</sup> Daan, wak yisle' cho' toshiizi, la' daa nonlilall'chone' wak ibig'cho lao Chioza', la' len' zoe' toshiizi chñabe' gaklen Chioza' cho'.

<sup>26</sup> Na' Jesúsza', leyeñ'en' beena' chyalljicho gake' bñox choo bñox xen checho. Nake' ben' nxi nyech, ben' bibi saaxya bene', ben' bi nda' nchene' ni to dii mal, ben' bi wllal' lao dii mala' chon ben' saaxyaka', na' biyep'e' jazoe' yabana' gana' chgoogake'ne' balaan. <sup>27</sup> Na' bi chone' ka ben bñox choo bñox xenka', ben'ka' benan byen betgake' bayix'ka' yog' lla na' bzeygake'b lao Chioza' kwengche zigaate legake' chiyakxen saaxya daa chongake', na' lekzka' betgake' bayix'ka' kwengche chiyakxen saaxya che ben' wllal che'ka'. San Jesúsza', shlin shlaxjzan bzani kwine' wite' ni che saaxya chechoka', na' daa bene' shlinz chonan llin zejli kañi. <sup>28</sup> Ley che dii Moiséza' bzoan ben' goke' bñox choo bñox xen la'kzi bi gogake' dowalj ben' wen. Per ka ba gok ssha chon bñoxka' llin, Chioza' wne' wzoe' Xiine'na', beena' toshiizi nak dowalj ben' wen, gake' bñox choo bñox xen, na' bzoa kwine' de taschiw gak ka wne'.

**8** Dga nak dii llialloch lao diiki cho'a dill' cheyin: bñox choo bñox xen chechona' zoe' zejli kañi na' ba chi'e shlaa de shli che Chioza' yabana' gana' chñabi'e.

<sup>2</sup> Na' nake' bñox yabana' gana' non Xancho Chioza' dowalj lill xlatje', na' aga nakan dii ben ben' yell-lioni.

<sup>3</sup> Yog' bñox choo bñox xenka' chzoa Chioza' legake' kwengche chjwa'gake' lawe'na' yog' daa chzani ben' wi'ene', na' chitgake' bayix'ka' lawe'na'. Daan, lekzka' benan byen bñox choo bñox xen chechona' bzani'e' daa bi'e Chioza'. <sup>4</sup> Shel' zoe' yell-lioni aga nake' bñox, shel'ka', la' zoakz bñoxka' choe'gake' Chioza' diika' nllia leya' bia' we'gake'. <sup>5</sup> Diika' chon bñoxka' bi nakan dowalj ka daa de yabana'. Daan, ka zi' gon dii Moiséza' lill xlatj Chioza', Chioza' bzajniile'ne', chi'ene': “Ben byen gonle yog'te diika' kon ka ba bzajniid' li' lo yaana'.” <sup>6</sup> Daa chon bñox choo bñox xen chechona' ñaa

zak'chin aga ka daa chon b̄xozka' sto. Na' daa ba bizoe' cho' wen kon Chioza', Chioza' ba b̄chebe' gone' to dii zak'chi çhecho aga ka daa b̄chebe' lao dii x̄ozxto'cho-ka'.

<sup>7</sup> Shel' daa b̄cheb Chioza' dii nech gone' çhe dii x̄ozxto'choka' benan ka yiyakgake' beñ' li beñ' shao', bi benan byen b̄chebe' gone' sto dii yoblə, shel'ka'. <sup>8</sup> Per Chioza' ble'ile' bi ben beñ'ka' ka bllie' bia', na' bene' ka wna dii beena' wdixjee xtilleena':

Xancho Chioza' ne': Wllin lla  
kat' w̄cheb' sto dii kob dii gaklenan le',  
le' zoale Israela' na' le' zoale Judána'.

<sup>9</sup> Na' aga gakan ka daa b̄cheb' gon' çhe dii x̄ozxto'le-ka'

llana' bibej' legake' Egíptona'.  
La' legake' bi bengake' daa b̄chebgake' gongake',  
na' daan wchoonlall'gakee, na Xancho Chioza'.

<sup>10</sup> Na' naa de sto dii w̄cheb' gon' kat' illin llana' kwençhe gaklen' beñ' Israelka'.

Gon' ka kwe' yichjgake' diika' ba bllia' bia' gongake',  
na' gon' ka kooshao'gake'n loo yichjlall'do'eka'.  
Na' nad' gak' Chios çhegake',  
na' legake' gakgake' yell' çha'.

<sup>11</sup> Na' bich gonan byen no wli' wsedi bish' ljwellin,  
ni bich gonan byen no wli' wsedi beñ' dialla çheyin,  
ye'ze'ne':

"Chiyal' gombi'o Xancho Chioza'",  
la' yog'z beñ' gombi'e nad', ka bi'do' ka beñ' gol.

<sup>12</sup> "Nad' yizi'xen' xtoleeka',  
na' bich lljadinid' saaxya çhe'ka'."

<sup>13</sup> Na' daa wna Chioza' gone' to dii kob dii gaklenan le-gake', zejin daa b̄chebe' gone' kani'yi ba nakan dii wde çheyin. Na' daa ba nakan dii gol dii ba wde çheyin ba zoa yinitlon.

<sup>9</sup> Kana' b̄cheb Chioza' dii nech gaklene' beñ' Israel-ka', bllie' bia' ka chiyal' we'la'ogake'ne', na' lekzka' bllie' bia' gongake' to lill x̄latj' ga we'la'ogake'ne' lo yell-lioni. <sup>2</sup> Na' ki nak lill x̄latj' Chioza' daa bengake': bengake' lo'inna' çhoplə, na' latj' necha' bsi'gake'n Latj' çhe Chios, na' bzoagake' to candeler na' to mes gana' bkwa'gake' yetxtilka' lao Chioza'. <sup>3</sup> Na' lechaa daa bze-gake' loo lill x̄latj' Chioza' kwençhe bengake'n çhoplə bkwashaan latja' sto daa bsi'gake' Latj' Ga Zoa Chios, <sup>4</sup> gana' bzoagake' to diido' nongake' ka mes de or gana' bzeigake' yala', na' sto yiin dii nwazjgake' or ka loolə ka koll'lin, na' bsi'gake'n yiin daa yoo daa chonli daa b̄cheb Chioza'. Na' lo'inna' wyooshao' to xwag de or daa yoo ye'l' wawa' be' Chioza' legake' daa le maná, na' lekzka' loo yiina' wyoo bar çhe dii Aarónna' daa bi-gaa, na' yaj taaka' gana' nyoj daa nllia Chioza' bia' gongake'. <sup>5</sup> Na' koll' yiina' bzoagake' lwaa lsak' anjlka' le kerubin kwençhe chli'n zoa Chioza' na', beena' yoo balaan xen. Na' xil anjlka' zen chxolgakan kolliinna' gana' chxit' b̄xoz' x̄chen bayix'ka' kwençhe chizi'xen Chioza' saaxya çhe'ka'. Per aga diikiyen'an cheenid' wsees'chid' le' naa.

<sup>6</sup> Na' ka ba nzoagake' yog' diika', na'ch b̄xozka' wzolo choogake' lle' zil loo latj' necha' kwençhe chongake' ka

bllia Chioza' bia' gongake' kat' we'la'ogake'ne'. <sup>7</sup> Per latj' wchopina' tochga b̄xoz choo b̄xoz xenna' de lsens sho'e shlin non twiz. Na' kat' cho'e, chonan byen lljwee x̄chen bayix'ka' daa wxitee loo latja' kwençhe yizi'xen Chioza' xtoleena' na' xtol' beñ' wllal' çhe'ka' daa bi chakbe'gakile' chongake'. <sup>8</sup> Na' Espíritu Sántona' chza-jniile' cho' daa chon b̄xoz' ka' zejin shlak ni chon lill x̄latj' Chioza' llin daa bengake' yell-lioni, biñ' gat' lsens sho'cho Latja' Gana' Zoa Chioza'. <sup>9</sup> Na' yog' diiki chza-jniin cho' zoacho naa nan la'kzi be'gake' diika' bzan-gakile' lao Chioza' na' betgake' bayix'ka' na' bzeigake'b lawe'na' kwençhe be'la'ogake'ne', diika' bengake' bi bi-zogakin yixis yiyibgakan yichjlall'do'eka' kwençhe gongake' lez ba bizi'xen Chioza' xtoleeka' toshiizi. <sup>10</sup> Di-iki zeelo bengakan llin çhe to beli chen çhe'ka'chga: ka çhe no dii bi gak yeej gaogake' wa ka çhe daa chiyal' gongake' kwençhe yixis yiyib kwingake'. Na' yog' diiki bengake' benan llin shlak biñ' gon llin dii koba' b̄cheb Chioza' gone'.

<sup>11</sup> Per naa ba bid Crístona', beena' nak b̄xoz choo b̄xoz xen çhecho, na' nsee dii wenka' chbezcho gak. Na' lill x̄latj' Chioza' gana' billin Crístona' nakan dii zak'chi na' dowalj daa aga no beñ' yell-lio b̄xe bsile'n, la' bi nakan çhe yell-lioni. <sup>12</sup> Na' Crístona', aga bexee no x̄chen shib wa no x̄chen goon ka wyo'e Latja' gana' zoa Chioza', san daa wlalj x̄chene'nan' wyo'e shlin shloxjz, na' çhe toshiizin wdixje' xtol'choka'. <sup>13</sup> B̄xoz' b̄chine' x̄chen goon na' x̄chen shib, na' de çhe bakdo'na' chzey-gake', na' b̄xiteen beñ'ka' bi nxi nyech lao Chioza', la' kan' na leya' chiyal' gak kwençhe bixi biyech kwerp çhe'ka' lao Chioza'. <sup>14</sup> Na' shi kan' nakan, zalechlə x̄chen Crístona', beena' ni to dii mal bi nda' nchene', nsa'chan ye'l' wak? Espíritu Sántona', beena' zoa zejli kañi, goklene'ne' kwençhe ben kwine' lall' na' Chioza' na' wlalj x̄chene'na' daa yixis yiyib diika' nda' nchen yichjlall'do'choka', diika' chon ka kwiayi'cho. Na' ka', iñezicho ba biyakxen xtol'choka' na' gak goncho daa cheeni Chioza', beena' nak beñ' yaa beñ' ban.

<sup>15</sup> Daan, Crístona' b̄xie' dii koba' daa b̄cheb Chioza' gone' çhecho, cho' gox wñabe'. La' daa bi'e ye'l' mban çhe'na' wite' ni çhecho, wdixje' saaxyaka' bencho shlak ben leya' llin, kwençhe gak ikaacho daa b̄cheb Chioza' gone' çhecho zejli kañi. <sup>16</sup> Shi to beñ' ba bene' lishi daa yikwaanlene' to beñ', aga wak ikaa beena' diika' chwal' yisha' shi biñ' guet beena' chikwaan. <sup>17</sup> La' yisha' daa bene' solo gonan llin kat' ba wite', na' bibi zakiin shlak ni mbane'. <sup>18</sup> Daan, ka b̄xe Chioza' dii necha' b̄chebe' gone', bene' byen betgake' bayix'ka' blalj x̄chemka'. <sup>19</sup> La' biyoll' bzajni dii Moiséza' dii x̄ozxto'choka' yog' di-ika' nllia leya' bia', na'ch bexee lat' xa xil' dii mben dii x̄na na' txis daa le hisopo na' b̄leeje'n loo chen çhe shibka' na' çhe goonka' betgake' na' zi lat' nis, na' b̄xi-teen lee libra' gana' nyoj leya', na' lekzka' b̄xiteen yog'loj beñ'ka' lle' na'. <sup>20</sup> Na' golle' legake': "Chennin chonan ka chakli daa n̄cheb Chioza' gone' çhecho na' lekzka' zejin chiyal' goncho yog' daa nllie' bia' goncho." <sup>21</sup> Na' lekzka' b̄xit' dii Moiséza' chenna' lill x̄latj' Chioza' daa bengake' de lech' na' yog' diika' b̄chingake' lo'inna'

ka be'la'ogake'ne'. <sup>22</sup> Leya' bllian bia' nan de dii zan daa chiyał wxit'gake' xchen bayix'ka' kwenche yixi yiyech-gakan lao Chioza'; na' kono yiyakxen cheyin shi bi ļalj chenna'.

<sup>23</sup> Benan byen wļalj xchen bayix'ka' kwenche bixi biyech diika' ben llin lill xlatj Chioza' yell-lioni, diika' nak ka bxen che diika' de yabana'. Per diika' de yabana', byalljin ļalj to chen dii zak'chi aga ka xchen bayix'ka'. <sup>24</sup> Ļa' Crıstona' aga wyo'e ļoo lill xlatj Chioza' daa ben beñ yell-lioni daa bi nakan dowalj ka daa de yabana', san yabanan' wyo'e kwenche chñabile' Chioza' yizi'xene' checho. <sup>25</sup> Na' aga zekizezin wyo'e be' kwine' blalj xchene'na', ka ben bxož choo bxož xenna' ze twiz wej wyo'e gana' le Latj Ga Zoa Chios kwenche bxitee xchen bayix'ka'. <sup>26</sup> Shel' byalljin gone' ka chon bxožka', ba be' kwine' wite' zan shii, shel'ka', wzolozan ka wxwzil yell-lioni. Per aga kan' nakan. San ñaa llaki zeelo, shlin shļaxjan bzani kwine' wite' ni checho kwenche bsol bñite' saaxya chechoka'. <sup>27</sup> Na' kon ka llia bia' gak che to to beñ yell-lioni guete' shlinz, na'tech wçoglo Chioza' nak gak che to toe', <sup>28</sup> ka'kzə Crıstona' be' kwine' wite' shlinzə kwenche bsol bñite' xtol' beñ yell-lioki. Na' ka yiyede' de wchop shiyi, aga yiyede' kwenche wsol wñite' xtol' beñaan, san yidixi'e beñ'ka' chbezgake'nen'.

**10** Ley che dii Moisėza' chzajniin cho' lat' che dii wenka' zi' za' gon Chioza', na' bi nakan ka daa nak dowalj. Daan, bi chzaki leya' yiyonan beñ' ļi beñ' shao' beñ'ka' yog' yiz chitgake' bayix'ka' chzangakile' we'gake' Chioza' ka nllian bia' gongake'. <sup>2</sup> Shel' daa chitgake' bayix'ka' gok bixis biyiban saaxya che'ka', aga wyooch yichjgake' nan nakgake' beñ' saaxya na' bich betgake' bayix'ka', shel'ka'. <sup>3</sup> Per daa betgake' bayix'ka' lao Chioza' ze twiz wej bisa'lan lall'gake' saaxya che'ka', <sup>4</sup> ļa' xchen goonka' na' xchen shibka' bi gak yisol yinitan saaxyaka'.

<sup>5</sup> Daan, ka bid Crıstona' yell-lioni, golle' Chioza': Aga cheenchilo' no wit bayix' lawo'na' wa izangakile' bichlə dii gongake' li', san ba beno' nad' beñ' de beli chen kwenche izanid' kwın' lo lazgakin.

<sup>6</sup> Bi chibailo' no wit bayix'ka' wa wzeygake'b lawo'na' kwenche wsol wñito' saaxya che'ka'.

<sup>7</sup> Na'ch wnia' li': "Ka choe' libr çho'na' xtillaa, Chios çha', ni zoa' kwenche gon' daa cheenilo'."

<sup>8</sup> Na' zigaate wne': "Aga cheenchilo' no wit bayix' na' wzeygake'b lawo'na' wa gongake' bichlə dii gongake' li' kwenche yizi'xeno' xtoļeeka'", ļa'kzi nakgakan daa nllia leya' bia' gongake'. <sup>9</sup> Na'tech chi'ene': "Chios çha', ni zoa' kwenche gon' daa cheenilo'." Na' daa golle' ka' zejin bzoe' ka'lə dii gola' ben bxožka' na' bxie' to dii kob lwaayi daa bzoe' ka'lə. <sup>10</sup> Na' daa ben Jesucristona' ka cheeni Chioza', be' kwerp che'na' na' wite' shlin shļaxj ni checho, kwenche bixi biyech yichjall'do'chona' lao Chioza'.

<sup>11</sup> Bxožka' chilaļgakile' choe'la'ogake' Chioza' yog' ļla, na' zekizezi chitgake' bayix'ka' lawe'na', ļa'kzi biga gak yisol yinıtgakan saaxya che'ka'. <sup>12</sup> San Crıstona' bzani

kwine' wite' shlin shļaxj kwenche bsol bñite' xtol'cho-ka'. Na' ka bibane', jachi'e shļaa de shļi che Chioza' gana' chñabilia'lene'ne'. <sup>13</sup> Na' na' zoe' chbeze' shlak wzoa Chioza' beñ'ka' chwiyi ļe' xñi'ena'. <sup>14</sup> Na' daa bzani kwine' wite', biyone' beñ'ka' bene' lall' na' Chioza' beñ' ļi beñ' shao' zejļi kañi. <sup>15</sup> Na' ļekzka' Espıritu Sántona' bi'e dill' cheyi dga, kana' wne':

<sup>16</sup> Ki nak daa chcheb' gon' chegake' kat' illin llana', na Xancho Chioza':

Gon' ka kooshao'gake' ļoo yichjall'do'eka' diika' nllia' bia' gongake', na' gon' ka kwe' yichjgake'n.

<sup>17</sup> Na' wnache':

Bichga lljadinid' saaxya che'ka' ni xtoļeeka'.

<sup>18</sup> Na' shi Chioza' ba bizi'xene' xtol' beñ', aga chyalļch witgake' bayix'ka' kwenche yiyakxenan.

<sup>19</sup> Le' beñ' bish' na' le' beñ' zan', daa ba wit Jesucristona' na' blalj xchene'na' ni checho, wak sho'cho do lall'cho Latja' Gana' Zoa Chioza'. <sup>20</sup> Daa bi'e kwerp che'na', bsalje' to nez kob dii lljwa'n cho' gana' de yeļ' mban zejļi kañi. Ļa' kwerp che'na' zaklebin leçhaa daa ze ļoo lill xlatj Chioza' daa bchez' ka wite', na' zejın byalj latja' gana' zoa Chioza' kwenche gak sho'cho.

<sup>21</sup> Na' Jesucristona', beena' nak ļiizelozı bxož choo bxož xen, nake' bxož checho, cho' nakcho lall' na' Chioza'.

<sup>22</sup> Daan, chiyał' ibig'cho lao Chioza' do yichj do lall'cho, na' wxenilall'cho wlebe' cho', ļa' ñezicho ba nxi nyech yichjall'do'chona' daa ba bsol bñite' xtol'choka', na' ba bixi biyechi kwerp chechoki nis xtila'. <sup>23</sup> Chiyał' soaचेचcho goncho lez lljazoalencho Chioza', kon ka choe'cho dill', ļa' ñezicho chone' ka nchebe'. <sup>24</sup> Na' chiyał' yiyiljall'cho naklə ka goncho gaklen lljwellcho kwenche to tocho gakchi lljwellcho na' gonchcho dii wen. <sup>25</sup> Bi chiyał' kwej yichjcho daa chdop chllagcho choe'la'ocho Chioza' ka chonz baļ beñ', san chiyał' wtip lall' lljwellcho, çalechli ñaa daa chakbe'icho ba zoa yiyed Xanchona'?

<sup>26</sup> Na' shi ni chonchcho dii mala' daa ñezicho bi chiyał' goncho kat' ba nombia'cho dill' ļi che Chioza', bich bi de we'cho Chioza' kwenche yizi'xene' xtol'cho-ka'. <sup>27</sup> Lechozə kwezcho do chall chllēbzcho wçoglo Chioza' checho llana' wzalee beñ'ka' chakzbangakile'ne' lo yi'na' chaļ'ñin daa wlliaiyi' legake'. <sup>28</sup> Kat' to beñ' bi chzenague' che ley che dii Moisėza', shi zoa çhop shon beñ' ble'gakile' daa bene', na' chçoglo guete' na' kono gak yiyesh'lallii ļe'. <sup>29</sup> ÇAlechlin ki gak yeļ' zak'zi'na' idol' beena' chonile' nakzi Xiin Chioza' na' xchene'na' daa blalje', na' chñie' zban che Espıritu Sántona' beena' chiyesh'lallii cho'? Ļa' xchene'nan' bixis biyiban yichjall'do'chona', na' ka blalje'n bxie' dii koba' daa bcheb Chioza' gone' checho. <sup>30</sup> Na' ñezicho Chioza' wne': "Nad' yizi'a wzon che beena' chon dii mala', na' wsak'zi'ane' ka chiyał' gak che'." Na' ļekzka' wne': "Nad' Xanle wçogloa' chele, le' nakle yell çha'." <sup>31</sup> ĩNyesh'laz wal inlleb gak che beena' wçoglo Chios yaa Chios banna' che' sak'zi'e!

<sup>32</sup> Ļi lljadini ka nak dii lalljka' ble'ile ka bleble beeni' che Chioza' ļoo yichjall'do'lēna', na' bizo bizakile' yeļ'

zak'zi'ka' bdil bllagle. <sup>33</sup> Ba]-le biya dii ben wna ben' le' na' biya dii bchi' bsak'gake' le' lao lkwe' ben'. Na' zi ba]-le goklenle ben'ka' biya dii gok c̄hegake'. <sup>34</sup> Na' biyeshile' ben'ka' got' lillyana', na' wzoale mbalaz la'kzi bikaa ben' bi dii de c̄hele, daa nezile de to dii wench c̄hele yabana' daa bi te c̄heyin. <sup>35</sup> Daan, bi kwej yichje daa n̄xenilall'le Chioza', la' to banez choo banez xen si'le c̄heyin. <sup>36</sup> Chiyal' so sakile diika' chen chle'ile kwenche yiyoll yido gonle ka cheeni Chioza' na' gaki c̄hele daa n̄chebe' gone'. <sup>37</sup> La' Cho'a Xtill' Chioza' nan: Ba zoa gaoshosh yiyed beena' chiyal' yiyed, na' aga wllachile'.

<sup>38</sup> Na' beena' nak ben' li ben' shao' daa nonjilallee nad' ibane' zejji kanj.

Na' shi bich gonjilallee nad', bich ile'shiidee.

<sup>39</sup> Per cho', aga nakcho ka ben'ka' kwiayi' daa chibi-igake' bich chonjilall'gake'ne', san cho' zoacho nonjilall'chone' yilacho bi kwiayi'cho.

**11** Daa nonjilall'cho Chioza', lennan' chonan kwenche chaklijyicho daa noncho lez na' chajle'chacho c̄heyi daa bin' ile'icho. <sup>2</sup> Daa benjilall' dii xozxto'choka' Chiozan', ble'shiile' legake'.

<sup>3</sup> Na' daa nonjilall'cho Chioza', nezicho len' bxe bsile' yabana' len yell-lioni na' ka bene'n aga bi b̄chine', san kon ka wnie' wxw wzil yog' diika' chle'icho.

<sup>4</sup> Daa benjilall' dii Abela' Chiozan', bi'ene' to dii zak'chi aga ka daa be' dii Caínna'. Na' daa benjilalleene', Chioza' wne' che' goke' ben' li ben' shao' na' bibaile' diika' bi'ene'. Na' la'kzi ba wit dii Abela', daa benjilallee Chioza' ni chzajniin cho' ka chiyal' goncho.

<sup>5</sup> Na' daa benjilall' Enoca' Chiozan', bi ble'ile' yel' wita', san Chioza' bikeene' shi'a shbane' na' koch no ble'i le'. Na' ka zi' yikaa Chioza'ne' wzeyi che' chone' ka chazlall' Chioza'. <sup>6</sup> Na' shi bi gonjilall'cho Chioza', aga wak goncho ka ile'shiile' cho', la' chonan byen beena' cheenile' gombi'e Chioza' chiyal' shajli'e che' nan zoakze' na' chone' wen che ben'ka' chiyilj le'.

<sup>7</sup> Daa benjilall' dii Noéna' Chiozan', wyajli'e ka bsi'nile'ne' che yejsiwaa daa zi' za' gak daa konon' yen ile'i. Na' daa bllebe' Chiozan', bzenague' che' na' bene' barkwa' gana' wyoo do bxoone' kwenche bilagake'. Na' daa benjilallee Chioza' na' bzoe' xtillena', bli'n ben'ka' wlliyai' yell-lioni gokgake' ben' mal. Na' Chioza' ble'ile'ne' ben' li ben' shao' daa benjilalleene'.

<sup>8</sup> Na' ka'kzə dii Abrahama', daa benjilallee Chiozan', bzenague' ka goxe' le' na' golle'ne' shaje' lljsoe' to latj dii b̄chebe' wi'ene' gakin che'. Na' wzee lalle'na' zeje' la'kzi bi w̄nezile' gan illine'. <sup>9</sup> Na' daa benjilallee Chiozan', jsoe' ka ben' zit' lo yell-liona' b̄cheb Chioza' wi'ene'. Na' bene' lille'na' de lech', ka'kzə dii Isaaca' na' dii Jacoba', ben'ka' lekzka' goki c̄hegake' daa b̄cheb Chioza' lao dii Abrahama'. <sup>10</sup> Na' dii Abrahama' jsoe' na', la' nezile' wllin lla lljzooalene' Chioza' to latj wen daa ben kwin Chioza', daa bi te c̄heyin.

<sup>11</sup> Na' lekzka' daa benjilallee Chiozan', wyajli'e gon Chioza' ka soa xiine' la'kzi ba nake' ben' gol na' nakte dii xooole' Sárana' nool will. <sup>12</sup> Ka' gok wzoa ben' zan inlleb xiin dia che', ka beljka' llia xan yabana' na' ka yoxa'

chi' cho'a nido'na' daa kono ibabi, la'kzi ba nake' ben' gol ka wzoa xiine'na'.

<sup>13</sup> Yog' ben'ki ni nonjilall'gake' Chioza' ka witgake' la'kzi lo yell-lioni bi wxi' wkaagake' diika' b̄cheb Chioza' wi'e legake'. Per w̄nezgake' wllin lla gak ka wne', na' bibagakile' daa zi' gak. Na' wnagake' nakgake' ka ben' zit', ben' za' xtit shollz lo yell-lioni. <sup>14</sup> Na' daa wnagake' ka', zejín ni chbezgake' gana' gak dowalj lallgake'. <sup>15</sup> La' shel' gokgakile' yella' gana' wza'gake' nakan dowalj lallgake', zak biyajgake' na' dii yoblə shel'ka'. <sup>16</sup> San legake' wzelall'gake' yillingake' yabana' gana' zoa to lallgake' dii wench. Daan, Chioza' bi chiyiile' daa nagake' nake' Chios c̄hegake', na' ba nonshawee gana' lljzooagake'.

<sup>17</sup> Na' dii Abrahama', beena' b̄cheb Chioza' gak xiin dia che'na' ben' zan, daa benjilalleenen' bzenague' che' kana' golle'ne' izani xiine'na', bi'na' nak tlish' tyaj, wite'b lao Chioza' kwenche gakbia' shi dii li n̄xenilalleene', <sup>18</sup> la'kzi ba goll Chioza'ne': "Xiin dia cho'ka' galjgake' lo xiin dia che dii Isaaca'." <sup>19</sup> Na' daa wyajle' dii Abrahama' nap Chioza' yel' wak yisbane' ben' wetka', wak inacho Chioza' bisbane' xiine'na' ladj ben' wetka' daa biz bi'e latj wite'b'.

<sup>20</sup> Na' lekzka' dii Isaaca', daa benjilallee Chiozan', w̄nabile'ne' gone' ka gak wen che xiine' Jacoba' na' Esaúna' llaka' zi' za'. <sup>21</sup> Na' lekzka' dii Jacoba', daa benjilallee Chiozan', ka ba zoa guete' w̄nabile'ne' gone' ka gak wen che chopte xiin dii Joséna', na' de n̄chish'zi yag bar che'na' be'lawee Chioza'. <sup>22</sup> Na' lekzka' dii Joséna', daa benjilallee Chiozan', kana' ba zoa guete', bi'e dill' wllin lla yichej ben' Israelka' Egíptona', na' golle' le-gake' yisa'gake' llit wet che'na' kat' yilleshgake'.

<sup>23</sup> Na' lekzka' daa benjilall' dii xax̄na' dii Moiséza' Chiozan', ka goljb' bkwash'gakeeb' shon beo' daa ble'gakile' ka xochi gokb'. Na' bi bllebgake' daa b̄choglo faraónna' guet bdo'ka'. <sup>24</sup> Na' lekzka' daa benjilall' dii Moiséza' Chiozan', ka bgole' bi goonile' ina ben' nake' xiin bi' nool che faraónna'. <sup>25</sup> Wyazlall'che' biya dii sak'zi'lene' ben' wllal che'ka', ben'ka' nak yell che Chioza', aga ka daa gone' dii malka' nak toldezə daa chibayi ben'. <sup>26</sup> Gokbe'ile' zak'chi kwell ine ben' che' ni che Crístona', aga ka daa si'e banez che yel' wni'ana' de Egíptona', daa bzooa yichje' dii wenna' we' Chioza'ne'. <sup>27</sup> Daa benjilall' dii Moiséza' Chiozan', bizee Egíptona' na' bi bllebe' illaa faraónna' le', san goke' wal daa w̄nezile' Chioza', beena' kono chle'i, wzoalene' le'.

<sup>28</sup> Na' daa benjilallee Chiozan', bene' Inj Paskwa'. Na' golle' ben' wllal che'ka' witgake' twej xil'do' na' wxit'gake' xchema' yichj puert che'ka' kwenche anjla', beena' lljet bi' byo nechka', bi wite' bi' byo nech che'ka'. <sup>29</sup> Na' daa benjilall' ben' Israelka' Chiozan', gok bidegake' loo nido'na' le Nido' X̄na, la' Chioza' bene'n chop laalə kwenche gok bidegake' lo yo billa'. Na' ka nan te ben' Egíptoka', to biyejzan na' wche'gake' yel.

<sup>30</sup> Lekzka' daa benjilall'gake' Chiozan', bene' ka billee zeeka' nechj yell Jericóna' ka biyoll wyeçhgake'n gall lla. <sup>31</sup> Na' lekzka' nool wdana' wle Rahab, daa benjilallee Chiozan', blebe' ben' Israelka' lille'na' ka

blingake' jawia jayigake' lalle'na' na' bi wlliyi'lene' beñ' Jericóka' beñ'ka' bi bzenag che Chioza'.

<sup>32</sup> Dii zanch dii de inia', per bich bi latj de wi'a dill' ka ben dii Gedeónna', dii Baráca', dii Sansónna', dii Jefté-na', dii Davina', dii Samuela' na' dii beñ'ka' wdixjee daa goll Chioza' legake'. <sup>33</sup> Daa beñ'ilall'gake' Chiozan', wkaagake' yell-lío che beñ'ka' wdił-lengake', na' wñabia'gake' xochi ka wyazlall' Chioza', na' goki che-gake' daa bcheb Chioza' wi'e legake'. Na' Chioza' bisle' balgake' lao bell zñiaka', <sup>34</sup> na' zi bałe' bene' kwenche bi bzey yi' wala' legake', na' zi bałe' bilagake' bi witgak-ile' spada'. Na' bał beñ' bñan'ka', ben Chioza' legake' beñ' wal, na' ka wdił-lengake' soldadka' nak beñ' zit', bengake' legake' gan. <sup>35</sup> Na' Chioza' goklene' bał nool-ka', bisbane' no xiñ che'ka' ba wit.

Na' zi bał beñ' biya dii bchi' bsak' beñ' legake' axt ka witgake' na' bi goklall'gake' kwej yichjgake' Chioza' kwenche yilagake' lao yel' zak'zi'na', daa bengake' lez gak wen chegake' kat' yisban Chioza' legake'. <sup>36</sup> Na' zi balgake' btiitjgake' na' bet wdingake' legake', na' bchejgake' legake' gdenna' na' wdixjgake' legake' lillyana'. <sup>37</sup> Na' zi balgake' betgakile' yaj, na' zi balgake' wlejgake' choplə kon sierra', na' zi balgake' betgakile' spad. Na' zi balgake' biga wzoa lill xlatjgake' na' bchin-gake' no xa xil'ka' no xa shibka' lwaaxagake', na' gok-gake' beñ' yesh'do' na' dii zan dii ben ble'gakile' daa bchi' bsak' beñ' legake'. <sup>38</sup> Wdagake' latja' gana' bibi chashj chleb na' do yaa yaoka', na' bigaangake' do xan blejka'zə na' no loo yech. Na' beñ'ka' kana', ni lat' bi nan chidoł'gake' soa beñ' wenka' ladje'ka', sheł'ka'. <sup>39</sup> Na' la'kzi Chioza' wyazlallee ka beñ'ilall'gake'ne', ni togake' shlak wzoagake' yell-lioni bi ble'gakile' gak daa bchebe' gone' chegake'. <sup>40</sup> La' wlo'e xpezin kwenche aga to lezgake' yizi'gake' banez ka nak daa bchebe' gone', san cheenile' lencho yizi'cho banez che to dii zak'chi kwenche yog'cho yiyakcho kwasłoł ka cheenile'.

**12** Na' daa ñezicho beñ' zan beñ'ka' wzoachech-gake' beñ'ilall'gake' Chioza', lekzka' cho' chiyał' kwej yichjcho yog' dii chllonan goncho ka cheeni Chioza' na' kwej yichjcho saaxyana' daa chombegui cho', na' soachechcho gonchcho ka dii le koochcho nez lo xñeze'na' ka to beñ' chxonj na' chgooyibe' kwenche gone' gan. <sup>2</sup> Chiyał' soacho wwiacho ka ben Jesúza', beena' chon ka chonjilall'cho Chioza', na' lekze' gake-lene' cho' kwenche yiyoll yido gonjilall'chone' kwasłoł. La' le' bizo bizakile' ka betgake'ne' lee yag cruza', na' bi bene' kwent che yel' zto'na' wxile' daa ñezile' ka yiyoll ile'ile' yel' zak'zi'na', yiba yizakile'. Na' ñaa chi'e gana' chñabia' Chioza' shłaa de shłi che'na'.

<sup>3</sup> Chiyał' koo yichjcho ka bizo bizakile' biya daa beni beñ' malka' le' kwenche bi lljxakicho ni bi wshe'lall'cho gonjilall'chone'. <sup>4</sup> Na' ka nakle le', aga biñ' xchenle wlalje ni cheyi daa chdił-lenle dii mala'. <sup>5</sup> Ba goł-lall'le daa wna Chioza' cho' daa nakcho xiñe', ka wne':

Xiñdawaa, bi gonilo' nakzi yel' zak'zi'na' chsełaa kwenche wzajniid' li,

na' bi yidinjilo' kat' chon' ka yiyakbe'ilo' daa chono'.

<sup>6</sup> La' nad' Chios, chigwaa shłi lall' beñ'ka' chakid',

na' chsak'zi'a beñ'ka' nak xiñ'.

<sup>7</sup> Chtił-le yel' zak'zi'ka' kwenche yigooshilall'le, la' Chioza' chonile' le' ka' daa nakle xiñe'. La' aga ga zoa to bi'do' bi chsak'zi' xabaa leb' kwenche yigooshilall'b'. <sup>8</sup> Na' shi Chioza' bibi gonile' le' kwenche yigooshilall'le, ka chone' che yog' xiñe'ka', zejın nakle ka beñ' bi wyoo xayin. <sup>9</sup> Kana' nakcho bi'do', xachoka', beñ'ka' bisgol cho', bsak'zi'gake' cho' na' wdapchogake' balaan. Na' lliatotech wzexj yichjcho wzenagcho che Xacho Chioza', beena' zoa yabana', kwenche gat' yel' mban checho zejli kañi. <sup>10</sup> Na' xachoka', shlak bisgolgake' cho' bsak'zi'gake' cho' kon ka gokgakile' nakan wen. Per Chioza' chsak'zi'e cho' kwenche gaklene' cho' gakcho beñ' li beñ' shao' ka nake' le'. <sup>11</sup> Aga no chibayi kat' chllagloe' yel' zak'zi'na', san le chakyeshile'. Per beena' yiyakbe'i cheyi daa chllagloe' na' yigooshilallee, yisa' che wen na' soe' mbalaz.

<sup>12</sup> Li gondiplall', na' li gon ka dii le gonjilall'le Chioza'.

<sup>13</sup> Li gon ka cheeni Chioza' kwenche beena' ba chshe'lall' ile'ile' ka chonle na' yiyondiplatee na' bi kwej yichje' Chioza'.

<sup>14</sup> Li gon byen soalenle yog'te beñ' mbalaz, na' li wsa'to chele lega beñ' nxi nyech lao Chioza', la' kono yillin lawe'na' shi bi nxi nyech yichjilall'do'ena'. <sup>15</sup> Li gon byen gap wwia ljwell-le kwenche ni tole bi gonle daa wllonan si'le banez daa ba ben Chioza' chele yel' beñ' wen che'na', na' kwenche bi galj xe loo yichjilall'do'leka' dii mala' daa wxinj wlenan beñ' zan. <sup>16</sup> Na' ni tole bi tal-enle no xiñ xool beñ'. Na' bi gonile nakzi daa nak che Chioza', ka ben dii Esaúna'. Tyeenz yel' wawa' bsha'ile' daa nan gaki che' daa nake' beñ' nech. <sup>17</sup> Na' ñezkzile ka wde, goklallee inab xe'na' gak wen che' daa nake' beñ' nech, na' bich gokan. La'kzi le wchelle' wñabile'n xe'na', bich bi gok gongake'.

<sup>18</sup> Aga ka gok che dii xozxto'chokan' chak chele. Legake' wbig'gake' kwit yaa Sinaína' na' ble'gakile' chal'ñinan, axt wche' chołan, na' wzen to be' wal, <sup>19</sup> na' bengakile' wchell trompeta' na' wñe Chioza' legake'. Na' ka bengakile' shi'ena' got'yogakile'ne' bich inie' le-gake', <sup>20</sup> daa le bllebgake' daa goll Chioza': "Nottez yidlej lo yaani chiyał' wítilene' yaja', laa beñ' laa bayix'."

<sup>21</sup> Daa ben ble'gakile' le bsheban legake', axt kwın Moiséza' wne': "Axt chxiztit' daa le chllebchga'."

<sup>22</sup> San le' ba wbig'le gana' zoa Chios, beñ' yaa beñ' banna', gana' le yaa Sión na' Jerusalén daa zoa yabana', gana' lle' lla' beñ' zan inlleb anjł che'ka', <sup>23</sup> gana' ndop nllag beñ'ka' nak xiñ' Chioza', beñ'ka' nak ka bi' nech, na' ba da' lie'ka' lee libr che'na' de yabana'. Na' ba wbig'le lao Chioza', beena' yizi'e kwent che yog'łoł beñ'. Na' ba nakcho txen beñ' li beñ' shao'ka' ba wit, beñ'ka' ba biyon Chioza' dowalj beñ' li beñ' shao'. <sup>24</sup> Lekzka' ba wbig'le lao Jesúza', beena' be' yel' mban che'na' kwenche bxie' dii koba' daa ncheb Chioza' gone' checho. Na' xchene'na' daa blalje' ni checho chaklenlan cho', aga chonan ka xchen dii Abela' daa wdao xya che dii beñ' bisheena'.

<sup>25</sup> Li wsak' kwenche bi gake' widenag lao Chioza', beena' chne cho'. La' shi beñ' Israelka' bi bilagake' lo

yeŀ zak'zi'na' daa bi bzenaggake' daa goll Chioza' ƀe-gake' lo yell-lioni, ƀalechlə cho', aga wilacho lo yeŀ zak'zi'na' shi yizečj koll'cho beena' zoa yabana' na' bi wzenagcho xtilleena'? <sup>26</sup> Ka wŀne Chioza' beŀ'ka' kani'yi, shi'ena' benan ka wxo' wŀnib yell-lioni, per ŀaa ne': "Sto shii gon' ka xo' inib yell-lioni, na' aga toz yell-lioni, san lente yabana'." <sup>27</sup> Na' daa ne' "sto shii gon' ka xo' iniban", zejin yinit yog' diika' bene', diika' te čheyin, na' yigaan diika' biga te čheyin. <sup>28</sup> Na' yeŀ wŀnabia' daa gon Chioza' cho' gana' zoe', biga te čheyin. Daan, chiyaŀ we'chone' yeŀ choŀken na' we'la'ochone' ka chazlallee na' gall illebchone'. <sup>29</sup> ƀa' Chios čhechona' nake' ka to yi' wal daa chzey chte.

**13** ƀi soatezi soa gaki ƀjwell-le ka chakile to beŀ' bish' goŀje. <sup>2</sup> Na' bi gaŀ'lall'le wleble beŀ' ƀoo yoo lill-le na' we'le ƀegake' ga yigaangake', ƀa' baŀ beŀ'ka' ben ka' blebgake' anjka' lille'ka', ƀa'kzi bi gokbe'gakile'. <sup>3</sup> ƀi ƀjadini gaklenle beŀ'ka' de lillyana', na' ƀi gaktezi lenkzlen chak čhele ka'. ƀi gaklen beŀ'ka' chiya dii chčhi' chsag' beŀ' ƀegake', na' ƀi gaktezi lenkzlen chak čhele ka'.

<sup>4</sup> Dii wen inleeb daa ne' nkaa čhe', na' le' nshagna'le bi chiyaŀ talenle beŀ' yoblə, ƀa' Chioza' wsak'zi'e nottez beŀ'ka' soalengake' nool bi nak nool čhegake' wa beŀ' byo bi nak beŀ' čhegake'.

<sup>5</sup> Bi chiyaŀ selall'cho yeŀ' wni'ana', san goncho banez ka'k' dii de čhecho, ƀa' Chioza' ba wne': "Biga wsan' li' ni bi kwej yičj' li'." <sup>6</sup> Daan, wak inacho do yičj' do lall'cho:

ƀancho Chioza' zoe' chaklene' nad'.

Na' bi gall illeb' shi bi goni beŀ' nad'.

<sup>7</sup> Na' ƀi ƀjadini ka ben beŀ'ka' bli' bsedi le' cho'a xtil' Chioza'. ƀi wwia ka wzoa wlezgake' benƀilall'gake' Cris-tona' toshiizi, na' ƀi gonƀilallee ka benƀilall'gake'ne'.

<sup>8</sup> Jesucristona' biga chillee, ƀekzen' kani'yi, ƀekzen' ŀaa na' ƀekzen' zejli kaŀi. <sup>9</sup> Bi we'le latj no wli' wsedi le' dii yoblə dii chyilƀall' beŀ' dii gonan ka yilaale lo nez ƀi čhe Chioza'. Wenchan wzoačheč yičj'ƀall'do'choni lo yeŀ' chaki čhe Chioza', aga ka daa sho'z yičj'cho čheyi di-ika' na beŀ' bi chiyaŀ' yeej gaocho. ƀa' beŀ'ka' chinal' chinogake'n bi chaklenen ƀegake'.

<sup>10</sup> Daa ba wit Cris-tona' ni čhecho, ba chizi'cho to banez daa bi bizi' bƀozka' bet bayix'ka' gana' wzoa lill xƀatj Chioza' daa bengake' de lech'. <sup>11</sup> Bƀoz choo bƀoz xenna' jwee xčhen bayix'ka' Latja' Gana' Zoa Chioza'

kwenče yizi'xene' xtoleeka', per bchejgake' latja' gana' wchengake' kwenče jazeygake' kwerp čhe bay-ix'ka'. <sup>12</sup> Na' ka'kzan gok čhe Jesúza', ƀekzka' wlej-gake'ne' yella' ka betgake'ne'. Na' wƀalj xčhene'na' kwenče yisol yinite' saaxya čhe beŀ'ka' gonƀi-lall'gake'ne'. <sup>13</sup> Na' cho' ŀaa, chiyaŀ' ŀocho Cris-tona' ƀa'kzi ƀe gakzbani beŀ' cho' ka gokzbangakile'ne'. <sup>14</sup> ƀa' yell-lioni gani zoacho nakan dii te čheyin, per noncho lez yillincho gana' soacho zejli kaŀi. <sup>15</sup> Daan, chiyaŀ' we'la'ocho Chioza' toshiizi daa wit Cris-tona' ni čhecho, na' koochone' balaan kon cho'a ƀoll'choni we'cho dill' ƀen' nake' ƀancho, ƀa' ƀennan' nakan ka dii chzanicho we'chone'. <sup>16</sup> Bi gaŀ-lall'cho goncho dii wenna' na' izani-cho bi de čhecho we'chon beŀ' chyallj chčhinile'n, ƀa' ƀennan' chazlall' Chioza' na' daa choncho ka', ƀen' choe'la'ocho.

<sup>17</sup> ƀi wzenag čhe beŀ'ka' chli' chsedi le' na' ƀi wƀexj yičj'le lawe'ka', ƀa' ƀegaken' chap chwiagake' le' daa yoo yičj'gake' wllin ƀa yidegake' kwent lao Chioza' daa bengake'. ƀi wzenag daa nagake' kwenče yibagakile' gon xshine'ka' na' bi gaggakile'n to dii lallj. ƀa' shi bi wzenagle čhe daa chli' chsedgake', bibi banez čheyin si'le.

<sup>18</sup> ƀi inabi Chioza' gaklene' neto', ƀa' ŀezyen'into' chonnto' ka cheenile', na' cheeninto' wsa' čhento' wen lao yog'loŀte. <sup>19</sup> Na' chat'yoid' le' inabile Chioza' ni čha' kwenče yob gak yid' sto shii gana' zoale.

<sup>20</sup> Chioza', beena' chzoe' cho' mbalaz, bisbane' ladj beŀ' wetka' ƀancho Jesucristona', beena' chap chwia cho' ka chon ƀan xilaa, beena' choe'la'ochga xil' čhe'ka'. Na' ƀekzen' beena' bƀe daa bčheb Chioza' gone' čhecho zejli kaŀi kana' blalj xčhene'na' na' wite'. <sup>21</sup> Na' Chioza'kzə gonshgue' ka gak gonle doloŀ dii wenna' ka cheenile' gonle, na' gonshgue' ka gaklen Jesu-cristona' le' gake' ka chazlallee. ƀSho'shgue' balaan zejli kaŀi! Ka' gakan.

<sup>22</sup> Chat'yoid' le' beŀ' bish' na' le' beŀ' zan', ƀi koo yičj'le diiki chŀnabid' le' gonle, diiki to čhop cho'a ba bzej'. <sup>23</sup> Na' cheenid' inezile ba bichej beŀ' bish'cho Timotewa' lillyana', na' shi ba wdaile' yide' ni, na' wčhi'ane' yidwianto' le'.

<sup>24</sup> ƀi wwap chiox yog' beŀ'ka' chli' chsedi le' na' yog' beŀ'ka' nakle txen nakle lall' na' Chioza'. Na' beŀ' Itália-ki nakcho txen chwapgake' le' chiox.

<sup>25</sup> Chioza' gaklenshgue' yog'loŀle.

# Santiago

1 Nad' Santiago, † nongake' nak' wen llin çe Chioza' na' wen llin çe Xancho Jesucristona', chwap' le' chiox, ka le' nakle ka shllin kwen xiin dia çe dii Israela' daa nakle lall' na' Chioza' na' neslesle doxen yell-lioni.

<sup>2</sup> Le' beṇ' bish'dawaa na' le' beṇ' zandawaa, li yiba yizaki kat' ile'ile yiya yeḷ' zak'zi'. <sup>3</sup> La' ba nezkzile kat' chzak'zi'cho daa nonjilall'cho Chioza', chaklenan cho' soatipchcho gonjilall'chone'. <sup>4</sup> Na' li gap yeḷ' chxenlall' lao bittez daa gak çehe kwençe yiyoll yido gakchale kon ka chazlall' Chioza'.

<sup>5</sup> Shi nole chyaljile yeḷ' sin'na', li inabin Chioza' na' gone'n. La' Chioza' cho'en nottezə beṇ' chṇabe'n, aga no chllonile'n. <sup>6</sup> Li inaban na' li gonyeṇ' lez gone'n na' bi gakchoplall'le. La' beena' chonchoplall' nake' ka bli çe nisdo'na' daa choa' be'na' to ni to na'lə. <sup>7</sup> Beena' chakchoplall', bi gone' lez we' Xancho Chioza' daa chṇabe', <sup>8</sup> la' chiya dii na yichjilall'do'ena' gone', na' shaḷ' ki shaḷ' ka'lə chake' lao yog'loḷ' daa chone'.

<sup>9</sup> Beṇ' bish'chona', beena' nak beṇ' yesh'do', chiyaḷ' yi-ba yizakile' daa nake' beṇ' zakii lao Chioza'. <sup>10</sup> Na' beṇ' bish'chona', beena' nak beṇ' wni'a, chiyaḷ' yibaile' daa ba biyakbe'ile' aga no nake' lao Chioza'. La' ka chde çe yejdo'ka' lliia lyixaa ka'kzan te çe beṇ' wni'aka'.

<sup>11</sup> Kat' chla' wbilldo'na' na' chṇa'n zi'bia' na' chbill yag yeja', na' chllib yeja' llian na' yeḷ' mba cheyinna' chbi-ayi'n. Ka'kzan beṇ' wni'ana', yiyol yinite' lao delgens çe'na' chone'.

<sup>12</sup> Chakomba beena' chzo chzaki chtile' bittez dii mal. La' kat' ba wdie' lawinna', Chioza' wi'ene' yeḷ' mban zejli kaṇi daa bchebe' wi'e beṇ'ka' chakgakile'ne'. <sup>13</sup> Nottez beṇ' kat' chza'lallee gone' dii malka', bi chiyaḷ' in'e': "Chioza' bzoe' dii mali lawa'ni". La' Chioza' aga bi dii mal chone' ni bibi dii mal chzoe' lao beṇ' kwençe gone'n. <sup>14</sup> San daa chzelall'cho goncho dii malan', lennan' chgooyelaan cho' kwençe ixopcho lawinna'.

<sup>15</sup> Na' daa chzelall'cho dii mala', chxopcho lao saaxyana', na' saaxyana' daa choncho chlliyi'n cho'.

<sup>16</sup> Le' beṇ' bish'dawaa na' le' beṇ' zandawaa, bi siye'z kwinkle. <sup>17</sup> Chioza', beena' zoa yabana' na' bxe bsile' yog' diika' chzeeni' xan yabana', len' chone' cho' yog'loḷ' daa nak dii wen dii shao' na' toshiizi zoe' chone' wen na' biga chillée. <sup>18</sup> Len' wyazlallee gone' yeḷ' mban çe-cho zejli kaṇi daa wyajle'cho dill' li çe'na', kwençe ladj yog' beṇ'ka' bxe bsile' gokcho beṇ' nech beṇ' biya'o bizi'e, na' zaklebicho diika' chizi' chilapgake' dii nech daa chzangakile' choe'gake' Chioza'.

<sup>19</sup> Le' beṇ' bish'dawaa na' le' beṇ' zandawaa, li wzoa yichjle dga: yog'loḷ' beṇ' chiyaḷ' wsede' wzenague', na' wsakee bin in'e', na' gape' to yeḷ' chxenlall' bi illaa iloke'. <sup>20</sup> La' yeḷ' chllaa chloka' chllonan goncho ka cheeni Chioza'. <sup>21</sup> Daan, li choonlall' yog'loḷ' dii zbanka' chonle na' yog'loḷ' dii malka' chonle, na' li wlexj yichjle wzenagle cho'a xtill' Chioza' daa ba nezkzile. La' lennan' napan yeḷ' wak yislan le' kwençe bi kwiayi'le.

<sup>22</sup> Aga to wzenagzcho cho'a xtill' Chiozan', san chiyaḷ' goncho ka nan. Na' shi bi goncho ka nan, chziye'zə kwinchon, shi naa. <sup>23</sup> Beena' to chzenagz cho'a xtill' Chioza' na' bi chone' ka nan, chone' ka beena' chwia cho'alawe'na' lo wanna', <sup>24</sup> na' ka chikwase' chiyaḷ' chwia cho'alawe'na', li chaḷ-lall'tie' nakan nake'.

<sup>25</sup> Beena' bi chaḷ-lall' dii wenna' nllia Chioza' bia' gone' daa yisell yilaan le' lao dii mala', na' zie'n wṇeyi, na' toshiizi zoa'tip zoashoshe' chone' ka nan, beenan' zoa mbalaz.

<sup>26</sup> Shi no chakzi chone' ka cheeni Chioza', per bi chak gox' cho'a lolleena', chziye'z kwinen' na' bibi zakii daa ne' chone' ka cheeni Chioza'. <sup>27</sup> Daa cheeni Xacho Chioza' goncho na' nxi'n lawe'na', len dga: yiyesh'lalli-cho bi' wizebdo'ka' na' nool wizebka' lao dii lalljka' chen chle'gakile', na' gap wwia kwinchon bi goncho txen dii malka' de yell-lioni.

2 Le' beṇ' bish' na' le' beṇ' zan', ka le' chonjilall'le Xancho Jesucristona', beena' yoo balaan xenna', aga nakzi beṇ' gakile. <sup>2</sup> Shi gana' ndop nllagle yidə to beṇ' nllin xbene'na' niy de or na' nakw xalaane' dii wen, na' lekzka' yidə to beṇ' yesh'do' na' nakwe' xalaane' dii ba bida' bichollee, <sup>3</sup> na' chle'shi'chile beena' le nak xalaaninna', na' che'lene': "Wche' latji gani nak wen", na' che'le beṇ' yesh'do'na': "Na'zə wze, li'", wa ba che'lene': "Lo yo na'tezə wche'", <sup>4</sup> zaaga nakzin ba chle'ile baḷ' beṇ' daa chwia chyile nak nake', na' ba chza'lall'le çe'gake'?

<sup>5</sup> Le' beṇ' bish'dawaa na' le' beṇ' zandawaa, li wzenag dga: Chioza' ba wleje' beṇ'do'ka' nak beṇ' yesh' yell-lioni kwençe do yichj do lall'gake' gonjilall'gake'ne' na' soalengake'ne' gana' chṇabi'e, kon ka ba bchebe' gone' çe beṇ'ka' chakgakile'ne'. <sup>6</sup> Na' le', chonzile le-gake' nakzi. Zaaga beṇ' wnia'kan' chsak'zi'gake' le' na' chjtaogake' xya çehe lao beṇ'ka' chṇabia'? <sup>7</sup> Zaaga le-gaken' chbell chnegake' mal çe Xanchona', beena' nakcho lall' nee, beena' le zakii?

<sup>8</sup> Dii wen inlleban chonle shi dii li chonle daa lliatote nllia Cho'a Xtill' Chioza' bia' gonle daa nan: "Goki bish' ljjwello'na' ka chaki kwino'." <sup>9</sup> Per shi nakzi beṇ' gakile, chxinj chlenle, na' ba de xtol'le daa bi chonle ka na ley

† Santiago Lekzen' Jacóbona'.



che Chioza'. <sup>10</sup> Shi to beŋ' zeje' chone' yog'te daa nllia ley che Chioza' bia', per shi ton bi gone', doxente leya' chawan xya nape' dol'. <sup>11</sup> Chios, beena' wna: "Bi chiya! ineleno' beŋ' yoblə", lekzka' wne': "Bi wito' beŋ'." Na' shi chito' beŋ', la'kzi bi chneleno' beŋ' yoblə, chyishjo' daa nllia ley che'na' bia'. <sup>12</sup> Chiya! wshaljle wen na' wsa' chele wen kon ka nllia leya' bia', lega beŋ' nezi wllin to lla leya' daa chisell chi!a' cho' lao dii mala', wchoglon checho. <sup>13</sup> Beŋ'ka' bi chiyesh'lallii beŋ', lekzka' Chioza' bi yiyesh'lallile' legake' llana' wchogloe' che beŋ'. San beŋ'ka' chiyesh'lallii beŋ', Chioza' yiyesh'lallile' legake'.

<sup>14</sup> Le' beŋ' bish' na' le' beŋ' zan', bibi zjanayin inaz beŋ' nonlilallee Chioza' shi bi nla' dii wenna' chone'. ¿Awak to daa nonlilall'ze' yislan le' shi bi chone' wen? <sup>15</sup> Inatezcho to beŋ' byo wa to noolə, beŋ' nakcho txen nonlilall'cho Jesucristona', bibi xalaane' de na' chyalljite dii yeej gawe' ka naa ka wxə. <sup>16</sup> Na' tole ye'lene': "Soashgo' mbalaz, na' gat'shga xalaano' na' dii yeej gawo'", na' bi we'lene' daa chyalljile', bibi zejın ye'zlene' ka'. <sup>17</sup> Ka'kzan beena' nonlilallee Chioza', shi bi chone' daa nak wen, bibi zjanayin ne' nonlilalleene'.

<sup>18</sup> Zoa beŋ' ine': "Li' no' nonlilalloo Chioza', na' nad' chon' daa nak wen. Aga wakbe'i beŋ' shi nonlilalloo Chioza' shi bi chono' daa nak wen. San nad', daa chon' daa nak wen chli'a nonlilallaa Chioza'." <sup>19</sup> Li' chajli'o toz Chiozan' zoa, na' wenkzan chono' chajli'o. Lekzka' dii xiw'ka' chajle'gakan na' le chlləbgakan. <sup>20</sup> Bi gono' ka beŋ' bi nteyi. Chiya! gakbe'ilo' shi bi chono' daa nak wen, bibi zjanayin no' chajli'o che Chioza'. <sup>21</sup> Daa bzani dii xozxto'cho Abrahama' xiine' Isaaca', bchi'eb' lo yaana' nan lljete'b' ka goll Chioza'ne' gone', na' wna Chioza' nak dii Abrahama' beŋ' wen lawe'na'. <sup>22</sup> ¿Abi chakbe'ilo' daa benlilall' dii Abrahama' Chiozan', bzani'le' xiine'na'? Na' daa bene' ka', bli'en nan dii licha nonlilallee Chioza'. <sup>23</sup> Na' billinin daa nyoj lee Cho'a Xtill' Chioza' daa nan: "Abrahama' wyajli'e che Chioza', na' Chioza' wne' nake' beŋ' li beŋ' shao' lawe'na'." Na' wngake' che' goke' to beŋ' bllagui Chioza'.

<sup>24</sup> Na' chakbe'ile beena' chonlilallee Chioza' nake' beŋ' wen lawe'na' shi chone' ka cheenile', na' aga to daa inaze' nonlilalleene'. <sup>25</sup> Ka'kzə gok che noolə wdana' wle Rahab. Chioza' wne' nake' beŋ' li beŋ' shao' daa bkwashee loo lille'na' beŋ'ka' jawia jayi lalle'na', na' bigwee legake' to nez yoblə ka bichejgake' lalle'na' kwənche kono bet legake'. <sup>26</sup> Ka chak che to kwerp, shi bi yoon bishbe, netan, ka'kzan beena' to nonlilall'ze' Chioza' na' bi chone' ka cheenile', bibi zjanayin nonlilalleene'.

**3** Le' beŋ' bish' na' le' beŋ' zan', bi shanzle selall'le gakle beŋ' chli' chsedi, la' ba nezkzile' kat' yizi' Chioza' cho' kwent wsak'zi'che' neto' chli' chsedinto' beŋ' shi bi gonnto' ka cheenile'. <sup>2</sup> Yog'lo!cho chxinjcho. Na' beena' bi chxinje' de cho'a dill' nake' to beŋ' li beŋ' shao', na' lekzka' chak inabi'e doxen kwerp che'na'. <sup>3</sup> Kat' chgoocho dona' cho'a kabaya' kwənche gom ka cheenicho, chzakicho chgoochob neza' gana' cheenicho shajb. <sup>4</sup> Na' lekzka' li wwiakachi barkwka', la'kzi nakgakan dii xen wal na' chde be' wala' chlligaan di-

ika', beŋ'ka' chsa' legakan chdagake' toz yagdo' xaninka' na' chajgakan gana' cheengakile'. <sup>5</sup> Ka'kzan chak che loll'choni. La'kzi nakan to diido'zə, dii zan dii chshalj chshonan. Nezicho toz bzeyi'do' wak wzeyan to yix' diŋ xen wal. <sup>6</sup> Na' loll'choni nakan ka to yi'. Na' nakan to dii lliashesh' chiya dii mal na' chxinj chlenan do ka nak benecha' shlak mbane' daa chzenague' che dii xiwaa. <sup>7</sup> Benecha' chak gonmaxe' yog'te bayix', ka ba ze xan yabana', ka ba chxob le'in, ka ba yoo loo nisdo'na'. Per la'kzi chnabi'e legakb, <sup>8</sup> bi chak inabi'e lolleena'. Nakan to dii mal dii bi cheeni no inabia' len, na' nakan ka yierb dii chitan beŋ'. <sup>9</sup> Chchincho loll'choni chole'la'ocho Xacho Chioza', beena' nak Xancho, na' lekzka' chchinchon chyishjcho bia' blag' che beŋ'ka' bxe bsile', beŋ'ka' bene' lwaasakee. <sup>10</sup> Cho'a loll'choni chole'la'olenchon Chioza' na' lekzka' len chyishjan bia' blag' che beŋ'. Le' beŋ' bish' na' le' beŋ' zan', bi chiya! goncho ka'. <sup>11</sup> To ga chal nis, aga wak galan nis dii gak yeejcho na' galten nis xzi'. <sup>12</sup> Le' beŋ' bish'dawaa na' le' beŋ' zandawaa, nezile to yag yixwew aga wbian daa ne' aceituna, na' yag uvana' aga wak kwian yixwew. Na' ka'kzə gana' chal nis xzi'na' aga walan dii gak yeejcho.

<sup>13</sup> Shi ladjlena' zoa beŋ' sin', beŋ' chajni, chiya! wli'en wsa' che' wen na' wlexj yichje' gone' kon ka na ye! sin'na' daa noe' Chioza' le'. <sup>14</sup> Na' shi we'le latj wxinj wlen ye! xe'na' yichjlall'do'lēna', na' gonile beŋ' nakzi, bi chiya! wshalj wshonle inale nape ye! sin' daa chon Chioza'. La' shi ka' chonle aga dill' lin chole'. <sup>15</sup> Ka nak ye! sin'na' daa nale nape, bi nakan dii beŋ' Chioza', san nakan de yell-lionə dii chalj yichjlall'do'lēna', na' nakten che dii xiwaa. <sup>16</sup> Gana' zoa beŋ'ka' chakxe'i ljuwellgake' na' chakdilgake' nogaken' mbejlawi, nan' chxe wdi! wishesh na' chiya dii mal. <sup>17</sup> Beŋ'ka' nap ye! sin' daa chole' Chioza', nakgake' beŋ' chon ka cheenile', na' bi nakgake' beŋ' wishagdil. Nakgake' beŋ' wen, beŋ' wizoa dill', beŋ' chiyesh'lallii beŋ', na' aga nakzi beŋ' chakgakile', na' nakgake' beŋ' chda do lallii. <sup>18</sup> Beŋ'ka' chon to dii byen soalen ljuwellgake' mbalaz, na' lekzka' chongake' ka soalen ljuwell beŋ' yoblə mbalaz, si'gake' banez goni beŋ' legake' wen, na' soagake' mbalaz.

**4** ¿Biche chakile de wdi! wshesha' ladjlena' shi aga dii malka' lle' lla' loo yichjlall'do'lenan' chnabia'gakan le'? <sup>2</sup> Chzelall'le bi gat' chele na' bi chatilen. She! wx'e'ile witle beŋ' na' ikaale bi de che', na' chakxe'ile' bi de che beŋ'. Na' daa bi chat' chbe'ile daa chzelall'le gat' chele, chdi! chsheshlen ljuwell-le. Na' bibi chat' chbe'ile daa bi chnabilen Chioza'. <sup>3</sup> Na' kat' chnabilene'n, bi chone'n daa nezile' chnablen kwənchez gonditjen we'le cho'a xbayi beli chen chele-na'. <sup>4</sup> Le' beŋ' bi yootli lallin. ¿Abi nezile daa nonle txen dii mala' de yell-lionin chonan ka chakzbanile Chioza'? Nottezə beŋ' cheenile' gone' txen dii mala' de yell-lioni chakzbanile' Chioza'. <sup>5</sup> Bi gakilo' nazə Cho'a Xtill' Chioza' daa nan: "Daa ba ngoo Chioza' Espiritu che'na' loo yichjlall'do'chonin llialallee toze' le' wzenagcho che'." <sup>6</sup> Per dii xen chaklene' cho', na' Cho'a Xtilleena' nan: "Chioza' bi chle'shiile' beŋ'ka' chep cha'lall', per

chaklene' beṅ'ka' nak beṅ' gaxjlall'." <sup>7</sup> Daan, li wlexj yichjle lao Chioza'. Na' li soaḩeḩ bi we'zle latj ḩe dii xiwaa, na' yikwasan ka'lə. <sup>8</sup> Li wxenilall' Chioza' na' soalene' le'. Le' beṅ' saaxya, li yiyaj yileni ḩe dii malka' chonle. Na' ka le' cheenile' gonlilall'le Chioza' na' gontele txen dii mala' de yell-lioni, li we' latj yixis yiyib Chioza' yichjlall'do'lena'. <sup>9</sup> Li gakyeshii na' li kwellyesh'. Lwaa wxill-le li kwellyesh'. Li yisha' ye! chiba chizaki ḩelena' yiyakan ye! chakyeshii. <sup>10</sup> Li gak beṅ' gaxjlall' lao Xanchona', na' gone' le' beṅ' choo beṅ' xen.

<sup>11</sup> Le' beṅ' bish', bi kwell ine ḩe ljjwell-le. Beena' chbell ḩne ḩe to beṅ' nakcho txen nonlilall'cho Chioza' wa chiya chiyilje'ne', ḩe ley ḩe Chioza'n chbell ḩnie' na' chiya chiyilje'n. Na' shi ka' chono', lwaa wzenago' daa na leya', ba choaz kwino' ḩḩoglo ḩheyin. <sup>12</sup> Toz beena' zoa, beena' wdixj leya', na' naktie' beṅ' ḩḩoglo ḩe beṅ'. Na' len' wak yisle' beṅ' wa wlliaeyeene'. Na' li', ṅaa, ḩnora nako' yiya yiyiljo' bish' ljjwello'na'?

<sup>13</sup> Li wzenag, ka le' nale: "ṅaa wa wxḩ shajcho yell yoblə na' lljsoacho twiz lljencho delgens na' goncho gan mech." <sup>14</sup> Ni bi ṅezile bi gak ḩele ka wxḩ. Ye! mban ḩelena' nakan ka gopaa daa chbe' xtitz na' lli chinitten. <sup>15</sup> Kin chiya! ṅale: "Shi Chioza' wi'e latj ibancho, na' goncho dga cheenicho goncho." <sup>16</sup> Per latjin dii ṅale ka', ḩshalj ḩshonləle, na' daa ḩshalj ḩshonle nakan mal. <sup>17</sup> Beena' ṅezi chiya! gone' wen na' bi chone'n, nakan xya lao Chioza'.

**5** Li wzenag dga, le' beṅ' wni'a. Li gosaadia kwell-le, daa ba za' ye! zi'ka' yen ile'ile! <sup>2</sup> Ye! wni'a ḩelena' ba gooll' bteban; na' be! zidaa ba blliyiib xalaanleka'. <sup>3</sup> Or plat ḩeleka' ba chasgakan bej. Na' daa nakgakan ka', chaogakan xya ḩele na' wlliyi'gakan le' ka chon yi'na' ḩzey chten. La' ba bkwa' bti'azle ye! wni'ana' ṅaa ba zoa kwiayi' yell-lioni. <sup>4</sup> Daa bi be'le laxj beṅ'ka' bizi' bilap ḩeleka' chawan xya ḩele. Na' Xancho Chioza', beena' zeelo nap ye! wak choo ye! wak xen, ba bzenague' xyana' daa chao wen llinka'. <sup>5</sup> Yell-lioni ba weej wdaoshao'le na' ba be' cho'a xba beli chen ḩeleka'. Ba be'la'o kwinle ka beṅ' choe'la'o to bayix' kwenḩe wite'b gawe'b, na' kan' gak ḩele, ba zoa kwiayi'le. <sup>6</sup> Ba ḩḩoglole ḩe beṅ'do' bibi ben, na' ba betle legake', la'kzi bibi bengake' ḩele.

<sup>7</sup> Na' le' beṅ' bish' na' le' beṅ' zan', li gap ye! ḩxenlall' axt kat' yiyedḩ Xancho Jesucristona'. Beṅ' goz

goṅa' none' lez yizi' yilape', na' nape' ye! ḩxenlall' ḩbeze' gak yeja'. <sup>8</sup> Ka'kzə le', chiya! gaple ye! ḩxenlall' na' soaḩeḩle gonlilall'le Xancho Jesucristona', la' ba zoa yiyede'. <sup>9</sup> Le' beṅ' bish' na' le' beṅ' zan', bi gaoz xya ḩe ljjwell-le kwenḩe bi wḩoglo Chioza' ḩele. La' ba zoa gaoshosh yiyed beena' wḩoglo ḩe beṅ'. <sup>10</sup> Le' beṅ' bish' na' le' beṅ' zan', li wwia ka ben dii beṅ'ka' wdixjee daa goll Xancho Chioza' legake' kani'yi, wdap-gake' ye! ḩxenlall' la'kzi chiya dii wxak'zi'gake'. <sup>11</sup> Dii li, chakomba beṅ'ka' chizo chizaki ye! zak'zi'ka'. Ba benzkile ka ben dii Joba', bizo bizakile' wdie' lo ye! zak'zi'ka'. Na' ṅezkile ka ben Xancho Chioza' ḩe' biyoll wxak'zi'e, la' Xanchona' nake' llizelozu beṅ' chiyesh'lallii.

<sup>12</sup> Le' beṅ' bish' na' le' beṅ' zan', dii llialote dga: bi wzoazle de tasḩiw yabana' ni yell-lioni, ni sto dii yoblə kwenḩe shajle' beṅ' ḩele. Kat' ṅale: "wakan", ka'kzan gonle. Na' kat' ṅale: "bi gakan", la' bi gakkzannan', kwenḩe bi gat' xto!le lao Chioza'.

<sup>13</sup> Shi nole chak dii chak ḩele, li we'llwill Chioza'. Na' shi nole zoa mbalaz, li go! ṅie'. <sup>14</sup> Shi to beṅ' bi shawee, chiya! gaxe' beṅ'ka' ṅoo lall' na'gake' beṅ'ka' nonlilall' Cristona' kwenḩe we'llwillgake' Chioza' ni ḩe', na' ḩebgake' yichje'na' seta' na' ṅabgake' yiyakile' kon ye! wak ḩe Xancho Jesucristona'. <sup>15</sup> Na' kat' we'llwillgake' Chioza' na' shajle'gake' gone' daa ḩṅab-gake', na' yiyaki beena' bi shao', la' Xanchona' yiyone'ne'. Na' shi ba bxinj blene' na' yiyakxen ḩe'.

<sup>16</sup> Daan, li yixoado! lao ljjwell-le na' li we'llwill Chioza' ṅab ḩe ljjwell-le kwenḩe yiyakile. Chioza' chzenague' ḩe beena' nak beṅ' li beṅ' shao', na' chone' daa ḩṅabile'ne'. <sup>17</sup> Elfaza', beena' wdixjee daa goll Chioza'ne' kani'yi, goke' beṅ' de beli chen ka cho', na' ka be'llwille' Chioza' do yichj do lallee wṅabile'ne' bi gak yeja', na' bi gok yeja' lo yell-lioni shon yiz yo gashjə. <sup>18</sup> Na' be'llwille'ne' sto shii, na' bizolo yeja' na' biyashj biləb lo yell-lioni dii weej wdaogake'.

<sup>19</sup> Le' beṅ' bish' na' le' beṅ' zan', shi tole yilaale lo nez li ḩe Chioza', na' sto beṅ' yoblə yigwee le' sto shii, to dii wenan chone'. <sup>20</sup> La' chiya! ṅezile beena' yigoyoe' to beṅ' saaxya lo nez mala' na' yigweene' lo nez lina', ba chaklene'ne' yile' lo ye! wita' na' yiyakxen saaxya ḩe'na' la'kzi nakan dii zan.

# 1 Pedro

**1** Nad' Pedro nak' postl che Jesucristona', chzej' le', ka le' ba wlej Chioza' gakte lall' nee na' neslesle zoale do Póntona', Galáciana', Capadóciána', Ásiana' na' Bitíniana', gana' bi naki lall-le. <sup>2</sup> Kon ka wlo'e xhezín gone' chele kani'teyi, Xacho Chioza' ba wleje' le' na' Espíritu che'na' ba bikobe' yichjall'do'léna' kwénche soale wzenagle che Jesucristona' na' gakte beñ' nxi nyech ni che xchene'na' daa bixis biyib le'. Chioza' gaktenshgue' le' dii xen wal na' gonshgue' ka soale mbalaz inleeb.

<sup>3</sup> We'la'ocho Chioza', Xa Xancho Jesucristona'. Daa ba biyesh'lallile' cho', ba beñe' sto yel' mban kob checho daa bisbane' Jesucristona' ladj beñ' wetka', na' soacho gonchon lez toshiizi. <sup>4</sup> Na' ikaacho daa ba ngooshawee yabana' daa biga kwiayi', na' daa bibi nda' nchen, na' daa biga te che yel' mba cheyinna'. <sup>5</sup> Daa nonjilall'cho Chioza' lekze' wkwash' wkweejléne' cho' yel' wak che'na' kwénche idol' illonicho yel' mbanna' daa ba nakten gone' cho' kat' illin lla te che yell-lioni.

<sup>6</sup> Na' ni cheyi dgan chiba chizakile, la'kzi llaki naa wde wdeli dii chdil' chillagle tolde. <sup>7</sup> Ka nak ora', chiya! ten lo yi'na' kwénche wli'lawin shi nakan dowalj. Ka'kzan le', kat' chtil-le yel' zak'zi'ka' chli'lawin shi dowaljkzan ba nonjilall'le Jesucristona'. Na' daa nonjilall'léne' zak'chan ka ora', la' ora' wllin lla kwiayi'n. Per le' zoachehle nonjilall'le Jesucristona', kat' ba biyoll wdele lo yel' zak'zi'ka', na' shajla'ole na' sho'le to balaan xen kat' ziyede'.

<sup>8</sup> La'kzi biñ' ile'iléne', le chakiléne'. Na' la'kzi bi chle'iléne' naa, chajle'le che' na' dii xen wal chiba chizakile axt bichkz bi dill' chillelile we'le cheyin, <sup>9</sup> daa ba nezile gat' yel' mban chele zejli kani daa nonjilall'léne'.

<sup>10</sup> Dii beñ'ka' wdixjee daa goll Chioza' legake' kani'yi, be'gake' dill' ka nak yel' chiyesh'lalli che'na'. Na' biyiljy-ollgake' daa golle' legake' kwénche shajni'gakile' nakan gone' yisle' cho' na' gone' yel' mban checho zejli kani. <sup>11</sup> Na' Espíritu che Crístona'kzan be'léne' legake' dill' che yel' zak'zi'ka' ile'ile' na' che balaan xenna' daa sho'e ka ziyoll tie' yel' zak'zi'ka'. Na' goklall'gake' inez-gakile' nakan gak yide' na' bi lla bi goran' gak dga.

<sup>12</sup> Na' Chioza' bzajniile' legake' nan aga legaken' yen ile'gakile' diika' be'gake' xtilliin, san len' yen ile'ilen. Na' jennan' dill' wen dill' kob che Crístona' daa benile ka be'len beñ'ka' le' dill' kon yel' wak che Espíritu Sántona', beena' bsel' Chioza'. Na' axt anjika' cheengakile' inezchgakile' cheyi diiki.

<sup>13</sup> Na' ni che daa ba ben Chioza' chele, chiya! se kwasle na' gakte beñ' nyeeñ nyeeniyi. Li gonyen' lez dii wenna' gon Chioza' le' kat' ziyed Jesucristona'. <sup>14</sup> Daa

nakle xiñ Chioza' na' chzoale xtilleena', bich chiya! gonle dii mala' wzelall'le kana' biñ' gombia'léne'. <sup>15</sup> San chiya! soale gakte dowalj beñ' li beñ' shao'. La' Chioza', beena' gox wñabe' le', nake' dowalj beñ' li beñ' shao'. <sup>16</sup> La' Cho'a Xtilleena' nan: "Li gak dowalj beñ' li beñ' shao', ka nad' nak' dowalj beñ' li beñ' shao'."

<sup>17</sup> Daa che'le "Xa", beena' chchoglo che beñ' kon ka chidol' to toe', chiya! gall illebléne' shlak zoale yell-lioni gani nakle ka beñ' zit'. <sup>18</sup> Chioza' ba bisle' le' lo yel' mban daa bi nxe bi nzak' daa bkwaanlen dii xoxto'le-ka' le'. Na' nezile daa bisle' le' aga wdixjile'n or wa plat, diika' chbiayi', <sup>19</sup> san xchen Crístona' daa zak'chgayi, jennan' biya'o biziile' le' kana' betgake'ne' ka to xil'do' ba bibi nda' nchen. <sup>20</sup> Kana' zi' xe silte yell-lioni, Chioza' wleje' Crístona' sak'zi'e. Na' naa ba zoa te che yell-lioni ba bide' ni checho. <sup>21</sup> Na' ni che Crístonan' ba nonjilall'le Chioza', beena' bisbane'ne' ladj beñ' wetka' na' wlo'ene' balaan xen. Daan, ba chonjilall'le Chioza' na' ba nonléne' lez.

<sup>22</sup> Na' le' naa, daa ba chonle ka na dill' li che Chioza' ba bixi biyechle, na' do lall'le chaki ljwell-le. Na' chiya! gakchi ljwell-le do yichj do lall'le axt ga zeelo. <sup>23</sup> La' nakle ka beñ' ba golj dii yoblə, per aga de beli chen daa chde cheyi, san Chioza' ba bikobe' yel' mban che-léna' daa wyajle'le cho'a xtilleena' daa nsa' yel' mban na' biga te cheyin. <sup>24</sup> Cho'a Xtill' Chioza' nan: Yog'lo! beñ' yell-lioki nakgake' ka yixaa, na' balaan che'ka' nakan ka yejka' ze lyixaa. Yixaa chbillan na' chllib yejdo' cheyinna',

<sup>25</sup> san cho'a xtill' Chioza' zejli kani den, na' biga te cheyin.

Na' jennan' dill' wen dill' koba' daa ba wdixje'gakile' le'.

**2** Daan, chiya! choonlall'le yog'lo! dii mal, yog'lo! de wxiye', na' yel' xe', na' yel' chbell chne che beñ'.

<sup>2</sup> Ka chon to bdo' cheendo' chdom' nillaa, kan' chiya! ibil' idonle cho'a xtill' Chioza' daa nak dowalj, kwénche gaktlenan le' gonjilall'chléne' na' idol'le yel' mbanna' daa gone'. <sup>3</sup> La' ba bnix bliiatele ka beñ' wen nak Xanchona'.

<sup>4</sup> Li ibig' lao Xancho Crístona', beena' nap yel' mban, beena' zaklebi yaja' daa bi wyoolalii wen yooka', la'kzi lao Chioza' nake' to beñ' zakii nleeb na' wleje'ne' kwénche gone' ka chazlallee. <sup>5</sup> Na' lekzka' le', Chioza' ba beñe' to yel' mban kob chele daa nonjilall'le Crístona', na' zaklebile ka yajka' daa chkwaagake' ljwellin kwénche gakan to yoo ga sho' Chioza' balaan. Na' gakte bxoz che', na' Jesucristona' gaktlene' le' kwénche soale we'la'ole Chioza' ka chazlallee. <sup>6</sup> Cho'a xtill' Chioza' nan:

Wselaa to beŋ' yell Siónna',  
na' zaklebile' yaja' daa mbejlawin dii wlejgakile'  
kwenche gakan yaja' daa wchejcha yooná'.

Na' beena' wxenilalleene', biga si'e yel' zto'.

<sup>7</sup> Ka le' ba nonlilall'le beena' zaklebi yaja', chakbe'ile  
nake' beŋ' zakii. San beŋ'ka' bi nonlilall'gake'ne' chon-  
gake' ka chillini Cho'a Xtill' Chioza' daa na:

Yaja' daa bi wyoolall' wen yooka',  
leyen'lannan' yaja' daa ba nchejcha yooná'.

<sup>8</sup> Na' lekzka' nan:

Zaklebile' to yaj dii chgoo chchew' beŋ' na' chchixan  
legake'.

Chbixgake' daa bi chzenaggake' cho'a xtill' Chioza', na'  
ka'kzan chiya! gak chegake'.

<sup>9</sup> San le', nakle beŋ' wlej Chioza' kwenche gonli-  
lall'lene', na' nakle bxož che beena' chñabia', na' yell  
che', to yell dii biya'o cize. Na' wleje' le' kwenche we'le  
dill' ka nak yel' wak choo yel' wak xen che beena' bibej  
le' gana' nak shgasj shcho! kwenche biyoole lo beeni'  
choo beeni' xen che'na'. <sup>10</sup> Kana', bi gokle lall' na'  
Chioza', san naa ba nakle lall' nee. Kana', bi biyesh'lallii  
Chioza' le', san naa ba chiyesh'lallile' le'.

<sup>11</sup> Le' beŋ' bish'dawaa na' le' beŋ' zandawaa, daa  
nakle ka beŋ' zit' yell-lioni, chat'yoid' le' bi we'le latj we'  
cho'a xbayi beli chen chelena' daa cheeni inabia'  
yichjall'do'lena'. <sup>12</sup> Li wsa' chele wen ladj beŋ'ka' bi  
nonlilall' Chioza', kwenche llana' wchoglo Chioza' che  
to to beŋ', gakbe'gakile' benle wen na' we'la'ogake'ne',  
la'kzi naa chnegake' chele nan nakle beŋ' mal.

<sup>13</sup> Daa ba nonlilall'le Xancho Jesucristona', chiya!  
wlexj yichjle lao yog'lo! beŋ'ka' chñabia': ka lao beena'  
liizelozí chñabia', <sup>14</sup> na' ka'kz lao beŋ'ka' chselee  
kwenche wdezi'gake' beŋ'ka' chon dii mala' na' kwee  
balaan beŋ'ka' chon wen. <sup>15</sup> Chioza' cheenile' gonle  
wen kwenche idap cho'a beŋ'ka' biz chon chna' chele,  
beŋ'ka' bi nteyi ni bi chajni'gakile'.

<sup>16</sup> Li soato lega beŋ' ba biyell bila', na' aga ni che ba  
biyell bila'le na' gonle kon daa nan chele. Li soato lega  
beŋ' chon ka cheeni Chioza'. <sup>17</sup> Li gap balaan yog'lo!  
beŋ'. Li gaki bish' ljjwell-leka'. Li gall illeb Chioza'. Na' li  
gap balaan beŋ' wñabia'na'.

<sup>18</sup> Ka le' chonle xshin beŋ', li wlexj yichjle lao xanleka'  
do yichj do lall'le. Aga to beŋ'ka' chonzi le' wen gonile  
ka', san ka'kzə li goni beŋ'ka' chsak'zi' le'. <sup>19</sup> La' wenan  
no gon banez kat' no chsak'zi' le' la'kzi bibi dol' nape'  
daa ba ngoo yichje' daa cheeni Chioza'. <sup>20</sup> Per shi le'  
chzak'zi'le ni che to dii mal dii benle, bibi zakiin lao  
Chioza' gonlen banez. San shi chzak'zi'le ni che dii  
wenna' chonle na' chonlen banez, lennan' zakii lao  
Chioza'. <sup>21</sup> Kwenche gonle dgan gox wñab Chioza' le'.  
La' Crístona' wxak'zi'e ni chele na' bliile' le' nakan  
chiya! gonle. <sup>22</sup> Aga bi saaxya ben Crístona', ni bibi dill'  
wxiye' bi'e. <sup>23</sup> Kana' biz ben wnagake' che', bi biyechj  
bibie', na' ka bsak'zi'gake'ne' bi bwall bshebe' legake',  
san ben kwine' lall' na' Chioza', beena' chchoglo che  
beŋ' ka chiya!. <sup>24</sup> Crístona' biyoni che' saaxya checho-  
ka' ka wite' lee yag cruza' kwenche bich goncho txen  
saaxyana', san soacho goncho ka cheeni Chioza'. Na'

daa wxak'zi'en, zoale shi'a shao'. <sup>25</sup> Kani'yi wdale ka  
xil'do' ba wnit. Per naa ba nakle lall' na' Crístona',  
beena' chap chwia le' ka beŋ' chap chwia xil' cheyin,  
na' zie' wñeyi chele.

**3** Le' noolə zoa beŋ' chele, li wlexj yichjle lawe'ka'  
kwenche shi bi chajle'gake' cho'a xtill' Chioza',  
gakbe'gakile' nakan dii wen ka ile'gakile' nsa' chele  
wen. Na' aga chini gat'yoile legake' shajle'gake' cheyin,  
<sup>2</sup> san daa wwiazgake' chonle wen lega beŋ' chall chllab  
Chios shajle'gake'. <sup>3</sup> Bitek sele wñeyi naklə gon kwintle  
xochi: ka no naklə yipaa yichjle, na' wchinzle no bga no  
niy de or, wa gakwle lech' dii zakii nilleb. La' aga diikin  
dii llialote. <sup>4</sup> San dii llialote gaksħao' loo  
yichjall'do'lena' kwenche gakle beŋ' gaxjllall' na' beŋ'  
lall'do' xen, la' lennan' nakan yel' xochi dii bi te cheyin  
na' zak'chgayin lao Chioza'. <sup>5</sup> La' kan' ben noolka'  
kani'yi, beŋ'ka' gok beŋ' li beŋ' shao'. Bxenilall'gake'  
Chioza' na' blexj yichje'ka' bzenaggake' che beŋ'  
che'ka'. <sup>6</sup> Ka ben dii Sárana', bzo'e xtill' dii beŋ' che',  
Abrahama', na' golle'ne' "xan". Na' le' nakle dia che' shi  
gonle wen ka bene' na' bi illeble bi gak chele.

<sup>7</sup> Na' ka le' beŋ' byo, li goni xool-leka' wen. Li gapshi-  
igake' daa bi nakgake' chech ka cho' beŋ' byo, na' daa  
nezile lengaken' chido! ikaa yel' mbanna' daa gon  
Chioza' chele. Li gon dga kwenche bibi wsej wilonan  
wzenag Chioza' chele kat' choe'llwill-lene'.

<sup>8</sup> Na' sto dii nia' le', yog'lo!tele chiya! soalen ljjwell-le  
wen, na' gakle beŋ' lall'do' yesh', na' gaki ljjwell-le ka  
chakile' to beŋ' bish' goljle. Li yiyesh'lallii beŋ', na' li  
gak beŋ' gaxjllall'. <sup>9</sup> Bi yizi'zle wzon che beena' chon  
mal chele wa beena' chbell chne chele. San li inabi  
Chioza' gak wen che', daa nezile gox wñabe' le'  
kwenche gak wen chele. <sup>10</sup> La':

Beena' cheeni idie' lo yell-lioni na' gakte wen che',  
chiya! wsakee kwell inie',  
na' bi wi'e latj ichej dill' wxiye' cho'a lolleena'.

<sup>11</sup> Chiya! yilaalawee dii mala', na' gone' daa nak wen.  
Chiya! sie' wñeyi soalene' beŋ' mbalaz.

<sup>12</sup> La' Xancho Chioza' chap chwie' beŋ'ka' nak beŋ' li  
beŋ' shao',  
na' chzenague' kat' chñabgake' yel' goklen che'na',  
per bi chle'shiile' beŋ'ka' chon mal.

<sup>13</sup> Aga no bi goni le' shi toshiizi ze le chonle dii wen-  
na'. <sup>14</sup> Per shi yel' chon wen chelena' wtil'le yel'  
zak'zi'ka', chakomba le'. Na' bi gall illebze bi goni beŋ'  
le', na' bi gakshejlall'le. <sup>15</sup> San do yichj do lall'le li koo  
Crístona' balaan, beena' nak Xancho. Na' toshiizi li se  
wñeyi che dill'ka' yilliile lao nottezə beŋ' inabile' le'  
cheyi daa ba nonle lez. Na' xochi li we'lengake' dill'.

<sup>16</sup> Na' li gon daa nezile nak wen daa nakle Crístona' tx-  
en, kwenche beŋ'ka' naz chele bi chonle wen si'gake'  
yel' zto'. <sup>17</sup> Wenchlan sak'zi'cho daa choncho wen, shi  
ka' cheeni Chioza', aga ka daa sak'zi'cho daa choncho  
mal.

<sup>18</sup> La' shlin shlaxjzan wxak'zi' Crístona' ni che saaxya  
chechoka'. Aga bi xtolee got', per wxak'zi'e ni checho  
cho' beŋ' mal, kwenche bizoalencho Chioza' wen.  
La'kzi beli chen che'na' ble'in yel' wita', Espíritu che

Chioza' bisbane'ne' ladj beṅ' wetka'. <sup>19</sup> Na' wyaje' latja' gana' nej beṅ' malka' †jtixje'ile' legake' daa bene' gan dii mala' na' yeṅ' wita'. <sup>20</sup> Legaken' gogake' widenag kana' wzoa dii Noéna', na' wdap Chioza' yeṅ' chxenlall' chegake' shlak ben dii Noéna' barkwa'. Na' xon'chga beṅ'ka' wyoo loo barkwa' bi wlliyi'gake' loo nisa'. <sup>21</sup> Na' daa bila beṅ'ka' loo nisa' kani'yi, zaklebin daa chchoacho nisa' ṅaa. Na' daa chchoacho nisa' aga chixis chiyiban kwerp chechoni, san chli'n ba wṅabicho Chioza' yixis yiyibe' yichjlall'do'choni kwenche sho' yichjcho bich bi xtoṅ'cho de. Na' de yeṅ' mban checho zejli kaṅi daa biban Jesucristona' ladj beṅ' wetka'. <sup>22</sup> Na' biyepe' yabana', jachi'e shlaa de shli che Chioza' na' chṅabi'e lao anjilka' na' lao bichlæ yeṅ' wṅabia' dii de.

**4** Na' kon ka gok che Crístona' wxak'zi'lene' beli chen che'na', ka'kzan chiyal' izani kwine. La' beena' ba wxak'zi' beli chen che'na' bich chṅabia' saaxyana' le'. <sup>2</sup> Na' bich gonze' daa nazan che beli chen che'na' shlak ni mbane', san gone' ka cheeni Chioza'. <sup>3</sup> Ba gok to ka't' chonle txen beṅ'ka' biṅ' gombia' Chioza', choe'gake' cho'a xbayi beli chen che'ka', chongake' kon daa nazan chegake', chzoll chnitgakile', chaoxatgake', biz chegake' chon, na' choe'la'ogake' no yaj yag, diika' chakzbani Chioza'. <sup>4</sup> Na' dii xen chakllej-gakile' ṅaa daa bich chonle legake' txen lawi diika' bi yejni'alallii, na' chiya dii chon chnagake' chele. <sup>5</sup> Per wllin lla yidegake' kwent lao beena' ba ze kwas wṅhogloe' che yog'loṅ beṅ', ka beṅ' ni mban ka beṅ' ba wit. <sup>6</sup> Daan, beṅ'ka' bengakile' dill' wen dill' kob che Chioza' na' wyajle'gake'n, la'kzi witgake' ka ba nchog-bia' gak che yog' beṅ' yell-lío, ni mbankzgake' lao Chioza'.

<sup>7</sup> Daa ba zoa gao kwiayi' yog'loṅte dii de, chiyal' gakle beṅ' nyeṅ nyeeniya na' sele wṅeyi we'lwill-le Chioza'. <sup>8</sup> Na' dii lliallote, gaki ljwell-le, la' beena' nap yeṅ' chakina' chonxenlallee ka'k'tezə dii choni beṅ' le'. <sup>9</sup> Li wleb ljwell-le loo yoo lill-le do lall'le. <sup>10</sup> To tole chiyal' wgonle llin wde wdeli diika' noṅ Chioza' gak gonle kwenche kon ga chyaljan wchinlen gaklenle beṅ' yoblə. <sup>11</sup> Beena' naki che' wi'e cho'a xtill' Chioza', chiyal' iṅe' kon ka nan. Na' beena' naki che' gaklene' gone' to llin, chiyal' wchine' doxente fuerza' be' Chioza' le'. Na' yog'loṅ daa gonle, li gonan kwenche shajla'o Chioza' daa nakle Jesucristona' txen. La' le' chidoṅee sho'e balaan na' inabi'e zejli kaṅi. Kan' nakan.

<sup>12</sup> Le' beṅ' bish'dawaa na' le' beṅ' zandawaa, bi gallejile na' yibanzile daa chle'ile yeṅ' zak'zi'ka', la' bi nakan ka dii yibanicho. <sup>13</sup> San li yibayi daa lenle chzak'zi'le ka diika' wxak'zi' Crístona', kwenche lekzka' yiba yizakile kat' ile'ile ziza'lene' balaan xen che'na'. <sup>14</sup> Chakomba le' shi no iṅe zban chele daa nakle Crístona' txen, la' Espírituna', beena' nak beṅ' choo beṅ' xen che Chioza', zoalene' le'. <sup>15</sup> Shi nole chzak'zi'le, wenlan sak'zi'le daa chonle dii wenna' aga ka daa sak'zi'le daa nakle wen xya, wa jlanle, wa benle bichlæ dii mal, wa jalalli chele ga bi chak che beṅ'. <sup>16</sup> Na' shi

chzak'zi'le daa nakle Crístona' txen, bi chiyal' yiyii yido'ile, san li we'la'o Chioza' daa naklene' txen.

<sup>17</sup> Ba blin lla solo gon Chioza' yeṅ' joschis che beṅ'ka' nonjlall'gake'ne'. Na' shi solon ladjchoni, ṅnakla gak che beṅ'ka' bi chzenag dill' wen dill' kob che Chioza', lla? <sup>18</sup> Na' shi beṅ'ka' zej shli dii zan dii chen chle'gakile' na' axt kayaadia yilagake' lawinka', zalechli ki gak che beṅ'ka' bi chall chlleb Chioza' na' beṅ' saaxyaka'? <sup>19</sup> Na' beṅ'ka' chzak'zi' kon ka nllia Chioza' bia' gak chegake', toshiizi chiyal' gongake' dii wenna' na' gon kwingake' lall' na' Chioza', beena' bxe bsile' legake', na' gaklene' legake' ka bchebe' gone'.

**5** Le' ngoo lo na'le bish' ljwellchoka' nonjlall' Crístona', lekzka' nad' nlan' ka daa nlanle, na' ble'teid' ka wxak'zi' Crístona', na' len' chidoṅaa ikaa balaan xen-na' kat' yilee. Daan, chat'yoid' le': <sup>2</sup> Gap wwiale beṅ'ka' ba nonjlall' Chioza', beṅ'ka' ba none' lall' na'le. Li gonan lega beṅ' chibayi gon ka chazlall' Chioza'. Na' aga gonyaadiazlen, ni bi gonle lez gaxjle dii xen, san li gonan do yichj do lall'le. <sup>3</sup> Na' bi gonze' ka chṅabia'tegal lao beṅ'ka' nak lall' na'le, san chiyal' wi'le chonle wen lawe'ka'. <sup>4</sup> Na' kat' yila' Jesucristona', beena' chṅabia' yog'loṅ beṅ'ka' chap chwia beṅ'ka' nonjlall'gake'ne', na' goṅe' le' to balaan xen daa biga te cheyin.

<sup>5</sup> Na' lekzka' le' bi' xkwid', wlexj yichjle lao beṅ' golka'. Na' yog'loṅ-le chiyal' wlexj yichjle lao ljwell-le ganga, na' gakle beṅ' gaxjlall', la':

Chioza' bi chle'shiile' beṅ'ka' chep cha'lall', san chaklene' beṅ'ka' nak gaxjlall'.

<sup>6</sup> Li gak beṅ' gaxjlall' lao Chioza', beena' nap yeṅ' wak choo yeṅ' wak xen, kwenche kwee le' balaan kat' illin lla. <sup>7</sup> Li gon lall' na' Chioza' yog'loṅ dii chak chele, la' le' zie' wṅeyi chele.

<sup>8</sup> Li gaktō beṅ' nyeṅ nyeeniya na' li se kwas. La' dii xi-waa daa chakzi' chakzbani cho' chdan ka to bell zṅia, ba chbiṅ chdon, na' chyiṅjan no wlliyi'n. <sup>9</sup> Li soatip li soashosh gonjlall'le Crístona' na' bi we'zle latj che dii xiwaa, la' ṅezkzile' doxenzə yell-lioni yog'loṅ beṅ'ka' nakcho txen ba chle'gakile' yeṅ' zak'zi'ka' ka diika' chen chle'ile. <sup>10</sup> Na' ka ba biyoll wdele yeṅ' zak'zi'ka' shloll, Chioza', beena' nap yeṅ' chiyesh'lall' xen, yiyone' le' ka chazlallee na' gone' ka gakchachle na' yizoatip yizoashoshe' le'. La' lekzen' gox wṅabe' cho' kwenche yidoṅ'cho balaan xen che'na' daa bi te cheyin daa nakcho Crístona' txen. <sup>11</sup> Len' chidoṅee sho'e balaan'na' na' inabi'e zejli kaṅi. Kan' nakan.

<sup>12</sup> Beṅ' bish'cho Silvánoni, beeni ṅezid' zoatip zoashoshe' nonjlallee Crístona', goklene' nad' bzej' le' to chop cho'a dill' kwenche wtip' lall'le. Na' dga nia' le' chli'n dii lliacha chaki Chioza' cho'. Li soatip li soashosh lo yeṅ' chaki che'na'.

<sup>13</sup> Beṅ'ki nonjlall' Crístona' yell Babilóniani, beṅ'ki ba gox wṅab Chioza' ka gox wṅabe' le', na' lekzka' Márconi, bi'ni nak ka dowalj bi' cha', chwapgake' le' chiox.

<sup>14</sup> Li wwap chiox ljwell-le lega beṅ' chaki ljwellin.

Soashgale mbalaz yog'loṅ-le le' nakle Crístona' txen.

## 2 Pedro

**1** Nad' Pedro, nak' wen llin çe Jesucristona' na' nak' postl' çe'. Chzej' le', ka le' ba nonljalall'cho Jesucristona', beena' nak Chios çecho na' ba beñe' cho' ye! mban zejli kani daa nake' beñ' li beñ' shao'. Na' daa nonljalall'chone' nakan to dii zakii. <sup>2</sup> Gaklenshga Chioza' le' na' gone' ka soale mbalaz inleeb daa ba nombia'lene' na' nombia'tele Xancho Jesús'a'.

<sup>3</sup> Kon ye! wak çe'na' ba non' cho' yog'lo! daa chyalljicho kwençe soacho goncho ka cheenile' daa nombia'chone', na' lo ye! beñ' wen çe'na', daa nak dii xen inleeb, gox wñabe' cho'. <sup>4</sup> Na' daa nake' beñ' wen inleeban, bçhebe' gone' ka gake beñ' wen ka nake' le', na' yilale lao daa chxinj chlenan beñ' yell-lioni daa chongake' daa nazan çegekake'. Na' daa bçhebe' gone' çecho nakan dii wen inleeb na' dii xen zaka'n. <sup>5</sup> Daan, le' ba chonljalall'lene' chiya! gonle ka dii le kwençe gonle wen, na' gapchle ye! sin', <sup>6</sup> na' inabia' kwinle, na' gaple ye! chxenlall' kat' bi chak çehe, na' gonle ka cheenile', <sup>7</sup> na' ile'shii ljuwell-le na' gakile yog' beñ'.

<sup>8</sup> Shi zizikchli gonle yog' diiki, gonan ka gakbia' lo ye! mban çhelena' bi bembia'dadzle Xancho Jesucristona'. <sup>9</sup> Per beena' bi chon diiki, nake' beñ' bi nteyi daa ba goj-lallee ba bixi biyech saaxya çe'na' bene'. <sup>10</sup> Daan, le' beñ' bish'dawaa na' le' beñ' zandawaa, daa ba gox wñab Chioza' le', li gon ka dii le soaçeçhle gonle diiki. La' kat' ba chonle diiki bibi de wchixan le', <sup>11</sup> na' le shajla'ole kat' yillinle gana' chñabia' Xancho Jesucristona', beena' bisle' cho'.

<sup>12</sup> Daan, toshiizi yisaa lall'le diiki, la'kzi ba ñezilen na' ba zoaçeçhle çajle'le dill' li çe Chioza' daa ba nombia'le. <sup>13</sup> Shlak ni mban', chakid' chiya! yisaa lall'le diiki, <sup>14</sup> la' ñezid' ba zoa gaoshosh guet' kon ka ba wna Xancho Jesucristona' gak cha'. <sup>15</sup> Na' gontekz' to dii byen we'len' le' dill' ñaa ni mban' kwençe lekzka' kat' ba wit' lljadinile' diiki ba wnia' le'.

<sup>16</sup> Diika' ba bli' bsdinto' le' çe ye! wak çe Xancho Jesucristona' na' çheyi daa yiyede', aga nakan dii biy-iljlall'zə beñ', san çhopshosh jalaonto'kin ble'into' ye! beñ' choo beñ' xen çe'na'. <sup>17</sup> Ble'into' ka wloo Xacho Chioza'ne' balaan len ye! chey cheeni' çe'na' ka wñie' yabana' gana' nak liizeloz' mbalaz, na' wne': "Beenin xi-inaa, le chakidee na' chazlall'chgaid' ka chone'." <sup>18</sup> Ne-ton' zelennto'ne' lo yaa çe Chioza' na' kwinnton' ben-into' shii Chioza' ka wñie' yabana'te.

<sup>19</sup> Na' daa ble'into' dga, bichop cho'a dill' daa bzej dii beñ'ka' wdixjee daa goll Chioza' legake' kani'yi. Na' le', chiya! sele wñeyi xtilleeka', daa nakan ka to yi' daa chzeeni' ga nak shgasj shçhol, axt ki illin lla yiyed Jesucristona', beena' chzaklebi belj xsila', na' kooche'

beeni' çe'na' loo yichjlall'do'leka'. <sup>20</sup> Na' dii lliarote shajniile dga: ni to cho'a dill'ka' bzej dii beñ'ka' wdixjee daa goll Chioza' legake' kani'yi bi nakan dii wdiljlall'zgake'. <sup>21</sup> La' dii beñ'ka' wdixjee daa goll Chioza' legake' kani'yi, biga wñegake' tobia'lall'zgake', san Espíritu Sántonan' bzajniile' legake' kwençe be'gake' xtille' Chioza'.

**2** Per lekzka' ladj beñ' Israelka' wzoa beñ' wxiye', wnazgake' chyixje'gake' daa goll Chioza' legake'. Na' ka'kzə ladjlena' soa beñ' wli' wsedi de wxiye'ka'. Na' wli' wsedgakile' le' ka ki gakbe'zile' de wxiye' çe'ka' daa chliayi' beñ'. Na' wzoagake' ka'lə Xan-chona', beena' wdix saaxya çe'ka'. Na' daa gongake' ka', tolbe' kwiayi'gake'. <sup>2</sup> Beñ' zan gongake' txen dii mal çe'ka' na' gongake' dii zban daa nazan çegekake'. Na' ni çegekake' in' beñ' zban çe dill' li çe Chioza' daa nocho. <sup>3</sup> Daa selall'gake' gat' kwe'gakile', wli' wsedgakile' le' daa chyiljlall'zgake'. Kani'teyi ba nchogbia' çegekake' kwiayi'gake', na' bich gakxen çegekake'.

<sup>4</sup> Chioza' bi wxi'xene' çe anjlka' bxinj, san btakw bçheje' legake' lo ye! çholə' latja' gana' nseje' legake', na' nan' nkweze' legake' axt kat' illin lla wçhogloe' çegekake'. <sup>5</sup> Ni bi wxi'xene' çe beñ' yell-lioka' kani'yi, san bene' yejsiw' wala' bliiayee beñ' malka'. Per dii Noéna', beena' wdixje'i beñ' nan chiya! gongake' wen, Chioza' bisle'ne' len zi gall beñ'. <sup>6</sup> Lekzka' Chioza' bçhogloe' çe beñ'ka' lle' yell Sodómana' na'ch yell Gomórrana', na' bzey btie' yellka' axt ka biyakgakan de, kwençe ile'i beñ' ka gak çe beñ' malka'. <sup>7</sup> Per bisle' dii Lota', beena' gok beñ' wen, beena' bwiyi dii zbanka' ben beñ' malka'. <sup>8</sup> Na' beñ' wenni wzoa ladjka', gokyeshii loo yichjlall'do'ena' ni çheyi dii malka' ble'ile' bengake' yog' lla. <sup>9</sup> Yog'lo! diiki chli'gakan nan Xanchona' ñezile' nak gone' yisle' beñ'ka' chon ka chazlallee lawi bittezə dii lallj. Na' lekzka' ñezile' nak wkweze' beñ' malka' axt kat' illin lla wçhogloe' çe yog'lo! beñ'.

<sup>10</sup> Na' dii lliarote wsak'zi'ch Xanchona' beñ'ka' choe' cho'a xbayi beli chen çe'ka' daa nxinj yichjlall'do'eka', na' bi cheentegakile' no inabia' legake'. Beñ'ka' bibi nalli na' nakgake' beñ' cha'sib, na' ni bi chllbe'gake' inegake' çe anjlka'. <sup>11</sup> San anjlka', la'kzi nakchgake' beñ' walch na' napchgake' ye! wak xençh, bi chiyaxjgakile' inegake' çe anjlka' bi bzenag kwençe gaogake' xyə çegekake' lao Chioza'.

<sup>12</sup> Per beñ'ki chñetezgakile' zban çe diika' bi chajni'gakile'. Nakgake' ka bayix'ka' baka' bi nteyi, baka' çhaljgknb na' çzen beñ' legakb na' chitgake'b. Ka'kzan gak çe beñ'ka', lekzka' kwiayi'gake'. <sup>13</sup> Na' ikaagake' laxji dii mala' ba bengake'. Beñ'ki chakgakile'

zix sia choe'gake' cho'a xbayi beli chen che'ka' axt telatekzə. Na' kat' chhengake' le' cheej chaole, bi nxe bi nzak' nakgake' daa chibagakile' chongake' daa nazan chegake'.

<sup>14</sup> Nottezə noolə ile'gakile' chzelall'gake'ne', na' bi chelj chlla'gakile' gongake' saaxyana'. Na' ch-gooyel'gake' beŋ'ka' biŋ' gakcha lo xhez Chioza' kwenche gongake' dii mala', na' le chzelall'gake' gat' kwe'gakile'. Beŋ'ki chon ka' ba nakten kwiayi'gake'.  
<sup>15</sup> Ba wlej yichjgake' nez li che Chioza' na' ba zejgake' lo nez daa wyoo Balaama' xiiŋ Beora', beena' wyoolall' sho' laxje' che dii mala' bene'.<sup>16</sup> Na' ni che dii mala' nan gone', to burr, ba bi chak iŋe, wŋeb ka beŋ' na' bsheshlem le' kwenche bi gone' dii mala' ba ngoo yichje' gone' daa nchoŋ nitile'.

<sup>17</sup> Beŋ' malki zaklebgakile' beja' daa bich bi nis chal, na' ka bejka' choa' be'na'. Ba nchoglo chegake' soagake' zejli kaŋi gana' liizelozi nak shgasj shchoŋ.

<sup>18</sup> Chnegake' cha'sibə choe'gake' dill' dii bibi zakii, na' chgooyel'gake' beŋ'ka' kayaadia ba bichejgake' ladj beŋ'ka' chon dii mala' kwenche sto shii yizologake' yiy-oe'gake' cho'a xbayi beli chen che'ka'.<sup>19</sup> Na' che'gake' wak gongake' daa nazan chegake', la' aga bi xya che dii mala' de, na' le'yen'gaken' ntakw nchej dii mala'. La' nottezə beŋ' chone' kon ka na daa chŋabia' le', ba ndo'e lawinna'.<sup>20</sup> Na' beŋ'ka' ba biyell bila'gake' lao dii mala' daa de yell-lioni daa ba beŋ'ilall'gake' Xancho Jesucristona', beena' bisla cho', shi sto shii yitakw yichej dii mala' legake', gaktechlə mal chegake' aga ka gok chegake' dii nech kana' biŋ' gonŋilall'gake'ne'.

<sup>21</sup> Wenchlan shel' bi bembia'kzgake' nez li che Chioza' aga ka daa bembia'gake'n na' bilaala'ogake' cho'a xtilleena' daa bli' bse di beŋ' legake'.<sup>22</sup> Na' daa beŋ-gake' ka', billinin che dillaa de daa na: "Bekwaa chiyaob daa biyebb, na' kusha', bana' zi' gozj, chibix chitolb loo beŋja' sto shii."

**3** Le' beŋ' bish'dawaa na' le' beŋ' zandawaa, dgan de wchop shii chzej' le'. Na' chopten choe'len' le' dill' kwenche chisaa lall'le sele wŋeyi che dii wenna' daa ba nezile.<sup>2</sup> Li lljadini dill'ka' be' dii beŋ'ka' wdixjee daa goll Chioza' legake' kani'yi, na' daa bliia Xanchona' bia', beena' bisla cho', daa ba bli' bse di postlka' le'.

<sup>3</sup> Dii llialote chiyaŋ' iŋezile, kat' ba zoa te che yell-lioni, na' ichej beŋ' gongake' daa nazan chegake' na' gonle-gake',<sup>4</sup> iŋagake': "¿Berache biŋ' yiyed Crístona' ka bchebe' gone'? Ba wit dii xaxna'choka' na' toz ka ni chak ŋaa ka kana' wxe wzilte yell-lioni."<sup>5</sup> Beŋ'ka' na' ka',

bi cheengakile' yisa'lall'gake' daa gok kani'yi, kana' to ka wnezə Chioza' na' wya' wbiŋ yabana', na' biyak nis-do'ka' toz na' bli'lao yell-liona'.<sup>6</sup> Na' lekzka' len' bliie' bia' gok yejsiwaa kwenche bliiayi' nisa' yell-lioni kani'yi.  
<sup>7</sup> Na' yabana' len yell-lioni, diiki chle'icho ŋaa, ba nllia Chioza' bia' chegakin wzey wte yi'na' legakan llana' wchogloe' kwiayi' yog' beŋ' malka'.

<sup>8</sup> Na' le' beŋ' bish'dawaa na' le' beŋ' zandawaa, bi gal-lall'le Xanchona' chle'ile' tlla ka to mil yiz na' to mil yiz ka tllazə.<sup>9</sup> Zoa beŋ' ne' chshe'lall' Xanchona' gone' ka bchebe'. Aga chshe'lalleen', san nape' yeŋ' chxenlall' daa bi cheenile' no kwiayi', na' cheenile' yog' beŋ' yiyaj yileni.

<sup>10</sup> Llana' yiyed Xanchona' tokongananz yilee, ka chon to beŋ' wban tokongananz cho'e loo yoo lill beŋ'. Na'ch gak to sshag wal na' yinitlo yabana' na' diika' llia xaninna', wzey yi'na' legakan na' kwiayi'gakan, na' yell-lioni na' yog' dii de lawinna' sheygakan.

<sup>11</sup> Daa nezicho yog'loŋte dii de kwiayi'gakan, chiyaŋ' goncho ka dii le gakcho beŋ' li beŋ' shao' na' soacho goncho ka cheeni Chioza'<sup>12</sup> shlak chbezcho llana' wchogloe' che beŋ', na' goncho to dii byen kwenche yob gakan. Llana' gak ka', yi'na' wlliaayi'n yabana' na' di-ika' llia xaninna' yilengakan na' kwiayi'gakan.<sup>13</sup> Na' cho', chbezcho to yaba kob na' sto yell-lio kob daa bcheb Chioza' gone' cho' gana' she' shgal' beŋ' li beŋ' shao'.

<sup>14</sup> Daan, le' beŋ' bish'dawaa na' le' beŋ' zandawaa, shlak zoale chbezle diiki, li gon to dii byen kwenche soalenle Chioza' wen, na' bibi xtol'le gat' ni bibi nda' nchen yichjllalldo'lana' kat' lljazele lawe'na'.<sup>15</sup> Na' chiyaŋ' shajniile' dga: Xanchona' nape' yeŋ' chxenlall' checho daa bi cheenile' kwiayi'cho, san cheenile' yog'cho yilacho. Na' lekzka' beŋ' bish'cho Páblona', beena' le' chakicho, bzeje' xtillii diiki kon yeŋ' sin' daa be' Chioza'ne'.<sup>16</sup> To to ka bzej Páblona', bi'e dill' che dii-ki. Na' baŋ diika' bzeje' le' lallj shajniichon, na' beŋ'ka' bi nteyi len beŋ'ka' biŋ' gakcha lo xhez Chioza' chajni'gak-ile'n klelə, ka chongake' che bichlə daa na Cho'a Xtil' Chioza', chajni'gakile'n klelə, na' chlliaayi' kwingake'.

<sup>17</sup> Na' le' beŋ' bish'dawaa na' le' beŋ' zandawaa, daa ba nezile dga, li wsak' kwenche ki gonlleji beŋ' malka' le' na' yilaale lo xhez Chioza'.<sup>18</sup> San li gon ka dii le sha-jni'chile ka chaklen Xancho Jesucristona' cho', na' li gombia'ch beena' bisle' cho'. Len' chidoŋee sho'e bal-aan ŋaa na' zejli kaŋi. Kan' gakan.

# 1 Juan

**1** Chzejnto' le' kwenche inezile che beena' ba zoa kana' zi' xe sil yell-lioni, beena' bzenagnto' bi'e dill' na' chopshosh jalaonto'kin ble'into'ne'. Bwianto' ka nake' na' bex'nto'ne' kon na'nto'ki kana' wde' yell-lioni. Len' nake' Xtill' Chioza' na' len' cho'e ben' ye! mban zejli kañi. <sup>2</sup> Na' beeni nsa' ye! mban zejli kañi bide' yell-lioni, na' ble'into'ne' na' choe'nto' dill' che'. Na' chyix-je'into'n le' kwenche inezile ba zoalenkze' Xacho Chioza' kana' zi' xe silte yell-lioni na' ba bidsoe' ladjchoni. <sup>3</sup> Chyixje'into' le' che beeni ble'into' na' bzenagnto' bi'e dill', kwenche yiyoll yido gakle neto' txen. Na' dii li ba nakkzcho txen Xacho Chioza' na' Xiine' Jesucristona'. <sup>4</sup> Chzejnto' le' diiki kwenche yiyoll yido soale mbalaz.

<sup>5</sup> Diikin bli' bsemi Jesucristona' neto', na' chyixje'into'n le': Chioza' nake' ka beeni' daa nake' liizelozi ben' li ben' shao', na' bibi dii mal ni de wxiye' nsee, diika' nak ka yel cho!. <sup>6</sup> Shi inacho nakchone' txen na' chdatecho lo yel cho!a', chziye'zchon na' bi zejlencho daa nak dii li. <sup>7</sup> San shi zoacho lo beeni'na' ka zoa Chioza' lo beeni'na', na' ba nakcho toz, na' xchen Xiine' Jesucristona' chixis chiyiban yichjlall'do'chona' kwenche bibi saaxya nda' nchenan.

<sup>8</sup> Shi inacho bibi saaxya napcho, chziye'z kwinchon, shi naa, na' nakbia' bi nombia'cho dii jina'. <sup>9</sup> San shi yixoado!cho saaxya chechoka' lao Chioza', beena' toshiizi chon ka chchebe' na' nake' ben' li ben' shao', wizi'xene' saaxya chechoka' na' yixis yiyibe' cho' che yog!lo! dii malka' ba bencho. <sup>10</sup> Shi inacho bin' goncho saaxya, ba chtobicho Chioza' de wxiye'na', na' nakbia' bin' gombia'cho cho'a xtillenan', shi naa.

**2** Le' xiindawaa, chzej' le' dga kwenche bi wxinj wlenle. Na' shi nocho ba bxinj blencho, zoa to ben' inabe' cho' lao Xacho Chioza', len' Jesucristona', beena' nak dowalj ben' li ben' shao'. <sup>2</sup> Na' len' wdixje' saaxya chechoka' kon ye! mban che'na', na' aga che to cho'zan wdixje', san len che yog' ben' lle' zbii zkaan yell-lionin.

<sup>3</sup> Shi choncho ka nllia Chioza' bia' goncho, nezicho ba nombia'chone'. <sup>4</sup> Na' shi zoa ben' ne': "Nombi'ane'", na' bi chone' daa nllie' bia', nake' to ben' wxiye' na' nakbia' bi nombi'e dii jina'. <sup>5</sup> San shi ba choncho ka na cho'a xtill' Chioza', dii li ba chakichone' ka chiyaji. Na' kan' chakbe'icho ba nakchone' toz. <sup>6</sup> Beena' ne' ba nake' Chioza' toza chiyal' wsa' che' ka bsa' che Jesucristona'.

<sup>7</sup> Le' ben' bish'dawaa na' le' ben' zandawaa, ka nak dga chzej' le' bi nakan dii kob, lekzannan' bzenagle dii nechte. Nakan dii nllia Chioza' bia' kani'teyi na' bakza yoon nagle. <sup>8</sup> La'kzi ka', wak inacho dga chzej' le' nakan

dii kob, la' dii li nakan ka ben Crístona' na' ka chonle. Na' dii mala' daa nak ka yel cho! zej chiyol chinitan, na' beeni' che Chioza' ba chzeeni'n.

<sup>9</sup> Shi to ben' ne' zoe' lo beeni' che Chioza', na' chakzbanile' bish' ljwelle'na', lo yel cho!an' ni zoe'. <sup>10</sup> Beena' chaki bish' ljwelle'na' ba zoe' lo beeni' che Chioza', na' bibi de wchixan le'. <sup>11</sup> San beena' chakzbanile' bish' ljwelle'na' chde' lo yel cho!a' na' bi nezile' galan zeje', la' dii mala' chone' ba nonan le' ka to ben' lcho!.

<sup>12</sup> Le' xiindawaa, chzej' le' dga, daa ba bizi'xen Chioza' saaxya cheleka' daa wit Jesucristona'. <sup>13</sup> Le' zoa xiin chele, chzej' le' dga daa nombia'le beena' ba zoa kana' zi' xe silte yell-lioni. Le' bi' wew', chzej' le' dga daa chzoile bi chzenagle che dii xiwaa.

Le' xiindawaa, chzej' le' dga daa nombia'le Xacho Chioza'. <sup>14</sup> Le' zoa xiin chele, chzej' le' dga daa nombia'le beena' zoa kana' wxw wzil yell-lioni. Lekzka' chzej' le' bi' wew', daa nakle bi' wal na' ba bleble Cho'a Xtill' Chioza' loo yichjlall'do'lana', na' bi chzenagle che dii xiwaa.

<sup>15</sup> Bi gaktekile yell-lioni, ni daa de lawinna'. Nottezcho shi chakicho daa de yell-lioni, bi chakicho Xacho Chioza'. <sup>16</sup> La' yog!lo! diiki de yell-lioni: dii mala' daa chzelall' beli chenna', na' daa chzelall'cho bi dii chle'icho, na' ye! cha'siba'. Aga legakannan' chshab Xacho Chioza', san nakan dii chshab yell-lioni. <sup>17</sup> Na' yell-lioni chde cheyin len dii malka' chzelall'cho lawinna', san beena' chon ka chazlall' Chioza' de ye! mban che' zejli kañi.

<sup>18</sup> Le', xiindawaa, ba zoacho llaka' zeelo. Na' ba benile za' Beena' gakzbanile' Crístona'. † Na' naa ba chle'icho ben' zan ben'ka' chakzbangakile'ne'. Daan, ba nezicho ba zoacho llaka' zeelo. <sup>19</sup> Legake' ba bengake' cho' txen la'kzi aga dii li gokgake' cho' toza. La' shel' dii li gokgake' cho' toza, ni nakgake' cho' txen, shel'ka'. Na' daa bikwasgake', bli'gake'n kwas!o! aga do lall'gake'n gokgake' cho' txen.

<sup>20</sup> Per beena' nak liizelozi ben' wen ben' shao' ba bene' kwenche zoa Espíritu Sántona' loo yichjlall'do'lana'. Na' daan, yog'le chajniile dill' li che Chioza'. <sup>21</sup> Aga chzej' dga daa inacho bi nombia'le dii linnan', san chzeja'n daa ba nombia'lennan', na' nezicho bibi dill' wxiye' nchix dill' li che Chioza'.

<sup>22</sup> ¿Noran ben' wxiye'na'? Len' beena' na che Jesús'a' aga len' Crístona', beena' chbezcho wsel' Chioza'. Beena' na ka', len' chakzbanile' Crístona', na' chzoe' Xacho Chioza' ka'lə len Xiine' Jesucristona'. <sup>23</sup> Beena'

† Beena' gakzbanile' Crístona': xtila' nagake' El Anticristo. Lekzka' bwia 1Jn. 2:22; 4:3; 2Jn. 1:7, na' 2Tes. 2:3.



chzoe' Xiin Chioza' ka'lə lenkz Xə' Chiozan' chzoe' ka'lə. San beena' ina chonlilallee Xiin Chioza', lenkz Xə'nan' nake' txen.

<sup>24</sup> Daan, li kooshao' loo yichjall'do'ləna' yog'lo! daa wzolo chsedle ka wyoole lo xnez Chioza'. Na' shi ba wlooshao'len loo yichjall'do'ləna', toshiizi gakte tozə Xacho Chioza' len Xiin'e'na'. <sup>25</sup> Na' dgan ba bcheb Jesu-crístona' checho: gone' yel' mban zejli kañi.

<sup>26</sup> Chzej' le' dga, daa chda beñ'ka' cheengakile' siye'gake' le'. <sup>27</sup> Na' ka nakle le', ba nzoa Jesu-crístona' Espíritu Sántona' loo yichjall'do'ləna', na' aga chyalljchile no wsedile le' daa nak dii li. La' kwin Espíritu Sántona' ba chsedile le' yog' diika', na' daa chli' chsedile le' nakan dii li, bi nakan de wxiye'. Na' toshiizi li gak Crístona' tozə, ka ba bli' bsele Espíritu Sántona' le'.

<sup>28</sup> Na' naa, xiindawaa, chiyal' gakcho Crístona' toz toshiizi kwenche kat' yiyede' yibaicho na' bi yiyii yido'icho lawe'na'. <sup>29</sup> Na' daa ba nezile nake' beñ' li beñ' shao, lekzka' chiyal' inezile yog' beñ'ka' chongake' daa nak shlichə nakgake' xiin Chios.

**3** Li gakbe'i ka chaki Xacho Chioza' cho' daa ne' nakcho xiin'e'. Na' dii li ba nakkzcho xiin'e'. Daan, beñ'ka' bi nonlilall'gake' Chioza' bi chle'shi'gakile' cho', la' bi nombia'gake'ne'. <sup>2</sup> Le' beñ' bish'dawaa na' le' beñ' zandawaa, ba nakcho xiin Chios. Na' la'kzi biñ' inezyen'icho nakan yiyakcho, nezicho kat' yila' Jesu-crístona' yiyakcho ka nake', la' ile'ichone' do ka nake'. <sup>3</sup> Na' nottez beena' ba none' lez dga, bich chone' txen dii mala' kwenche gake' ka nak Jesu-crístona', beena' bibi dii mal nda' nchene'.

<sup>4</sup> Na' beena' chxinj chlen chyishje' daa nllia Chioza' bia', la' kat' chxinj chlencho, xtilleenan' chyishjcho. <sup>5</sup> Le' ba nezile bid Jesu-crístona' yell-lioni kwenche bikwase' saaxya chechoka', na' nezteile bibi saaxya che' de. <sup>6</sup> Na' yog' beñ'ka' nakgake'ne' toz bi chdagake' lao saaxyana'. San yog' beñ'ka' chda lao saaxyana' biñ' gakbe'gakile' non nak Crístona', ni bi nombia'gake'ne'. <sup>7</sup> Le' xiindawaa, bi we'le latj no siye' le'. Beena' chon daa nak shli nake' beñ' li beñ' shao' ka Jesu-crístona' nake' beñ' li beñ' shao'. <sup>8</sup> Na' beena' chxinj chlen nake' xiin dii xiwaa, la' dii xiwaa bxinj b'lenan kana' zi' xe silte yell-lioni. Na' ni cheyi dgan bid Xiin Chioza', kwenche wlliyee yog'lo! daa chon dii xiwaa.

<sup>9</sup> Beena' ba nak xiin Chios bich chde' lao saaxyana', la' Chioza' ba bikobe' yel' mban che'na'. Na' daa ba nake' xiin Chioza', bich gak te' lao saaxyana'. <sup>10</sup> Na' nakbia' beñ'ka' dii licha nakgake' xiin Chios na' beñ'ka' nak xiin dii xiwaa. La' nottez beena' bi chon daa nak shli na' bi chakile' bish' ljwelle'na' bi nake' xiin Chios.

<sup>11</sup> Kana' wzolotele bzenagle xtill' Crístona' benile dga: chiyal' gaki bish' ljwellcho. <sup>12</sup> Bi chiyal' goncho ka ben dii Caínna', bene' dii xiwaa txen na' bete' beñ' bisheena'. Na' z'bighe betze'ne'? Bete'ne' daa bentezi ben Caínna' dii mala', na' beñ' bisheena' bene' daa chiyoolallii Chioza'.

<sup>13</sup> Le' beñ' bish'dawaa na' le' beñ' zandawaa, bi gallejile shi beñ'ka' bi chajle' che Chioza' chakzbangakile'

le'. <sup>14</sup> Daa chakicho bish' ljwellchona' nezicho bich chdacho lo neza' gana' kwiayi'cho, san ba de yel' mban checho zejli kañi. La' beena' bi chaki bish' ljwelle'na' ni zeje' lo neza' gana' kwiayee. <sup>15</sup> Nottez beñ' chakzbanile' bish' ljwelle'na', lebzin chonlene' beñ' wen xyana'. Na' nezile ni to wen xya bi de yel' mban che' zejli kañi. <sup>16</sup> Crístona' bliile' cho' ka nak yel' chakina' daa bzani yel' mban che'na' ni checho. Na' lekzka' cho' chiyal' izani yel' mban chechoni ni che bish' ljwellchona'. <sup>17</sup> Shi ga zoacho chaj chdecho mbalaz na' chwiacho bish' ljwellchona' chyallj chchinile' na' bi chiyesh'lallichone', z'nakran goncho inacho chakicho Chioza'? <sup>18</sup> Le' xiin-dawaa, bi chiyal' gaki ljwellcho de cho'a dill'z, san chiyal' wli'cho dii li chaki ljwellcho.

<sup>19</sup> Na' nezicho shi ba chaki ljwellcho, na' wli'n ba zejcho lo nez lina', na' nezicho Chioza' chibaile' ka choncho, <sup>20</sup> la'kzi yichjall'do'choni inan nakcho beñ' saaxya. La' Chioza' nakche' beñ' choo beñ' xench ka cho' na' nezile' yog'lo!te. <sup>21</sup> Le' beñ' bish'dawaa na' le' beñ' zandawaa, shi yichjall'do'choni chakbe'in bibi xtol'cho de, na' bi gall illebcho we'lwillichone', <sup>22</sup> na' gone' bittezə daa inabichone', la' chzenagcho daa nllie' bia' goncho na' choncho ka chazlallee. <sup>23</sup> Na' dgan nllie' bia' goncho: gonlilal'cho Xiin'e' Jesu-crístona', na' gaki ljwellcho ka ba bliie' bia' goncho. <sup>24</sup> Beñ'ka' chongake' ka nllia Chioza' bia' ba nakgake'ne' toz na' zoalene' legake'. Na' nezicho zoalene' cho' daa ba beñe' Espíritu che'na' zoe' loo yichjall'do'choki.

**4** Le' beñ' bish'dawaa na' le' beñ' zandawaa, bi shajle'le che nottez beñ' in'e': "Ba chne Chioza' nad'", san li wwiagaxə shi leile' Chioza' chne'ne' wa shi naze'n. La' yell-lioni ba chas chda beñ' zan beñ' chziye' nazgake' chyixje'gake' daa na Chioza'. <sup>2</sup> Dgan gonan ka gakbe'ile beena' chyixjee daa na Espíritu che Chioza': yog'lo! beñ'ka' cho'e dill' nan Jesu-crístona' nake' Chios na' bide' golje' goke' beñ' de beli chen ka cho', beenan' zoalen Espíritu che Chioza'ne'. <sup>3</sup> Na' nottez beena' ina Jesu-crístona' bi goke' beñ' de beli chen, bi zoalen Espíritu che Chioza'ne' na' chakzbanile' Crístona'. Na' ba nezile ba zoa wli'lao beena' gakzbanile' Crístona', na' naa ba chdakz beñ' chon ka' yell-lioni.

<sup>4</sup> Le' xiindawaa, ba nakle Chioza' tozə, na' bich chajle'le che beñ' wxiye'ka', la' beena' zoalene' le' napche' yel' wak xench aga ka dii xiwaa daa chda yell-lioni. <sup>5</sup> Beñ' wxiye'ka' nogake' diika' na beñ' yell-lioki, daan, zle che yell-lionizə choe'gake' dill', na' beñ'ka' bi nombia'gake' Chioza' chzenaggake' xtilleeka'. <sup>6</sup> San cho' ba nakcho Chioza' tozə, na' beñ'ka' nombia'gake' Chioza' chzenaggake' checho. Na' beñ'ka' bi nakgake' Chioza' tozə, bi chzenaggake' checho. Na' kan' chnezicho non cho'e dill' li daa chzajni Espíritu che Chioza'ne' na' non cho'e dill' wxiye' daa chzajni dii xiwaane'.

<sup>7</sup> Le' beñ' bish'dawaa na' le' beñ' zandawaa, chiyal' gaki ljwellcho, la' kan' chon Chioza' chakile' beñ'. Nottezə beñ' zoe' chaki ljwelle', nakbia' dii li nake' xiin Chios na' nombi'e Chioza'. <sup>8</sup> Na' beena' bi chaki bish' ljwelle'na' biñ' gombi'e Chiozan', la' Chioza' zoe' chakile' cho'. <sup>9</sup> Chioza' bli'e ka chakile' cho' daa bselee Xi-

inena' tlish' tyaj yell-lioni kwenche gonlilall'chone' na' gat' yel' mban checho dii bi te cheyin. <sup>10</sup> Kin nak yel' chaki daa nak dowalj: aga inacho cho'lan gokicho Chioza', san daa chaki Chioza' chon' bselee Xiine'na' wite' kwenche wdxije' saaxya chechoka'.

<sup>11</sup> Na' le' ben' bish'dawaa na' le' ben' zandawaa, shi kan' chaki Chioza' cho', ka'kzan chiyal' gaki ljwellcho. <sup>12</sup> Ni to ben' bin' ile'ile' Chioza', per shi chaki ljwellcho, Chioza' zoalene' cho' na' yel' chaki che'na' ba chonan llin lo yel' mban chechoki ka chiyali. <sup>13</sup> Nezicho zoalene' cho' na' le' zoalene' cho' daa ba nzoe' Espiritu che'na' loo yichjallal'dochoki. <sup>14</sup> Na' neto' ble'into' Xiin Chioza' na' choe'nto' dill' nan Xacho Chioza' bselee Xiine'na' kwenche yisle' ben' yell-lioni na' bi kwiayi'gake'. <sup>15</sup> Notteza ben' chajli'e na' cho'e dill' ne' Jesúza' nake' Xiin Chioza', Chioza' zoalene'ne' na' le' zoalene' Chioza'.

<sup>16</sup> Cho' ba nezicho na' ba chajle'cho chaki Chioza' cho'. Chioza' zoe' chakile' cho', na' shi zoacho chakichone' na' chaki ljwellcho, zoalene' Chioza' na' le' zoalene' cho'. <sup>17</sup> Na' shi ba chaki ljwellcho, chli'cho yel' chaki che Chioza' ba chonan llin lo yel' mban chechoki ka chiyali, na' bi illebcho llana' yizi'e cho' kwent, la' ka wda Jesucristona' ka'kzan chdacho chakicho ben' yell-lioni. <sup>18</sup> Gana' zoa yel' chaki che Chioza' bibi yel' chilleb de. Na' shi dii li napcho yel' chakina' aga wlllebcho yel' zi'na' wsel' Chioza'. La' beena' chilleb, bin' gon xshin yel' chaki che Chioza' lo yel' mban che'na' ka chiyal'.

<sup>19</sup> Cho' chakicho Chioza', la' zigaate len' gokile' cho'. <sup>20</sup> Shi zoa ben' ne': "Chakid' Chioza'", per chakzbanile' bish' ljwelle'na', chziye'ze'n. ¿Nakran gone' gakile' Chioza', beena' bi chle'ile', len chle'itele bish' ljwelle'na' na' bi chakile'ne'? <sup>21</sup> Dgan nllia Jesucristona' bia' goncho: Beena' chakile' Chioza', lekzka' chiyal' gakile' bish' ljwelle'na'.

**5** Yog'lo' ben'ka' chajle'gake' Jesúza' nake' Crístona', beena' bsel' Chioza', legaken' ba nakgake' xiin Chios. Na' yog' ben'ka' chakgakile' Xacho Chioza' lekzka' chakgakile' ben'ka' nak xiine'. <sup>2</sup> Nezicho shi chakicho Chioza', choncho daa nllie' bia' goncho, lekzka' chakicho yog'lo' ben'ka' ba nak xiin Chios. <sup>3</sup> Shi choncho daa nllia Chioza' bia' goncho, ba chakichonen', shi naa. Na' diika' nllie' bia' goncho bi nakan zii sshab. <sup>4</sup> Na' yog' ben'ka' ba nakgake' xiin Chios chizogakile' bich chongake' dii mala' de yell-lioni. Na' daa chonlilall'cho Jesucristona', chizoicho bi choncho dii mala' de

yell-lioni. <sup>5</sup> Ben'ka' chajle' Jesúza' nake' Xiin Chios, legaken' chzogakile' bi chongake' dii mala' de yell-lioni.

<sup>6</sup> Ka bid Jesucristona' yell-lioni wchoe' nisa' na' blalj xchene'na' kana' betgake'ne'. Aga to wchoaze' nisan', san bene' diiki chopte, wchoe' nisa' na' blalj xchene'na'. Na' Espiritu che Chioza' choe' dill' ka daa gokə, la' len' zeelo cho'e dill' daa nak dii li. <sup>7</sup> Na' shon diika' choe'n dill' che Jesucristona': <sup>8</sup> Daa bidsoalen Espiritu che Chioza' le', na' daa wchoe' nisa', na' daa blalj xchene'na'. Na' toz ka choe'gakan dill'. <sup>9</sup> Chajle'cho dillaa choe' ben', per zak'chi dillaa daa choe' Chioza', na' len' cho'e dill' che Xiine'na'. <sup>10</sup> Beena' chajle' che Xiin Chioza', nezile xtil' Xacho Chioza' daa bi'e che Xiine'na' nakan dill' li. Na' beena' bi chajle' che Chioza' ba chone' Chioza' ka to ben' wxiye' daa bi chajli'e che dillaa bi'e che Xiine'na'. <sup>11</sup> Na' dillaa bi'e nan: ba bene' cho' yel' mban zejli kan'i, na' bene'n daa nonlilall'cho Xiine'na'. <sup>12</sup> Beena' nake' Xiin Chioza' tozə, de yel' mban che' zejli kan'i, na' beena' bi nake' Xiin Chioza' tozə, bi gat' yel' mban che' zejli kan'i.

<sup>13</sup> Chzej' le' dill'ki, ka le' nonlilall'le Xiin Chioza', kwenche inezile ba de yel' mban chele zejli kan'i.

<sup>14</sup> Nxenlall'cho wzenag Chioza' checho kat' bin inabichone' shi nakan daa cheenile' gəkə. <sup>15</sup> Na' daa nezicho chzenague' checho bin chnabichone', lekzka' nezicho gone' daa chnabichone'.

<sup>16</sup> Na' shi chle'icho to bish' ljwellcho chone' dii mala' daa bi nak dii kwiayi'lene', chiyal' inabicho Chioza' gaklene'ne', na' Chioza' gone' ka yiyakshao' yichjallal'do'ena'. Kan' goncho shi chone' dii mala' daa bi kwiayi'lene'. De dii mala' daa chon ben' daa wlliyai'n le', na' bi nia' inabile Chioza' gaklene' beena' chon daa nak ka'. <sup>17</sup> Yog' dii mala' nakan saaxya, per de saaxyana' daa bi wlliyai'n cho'.

<sup>18</sup> Nezicho beena' ba biyak xiin Chioza' bich zoe' chone' dii mala', la' Jesucristona', Xiin Chioza', chap chwie'ne' kwenche dii xiwaa bich gak gox' wñizan le'.

<sup>19</sup> Nezicho nakcho lall' na' Chioza', na' yog' ben'ka' bi chzenag che Chioza' nakgake' lall' na' dii xiwaa.

<sup>20</sup> Na' lekzka' nezicho ba bid Xiin Chioza' na' bidzajniile' cho' kwenche nombia'cho beena' nak dowalj Chios. Na' ba nakcho lall' nee daa nonlilall'cho Jesucristona'. La' Jesucristona' nake' dowalj Chios, na' chone' yel' mban checho zejli kan'i. <sup>21</sup> Le' xiindawaa, mara gonlilall'le chioska' chon benecha'.

## 2 Juan

**1** Nad' ngoo lall' na' bish' l'jwellchoki nonl'jall' Crístona' chzej' li', noolə ba wlej Chioza' gako' lall' nee len xiino'ka'. † Na' le chakid' le', na' aga toz nad' chakid' le' san len yog' beŋ'ka' ba nombia' daa nak dii jin. <sup>2</sup> Le chakid' le' daa ba nombia'cho daa nak dii li daa yoo loo yichjlall'do'choka' ŋaa, na' soalenan cho' toshiizi.

<sup>3</sup> Chioza', beena' nak Xacho, len Xiine' Jesucrístona', gongake' ka gak wen checho, na' yiyesh'lall'gakile' cho', na' gongake' ka soacho mbalaz kwenche zejch gombia'cho daa nak dii li na' gaki l'jwellcho.

<sup>4</sup> Dii xen biba bizakid' ka wnezid' bal' xiino'ka' †† chdagake' lo nez li che Chioza', kon ka na Xachona' goncho.

<sup>5</sup> Na' ŋaa, nia' le' chiya!' gaki l'jwellcho ganga. Dga nia' le' aga nakan dii zi' benicho, san dezd nechte wnezicho dga. <sup>6</sup> Dgan ye!' chakina': goncho daa non Chioza' mandad. Na' dgan cheenile' goncho: soacho gaki-chone' na' lekzka' gaki l'jwellcho kon ka ba benicho dezd nech.

---

† Noolə ba wlej Chioza' gako' lall' nee len xiino'ka': beŋ'ka' nsed nagake' daa na Juanna' ka' zej in beŋ'ka' chdop chillag choe'la'ogake' Crístona' gana' bselee karta'. †† Bal' xiino'ka': beŋ'ka' nsed nagake' zej in beŋ'ka' chdop chillag choe'la'ogake' Crístona' gana' bselee karta'.

<sup>7</sup> Beŋ' zan beŋ' wxiye'ka' ba chda yell-lioni, na' bi chajle'gake' nan ba bid Jesucrístona' yell-lioni goke' beŋ' de beli chen. Beŋ'ka' bi chajle', legaken' beŋ' wxiye'ka', beŋ'ka' chakzbangakile' Crístona'. <sup>8</sup> Wsak'gale kwenche bi gakdadz llinna' ba benle, san yizi'le banez do ka nak daa chido!'le.

<sup>9</sup> Nottezə beena' yilaa nez li che Chioza' na' bich zejlene' daa bli' bsemi Crístona', bi zoalen Chioza'ne'. Na' beena' zejlen daa bli' bsemi Crístona', zoalen Xacho Chioza'ne' na' lekzka' Xiine'na'. <sup>10</sup> Shi no za' gana' zoale zidyelene' le' dill' daa bi chidilin daa bli' bsemi Crístona', bi wleblene' loo yoo lill-lena', ni bi wwaplene' chiox. <sup>11</sup> La' beena' chlebe'ne', chone' txen dii mala' chone'.

<sup>12</sup> Dii zan dii cheenid' inia' le', per bi chaklallaa gona'n yishzə. San chbez' gat' latj yidkz' gana' zoale kwenche ile'i l'jwellcho na' we'cho dill', na' yiyoll yido soacho mbalaz.

<sup>13</sup> Beŋ'ka' nak xiin beŋ' bilo'na', ‡ beena' wlej Chioza' gake' lall' nee, chwapgake' le' chiox.

---

‡ Xiin beŋ' bilo'na': Lekzka' beŋ'ka' nsed nagake' zej in beŋ'ka' chdop chillag choe'la'ogake' Crístona' gana' zoa Juanna'.

## 3 Juan

<sup>1</sup> Nad' ngoo lall' na' bish' l'jwellchoki nonl'ilall' Crístona', chzej' li', Gayo, nako' beṅ' chakid' do yichj do lallaa.

<sup>2</sup> Beṅ' bish'dawaa, chṅabid' Chioza' kon ka mbalaz nak yichjlall'do'na' lawe'na', ka'kz gak wen ḅho' lao yog'loṽte na' so' shi'a shao'. <sup>3</sup> Le biba bizakid' ka bid baṽ beṅ' bish'choka' na' wṅagake' zoaḅheḅho' lo nez ṽi ḅhe Chioza'. <sup>4</sup> Bich bi de dii chonan ka yiba yizakchid' ka daa iṅezid' nan beṅ'ka' nak ka xiṅṅ' zejgake' lo nez ṽi ḅhe Chioza'.

<sup>5</sup> Beṅ' bish'dawaa, ṽe wen chono' daa chakleno' bish' l'jwellchoka' chon xshin Crístona', ṽa'kzi nakgake' beṅ' zit' beṅ' bi nombi'o'. <sup>6</sup> Lao beṅ'ki lle' ni nonl'ilall'lenchogake' Crístona' ba be'gake' xtilloo daa ṽe chakilo' ṽegake'. Ben goklen, be'gake' daa chyallj chḅhingakile' kon ka chaklall' Chioza' goncho, kwenḅhe koochgake' nez. <sup>7</sup> ṽa' ṽegake' ba wloogake' nez kwenḅhe gongake' xshin Jesucrístona', na' bibi beḅ'gake' ḅhe beṅ'ka' bi nonl'ilall'gake'ne'. <sup>8</sup> Daan, chiyaṽ' we'cho daa chyallj chḅhingakile' kwenḅhe gakenchogake' we'gake' dill' ṽi ḅhe Chioza'.

<sup>9</sup> Ba bzej' le', le' chdop chllagle choe'la'ole Crístona', per Diótrefeza' bi chzenague' daa nia' le' daa cheenile' toze' iṅabi'e. <sup>10</sup> Na' daan shi ba gokan yid' gana' zoale na' wsheshlenee, ṽa' chde' biz chon chne' ḅha'. Na' leyi bi chlebe' bish' l'jwellchoka' chla' gana' lle'le. Na' beṅ'ka' cheeni wleb ṽegake', chsej chllone', na' chibeje' ṽegake' bich cho'e latj idop illaglengake' le' txen.

<sup>11</sup> Li' bish'dawaa, bi leno' gono' dii mala', san ben daa nak wen. Beena' chon daa nak wen nake' Chioza' txen, san beena' chon dii mala' biṅ' gombi'e Chiozan'.

<sup>12</sup> Yog'zə beṅ' choe' xtill' Demétriona' daa chone' wen, na' nakbia'cha chzenague' dill' ṽi ḅhe Chioza'. Na' ṽekzka' neto' choe'nto' dill' ka wen chone', na' ṅezkzilo' dill' ṽin choe'nto'.

<sup>13</sup> Na' dii zan dii cheenid' iṅia' li', per bi cheenid' gona'n yishzə, <sup>14</sup> ṽa' chbez' yob gat' latj yidkz' gana' zo' kwenḅhe ile'i l'jwellcho na' we'cho dill'.

<sup>15</sup> Chioza' gone' ka soashgo' mbalaz. Beṅ'ki nllagui-cho chwapgake' li' chiox. Bwapgach chiox to to beṅ'ka' nllaguicho gana' zo'.

# Judas

<sup>1</sup> Nad' Judas, nak' wen llin che Jesucristona' na' lekzka' nak' ben' bish' Jacóbona'. Chzej' le', ka le' chaki Xacho Chioza', le' ba gox wñabe', na' chap chwia Jesucristona' le'. <sup>2</sup> Chioza' yiyesh'lall'shgaile' le', na' gonshgue' ka soachle mbalaz na' gone' ka gakbe'chile' ka chakile' le'.

<sup>3</sup> Le' ben' bish'dawaa na' le' ben' zandawaa, le ba goklall'chga' wzej' le' na' we'len' le' dill' ka nak daa ba ben Chioza' bisle' cho'. Per chonchan byen wzej' le' kwenche gonle ka dii le shajle'le kwasloj dill' li che Chioza' daa bkwaanlene' cho' che toshiizi, ka cho' nakcho lall' nee. <sup>4</sup> La' ladjlena' do ngash'zə ba chda ba ben', na' legaken', kani'teyi ba nchogbia' chegake' kwiayi'gake' daa nakgake' ben' mal. Na' nagake' daa chiyesh'lalli Chioza' cho' wak goncho kon daa nan checho. Na' chzoagake' ka'lə Xancho Jesucristona', beena' zeelo chñabia' cho'.

<sup>5</sup> La'kzi le' ba ñezilen, cheenid' yisaa lall'le ka biyoll bibej Xancho Chioza' ben' Israelka' Egíptona', bliiayee ben'ka' bi wyajle' che'. <sup>6</sup> Na' lekzka' bene' che anjlka', ben'ka' wlej yichjgake' yel' wñabia' che'ka' daa bene' lall' nagake', na' bchejgake' latj gana' lle'gake'. Chioza' ntakw ncheje' legake' zejli kani' gana' shgasj shchoj, na' nan' nkweze' legake' axt kat' illin lla choo lla xenna' wchogloe' che yog'loj ben'. <sup>7</sup> Lekzka' ben'ka' wle' yell Sodómana' na' yell Gomórrana', na' yellka' nllaggakan, bengake' daa wnaz beli chen che'ka', na' wñelen ljwell-gake', na' axt ben' byoka' biyat'len ljwellgake' na' bengake' dii zban ka daa bi chiyal' gonlencho beli chen chechona'. Na' Chioza' bselee yi'na' bzey bten legake'. Na' daa bene' chegake' ka', chsi'nile' yog'loj ben' nan de yel' zak'zi' zejli kani' che ben'ka' bi chon wen.

<sup>8</sup> Na' kan' chon ben' wxiye'ka' chda ladjlena', naz-gake' chle'do'gakile', na' choe'gake' cho'a xbayi beli chen che'ka', na' bi cheengakile' no inabia' legake' na' bi nallgakile' chnegake' che anjlka'. <sup>9</sup> Kana' anjla' le Miguel, beena' nak ben' choo ben' xen ladj anjlka', gokdil-lenile' dii xiwaa kwerp che dii Moiséza', bi biyaxjile' chishje' bia' blag' che dii xiwaa, san golle'n: "Chioza', beena' nak Xan', wsheshlene' li'." <sup>10</sup> San ben' wxiye'ka', chnegake' che dii bi chajni'gakile'. Na' chontezgake' diika' na' beli chen che'ka', ka chon bayix' ba bnteyi. Na' diika' chongake', leyen'gakannan' chlliai'n legake'.

<sup>11</sup> Nyesh'laz gak che ben'ki!, daa chongake' ka ben dii Caínna', na' daa chongake' dii mala' ni che yel' wze-lall' che'ka', ka ben dii Balaama'. Na' daa nakgake' widenag ka dii Coréna', kwiayi'gake'. <sup>12</sup> Ben'ki nakgake' ka dii bi nxe bi nzak' lengake' ladjlena' kat' chonle lni-

na' choe'la'o ljwell-le, na' lengake' le' cheej chaogake' ni bi chiyi chido'gakile'. Na' nakgake' ka to ben' chap bayix' na' bi zie' wñeyi chegakb, san legake' chap chwia kwingake'. Na' nakgake' ka bejka' ze xan yabana' diika' bibi nis yollə na' choa' be'na' legakan. Na' nakgake' ka yag zix dii bi chbia kat' chllin lla kwian. Latjin dii nan kwian, chilleelan chlall'te do loyin na' chbillan. Na' ben'ka' chon ka' axt chop shiilə ba mbi-ayi'gake'. <sup>13</sup> Na' nakgake' ka bli che nisdo'na' daa chas chat', na' yel' zto'ka' chongake' nakgakan ka bllin bes-ja' daa chchoon bli che nisdo'na'. Na' lekzka' nakgake' ka beljka' diika' chlaa xñezinka'. Na' daa chongake' ka' ba nchoglo chegake' soaga

ke' gana' zeelo nak shgasj shchoj zejli kani'.

<sup>14</sup> Beena' wle Enoc, goke' ben' de galli lo dia che Adánna'. Wdixji'e daa goll Chioza' che ben'ki chon dii mala', wne': "Li wwiakachi, za' Xanchona' nchi'e ben' zan wal inleeb anjl che'ka' <sup>15</sup> kwenche wchogloe' che yog'loj ben', na' wsak'zi'e ben' malka' ni che yog' dii malka' bengake' yel' ben' mal che'ka', na' ni che yog'loj daa wchell wnegake' che'." <sup>16</sup> Ben'ki bibikzə chazlall'gake', na' lillinzi chwia chyigake' che ben', na' toshiizi choe'gake' cho'a xbayi beli chen che'ka'. Na' chshalj chshon che kwingake', na' choe'la'o choe' dill'gake' ben' kwenchezə gongake' ben' gan.

<sup>17</sup> Na' le' ben' bish'dawaa na' le' ben' zandawaa, li lljadini dill'ka' be' postlka', ben'ka' ben Xancho Jesucristona' lall' na'gake' we'gake' cho'a xtilleena'. <sup>18</sup> Wnagake' le', "Kat' ba zoa te che yell-lioni, yid ben' wtijtgak-ile' che cho'a xtill' Chioza' daa chajle'cho, na' gongake' kon daa nazan chegake'." <sup>19</sup> Legaken' chongake' cho-plə ben'ka' nonlilall' Chioza', na' chongake' daa na' beli chen che'ka' na' bi yoo Espíritu che Chioza' loo yichjlall'do'eka'.

<sup>20</sup> Na' le' ben' bish'dawaa na' le' ben' zandawaa, li soachech gonlilall'chle Chioza', na' li inabi Espíritu Sán-tona' gaklene' le' we'llwill-le Chioza'. <sup>21</sup> Li gon ka cheeni Chioza', beena' le chaki le', na' li gon lez llana' gon Xancho Jesucristona' cho' yel' mban zejli kani'na' daa chiyesh'lallile' cho'.

<sup>22</sup> Li yiyesh'lallii ben'ka' chakchopi. <sup>23</sup> Na' zi bale', li yislagake' lawi dii mala' kwenche bi lljayaake' lo yi' gabila'. Na' li yiyeshlallii zi ba ben' chon dii malka', per li gatzbani saaxya che'ka' na' li wsak' ki gonle ka chongake'.

<sup>24</sup> Shajla'oshga Chioza', beena' nap yel' wak gap wwie' le' kwenche bi ibixle lao dii mala', na' gone' ka lljazele lawe'na' gana' yoo balaan xen che'na' na' yiba yizakile daa bibi xtoj'le de. <sup>25</sup> La' zeelo len' nake' Chios,

na' bisle' cho' daa bselee Xancho Jesucristona', na' chi-  
dolee koochone' balaan na' we'cho xtillee nake' beṅ'  
choo beṅ' xen, beṅ' liizelozi chṅabia', na' beṅ' yeḷ' wak  
choo yeḷ' wak xen, ṅaa na' zejli kaṅi. Kan' nakan.

# Apocalipsis

**1** Dgan blii Chioza' Jesucristona' kwenche bliile' ben'ka' nonlilall' le' daa ba zoa gaoshosh gak. Na' Jesucristona' bselee anjl che'na' kwenche bidzajniile' nad' Juan, nak' wen llin che'. <sup>2</sup> Na' cho'a dill' che yog'lo' daa ble'id', na' nezid' nakan dowalj daa wna Chioza' na' daa bli'yi Jesucristona' nad'.

<sup>3</sup> Chakomba beena' chlab dill'ki, diiki na Chioza' zi' gak, na' chakomba ben'ka' chzenaggake' na' zegake' wneyi cheyin, la' ba zoa gaoshosh gaggakan.

**Juanna' chwape' chiox ben'ka' nonlilall' Crístona' gana' mbani Ásiana'**

<sup>4</sup> Nad' Juan chwap' le' chiox, ka le' chdop chllagle choe'la'ole Jesucristona', le' lle'le yellka' gall gana' mbani Ásiana'. Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, na' espírituka' gall lle' gana' zoe' chnabi'e, gaklenshgake' le' na' wzoagake' le' mbalaz. <sup>5</sup> Na' lekzka' Jesucristona' gaklenshgue' le' na' wzoe' le' mbalaz. Len' beena' choe' dill' li che Chioza', na' len' ben' necha' biban ladj ben' wetka' na' bich bi yel' wit ile'ile', na' nape' yel' wñabia' lao yog'lo' ben' wñabia'ka' lle' yell-lioni. Len' chakile' cho' na' ba bisle' cho' lao saaxya chechoka' daa blalj xchene'na', <sup>6</sup> na' ba bene' cho' yel' wñabia'na', na' ba none' cho' bxo'z che Xe' Chioza'. Len' chido'lee sho'e balaan na' inabi'e zejli kan'i. Kan' nakan.

<sup>7</sup> Crístona' yiyede' ladj bejka' ze xan yabana', na' yog'lo' ben' ile'gakile'ne', lente ben'ka' betgake'ne'. Na' yog'lo' ben' lle' yell-lioni kwellyesh'gake' ka ile'gakile'ne'. Kan' nakan.

<sup>8</sup> "Nadaan zaklebid' letr necha' le A † daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z", †† kan' na Xancho Chioza', beena' zoa ka wxw wzil yell-lioni, na' zoakze' naa, na' ni zoakze' kat' te cheyin, beena' nak ben' yel' wak choo yel' wak xen.

**Juanna' ble'do'ile' Jesucristona'**

<sup>9</sup> Nad' Juan, nak' le' txen, na' chñabia' Chioza' cho' daa nakcho Crístona' txen na' la'kzi dii zan dii chen chle'icho daa chonlilall'chone', lekzen' chaklene' cho' chizo chizakicho diika' chen chle'icho. Na' daa chyixji'a xtill' Chioza' na' xtill' Jesucristona' bengake' nad' pres na' bsel'gake' nad' yell-liodo'ni le Patmos, dga lliia lo nido'ni. <sup>10</sup> Na' gok to lla, llana' nak lla che Xanchona', Espiritu che Chioza' bene' ka benid' wne to ben' zillj inleb koll'la', ka ga chbell to trompet. <sup>11</sup> Na' wne' nad':

† Letr necha' le A: de dill' griegona' letri len alfa. ††

—Bzej dga chle'ilo' to lee yish, na' bse'laan lao ben'ka' chdop chllag choe'la'ogake' Jesucristona' yellka' gall gana' mbani Ásiana': Éfesona', Esmírnana', Pérga-mona', Tiatírana', Sárdiza', Filadélfiana', na' Laodiceana'.

<sup>12</sup> Na' biyechj' kwenche ile'id' non chne nad', na' ka biyechj' ble'id' gall candeler de or chal'gakan. <sup>13</sup> Na' ladj candelerka' gall ble'id' to ben' nake' ka cho' benech, na' nakwe' to xe' dii ton dii ze koll' ni'ena'te, na' ngoo li'ena' to bad' de or blinten ka de cho'al-cho'ena'. <sup>14</sup> Yish' yichje'na' nakan xtil ka xa xil' wa ka beyaa, na' jalawe'na' chzeeni'n ka bel'yi'. <sup>15</sup> Na' ni'ena' chep yesan ka daa ne' bronce dii ba beshawee lo yi'na'. Na' shi'ena' nenan sshag wal ka nen to yao xen daa chxop cho'a bnanja'. <sup>16</sup> Nee de shljina' noxee gall belj, na' cho'ena' chchejan to spad dii nlatit chop laa. Na' cho'alawe'na' chna'titan ka chna'tit wbillla'.

<sup>17</sup> Ka ble'idee, na' bgoonaa ka ben' wet xni'ena'. Na' bikwise' nad' kon nee de shljina', na' wne' nad':

—Bi illebo'. Nadaan zoa' kana' wxw wzil yell-lioni na' nad'kzan ni zoa' kat' te cheyin. <sup>18</sup> Na' nad'kzan ben' yaa ben' banna'. Betgake' nad', per biban' na' mban' zejli kan'i. Na' nap' yel' wak yisla' ben' lo yel' wita'. <sup>19</sup> Bzej dga ba ble'ilo', dga chak naa, na' daa zi' gak. <sup>20</sup> Kin zeji che beljka' gall daa noxaa lo na' de shljini na' che candelerka' gall diika' nak de or: beljka' gall zaklebin gall ben'ka' ‡ chap chwiagake' ben'ka' chdop chllag choe'la'ogake' nad' yellka' gall. Na' candelerka' gall zaklebin ben'ka' gall kwen.

**Daa golle' ben'ka' lle' yell Éfesona'**

**2** 'Bzej dga inia' li' na' bse'laan lao beena' chap chwia ben'ka' chdop chllag choe'la'ogake' nad' yell Éfesona': "Ki na beena' nox' beljka' gall lo nee de shljina', na' zie' ladj candelerka' gall, diika' nak de or: <sup>2</sup> Nad' nez nle'id' yog' dii wenna' chonle, ka chonchgale xshin'na' na' ka zoachechle. Na' nezid' bi chleble ben'ka' bi nsa' cheyin wen, na' ba biyiljni'ale ka chon ben'ka' nazə nakgake' postl' cha' na' ba gokbe'ile ben' wxiye'zgakan. <sup>3</sup> Dii xen ba benxenlall'le lao diika' ba ben ble'ile ni cha', na' bichga bshe'lall'le. <sup>4</sup> Per de to dii bi chazlallid' chele: bich nape' yel' chakina' ka daa wdaple dii nechte. <sup>5</sup> Li yiyakbe'i bich chonle dii wenna' benle kana'. Na' li yiyaj yileni na' li yiyon sto shii ka benle dii nechte kana' wzolole benlilall'le nad'. Shi bi yiyaj yilenile, na' yid' yikaa candeler chelena' gana'

‡ Ben'ka': Dill' griegona' nan angeloi. Zoa kat' dillii zejlin anjl, na' zoa kat' zejlin to ben' nsel' ben' lljwee rson wa lljtixji'e to dii lljtixji'e.

zoale. <sup>6</sup> De to dii ni chazlallid' chele: daa chakzbanile daa chon nicolaítaka', diika' lekzka' chakzbanid'.

<sup>7</sup> Beena' cheni, chiya! wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', wi'a latj gawe' daa lliia lo yaga' daa nsa' yel' mbanna', daa zoa latj che Chioza' gana' nak mbal-az inlleb."

#### Daa golle' beñ'ka' lle' yell Esmírmana'

<sup>8</sup> Na' lekzka' bzej dga inia' li' na' bsejaan lao beena' chap chwia beñ'ka' chdop chllag choe'la'ogake' nad' yell Esmírmana': "Ki na beena' zoa ka wxe wzil yell-lioni, na' ni zoakze' kat' te cheyin, beena' wit na' bibane':

<sup>9</sup> Nad' nezid' yel' zak'zi'ka' chen chle'ile na' yel' yeshaa daa chak chele. Per de to dii zak'chi chele aga ka yel' wni'ana'. Na' nezid' dii mala' daa chbell chne beñ' chele, beñ'ka' nazgake' nakgake' beñ' Israel, la'kzi dii licha lao Chioza' aga nakgake' beñ' Israel, san nakgake' xonj beñ' chzenag che dii xiwaa. <sup>10</sup> Bi gall ille-ble yel' zak'zi'ka' yen ile'ile. Dii xiwaa gonan ka koogake' bal-le lillyana' kwenche gonan ka bich gonlilall'le nad', na' tele lo yel' zak'zi'na' shi lla. Li soachech gonlilall'le nad' axt ni ka guetle, na' nad' gon' yel' mban chele zejli kanj. <sup>11</sup> Beena' cheni, chiya! wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad' bi ile'ile' yel' wit wchopina'."

#### Daa golle' beñ'ka' lle' yell Pérgamona'

<sup>12</sup> Na' lekzka' bzej dga inia' li' na' bsejaan lao beena' chap chwia beñ'ka' chdop chllag choe'la'ogake' nad' yell Pérgamona': "Ki na beena' nox' spada' daa nlatit chop laate: <sup>13</sup> Nad' nezid' zoale gana' chnabia' Satanáza', per ni zoachechle nonlilall'le nad'. Na' bi wlej yichjle daa nonlilall'le nad', ni kana' betgake' Antípaza', beena' bi bsan wi'e cho'a xtillaana', beena' betgake' lall-lena' gana' zoa Satanáza'. <sup>14</sup> Per de to chop dii bi chazlallid' chele: ni lenzə ladjlena' bal beñ' bi cheengakile' yilaala'ogake' daa bli' bsemi dii Balaama' dii Balaca' kwenche wlooyee beñ' Israelka' bxinj blengake', na' wdaogake' yel' waoka' daa bliagake' lao lwaa Isak' diika' be'la'o beñ'ka', na' wnelen ljwellgake'. <sup>15</sup> Lekzka' ladjlena' ni len bal beñ' bi cheengakile' yilaala'ogake' daa chli' chsemi nicolaítaka'. <sup>16</sup> Na' daan, chiya! yiyaj yilenile cheyi diika' chak ladjlena'. Na' shi bi yiyaj yilenile, lii za'tia' yidtil-len' le' kon spada' daa chchej cho'ani. <sup>17</sup> Beena' cheni, chiya! wzenagyenee daa che' Espíritu che Chioza' beñ'ka' gall kwente chdop chllag choe'la'ogake' nad'. Na' beena' so saki soacheche' gonlilallee nad', na' wwawee daa le maná daa ngash'. Na' lekzka' wi'a to yaj llyish che' gana' da' to le kobe' daa kochno nombia', san toz beena' ikaan gombi'en."

#### Daa golle' beñ'ka' lle' yell Tiatira

<sup>18</sup> Na' lekzka' bzej dga inia' li' na' bsejaan lao beena' chap chwia beñ'ka' chdop chllag choe'la'ogake' nad' yell Tiatirana': "Ki na Xiiñ Chioza', beena' chzeeni' jalawe'na' ka bel yi', na' ni'ena' nakan ka de bronze dii chnachga: <sup>19</sup> Nad' nez nle'id' yog' dii wenna' chonle. Nezid' nable yel' chaki na' nonlilall'le nad', na' chaklenle beñ', na' chzo chzakile bitteza dii chen chle'ile. Na' nezid' ba chonchle dii wenna' naa aga ka benle kana' zi' beñlilall'le nad'. <sup>20</sup> Per de to dii bi chazlallid' chele: choe'zle latj zoa noola' le Jezabel ladjlena', beena' chonz ka beñ' chyixjee daa che' Chioza' le'. Na' daa chli' chsedile' chziye'lene'n beñ'ka' chonlilall' nad', na' chone' ka chnelengake' beñ' na' chaogake' yel' wawa' daa chllia beñ' lao lwaa Isak' diika' choe'la'ogake'. <sup>21</sup> Nad' ba bi'a latj che' kwenche yiyaj yilenile' daa chne-lene' beñ', per bi cheenile' kwey yichje'n. <sup>22</sup> Na' ni cheyin wsak'zi'ane', na' lekzka' wsak'zi'chga' beñ'ka' chongake'ne' txen chxinj chlengake' shi bi yiyaj yilengakile' cheyi daa chonlengake'ne'. <sup>23</sup> Na' wit' beñ'ka' nak ka xiine' daa chongake'ne' txen. Na' yog' beñ'ka' chdop chllag choe'la'ogake' nad' to to yell inezgakile' nan nadaan nombi'a do ka nak yichjall'do' beñ', na' gonid' to tole kon ka nak daa chonle. <sup>24</sup> Na' ka le' lle'le Tiatirana' na' bi chonle txen diika' chli' chsemi noola' ni diika' nagake' chzajni Satanáza' legake' daa kochno nezi, bich bi dii yoblə inia' le' chiya! gonle. <sup>25</sup> Kon li se wneyi gontezi gonle daa nak wen axt kat'ch yiyed'. <sup>26</sup> Na' beena' so saki soacheche' gonlilallee nad' na' soe' gone' ka chazlallaa axt ni ka yiyed', na' wi'ane' yel' wñabia' kwenche inabi'e lao yog' yellka' lle' yell-lioni, <sup>27</sup> ka ben Xa'na', beñe' nad' yel' wñabia'na'. Na' inabi'e legake', na' bi si'xene' che nottez beñ' bi chzenag che', na' wlliyee legake' ka beñ' chxoxj chtin to yes' yo. <sup>28</sup> Na' lekzka' wi'ane' belj xsila'. <sup>29</sup> Beena' cheni, chiya! wzenagyenee daa che' Espíritu che Chioza' beñ'ka' gall kwente chdop chllag choe'la'o nad'."

#### Daa golle' beñ'ka' lle' yell Sárdiza'

**3** 'Bzej dga inia' li' na' bsejaan lao beena' chap chwia beñ'ka' chdop chllag choe'la'ogake' nad' yell Sárdiza': "Ki na beena' ngoo lall' nee gall espírituka' nak che Chioza' na' noxee beljka' gall: Nad' nez nle'id' yog' daa chonle. Na' la'kzi zeyi chele le wen chonle, lawa'ni bibi zakii daa chonle. <sup>2</sup> Li yiyakbe'i, na' li yiyon ka dii le kwenche bi yiyoll yido kwey yichjle dii wenna' ni chonle. La' nez nle'id' daa chonle bi nakan kwasloj ka cheeni Chios cha'na'. <sup>3</sup> Li ljadini diika' ba bli' bsedgakile' le' na' li wzenag cheyin, na' li yiyaj yileni. Shi bi chonle ka dii le, tokonganə yidsak'zi'a le', ka chon to wban aga no chsi'nile' kat' chjlane'. <sup>4</sup> Na' la'kzi chonle ka', ni len bal beñ' ladjlena' yell Sárdiza' beñ' bi nda' nchen yichjall'do'ena' dii mala'. Na' chidol'gake' soalengake' nad' na' gakwgake' to lech' xtil. <sup>5</sup> Beena' so saki soacheche' gonlilallee nad', na' wi'ane' to lech' xtil gakwe'. Na' biga yisol' lie'na' lee libr cha'na' gana' nda'



le yog' beŋ'ka' napgake' ye! mban zejli kaŋi. Na' we'len' Xa'na' dill' len anjl che'ka', yepgakee nake' nad' txen. <sup>6</sup> Beena' cheni, chiya! wzenagyenee daa che' Espiritu che Chioza' beŋ'ka' gall kwente chdop chillag choe'la'ogake' nad'."

#### Daa golle' beŋ'ka' lle' yell Filadélfiana'

<sup>7</sup> Bzej dga inia' li' na' bseŋaan lao beena' chap chwia beŋ'ka' chdop chillag choe'la'ogake' nad' yell Filadélfiana': "Ki na beena' nak dowalj beŋ' li beŋ' shao', beena' nap ye! wŋabia' ka daa wdap dii Davina'. Daa chsalje', kono gak yisejan, na' daa chseje', kono gak yisaljan. <sup>8</sup> Nad' ŋez nle'id' yog' dii wenna' chonle. Na' ba bsalj' ka to puert chele na' kono gak wsej wllon sho'le. Na' la'kzi xonjchgale nak, chonle ka na cho'a xtillaana' na' toshiizi chcheble nakle nad' txen. <sup>9</sup> Ka nak beŋ'ka' chzenag che Satanáza' na' chziye'gake' nazgake' nakgake' beŋ' Israel, nad' gon' ka yidchek' xibe'ka' laolena' na' gakbe'gakile' nad' chakid' le'. <sup>10</sup> Daa ba benle banez wzoacheche benlilall'le nad', na' gapshii gapshawaa le' kat' illin lla yen ile'i yog'lo! beŋ' yell-lioni ye! zak'zi'ka' kwenche wli'lawin non chzenag cha'. <sup>11</sup> Ba zoa gaoshosh yiyed'. Li se wŋeyi gontezi gonle daa nak wen kwenche bi wnitle daa ba non' lkwez chele.

<sup>12</sup> Beena' so saki soacheche' gonlilallee nad', ka zoa pilarka' nox'gakan lill Chios cha'na', ka' soe' gana' zoa Chioza' na' yigaanlene'ne' zejli kaŋi. Na' wda' le Chios cha'na' le', na' le yell che Chios cha'na', yell Jerusalén-na' daa nak dii kob daa za' yaba che Chios cha'na', na' lekzka' wda' lia'na' le' daa nak dii kob. <sup>13</sup> Beena' cheni, chiya! wzenagyenee daa che' Espiritu che Chioza' beŋ'ka' gall kwente chdop chillag choe'la'ogake' nad'."

#### Daa golle' beŋ'ka' lle' yell Laodicéana'

<sup>14</sup> Bzej dga inia' li' na' bseŋaan lao beena' chap chwia beŋ'ka' chdop chillag choe'la'ogake' nad' yell Laodicéana': "Ki na beena' na gakshga yog' daa na Chioza', beena' toshiizi choe' dill' kon ka nak dill' li che Chioza', beena' chŋabia' lao yog'lo!te daa bxe bsil Chioza': <sup>15</sup> Nad' ŋez nle'id' yog' daa chonle, ŋezid' bi chonle ka chazlallaa na' ni bi chbej yichjle nad'. Wenchlan shel'ka' gonle tozan. <sup>16</sup> Na' daa ni ton bi chchoglall'le gonle, kwejiyichjchokl' le'. <sup>17</sup> Le' nazle nakle beŋ' wni'a, na' nale le wen chak chele na' bich bi de dii chyaljile. Na' bi chakbe'ile lao Chioza' nakle ka beŋ' bi chak wen cheyin, ka beŋ' yesh', ka beŋ' lcho!, ka beŋ' chda gal'yid gal'bel'. <sup>18</sup> Na' daan, nia' le' chiya! si'le lawa'na' or daa ba gokshao' lo yi'na', kwenche gakle dowalj beŋ' wni'a; na' si'le lawa'na' lech' xtila' gakwle kwenche bich si'le zto' tale gal'yid gal'bel'le; na' si'le' rmecha' kaale jalaoleka' kwenche ile'ile. <sup>19</sup> Nad' chsheshlen' yog' beŋ'ka' chakid', na' chsak'zi'a legake' kat' bi chongake' wen. Na' daan, li gon ka dii le, na' li yiyaj yileni. <sup>20</sup> Nad' chŋia' le' ka to beŋ' ze to cho'a yoo. Shi zoa beŋ' guenile' chŋia' na' wsalje', na' sho'a na' gaolenee txen. <sup>21</sup> Beena' so saki soacheche' gonlilallee nad', na' wi'a latj inibia'lene' nad', ka ben' nad', wzoachech' wzo

wzakid' daa bti! na' ba chŋabia'len' Xa'na'. <sup>22</sup> Beena' cheni, chiya! wzenagyenee daa che' Espiritu che Chioza' beŋ'ka' gall kwente chdop chillag choe'la'ogake' nad'."

#### Choe'la'ogake' Chioza' yabana'

**4** Ka biyoll bzej' diika' wne' nad', na' ble'do'id' nyalj to puert xan yabana'. Na' bizenid' bishbena' daa benid' dii nech daa nen ka ga chbell to trompet, na' wne' nad':

—Nilə wyep, na' wliid' li' diika' zi' za' gak.

<sup>2</sup> Na' ka wŋie' nad', Espiritu che Chioza' bene' ka ble'id' yabana' gana' lliia to beŋ' chŋabi'e. <sup>3</sup> Na' beena' lliia na', chey cheeni'chgue' ka yaj wan daa le jaspe na' daa le cornalina. Na' tcho'a tlawi gana' lliie' ze to betyaa na' chŋa'titan ka yaj wan daa le esmeralda. <sup>4</sup> Na' gana' lliie', ble'id' nechj zi tapichoa beŋ' lliagake' chŋabia'gake', na' zoagake' do xtil na' nzoa twej corona de or yichje'ka'. <sup>5</sup> Na' gana' lliia beŋ' necha' chep yes, na' chashj chtin, na' chak sshag inlleb. Na' lawe'na' ze gall yi' chal'ŋinan na' legakannan' espírituka' gall che Chioza'. <sup>6</sup> Lekzka' lao beena' lliia chŋabia' de to dii nak katekzə nisdə'na' na' nakan ka de vidr.

Na' gcho! gana' chi'e chŋabi'e lle' tap beŋ' de ye! mban cheyin, na' dii zan jalaogake' lliia, ka laoləgake' na' ka koll'ləgake'. <sup>7</sup> Beŋ' necha' nake' ka bell, na' beŋ' wchopina' nake' ka goon, na' beŋ' wyonina' nak cho'alawe'na' ka che benech, na' beŋ' wdapina' nake' ka bsia, ba chzo. <sup>8</sup> To to beŋ'ki zoa xop wej xilgake', na' zoa dii zan jalaogake' ka loolə na' ka koll'lə xile'ka'. Na' bi chsangake' ka wal' ka tella nagake':

Dowalj beŋ' li beŋ' shao', dowalj beŋ' li beŋ' shao',  
dowalj beŋ' li beŋ' shao', nak Xancho Chioza',  
beena' nap ye! wak choo ye! wak xen,  
beena' zoa ka wxe wzil yell-liona',  
na' lekzen' zoe' ŋaa, na' zoakze' zejli kaŋi.

<sup>9</sup> Na' beŋ'ka' tap chgoogake' balaan beena' lliia chŋabia', beena' mban zejli kaŋi. Na' choe'gake' xtillee nake' beŋ' zakii nllab na' choe'gake'ne' ye! choxken. Na' to to ka chongake' ka', <sup>10</sup> beŋ'ka' tapichoa chchek' xibe'ka' lao beena' mban zejli kaŋi na' choe'la'ogake'ne'. Na' chzal'gake' corona che'ka' lawe'na', nagake':

<sup>11</sup> Chios, li' nako' Xannto', na' chido!oo koonto' li' balaan na' we'nto' xtilloo nako' beŋ' zakii nllab, na' beŋ' ye! wak choo ye! wak xen.  
Lin' bxe bsilo' yog'lo!te dii de,  
na' daa goklalloo soagakan, bxe bsilgako'n.

#### Yisha' daa ndos' gall sey

**5** Na' beena' lliia chŋabia' noxee lo nee de shlina' to yish dii ndobə, na' chop laaten' nyoj. Na' gana' biyoll bidoban ndosa'n gall sey. <sup>2</sup> Na' ble'id' to anjl, beŋ' nap ye! wak xen, na' wŋie' zillj inlleb, chŋabe':

—ŋNotg zakii wxoxje' seyka' na' wselle' yisha'?

<sup>3</sup> Na' kono bllel yabana' ni lo yell-liona', ni xan yell-liona', beŋ' gak wzeshe'n na' wwie' bin da'n. <sup>4</sup> Na' le

wchellchga' daa kono bllel beṅ' zakii wzeshe' yisha' na' wwie' bin da'n. <sup>5</sup> Na'ch to beena' len beṅ'ka' tapichoa wne' nad':

—Bich kwello', la' beena' nsi'gake' Bell che Judá daa mbejlawe' lo dia che dii Judána', beena' nak xiiṅ dia che dii Davina', ba bene' gan dii mala' na' wak wxoxje' seyka' gall na' wzeshe' yisha'.

<sup>6</sup> Na'ch ble'idee zie' gchoḷ gana' lliá beena' chṅabia' na' gana' nechj beṅ'ka' tap na' beṅ'ka' tapichoa. Na' ble'idee ka to xil'do', ba betgake'. Na' lliá gall lozḅ na' di gall jalaob, diikan' nak espírituka' gall daa nak che Chioza' daa nselee doxen yell-lioni. <sup>7</sup> Na'ch beena' ble'id' ka xil'do' wbiguee lao beena' lliá chṅabia' na' wdoyoe' yisha' daa ndobə daa noxee lo nee de shli'ina'. <sup>8</sup> Na' kon ka wdoyoe' yisha' daa ndobə, beṅ'ka' tap na' beṅ'ka' tapichoa bḅhek' xibe'ka' lao beena' ble'id' nak ka xil'do'. To togake' nox'gake' twejə arpa, na' lekzka' nox'gake' barser de or yoogakan yala' daa chzeygake', na' llen yala' zaklebin xtill' beṅ'ka' nak lall' na' Chioza', dill'ka' choe'lengake'ne' kat' choe'lwilgake'ne'. <sup>9</sup> Na' belgake' to dii kob dii chgoon le' balaan, na' ki nan:

Lin' chidoḷoo goxoo yishi ndobə na' wxoxjo' seyka', daa betgake' li',

na' daa blalj xcheno'na' biya'o bizi'o  
beṅ' za' yog' dia, yog' yell na' yog' nación,  
na' beṅ' chṅe wde wdeli dill',  
kwenche nakgake' lo na' Chioza'.

<sup>10</sup> Na' ba nono' lall' na'gake' inabia'gake' lo yell-liona' na' gakgake' bḅox che Chios chechona'.

<sup>11</sup> Na'ch ble'id' anj zan, na' benid' shi'eka'. Nechjgake' gana' lliá beena' chṅabia' len beṅ'ka' tap na' beṅ'ka' tapichoa. Na' daa nakgake' beṅ' zan inlleb ni bi wbadid'gake'. <sup>12</sup> Na' wnagake' zillj nllleb:

Beena' nak ka xil'do', beena' betgake',  
chidoḷee we'nto' xtillee nape' yeḷ' wṅabia' xen,  
na' naki che' yog' loḷ yeḷ' wni'a dii de,  
nape' yeḷ' sin' xen na' yeḷ' wak choo yeḷ' wak xen,  
nake' beṅ' zakii nllleb,  
na' chidoḷee we'la'onto'ne' na' koonto'ne' balaan.

<sup>13</sup> Na' benid' wṅe yog' loḷ dii de yeḷ' mban cheyin na' yog' loḷ diika' bxe bsil Chioza' yabana' na' yell-lioni, na' xan yell-lioni, na' loo nisdona', nagakan:

Beena' lliá chṅabia' len beena' nak ka xil'do',  
chidoḷ'gake' we'la'ocho legake' na' koocho legake' bal-  
aan zejli kanj,

na' we'cho xtill'gake' nakgake' beṅ' zakii nllleb, na' nappgake' yeḷ' wak choo yeḷ' wak xen.

<sup>14</sup> Na' beṅ'ka' tap nechj le', nagake':

—jKan' nakan!

Na' beṅ'ka' tapichoa bḅhek' xibe'ka' be'la'ogake' le-  
gake'.

### Bxoxje' seyka'

**6** Na' ble'id' Beena' Zaklebi to Xil'do' bxoxje' sey necha' lawi diika' gall, na' benid' wṅe to beṅ'ka' tap lle' na', na' shi'ena' nenan ka ga chashj chtin. Na' wne' nad':

—Nilə da, na' bwia dga.

<sup>2</sup> Na' ble'id' to kabay llyish, na' beena' lliá koll'ba' noxee to xis wixit'. Na' bzoagake' to corona yichje'na', na' bcheje' lega beṅ' ben gan lo wdil na' zeje' sto shii ll-jene' gan.

<sup>3</sup> Na' ka bxoxj Beena' Zaklebi to Xil'do' sey de wchopina', benid' wna beṅ' wchopina', beena' len ladj beṅ'ka' tap:

—Nilə da, na' bwia dga.

<sup>4</sup> Na' ble'id' bchej sto kabay, ba xṅa. Na' beena' lliá koll'ba' gok loo nee gone' ka bich soalen ljwell beṅ' yell-lioni mbalaz na' wit ljwellgake'. Na' bi'ene' to spad xen.

<sup>5</sup> Na' ka bxoxj Beena' Zaklebi to Xil'do' sey de wyonina', benid' wna beṅ' wyonina' len ladj beṅ'ka' tap:

—Nilə da, na' bwia dga.

Na' bwia' na' ble'id' to kabay gasj. Na' beena' lliá koll'ba' noxee to xig'libr. <sup>6</sup> Na' benid' wṅe to beṅ' ladj beṅ'ka' tap, chi'e:

—Gono' ka sak' chop ya trígona' che shlla llin, na' xop ya cebádana' che shlla llin, na' bi wwal' wsilo' seta' ni vinona'.

<sup>7</sup> Na' ka bxoxj Beena' Zaklebi to Xil'do' sey de wdapina', benid' wna beṅ' wdapina':

—Nilə da, na' bwia dga.

<sup>8</sup> Na' bwia', na' ble'id' to kabay, ba te, na' beena' lliá koll'ba' lie' Yeḷ' Wit. Na' daa le Hades † zjanon le'. Na' gok lo nagake' witgake' to kwart beṅ'ka' lle' yell-lioni lo wdil, lo wbin, lo yillwe' na' lao ba zṅiaka'.

<sup>9</sup> Na' ka bxoxj Beena' Zaklebi to Xil'do' sey de gayi'na', ble'id' to dii nak ka gana' chzeygake' diika' chjwa'gake' lao Chioza', na' xṅi'ayinna' lle' beṅ'ka' betgake' ni che cho'a xtill' Chioza', na' daa bi bsangake' we'gake' xtilleena'. <sup>10</sup> Na' wṅegake' zillj inlleb, che'gake':

—Chios, li' nako' xannto'. Nako' dowalj beṅ' li beṅ' shao' na' nako' beṅ' chon yog' dii chḅhebo', zbat gono' yeḷ' joschis che beṅ'ka' lle' yell-liona' na' yizi'o wzon daa betgake' neto'?

<sup>11</sup> Na'ch bi'e twej xa xtilgake', na' golle' legake' kwez-gake' zi' xtit axt ki yizaa yibab beṅ'ka' nakgake' txen, beṅ'ka' zi' witgake' daa choe'gake' xtill' Chioza'.

<sup>12</sup> Na' ka bxoxj Beena' Zaklebi to Xil'do' sey de wx-opina', ble'id' gok to bedxo' xen wal. Na' wbillá' biyakan dii gasj ka lech' gasj daa chakw beṅ' kat' chet to bish' ljwelle'. Na' doxen beo'do'na' biyakan dii xṅa ka chen, <sup>13</sup> na' bllib beljdo'ka' lliá xan yabana', bxopgakan lo yell-liona' ka chxop yixwew yaa kat' chta be' wala' xyaguinna'. <sup>14</sup> Na' yabana' bidoblojan ka chidob to yish, na' yog' loḷ yaaka' na' yog' loḷ yell-liodo'ka' lliá lo nisdona' blla' xishna'inka'. <sup>15</sup> Na' beṅ'ka' chṅabia' lo yell-lioni, na' no beṅ' zakii, na' no beṅ' wni'a, na' no xan soldadka', na' no beṅ' mbejlawin, no beṅ' ndoo lla yeḷ' chone' xshin beṅ' na' no beṅ' chon xshinkze', jak-wash'gake' no loo blej, no ladj yajka' lle' lo yaaka'.

<sup>16</sup> Na' che'gake' yaa yaoka' na' yajka':

—Li idakwtega neto', na' li kwwash' neto' lao beena' lliá chṅabi'e na' lao yeḷ' zak'zi' daa chon Beena' Zaklebi

to Xil'do', <sup>17</sup> la' ba bllin lla wsak'zi'gake' beñ', na' aga no so saki yel' zak'zi'na'.

### Beñ'ka' nak to guiyoa tapiyona mil

**7** Ka biyoll ble'id' diiki, bizle'id' tap anjl zechagake' tap laate yell-lioni, chzag'gake' be'na' za' tap laate kwenche bibi be' se lo yell-lioni ni lo nisdona' na' ni lo yagka'. <sup>2</sup> Lekzka' ble'id' sto anjl zee gana' chla'lə wbillā', na' noxee sey che Chios yaa Chios banna'. Na' besyaa anjli zillj inleeb wnie' anjlka' tap, beñ'ka' gok lo na'gake' yel' waka' kwenche gak wlliyai'gake' diika' de lo yell-liona' na' loo nisdona', na' chi'e legake':

<sup>3</sup> —Bibi gonile yell-lioni, nisdona', ni yagdo'ka' shlak biñ' wda'cho seya' loxga beñ'ka' nonlilall' Chios chechona'.

<sup>4</sup> Na' benid' ka'k' beñ'ka' wda' seya' loxgue'ka', na' nakgake' to guiyoa tapiyona mil beñ', beñ'ka' nak shllin kwen dia che dii Israela'. <sup>5</sup> Shllina mil beñ'ka' nak dia che dii Judána', shllina mil beñ'ka' nak dia che dii Rubénna', shllina mil beñ'ka' nak dia che dii Gada', <sup>6</sup> shllina mil beñ'ka' nak dia che dii Asera', shllina mil beñ'ka' nak dia che dii Neftalína', shllina mil beñ'ka' nak dia che dii Manaséza', <sup>7</sup> shllina mil beñ'ka' nak dia che dii Simeónna', shllina mil beñ'ka' nak dia che dii Levína', shllina mil beñ'ka' nak dia che dii Isacara', <sup>8</sup> shllina mil beñ'ka' nak dia che dii Zabulónna', shllina mil beñ'ka' nak dia che dii Joséna', na' zi shllina mil beñ'ka' nak dia che dii Benjamínna'.

### Beñ' be beñ' zil beñ'ka' zoa do xtil

<sup>9</sup> Ka biyoll dga, na'ch bwia' na' ble'id' beñ' zan inleeb, beñ' za' doxen yell-lioni, na' lo wde wdeli dia, na' beñ' chne wde wdeli dill', na' beñ' za' yog' yell. Zegake' lao beena' lliā chñabia' na' lao Beena' Zaklebi to Xil'do', na' kono ibabi legake' daa nakgake' beñ' be beñ' zil inleeb. Na' nakwgake' twej xagake' dii xtil na' nox'gake' twej zin. <sup>10</sup> Na' yog'loz'gake' chosyaagake' zillj inleeb, nagake':

Chios chechona', beena' lliā gana' chñabi'e, na' Beena' Zaklebi to Xil'do' ba bislagake' cho'.

<sup>11</sup> Na' yog'lo' anjlka' nechjgake' beena' lliā chñabia', na' beñ'ka' tapichoa len beñ'ka' tap, bchek' xibe'ka' lawe'na' axt lo yona' bllin loxgue'ka', na' be'la'ogake' Chioza', <sup>12</sup> nagake':

¡Kan' nakan! Toshiizi we'la'ocho Chios chechoni, na' koochone' balañ, na' we'cho dill' ka nak yel' sin' che'na', na' we'chone' yel' choxken, na' we'cho dill' nake' beñ' zakii nleeb, beñ' chñabia' doxen, na' beñ' yel' wak choo yel' wak xen. ¡Kan' nakan!

<sup>13</sup> Na' to beena' len beñ'ka' tapichoa wñabile' nad': —¿Nora beñ'ki nakw lech' xtila'? ¿Gara za'gake', lla?

<sup>14</sup> Na' goshee:

—Li'kz ñezilo' daa, beñ'do'.

Na' le' wne' nad':

Beñ'kin ba bichej lo yel' zak'zi' xenna', na' ba biyib bixisi xe'ka' xchen Beena' Zaklebi to Xil'do', na' daan nakwgake' lech' xtila'. <sup>15</sup> Daan, zegake' lao Chioza' gana' zoe' chñabi'e na' ka wal' ka tella choe'la'ogake'ne'. Na' Chioza', beena' lliā chñabi'a soalene' legake' na' gap wwie' legake'. <sup>16</sup> Bich ibil' idon-gake', ni bich wzey wbilldo'na' legake', ni bich gaggak-ile' zey', <sup>17</sup> la' Beena' Zaklebi to Xil'do', beena' zoa gana' chi' Chioza' chñabi'e, gap wwie' legake'. Na' wchi'e legake' gana' chal nisa' daa nsa' yel' mbanna'. Na' Chioza' wkwase' yog'lo' daa chkwellyeshaan legake'.

### Bxoxje' sey de gállina'

**8** Na' ka bxoxj Beena' Zaklebi to Xil'do' sey de gállina', goklli yabana' ka do gashj gor.

<sup>2</sup> Na'ch ble'id' gall anjlka' zegake' lao Chioza', na' bi'e legake' gall trompet. <sup>3</sup> Na'tech bla' sto anjl noxee to barser de or, na' jsie' kwit daa nak ka mes de or gana' chzeygake' yala' daa zoa lao beena' chñabia'. Na' bi'ene' yal zan kwenche wzeye'n lawinna', na' gakan toz xtill' beñ'ka' nak lall' na' Chioza' kat' choe'lwillegake'ne'. <sup>4</sup> Na' llen che yala' daa yoo loo barsera' nox' anjla' wyasan zejan lao Chioza' nakan txen xtill' beñ'ka' choe'lwillegake'ne'. <sup>5</sup> Na' anjla' bexee barsera', wlo'en yi' galja' daa chi' gana' chey yala', na' bzaleen lo yell-lioni. Na' goshj wtin, na' gok sshag, na' wyep yes, na' wxo' wñib yell-lioni.

### Trompetka' gall

<sup>6</sup> Na' anjlka' gall, beñ'ka' nox' trompetka', wze kwasgake' wkwellegake'n.

<sup>7</sup> Na' anjl necha' bkwell'e trompet che'na', na' bxop lo yell-lioni yaj yaba na'ch yi' na' nchixgakan chen. Na' schoo yell-lioni wyey, zi lat'zə ki gokan gashjə, † na' wyeylenan dii zan inleeb yag, na' doxen gana' de shga'.

<sup>8</sup> Na' anjl wchopina' bkwell trompet che'na', na' bxop loo nisdona' to dii nak ka to yaa xen dii chal'ñin. Na' zi lat'zə ki gok gashjə nisdona' biyakan chen. <sup>9</sup> Na' zi lat'zə ki gok gashjə bado'ka' lle' loo nisdona' witgakk, na' lekzka' zi lat'zə ki gok gashjə barkwka' chda lo nisdona' wlliyai'.

<sup>10</sup> Na' anjl wyonina' bkwell trompet che'na' na' bxop to belj xen chal'ñinan, na' bxopan gana' de yaoka' na' gana' chal niska'. <sup>11</sup> Na' belj xenna' len Dii Zla'. Na' zi lat'zə ki gok gashjə nisa' gokan zla', na' beñ' zan wit ni che nis zla'na'.

<sup>12</sup> Na' anjl wdapina' bkwell'e trompet che'na', na' zi lat'zə ki gok gashjə wbillā' na' beo'do'na' na'ch beljdo'ka' wnit beeni' cheyinka'. Na' bich bzeeni'gakan zi lat'zə ki gok shgobill na' gashj yel.

<sup>13</sup> Na'ch ni zej chwia' na' benid' to bsia chzob gcho' xan yabana' na' wñeb zillj inleeb, nab:

—¡Nyesh'laz gak che beñ' yell-lioka' kat' wkwel' anjlka' tompetka' zi shon'!

**9** Na' anjl, beñ' gayi'na', bkwell'e trompet che'na', na' ble'id' to belj dii bxop xan yabana' jet'an lo

† Zi lat'zə ki gokan gashjə: literalmente la tercera parte.

yell-liona'. Na' be'gake'ne' xiinya che yecha' daa bi chiy-oll chido nak zitj. <sup>2</sup> Na' bsalje' cho'a yecha' daa bi chiy-oll chido nak zitj na' bchej lo'inna' llen ka che to gorn xen. Na' llenna' daa bchej lo'inna' bkwashaan wbilla' na' xan yabana'. <sup>3</sup> Na' loo llenna' bllesh ba zan inleeb bish'zo na' bliljgakb doxen lo yell-lioni. Na' bene' kwenche gak gad'gakb ka chad' bexjoni'ka'. <sup>4</sup> Na' bi bi'e latj bi gongakib yix ga'na' daa de yell-lioni, ni tlish' dii nak shi'a shga', ni tlish' yag, san toz ben'ka' bi da' sey che Chioza' loxgue'ka' bzoazi'yaagakb. <sup>5</sup> Na' bi bi'e latj witgakb legake', san to wzoazi'yaazgakb legake' gay' beo'. Na' gana' god'gakb wlan ka chla gana' chad' bexjoni'na'. <sup>6</sup> Na' kat'ka' gak dga, ben' yell-lioka' gakkall'gake' guetgake' per bi guetgake'; na' selall'gake' bich soagake' per yel' wita' wxonj kwashiin legake'.

<sup>7</sup> Na' bish'zoka' nakgakb ka kabay ba shaj lo wdił. Na' yichjbka' zoa twej dii nak ka corona de or, na' cho'alaobka' nakan ka cho'alaob ben'. <sup>8</sup> Na' yish' yichjbka' nakan ka yish' yichj noolə, na' leybka' nakan ka ley bell. <sup>9</sup> Na' daa nakwgakb nakan de ya na' chkweejan kwerp chebka'. Na' xilbka' chongakan sshag inleeb ka ga za' zan kabay ba ngoyo karret dii zej lo wdił. <sup>10</sup> Na' lo xbambka' zoagakan ka lew bexjoni', na' wchingakban kwenche wzoazi'yaagakb ben' yell-liona' gay' beo'. <sup>11</sup> Na' anjla', beena' nak lall' nee yech zitja', chnabi'e bish'zoka', na' dill' hebrewa' lie' Abadón, na' dill' griegona' lie' Apolión, na' zejin Williayi' Williade.

<sup>12</sup> Na' biyoll yel' zak'zi' necha', per ni chyallj zi chopan.

<sup>13</sup> Na'ch anjl, ben' wxopina', bkwell trompet che'na', na' benid' wne to ben' gana' zoa daa nak ka mes de or gana' chzeygake' yala' daa lliia ka lozdo'in to to schin daa zoa lao Chioza'. <sup>14</sup> Na' golle' anjl, ben' wxopina', beena' nox' trompeta':

—Bsell anjlka' tap, ben'ka' nchej cho'a yao xenna' le Éufrates.

<sup>15</sup> Na' bselle' tapte anjlka', ben'ka' nzoe' kwenche witgake' ben', na' zi lat'zə ki gok gashjə † ben' yell-liona' betgake'. La' ba nllie' bia' gongake' ka' ka lo gora', lo llana', lo bewaa, na' lo yiza'. <sup>16</sup> Na' benid' nak chop guiyoa millón soldadka' lliagake' kabay.

<sup>17</sup> Na' ki nak kabayka' ble'do'id' na' ben'ka' lliia koll'bka': daa nkweej cho'alcho'eka' nakan dii xna ka yi'na', na'ch de azul ka yaj wan daa le zafiro, na' dii gush ka bishte daa ne' azufre. Na' yichj kabayka' nakgakan ka yichj bell, na' loo cho'abka' chchej yi' dii nchix azufre na'ch llen. <sup>18</sup> Zlat'zə ki gok gashjə †† ben' yell-lioka' witgake' ni che shon yel' zi'ki: yi'na', llenna', na'ch azúfrena' diika' bchej cho'a kabayka'. <sup>19</sup> Na' kabayka', bchingakb cho'abka' na' xbambka' kwenche betgakb ben', la' xbambka' nakgakan ka bel, na' yichji daa zoa xbamka' daa nak ka bel bzoazi'yaagakan ben'.

<sup>20</sup> Na' ben'ka' bi biya gueti diiki, bi biyaj bilengakile' dii malka' chongake', ni bi wlej yichjgake' we'la'ogake' dii xiw'ka' na' diika' nongake' de or, de plat, de bronce, na' de yaj na' de yag, diika' bi chle'i ni bi chengakin, ni bi chak sa'gakan. <sup>21</sup> Ni bi biyaj bilengakile' daa chit-

† Zi lat'zə ki gokan gashjə: literalmente la tercera parte. †† Zi lat'zə ki gokan gashjə: literalmente la tercera parte.

gake' ben', daa nlangake' yel' willa'na', ni daa chnelen ljwellgake', ni daa chzi' chbangake'.

### Anjla' noxee to yish dii ba biyesh

**10** Na'ch ble'id' sto anjl, ben' nap yel' wak xen, chetje' yabana' zindobe' to bej. Yichje'na' xoa to betyaa, na' cho'alawe'na' chep cheeni'n ka wbilla', na' ni'eka' nakgakan ka bel yi' dii chzolla'. <sup>2</sup> Na' noxee to yish dii ba biyesh, na' bzoe' ni'e de shlina' lo nisdona' na' de robesa' bzoe'n lo yell-liona'. <sup>3</sup> Na' besyaadie' zillj inleeb ka chosyaa to bell. Na' ka besyee, wne wziwaa gall shii. <sup>4</sup> Na' ka biyoll wne wziwaa gall shii, na'ch nan wzej' daa wnagakan. Per benid' wne to ben' yabana', na' wne' nad':

—Bi wzejo' daa wna wziwaa, san wlooshawaan loo yichjlall'do'na'.

<sup>5</sup> Na' anjla', beena' ble'id' nzoa ni'ena' tlaa lo nisdona' na' daa zi tlaa lo yell-liona', blis nee de shlina' yabalə <sup>6</sup> na' bzoe' de taschiw beena' zoa zejli kani, beena' bxe bsil yabana' na' yog'loł daa lliia xaninna', na' yell-lioni na' yog'loł daa de lawinna', na' nisdona' na' yog'loł daa lle' lo'inna', na' wne':

—Aga chillach gak daa lliia bia' gak. <sup>7</sup> San kat' kwell anjl, ben' gállina', trompet che'na', na' yiyoll yido gak yog'loł daa bllia Chioza' bia' gak, kon ka golle' dii ben'ka' wdixjee daa wne' kani'yi.

<sup>8</sup> Na' sto shii benid' shii beena' wne yabana', na' wne' nad':

—Wyaj kwit anjla', beena' nzoa ni'ena' lo nisdona' na' lo yell-liona', na' jaxi' yisha' daa noxee.

<sup>9</sup> Na' wya' kwit anjla' na' binabidee yisha'. Na' wne' nad':

—Ni den, wdawan. Na' idawilon' zix sia ka shin basera', per loo li'ona' yiyakan zichj zla'.

<sup>10</sup> Na' bikaa yisha' lo na' anjla' na' wdawa'n. Na' bdawidaan zix sia ka shin basera', per ka bidon wdaw' na' biyakan zichj zla' loo li'ana'. <sup>11</sup> Na' wne' nad':

—Chonan byen wi'o dill' daa na Chioza' gak che ben'ka' lle' yellka', na' naciónka', na' ben' chne wde wdeli dill', na' ben' wñabia'ka'.

### Chop ben' wi'e dill' daa che' Chioza' legake'

**11** Na' bene' nad' to ya dii gak wchixid', na' wne': —Wyaj na' jachix ka'k' nak yoodo' che Chioza' na' ka'k' nak gana' chzeygake' yala', na' blab ka'k' ben'ka' choe'la'o Chioza' na'. <sup>2</sup> Na' bi wchixo' lesh' chyoodo'na', la' ba nakan lall' na' ben'ka' bi nombia' Chioza', ben'ka' wlej wshoshjgake' yell che Chioza' chopiyon beo'. <sup>3</sup> Na' wselaa chop ben' wi'e cho'a xtil-laana', na' gakwgake' lech' zeshaa, na' to mil chop guiyoa guiyon lla chixje'gake' daa yepgakee.

<sup>4</sup> Ben'ki chop zaklebgake' chop yag olivoka' na' chop candelerka' zoa lao Chioza', beena' nak xan yell-lioni. <sup>5</sup> Na' shi no bi goni legake', loo cho'eka' ichej yi' na' wliayi'n ben'ka' chakzbani legake'. Na' ka' kwaiyi' notteze ben' gakkallee bi gonile' legake'. <sup>6</sup> Ben'ka' chop nap-gake' yel' wak kwenche bi gak yeja' shlak chixje'gake'

daa ye' Chioza' legake'. Na' lekzka' napgake' ye! wak yiyongake' nisa' chen, na' gongake' yiya dii wsak'zi'n beŋ' yell-lioki kon ka'k'to cheengakile'. <sup>7</sup> Na' kat' yiyoll çixje'gake' cho'a xtill' Chioza', daa nak ka bayix' zña daa ichej loo yecha' daa bi chiyoll chido nak zitj, goxaan legake' na' gonan gan witan legake'. <sup>8</sup> Na' kw-erp çhe'ka' gat'gakan yawi nez çhe yell xenna' gana' bda'gake' Xancho Jesucristona' lee yag cruza', daa zak-lebi Sodómana' na'ch Egiptona'. <sup>9</sup> Na' beŋ' wde wdeli yell, na' wde wdeli dia, na' beŋ' çhne wde wdeli dill', na' beŋ' wde wdeli nación wwiagake' kwerp çhe'ka' shon lla shgobill, na' bi we'gake' latj no kwash' legake'. <sup>10</sup> Na' beŋ'ka' zoa lo yell-lioni yiba yizakgakile' daa ba witgake'. Na' daa le yiba yizakgakile' we' ljwellgake' dii chiza'lall'gake', la' beŋ'ka' wdixjee daa goll Chioza' legake' chiya dii bengake' kwençe bsak'zi'gake' legake'. <sup>11</sup> Na' ka gok shon lla shgobill, Chioza' bisbane' legake', na' biyasgake' sto shii. Na' yog' beŋ'ka' ble'gakile' legake' le bllebgake'. <sup>12</sup> Na' beŋ'ki çhop bengakile' wne to beŋ' yabana', chi'e legake':

—Li yiyep nila.

Na' biyepgake' yabana' to lo bej, chwiate beŋ'ka' gokzi' gokzban legake'. <sup>13</sup> Na' ka chiyepgake' gok to bedxo' xen, na' bçhinjan lat' † yella', na' wit galla mil beŋ'. Na' beŋ'ka' bi wit le bllebgake' na' be'la'ogake' Chioza', beena' lliia yabana'.

<sup>14</sup> Na' biyoll ye! zak'zi' de wchopina', per lii za'te de wyonina'.

### Bkwelle' trompet de gállina'

<sup>15</sup> Na' anjl, beŋ' gállina', bkwelle' trompet çhe'na', na' benid' wne beŋ' zan zillj inlleb yabana', wnagake':

Ye! wñabia'na' de yell-liona'  
ba nakan çhe Xancho Chioza' len Crístona',  
beena' wleje' kwençe inabi'e;  
na' inabi'e zejli kaŋi.

<sup>16</sup> Na' beŋ'ka' tapichoa, beŋ'ka' lliia lao Chioza', bçhek' yichje'ka' axt lo yona', be'la'ogake'ne', <sup>17</sup> nagake':

Chonnto' li' ye! choxken, Chios,  
beŋ' liizelozi nap ye! wak choo ye! wak xen, beŋ' nak Xannto'.

Li'kzan zo' naa, na' li'kzan zo' ka wxe wzil yell-liona', na' zejli kaŋi zo'.

Na' ba wzolo çhñabia'lono' ye! wak choo ye! wak xen çho'na'.

<sup>18</sup> Beŋ'ka' lle' yell-liona' ba bllaa blokgage', na' ba bllin lla wsak'zi'gako'ne'. Na' naa gono' ye! josçhis çhe beŋ' wetka', na' wi'o daa chido! beŋ'ka' wdixjee daa gollo' legake', na' beŋ'ka' nak lall' no', len beŋ'ka' chgoo li' balaan, ka beŋ' zakii ka beŋ' bi zakii;  
na' wlliyoo beŋ'ka' chlliaiyi' beŋ' yell-liona'.

<sup>19</sup> Na'ch byalj yoodo'na' zoa yabana', na' loo yoodo'na' nla' yiina' gana' lle' yaj taaka' gana' bzej Chioza' diika' bllie' bia' gon beŋ' Israelka'. Na' wyep yes, na' gok sshag, na' goshj wtin, na' gok to bedxo' wal, na' wche'çga yaj yabana'.

### Noola' na' bayixaa nak ba xña

**12** Na' xan yabana' ble'id' to dii chonan ka yibanicho. Ble'id' to nool ndobæ beeni' çhe wbillla' le', na' zoa beo'do'na' xñi'ena', na' nzoa to corona yichje'na' na' llian shllin belj. <sup>2</sup> Na' noa' noola' to bdo', na' chosyee daa chllagloe' chaz besa' sane'b'. <sup>3</sup> Na'ch bizle'id' xan yabana' sto dii chon ka yibanicho. Ble'id' to bayix' xen inlleb, ba xña, na' lliia gall yichjb na' zi shi lozb, na' twej corona zoa to to yichjba'. <sup>4</sup> Na' bta xba-ma' bshibb zan beljdo'ka' lliia xan yabana', zi lat'zæ ki gokan gashj, †† na' bzal'b legakan lo yell-lioni. Na' wze bayixaa lao noola' beena' san, kwençe guebb xi-ine'na' kate galjb'. <sup>5</sup> Na' noola' wxane' to bi' byodo', bi'na' inabia' doxen zbii zkaan yell-lioni na' gom' byen wzenaggake' çheb'. Na' Chioza' llii bigoyotie'b' ziyajb' gana' chi'e çhñabi'e. <sup>6</sup> Na' bxonj noola' zeje' gana' bibi chashj çleb, gana' ba nonshao' Chioza' to latj çhe', na' we'gake' dii gawe' to mil çhop guyoa guyon lla.

<sup>7</sup> Na'tech gok to wdi! yabana'. Anjl, beena' le Miguel, na' anjlka' ngoo lall' nee wdi!-lengake' bayix' xñana'. Na' bayix' xñana', daa nak dii xiwaa, len anjl çheyinka' wdi!-lengakan legake', <sup>8</sup> per bi wzogakin gongakan gan. Na' bich bi latj çhegakin got' yabana'. <sup>9</sup> Na' wlejjake' bayix' xñana', daa nak bel kani'teyi, daa le dii xiw' na' Satanás, daa çziye' doxen yell-lioni.

Bzal'gake'n yell-lioni len anjl çheyinka'.

<sup>10</sup> Na' benid' wne to beŋ' zillj inlleb yabana', wne':

—Ba bllin lla bisla Chios çhechona' beŋ' yell-liona', ba bli'e ye! wak choo ye! wak xen çhe'na' na' ye! wñabia' çhe'na', na' ye! wñabia' çhe Crístona', beena' wleje' inabia'lene' txen. La' ba bibejgake' dii xiwaa daa chao xya çhe beŋ'ka' nakcho txen, daa chao xya çhegake' lao Chios çhechona' ka tella ka wa! <sup>11</sup> Ba bengake'n gan daa chonlilall'gake' Jesucristona', Beena' Zaklebi to Xil'do', beena' blalj xçhene'na' ni çhegake'. Na' bi bllebgake' be'gake' xtilleena', san bzani kwingake' guet-gake'. <sup>12</sup> Ka le' zoale yabana', li yiba yizaki! Per inyesh'laz gak çhele, le' lle'le yell-liona' na' lo nido'na'! La' dii xiwaa ba betjan gana' zoale na' chllaa chlokan nall inlleb daa nezin bich bi latj xen çheyin de.

<sup>13</sup> Na' ka gokbe'i bayix' xñana' ba bzal'gake'b lo yell-liona', na' blagdob noola' wxan bi' byodo'na'. <sup>14</sup> Na' bzoo Chioza' çhop xil noola', ka xil bsia xen, kwençe bx-onjile' dii xiwaa na' lljsoe' gana' bibi chashj çleb, gana' ba nonshao' Chioza' to latj çhe', na' we'gake' dii gawe' shon yiz yoo gashjæ. <sup>15</sup> Na' dii xiwaa, daa nak bayix' xñana', bem ka bchej nis zil loo cho'aba' gokan to yao kwençe nan wa'n noola'. <sup>16</sup> Per yell-liona' byaljan kwençe goklenan noola', na' wdeban yawa' daa bchej loo cho'aba'. <sup>17</sup> Na' daa gok ka', bllaa blokchga bayix' xñana' noola' na' wyajb jtil-lem xiin dia çhe'na' bgaan, beŋ'ka' chzoa dill' daa nllia Chioza' bia' gongake', beŋ'ka' zoaçheçh çhajle'gake' cho'a xtill' Jesucristona'. <sup>18</sup> Na' wze bayix' xñana' cho'a nido'na'.

† Lat': literalmente la décima parte.

†† Zi lat'zæ ki gokan gashjæ: literalmente la tercera parte.

## Bayixaa bchej loo nisdona'

**13** Na' ble'id' bchej loo nisdona' to bayix' lliia gall yichjb na' zi shi lozba. Na' to to lozba' zoan twej corona, na' to to yichjba' llian leba' daa zeji chon kwim ka Chioza'. <sup>2</sup> Na' bayixaa ble'id', nakb katekzə bell tigr †, na' ni'a naba' nakan ka ni'a na' oso, na' cho'aba' nakan ka che bell lión. Na' bayix' xñana' be'b leb yel' wak na' yel' wñabia' cheba' kwenche inabia'b. <sup>3</sup> To yichj bayixaa zoalejan byaljan to we' daa nan guetib, na' we'na' biyakin. Na' yog' beñ' yell-lioka' bibangakile' na' ben-gake' bayixaa txen. <sup>4</sup> Na' be'la'ogake' bayix' xñana', daa be' yel' wñabia' cheba' bayixaa nak ka bell tigr, na' lekzka' be'la'ogake' bell tigrā, nagake':

—Kono zoa sto ka bayixii, na' kono so saki til-lem.

<sup>5</sup> Na' kono bsej blon be'b dill' cha'sibə na' wñeb zban che Chioza', na' wñabia'b chopiyon beo'. <sup>6</sup> Wñeb zban che Chioza', na' biz ben wñab che', na' che yabana' gana' zoe', na' che beñ'ka' zoa yabana'. <sup>7</sup> Na' gok lo na'b til-lem beñ'ka' nak lall' na' Chioza', na' bem le-gake' gan. Na' lekzka' gok lo na'b inabia'b lao yog'lo beñ' za' yog' dia, beñ' lle' yog' yell, beñ' lle' yog' nación, na' beñ' chñe wde wdeli dill'. <sup>8</sup> Na' yog'lo beñ'ka' lle' yell-lioni, beñ'ka' bi da' leinna' lee libr che Jesucristona', we'la'ogake' bayixaa. La' kana' wxe wzilte yell-lioni, Jesucristona', Beena' Zaklebi to Xil'do' daa bet-gake'ne', bzeje' lee libr che'na' le yog' beñ'ka' gat' yel' mban cheyin zejli kañi.

<sup>9</sup> Beena' cheni dga nia', chiya! wzenagyeneen.

<sup>10</sup> Beena' wche'gake' wsejgake', shajshaze' gatee lillyana'. Na' beena' ba nakan guetile' yesyana', guets-hazile'n. Na' daan, beñ'ka' nak lo na' Chioza' chiya! soachehgake' gonjilall'gake'ne'.

<sup>11</sup> Na'tech ble'id' sto bayix' bchejb loo yell-liona' na' lliia chop lozba dii nak ka che to xil'do', per chñeb ka bayix' xñana'. <sup>12</sup> Na' wdapb do ka nak yel' wñabia' che bayix' necha', na' ba necha' be'b latj wñabia'b kwenche bem byen yog' beñ' lle' yell-lioni be'la'ogake' ba necha', bana' biyaki we' cheba' daa nan guetib. <sup>13</sup> Na' lekzka' bana' bchej loo yell-liona' bem yel' wak xen daa benan ka bibani beñ', axt bem ka betj yi' xan yabana' bxopan lo yell-lioni chwiata beñ' yell-lioka'. <sup>14</sup> Na' ni che yel' wakki gok lo na'b gom gana' lliia ba necha', wxiye'b beñ'ka' lle' yell-lioni kwenche bzenaggake' che ba necha', na' bem byen bengake' to lwaa Isak' ba necha' bana' biyaki we' cheba' daa bsalj yesyana'. <sup>15</sup> Na' bayix' wchopina' wdapb yel' wak kwenche wloob bishbe daa nak lwaa Isak' bayix' necha', kwenche gak inen na' gonan ka witgake' yog' beñ'ka' bi we'la'o len. <sup>16</sup> Na' lekzka' bem byen yog'lo beñ' sho' nee de shlina' wa loxgue'na' to sen, ka beñ' zakii ka beñ' bi zakii, ka beñ' wni'a ka beñ' yesh', ka beñ' ndoo lla yel chone' xshin beñ' na' ka beñ' chon xshinkze'. <sup>17</sup> Na' kono gok wit' wde bi dii de che' wa si'e bi dii chyaljile' shi bi yo'e sen che bayixaa daa nak leb wa número daa zeji leba'.

<sup>18</sup> Chyaljicho yel' sin' kwenche shajniicho dga. Beena' shajniile'n na' yiyiljni'e número che bayixaa daa nak to

† Bell tigr: literalmente leopardo.

número che beñ'. Na' número na' nakan xop guiyoa guiyon xop.

## Daa beñ' beñ'ka' to guiyoa tapiyona mil

**14** Na' ble'id' Jesucristona', Beena' Zaklebi to Xil'do', zie' lo yaana' le yaa Sión. Na' lene' to guiyoa tapiyona mil beñ', na' da' loxgue'ka' le Jesucristona', Beena' Zaklebi to Xil'do', na' le Xe'na'. <sup>2</sup> Na'ch benid' to sshag wal za'n yabana', na' sshaga' nenan ka nen yao xenna' daa chxop cho'a bnanja' na' ka nen kat' chashj chtin. Daa benid', nenan ka shii dii zan arpa dii chsill-gake'. <sup>3</sup> Na' cholgake' to dii kob lao beena' lliia chñabi'a na' lao beñ'ka' tap zoa xilin, na' lao beñ'ka' tapichoa. Na' koch no beñ' yoblə gok goł daa cholgake', san toz beñ'ka' nak to guiyoa tapiyona mil, beñ'ka' bisla Chioza' ladj beñ'ka' lle' yell-lioni. <sup>4</sup> Beñ'kin wdapshii kwingake' na' bi bdi'gake' nool, na' nogake' Jesucristona', Beena' Zaklebi to Xil'do', gattezə zeje'. Na' bisla Chioza' legake' ladj beñ' yell-lioka' kwenche gakgake' lo nee na' lo na' Jesucristona'. Na' zaklebgakile' ka to dii nech dii chizi' chilap beñ' cho'en Chioza'. <sup>5</sup> Na' biga bchej dill' wxiye' cho'eka', na' ni to bibi nda' nchen-gake' lao Chioza'.

## Dill' daa be' anjlka' shon

<sup>6</sup> Na' ble'id' sto anjl chzoe' xan yabana', na' chyixji'e dill' wen dii kob che Chioza' daa bi te cheyin lao beñ'ka' lle' yell-lioni, beñ'ka' lle' yog' naciónka', yog' yell, beñ'ka' za' yog' dia, na' beñ'ka' chne' wde wdeli dill'.

<sup>7</sup> Na' wñie' zillj inlleb, chi'e:

—Li illeb Chioza' na' li kwee balaan, la' ba bllin lla gone' yel' joschis che to to beñ'. Li we'la'o beena' ben yabana' len yell-liona', na' nisdona', na' gana' chal niska'.

<sup>8</sup> Na' no sto anjl le', na' ne':

—Ba wlliyi' Babilóniana', yella' le wzeyi cheyi, yella' gana' wlle' beñ'ka' zaklebi noola' chsolli beñ' kwenche gonlen ljwellgake' bittez dii zbanka' cheeni beli chen che'ka', daa wlooyel'gake' beñ'ka' lle' yog' naciónka' kwenche gongake' dii malka' bengake'.

<sup>9</sup> Na' jano sto anjl legake', beñ' wyoni, na' wñie' zillj inlleb, wne':

—Nottezə beñ' we'la'o bayixaa na' lwaa Isak'ba', na' wi'e latj sho' sen cheba' loxgue'na' wa neena', <sup>10</sup> yen ile'ile' do ka nak yel' chllaa che Chioza'. Na' sak'zi'e lo yi' gabi'la' daa nak ka yina' nchix azúfrena' chwiata beñ'ka' nak anjl che Chioza' na' Jesucristona', Beena' Zaklebi to Xil'do'. <sup>11</sup> Na' llen che yi'na' gana' sak'zi'gake' chasan zejli kañi. Na' beñ'ka' choe'la'o bayixaa na' lwaa Isak'ba' na' beñ'ka' we'gake' latj sho'gake' sen cheba', bibi yel' wixi'lall' gat' chegake' ka tella ka wał. <sup>12</sup> Na' daa gak ka', beñ'ka' nak lall' na' Chioza' na' chzoagake' xtilleena', na' zoatezi zoagake' chonjilall'gake' Jesúza', chiya! so sakgakile' daa yen ile'gakile'.

<sup>13</sup> Na' benid' wñe to beñ' yabana', na' wne' nad':

—Bzej dga: "Chakomba beñ'ka' nak Xancho Jesucristona' txen, beñ'ka' guet naa na' beñ'ka' zi' guet ni

che." Kan' nakan, —na Espiritu che Chioza'—, legaken' yizi'lall'gake' che yog' dii ben ble'gakile', na' yog' dii wenka' bengake' bi gal-lallii Chiozan'.

### Chioza' yitope' ben' yell-liona' ka ben' chizi' chilap

<sup>14</sup> Na' bwia' na' ble'id' to bej llyish, na' lo beja' chi' to ben' nake' ka benech. Na' nzoa to corona de or yich-je'na' na' noxee to garbat dii nlatit. <sup>15</sup> Na' bchej sto anjl loo yoodo' che Chioza', na' chosyee zillj inleeb chi'e beena' chi' lo beja':

—Bchin garbata' daa noxoo na' bizi' bilap, la' ba go! yizi' yilapo' daa de yell-liona'.

<sup>16</sup> Na' beena' chi' lo beja' bizi' bilape' daa de lo yell-lioni.

<sup>17</sup> Na'ch bchej sto anjl loo yoodo' che Chioza' zoa yabana', lekzka' noxee sto garbat dii nlatit. <sup>18</sup> Na' bchej sto anjl gana' zoa daa nak ka mes de or gana' chzey-gake' yala', na' nak lo nee yi'na'. Na' wnie' zillj beena' nox' garbata' daa nlatit, chi'ene':

—Bichogui garbata' noxoo uvana' de yell-liona', la' ba wegakan.

<sup>19</sup> Na' anjla' bichoguile' garbata' uvaka' de lo yell-liona' na' bizi' bilape'n, na' blleen gana' chsigake'n. Na' zejin Chioza' bitope' ben' yell-lioka' bi nakgake'ne' tx-en, na' wlo'e legake' gana' sak'zi'gake', gana' yen ile'gakile' yel' chllaa che'na'. <sup>20</sup> Na' ben'ka' zaklebi uva-ka', wzak'zi'gake' cho'a yella'. Na' gana' blee legake' wlalj dii zil inleeb xchene'ka' na' wyasan ka to ze cho'a kabaya' na' bliljan shon guiyoa kilómetro.

### Anjlka' gall

**15** Na' ble'id' yabana' sto dii wal, dii chonan ka yibanicho. Ble'id' gall anjl, ben'ka' nak lall' na'gake' wisgake' zi gall yel' zak'zi'ka' gat' lo yell-lioni kwenche yiyoll yido yel' chllaa che Chioza'.

<sup>2</sup> Na' lekzka' ble'id' daa nak ka nisdoo' de vidr nchixan yi'. Na' ble'id' ben'ka' bizo bizaki bi be'la'ogake' bayixaa na' lwaa lsak'ba' na' bi be'gake' latj sho'gake' sen che-ba', zegake' cho'a nisdoo' de vidra' na' nox'gake' twej arpa daa be' Chioza' legake'. <sup>3</sup> Na' cholgake' to dii bel dii Moiséza', beena' ben ka cheeni Chioza', na' daa bel Jesucristona', Beena' Zaklebi to Xil'do', nagake':

Le nak diika' chono' na' chongakan ka chibaninto', Chios, ben' nak Xannto', ben' yel' wak choo yel' wak xen.

Yog' diika' chono', chono'n ka chiyal', li' nako' ben' wñabia' che yog' ben' yell-lion.

<sup>4</sup> Biga zoa ben' bi gall illebe' li', Xan'.

Biga zoa ben' bi kwe' li' balaan.

La' tozo' lin' nako' dowalj ben' li' ben' shao'.

Na' ben'ka' lle' doxen yell-lioni yidgake' we'la'ogake' li',

daa ble'gakile' diika' chono' nakan shlich.

<sup>5</sup> Na' ka biyoll dga, bizle'id' byalj yoodo' che Chioza' yabana', latj gana' yooshao' ley che Chioza' daa bzeje' lee yaj taaka'. <sup>6</sup> Na' loo yoodo'na' bchej gall anjl, ben'ka' nak lall' na'gake' wisgake' gall yel' zak'zi'ka' gat'

lo yell-liona'. Nakwgake' twej lech' xtil dii chey cheeni' na' ngoo li'eka' twej bad' de or blinten ka de cho'al-cho'eka'te. <sup>7</sup> Na' to ben'ka' tap, ben'ka' zoa xilinna', bi'e to to anjlka' twej kop de or nakgakan tolla' yel' zak'zi' che Chioza', beena' zoa zejli kanj. <sup>8</sup> Na' loo yoodo'na' gokan tolla' llenna' ni cheyi balaan xen che Chioza' na' yel' wak choo yel' wak xen che'na'. Na' kono gok yiyoo loo yoodo'na' axt ki biyoll bido gallte yel' zak'zi'ka' daa nak lo na' anjlka' gall.

### Yel' zak'zi'ka' gall daa yoll loo kopka'

**16** Na' benid' wne to ben' zillj inleeb loo yoodo'na', chi'e anjlka' gall:

—Li shaj na' li lljalatj lo yell-liona' yel' zak'zi' che Chioza' diika' yoll loo kopka' gall.

<sup>2</sup> Na' wyaj anjl necha', jalatje' yel' zak'zi' daa yoll loo kop che'na' lo yell-liona' na' yog' lo ben'ka' yoo sen che bayixaa na' be'la'ogake' lwaa lsak'ba' byalgake' we' dii wyoll guull' na' wyey wlagake'.

<sup>3</sup> Na' anjl, ben' wchopina', jalatje' yel' zak'zi' daa yoll loo kop che'na' lo nisdoo'na', na' nisdoo'na' biyakan ka xchen ben' witi yesya, na' wit yog' lo dii de yel' mban cheyin loo nisdoo'na'.

<sup>4</sup> Na' anjl, ben' wyonina', jalatje' yel' zak'zi' daa yoll loo kop che'na' loo yaoka' na' yog' ga chal nis, na' biyakgakan chen. <sup>5</sup> Na' benid' wne anjla' blalj yel' zak'zi'na' lo nisa', wne':

—Chios, lin' nako' dowalj ben' li' ben' shao'. Lin' zo' naa, na' li'kzan zo' ka wxw wzil yell-lioni. Lin' chono' daa nak shlich daa ba bchoglo' che ben'ki kon ka chiyal' gak. <sup>6</sup> La' legake' blalgake' xchen ben'ka' nak lall' no' na' ben'ka' wdixjee daa gollo' legake', na' ba be'gako'ne' chenna' yeejgake', ka chido'kzə gak che-gake'n.

<sup>7</sup> Na' lekzka' benid' wna beena' ze kwit daa nak ka gana' chzeygake' diika' chjwa'gake' lao Chioza', ne':

—Kan' nakan Chios, ben' nak Xannto', ben' yel' wak choo yel' wak xen, li' ba beno' yel' joschis kon ka chiyal' gakan.

<sup>8</sup> Na' anjl, ben' wdapina', jalatje' yel' zak'zi' daa yoll loo kop che'na' lo wbilldo'na', na' bzeyan ben' yell-liona'. <sup>9</sup> Na' yog' lo lgake' wyeygake' nall inleeb. Per bi biyaj bilengakile' lao Chioza', ni bi be'la'ogake'ne', san wnelgake' zban che' daa bi'e latj chak yel' zak'zi'ka'.

<sup>10</sup> Na' anjl, ben' gayi'na', jalatje' yel' zak'zi' daa yoll loo kop che'na' gana' lliia bayixaa chñabia'b, bana' bchej loo nisdoo'na', na' gok shgasj shcho' doxen gana' chñabia'b. Na' ben' yell-lioka' non leb txen wdaoyaa lolleeka' daa le wyey wlagake'. <sup>11</sup> Na' wnelgake' zban che Chioza', beena' zoa yabana', daa chey chlagake' ni che we'ka' lliagake', na' bi biyaj bilengakile' dii mala' chongake'.

<sup>12</sup> Na' anjl, ben' wxopina', jalatje' yel' zak'zi' daa yoll loo kop che'na' loo yao xenna' le Éufrates, na' biyeej yao xenna' kwenche gok wde ben' wñabia'ka' za' gana' chla'lə wbillla'.

<sup>13</sup> Na' ble'id' shon dii xiw' dii nak ka bloll. Ton bchej loo cho'a bayix' xñana', na' ston bchej lo cho'a bayixaa

bana' be'la'o beṅ' yell-liona', na' ston bchej loo cho'a bana' chziye' beṅ', cho'eb dill' daa che' bayixaa sto leb. <sup>14</sup> Na' dii xiw'ki chongakan yeṅ' wak. Na' bchejgakan jatopgakan beṅ' wṅabia'ka' lle' doxen yell-lioni kwenḅe yiyakgake' toz tiṅ-lengake' Chioza', beena' zeelo nap yeṅ' wak choo yeṅ' wak xen, kat' illin lla choo lla xen ḅe'na'. <sup>15</sup> "Li se wṅeyi, nad' zizaa tokonganzi, ka chon to beṅ' wban aga no chsi'nile' kat' chjlane'. Chakomba beena' ze wṅeyi na' nakw xe'na' kwenḅe bi te gal'yid gal'bel'ze' na' si'e yeṅ' zto'." <sup>16</sup> Na' dii xiw'ka' btopgakan beṅ' wṅabia'ka' latja' le Armagedón de dill' hebreo.

<sup>17</sup> Na' anjl, beṅ' gállina', blatje' yeṅ' zak'zi' daa yoll loo kop ḅe'na' lo llazə. Na' loo yoodo'na' zoa yabana', gana' llia Chioza' chṅabi'e, wṅie' zillj, wne':

—Ba gok daa chiyaṅ' gak.

<sup>18</sup> Na'ch wyep yes, na' gok sshag, na' goshj wtin, na' bṅib yell-liona' ni ḅe to bedxo' xen inlleb dii nakch zibia' ka yog' bedxo'ka' ba gok shlak wzoa beṅ' lo yell-lioni. <sup>19</sup> Na' yell daa le zeyi ḅheyin gokan shoṅ laalə, na' yellka' lle' yell-lioni wlliyai'gakan. Na' ngoo yichj Chioza' wsak'zi'e Babilóniana', yella' le zeyi ḅheyin, kwenḅe beṅ'ka' lle' na' yen ile'gakile' yeṅ' zak'zi' xen ḅe'na' daa le bshaagake' le'. <sup>20</sup> Na' yog' yell-liodo'ka' llia lo nis-do'na' na' no yaaka' binitlogakan. <sup>21</sup> Na' xan yabana' bxop yaj yaba dii yeṅ' inlleb na' ziiigakan wdeli ḅhoa kil. Na' beṅ' yell-lioka' wṅelgake' zban ḅe Chioza' ni ḅe yaj yabana' daa gokan to yeṅ' zak'zi' xen inlleb.

#### Nool wdana' beena' llia koll' bayix' xṅana'

**17** To anjla', beena' len beṅ'ka' gall, beṅ'ka' nox'gake' kopka', bide' gana' zia' na' wne' nad':

—Da, wliid' li' yeṅ' zak'zi'na' ile'i noolə wdana', beena' zaklebi yella' le zeyi ḅheyin daa llia gana' chde yao zan. <sup>2</sup> Beṅ' wṅabia'ka' lle' yell-liona' ba benlengake'ne' txen lo yeṅ' wdana', na' beṅ'ka' lle' yell-liona' ba lenzgake' nak ka beṅ' chzoll chniti daa chongake' dii malka' chone'.

<sup>3</sup> Na' anjla' bḅhi'e nad' latja' gana' bibi chashj chṅeb na' Espiritu ḅe Chioza' bene' ka ble'do'id' to noolə llie' koll' to bayix' xṅa, na' doxem da' dill' daa chṅe zban ḅe Chioza', na' llia gall yichjb na' zi shi lozb. <sup>4</sup> Na' noola' nakwe' to lech' de morad na' dii xṅalil, na' le nonilen' nḅhine' or, yaj wan na' perla. Na' noxee to kop de or daa nak tolla' dii zbanka' na' yeṅ' wdana' chone'. <sup>5</sup> Na' loxgue'na' da' to lie' daa kono wyajni bin zejin, na' nan: "Babilóniana', yella' le zeyi ḅheyin, xaxṅa' yeṅ' wdana' na' yog'loṅ dii zban daa chak doxen lo yell-lioni." <sup>6</sup> Na' gokbe'id' wzolli noola' daa weeje' xḅen beṅ'ka' bete', beṅ'ka' benṅilall' Chioza' na' beṅ'ka' be' cho'a xtill' Jesús'a'. <sup>7</sup> Na' anjla' wne' nad':

—ḅiḅhe chibanzilo? Na' inia' li' bi zeji daa ble'ilo' noola' na' bayixaa, bana' llie', bana' llia gall yichjin na' zi shi lozb. <sup>8</sup> Bayix' xṅana' ble'ilo', leban wzoa kani'yi, na' bich zoab ṅaa. Na' wiyedb sto shii ichejb loo yecha' daa bi chiyoll chido nak zitj kwenḅe kwiayi'b toshiizi. Na' beṅ'ka' lle' lo yell-lioni, beṅ'ka' bi da' lie'ka' lee li-bra' gana' da' le beṅ'ka' de yeṅ' mban ḅhegake' zejli

kani kana' zi xe silte yell-lioni, yibangakile' ile'gakile' bayixaa, bana' wzoa kana', na' bich zoab ṅaa, per wibam sto shii.

<sup>9</sup> Nin chyalljicho yeṅ' sin'na' na' yeṅ' chajniina'. Yichjb-ka' gall, zaklebin gall yaaka' gana' llia noola', <sup>10</sup> na' lekz-ka' nakgakan gall beṅ'ka' chṅabia'. Gay'gake' bich chṅabia'gake', toe' chṅabi'e ṅaa, na' beena' sto zi' solo inḅabi'e. Na' kat' solo inḅabi'e, xtizan inḅabi'e. <sup>11</sup> Na' bayixaa, bana' wzoa kani'yi na' bich zoab ṅaa, leban' beṅ' wṅabia' de wxoni'na'. Na' lene' beṅ'ka' gall, na' ba nak-ten kwiayi'tekze'.

<sup>12</sup> Na' lozbka' shi, diika' ba ble'ilo', zaklebigakan shi beṅ'ka' zi' solo inḅabia', per shllollzan inḅabia'lengake' bayixaa. <sup>13</sup> Na' beṅ' wṅabia'ki shi gakgake' toz, na' we'gake' bayixaa yeṅ' wṅabia' ḅe'ka'. <sup>14</sup> Na' tiṅ-lengake' Jesucristona', Beena' Zaklebi to Xil'do', na' Jesucristona' gone' legake' gan, la' len' Beena' zeelo nak Xan yog'loṅ beṅ', na' Beena' liizelozi chṅabia' lao yog'loṅ beṅ'. Na' beṅ'ka' zejlen le' txen nakgake' beṅ' wlej Chioza' na' zoacheḅgake' nonṅilall'gake'ne' do yichj do lallgake'.

<sup>15</sup> Na' lekzka' wna anjla' nad':

—Yaoka' ble'ilo' gana' llia noolə wdana', zejin beṅ' zan inlleb, beṅ' za' yog' yell na' yog' nación, na' beṅ' chṅe wde wdeli dill'. <sup>16</sup> Na' bayixaa na' beṅ' wṅabia'ka' zaklebi lozba' shi gakzbangakile' nool wdana'. Na' gak-gake' txen ḅhoonlall'gake'ne' gal'yid gal'belee na' gao-gake' xpeleena', na' leyi wzeygake'ne' lo yi'na'.

<sup>17</sup> Chioza' ba bzoe' loo yichjlall'do'eka' daa cheenile' gongake', na' gakgake' toz we'gake' yeṅ' wṅabia' ḅe'ka' bayixaa na' yiyoll yido gak daa wna Chioza' gak. <sup>18</sup> Na' noola' ba ble'ilo', len' zaklebi yell daa le zeyi ḅheyin, yella' chṅabia' lao yog'loṅ beṅ' chṅabia' yell-lioni.

#### Kwiayi' yell Babilóniana'

**18** Ka biyoll ble'id' dga, na'ch ble'id' sto anjl chetje' yabana', na' nsa'chgue' yeṅ' wṅabia' xen inlleb, na' beeni' ḅe'na' bzeeni'n doxen yell-lioni. <sup>2</sup> Na' besyaadie' ne':

—ḅiḅa wlliyai' Babilóniana', yella' le wzeyi ḅheyi! ḅiḅa wlliyai'n! Ba biyakan lill xlatjə dii xiw'ka'. Ba biyakan ga lle' lla' chiya dii xiw' na' ga lle' lla' yog'loṅ ba chda xan yabana' ba nak zban, ba chpani beṅ'. <sup>3</sup> La' yella' wllie' beṅ'ka' zaklebi noola' chsolli beṅ' kwenḅe gonlen ljwellgake' bittez dii zbanka' cheeni beli chen ḅe'ka', daa wlooyel'gake' beṅ'ka' lle' yog' naciónka' len beṅ'ka' chṅabia' legake' kwenḅe gongake' dii malka' ben-gake'. Na' beṅ'ka' chit' chde lo yell-lioni biyakgake' beṅ' wni'a ni ḅe yella' daa chit' chdegake' diika' zeelo chibayi beṅ'ka' lle' na'.

<sup>4</sup> Na' benid' wṅe sto beṅ' yabana', ne':

—Li yichej yell Babilóniana', ka le' nakle lall' na', kwenḅe bi gonle txen saaxyaka' chongake', na' bi ile'ile' yeṅ' zak'zi'ka' ile'i beṅ'ka' lle' na'. <sup>5</sup> La' saaxyaka' chak yella' nakan dii zan inlleb, na' ngoo yichj Chioza' dii malka' chongake'. <sup>6</sup> Ka ba bsak'zi'gake' beṅ', ka'kzan sak'zi'gake'. Yeṅ' zak'zi' xench yen ile'gakile' aga ka daa ba bengakile' beṅ', axt ḅhoplə ka daa bḅhi' bsak'gake'



ben' yen ile'gakile'.<sup>7</sup> Ka to ba be'la'o kwingake' na' ka to ba biba bizakgakile' bengake' daa nazan chegake', ka'kzan illaglogaken' na' kwellyesh'gake' lao yel' zak'zi' che'ka'. La' loo yichjall'do'eka' nan: "Ni zoanto' ka ben' wñabia'. Bi naknto' ka ben' ba bzeb na' biga kwellyesh'nto'."<sup>8</sup> Na' daa nagake'ka', shllazə yen ile'gakile' yel' zak'zi'ki: balgake' guet, na' ben'ka' yigaañ kwellyesh'gake' na' ibiñ idongake', na' sheygake' lo yina', la' ben' yel' wak choo yel' wak xen nak Xancho Chioza', beena' ba bçhogloe' chegake'.

<sup>9</sup> Na' ben' wñabia'ka' lle' yell-lioni ben'ka' ben legake' txen bengake' yel' wdana' na' biba bizakgakile' lawi daa na beli chen che'ka', kwellyesh'gake' ni che yell Babilóniana' kat' ile'gakile' çhasan llenna' daa cheyan.

<sup>10</sup> Na' segake' zit'lə daa chllébgake' yel' zak'zi'na' chllaglo ben'ka' lle' na', na' inagake':

—Nyesh'laz inlleb chak çho', yell Babilonia, li' le zeyi çho' chñabi'o! La' tolbe' ba bla' yel' zak'zi' çho'ni.

<sup>11</sup> Na' ben'ka' chit' chde lo yell-lioni lekzka' kwelgake' na' gakyesh'gakile' ni cheyin, la' kochno zoa no si' diika' chit' chdegake',<sup>12</sup> diika' nak de or, de plat, yaj wan, perla, lech' shao' de lino na' de sed, lech' morad na' dii xñajil, na' biya yagla' dii chl'a' zix, no diika' chongakile' joshj lefantka' na' de yagla' diika' nak mbalaz inlleb, na'ch de ya, na' de yajes.<sup>13</sup> Na' lekzka' chit' chdegake' canel, clab piment, yal, set zix, nill' che yag dii chl'a' zix, vino, set, yezj widi, trigo, bayix' ba choa' yoa', xil', kabay na' karret daa chgoyogakb, ga biyollin axt chit' chdetegake' ben' gon xshin ben'.<sup>14</sup> Na' ye'gake' ben'ka' lle' yella':

—Bichbi yel' shao' cheleka' de, diika' bibaile. Ba binit yel' wni'a cheleka' na' bichga ile'ile' dii wen dii shao'ka'.

<sup>15</sup> Na' ben'ka' bet' bde chiya diika' bsa'gake' na' bni'agake' daa bet' bdegake'n yella', zit'lə segake' daa chllébgake' yel' zak'zi'na' chllaglo ben'ka' lle' na', na' kwellyesh'gake'.<sup>16</sup> Na' inagake':

—jNyesh'laz inlleb chak che yella' le wzeyi cheyi, gana' gokwgake' lech' shao'ka' nak de lino, na' lech' morad na' dii xñajil, daa da' or, perla na'ch yaj wan!

<sup>17</sup> jLa' tolbe' binit yel' wni'a cheyinna'!

Na' yog' ben'ka' chsa' barkwka', na' yog' ben'ka' choogake'n, na' ben'ka' chon llin loo barkwka', na' yog' ben'ka' chon llin lo nisdona' kwenche cheej chaogake', segake' zit'lə wwiagake'n.<sup>18</sup> Na' ka ile'gakile' chey yella' na' gosyaagake', inagake':

—jBichga zoa sto yell dii zaklebin yelli dga le zeyi cheyin!

<sup>19</sup> Na' yillee bishte yona' yichje'ka', leyi kwellyesh'gake', na' gosyaagake' inagake':

—jNyesh'laz inlleb chak che yelli dga le zeyi cheyin! Yog' ben'ka' wdalen barkwka' lo nisdona' bni'alengake' yel' shao' cheyinna'. jNa' tolbe' ba wlliyi'n!

<sup>20</sup> Ka le' lle'le yabana', le' nakle lall' na' Chioza', na' ka le' bselee we'le xtilleena', na' ka le' nakle ben' wdxjee daa wna Chioza' le', jYiba yizaki, la' Chioza' ba bizi'e wzonna' daa bçhi' bsak'gake' le'.

<sup>21</sup> Na'ch to anjl, ben' wal, bñise' to yaj xen inlleb na' bzañeen loo nisdona', na' chi'e:

—Kan' gak che yell Babilóniana' daa le zeyi cheyin, na' bichga lliia ile'i ben' len.<sup>22</sup> Bichga yeni ben' chsill-gake' árpana', ni ben' chkwel no bllej no trompet lawinna'. Ni bichga soa ben' wñan wde wdeli llin, ni bich gak sshag che yaj molinna'.<sup>23</sup> Bich bi beeni' che yi' kandil gat' lawinna', ni bich bi lñi che wishagna' gat' lawinna'. La' ben'ka' bet' bde bi de cheyin lawinna' gokgake' ben' choo ben' xen yell-lioni, na' ben' Babilóniaka' wxiye'lengake' yel' willa' che'ka' yog' ben' lle' yell-lioni.<sup>24</sup> Na' lawinna' betgake' ben'ka' wdxjee daa goll Chioza' legake' len ben'ka' nak lall' nee, na' ndob-gakile' yel' wit che yog' ben' ba betgake' doxen lo yell-lioni.

**19** Ka biyoll ble'id' diiki, benid' chosyaa ben' zan yabana', nagake':

jWe'la'ocho Chioza'!

Xancho Chioza', beena' chisla ben'ka' nonlijall'gake'ne',

chidolee sho'e balaan na' inabi'e toshiizi,

<sup>2</sup> jLa' len' chone' yel' joschis kon ka chiyal' gakan.

Ba bliiayee yella' daa le wzeyi cheyi.

Yelli zaklebin nool wdana' daa wlooyel'gake' ben' yell-liona' bengake' legake' txen bxinj blengake'.

Ba bizi'e wzon che ben'ka' nak lall' nee, ben'ka' betgake'.

<sup>3</sup> Na'ch wiznagake' sto shii:

—jWe'la'ocho Chioza'! Ba wlliyi' wlliyee yella' toshiizi.

<sup>4</sup> Na' ben'ka' tapichoa len ben'ka' zi tap, ben'ka' zoa xilin, bçhek' xibe'ka' na' yichje'ka' bllinan axt lo yona' be'la'ogake' Chioza', beena' lliia gana' chñabi'e. Na' nagake':

—Kan' nakan. We'la'ocho Chioza'.

<sup>5</sup> Na' gana' llie' chñabi'e benid' wñe to ben', na' ne':

Li we'la'o Chios chechona',

yog'lo-le le' nakle lall' nee na' chall chlléblene',

ka ben' zakii ka ben' bi zakii.

#### Yel' wishagna' che Beena' Zaklebi to Xil'do'

<sup>6</sup> Na' benid' shii ben' zan inlleb, na' nenan ka nen to yao xen daa chxop cho'a bnanja' na' ka ga chne to wziw' xen inlleb, nagake':

jWe'la'ocho Chioza'!

Xancho Chios, ben' yel' wak choo yel' wak xenna', ba wzoloe' chñabi'e.

<sup>7</sup> Yiba yizakicho dii xen wal na' koochone' balaan.

La' ba bllin lla wshagna' Beena' Zaklebi to Xil'do'.

Na' ben'ka' nonlijall' le' ba ze kwasgake' chbez-gake'ne' ka chon noola' llana' wshagnee.

<sup>8</sup> Na' ba bi'e twej xagake' de lech' shao' dii nxi nyech na' chep cheeni'n.

Na' lech' shawaa zaklebin dii wenka' bengake'.

<sup>9</sup> Na' wna anjla' nad':

—Bzej dga: "Chakomba ben'ka' gox wñab Jesucristona' soagake' kat' gak yel' wishagna'na'."

Na' wne':

—Diikin dill' jli che Chioza'.

<sup>10</sup> Na' bçhek' xibaa lao anjla' kwençhe nan we'lawaane', na' wne' nad':

—¡Bi gono' ka'! La' lekzka' wen llin çhe Chioza' nad', ka nako' li' na' ka bish' l'jwello'ka', beñ'ka' zoaçheçh-gake' çhajle'gake' çhe Jesúza'. ¡Be'la'o Chioza'!

La' beñ'ka' choe' dill' li çhe Jesúza', zoa Espíritu çhe Chioza' chzajniile' legake' kwençhe we'gake' xtilleena'.

### Beena' lliia koll' kabay llyisha'

<sup>11</sup> Na' ble'id' nyaljə yabana' na' bli'lao to kabay llyish. Na' beena' llie'b lie' Beñ' Chon Kon Ka Ne' na' Cho'e Dill' Li. Na' chçhogloe' çhe beñ' kon ka chido' gone' çhegake', na' chdi'l-lene' beñ'ka' chido' til-lene'.

<sup>12</sup> Jalawe'na' chzeeni'gakan ka be' yí', na' nllin yichje'na' dii zan corona. Na' da'n to lie' daa toze' le' nombi'e.

<sup>13</sup> Na' nakwe' to xe' dii nak ka dii wleej chen, na' lie' Cho'a Xtill' Chios. <sup>14</sup> Na' nçhi'e wen wdil' çhe'ka', beñ'ka' lle' yabana', na' nakwgake' lech' shao' daa nxi nyech, na' kabayka' lliagake' nakgakb ba llyish. <sup>15</sup> Na' chchej cho'ena' to spad dii nlatit kwençhe wlliyi'lene'n beñ'ka' lle' yell-lioni. Na' inçabi'e legake', na' bi si'xene' çhe nottez beñ' bi chzenag çhe'. Na' lo ye'l' chllaa çhe Chios, beñ' ye'l' wak choo ye'l' wak xenna', wsak'zi'e legake' gonile' legake' ka chon to beñ' chlej chshoshj uvana' kwençhe chzin. <sup>16</sup> Lee lechaa nakwe' ka do lee xichje'na' da'n lie'na', nan: "Beñ' zeelo nak Xan yog'lo' beñ', na' Beñ' l'jizelozi chñabia' lao yog'lo' beñ'."

<sup>17</sup> Na' ble'id' to anjl zie' lo wbilldo'na', na' chosyee, chi'e yog' baka' ze xan yabana':

—Li yidop yillag kwençhe yeej gaole to xshe' xen daa ba ben Chioza' çhele. <sup>18</sup> Na' gaole xpel' beñ' wñabia'ka', na' çhe beñ'ka' ngoo lall' na' wen wdil'ka', na' çhe beñ' walka', na' gaole xpel' kabayka' na' çhe beñ'ka' chbiab. Na' gaole xpel' yog'lo' beñ', ka beñ' ndoo lla yel chone' xshin beñ' ka beñ' chon llin çhekze', ka beñ' zakii ka beñ' bi zakii.

<sup>19</sup> Na' ble'id' bayixaa, bana' bchej loo nisdona' len beñ' wñabia'ka' chñabia' lo yell-lioni na' wen wdil' çhe'ka' bidop billaggake' kwençhe til-lengake' beena' lliia kabaya' na' wen wdil' çhe'ka'. <sup>20</sup> Na' beç'gake' bayixaa bchej loo nisdona' len bana' chyixjee xtil'ba', bana' ben chiya ye'l' wak gana' lliia bayixaa. Na' daa bem ka' wxiye'b beñ'ka' be' latj sho'gake' señ çhe bayixaa na' be'la'ogake' lwaa lsak'ba'. Na' shi'a shbangakb bzalee çhopteb lo yi'na' chal'niñ daa nçhiç azúfrena'. <sup>21</sup> Na' beñ'ka' len legakb, beti beena' lliia kabaya' legake' spad daa chchej cho'ena', na' yog'lo' baka' ze xan yabana' belj blla'gakib xpeleeka'.

### Wseje' dii xiwaa' to mil yiz

**20** Na' ble'id' to anjl chetje' yabana', na' noxee xi-nyaa çhe yecha' daa bi chiyoll chido nak zitj na' noxee sto gden xen. <sup>2</sup> Na' anjla' bçheje' bayix' xñana', bana' nak be' kani'teyi, leban dii xiwaa na' Satanáza', na' bçheje'n to mil yiz. <sup>3</sup> Na' bzaleen loo yecha' daa bi chiyoll chido nak zitj, na' bsejtipe'n kwençhe shejan to

mil yiz na' bich siye'n beñ' yell-lioka'. Ka yiyoll gak to mil yiz na' yiselle'n xtit.

<sup>4</sup> Na'ch ble'id' gana' lliia beñ'ka' gok lo na'gake' gongake' ye'l' josçhisa'. Na' lekzka' ble'id' beñ'ka' bçhoggake' yene'ka' ni çheyi daa be'gake' xtil' Jesúza' na' cho'a xtil' Chioza'. Legaken' bi be'la'ogake' bayixaa bchej loo nisdona' ni bi be'gake' latj ta' señ çheba' loxgue'ka' wa neeka'. Na' bibangake' sto shii na' wñabia'lengake' Crístona' to mil yiz. <sup>5</sup> Legaken' beñ' nechka' yiban ladj beñ' wetka'. Na' beñ' wetka' sto, ka biyollch bza' de to mil yiza' bibangake'. <sup>6</sup> Chakomba beñ'ka' yiban nech ladj beñ' wetka', la' beñ'kan' nak lall' na' Chioza'. Na' bi ile'gakile' ye'l' wit wchopina', san gaggake' bçoz çhe Chioza' na' çhe Crístona' na' inçabia'lengake'ne' to mil yiz.

<sup>7</sup> Kat' yiyoll iza' de to mil yiza', yiselle' Satanáza' gana' nçheje'n. <sup>8</sup> Na' tan siye'n beñ'ka' lle' tap laate yell-lioni, beñ'ka' zaklebgake' beñ'ka' lle' yellka' le Gog na' Magog, na' wtopan legake' kwençhe shajlengake'n lo wdil'a, na' gaggake' beñ' be beñ' zil ka yoxa' chi' cho'a nisdona'. <sup>9</sup> Na' blesh bcheengake' doxen lo yell-lioni na' wyeçhjgake' yella' daa le çhaki Chioza', gana' lle' beñ'ka' nak lall' nee, nan wlliyi'gake' legake'. Per Chioza' bletje' yi'na' xan yabana' bisya bislenan legake'. <sup>10</sup> Na' bzalee dii xiwaa, daa wxiye'n legake', lo yi' gabi'la' daa nçhiç azúfrena', gana' bzalee bayixaa bchej loo nisa' na' bana' wdixjeeb xtil'ba'. Nan' illaglogakan ye'l' zak'zi'na' ka tella ka wa' zejli kani'.

### Chioza' gone' ye'l' josçhis çhe beñ' wetka'

<sup>11</sup> Na' ble'id' gana' lliia Chioza' chñabi'e, nakan to dii llyish na' to dii xen. Na' lawe'na' binitlo yell-lioni len yabana', na' koch no ble'i legakan. <sup>12</sup> Na' ble'id' beñ' wetka', ka beñ' zakii na' ka beñ' bi zakii, zegake' lao Chioza' gana' llie' chñabi'e. Na' bsalje' librka', na'tech bsalje' sto libr yoblə gana' da' le beñ'ka' de ye'l' mban çheyin zejli kani'. Na' bene' ye'l' josçhis çhe beñ' wetka' kon ka choe' librka' dill' ben to toe'. <sup>13</sup> Na' biban yog' beñ'ka' wit loo nisdona', na' beñ' wetka' lle' latj çhe ye'l' wita' gana' le Hades, † na' yog'lo'gake' gok ye'l' josçhis çhe'ka' kon ka ben to toe'. <sup>14</sup> Na'ch lekzka' bzal' Chioza' ye'l' wita' na' latja' le Hades lo yi' gabi'la'. Na' lo yi' gabi'lan' nakan ye'l' wit wchopina'. <sup>15</sup> Na' bzalee lo yi' gabi'la' beñ'ka' bi da' lie'ka' lee libra' gana' da' le beñ'ka' de ye'l' mban çheyin zejli kani'.

### To yaba kob na' sto yell-lío kob

**21** Na'ch ble'id' to yaba kob na' sto yell-lío kob, la' yaba necha' na' yell-lío necha' binitlogakan na' lekzka' nisdona'. <sup>2</sup> Na' ble'id' yell çhe Chioza', yell koba' le Jerusalén chetjan yabana' gana' lliia Chioza'. Ba none'n xochi ka to noolə beñ' ba nakwe' xe'na' kwençhe wshagna'lene' beñ' çhe'na'. <sup>3</sup> Na' gana' lliia beena' chñabia', benid' wne to beñ' zillj inleeb, ne':  
—Chioza' ba zoe' ladj beñ' yell-lioka' ñaa. Na' soa-lene' legake', na' gaggake' yell çhe', na' kwín Chioza'

soalene' legake' na' we'la'ogake'ne'. <sup>4</sup> Na' gone' ka bich gat' daa gonyeshiin legake'. Bich bi yel' wit gat', ni kochno kwell, ni koch no gakyeshii, ni koch no shey la, la' ba wde che yog' diika' got' lo yell-lion necha'.

<sup>5</sup> Na' beena' lilia gana' chnabi'e wne' nad':

—Nadaan chikob' yog'lojte.

Na' lekzka' wne' nad':

—Bzej dill'ki, la' nakgakan dii li na' nakgakan dii gak wxenilall' ben'.

<sup>6</sup> Na' lekzka' wne' nad':

—Ba gok daa chiya' gak. Nadaan zaklebid' letr necha' le A † daa ba zoakz' ka wxw wzil yell-lioni, na' daa zoakz' kat' te cheyin zaklebid' letra' chiyollin daa le Z. †† Nad'kzan bxe bsil' yog'loj dii de, na' nad'kzan gon' ka te chegakin. Na' beena' chbilj, wi'ane' nis daa nsa' yel' mbanna' na' bibi sakile'n. <sup>7</sup> Beena' so saki soacheche' gonjilallee nad', gaki che' dii wen dii shao' daa ba wnia' gaki che', na' nad' gak Chios che' na' le' gake' bi' cha'. <sup>8</sup> San ka nak ben'ka' blleb gon nad' txe, na' ben'ka' bi wyajle' cha', na' ben'ka' chongake' daa chakzbanid', na' ben' wen xyaka', ben'ka' chnelen ljwellin, ben'ka' nlan yel' willa'na', ben'ka' choe'la'o yaj yagka', na' yog'loj ben' wxiye'ka', legaken' chido'gake' shajgake' lo yi' gabi'la' daa nchix azufrena', na' lennan' yel' wit wchopina'.

#### Yell Jerusalenna' daa nak dii kob

<sup>9</sup> Na' gana' zia' bid to anjl beena' len anjlka' gall, ben'ka' nox' gall kopka' nakgakan tolla' yel' zak'zi'ka' zeelo, na' wne' nad':

—Da, wliid' li' xool Beena' Zaklebi to Xil'do'.

<sup>10</sup> Na' Espiritu che Chioza' bene' kwenche wyaalen' anjla' to lo yaa xen na' dii sibə, na' bliile' nad' yell Jerusalenna' daa nak yell che Chioza', chetjan yabalə gana' zoe'. <sup>11</sup> Na' yella' chey cheeni'n daa yoon yel' chey cheeni' che Chioza', na' chna'titan ka to yaj wan daa zakii daa le jaspe, daa chep yes ka vidr. <sup>12</sup> To zee xen dii sibə nechjan yella' na' zoan shllin puert xen, na' to to cho'a puertka' ze twej anjl. Na' lekzka' to to lee puertka' lilia le tkwen dia che dii Israela'. <sup>13</sup> Na' tap laate zeena' nechj yella' zoan shon wej puertka'. <sup>14</sup> Loo len zee xenna' nechj yella' yoon shllin yaj, na' da'gakan le shllinte postl che Jesucristona', Beena' Zaklebi to Xil'do'.

<sup>15</sup> Na' anjl, beena' bshaljlene' nad', noxee to dii nak ka xis de or kwenche wchixile'n yella' len puertka' na'ch zee daa nechjan. <sup>16</sup> Na' yella' toz ka nakan de tonlə na'ch de zlag'lə. Na' bchix anjla' yella' na' nakan chopo mil chop guiyoa kilómetro, na' toz ka nakan ka de tonlə, ka de siblə, na'ch ka de zlag'lə. <sup>17</sup> Na'ch bchixe' zeena' na' chillan to guiyoa tapiyon lilit. ‡ Kon ka chchixə nottezə ben', ka'kzə bchix anjan'.

<sup>18</sup> Na' zeena' daa nechj yella' nakan de yaj wan daa le jaspe, na' yella' nakan de or dowalj daa chep yes ka vidr. <sup>19</sup> Na' yajka' yoo loo len zeena' nakan xochi, nakan

† Letr necha' le A: de dill' griegona' letri len alfa. †† Letra' chiyollin daa le Z: de dill' griegona' letri len omega. ‡ To guiyoa tapiyon lilit: nakan ka do guiyon gay' metr.

de biya yaj wan. Dii necha' nakan yaj wan daa le jaspe, de wchopina' nakan yaj wan daa le zafiro, de wyonina' nakan yaj wan daa le ágata, de wdapina' nakan yaj wan daa le esmeralda, <sup>20</sup> de gayi'na' nakan yaj wan daa le ónice, de wxopina' nakan yaj wan daa le cornalina, de gállina' nakan yaj wan daa le crisólito, de wxoni'na' nakan yaj wan daa le berilo, de gayina' nakan yaj wan daa le topacio, de shiyina' nakan yaj wan daa le criso-prasa, de shnejina' nakan yaj wan daa le jacinto, na'ch de shllinina' nakan yaj wan daa le amatista. <sup>21</sup> Na' puertka' shllin nakgakan shllin perla, to to puertka' nakan de toz perla. Na' nez daa chde yella' nakan de or dowalj daa chep yes ka vidr.

<sup>22</sup> Na' ni to yoodo' bi ble'id' yella', la' kwin Xancho Chioza', beena' nak liizeloz ben' yel' wak choo yel' wak xen, len Jesucristona', Beena' Zaklebi to Xil'do', zoa-gake' ladj ben'ka' lle' na'. <sup>23</sup> Na' yella' bi byalljin wbillan' ni beo'do'na' kwenche wzeeni'gakan lawinna', la' yel' chey cheeni' che Chioza' na' che Jesucristona', Beena' Zaklebi to Xil'do', chzeeni'n lawinna'. <sup>24</sup> Na' ben'ka' za' doxen lo yell-liona' soagake' lao beeni' che Chioza' de yella'. Na' ben'ka' chnabia' yell-lioni wsa'gake' yel' zakii che'ka' na' balaan che'ka' yella'. <sup>25</sup> Na' puertka' zoa yel-la' toshiizi iyaljgakan, la' bichbi wal' gat' na'. <sup>26</sup> Na' yisa'gake' yella' do ka nak balaan na' yel' zakii che naciónka'. <sup>27</sup> Na' biga sho' ni to dii nda' nchen dii mal, ni nottez ben' chon dii chakzbani Chioza', ni ben' chziye', san toz ben'ka' da' lie'ka' lee libr che Beena' Zaklebi to Xil'do', gana' da' le ben'ka' de yel' mban cheyin zejli kañi.

#### Yao daa nsa' yel' mbanna'

**22** Na' bli'yi anjla' nad' to yao dii nxi nyech yollan nis daa nsa' yel' mbanna', na' nakan nis xtil in-lleb ka'kzə vidr. Na' chchejan gana' lilia Chioza' chnabi'e len Jesucristona', Beena' Zaklebi to Xil'do', <sup>2</sup> na' chden gcho' neza' daa chde yella'. Na' chop laate cho'a yawa' zoa yagka' nsa' yel' mbanna', na' ze tbeo' wej chbiagakan dii zixka', na' shllin shii chbiagakan twiz. Na' xlaguiinka' nakgakan bell rmech che ben' yell-lioka'. <sup>3</sup> Na' bibi daa nashj bia' blag' cheyin gat'ch yella', la' nan' kwia Chioza' inabia'lene' Jesucristona', Beena' Zaklebi to Xil'do'. Na' yog' ben'ka' lle' na' we'la'ogake'ne'. <sup>4</sup> Na' ile'gakile'ne' kon ka nakyenee, na' ta' lie'na' loxgue'ka'. <sup>5</sup> Aga bich bi wal' gat', ni bich bi yi' kandil iyalljgakile' ni beeni' che wbilldo'na', la' beeni' che Xancho Chioza' wzeeni'n gana' soagake', na' inabia'gake' zejli kañi.

#### Ba zoa yila' Jesucristona'

<sup>6</sup> Na' wna anjla' nad':

—Dill'ki nakgakan dii li na' nakgakan dii gak wxenilall' ben'. Xancho Chioza', beena' chxo'a xtilleena' cho'a lol' ben'ka' chyixee daa chi'e legake', ba bselee nad' nak' anjl che' kwenche wliid' ben'ka' nak lall' nee daa ba zoa gaoshosh gak.

<sup>7</sup> —iBa zoa gaoshosh yiyed'!

Chakomba beena' ze wneyi dill'ki llia lee libri cheyi di-ika' ba wna Chioza' gak.

<sup>8</sup> Nad', Juan, ben ble'id' diiki. Na' ka biyoll ben ble'ida'n, b'chek' xib' nan we'lawaan anjla', beena' bli'yi nad' diika'. <sup>9</sup> Na' le' wne' nad':

—iBi gono' ka'! Nad' nak' wen llin che Chioza' ka li' na' ka bish' l'jwello'ka', be'ka' cho'e cho'a xtill' Chioza', na' ka yog' be'ka' zegake' kwent wneyi daa llia lee libri. Toz Chiozan' chiya' we'lawoo.

<sup>10</sup> Na' lekzka' wne' nad':

—Bi wkwashoo dga ba bzejo' lee libri, dga chyixje'n che diika' wna Chioza' gak, la' ba zoa gaoshosh gakan.

<sup>11</sup> Be' mala' shajlenshaze' dii mala' chone', na' beena' nda' nchen saaxyana' shajlenshaze' saaxya che'na'; na' be' wenna' soatezi soe' gone' wen, na' beena' nak lall' na' Chioza' soatezi soe' gonche' daa cheeni Chioza'.

<sup>12</sup> —iBa zoa gaoshosh yiyed'! Na' wi'a daa chido' to to be' kon ka nak daa ben to toe'. <sup>13</sup> Nadaan zaklebid' letr necha' le A † daa ba zoakz' ka wxw wzil yell-lioni, na' daa zoakz' kat' te cheyin zaklebid' letr' chiyollin daa le Z, †† Nad'kzan bxe bsil' yog'lo' dii de na' nad'kzan gon' ka te cheyin.

<sup>14</sup> Chakomba be'ka' ch'abgakile' nad' yixis yiyib' yich'jall'do'eka', kwenche idol'gake' gaogake' dii zixa' llia lo yaga' daa nsa' ye' mbanna', na' sho'gake' cho'a puert che yella'. <sup>15</sup> San bi gak sho' be' malka', be'ka'

† Letr necha' le A: de dill' griegona' letri len alfa. †† Letra' chiyollin daa le Z: de dill' griegona' letri len omega.

nlan ye' willa'na', be'ka' ch'elen l'jwellin, be' wen xyaka', be'ka' choe'la'o lwaa lsak' diika' non chios che-gake', na'ch yog' be'ka' chibayi siye'.

<sup>16</sup> Nad', Jesús, ba bselaa anjl cha'na' kwenche bzajni-ile' li' diiki ba bzejo' na' wi'on dill' lao be'ka' chdop chllag choe'la'ogake' nad'. Nad' nak' xii' dia che dii Davina', na' zaklebid' belj xsila' daa ch'atit.

<sup>17</sup> Na' Espíritu che Chioza', na' cho' zaklebid'cho noola' wshagna'lene' Jesucristona' daa non'jilall'chone', che'chone':

—iBida!

Na' beena' yeni dill'ki yeene':

—iBida!

Nottez' be' ch'bilj, wak yide' na' yeeje' nisa' daa nsa' ye' mbanna', na' aga bi sakile'n.

<sup>18</sup> Nad' chsi'nid' yog' be' yeni dill'ki llia lee libri cheyi diika' wna Chioza' gak: Shi no ch'xoatelə cheyin lo dill'ki, Chioza' wdie'ne' lao ye' zak'zi'ka' ba bzetje' lee libri. <sup>19</sup> Na' shi no yikwas ba' dill'ki llia lee libri cheyi di-ika' wna Chioza' gak, Chioza' bi wi'e latj gawe' dii zixa' llia yaga' daa nsa' ye' mbanna', ni bi wi'e latj sho'e yell che'na', diiki choe' libri dill' cheyin.

<sup>20</sup> Jesúsza', beena' bzajni' nad' diiki, ne':

—Dii li, ba zoa gaoshosh yiyed'.

Kan' nakan. iBidagach, Xan' Jesús!

<sup>21</sup> Na' ye' goklen che Xancho Jesucristona' soalensh-gan yog'lo'itele. Kan' gakan.